


Abi'uai Apa'uana  
Mahamahana



The New Testament in the Waima Language of Papua New Guinea

**'Abi'uai Apa'uana Mahamahana**  
**The New Testament in the Waima Language of Papua New Guinea**  
**Nupela Testamen long tokples Waima long Niugini**

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-09-20

---

PDF generated using Haiola and XeLaTeX on 7 Nov 2023 from source files dated 31 Aug 2023  
cec16783-6218-5812-9255-85478fb5e61c

## Contents

Puka Wairana . . . . .	1
Mataio . . . . .	3
Mareko . . . . .	44
Luka . . . . .	69
Ioane . . . . .	111
Iuhubeau Ekia Aka . . . . .	143
Roma . . . . .	184
1 Korinto . . . . .	203
2 Korinto . . . . .	222
Galatia . . . . .	234
Epeso . . . . .	241
Pilipo . . . . .	248
Kolose . . . . .	253
1 Tesalonika . . . . .	258
2 Tesalonika . . . . .	262
1 Timoteo . . . . .	265
2 Timoteo . . . . .	271
Tito . . . . .	275
Pilemona . . . . .	278
Heberu . . . . .	280
Iakobo . . . . .	295
1 Petero . . . . .	300
2 Petero . . . . .	306
1 Ioane . . . . .	310
2 Ioane . . . . .	315
3 Ioane . . . . .	316
Iuda . . . . .	317
Ibawaira Tinana . . . . .	319
'Abi Anikia . . . . .	343

## 'Abi'uai Apa'uana Mahamahana

The New Testament in the Waima Language, Central Province, PAPUA NEW GUINEA

The Bible Society of Papua New Guinea  
ISBN: 9980 63 939 3  
263P-2002—2,578 copies

### *Puka Wairana*

Puka neiana "Abi'uai Apa'uana Mahamahana" hanona Tirama ena 'abi aba wa'i baha 'akinai Auba Robe Tirama ena maearima ebaraonania ba tererena. Popounai tererena hanona Helene maeanai tererena ba muriai tea'i banaina maea haeai haeai ai tererena. Bariu neiana hanona aba ia'i banaina Waima maeanai. Waima maeani teona mai tehinana maearimania hanona ikoinai 12,000 'abana, ia hanona Bereina District ai temiaho, Central Province aonai.

2 Timoteo 3.16 ai Paulo e'abi etibaha,

"Puka Robena 'abikia ikoikiai hanona Tirama Aubana ena baraiarai ai tererenakia, ba ekia aka hanona teapa'ua ki'a baha, weiakiai 'abi tohana kahabamarere aina, katebaraona beronaka, katebaka'a beronaka, mai mauri berona kateba'iohinaka weianai kahamiaho. Ua buonai Puka robena 'abina kehore maearima Tirama ena aka tibabaina haukia keba'oru harainakia aka namokia ikoikiai katebabainakia."

Ai tanuatae Puka neiana kotuabi aonai, 'abi weiana "Tirama ena aka tibabaina haukia keba'oru harainakia aka namokia ikoikiai katebabainakia." hauna oi 'eumuai keao.

### *Puka Neiana Aonai*

Puka neiana hanona Iesu Keriso pouna namona. Kotuabina hanona ko'iohina, maearima hanona Tirama kipokia katebahamomo mue. Neiana hanona puka hamona, iamo Iesu ena iuhubeau haukia baika mai a'ikakauma haukia tehore puka haha tererenakia. Ua buonai puka neiana aonai hanona puka ikoinai harau rua 'abaihau hamomo (27) temiaho, ba aokiai hanona Tirama Nahuna Iesu Keriso robana teahuna. Ihau tabakiai puka neikia tererenakia hanona puka

ahakiai ai temiaho. Aotipa haukia tiraona Iesu eao kupa murinai hanona ena maearima tehore puka neikia tererenakia. Mareko ena rererere hanona emai 'uai ba murihaina hanona Ioane 'euna.

'Uainai maearima weiakia puka neiana 'abikia tererenakia hanona puka iro'ana bita mai paipana bita hanona a'i tererenakia, haeamona puka 'arana 'abikia papakia hanona a'i tererenakia. Bariumo muriai hanona maearima tehore puka iro'ana mai paipana bita hanona tererenakia haeamona puka 'arana 'abikia papakia abomo tererenakia ena poki hanona tuabi tuabi iba'aba'abana paunai.

Puka kori'uaikia bani aokiai puka 'arania 'abikia papakia baika ba'akiai hanona puka baika atakia haeamona iro'akia mai paipakia abomo tererenakia. Neiana anina hanona 'ori ihobona puka weiakia aokiai kotabu ahina. Puka ha ha ia'i ramanakiai hanona 'Puka aona irerena 'abina' tererenakia, weiakia hanona puka robakia teahunakia, mai ba'akiai hanona 'Puka paipana apa'uakia' tererenakia.

Pou namona tererena haukia ekia rererere aokiai hanona rani bo'ona puka 'ai'aina 'abikia baika abomo tererenakia. Ua buonai puka neiana aonai 'abi'abi uahomakia hanona papana tabairu totonakia aona tainai tarerenakia. Ua tarere aihonakia pokina hanona wai tuabi tuabi haumi katoihana hanona beronaimo kato'iohina, weiana hanona puka 'ai'aina 'abikia. Ihobona maearima ekia hui tererenakia haukia abomo papana tabairu totonakia aona tainai tarerenakia.

Puka paipana 'abikia baika hanona maka nahomakia [ ] aokiai tarerenakia, pokina 'abi weiakia hanona rererere 'uaikia aokiai a'i temiaho iamo bariumo muriai, ihau bo'ona aba teao aonai tererenakia. Abomo 'abi baika maka nahomakia ( ) aokiai hanona popounai Helene maeanai a'i tererenakia 'abikia iamo bariumo muriai ai kipomai tarerenakia pokina 'abi anina oi heremuai katabawaira tina haraina paunai.

Puka neiana murinai kapena aonai

hanona puka neiana aonai "Abi anikia'  
baika tarerenakia. Neiakia hanona Iuda  
maearimakia ekia hoahoa mai kupukia  
'aba'abakia ekia hoahoa weia ko'iohi  
harainakia obokia kobo paunai tarere-  
nakia.

Weiana murinai hanona "Abi ka-  
hatabu ahinakia 'ekakia' koihanakia.  
Weiana aonai hanona puka 'arana  
'abikia baik, ba 'ara 'abikia ha ha  
ba'akiai hanona puka baik atakia  
haeamona iro'akia mai paipakia abomo.  
Puka weiakia aokia koihanakia hanona  
barai barai 'abikia puka 'arana 'abina  
robana teahuna.

## Pou Namona MATAIO Ererena Hauna

### *Puka Aona Irerena 'Abina*

Pou namona nei ana aonai hanona Mataio netibaha, Iesu ehore Tirama ena 'abi'uai weiana aba 'uainai ena maearima Isaraela haukia herekia e babaina hauna ebatoha haraina, 'abi'uai weiana Tirama kehore hau ha keuhuna kemai maearima kebamaurinakia. Pou namona nei ana hanona Iuda haukia weiakia baiatakia Iesu emiaho haukia 'eukiai mo aha'i, ia hanopaka maikoina ekia pou namona.

Mataio hanona Iesu neia hanopakai emiaho aonai, herenai taba terama haukia ehina pou harainakia. Ena rama raninai eaomo teahu 'arina raninai, ba 'ariai emikiri mue mai ena maearima ehabonakia 'ubi eao.

Mataio taba apa'uana robaha eahuna hanona Tirama ena obia aiarana, weiana Iesu hanona pouna ehina haraina.

Puka nei ana iba'iohi paipana ima aonai, (1) Oeo ahanai bamarere 'abikia, weiakia Tirama ena obia aiarana aonai katemiaho haukia ekia hoahoa mai ekia babai (5–7); (2) Iesu i'abana haukia aka aeahomakia katebabainakia haukia robakia (10); (3) Tirama ena obia aiarana 'abikia iba-bataikia (13); (4) Weiakia i'abana haukia tohakia timarere haukia ekia hoahoa mai ekia babai aea katehoma (18); mai (5) Taba weiakia hanopaka puanai katerama haukia (24–25).

### *Puka Paipana Apa'uakia*

- a. Iesu Keriso ena kuputori mai ena rama (1:1–2:23)
- b. Ioane ba'uere robe hauna ena aka (3:1-12)
- c. Iesu ena 'uere robe mai baihobo (3:13–4:11)
- d. Iesu ena aka maearima herekia Galilea aonai (4:12–18:35)
- e. Galilea eaomo Ieruselema (19:1–20:34)
- f. Hui orena Ieruselema herenai mai aonai (21:1–27:66)
- g. Obiapaka ena mikiri mue mai ena waira tina (28:1-20)

### *Iesu Keriso Ena Rama Kupu Torina. (Lk 3.23-38)*

- 1 Iesu Keriso ena rama kupu torina Aberahamo mai Davida bibirakia emai.
- 2 Aberahamo ehore Isako ebaramana, Isako ehore Iakobo ebaramana, Iakobo ehore Iuda uaho'abana kipokia ebaramanakia.
- 3 Iuda ehore Perese mai Sera ebaramanania, hinakia hanona Tamar, Perese ehore Hesarona ebaramana, Hesarona ehore Ram ebaramana.
- 4 Ram ehore Aminadab ebaramana, Aminadab ehore Nasona ebaramana, Nasona ehore Salmon ebaramana.
- 5 Salmon ehore Boa ebaramana, hinana hanona Rahab rama haeai babi'ena. Boa ehore Obeda ebaramana, hinana hanona Ruta rama haeai babi'ena. Obeda ehore Iese ebaramana.
- 6 Iese ehore Obia 'arana Davida ebaramana. Davida ehore Solomon ebaramana, ia hinana hanona 'uainai Uria atawana.
- 7 Solomon ehore Rehoboam ebaramana, Rehoboam ehore Abia ebaramana, Abia ehore Asa ebaramana.
- 8 Asa ehore Iehosabat ebaramana, Iehosabat ehore Ioram ebaramana, Ioram ehore Usia ebaramana.
- 9 Usia ehore Iotam ebaramana, Iotam ehore Ahasa ebaramana, Ahasa ehore Hesehia ebaramana.
- 10 Hesehia ehore Manase ebaramana, Manase ehore Amon ebaramana, Amon ehore Iosia ebaramana.
- 11 Iosia ehore Iekonia mai uaho'abana ebaramanakia, rani weianai Babulono haukia tehore Isaraela haukia tea'inakia teoainakia ekia hanopakai.
- 12 Baika teoainakia Babulono murinai Iekonia ehore Sealtiel ebaramana, Sealtiel ehore Serubabel ebaramana.
- 13 Serubabel ehore Abiud ebaramana, Abiud ehore Eliakima ebaramana, Eliakima ehore Asoro ebaramana.
- 14 Asoro ehore Sadok ebaramana, Sadok ehore Akim ebaramana, Akim ehore Eliud ebaramana.
- 15 Eliud ehore Eleasara ebaramana, Eleasara ehore Matan ebaramana, Matan ehore Iakobo ebaramana.
- 16 Iakobo ehore Iosefa ebaramana.

\* 1:16: (16) 'Ao "Mesia"

Iosefa atawana Maria ehore Iesu ebaramana, maearima atana teaparina

Keriso\* bamauri hauna.

<sup>17</sup> Weiana Aberahamo ai eao Davida herenai hanona uru harau haea bani, Davida herenai eaomo teaoainakia Babulono raninai hanona uru harau haea bani, haeamona teaoainakia Babulono murinai eaomo Keriso herenai hanona uru harau haea bani.

*Iesu Keriso Ena Rama.*  
(Lk 2.1-7)

<sup>18</sup> Iesu Keriso aea erama aiho hauna pouna hanona neiana. Hinana Maria hanona te'abi'uai aina Iosefa keatawana. Ia a'i tebahamomo baha aonai e'jobina Auba Robe hiabunai miori ha ea'ina. <sup>19</sup> Iosefa hanona aka bero hauna, a'i enuatae Maria kebahaumaeana to'u wairakiai buonai, enuatae 'abi'uai weiana bunianai kea'i ki'ana. <sup>20</sup> Raona weiana niraonana aonai, Obiapaka ena Aneru nibiai herenai ewaira tina e'abi etibaha, "Iosefa Davida 'aba'abana e, Maria iatawana a'i kota'uaina, pokina Auba Robe hiabunai miori weiana ea'ina. <sup>21</sup> Ia hanona miori ha kebaramana, atana katoaparina Iesu, pokina ia hanona ena maearima ekia ki'ai kebamaurina." "

<sup>22</sup> Hoa neiana erama hanona Obiapaka ena mahabanai hauna herenai e'abi hauna nibatohana.

<sup>23</sup> "Uaho rari ha kepuma miori ha kebaramana, atana kateaparina Emanuela."

Isa 7.14

Anina hanona 'Tirama aika herekai'.

<sup>24</sup> Iosefa eno'a murinai, Obiapaka ena Aneru e'abi ihobona eabaina Maria eatawana. <sup>25</sup> Ia terarua a'i tenoti oioi 'apua eaomo Maria miori ebaramana. Iosefa miori atana eaparina Iesu.

## 2

*Aotipa Haukia Taetana Tainai Temai.*

<sup>1</sup> Heroda Obia 'arana Iuda eobia aina raninai, Iesu hanona Iuda aonai Betelehema erama. Rani weianai aotipa haukia taetana taina hanopaka haeai ai temai Ieruselema teao, <sup>2</sup> ba tebakai bakai tetibaha, "Iuda ekia Obia 'arana erama miorina hanona ae'eai? Ia ena bihiu taetana tainai taihana buonai tamai katakuti aina". <sup>3</sup> Heroda Obia 'arana 'abi weiana eona raninai nuana etae, mai Ieruselema

ai maearima ikoinai abomo nuakia etae. <sup>4</sup> Ia ehore Iuda ekia robe haukia apa'uakia mai rauhuhu poki haukia ikoikiai eaparinakia ebakainakia etibaha, "Keriso hanona ae'eai kerama?" <sup>5</sup> Ia ena 'abi tebaumena tetibaha, "Iuda Betelehema aonai. Mahabanai hauna na erere aihona.

<sup>6</sup> 'Oi Betelehema,

Iuda hanona aonai,  
Iuda teiha 'inina aiarakia  
baiatakiai oi hanona  
a'i oko'iko'i ki'a baha,  
pokina oi heremuai  
poki hauna ha kemai  
ia hanona e'u Isaraela  
maearimakia ke'uai ainakia  
mamoe i'imana hauna 'abana.' "

Mik 5.2

<sup>7</sup> Ua buonai Heroda aotipa haukia eapari buninakia ebakainakia ke'ioi haraina rani tabana tohanai hanona bihiu weiana ewaira tina. <sup>8</sup> Euhunakia kateao Betelehema e'abi etibaha, "Katoao miori 'oru'oruna weiana katotabu haraina. Katotabu ahina hanona katoba'jobina'u, ba au abomo kaeao ia kakuti aina."

<sup>9</sup> Aotipa haukia Heroda obia 'arana aiana teona murinai teka'a, taearai teao aonai bihiu weiana taetana tainai teihana hauna e'uai ainakia eaomo miori nemiaho 'ekana hanona e'oro. <sup>10</sup> Bihiu weiana teihana raninai aokia enamo banaina.

<sup>11</sup> Itu weiana aonai tetoto hanona miori hinana Maria ohi teihanakia ba tekaipehu miori tekuti aina. Murinai obia 'abana iberuberu bena tabakia gold, muramura timina orimona, mai muramura taburana hauani katetarona hauna tetara 'aunakia teberuberu bena. <sup>12</sup> Ba nibiai Tirama eharabunakia a'i katemue Heroda herena, weiana taeara haeai tekana temue teao ekia hanopaka.

*Iesu Te'uru aina Aikupito Teao.*

<sup>13</sup> Aotipa haukia teka'a murikiai Obiapaka ena aneru nibiai Iosefa herenai ewaira tina e'abi etibaha, "Momikiri miori hinana ohi moba ka'anakia mo'uru ainakia moao Aigupito. Weia katomiaho keaomo au kahina beni'o, pokina Heroda hanona aba miori ketabuna keahu 'arina." <sup>14</sup> Epua, Iosefa emikiri miori hinana ohi ebaka'anakia rabi weianai teka'a teao Aikupito, <sup>15</sup> weia temiaho keaomo Heroda ke'ari. Weiana Obiapaka ena mahabanai hauna pinanai ehinana hauna ibatohana,

“Au Aikupito ai  
Naha'u aparī ahina.”

Hos 11.1

<sup>16</sup> Heroda e'iohina aotipa haukia a'i katemue herena, weiana aona eopuere ki'a, aotipa haukia ebakainakia ranina eraonana ihobonai 'abi ebaibeni ena huari haukia Betelehema mai aiara herenai haukia aokiai miori ikoinai ihaukia rua mai ba'ai haukia teahu'arinakia. <sup>17</sup> Rani weianai mahabanai hauna Ieremia ehinana 'abina hanona etohana, <sup>18</sup> “Aia ha Rama ai teona hai mai aoko'o rarina 'akina, Rahela nahuna nihai ainakia, ia aona katebakirona hanona a'i nenuatae pokina ikoinai aba te'ari ore.”

Ier 31.15

### *Aikupitoai Temue aina Nasareta Teao.*

<sup>19</sup> Heroda e'ari murinai Aigupito ai Obi-apaka ena aneru Iosefa herenai nibiai ewaira tina, <sup>20</sup> e'abi etibaha, “Momikiri miori hinana ohi moba ka'anakia kato-mue Isaraela hanonai, weiakia miori kateahu 'arina haukia hanona aba te'ari”. <sup>21</sup> Ba Iosefa emikiri miori hinana ohi ebaka'anakia teao Isaraela.

<sup>22</sup> Ia Akelao hamana Heroda 'ekana ea'ina Iuda neiha 'inina 'uruna eona rani-nai, keao hanona eta'u. Ba nibiai ba'iohi ea'ina ekabanai eao Galilea. <sup>23</sup> Ia teao aiara ha atana Nasareta wa'a temiaho, weiana hanona mahabanai haukia tehinana 'abina etohana, 'Ia hanona kateaparina Nasareta hauna.’

## 3

### *Ba'uere robe Hauna Ioane Eiroro.* (Mk 1.28; Lk 3.1-18; Io 1.19-28)

<sup>1</sup> Rani weianai Ioane Ba'uere robe\* hauna ewaira tina Iuda hano'akunai ena iroro ea'i ramana etibaha, <sup>2</sup> “Emi ki'ai tomoraona kabe, pokina Tirama ena obia aiarana hanona aba ekaibari.” <sup>3</sup> Neiana hanona mahabanai hauna Isaia 'abina ehinana hauna etibaha, “Hau ha hano'akunai eio etibaha, 'Obiapaka ena taeara tomoba'oruna, Ena kaoao boana tomobaberona.’”

Isa 41.3

<sup>4</sup> Ioane ena habuni hanona mahi atana Kamela buirana tanatananai ebabaina, mai huana 'apana hanona poromakau paruaana ehaina, ena aniani hanona pekaupekau mai hoho beina. <sup>5</sup> Ierusalem maearimakia mai Iuda aonai aiara maikoina, haeamona Ioridana ate herenai aiara ikoinai haukia temai herena aiana kateona. <sup>6</sup> Ekia ki'a tehina pounakia, haeamona eba'uere robenakia Ioridana ate aonai.

<sup>7</sup> Ioane Parisea haukia mai Sadukea haukia bo'okia temai herenai keba'uere robenakia eihanakia raninai ehinabenakia etibaha, “Erau nahuna haumi e. Tai ehinabenimi puma weiana Tirama aba ketiuhina hauna herenai katobea pare? <sup>8</sup> Raonakabe buabuana tomobawaira tinana. <sup>9</sup> Aomia ai'ikiato'abi wai hanona Aberahamo 'aba'abana buonai puma weiana herenai katobea pare. Au wai nahinabenimi Tirama hanona mai hiabuna pihara neiakiai Aberahamo 'aba'abana kebabainakia! <sup>10</sup> Wapira hanona aba e'oru matiu pokinai, buabua namokia a'i tibaramanakia matiukia ikoinai hanona ke'uinakia iruba aonai kekapo totonakia.

<sup>11</sup> Au hanona beiai mo naba'uere robenimi emi raona kabe hoana, ia weiana muri'uai nimai hauna hanona Auba Robeai mai irubai keba'uere robenimi. Ia hanona epa'ua ki'a baha ba au, au a'i anamo ena tamaka kabuanakia. <sup>12</sup> Ena ikomo matiuna imanai ea'ina, ikomo 'ekana ea'i a'i haraina uho weiakia ikoinai kekomonakia paruakia keba'ehonakia, uho namokia ikoinai kebararonakia paraboa aonai kero'anakia, ia hamarakia hanona weiana a'i ni'ao 'apua irubana aonai kehuhu orenakia.”

### *Ioane Iesu Eba'uere Robena.* (Mk 1.9-11; Lk 3.21-22)

<sup>13</sup> Rani weianai Iesu hanona Galilea ai emai Ioridana atena Ioane herenai keba'uere robena. <sup>14</sup> Ia Ioane ebaoao etibaha, “Oi au poba'uere robena'u hanona penamo. Iamo omai au here'u.” <sup>15</sup> Iesu Ioane ena 'abi ebamuena etibaha, “Bariu hanona neiana oi kobabaina. Aka neianai Tirama ena bero akakia ikoikia kahabatohanakia.” Ba Ioane ehore Iesu eba'uere robena.

\* 3:1: (1) Baptiso



16 Iesu e'uere robe murinai, beronai beiai ekara'au aonai kupa ekaikau Tirama ena Auba eriri emai ahanai matoha rauria eriri 'abana eihana. 17 Ba aia ha Kupai emai e'abi etibaha, "Neiana hanona au Naha'u tohana, E'u raona'au. Au hanona ia naonamo aina."

#### 4

##### *Tiaporo Ehore Iesu Ehobona.* (Mk 1.12-13; Lk 4.1-13)

1 Weiana Auba Robe ehore Iesu eaoaina hano'akunai tiaporo\* kehore kehobona. 2 Iesu wapu ikoinai bariabui erobe aniani ha a'i eani, murinai hanona mare'a e'ari ki'a. 3 Aonai baihobo hauna emai herena e'abi etibaha, "Peoi Tirama nahuna raninai, pihara neiakia mohina benakia pohamai temeao." 4 Ia Iesu e'abi etibaha, "Puka robenai aba tererena, 'Maearima hanona pohamai mo a'i katemaui, ia Tirama ena 'abi ehina haukia ikoinai katea'inakia hanona katemaui.' "

5 Weiana tiaporo ehore Iesu eaoaina Ierusalem aiaara robena, Marea robe 'ubina 'akinai ebakori 'auna, 6 ba ehinabena etibaha, "Peoi Tirama nahuna raninai, kipomu naia morobo ahi. Pokina Puka robenai aba tererena, 'Tirama ena aneru kehina benakia kate'imani'o imakiai katea'i taeani'o, weiana pihara aemu a'i mokaina ta'una.' "

Sal 91.11, 12

7 Iesu ia ena 'abi ehamuena etibaha, "Puka robenai abomo na terere aihona, 'Obiapaka emu Tirama baihobo 'ekanai a'i kohorotina.' "

8 Haeamona tiaporo ehore Iesu eaoaina 'ubi 'akina kobiona kaipanai ebaehe 'auna, ba hanopaka aiarakia maikoina nuabina ebaihana. 9 Tiaporo e'abi etibaha, "Kokaipehu kokuti aina'u raninai, neiakia maikoinai oi kabeni'o." 10 Iesu haeamona e'abi etibaha, "Satani e, mokatu'a! Puka robenai na terere aihona, 'Obiapaka emu Tirama iamokupaiana kokuti aina, mai ta'arana koa'i.' "

\* 4:1: (1) *Satani* † 4:17: (17) *Basileia*

11 Weiana tiaporo Iesu herenai ekaobo, ba aneru temai tebaraina.

##### *Iesu Ena Aka Ea'i Ramana Galileai.* (Mk 1.14-15; Lk 4.14-15)

12 Iesu Ioane aba wapura itunai tehrotina pouna eona raninai emue eao Galilea hanonai. 13 Weia Nasareta aiarana a'i emiaho, ia eao Sebulon mai Napatali hanokiai Galilea obu haianai aiara ha atana Kaperanauma ua'a emiaho. 14 Neiana erama hanona Isaia mahabanai hauna e'abi hanona kebatohana etibaha, 15 "Sebulon hanonai mai Napatali hanonai, obu haianai, Ioridana ate abihanai, Galilea rama haeai haukia ekia hano ai! 16 Maearima weiakia wapurai temiaho haukia ea rarina 'akina kateihana. Weiakia 'ari aiaiakia hanokiai temiaho haukia herekiai ea kerara."

Isa 9.1, 2

17 Rani weianai Iesu ena iroro ea'i ramana etibaha, "Emi ki'ai tomoraona kabe, pokina Tirama ena obia aiarana† hanona aba ekaibari!"

##### *Iesu Ba'eha Haukia Bani Eaparinakia.* (Mk 1.16-20; Lk 5.1-11)

18 Iesu Galilea 'obu poena haiana ekana eao aonai, a'a hati rua Simona, teaparina Petero, uaho 'abana Anderea ohi eihanakia ekia re'e 'obu aonai tehorenakia, pokina ia hanona ba'eha haukia. 19 Iesu ehina benakia etibaha, "Muri'uai tomai. Au kahore maearima iba'eha benikia haumiai kabaonimi." 20 Beronai ekia re'e tehaborakia murinai teao.

21 Eka'a haha eao hanona a'a hati rua Iakobo mai Ioane hamakia Sebedeo kipokia ekia ahi ahanai ekia re'e tياهو abunakia eihanakia ba eaparinakia. 22 Beronai ekia ahi mai hamakia tehaborakia Iesu murinai teao.

##### *Iesu Eiroro mai Inawa Ebanamonakia.* (Lk 6.17-19)

23 Iesu Galilea hanona maikoina aona ekana, Iuda haukia ekia marea aokiai eba'iobi, Tirama ena obia aiarana pouna namona eiroro aina, mai maearima ekia

inawa haeai haeai mai hau haiara haeai haeai ikoinai ebanamonakia. <sup>24</sup> Suria hanopakana maikoina aonai pouna erama otaraina, weiana maearima tehore inawa haeai haeai haukia temaiainakia Iesu herena, hau haiara haeai haeai haukia, aokiai auba ki'a obokia haukia, nawa ti'ari aina haukia, mai 'ome haukia. Ia ehore ikoinai ebanamonakia. <sup>25</sup> To'u rarina 'akina Galileai mai weiakia Aiara Harauhaei, Ierusalem mai Iudai, Ioridana atena abiranai hanokia maearimakia Iesu murinai teka'a.

## 5

### *Iroro Oeo 'Ubinai Hauna.* (Lk 6.20-23)

<sup>1</sup> Iesu mako eihanakia raninai oeoai ekara'au weia emiati. I'abana haukia temai herena, <sup>2</sup> weia ena ba'iobi ea'i ramana, ehina benakia etibaha,

<sup>3</sup> "Aokia te'aiaunu haukia hanona tenamo, pokina Tirama ena obia aiarana hanona ia 'eukia.

<sup>4</sup> Tihai hai haukia hanona tenamo, pokina Tirama aokia kebataburanakia.

<sup>5</sup> Mamata haukia hanona tenamo, pokina hano e'abi'uai aina hauna katea'ina.

<sup>6</sup> Aka berona timare'a aina mai ti'ako 'ororo aina haukia hanona tenamo, pokina Tirama kehore ekia raona kebabonunakia.

<sup>7</sup> Maearima tiaoko'o ainakia haukia hanona tenamo, pokina ia abokiamo Tirama keaoko'o ainakia.

<sup>8</sup> Aokia timahamaha haukia hanona tenamo, pokina ia hanona Tirama kateihana.

<sup>9</sup> Baibua akana tibabaina haukia hanona tenamo, pokina Tirama kehore nahunai kebaonakia.

<sup>10</sup> Aka berona tibabaina paunai ti'oatanakia haukia hanona tenamo, pokina Tirama ena obia aiarana hanona ia 'eukia.

<sup>11</sup> Au muri'uai tuka'a paunai maearima kateiahunimi

mai kate'oatanimi, bai'oi 'abikia ki'a obokia haeai haeai heremai katehina hanona tonamo.

<sup>12</sup> Aomi kenamo mai katoaonamo, pokina kupai hana 'arami rarina. 'Uainai mahabanai haukia temiaho raninai na te'oata aihonakia.

### *Hanopaka Kikimaruna mai Hanopaka Eana.*

(Mk 9.50; Lk 14.34-35)

<sup>13</sup> Wai hanona maearima ekia kikimaru. Ia kikimaru ena 'aku'aku ke'akauma raninai, aea keiba'aku'aku mue aiho? Taba baika herekiai ena aka aha'i buonai, kahane'e ahina maearima ahanai kate'ehe hai 'ehe haina.

<sup>14</sup> Wai hanona maearima ekia ea. Aiara oeo 'ubinai tebabaina hauna hanona kebuni a'i ketaina. <sup>15</sup> Hau ha ramepa keba'arana raninai uro ba'anai a'i kehorotina. Ia ihao'auna 'ekanai kehao'auna, ba maearima ikoinai itu aonai haukia ea kebenakia. <sup>16</sup> Taeara neiana ihobonai, emi ea maearima wairakiai tomobawaira tinana, weiana aka namokia tubabai hanona temeiha Hamami kupai hauna temebanamona.

### *Iesu Mose Ena Rauhuhu 'Abikia Kebotohanakia.*

<sup>17</sup> Na a'i katoraona aiho au amai hanona Mose ena Rauhuhu mai mahabanai haukia ekia ba'iobi ka'i parenakia paunai. Au amai hanona a'i ka'i parenakia, ia ekia ba'iobi kabatohanakia. <sup>18</sup> 'Abi tohana au wai nahinabenimi, hanopaka mai kupa katepua, ia rererere puapuana 'aki ha 'ao 'abi papana 'aki ha rauhuhu aonai a'i ke'akauma keao mo taba ikoinai katerama ore. <sup>19</sup> Weiana buonai hau ha rauhuhu papana 'aki a'i nika'aina ba maearima baika ba'iobi weiana ihobona kebenakia hanona Tirama ena obia aiaranai ia hanona ke'aera 'aera 'aki. Ia tai rauhuhu nika'ai haraina mai ba'iobi weiana ihobona nibenakia hanona Tirama ena obia aiaranai ia hanona keapa'ua. <sup>20</sup> Au wai nahinabenimi, wai emi bero akakia katehore weiakia Parisea haukia mai rauhuhu poki haukia ekia bero akakia a'i katetara haonakia raninai Tirama ena obia aiaranai a'i katokatoto 'apua.

*Uaho'abami Kipokia Kato'abi Oioi.*  
(Lk 12.57-59)

<sup>21</sup> 'Uainai 'aba'abami herekiai tehinana 'abina aba tona. "A'i koahuahu, ia hau ha keahuahu hauna hanona bakai 'ekanai kehoroti." <sup>22</sup> Ia bariu au nahinabenimi. Hau ha uaho'abana niopuereaina hanona kateaoaina bakai 'ekana. Haeamona hau ha uaho'abana po'ona kehinana hanona kateaoaina bakai apa'uana te'imana haukia herekia. Ia hau ha uaho'abana kehinabena ketibaha, "Ao 'abaea tohamu." hanona kateaoaina 'eka ki'a obona iruba a'i ni'ao 'apua 'ekana.

<sup>23</sup> Weiana paunai emu ibeni tabana itara robena ahanai nubaibeni aonai uaho'abamu herenai emu beho ha nemi-aho hauna oraona tinana raninai, <sup>24</sup> emu ibeni tabana weia itara robena wairanai kohabona. Koao 'uai uaho'abamu herenai torarua kato'abi oioi, ba komue emu ibeni tabana kobaibeni.

<sup>25</sup> Hau ha oi beho 'ekanai ehorotini'o hauna bariu torarua bakai 'ekana tuao aonai moba'amena beho weiana tomob-also biaina, ba bakai wairanai kokoroti. Weiana a'i kobabaina raninai, oi ni'oatani'o hauna bakai ne'imana hauna imanai keutani'o, bakai ne'imana hauna habuni hauna imanai keutani'o, ba oi hanona wapura 'ekanai kate horotini'o. <sup>26</sup> 'Abi tohana au nahina beni'o, oi hanona a'i kokarahi 'apua keaomo emu beho 'arana pene orena kobaibeni.

### *A'i Konabau Ki'a.*

<sup>27</sup> Wai 'abi 'uruna aba tona na e'abi aiho, 'Oi hau ha atawana a'i konabau aina.' <sup>28</sup> Ia au wai nahina benimi hau ha babi'e neihaana ba niraona ki'a hanona aonai aba nabau hoana ebabaina ia herenai.

<sup>29</sup> Mahamu itipana ki'ai nihorotini'o raninai, ko'ipa ahina kone'ena. Hauanimu puana ke'akauma hanona enamo ba haumu maikoina iruba a'i ni'ao 'apua 'ekana aonai a'i mekapo totoni'o marikina. <sup>30</sup> Mai imamu itipana ki'ai nihorotini'o raninai, kokabe hurina kone'ena. Haumu puana hamona ke'akauma hanona enamo ba haumu maikoina iruba a'i ni'ao 'apua 'ekana aonai a'i mekapo totoni'o marikina.

### *Atawana A'i Kebakarahina.*

*(Mt 19.9; Mk 10.11-12; Lk 16.18)*

<sup>31</sup> Abomo na e'abi aiho, 'Hau ha atawana nibakarahina raninai bakarahi marerena

ha kererena kebena.' <sup>32</sup> Ia au wai nahinabenimi, hau ha atawana a'i nimaha porepore ia nibakarahi 'abaeana hanona ena behoai atawana nabau 'ekanai ehorotina, mai hau ha kehore tebakarahina babi'ena weiana keatawana hanona ia abomo nabau hoana ebabaina.

### *'Abi'uai Pahihina A'i Katobabaina.*

<sup>33</sup> Haeamona 'uainai 'aba'abami herekiai tehinana 'abina aba tona, 'Emi 'abi'uai hanona a'i katokabena. Ia emi 'abi'uai pahihina Obiapaka herenai hanona katobabaina.' <sup>34</sup> Ia au wai nahinabenimi. 'Abi'uai pahihina a'i katobabaina. Kupa ahanai 'abi'uai pahihina a'i katohinana, pokina ia hanona Tirama ena imia'au. <sup>35</sup> 'Ao hanopaka ahanai 'abi'uai pahihina a'i katohinana, pokina ia hanona Tirama 'apuna ihorotina 'ekana, 'ao Ierusalem ahanai 'abi'uai pahihina a'i katohinana, pokina ia hanona Obia 'arana apa'uana ena aiara. <sup>36</sup> Mai oi 'aramu ahanai 'abi'uai pahihina a'i kohinana, pokina oi buimu ha hamona kobaporena 'ao koba'umuna hanona a'i o'iohina. <sup>37</sup> Oi mo emu 'abi, 'E re'a 'E, 'ao Aha'i re'a Aha'i. Taba neiakia waira 'akinai nohinanakia hanona hau ki'a obona herenai timai.

### *Ki'a 'Arana A'i Kobamuena.*

*(Lk 6.29-30)*

<sup>38</sup> Wai 'abi neiana aba tona e'abi etibaha, 'Maha 'arana hanona maha, mai nihe 'arana hanona nihe.' <sup>39</sup> Ia au wai nahinabenimi, maearima ena ki'a 'arana hanona a'i kobamuena. Hau ha mekemu itipana kebo'ana raninai, koke'e banai awarimu abomo kobena. <sup>40</sup> Hau ha nenuatae emu ibatoto kea'ina paunai bakai 'ekanai kehorotini'o raninai, emu iro'abu abomo kobena. <sup>41</sup> Hau ha kebahi ahini'o maela hamona koka'aina raninai, torarua maela rua katoka'aina. <sup>42</sup> Maearima tinoini'o tabana hanona kobenakia, mai heremuai taba ha nenuatae aina kea'i 'abaeana hanona a'i koubo aina.

### *'Ou Haukia Katoraona'au ainakia.*

*(Lk 6.27-28, 32-36)*

<sup>43</sup> Wai 'abi 'uruna aba tona na e'abi aiho, 'Heremiai haukia katoraona'au ainakia mai emi 'ou haukia katabaki'anakia.' <sup>44</sup> Ia au wai nahinabenimi, emi 'ou haukia katoraona'au ainakia mai weiakia ti'oatanimi haukia paukiai kato bahuba'ari. <sup>45</sup> Weianai wai hanona

Hamami kupai hauna nahunai katoao. Ia ena beraura ihobonai mo nibararana ki'a haukia mai namo haukia herekiai, mai abara ihobona mo nibatibona babai bero haukia mai babai ki'a haukia herekiai. <sup>46</sup> Wai maearima weiakia tiraona'au ainimi haukia mo turaona'au ainakia raninai 'arami hanona taba katoa'ina? Moni bararo haukia abomo ua tibabai aiho. <sup>47</sup> Wai uaho'abami mo tubaonakia raninai, emi namo hanona taba maearima baika herekiai? A'i tia'ikakauma haukia abomo ua tibabai aiho. <sup>48</sup> Ua buonai wai katobero harai ihobona Hamami kupai nemiaho hauna ebero harai 'abana."

## 6

### *Maearima Ibaraikia Hoahoana.*

<sup>1</sup> "Kato'ima'ima harainimi, emi bero akakia maearima wairakiai a'i katobabai, a'i temeihanimi marikina. Ua katobabai aihona raninai wai hanona 'arami aha'i Hamami kupai hauna herenai.

<sup>2</sup> Weiana buonai baraibarai tabana uraru hauna kobena raninai, maearima wairakiai a'i koapa, ihobona bahaorea haukia marea aokiai mai aiara ibuakiai tibabaina 'abana maearima banamo ia katebenakia paunai. 'Abi tohana au wai nahinabenimi, ia hanona 'arabia maikoina aba tea'ina. <sup>3</sup> Ia wai uraru haukia tubarainakia raninai, imamu awarina hauna a'i ke'iohina imamu itipana hanona taba nibabaina. <sup>4</sup> Weiana emu baibeni hanona aomuai kobunina. Ba Hamamu taba bunianai tirama nei-hanakia hauna oi 'aramu kebeni'o.

### *Bahuba'ari Hoana.* (Lk 11.2-4)

<sup>5</sup> Wai katobahuba'ari raninai bahaorea haukia 'abakiai a'i katoao. Ia ekia nuatae apa'uana hanona marea aokiai mai aiara ibuakiai katekoroti katebahuba'ari maearima ia kateihanakia paunai. 'Abi tohana au wai nahinabenimi, 'arabia maikoina aba tea'ina. <sup>6</sup> Ia kobahuba'ari raninai, emu ikaihuri aonai kokatoto ba emu pa'abi kokaiabuna kobahuba'ari Hamamu a'i noihana hauna herenai. Hamamu taba bunianai tirama neiha hauna 'aramu kebeni'o.

<sup>7</sup> Tubahuba'ari aonai 'abi anikia ha'i haukia bo'ona a'i katohina matoha rama haeai haukia tibabaina 'abana. Tiraonana ekia bahuba'ari nihoma'a hanona Tirama

aiakia aba niona. <sup>8</sup> Ia 'abakiai a'i katoao. Wai Hamami a'i tunoi bahana aonai aba e'iohina wai taba tonuatae aina.

### *Bahuba'ari Obiapaka Eba'iohinaka Hauna.*

<sup>9</sup> Wai hanona na katobahuba'ari aiho. 'Hamamai e, kupai nomiaho.

Oi atamu hanona katabarobena.

<sup>10</sup> Emu obia aiarana kemai, ikoimaiai emu nuatae katababaina hanopakai, ihobona kupai tibabaina 'abana.

<sup>11</sup> Bariu rani neianai aniani tanuatae aina hauna kobenamai.

<sup>12</sup> Emai ki'a tababai haukia mohina hao,

ihobona weiakia heremaiai tebabai ki'a haukia ekia ki'a tahina hao 'abana.

<sup>13</sup> A'i koaoainamai baihobo 'ekakiai, ia tiaporo herenai kobamaurinamai.

(Kupa aiarana oi 'eumu, Hiabu oi 'eumu, Nuabi oi 'eumu,

keamoto banai banai. Amen.)\*

<sup>14</sup> Maearima weiakia heremai tebabai ki'a haukia ekia ki'a katohina haonakia raninai, Hamami kupai hauna emi ki'a abomo kehina haonakia. <sup>15</sup> Ia wai maearima ekia ki'a a'i katohina haonakia raninai, Hamami kupai nemiaho hauna abomo emi ki'a a'i kehina haonakia.

### *Ani Robe Hoahoana.*

<sup>16</sup> Wai tuanirobe raninai wairami a'i katobabira biranakia matoha bahaorea haukia 'abakia. Ihakia tibamaea maeanakia maearima ikoinai kateihanakia kate'iohina ia hanona tianirobe. 'Abi tohana au wai nahina benimi, 'arabia maikoina aba tea'ina. <sup>17</sup> Ia oi koanirobe raninai, wairamu koutu mai 'aramu tehoroi koutuna. <sup>18</sup> Weiana maearima a'i kate'iohina oi hanona nuanirobe, iamo Hamaka a'i nahaihana hauna mo ke'iohina. Ba Hamamu taba bunianai tirama neihanakia hauna kehore 'aramu kebeni'o.

### *Kepu Kupai Katoro'anakia.* (Lk 12.33-34)

<sup>19</sup> Emi kepu hanopakai a'i katoro'anakia, weiana muhi mai 'abi'abi katehore katea'i ki'anakia, mai bainao haukia katehore itu kateahu pa'ana katebainao ainakia. <sup>20</sup> Ia emi kepu

\* **6:13:** (13) Puka baika aokiai ( ) 'abina aha'i.



kupai katoro'anakia, weia hanona muhi mai 'abi'abi a'i katea'i ki'anakia, mai bainao haukia itu a'i kateahu pa'ana a'i katebainao ainakia. <sup>21</sup> Weiana oi emu kepu 'eka tabanai hanona aomu abomo weia.

*Hauani Ena Ramepa.*  
(Lk 11.34-36)

<sup>22</sup> Maha hanona hauani ena ramepa, oi mahamu tenamo raninai hauanimu maikoina hanona ea aonai. <sup>23</sup> Ia mahamu kateki'a raninai hauanimu maikoina hanona wapura aonai. Ba oi aomu eana niwapura raninai wapura weiana hanona keapa'ua wairai.

*Poki Haukia Rua Ta'arakia A'i Koa'i.*  
(Lk 16.13)

<sup>24</sup> Hau ha poki haukia rua rani hamonai ta'arakia a'i kea'i. Ia hamona 'arina a'i ke'ari mai ha keraona'au aina, 'ao hamona aiana keona mai ha kebaki'ana. Wai Tirama mai kepu terarua rani hamonai ta'arakia a'i katoa'i.

*Aomi A'i Katearo'ari.*  
(Lk 12.22-31)

<sup>25</sup> Weiana buonai au wai nahinabenimi. Aomi a'i katearo'ari, taba patoana 'ao taba patoinu emi mauri paunai, 'ao hauanimiai taba patobatotona hauna a'i katoraonana. Mauri hanona eapa'ua ki'a baha ba pohama, mai hauanimu hanona eapa'ua ki'a baha ba habuni. <sup>26</sup> Roborobo tirobo tomoihanakia. Ia uho a'i tibato, a'i tieueu mai rerea a'i tihoroti, ia Hamami kupai hauna ne'ima harainakia. Ia wai hanona tonamo ki'a baha ba roborobo. <sup>27</sup> Oi tai ha emu ao aro'ari kehore emu mauriai pomiaho homa'a 'apuana?

<sup>28</sup> Mai taba buonai aomi niaro'ari habuni herenai? Hoeahoea arabu haianai aea ti'omu aiho katoihanakia. Ia a'i tiaro'ari 'ao kipokia habunikia a'i tibabai. <sup>29</sup> Ia au wai nahinabenimi, Solomon ena nuabiai habuni namona ebatotona, iamo taitai neiakia hanona tenamo ki'a baha. <sup>30</sup> Weiana arabu tubukia bariu titaitai mara aba kate'ororo iruba aonai katekapo totonakia kate'ara haukia habunikia Tirama nihore na nibabatoto aihonakia raninai, wai emi habuni ua a'i kebabatoto aihonimi, u? Emi a'ikakauma teko'iko'i haumi. <sup>31</sup> Ua buonai aomi a'i katearo'ari, a'i kato'abi, "Aika taba kahana?" 'ao "Aika

taba kahainu?" 'ao "Aika taba kahabatotona?" <sup>32</sup> Weiana rama haeai haukia taba nahomakia ikoinai titabunakia, ia wai Hamami kupai aba e'iohina taba neiakia tonuatae ainakia. <sup>33</sup> Wai hanona Tirama ena obia aiarana mai ena nuatae akana berona katotabu 'uaina, ba taba nahomakia ikoinai hanona wai kebenimi. <sup>34</sup> Weiana paunai aomu a'i kearo'ari mara 'eunai. Mara hanona kipona ena ao aro'ari. Wapu ha ha ekia aro'ari hanona kipokia 'eukia."

## 7

*Beho 'Ekanai A'i Katohorotinakia.*  
(Lk 6.37-38, 41-42)

<sup>1</sup> "Baika beho 'ekana'i a'i katohorotinakia pokina Tirama wai beho 'ekana'i a'i mehorotini. <sup>2</sup> Weiana wai baika behoai tuhorotinakia taeara ihobonai Tirama kehore wai behoai kehorotini. Mai wai emi babai baika herekiai ihobokiai Tirama kehore heremiai kebabai. <sup>3</sup> Taba buonai uaho'abamu mahana aonai matiu nabunabuna noihana, iamo oi kipomu mahamu aonai matiu rarina robana a'i nuahuna? <sup>4</sup> Aehoma buonai oi uaho'abamu nohinabena, "Mahamu aonai matiu nabunabuna ma'i ahina"? Ia oi hanona mahamu aonai matiu rarina nemiaho. <sup>5</sup> Oi bahaorea haumu! Kipomu mahamu aonai matiu rarina moa'i ahi 'uaina, ba koihaiha harai uaho'abamu mahana aonai matiu nabunabuna koa'i ahina.

<sup>6</sup> Robe tabana waeha a'i katobenakia, katekabe a'i teme 'urinimi marikina. Emi mairi a'i katokapo ahinakia aiporo wairakiai. Aekiai a'i teme'ehe banai 'ehe banaina marikina.

*Katonoi, Katotabuna, Katoharahara.*  
(Lk 11.9-13)

<sup>7</sup> Katonoi hanona kebenimi, katotabuna hanona katotabu ahina, katoharahara hanona pa'abimi kekaikauna. <sup>8</sup> Weiana maearima ha ha tinoinoi hanona katea'inakia, tabu tabu haukia hanona katetabu ahina, mai harahara haukia hanona pa'abikia kekaikauna.

<sup>9</sup> Oi hau tabamu, nahumu pohama penoi aina raninai pihara pobena, u? <sup>10</sup> 'Ao maia penoi aina raninai 'erau pobena, u? <sup>11</sup> Wai ki'a haumi, iamo nahumi taba namokia katobenakia hanona to'iohina. Babita 'abana Hamami

kupai hauna kehore tinoi haukia taba namokia tohokia kebenakia, u?

<sup>12</sup> Maearima baika heremiai taba tonuatae aina katebabaina hauna wai abomo herekiai ihobona katobabaina. Neiana hanona Mose ena Rauhubu mai mahabanai haukia ekia ba'iohi 'abina anina tohana.

*Pa'abi 'Omo'omona Aonai Katokatoto.*  
(Lk 13.24)

<sup>13</sup> Wai hanona pa'abi 'omo'omona aonai katokatoto. Pokina pa'abi weiana eao 'ari banaibanai 'ekana hanona emata mai taearana epanaba, maearima bo'ona hanona weia tikitoto. <sup>14</sup> Ia pa'abi weiana eao mauri 'ekana hanona e'omo'omo, mai taearana ika'ana hanona epahihi, maearima bitamo titabu ahina.

*Matiu Hanona Buanai Kaha'iohina.*  
(Lk 6.43-44)

<sup>15</sup> Mahabanai bai'oi haukia katoihia harainakia, katemai heremi ihakia matoha mamoe 'abakia, ia aokia hanona waeha 'aki aibarakia 'abakia. <sup>16</sup> Wai hanona maearima weiakia buabuakiai katobai'iohi. 'Ama'ama 'ororo buana a'i keba ramana, 'ao 'ini boaboa maiha buana a'i kebaramana. <sup>17</sup> Ihobona mo matiu namokia ikoikiai hanona buakia namokia tibaramanakia, ia matiu ki'a obokia hanona buakia ki'a obokia tibaramanakia. <sup>18</sup> 'A matiu namona hanona buabua ki'a obona kebaramana a'i ketaina mai matiu ki'a obona hanona buabua namona kebaramana a'i ketaina. <sup>19</sup> Matiu weiakia ikoinai buabua namokia a'i tibaramanakia haukia hanona ikabe obo iruba aonai katekapo totonakia. <sup>20</sup> Weiana buabua uahomakiai hanona mahabanai bai'oikia aba kato'iohinakia.

*Au Wai A'i A'iohinimi.*  
(Lk 13.25-27)

<sup>21</sup> Maearima tiaparina'u, "Obiapaka e, Obiapaka e," weiakia haukia maikoinai mo Tirama ena obia aiarana aonai a'i katekatoto, ia tai Hama'u kupai nemiaho hauna ena nuatae akana kebabaina hauna mo kekatoto. <sup>22</sup> Wapu weianai maearima bo'ona here'u ai kate'abi katetibaha, "Obiapaka e, Obiapaka e, ai atamuai tamahabanai, ai atamuai auba ki'a obokia tau'u ahinakia, mai hoa haeha haeha tababainakia!" <sup>23</sup> Ba au hanona wairakiai kahinabe harainakia

katibaha, "Au wai a'i a'iohinimi. Here'uai tomokapare, wai ki'a ibabaina haumi!"

*Itu Ibakorotikia Taearakia Rua.*  
(Lk 6.47-49)

<sup>24</sup> Weiana paunai hau ha e'u 'abi neiana 'uruna niona mai akakia nibabai hanona matoha ao bero hauna 'abana ena itu wairo ahanai ebakori 'auna. <sup>25</sup> Abara etibo tou ekarahi mai baura rarina eabu 'au itu eabu ki'ana, ia a'i epobu, pokina itu hanona wairo ahanai ebakori 'auna. <sup>26</sup> Ia hau ha e'u 'abi neiana 'uruna niona, ia akana a'i nibabaina hanona matoha po'o hauna 'abana ena itu 'ano ahanai ebakorotina.

<sup>27</sup> Abara etibo tou ekarahi, mai baura eabu itu epobu earu otaraina." <sup>28</sup> Iesu 'abi weiana ebapuana hanona to'u haukia ikoikiai ena ba'iohia teta'u ta'u huri. <sup>29</sup> Pokina ia ena ba'iohi hanona rauhubu poki haukia ekia ba'iohi 'abakia aha'i, ena 'abi hanona mai hiabuna.

## 8

*Iesu Morumoru Hauna Ebanamona.*  
(Mk 1.40-44; Lk 5.12-14)

<sup>1</sup> Iesu oeo ai eriri raninai maearima to'u rarina 'akina murinai te'au. <sup>2</sup> Morumoru hauna ha emai Iesu wairanai ekaipehu e'abi etibaha, "Obiapaka e, konuatae raninai kobanamona'u ketaina." <sup>3</sup> Iesu imana etiu ahina ea'i 'apuana e'abi etibaha, "Au nanuatae haumu menamo." Biaimo ena morumoru enamo. <sup>4</sup> Ba Iesu hau weiana ehinabena etibaha, "Hau ha haianai a'i ko'abi, ia koao kipomu robe hauna herenai haumu kobaihana, mai beruberu Mose e'uahina hauna kobaibeni ia herenai kebatohani'o oi hanona aba onamo."

*Roma Huari Poki Hauna Ena A'ikakauma Hoana.*  
(Lk 7.1-10)

<sup>5</sup> Iesu Kaperanauma aiaranai ekatoto raninai, Roma huari poki hauna ha emai herena enoina kebaraina. <sup>6</sup> E'abi etibaha, "Obiapaka e, e'u ta'ara a'i hauna nimeru ituai enoti, hauna nihaiara ki'a." <sup>7</sup> Iesu ehinabena etibaha, "Kawahi kabanamona." <sup>8</sup> Huari poki hauna e'abi etibaha, "Obiapaka e, au a'i anamo oi komai e'u itu, 'a ko'abi mo weiana e'u ta'ara a'i hauna kemauri. <sup>9</sup> Pokina au hanona hiabu hauna ha ba'anai namiaho mai huari haukia baika au ba'a'uai temiaho.

Au hau neiana nahina bena, 'Moao' hanona niao, haemona hau weiana nahina bena, 'Omai.' hanona nimai. Abomo e'u ta'ara a'i hauna nahina bena, 'Neiana mobabaina.' hanona ia nihore nibabaina." <sup>10</sup> Iesu aia weiana eona raninai eta'u ta'u huri, ba murinai ti'au haukia ehinabenakia etibaha, "Abi tohana au wai nahinabenimi, Isaraela aonai hau ha herenai a'ikakauma nahomana ha a'i atabu ahi'apuana.

<sup>11</sup> Au wai nahinabenimi maearima bo'ona 'akina taetanai mai tibotainai katemai Tirama ena obia aiarana aonai tatu 'ekana' Aberahamo, Isako, Iakobo kipokia katemiati haemo. <sup>12</sup> Ia maearima weiakia Tirama ena obia aiarana eba'oruna 'eukia haukia hanona mahana wapuranai katekapo ahinakia weia katehai mai nihekiea katearao'i arao'i."

<sup>13</sup> Iesu huari poki hauna ehinabena etibaha, "Moao emu itu, oa'ikakauma ihobonai heremuai aba kerama." Ena ta'ara a'i hauna beraura hoana weiana aonai beronai emauri mauri.

*Iesu Petero Rawana Babi'ena Ena Inawai Ebanamona.*  
(Mk 1.29-31; Lk 4.38-39)

<sup>14</sup> Iesu Petero ena ituai ekatoto raninai, Petero rawana babi'ena eihana neinawa hauna nehiabu enoti. <sup>15</sup> Iesu ehore babi'e imana ea'i 'apuana, ba inawa ehabona, babi'e emikiri Iesu ta'arana ea'i.

*Iesu Ehore Inawa Haeai Haeai Ebanamonakia.*  
(Mk 1.32-34; Lk 4.40-41)

<sup>16</sup> Weiana rabirabi eaoaina aonai maearima bo'ona auba ki'a obokia aokiai haukia temaiainakia Iesu herena. Iesu hanona ena 'abiai auba ki'a obokia eu'u ahinakia mai inawa haukia ikoikia ebamaurinakia. <sup>17</sup> Neiana hanona Isaia mahabanai hauna ena 'abi ibatohana na e'abi aiho, 'Ia kipona eka 'abe'abe kea'i parenakia mai eka inawa kebua obonakia.'

*Iesu I'abana Haukiai Kateao.*  
(Lk 9.57-60)

<sup>18</sup> Iesu to'u rarina tekori kaiarona eihanakia raninai i'abana haukia ehina benakia katekabanai obu abirana kateao. <sup>19</sup> Rauhuhu poki hauna ha emai Iesu ehinabena etibaha, "Ba'iohi haumu e, 'eka

tabana koao ia au hanona oi murimuai ka'au." <sup>20</sup> Iesu ia ena 'abi ebamuena etibaha, "Waeha 'aki hanona mai ekia 'uri, mai 'ubi roborobokia hanona mai ekia ni'i, 'a au maearima nahuna hanona ara'u kahorotina karai 'ekana aha'i." <sup>21</sup> I'abana hauna ha Iesu ehinabena etibaha, "Obiapaka e, paeao 'uai hama'u pahorena." <sup>22</sup> 'A Iesu ia ehinabena etibaha, "Muri'uai mo'au, 'ari haukia hanona mohabonakia kipokia ekia 'ari temehorena."

*Iesu Rani Mai Roio Eba'omatanakia.*  
(Mk 4.36-41; Lk 8.22-25)

<sup>23</sup> Weiana Iesu ahiai ehe'au, i'abana haukia kipokia teao. <sup>24</sup> Weiana obuau kou rarina 'akina eabu 'au, roio rarikia temikiri ahi tebahu abuna, 'a Iesu hanona eparua 'ari. <sup>25</sup> I'abana haukia teao tebaona te'abi tetibaha, "Obiapaka e, moba maurinaka aba kahatono." <sup>26</sup> Ia ekia 'abi ebamuena etibaha, "Emi a'ikakauma eko'i ko'i haumi, aehoma buonai tuta'u ki'a?" Ba Iesu emikiri rani mai roio erikenakia, weiana beronai e'omata harai 'aki. <sup>27</sup> Hau weiakia teta'u ta'u huri te'abi tetibaha, "Neiana hanona hau tabana, ba rani mai roio abomo aiana tika'aina."

*Iesu Hau Rua Aokiai Auba Ki'a Obokia Eu'u Ahinakia.*  
(Mk 5.1-17; Lk 8.26-37)

<sup>28</sup> Iesu obu abirana Gadarene hanonai ekara'au raninai, hau rua aokiai auba ki'a obokia temiaho haukia 'ari ahanai temai herena. Ia teaiahu wairai paunai hau ha taeara weianai a'i ekabanai. <sup>29</sup> Ia teio tetibaha, "Tirama nahuna e, heremai ai taba nonuatae aina? Rani a'i nitai bahana ia oi omai hanona ai kobahaiaranamai, u?" <sup>30</sup> 'Eka weianai baiatana a'i ehoma'a hanona aiporo to'una ha tianiani. <sup>31</sup> Ba auba ki'a obokia Iesu tenoina tetibaha, "Oi kobakarainamai raninai, kauhuna-mai kataeao aiporo to'una weiana aokiai katatoto."

<sup>32</sup> Weiana ia ehinabenakia etibaha, "Tomao." Ba ia tekarahi teao, aiporo aokiai tetoto. Aiporo to'una maikoinai herehere ai tebeau riri papa'a ai terobo ahi obu aonai tetobu tetono 'ari.

<sup>33</sup> Aiporo 'ima haukia tebeau obo aiara apa'uanai pou neiana mai auba ki'a obokia hau aokiai temiaho haukia pouna abomo tehinana. <sup>34</sup> Weiana aiara

apa'uana maearimana maikoinai temai Iesu kateihana. Ba temai teihana raninai, tenoina ekia hano kehabona.

## 9

### *Iesu Mero Hauna Ha Ebanamona.* (Mk 2.1-12; Lk 5.17-26)

<sup>1</sup> Iesu ahi ai ehe'au obu ebeau banai ena aiara tohana eao. <sup>2</sup> Maearima baika mero hauna ha toto'eai teoaina herena. Iesu ekia a'ikakauma eihana raninai, mero hauna ehinabena etibaha, "Naha'u e, a'i kota'u, emu ki'a aba ihina hao."

<sup>3</sup> Weiana rauhuhu poki haukia baika kipokia baiatakia te'abi'abi tetibaha, "Hau neiana hanona Tirama herenai ni'abi ki'a."

<sup>4</sup> Iesu ekia raona raona e'iohinakia ba e'abi etibaha, "Aehoma buonai raona ki'a obona aomia turaonana? <sup>5</sup> Aeana hauna e'ama'ama, ka'abi 'Emu ki'a ihinahao.' 'ao ka'abi 'Momikiri, moka'a.' <sup>6</sup> 'A wai kato'iohina au maearima nahuna hanona mai e'u hiabu hanopaka maearimania ekia ki'a kahina hao." Ba Iesu mero hauna ehinabena etibaha, "Momikiri, emu toto'e moa'ina, moao emu itu." <sup>7</sup> Weiana ia emikiri, eao ena itu. <sup>8</sup> To'u haukia babai weiana teihana raninai teta'u ki'a, ba hiabu uahomana maearima ebenakia Tiramana tebanamona.

### *Iesu Mataio Eaparina.* (Mk 2.13-17; Lk 5.27-32)

<sup>9</sup> Iesu 'eka weiana ehabona eao aonai hau ha eihana, ia atana Mataio moni a'i 'ekana\* emiati, ehinabena etibaha, "Muri'uai mo'au." Mataio emikiri murinai eka'a.

<sup>10</sup> Iesu Mataio ena itu ai nianiani aonai, moni bararo haukia bo'ona mai aka ki'a haukia abomo temai ia mai i'abana haukia kipokia teaniani haeamo. <sup>11</sup> Parisea haukia baika hoahoa weiana teihana raninai i'abana haukia tebakainakia tetibaha, "Aehoma buonai emi ba'iohi hauna moni bararo haukia mai aka ki'a haukia kipokia tianiani haeamo?"

<sup>12</sup> Iesu aia neiana eona hanona ekia 'abi ebamuena etibaha, "A'i teinawa haukia hanona muramura baibeni hauna† a'i tenuatae aina, 'a teinawa haukia mo ia tenuatae aina. <sup>13</sup> Wai tomoao Puka robena 'abina neiana anina taba hanona katotabuna, 'Au aoko'o nanuatae aina ia

baibeni tabana aha'i.' Au amai ena poki hanona bero haukia a'i kaparinakia, 'a aka ki'a haukia kaparinakia."

### *Ani Robe 'Abina.* (Mk 2.18-22; Lk 5.33-39)

<sup>14</sup> Weiana Ioane i'abana haukia temai Iesu herena tebakaina tetibaha, "Aehoma buonai ai mai Parisea haukia kipokia tani robe, 'a oi i'abamu haukia hanona a'i tiani robe?" <sup>15</sup> Iesu ekia 'abi ebamuena etibaha, "Hawainibe mahamaha hauna ena baki haukia herekiai nemiaho aonai ia aea katehai aiho? 'A rani kemai hawainibe mahamaha hauna herekiai katea'i parena aonai ia kateani robe.

<sup>16</sup> Hau ha habuni mahamahana puana habuni 'ai'aina ohi a'i ketai orenakia, pokina itai 'ekana kepuhu pa'ana hanona tapa keapa'ua ki'a. <sup>17</sup> Maearima bine beina mahamahana beibe 'ai'aikiai a'i katebaharuna, pokina beibe katepa'a hanona bine beina kekiki oioi abomo beibe keki'a, 'a bine beina mahamahana hanona beibe mahamahakiai katebaharu weiana teraru katenamo."

### *Uaho E'ari Hauna Ha, Mai Inawa Babi'ena Ha.* (Mk 5.22-43; Lk 8.41-56)

<sup>18</sup> Iesu 'abi neiana nehinana aonai, marea poki hauna ha emai wairanai ekai pehu ehinabena etibaha, "Naha'u uahona hanona bariu mo e'ari, ia omai imamu ahanai kohao 'au hanona kemauri." <sup>19</sup> Ba Iesu emikiri murinai e'au, i'abana haukia abomo teao.

<sup>20</sup> Weia babi'e ekia inawa ea'ina ihau harau haea rua babi'ena ha Iesu murinai eka'a emai ena habuni puana ea'i 'apuana. <sup>21</sup> Pokina kipona aonai etibaha, "Ena habuni puana mo ka'i 'apuana hanona kanamo." <sup>22</sup> 'A Iesu eia kabe eihana ba ehinabena etibaha, "Naha'u e, a'i kota'u, emu a'ikakauma ehore ebanamoni'o." Babi'e beronai mo enamo.

<sup>23</sup> Weiana Iesu marea poki hauna ena ituai etoto, irarabu ahu haukia mai to'u rarina urukia nebua eihanakia raninai, <sup>24</sup> ia ehinabenakia etibaha, "Tomokatu'a, uaho hanona a'i e'ari, ia hanona niparu." To'u haukia Iesu teiriri aina. <sup>25</sup> Ba to'u haukia tekarahi mahanai murinai, ia ikai-huri aonai etoto, uaho imanai ea'i hanona

\* 9:9: (9) takiti a'i 'ekana † 9:12: (12) Doketa



uaho emauri mauri ba emikiri. <sup>26</sup> Pou neiana eao hano weiana maikoinai tehina otaraina.

*Iesu Mahakia Teki'a Haukia Rua Mai Maeana Eki'a Hauna Ha Ebanamonakia.*

<sup>27</sup> Iesu 'eka weianai ekarahi aonai mahakia teki'a haukia rua murinai teka'a teio tetibaha, "Davida nahuna e, moaoko'o ainamai." <sup>28</sup> Ia ituai etoto raninai mahakia teki'a haukia temai herena, ba Iesu ebakainakia etibaha, "Wai tua'ikakaumana'u au aka neiana kababaina hanona ketaina, u?" Ia te'abi tetibaha, "E, Obiapaka, ta'ikakaumani'o." <sup>29</sup> Weiana Iesu ia mahakia ea'i 'apuanakia ba e'abi etibaha, "Emi a'ikakauma ihobona heremiai merama." <sup>30</sup> Weiana mahakia teno'a. Ba Iesu eharabunakia etibaha, "Hau ha a'i katoba'iohina." <sup>31</sup> 'A ia tekarahi teao hano weiana maikoina aonai Iesu pouna tehina otaraina.

<sup>32</sup> Ia tekarahi teka'a aonai, maearima baika hau ha aonai auba ki'a obona nemi-aho buonai maeana eki'a hauna teoaina Iesu herena. <sup>33</sup> Auba ki'a obona eu'u ahina murinai maeana eki'a hauna enamo ba e'abi'abi, to'u haukia maikoinai teta'u ta'u huri te'abi tetibaha, "Isaraela aonai hoa nahomana ha a'i haiha 'apua." <sup>34</sup> 'A Parisea haukia te'abi tetibaha, "Ia hanona auba ki'a obokia ekia poki hauna ena hiabuai auba ki'a obokia neu'u ahinakia."

*Iesu To'u Haukia Eaoko'o ainakia.*

<sup>35</sup> Weiana Iesu eao aiara apa'uakia mai papakia maikoikiai aokiai ekaoao, ekia marea aokiai eba'iohi, Tirama ena obia aiara pouna namona eiroro aina, inawa mai haiara haeai haeai ikoikiai ebanamonakia. <sup>36</sup> Iesu to'u haukia eihanakia hana eaoko'o ainakia pokina tiaru 'abaea mai hau hororokia ihobona mamoe i'imakia hauna aha'i haukia 'abana. <sup>37</sup> Ba ia i'abana haukia ehinabenakia etibaha, "Umai aniani bo'ona aba te'oru, ia aka haukia hanona a'i ebo'o. <sup>38</sup> Ua buonai uma Poki Hauna katonoina aka haukia keuhunakia ena umai kateueu."

## 10

*Iesu Iuhubeau Haukia Harau Haea Rua Etina'anakia.*

*(Mk 3.13-19; Lk 6.12-16)*

<sup>1</sup> Iesu i'abana haukia harau haea rua eparinakia temai herena, hiabu ebenaakia auba ki'a obokia kateu'u ahinakia

haeamona inawa mai haiara haeai haeai ikoikiai kateba namonakia.

<sup>2</sup> Iuhubeau haukia harau haea rua atakia hanona neiakia, kori 'uaina Simona, ia hanona teaparina Petero, mai uaho'abana Anderea, Sebedeo nahuna Iakobo mai uaho'abana Ioane. <sup>3</sup> Pilipo, Batolomeo, Toma mai moni bararo hauna Mataio, Alepeo nahuna Iakobo, mai Tadeo. <sup>4</sup> Selote hauna Simona, mai Isakariote hauna Iuda, Iesu ehinahinaina hauna.

*I'abana Haukia Harau Haea Rua Euhu Ahinakia.*

*(Mk 6.7-13; Lk 9.1-5)*

<sup>5</sup> Iesu hau harau haea rua neiakia euhunakia mai ehinabenakia etibaha, "Rama haeai haukia ekia hano a'i katoao abomo Samaria aiarakia ha a'i katokatoto. <sup>6</sup> 'A katoao Isaraela itubuna ena mamoe te'akauma haukia herekia. <sup>7</sup> Katoao aonai katoiroro katotibaha, "Tirama ena obia aiarana hanona aba herekai." <sup>8</sup> Inawa haukia katoba namonakia, 'ari haukia katoba maurinakia, morumoru tea'ina haukia huanikia katoba namonakia, mai auba ki'a obokia katou'u ahi. Wai toa'i 'abaeana buonai katobaibeni 'abaea.

<sup>9</sup> Emi mahoa ihiua ihiua aokiai moni apa'uana 'ao papana ha a'i katoutana. <sup>10</sup> Emi kaoao paunai mahoa, habuni ibatoto ibaruana, tamaka, mai ikai'ini a'i katoa'inakia, pokina aka hauna hanona mai ena iro'o.

<sup>11</sup> Aiara tabanai tukatoto hanona kea'i taeanimi hauna katotabuna herenai katomiaho keaomo 'eka weiana katohabona. <sup>12</sup> Itu weianai tukatoto hanona banamo katobaibeni. <sup>13</sup> Itu maearimakia katea'i taeanimi raninai emi baibua banamona ahakiai kemiaho, 'a a'i katea'i taeanimi raninai emi banamo hanona kemue heremi. <sup>14</sup> 'A tai ha a'i kea'i taeanimi 'ao aiami a'i keona raninai aiara 'ao itu weiana katohabona aonai 'apumi 'apurorokia katotabu tabu obonakia. <sup>15</sup> 'Abi tohana au wai nahina benimi, bakai orena berauranai Sodoma mai Gomora aiarakia ekia puma ma ke'aera, ia aiara weiana ena puma hanona keapa'ua.

*Bai'oata Katemai.*

*(Mk 13.9-13; Lk 21.12-17)*

<sup>16</sup> Au wai nauhunimi hanona ihobona matoha mamoe 'abakia tuao waeha 'aki baiatakiai. Ua buonai 'erau 'abakiai katoao katoaobero mai rauria 'abakiai

katoao aomia ki'a a'i katoraonana. <sup>17</sup> Maearima herekiai kato'ima 'ima harainimi, pokina ia kateaoainimi bakai 'ekana katehorotini, abomo marea aokia kate'atinimi. <sup>18</sup> Au buo'uai wai kateaoainimi poki haukia apa'uakia mai obia haukia apa'uakia wairakiai katebabakainimi, aonai ia mai rama haeai haukia herekiai pou namona ihina pouna haumiai katoao. <sup>19</sup> Kateaoainimi bakai 'ekana raninai aomi a'i kearo'ari 'abi tabana katohinana 'ao aea kato'abi aiho. Rani weianai taba katohinana hauna Tirama kebenimi. <sup>20</sup> Pokina ihinana hanona wai aha'i, 'a Hamami Tirama Aubana aomia hauna ke'abi.

<sup>21</sup> Uaho'aba ha kehore uaho'abana kehinahina aina kateahu 'arina, hama kehore nahuna ua kehomana, nahu katehore hamakia mai hinakia kate'oatanakia 'ari 'ekana katehorotinakia. <sup>22</sup> Maearima ikoikiai au buo'uai kateatata ainimi, 'a tai kekori 'ini keao puanai hauna kemauri. <sup>23</sup> Aiara hai kate'oatanimi raninai kato'uru katoao aiara 'abana ha. 'Abi tohana au wai nahinabenimi, Isaraela ajarakia ikoikiai a'i katokatoto ore bahanakia aonai au maearima nahuna hanona kamai.

<sup>24</sup> Marere miorina ena ba'iobi hauna a'i ketara haona 'ao ta'ara'i hauna ena poki hauna a'i ketara haona. <sup>25</sup> Marere miorina ena ba'iobi hauna ohi kateihobo hanona enamo, mai ta'ara a'i hauna ena poki hauna ohi kateihobo hanona enamo. Itu poki hauna kateaparina Belesebulo raninai itu maearimakia baika abomo ata ki'a obokiai kateaparinakia.

*Kahata'u aina Hauna.*

*(Lk 12.2-7)*

<sup>26</sup> Ua buonai a'i katota'u ainakia. Taba tebahu abunakia haukia ikoikiai hanona kate'a'i kau mai taba bunikia ikoikiai hanona katebawaira tinanakia kate'iobi. <sup>27</sup> Taba wapurai nahina benimi haukia hanona ea aonai katohinanakia mai taba haiamiai abateteai haukia hanona itu kapenai katoiroro ainakia. <sup>28</sup> Weiakia hauani kateahu 'arina haukia a'i katota'u ainakia pokina auba hanona a'i kateahu 'arina. Ia Tirama katota'u aina ia hanona hauani mai auba terarua kea'i ki'a ki'a bahanakia iruba aonai.

<sup>29</sup> Komure rua hanona pene hamonai katekawanakia. Iamo Hamami ena nuatae aha'i raninai ha a'i ke'eho 'anoai.

<sup>30</sup> Weiana buimi ikoikiai aramiai haukia aba etuabi orenakia. <sup>31</sup> Ua buonai a'i katota'u wai hanona komure bo'ona 'akina totara haonakia.

*Iesu Ihina Pouna Hoana.*

*(Lk 12.8-9)*

<sup>32</sup> Hau ha maearima wairakiai ke'abi ia au ni'abana'u hauna hanona au abomo Hama'u kupai nemiaho hauna wairanai ka'abi ia hanona au i'aba'u. <sup>33</sup> 'A hau ha maearima wairakiai au kebuniai aina'u hauna hanona au abomo Hama'u kupai nemiaho hauna wairanai ia kabuniai aina.

*Kareba Amaiaina Hanopakai.*

*(Lk 12.51-53; 14.26-27)*

<sup>34</sup> A'i katoraonana au amai hanona baibua hanopakai kamaiaina. Au hanona baibua a'i amaiaina ia kareba amaiaina bai'oata kerama. <sup>35</sup> Au amai pokina hanona neiana,

'Hau kehore hamana ke'oatana, uaho kehore hinana ke'oatana, rawa babi'ena 'aru'aruna kehore rawana babi'ena kirona ke'oatana.

<sup>36</sup> Maearima ha ena itu haukia hanona ena 'ou haukiai kateao.'

Mik 7.6

<sup>37</sup> Hau ha hamana 'ao hinana niraona'auai ki'a bahana ba au, ia hanona a'i ketaina here'uai. Hau ha nahuna hauna 'ao uahona niraona'auai ki'a bahana ba au, ia hanona a'i ketaina here'uai. <sup>38</sup> Hau ha ena matiu ibiri ropo a'i nebuana muri'uai a'i ni'au hauna, ia hanona a'i ketaina here'uai. <sup>39</sup> Hau ha ena mauri keani ki'aina hauna hanona ena mauri keba'akaumana, hau ha ena mauri keba'akaumana au pau'uai hauna hanona ena mauri ketabu ahina.

*'Ara Namona Kebenakia.*

*(Mk 9.41)*

<sup>40</sup> Maearima tabana wai nia'i taeanimi hauna hanona au nia'i taeana'u, mai au nia'i taeana'u hauna hanona euhuna'u Tiramana abomo nia'i taeana. <sup>41</sup> Hau ha mahabanai hauna ha nia'i taeana pokina ia mahabanai hauna paunai, ia hanona mahabanai 'arana ihobona kea'ina, mai hau ha bero hauna ha nia'i taeana pokina ia bero hauna paunai, ia hanona bero hauna 'arana ihobona kea'ina. <sup>42</sup> Hau ha bei 'amarina ereai miori neiakia atakia a'i teapa'ua haukia kebenakia pokina ia au i'aba'u haukia paunai, 'abi tohana au

wai nahina benimi, 'ara ia'ina aonai ia a'i kekapu."

## 11

*Iesu Ba'uere Robe Hauna Ioane Robana Eahuna.*

*(Lk 7.18-35)*

<sup>1</sup> Iesu i'abana haukia harau haea rua 'abi neiakiai erobenakia murinai, 'eka weiana ehabona eao Galilea aiarakia aokiai weia keba'iohi mai keiroro.

<sup>2</sup> Ioane wapura ituna aonai Keriso ena aka poukia eo'o raninai i'abana haukia euhunakia herena teao, <sup>3</sup> Iesu tebakaina tetibaha, "Kemai hauna hanona oi? 'Ao haeai ha kata'imana?"

<sup>4</sup> Iesu ekia 'abi ehamuena etibaha, "Tomomue tomoao, taba to'o mai toiha haukia Ioane haianai katohinanakia. <sup>5</sup> Maha ki'a haukia aba teihaiha mue, ome haukia tika'a, morumoru haukia aba tinamo, haia po'o haukia aia tio'o, 'ari haukia temikiri timauri, mai uraru haukia herekiai pou namona teiroro aina. <sup>6</sup> Hau ha here'uai aona a'i nikai'au kai'au hauna Tirama nibanamona."

<sup>7</sup> Ioane i'abana haukia tekamuri aonai, Iesu to'u haukia herekiai Ioane pouna ehina ramana. "Wai taba katoihana buonai toao hano'akunai? Baura kopura nibaibiunakia katoihanakia, u? <sup>8</sup> Aha'i raninai, toao hanona taba katoihana? Hau ha habuni ta'eta'ekia ebatotonakia hauna, u? Weiakia habuni ta'eta'ekia tibatoto haukia hanona obia 'arana ena ituai temiaho. <sup>9</sup> Ba taba katoihana buonai toao? Mahabanai hauna ha? 'E, au wai nahinabenimi, Ioane hanona mahabanai haukia etara haonakia. <sup>10</sup> Ia pouna Puka robenai na tererena aihona, 'Au e'u iuhubeau hauna kauhu 'uaina wairamuai, ia kehore emu taeara kea'ia'i haraina.'

Mal 3.1

<sup>11</sup> 'Abi tohana au wai nahinabenimi, weiakia babi'e tebaramanakia haukia ba-iatakiai hau ha ba'uere robe hauna Ioane a'i etara haona, iamo weiana Tirama ena obia aiaranai eko'i ko'i hauna Ioane etara haona.

<sup>12</sup> Ba'uere robe hauna Ioane ena raniai emaimo bariu, Tirama ena obia aiarana hanona tikakina, kakikaki haukia hanona tibahobona katepuhu boina. <sup>13</sup> Pokina

mahabanai haukia mai Mose ena rauhuhu ikoikiai aokiai Tirama ena obia aiarana pouna tehinana emai mo Ioane ena raniai.

<sup>14</sup> Wai tua'i taeanan raninai kato'iohina Ioane hanona Elia weiana kemai hauna.

<sup>15</sup> Mai haiana hauna hanona aia keona.

<sup>16</sup> Uru neiana haukia tabai kaba batainakia? Ia hanona matoha miori papakia kawakawa 'ekana'i temiati 'abakia tiaparinakia tetibaha, <sup>17</sup> 'Ai irarabu tahunakia wai paumiai, iamo wai a'i tuewa. 'Ari huikia ta'i, iamo wai a'i tuhai.'

<sup>18</sup> Weiana Ioane emai hanona a'i eaniani mai a'i einuinu, ba ia te'abi tetibaha, 'Auba ki'a obona ha ia aonai.' <sup>19</sup> Au Maearima nahuna amai aniani mai ainuinu hanona ia te'abi tetibaha, 'Ia hanona aniani ki'a mai inuinu ki'a, moni bararo mai aka ki'a haukia ekia hau.' 'A aobero hanona ena buabua nihore ena bero nibatohana."

*A'i Teraona Kabe Aiarakia Herekiai Keki'a Wairai.*

*(Lk 10.13-15)*

<sup>20</sup> Weiana Iesu aiara weiakia aokiai hi-abu hoakia bo'okia ebabai 'ekakia maearimania ebatanakia, pokina ia ekia ki'ai a'i teraona kabe buonai. <sup>21</sup> "Korasina e, heremuai keki'a wairai! Betesaida e, oi abomo heremuai keki'a wairai! Hi-abu hoakia heremai ababai haukia Turo mai Sidono haukia herekiai pababai raninai, ia hanona aba wa'i baha 'akinai pateraona kabe, habuni ki'a obokia patebatoto mai arakiai rabu patehoroti. <sup>22</sup> 'A au wai nahina benimi, Tirama ena bakai apa'uana berauranai Turo mai Sidono haukia ekia puma hanona ma ke'ama'ama ba wai 'eumi. <sup>23</sup> Kaperanauma e, oi katea'i taeani'o koao kupa ubinai, u? Aha'i, oi hanona katekapo ririni'o koao iruba aonai. Hiabu hoakia weiakia heremuai ababai haukia Sodoma herenai pababai raninai, ia hanona pemiaho mo pemai bariu rani neianai. <sup>24</sup> 'A au wai nahinabenimi, Tirama ena bakai apa'uana berauranai Sodoma ena puma hanona ma ke'ama'ama ba wai 'eumi.

*Tomai Here'uai Katoarai.*

*(Lk 10.21-22)*

<sup>25</sup> Rani weianai Iesu ena bahuba'ariai e'abi etibaha, "Hama'u e, kupa mai hanopaka Obiana. Au oi nabanamoni'o pokina taba neiakia ohore buninakia aotipa mai 'iohi haukia herekiai, ia miori

papakia herekiai obawaira tinanaka. <sup>26</sup> Hama'u e, 'abi tohana, pokina neiana hanona oi emu aonamo tohana. <sup>27</sup> Hiabu ikoikiai hanona Hama'u aba ebena'u. Ia Nahuna a'i te'jobina Hamana mo kipona, mai hau ha Hamana a'i e'jobina Nahuna mai Nahuna etina'anakia haukia weiakia herekiai kipona kebawaira tinana haukia mo."

<sup>28</sup> "Tuhau hororo haumi mai puma tobuana haumi, ikoimiai ena here'u tomiai, au wai arai kabenimi. <sup>29</sup> E'u iebebe tomoa'ina 'aromia tomobuana mai here'uai 'iobi katoa'ina pokina au hanona ao 'amari mai 'aiaunu hau'u. Weiana wai aubami katearai. <sup>30</sup> Pokina e'u iebebe hanona e'ama'ama mai e'u buabua hanona a'i epuma."

## 12

### *Beraura Robe Obiana.* (Mk 2.23-28; Lk 6.1-6)

<sup>1</sup> Rani weiana beraura robenai Iesu witi umana aonai ekabanai. I'abana haukia mare'a te'ari buonai witi buakia te'ini huri teani. <sup>2</sup> Parisea haukia babai weiana teihana raninai Iesu tehinabena tetibaha, "Moihana, oi i'abamu haukia hanona beraura robenai taba a'i katebabaina hauna tibabaina." <sup>3</sup> Iesu ekia 'abi ebamuena etibaha, "Wai, Davida te'abana haukia kipokia mare'a te'ari aonai taba ebabaina hauna a'i totuabina? <sup>4</sup> Ia Tirama ena ituai etoto, weia parawa robena ea'ina, parawa weiana hanona erobe, robe haukia ikupa- iakia mo kateana hauna, ia mai te'abana haukia kipokia teana. <sup>5</sup> Haeamona robe haukia marea robe aonai beraura robe akana tibabai ki'ana iamo a'i tibeho, rauhubuna weiana a'i totuabina? <sup>6</sup> Au wai nahinabenimi, hau ha neia hauna ehore marea robe etara haona.

<sup>7</sup> 'Au nanuatae aoko'o, ia a'i nanuatae baibeni tabakia.'

Hos 6.6

Puka robenai 'abi neiakia anikia pato'iobi raninai maearima a'i tebeho haukia behoai a'i katohorotinakia. <sup>8</sup> Pokina au Maearima nahuna hanona beraura robe obiana."

### *Iesu Ehore Ima Kobekobe Hauna Imana Ebanamona.*

(Mk 3.1-6; Lk 6.6-11)

<sup>9</sup> Iesu 'eka weiana ehabona eao ekia marea ha aonai etoto, <sup>10</sup> hau ha imana

kobekobena abomo weia, maearima baika taeara tetabu Iesu beho 'ekanai katehorotina, ba Iesu tebakaina tetibaha, "Beraura robenai inawa kahabanamo hanona behona aha'i?" <sup>11</sup> Iesu ehinabenakia etibaha, "Wai ha emu mamoe beraura robenai 'uriai petoa raninai a'i poa'i 'auna, u? <sup>12</sup> Maearima hanona mamoe etara haona. Ua buonai beraura robenai namo kahababaina hanona ebero." <sup>13</sup> Ba Iesu hau weiana ehinabena etibaha, "Imamu motiu berona." Weiana imana etiu berona hanona maikoina enamo ihobona imana abihana 'abana. <sup>14</sup> 'A Parisea haukia tekarahi teao teroba ahu aea katehoma Iesu kateahu'arina.

### *Tirama Etina'ana Hauna.*

<sup>15</sup> Iesu aba e'jobina paunai 'eka weianai ekapare. Maearima bo'ona 'akina murinai te'au, ekia inawa ikoikiai ebanamonia, <sup>16</sup> ehara abunakia tai ha haianai a'i kate'abi ia hanona tai. <sup>17</sup> Neiana hanona Isaia mahabanai hauna ehinana 'abina ibatohana.

<sup>18</sup> "Tomoihana ia hanona atina'ana e'u ta'ara'i hauna, naraona'au aina mai naonamo aina. Au e'u Auba Robe ia ahanai kahorotina, bero keiroroaina hanopaka haukia herekiai.

<sup>19</sup> Ia hanona a'i kebaihara tae 'ao a'i keio abomo aiana aiara ibuakiai a'i kateona.

<sup>20</sup> Ia hiribo aba nimohu hauna matoha 'abe'abe haukia 'abana ia a'i kebamohu hurina, abomo baubaea aba ni'ao hauna matoha ekia buabeni e'aera 'aera haukia 'abana ena buabeni a'i keba'aona keaomo bero akana kebawaira tinana.

<sup>21</sup> Hanopaka maearimakia ikoikiai ekia buabeni ia atana ahanai katehorotinakia.'

Isa 42.1-4

### *Iesu Mai Belesebulo.*

(Mk 3.20; Lk 11.14-23; 12.10)

<sup>22</sup> Hau ha aonai auba ki'a obona emiaho hauna temaiaina Iesu herena ia hanona mahana teki'a mai maeana eki'a, Iesu ehore ebanamona, weiana ia e'abi'abi mai eihaiha mue. <sup>23</sup> Maearima ikoikiai teta'u ta'u huri tetibaha, "Pa'e hau neiana hanona Davida Nahuna." <sup>24</sup> 'A Parisea haukia pou neiana teona raninai te'abi



tetibaha, “Neiana hanona auba ki'a obokia ekia poki Belesebulo ena hiabuai auba ki'a obokia naiakia neu'u ahinakia.”

<sup>25</sup> Iesu ekia raona e'ioibina buonai ehinabenakia etibaha, “Hanopaka ha kipona kebapa'ana kate'au hanona ke'iti'iti, mai aiara ha kipona 'ao itubu ha kipona kebapa'ana kate'au raninai kekori 'ini hanona a'i ketaina. <sup>26</sup> Ba Satani kehore Satani ke'u ahina raninai ia hanona kipona nibapa'ana, weiana ena hanopaka hanona aea kekori 'ini aihō? <sup>27</sup> Au Belesebulo hiabunai auba ki'a obokia nau'u ahinakia raninai tai'eunai wai emi maearima auba ki'a obokia teu'u ahi? Ua buonai emi maearima katehore behoi katehorotini. <sup>28</sup> A au Tirama ena Auba hiabunai auba ki'a obokia nau'u ahinakia raninai weiana Tirama ena obia aiarana hanona aba emai wai heremai.

<sup>29</sup> Hau ha tabura hauna ena itu a'i keahu pa'ana ena taba a'i kea'i parenakia keaomo ia tabura hauna kea'ina kebiri 'uaina, ba ena taba kebainao ainakia.

<sup>30</sup> Maearima ha tai'u a'i nitai hauna hanona au ni'oatana'u, mai maearima ha au tararua a'i tabararo bararo hauna hanona nikapo kapo otarai.

<sup>31</sup> Weiana buonai au wai nahina benimi, maearima ekia aka ki'a mai ekia 'abi ki'a ikoikiai hanona kehina hao ketaina, ia Auba Robe herenai e'abi ki'a hauna hanona a'i kehina hao 'apuana.

<sup>32</sup> Hau ha ke'abi ki'a Maearima nahuna herenai hanona kehina hao ketaina, 'a hau ha Auba Robe herenai ke'abi ki'a hauna hanona a'i kehina hao 'apuana bariu mauri neianai mai mauri wairai abomo.

*Matiu Hanona Buabuakiai Kaha'ioibinakia*  
(Lk 6.43-45)

<sup>33</sup> Matiu namonai hanona buabua namokia katerama, matiu ki'a obonai hanona buabua ki'a obokia katerama, pokina matiu aea homana hanona buabuanai i'ioibina nirama. <sup>34</sup> 'Erau nahukia e, emi raona teki'a aeahomanai mo 'abi namokia katohina? Pokina pina hanona aoi taba ebonu hauna nehinana.

<sup>35</sup> Hau namona aonai taba namokia euta haukia namokia nibakarahi, hau ki'a obona aonai taba ki'a obokia euta haukia ki'a obokia nibakarahi.

<sup>36</sup> Au wai nahinabenimi, maearima ikoinei te'abi 'abaea haukia ikoikiai Tirama ena bakai berauranai 'ara katebaibeni toha. <sup>37</sup> Ua buonai emu 'abi kehore bero kebeni'o, abomo emu 'abi kehore puma kebeni'o.”

*Tenuatae Hiabu Hoana Kateihana.*  
(Mk 8.11-12; Lk 11.29-32)

<sup>38</sup> Ba Parisea haukia mai rauhuhu poki haukia baika Iesu tehinabena tetibaha, “Ba'ioibi haumu e, ai tanuatae oi heremuai hiabu hoana ha pobabaina pataihana.”

<sup>39</sup> Iesu ekia 'abi ebamuena etibaha, “Uru neiana ki'a obona mai a'ikakauma aha'i haumi, aehoma buonai hiabu hoana tubakai bakai aina? Ia hoa kabenimi hauna hanona mahabanai hauna Iona mo ena hoa. <sup>40</sup> Iona mararani aihau mai rabi aihau maia apa'uana nuana aonai emiaho, ihobona mo au maearima nahuna abomo mararani aihau mai rabi aihau hano aonai kamiaho. <sup>41</sup> Bakai ranina kemai Nineba maearimakia uru neiana haumi beho 'ekana katehorotini, pokina Iona ena iroroai teraona kabe. Ia bariu Iona etara hauna hauna hanona neia. <sup>42</sup> Ahitaina hanopakana obia babi'ena\* bakai 'ekana kemikiri uru neiana haumi beho 'ekana kehorotini, pokina ia hanopaka puanai emai Solomon ena aobero 'abikia eo'o. Ia bariu Solomon etara hauna hauna hanona neia.”

*Auba Ki'a Obona Emue.*  
(Lk 11.24-26)

<sup>43</sup> “Auba ki'a obona hau ha aonai ekarahi raninai eao hano 'ororonai ekaoao 'eka etabu kearai, ia 'eka ha ai etabu ahina, <sup>44</sup> ba kipona e'abi etibaha, ‘Au hanona kamue e'u itu ahabona hauna kaeao', weiana emue eao itu 'abaeana etabu ahina aba tetarona mai e'oru harai. <sup>45</sup> Ba ekarahi eao 'abana baika 'abaihau hamomo teki'a ki'a baha haukia emaiainakia tetoto weia temiaho. Hau weiana 'uainai ena miaho eki'a, ia bariu hanona eki'a ki'a baha. Weiana hanona uru ki'a obona neiakia haukia herekiai ua kerama aihō.”

*Iesu Hinana Mai Uaho'abana.*  
(Mk 3.31-35; Lk 8.19-21)

<sup>46</sup> Iesu maearima nehinabe ohonakia aonai hinana mai uaho'abana tekara'au. Mahana tekoro ti tenuatae Iesu kipokia kate'abi'abi. <sup>47</sup> Hau ha ia ehinabena

\* 12:42: (42) atana Seba 1 King 10.1-10

etibaha, “Hinamu mai uaho'abamu hanona mahanai tekoroiti, oi tenuatae aini'o kato'abi'abi.”<sup>48</sup> Iesu ia ena 'abi ebamuena etibaha, “Tai hauna au hina'u, mai tai haukia au uaho'aba'u?”<sup>49</sup> Imana etiu i'abana haukia e'uahinakia etibaha, “Neiakia haukia hanona au hina'u mai au uaho'aba'u.”<sup>50</sup> Pokina maearima ha au Hama'u kupai nemiaho hauna ena nuatae nibabaina hauna hanona au uaho'aba'u, haibu'u mai hina'u.”

### 13

*'Abi Ibabatai Hau Ha Uho Ebatonakia.*  
(Mk 4.1-9; Lk 8.4-8)

<sup>1</sup> Beraura hamona weianai Iesu ituai ekarahi eao 'obu poenai emiati. <sup>2</sup> Herenai to'u eapa'ua ki'a baha buonai emikiri ahi hai ehe'au emiati, maearima ikoikiyai hanona poeai tekoroiti. <sup>3</sup> Ba ia ehore taba bo'ona 'abi ibabataiai ehinanakia etibaha, “Biraura hauna ha ekarahi eao ena umai uho kebatonakia. <sup>4</sup> Ena uho ekapo kapo otarainakia aonai, baikha hanona taearai te'eho, weiana roborobo temai teani orenakia. <sup>5</sup> Baikha bohuai te'eho, te'omu noanoa pokina hano enibinibi. <sup>6</sup> Ba beraura ekara'au raninai hubukia tepaea abomo te'ororo pokina ramukia aha'i. <sup>7</sup> Uho baikha 'ini boaboa aokiai te'eho, ia 'ini boaboa te'omu tetara tara abunakia. <sup>8</sup> 'A uho baikha hano namonai te'eho. Weiana buakia terama baikha hanona hinabu hamomo, baikha imabui harauhaea, mai baikha harau aihau. <sup>9</sup> Mai haiana hauna aia keona.”

*'Abi Ibabatai Pokina.*  
(Mk 4.10-12; Lk 8.9-10)

<sup>10</sup> Ba i'abana haukia temai Iesu herena tebakaina tetibaha, “Taba buonai maearima 'abi ibabataiai nohina benakia?” <sup>11</sup> Iesu ekia 'abi ebamuena etibaha, “Tirama ena obia aiarana aotipana bunikia hanona aba heremiai tewaira tina, 'a ia herekiai hanona aha'i. <sup>12</sup> Pokina maearima ha mai 'euna hauna bo'ona katebena, weiana ia 'euna hanona kebo'o harai. Maearima ha 'eunai aha'i hauna herenai papana nemiaho hauna abomo katea'i boina. <sup>13</sup> 'Abi ibabataiai nahina benakia ena poki hanona neiana, kateihana mo ia a'i kateiha tinana, katebahu mo ia aia a'i kateona mai obona a'i kateobo. <sup>14</sup> Ua buonai 'eka neianai

Isaia ena mahabanai 'abina hanona emai etohana,

‘Wai aia katobahu ai 'arimo

ia obona a'i katobo,

wai katoiha to'o baihana mo

ia a'i katoiha tinana.

<sup>15</sup> Weiana hanona maearima neiakia

aokia tewapura,

haiakia te'ou abunakia

mai mahakia tekaibunakia,

pokina mahakiai a'i temeihaiha,

haiakiai aia a'i teme'o,

aokiai obo a'i temeobo,

a'i temeraona kabe here'uai,

a'i mabamaurinakia paunai.’

Isa 6.9, 10

<sup>16</sup> “Wai hanona Tirama nibanamonimi, pokina mahamiai toiha mai haiamiai aia tuo'o. <sup>17</sup> 'Abi tohana au nahina benimi, mahabanai haukia mai bero haukia bo'okia tenuatae ki'a baha taba toiha haukia pateiha, ia a'i teiha, mai taba wai tuo'o haukia pateo'o, ia a'i teo'o.”

*'Abi Ibabatai Anina.*  
(Mk 4.13-20; Lk 8.11-15)

<sup>18</sup> “Ba tomobahu 'abi ibabataiai batobato anina hanona taba. <sup>19</sup> Hau ha Tirama ena obia aiarana 'abina pouna niona 'a obona a'i niobo aonai tiaporo nimai taba aonai tebatona hauna nia'i parena. Neiana hanona uho weiakia taearai te'eho 'abakia. <sup>20</sup> Uho bohu ahanai e'eho hanona hau ha Tirama ena 'abi aiana niona mai aonamona nia'i taea noanoana. <sup>21</sup> Ia ramuna a'i teriri harai buonai a'i nemiaho homa'ana. Tirama ena 'abi weiana paunai atetua 'ao bai'oata timai raninai beronai mo ni'eho. <sup>22</sup> Ba uho 'ini boaboa baiatakiai e'eho hanona hau ha Tirama ena 'abi aiana niona 'a hanopaka aonina mai kepu raonaraonakia tihore 'abi weiana tita'a ta'a abuna ba a'i nebua'a. <sup>23</sup> 'A uho hano namonai e'eho hanona hau ha Tirama ena 'abi aiana niona mai obona niobo. Ia hanona nebua'a buabuana hinabu hamomo nibarama, baikha imabui harauhaea, mai baikha harau aihau.”

*'Abi Ibabatai Witi Mai Awa.*

<sup>24</sup> Iesu 'abi ibabatai ha herekiai ehinana. “Tirama ena obia aiarana hanona matoha hau ha uho namokia ena umai ebatonakia. <sup>25</sup> 'A maearima ikoikiyai teparua rea aonai, ena 'ou hauna emai witi baiatakiai awa ebatonakia ba eka'a. <sup>26</sup> Witi te'omu buakia tekapo ahi raninai, awa abomo

tekere. <sup>27</sup> Poki hauna ena ta'ara'i haukia temai herena te'abi tetibaha, 'Poki haumu e, oi emu umai uho namokia obatonakia, ia awa hanona ae'eai temai?'

<sup>28</sup> Ia ekia 'abi ebamuena etibaha, 'Ou hauna ha naiana e'babaina.' Ena ta'ara'i haukia tetibaha, 'Nonuatae kataeao awa katapuhu 'aunakia?' <sup>29</sup> Ia e'abi etibaha, 'Aha'i, pokina awa katopuhu 'aunakia raninai witi abomo awa kipokia a'i tomopuhu 'aunakia marikina. <sup>30</sup> Tomohabonakia terarua teme'omu haeamo keaomo witi iarikia ranina. Rani weianai hanona iarina haukia kahina benakia, 'Awa tomobararo 'uainakia katotoba 'ininakia kate'ara, ba witi kato bararonakia katomaianakia e'u paraboa aonai.' ” ”

*'Abi Ibabatai Tuaba Uhona.*  
(Mk 4.30-32; Lk 13.18-19)

<sup>31</sup> Iesu 'abi ibabatai ha herekiai ehinana. "Tirama ena obia aiarana hanona matoha tuaba uhona 'abana. Weiana hau ha ea'ina ena umai ebatona. <sup>32</sup> Uho ikoikiai baiatakiai ia hanona e'aera 'aera 'aki, iamo eomu raninai ia hanona eapa'ua ba umai batobato tabakia ikoikiai eberenakia, matiu hai eao ubi roborobokia timai weia kakanai tiarai."

*'Abi Ibabatai Bakupu Muramurana.*  
(Lk 13.20-21)

<sup>33</sup> Iesu 'abi ibabatai ha haeamona ehinana. "Tirama ena obia aiarana hanona matoha bakupu muramurana 'abana. Babi'e ha bakupu mura murana ea'ina pani rarina aonai parawa bo'ona kipokia eu banai eu banaina eaomo parawa maikoina ekupu."

*'Abi Ibabatai Ekia Aka.*  
(Mk 4.33-34)

<sup>34</sup> Iesu 'abi neiakia ikoikiai to'u haukia ehinabenakia hanona 'abi beronai a'i ehina benakia, ia 'abi ibabataiai mo ehinabenakia. <sup>35</sup> Neiana hanona mahabanai hauna ehinana hauna nibatohana. "Ka'abi benakia raninai 'abi ibabataiai kahina benakia, hanopaka erama raninai emai mo bariu taba bunikia haukia au kahore kahina pounakia."

Sal 78.2

*Witi Mai Awa 'Abi Ibabataina Anina.*

<sup>36</sup> Ba mako ehabonakia eao itu aonai etoto, i'abana haukia temai herena te'abi tetibaha, "Abi ibabatai neiana awa uma

aonai hauna heremaiai mohina hina haraina."

<sup>37</sup> Iesu e'abi etibaha, "Weiana uho namona ebatona hauna hanona au maearima nahuna. <sup>38</sup> Uma hanona hanopaka, uho namokia hanona Tirama ena obia aiarana maearimakia, awa hanona hau ki'a obona ena maearima. <sup>39</sup> 'Ou hauna weiana awa ebatonakia hauna hanona tiaporo. Iarina ranina hanona hanopaka puana, ariari haukia hanona aneru. <sup>40</sup> Awa ipuhu 'au ibararo irubai kate'ara ihobona hanona hanopaka puana kerama. <sup>41</sup> Au maearima nahuna e'u aneru kauhu ahinakia e'u aiara aonai beho tibaramana haukia mai aka ki'a tibabai haukia ikoinai katebararonakia. <sup>42</sup> Ia katehore iruba a'i ni'ao 'apua 'ekana aonai katekapo totonakia, weia katehai mai 'aki'akikia katearao'i arao'i. <sup>43</sup> Ba bero haukia hanona Hamakia ena obia aiarana aonai katea matoha beraura 'abana. Mai haiana hauna aia keona.

*Tirama Ena Obia Aiarana 'Abina Ibabataikia Aihau.*

<sup>44</sup> "Tirama ena obia aiarana hanona matoha kepu namona uma aonai ihore buni 'abana. Hau ha etabu ahina raninai ehore buni muena, mai aonamona eao ena taba maikoinai ekawa kawa ainakia moninai hano weiana mai umana ekawana.

<sup>45</sup> Haeamona Tirama ena obia aiarana hanona matoha kawakawa hauna ha hoea raia namona nitabuna 'abana. <sup>46</sup> Ba hoea raia namona 'akina ha etabu ahina raninai, ia eao ena taba maikoinai ekawa kawa ainakia moninai hoea raia weiana ekawana.

<sup>47</sup> Abomo Tirama ena obia aiarana hanona matoha re'e 'obuai tehorena weiana maia haeai haeai terewa 'abana. <sup>48</sup> Ba'eha haukia re'e ebonu raninai teberi 'auna poeai, ba temiati maia namokia pohea aonai teutanakia, 'a ki'a obokia hanona tene'enakia. <sup>49</sup> Hanopaka ena puai hanona ua kerama aiho. Aneru katemai bero haukia mai ki'a haukia katebina'anakia. <sup>50</sup> Ki'a haukia hanona iruba a'i ni'ao 'apua 'ekana aonai katekapo totonakia, weia katehai mai 'aki'akikia katearao'i arao'i."

*Kepu Mahamahakia Mai 'Ai'aikia.*

<sup>51</sup> Ba Iesu ebakainakia etibaha, "Abi neiakia ikoikiai obokia aba tuobo?" Ena 'abi tebamua tetibaha, "E, obokia aba

taobo.”<sup>52</sup> Ia ehina benakia etibaha, “Weiana paunai rauhubu poki haukia weiakia Tirama ena obia aiarana pouna aba te'jobina haukia ha ha hanona matoha itu poki hauna 'abana, ena ro'aro'a ikaihurinai kepu mahamahakia mai 'ai'aikia nia'i ahinakia.”

*Iesu Ena Aiara Haukia Tebaki'ana.*  
(Mk 6.1-6; Lk 4.16-30)

<sup>53</sup> Iesu 'abi ibabatai neiakia ehinanakia murinai 'eka weiana ehabona, <sup>54</sup> emai ena aiara marea aonai maearima eba'iohinakia hanona teta'u ta'u huri. Tebakai bakai tetibaha, “Hau nei ana aobero mai hiabu akakia neiakia ae'eai ea'inakia?”<sup>55</sup> Ia hanona kamuta hauna nahuna tohana, ia hinana atana Maria, uaho'abana hanona Iakobo, Iosepa, Simona mai Iuda. <sup>56</sup> Haibuna ikoikiai hanona neia kipokia nahamiaho. Ba hau nei ana taba neiakia ikoikiai ae'eai ea'inakia?”<sup>57</sup> Weiana ia tehore Iesu tebaki'ana. 'A Iesu ia ehina benakia etibaha, “Mahabanai hauna hanona katemariki aina, ia ena aiara mai ena itu haukia hanona a'i katemariki aina.”<sup>58</sup> Weiana ekia a'ikakauma aha'i paunai hiabu hoakia bo'okia weia a'i ebagai.

## 14

*Ba'uere Robe Hauna Ioane Ena 'Ari.*  
(Mk 6.14-29; Lk 3.19-20; 9.7-9)

<sup>1</sup> Rani weianai obia 'arana Herod hanona Galilea epoki aina aonai Iesu pouna eona. <sup>2</sup> Ba ena aka haukia ehinabenakia etibaha, “Ioane ba'uere robe hauna ahu'arina hauna 'ariai emue emai, weiana buonai hiabu akakia neiakia ia aonai tiaka.”

<sup>3-4</sup> 'Uaina raninai Herod hanona uaho'abana Pilipo atawana Herodia eatawana. Ba Ioane ba'uere robe hauna rani ikoinai Herod ehinabena etibaha, “Babi'e nei ana oatawana hanona a'i ebero.” Weiana paunai Herod 'abi ebaibeni Ioane tebirina wapura itunai tekaiabuna. <sup>5</sup> Herod ena nuatae Ioane keahu 'arina, ia maearima eta'u ainakia, pokina ia hanona mahabanai haunai tebaona.

<sup>6</sup> Rani ha Herod ena rama beraurana tatunai Herodia nahuna uahona to'u wairakiai ewa, ba Herod aona ebaonamo ki'ana. <sup>7</sup> Weiana Herod e'abi'uai uaho

herenai, ena 'abi'uai taburana ehinana weiana taba kenoiaina hauna kebena mo. <sup>8</sup> Hinana ena 'abiai uaho Herod enoina etibaha, “Bariu mo Ioane ba'uere robe hauna arana tihuai koutana kobena'u.”

<sup>9</sup> Obia 'arana hauna aona earo'ari. Ia ena 'abi'uai baki haukia wairakiai ehinana hauna paunai, 'abi ebaibeni uaho ena noi akana katebabaina. <sup>10</sup> Weiana euhunakia wapura ituna aonai Ioane 'akona tekabe hurina. <sup>11</sup> Ioane 'arana tihu aonai teutana temaiaina uaho tebena, ba uaho eaoaina hinana ebena. <sup>12</sup> Ioane i'abana haukia temai hauanina tea'ina teaoaina tehorena. Ba teao Iesu teba'jobina.

*Iesu Maearima Taha Ima Ebanianakia.*

(Mk 6.31-44; Lk 9.10-17; Io 6.1-13)

<sup>13</sup> Iesu pou weiana eona raninai ahiai ehe'au ikupaiana eao 'eka 'abaeana ha, maearima bo'ona 'uru nei ana teona hanona ekia aiara aekiai Iesu murinai teao. <sup>14</sup> Iesu ahiai eriri raninai to'u rarina eihana eaoko'o ainakia mai ekia inawa ebanamonakia.

<sup>15</sup> Aba erabirabi aonai i'abana haukia teao Iesu herena te'abi tetibaha, “Neiana hanona 'eka 'abaeana mai aba kerabi. To'u haukia mouhunakia temeao, aiara baika aokiai kipokia ekia aniani temekawa hanona kenamo.”<sup>16</sup> Iesu e'abi etibaha, “Ia hanona a'i kauhunakia, wai taba ha katobenakia kateani.”<sup>17</sup> I'abana haukia te'abi tetibaha, “Ai heremaiai hanona parawa ima mai maia rua 'akimo.”<sup>18</sup> Iesu e'abi etibaha, “Tomaianakia here'u.”

<sup>19</sup> Ba maearima ehina benakia tubu ahanai katemiati, weiana parawa ima mai maia rua ea'inakia ea'a taea kupa Tirama ebanamona ba parawa ehobinakia, i'abana haukia ebenakia teaoai maearima tebenakia. <sup>20</sup> Ia ikoikiai teaniani teani 'ari, i'abana haukia aniani harikia tebararo areha ikoinai harauhaea rua tebabonunakia. <sup>21</sup> Weiakia teaniani haukia hanona taha\* ima (5,000) 'abana, hau mo tetuabinakia babi'e mai miori hanona a'i tetuabinakia.

*Iesu Bei Kapenai Eka'a.*

(Mk 6.45-52; Io 6.16-21)

<sup>22</sup> Weiana murinai Iesu beronai i'abana haukia ahiai ebaehe 'aunakia kate'uai kateao obu abiranai, aonai ia

\* 14:21: (21) 1,000 (thousand)



hanona maearima euhunakia kateka'a.  
<sup>23</sup> Maearima euhunakia teka'a murinai, ia ikupaiana oeo ha ai ekara'au kebahuba'ari. Rabi emai aonai ia hanona ikupaiana weia. <sup>24</sup> 'A ahi hanona abakarahi 'akaumana obu kapenai, roio niahua ahuana pokina baura hanona wairakiai emai. <sup>25</sup> Raurani wapuranai kokoro'u ibaihauna ni'arara ihobonai Iesu bei kapenai eka'a eao herekia. <sup>26</sup> I'abana haukia Iesu bei kapenai eka'a teihana raninai teta'u ki'a, mai ta'ukia teio tetibaha, "Ei, biriua." <sup>27</sup> Iesu beronai mo ehina benakia etibaha, "Tomobakiro, na au, a'i katota'u."

<sup>28</sup> Ba Petero etae e'abi etibaha, "Obi-apaka e, oi tohamu raninai mo'abi, bei kapenai mawahi heremu." <sup>29</sup> Iesu e'abi etibaha, "Omai." Weiana Petero ahiai eriri bei kapenai eka'a ha ha Iesu herena eao. <sup>30</sup> 'A roio rarina eihana raninai eta'u, beiai nepurupuru aonai eio etibaha, "Obi-apaka e, mobamaurina'u!"

<sup>31</sup> Beronaimo Iesu imana etiu ahina Petero ea'ina ehinabena etibaha, "Emu a'ikakauma e'aera haumu, taba buonai aomu ekai'au kai'au?" <sup>32</sup> Ba terarua ahi ahanai tehe'au hanona baura e'oko. <sup>33</sup> I'abana haukia weia ahi aonai haukia Iesu tekutiaina te'abi tetibaha, "Abi tohana oi hanona Tirama Nahuna."

*Iesu Genesaretai Inawa Haukia Eba-maurinakia.*  
*(Mk 6.53-56)*

<sup>34</sup> Obu tebeau banai temai Genesareta hanonai tekara'au. <sup>35</sup> 'Eka weiana haukia Iesu teiha 'iobi aina hanona 'abi teuhuna eao aiara weiakia herekia haukia herekia, ba maearima weiakia ekia inawa haukia ikoikiai temai ainakia herena. <sup>36</sup> Maearima Iesu tenoina inawa haukia ena habuni puana mo pateai 'apuana. Ba tea'i 'apuana haukia ikoikiai hanona tenamo.

## 15

*Maearima Ekia Rauhubukia Mo Tiba'iobinakia.*  
*(Mk 7.1-13)*

<sup>1</sup> Rani weianai Parisea haukia mai rauhuhu poki haukia baika Ierusalem mai temai Iesu herena tebakaina tetibaha, <sup>2</sup> "Aehoma buonai i'abamu haukia 'ai'ai

ekia hoahoa tikabenakia? Imakia a'i teutu 'uai, ia tianiani mo."

<sup>3</sup> Iesu ekia 'abi ebamuena etibaha, "Aehoma buonai wai Tirama ena rauhuhu 'abina tukabena, ia emi 'ai'ai ekia hoahoa tua'i taeanakia? <sup>4</sup> Pokina Tirama e'abi etibaha, 'Hamamu mai hinamu komariki ainakia,' abomo 'Hau ha hamana 'ao hinana keururu aina hauna hanona kateahu 'arina.' <sup>5</sup> Ia wai hanona emi ba'iobiai tu'abi tetibaha, 'Hau ha hamana 'ao hinana kehina benakia ketibaha, "Kepu neiakiai pabarainimi haukia hanona kabaibeni Tirama 'euna." <sup>6</sup> Ba hau weiana hanona hamana mai hinana koku weianai a'i kemariki ainakia.' Taeara nahomanai wai Tirama ena 'abi taba aha'iai tubaona, ia 'ai'ai ekia hoahoa mo tua'i taeanakia.

<sup>7</sup> Bahaorea haumi e, Isaia emahabanai harai wai ahamiai e'abi etibaha,

<sup>8</sup> "Maearima neiakia hanona pinakia kapenai mo ata'u tibanamona, 'a aokia hanona atau'a 'akinai.

<sup>9</sup> Tekutiai 'abaeana'u, pokina tiba'iobi rauhukia hanona maearima ekia rauhuhu 'abikia mo."

Isa 29.13

*'Abi Maearima Niba'opuna.*  
*(Mk 7.14-23)*

<sup>10</sup> Iesu mako eaparinakia teao herena, ehinabenakia etibaha, "Katobahu abomo obona katobo. <sup>11</sup> Taba pinai nitoto niao aoi hauna hanona Tirama wairanai maearima a'i niba 'opuna, ia taba pinai nikarahi hauna maearima niba'opuna."

<sup>12</sup> Ba i'abana haukia temai herena tebakaina tetibaha, "Parisea haukia aiamu teona raninai aokia teopuere hanona o'iobina?"

<sup>13</sup> Ekia 'abi ebamuena etibaha, "Matiu ikoikiai Hama'u kupai nemiaho hauna a'i ebatonakia haukia mai ramukia kepuhu 'aunakia. <sup>14</sup> Tomohabonakia. Ia mahakia teki'a ba maha ki'a haukia te'uai ainakia. Maha ki'a hauna ha kehore maha ki'a hauna ha kebaka'ana raninai terarua 'uriai katetoe."

<sup>15</sup> Ba Petero e'abi etibaha, "Abi ibabatai neiana anina mohina hina haraina here-mai." <sup>16</sup> Iesu ia ehina benakia etibaha, "Wai abomimo obo a'i tuobo oho mo? <sup>17</sup> Taba ikoikiai pinai titoto tiao mo'oru haukia haeamona mo'oruai tikarahi timai

atapakai hanona a'i to'jobina? <sup>18</sup> 'A taba pinai tikarahi haukia hanona aoai timai tikarahi, ba weiakia haukia tihore maearima tiba'opuna. <sup>19</sup> Weiana aoai nikarahi hauna hanona raona ki'a obokia maearima niao ainakia katehuahu, katenabau, katemaha porepore, katebainao, katebai'oi mai kate'uahi 'uahi. <sup>20</sup> Hoahoa weiakia haukia maearima tiba'opuna Tirama wairanai, ia imaka a'i nahautu nahaniani hauna maearima a'i niba'opuna."

*Kanana Babi'ena Ena A'ikakauma.*  
(Mk 7.24-30)

<sup>21</sup> Iesu 'eka weiana ehabona Turo mai Sidono hanokia eao. <sup>22</sup> 'Eka weianai Kanana babi'ena ha emai herena ba eapari etibaha, "Obiapaka Davida Nahuna e, moaoko'o aina'u, auba ki'a obona nahu'u uahouahona aonai nibahaiara ki'a bahana." <sup>23</sup> 'A Iesu babi'e ena 'abi a'i ebamuena, ba i'abana haukia Iesu tenoi hao noi haona tetibaha, "Mouhuna mekatu'a, pokina ia murikai nimai niapari to'ona."

<sup>24</sup> Iesu e'abi etibaha, "Tirama au euhuna'u hanona Isaraela mamoeikia te'akauma haukia mo paukiai." <sup>25</sup> Babi'e emai Iesu wairanai ekai pehu, e'abi etibaha, "Obiapaka e, mobaraina'u." <sup>26</sup> Iesu babi'e ena 'abi ebamuena etibaha, "Miori ekia aniani kahane'ena waeha kateani hanona a'i enamo." <sup>27</sup> Babi'e etibaha, "Abi tohana, ia mo obia hauna ena itara ai, aniani 'ika'ikakia ti'eho ba'ai hanona waeha abomo tiani." <sup>28</sup> Ba Iesu ia ehinabena etibaha. "Babi'e e, emu a'ikakauma hanona eapa'ua, emu nuatae tabana hanona kerama." Beraura hoana ihobonai nahuna uahouahona emauri mauri.

*Iesu Inawa Haeai Haeai Ebamaurinakia.*

<sup>29</sup> Iesu 'eka weiana ehabona, Galilea obu poena ekana eao, ba oeoai ekara'au emiati. <sup>30</sup> Mako rarina temai herena, temaiainakia haukia hanona 'ome, maha ki'a, ima kobekobe, maeakia teki'a, abomo inawa haukia haeaihaeai Iesu herenai tehorotinakia, ba ia ehore eba maurinakia. <sup>31</sup> Maeakia teki'a haukia te'abi 'abi, ima kobekobe haukia imakia tebero, 'ome haukia teka'a, mahakia teki'a haukia teihaiha. Maearima hoa neiakia teihanakia

raninai teta'u ta'u huri, weianai Isaraela ena Tirama tebanamona.

*Iesu Maearima Taha Bani Ebanianakia.*  
(Mk 8.1-10)

<sup>32</sup> Rani weianai Iesu i'abana haukia eaparinakia temai herena, ehina benakia etibaha, "Au maearima neiakia naoko'o ainakia, pokina ia hanona aba wapu aihau au here'uai temiaho taba ha a'i tiana, mai mare'akia kauhunakia kateka'a hanona a'i nanuatae, pokina ha taearai mare'a a'i meba'ehona." <sup>33</sup> I'abana haukia te'abi tetibaha, "Neiana hanona hano 'abaeana, aniani ae'eai kata'inakia mako nahomana katabanianina?" <sup>34</sup> Iesu ebakainakia etibaha, "Aniani heremai bita?" Ia te'abi tetibaha, "Parawa 'abaihau hamomo mai maia papakia bita 'aki mo."

<sup>35</sup> Iesu ehore to'u haukia ehina benakia 'anoai katemiati. <sup>36</sup> Ba parawa 'abaihau hamomo mai maia ea'inakia Tirama ebanamona, epua ehobi 'iti 'itinakia, i'abana haukia ebenakia ba i'abana haukia maearima tebenakia. <sup>37</sup> Maearima ikoikiai teanaiani teani'ari, i'abana haukia aniani harikia areha 'abaihau hamomo tebabonunakia. <sup>38</sup> Weia teaniani haukia tetuabinakia hanona 4,000, 'a babi'e mai miori hanona a'i tetuabinakia. <sup>39</sup> Iesu to'u haukia euhunakia teka'a murinai ahiai ehe'au ebeau banai Magadan hanona eao.

## 16

*Parisea Haukia Tenuatae Hoa Ha Kateihana.*

(Mk 8.11-13; Lk 12.54-56)

<sup>1</sup> Parisea haukia mai Sadukea haukia temai Iesu herena tehobona, tenoina hoa ha keba ihanakia katebatohana ia hanona kupai emai. <sup>2</sup> Iesu ehinabenakia etibaha, "Rabirabi beraura kaihu niaoaina rani-nai, tu'abi totibaha, 'Mara rani kenamo pokina kupa nipairu.' <sup>3</sup> Kerani raurani tu'abi totibaha, 'Bariu rani neianai abara mai baura katemai pokina kupa nipairu auhao ekaiabu haraina.' To'jobina kupai hoa tabakia katerama, ia aehoma buonai rani neianai hoa tabana kerama hauna a'i to'jobina? <sup>4</sup> A'ikakauma aha'i mai aka ki'a uruna haumi, hoa tutabu, ia hoa ha a'i kabenimi, mahabanai hauna Iona ena hoa mo kabaihanimi." Ba Iesu ehabonakia herekiai ekaobo.

*Parisea Ekia Bakupu Muramurana.*  
(Mk 8.14-21)

<sup>5</sup> Weiana i'abana haukia tekabanai obu abiranai raninai parawa tereanakia a'i tea'i. <sup>6</sup> Ba Iesu ehina benakia etibaha, "Mahami katoba no'a, Parisea haukia mai Sadukea haukia ekia bakupu muramurana herenai kato'ima 'ima harainimi." <sup>7</sup> I'abana haukia kipokia te'abi'abi tetibaha, "Abi neiana nehinana pokina parawa ha a'i hamaiaina." <sup>8</sup> Iesu ekia raona e'jobina ba ehina benakia etibaha, "A'ikakauma papana haumi e, aehoma buonai kipomi parawa ha a'i toa'ina hauna paunai tu'abi'abi? <sup>9</sup> Aomi a'i niea baha parawa ima 'aki maearima taha ima (5,000) teani'ari mai harikia areha bita tobabonu hauna a'i turaona 'inina? <sup>10</sup> Abomo parawa 'abaihau hamomoaimo maearima taha bani (4,000) teani'ari, harikia areha bita tobabonu haukia a'i toraona'ini? <sup>11</sup> Aehoma buonai aomi a'i niea? Au hanona parawa robana a'i nahuna, ia Parisea haukia mai Sadukea haukia ekia bakupu muramurana herenai kato'ima'ima harainimi."

<sup>12</sup> 'Abi weianai aokia ea, te'jobina ia hanona parawa ibakupuna muramurana robana a'i niahuna 'a ia hanona Parisea haukia mai Sadukea haukia ekia ba'jobi 'abikia herekiai kate'ima'ima harainakia.

*Petero Iesu Ehina Pouna Keriso.*  
(Mk 8.27-30; Lk 9.18-21)

<sup>13</sup> Iesu Kaisarea Pilipo hanokiai ekara'au aonai, i'abana haukia ebakainakia etibaha, "Maearima taba na tihoma, au maearima nahuna hanona tai?" <sup>14</sup> Ena 'abi tebamuna tetibaha, "Baika ti'abi Ioane ba'uere robe hauna, baika ti'abi Elia, haeamona baika ti'abi Ieremia 'ao mahabanai hauna ha." <sup>15</sup> Iesu haeamona ebakai muenakia etibaha, "Ia wai taba na tuhoma, au hanona tai?"

<sup>16</sup> Simona Petero e'abi etibaha, "Oi hanona Keriso, mauri Tiramana Nahuna."

<sup>17</sup> Iesu e'abi etibaha, "Simona Iona nahuna e, Tirama ebanamoni'o, pokina maearima ha 'abi neiana oi a'i eba'jobini'o 'a Hama'u kupai nemiaho hauna eba'jobini'o. <sup>18</sup> Nahina beni'o, oi hanona Petero, wairo neiana ahanai e'u marea kabakorina, 'ari ena hiabu e'u marea neiana a'i keba ibiuna. <sup>19</sup> Au kahore Tirama ena obia aiarana ikaikauna

hiabuna kabeni'o, ba hanopaka ai kobirinakia haukia abomo kupa ai kebirinakia, hanopaka ai korubunakia haukia abomo kupa ai kerubunakia." <sup>20</sup> Ba Iesu i'abana haukia eharabunakia, hau ha haianai a'i kate'abi ia hanona Keriso.

*Iesu Kehaiara Mai Ke'ari 'Abikia Ehinana.*

(Mk 8.31—9.1; Lk 9.22-27)

<sup>21</sup> Rani weianai Iesu i'abana haukia eba'jobi ramanakia ia hanona keao toha Ierusalem a' weia Iuda ekia maearima apa'uakia, robe haukia apa'uakia mai rauhuhu poki haukia hauna katebahaiara ki'ana ba kateahu 'arina, ia wapu ibaihau-nai Tirama kehore ia kebamikiri muena.

<sup>22</sup> Petero ehore Iesu ebakapare haiahaiai ehinabe pahihina etibaha, "Obiapaka e, ua a'i kehoma, oi hanona ua a'i katehomani'o." <sup>23</sup> Iesu ekori kabe Petero erikena etibaha, "Satani e, here'uai mokatua, oi au e'u taeara nukaiabuna, pokina emu raona raona hanona Tirama 'eunai aha'i ia maearima 'eukiai emai."

<sup>24</sup> Ba Iesu i'abana haukia ehinabenakia etibaha, "Hau ha kenuatae au muri'uai keka'a raninai ia kipona ena mauri kehabona, ena matiu ibiri ropo kebuana au muri'uai keka'a. <sup>25</sup> Hau ha kipona ena mauri nenuatae ai ki'ana hauna hanona keba'akaumana, ia hau ha au pau'uai kipona ena mauri kehabona hauna hanona kea'i muena. <sup>26</sup> Hau ha hanopaka maikoina ia'inai ena mauri keba'akaumana hanona ena namo taba? 'Ao hau ha ena mauri tabai kekawa muena? <sup>27</sup> Au Maearima Nahuna hanona Hama'u nuabinai kamai e'u aneru kipokia, rani weianai maearima ha ha ekia aka ihobokiai 'arafia kabenakia. <sup>28</sup> 'Abi tohana au wai nahinabenimi, baika neia tikoroti haukia a'i kate'ari baha keaomo Au Maearima Nahuna kupa aiarana obia hiabunai kamai maearima baiatakiai hanona kateihana'u."

## 17

*Iesu Ihana Ehaeai.*  
(Mk 9.2-13; Lk 9.28-36)

<sup>1</sup> Wapu 'abaihau murinai Iesu ehore Petero mai Iakobo hatina Ioane ohi ia ikupaiakia mo e'uaiainakia oeo apa'uana ha ai tekara'au. <sup>2</sup> Ba weia ia wairakiai Iesu ihana ehaeai, wairana ea obo matoha

beraura 'abana abomo ena habuni tepore ki'a te'imare 'imare. <sup>3</sup> Mawa'eai Mose mai Elia tewaira tina ia wairakiai, Iesu kipokia te'abi 'abi. <sup>4</sup> Ba Petero Iesu ehinabena etibaha, "Obiapaka e, aika neia nahami-aho hanona enamo, oi konuatae raninai au i'aau aihau kababainakia ha oi 'eumu ha Mose 'euna ha Elia 'euna."

<sup>5</sup> Petero ni'abi ohomo aonai, 'auhao pore obona emai ebahu abunakia, ba aia ha 'auhao aonai emai e'abi etibaha, "Naiana hanona au naha'u, e'u raona'au, au ia naonamoaina, aiana katona."

<sup>6</sup> I'abana haukia aia weiana teona raninai te'eho 'anoai te'umuti, teta'u wairai. <sup>7</sup> 'A Iesu eka'a emai herekia, ea'i 'apuanakia e'abi etibaha, "A'i katota'u, tomomikiri." <sup>8</sup> Ba ia tea'a taea hanona tai a'i teihana ia Iesu mo ikupaiana.

<sup>9</sup> Oeoi teriri raninai Iesu eharabunakia etibaha, "Taba toihana hauna hau ha hianai a'i kato'abi keaomo au maearima nahuna 'ariai kamikiri mue." <sup>10</sup> Ba i'abana haukia tebakaina tetibaha, "Taba buonai rauhuhu poki haukia ti'abi Elia hanona kemai 'uai?"

<sup>11</sup> Iesu ekia 'abi ebamuena etibaha, "'Abi tohana, Elia hanona kemai haeamona taba kehorehore harainakia. <sup>12</sup> Ia au wai nahina benimi, Elia hanona aba emai, maearima ia a'i teiha 'iobiaina ia herenai ekia nuatae akakia tebabainakia, ihobona uahomanai au maearima nahuna hau'u ua katebahaiara aiho." <sup>13</sup> Ba i'abana haukia obona teobo, ia hanona Ioane ba'uere robe hauna robana eahuna.

*Iesu Miori Ha Aonai Auba Ki'a Obona Eu'u Ahina.*

*(Mk 9.14-29; Lk 9.37-42)*

<sup>14</sup> Weiana temue to'u haukia herekiai tekara'au raninai, hau ha emai Iesu wairanai ekaipehu e'abi etibaha, <sup>15</sup> "Obiapaka e, Naha'u moaoko'oaina pokina ia hanona nawa ni'ariaina ena haiara eapa'ua, rani baika kipona iruba ai neno'au 'ao beiai nitobu. <sup>16</sup> Amaiaina i'abamu haukia herekia, katebanamona hanona a'i etainakia."

<sup>17</sup> Iesu ehinabenakia etibaha, "A'ikakauma aha'i mai haia po'o uruna haumi, heremiai kabapahihi kamiaho keaomo aita? Miori tomaiaina here'u." <sup>18</sup> Iesu auba ki'a obona ebatana, ba auba ki'a obona miori aonai ekarahi, miori beronai enamo. <sup>19</sup> Weiana murinai i'abana haukia

bunianai teao Iesu tebakaina tetibaha, "Aehoma buonai ai auba ki'a obokia katau'u ahina hanona a'i etainamai?"

<sup>20</sup> Iesu ekia 'abi ebamuena etibaha, "Pokina emi a'ikakauma teko'iko'i 'aki, 'Abi tohana au wai nahina benimi, emi a'ikakauma petuaba uhona 'abana raninai, oeo neiana pohinabena, 'Moibiu moao weia' hanona beronai peibiu peao, taba ha heremi a'i kepahihi ki'a baha.

<sup>21</sup> Ia taba nahomakia hanona kipokia a'i katekarahi 'apua, ia mo bahuba'ari ai mai ani robeai hanona katekarahi."

*Iesu Ena 'Ari Pouna Ehina Muen.*

*(Mk 9.30-32; Lk 9.43-45)*

<sup>22</sup> I'abana haukia ikoikiai temai Galileai tebahamomo, ba Iesu ehina benakia etibaha, "Au maearima Nahuna hanona ihina hinai kaeao ba kateahu'arina'u, <sup>23</sup> ia wapu ibaihaunai Tirama kebamikiri muena'u kamauri mauri." Weiana teona raninai i'abana haukia aokia eaoko'o.

*Iesu Petero Ohi Marea Monina Tebaibeni.*

<sup>24</sup> Iesu mai i'abana haukia teao Kaperanaumai tekara'au raninai, marea robe takitina tibararo haukia temai Petero herena tebakaina tetibaha, "Emi poki hauna Marea Robe takitina nibaibeni?" <sup>25</sup> Petero e'abi etibaha, "E, nibaibeni." Ba Petero eao itu aonai etoto a'i ni'abi baha aonai, Iesu Petero ebakaina etibaha, "Simona e, oi taba na nuho? Hanopaka obiakia hanona nahukia herekiai takiti tia'i 'ao maearima haeai herekiai tia'i?" <sup>26</sup> Petero e'abi etibaha, "Maearima haeai herekiai tia'i." Iesu etibaha, "O'abi harai, weiana nahukia hanona takiti a'i katehoroti. <sup>27</sup> Ia maearima neiakia aokia a'i hamaba opuerenakia paunai, moao obuui monaku, maia koberi'au 'uaina hauna pinana kohaokauna aonai moni kotabu ahina, koa'ina kobenakia hararua eka takiti 'arana."

## 18

*Tai Keapa'ua?*

*(Mk 9.33-37; Lk 9.46-48)*

<sup>1</sup> Rani weianai i'abana haukia temai Iesu herena tebakaina tetibaha, "Tai hanona eapa'ua ki'a baha Tirama ena obia aiarana aonai?"

<sup>2</sup> Weiana Iesu miori papana ha eaparina emai baiatakiai ebakorotina. <sup>3</sup> Ba ehina



benakia etibaha, “Abi tohana au wai nahina benimi, aomi a'i katoba ko'iko'ina miori papakia 'abakiai a'i katoao raninai wai hanona Tirama ena obia aiaranai a'i katokatoto. <sup>4</sup>Ua buonai hau ha ke'aiaunu miori papana neiana 'abanai keao hauna, ia hanona keapa'ua ki'a baha Tirama ena obia aiarana aonai.

<sup>5</sup> Hau ha au ata'uai miori papana nahomana kea'i taeana hanona au abo'umo aba ea'i taeana'u.

*Baihobo Kebabaina Hauna Herenai Keki'a Wairai.*

*(Mk 9.42-48; Lk 17.1-2)*

<sup>6</sup> Ia hau ha au tia'ikakaumana'u miorina nahomana ha behoi kehorotina hauna hanona iata rarina 'akonai pate-toba 'auna 'aku kunakunanai patekapo uhuna petono 'ari hanona penamo.

<sup>7</sup> Hanopaka neiana hanona keki'a wairai, pokina ia kehore maearima keaoainakia ki'ai kehorotinakia. Baihobo uahomakia hanona katerama, ia baihobo kebabaina hauna herenai keki'a wairai.

<sup>8</sup> Imamu 'ao aemu ki'ai kehorotini'o raninai kokabe hurina kone'e 'akaumana. Ba imamu ki'a obonai 'ao aemu ki'a obonai mauri banaibanai 'ekana'i kokatoto hanona enamo, ia a'i enamo imamu rua mai aemu rua weiakia kateaoaini'o a'i ni'ao 'apua ni'ara banaibanai irubana'i katekapo totoni'o.

<sup>9</sup> Mahamu ki'ai kehorotini'o raninai ko'ipa ahina kone'e 'akaumana. Mahamu hamonai mauri banaibanai 'ekai kokatoto hanona enamo, ia a'i enamo mahamu rua namokiai a'i ni'ao 'apua irubana'i katekapo totoni'o.

*'Abi Ibabataina Mamoe E'akauma.*

*(Lk 15.3-7)*

<sup>10</sup> Kato'ima'ima harainimi miori papakia neiakia ha taba aha'iai a'i katobaonakia, pokina ekia aneru kupa ai hanona rani ikoinai Hama'u kupai nemiaho hauna katehinabena ketaina. <sup>11</sup> Au maearima Nahuna hanona te'akauma haukia kabamaurinakia paunai amai.

<sup>12</sup> Wai aea turaona aihona? Hau ha ena mamoe hinabu hamomo, ba hamona pe'akauma raninai, imabui bariabui 'ababani hamomo oeoai pehobonakia ba peao e'akauma hauna petabuna. <sup>13</sup> 'Abi tohana au wai nahina benimi, petabu ahina raninai, aona penamo wairai weiana hamona

etabu ahina hauna paunai ba weiakia imabui bariabui 'ababani hamomo a'i te'akauma haukia paukia aha'i. <sup>14</sup> Weiana ihobonai Hamami kupai hauna nenuatae miori papakia neiakia ha a'i ke'akauma.

*Uaho'abamu Heremuai Beho Ebabaina Hauna Kobaberona.*

<sup>15</sup> Uaho'abamu ki'a ebabai here-muai raninai koao herena torarua mo kato'abi'abi aina ena babai ki'a haianai kohinahina haraina, ba aiamu kea'i taeana raninai oi hanona uaho'abamu abanua'i muena. <sup>16</sup> Ia aiamu a'i keona raninai maearima ha 'ao rua koaoainakia herena, ba maearima weiakia rua 'ao aihau 'abi kato'abi'abi ainakia haukia ikoikiai katebatohanakia. <sup>17</sup> Ia keubo aiami a'i keona raninai, robe haukia a'ia'i harainai kohina karahina, ba kebaki'a aiakia a'i keona raninai rama haeai haunai 'ao ki'a haunai katobaona.

*Ibiri 'Ini, Mai Iribu Ta'i.*

<sup>18</sup> 'Abi tohana au wai nahina benimi, taba hanopakai katobirinakia hanona kupai abomo kebirinakia 'a taba hanopakai katorubunakia hanona kupai abomo kerubunakia.

<sup>19</sup> Haeamona nahinabe muenimi, hanopakai torarua taba ha aomi hamonai katonoi aina hauna Hama'u kupai nemiaho hauna kebabaina 'eumi. <sup>20</sup> Maearima rua 'ao aihau au ata'uai tito'u, au hanona weia ia herekia'i.”

*'Abi Ibatataina Ta'ara'i Hauna Ena Ki'a Ai Ehinahao.*

<sup>21</sup> Weiana Petero eao Iesu herena ebakaina etibaha, “Obiapaka e, uaho'aba'u kebabai ki'a here'uai hanona rani bita ena ki'a kahina haona? Rani 'abaihau hamomo, 'u?”

<sup>22</sup> Iesu e'abi etibaha, “Rani 'abaihau hamomo aha'i, ia rani imabui haraurua ikoinai rani 'abaihau hamomo 'abana kohina haonakia.

<sup>23</sup> Weiana Tirama ena obia aiarana hanona matoha obia arana ha 'abana, ena ta'ara'i haukia herenai taba bita tea'i haukia kebaberonakia. <sup>24</sup> Ua buonai ena aka ea'i ramana hanona ia herenai Kina kerepu\* harau haea ea'ina hauna temaiaina ia wairanai. <sup>25</sup> Ia poki hauna ena moni 'arana kehorena hanona imanai a'i etaina, ba poki hauna ia ehinabena

\* 18:24: (24) 1,000,000 (million)

etibaha, 'Oi mai atawamu, nahumu mai emu taba ikoikiai katekawa kawainakia monikiai moni oa'ina hauna 'arana kohorena.' <sup>26</sup> Weiana ta'ara'i hauna ena poki hauna wairanai ekai pehu eba'amena, 'Rani papana mobai'ima, ba a'ina hauna 'arana maikoina kahorena.' <sup>27</sup> Poki hauna ta'ara'i hauna eaoko'oaina, ba moni ea'ina hauna ekakina ba euhuna eka'a.

<sup>28</sup> Ba ta'ara'i hauna ekarahi eao raninai 'abana ha etabu ahina hau weiana hanona ia herenai Kina harau rua ea'ina, emikiri hau weiana ea'i 'inina 'akona ebebena e'abi etibaha, 'E'u moni oa'ina hauna 'arana mohorena.'

<sup>29</sup> Ba ia 'abana ekai pehu eba'amena, 'Rani papana mobai'ima 'arana aba kahorena.' <sup>30</sup> 'A ia a'i enuatae, hau weiana eaoaina wapura 'ekanai ehorotina weia kemiaho keaomo 'ara kehore obona.

<sup>31</sup> Ta'ara'i haukia baika hoa weiana teihana raninai aokia ehaiara, teao ekia poki hauna herena taba erama hauna pouna tehinana. <sup>32</sup> Ba poki hauna ta'ara'i hauna weiana eaparina emai, ehinabena etibaha, 'Oi ta'ara'i haumu ki'a obomu, onoina'u paunai moni oa'ina hauna maikoina akakinakia. <sup>33</sup> Ia aehoma buonai 'abamu a'i oaoko'o aina ihobona au aoko'o aini'o 'abana?' <sup>34</sup> Poki hauna eopuere ki'a ta'ara'i hauna eba wapurana haiara katebahoaina keaomo moni weiana ea'ina hauna 'arana maikoina kehore obona.

<sup>35</sup> Weiana paunai wai ha ha uaho'abami aomi tohakiai ekia ki'a a'i katohina haonakia raninai Hama'u kupai nemiaho hauna abomo ua kehomanimi."

## 19

### *Hau Ha Atawana Kebakarahina.* (Mk 10.1-12; Lk 16.18)

<sup>1</sup> Iesu 'abi weiakia ebaorenakia murinai, Galilea ehabona eao Iuda hanonai Ioridana ate abihana tainai. <sup>2</sup> Mako rarina 'akina ia murinai teao weia ekia inawa ebanamonakia.

<sup>3</sup> Weiana Parisea haukia baika temai Iesu herena tehobona tebakaina tetibaha, "Hau ha ena raona baika buonai atawana kebakarahina hanona mai ena bero ha 'ao aha'i?"

<sup>4</sup> Iesu ekia 'abi ehamuena etibaha, "Wai Puka Robena a'i totuabina, u? Bahabana 'akinai barama Tiramana ehore maearima ehabainakia hau mai

babi'e ohi. <sup>5</sup> Ba e'abi etibaha, 'Weiana buonai hau kehore hamana mai hinana kehabonakia, ia atawana ohi katebahamomo, terarua hanona hauani hamona.' <sup>6</sup> Ua buonai ia hanona hamona ia rua aha'i. Weiana paunai Tirama ehore eba hamomonakia hauna hau ha a'i keboa 'apuana."

<sup>7</sup> Parisea haukia tebakai muena tetibaha, "Aehoma buonai Mose ehinabenamai, hau kenuatae raninai bakarahi marerena kererena atawana kebena ba kebakarahina?"

<sup>8</sup> Iesu ekia 'abi ehamuena etibaha, "Wai emi ao pahihi paukiai Mose bero ebenimi atawami katoba karahinakia, ia popouna 'akinai hanona ua homana aha'i. <sup>9</sup> Au wai nahinabenimi, hau ha atawana a'i enabau ia ebakarahi 'abaeana ia haeamona babi'e mahamahana ha eatawana, hau weiana hanona nabau hoana ehabaina."

<sup>10</sup> I'abana haukia Iesu tehinabena tetibaha, "Hau mai babi'e baiatakiai ua niho raninai, hau a'i pehawainibe hanona penamo."

<sup>11</sup> Iesu ekia 'abi ehamuena etibaha, "Abi naiana maearima ikoikiai herekiai hanona a'i ketaina, ia weiakia Tirama ea'i taeanakia haukia herekiai hanona ketaina. <sup>12</sup> Maearima baika hanona a'i katehawainibe, hau baika hanona uahomanai terama a'i katehawainibe, hau baika hanona maearima tehore teuanakia a'i katehawainibe, hau baika hanona Tirama ena obia aiarana paunai hawainibe a'i tiraonana. Tai herenai etaina hauna 'abi neiana kea'i taeana."

### *Iesu Miori Papakia Ebanamonakia.* (Mk 10.13-16; Lk 18.15-17)

<sup>13</sup> Rani weianai maearima baika nahukia temaiainakia Iesu herena ahakiai kehao'au kehabuha'ari, ia i'abana haukia tehore maearima weiakia terikenakia, <sup>14</sup> Iesu e'abi etibaha, "Miori papakia tomo habonakia, temai here'u a'i kato kaiabunakia, pokina Tirama ena obia aiarana hanona nahomakia haukia 'eukia.'" <sup>15</sup> Iesu miori papakia ahakiai imana ehao'au ebanamonakia, murinai 'eka weiana ehabona.

### *Iesu Kepu Hauna 'Aru'aruna Ohi Te'abi'abi.*

(Mk 10.17-31; Lk 18.18-30)

<sup>16</sup> Weiana hau ha emai Iesu herena ebakaina etibaha, "Ba'iohi haumu e, aka

namona tabana kababai hanona mauri banaibanai ka'ina?"

<sup>17</sup> Iesu ia ena 'abi ebamuena etibaha, "Aehoma buonai au here'uai aka namona nubakaibakai aina? Weiana Tirama mo ikupaiana enamo, oi konuatae mauri banaibanai koa'ina raninai, rauhuhu 'abikia ko'ima harainakia."

<sup>18</sup> Ia e'abi etibaha, "Rauhuhu 'abikia aeakia?" Iesu etibaha, "Rauhuhu neiakia, a'i koahuahu, a'i konabau, a'i kobainao, a'i kohinau bai'oi. <sup>19</sup> Hamamu mai hinamu komariki ainakia, abomo heremu hauna koraona'au aina matoha oi kipomu nu-raona'au aini'o 'abana."

<sup>20</sup> Hau 'aru'aruna e'abi etibaha, "Naiakia ikoikiai aba a'ima harainakia, ba taba akapu aina?"

<sup>21</sup> Iesu ia ehinabena etibaha, "Konuatae konamo harai ki'a baha raninai moao emu kohu ikoikiai kokawa kawainakia monikia uraru haukia kobenakia, weiana emu kepu hanona aba wa'a kupai koa'ina, ba komai muri'uai moka'a." <sup>22</sup> Hau 'aru'aruna aia weiana eona raninai aona earo'ari ekaobo, pokina ia herena kepu ebo'o.

### *Kepu Haukia Kupa Katekatoto Hanona Kepahihi.*

<sup>23</sup> Ba Iesu i'abana haukia ehina benakia etibaha, "'Abi tohana au wai nahina benimi. Kepu hauna Tirama ena obia aiaranai kekatoto hanona kepahihi ki'a baha. <sup>24</sup> Haeamona nahinabe muenimi. Mahi atana Kamela kopi ererenai kekuri banai hanona epahihi, ba kepu hauna Tirama ena obia aiaranai kekatoto hanona kepahihi ki'a baha."

<sup>25</sup> I'abana haukia 'abi weiana teona raninai teta'u ta'u huri tebakai bakai tetibaha, "Ba tai hanona mauri kea'ina?"

<sup>26</sup> Iesu eia 'ini 'ininakia e'abi etibaha, "Maearima herekiai neiana katebabaina hanona a'i ketaina, ia Tirama herenai taba ikoikiai kebabai hanona ketaina."

<sup>27</sup> Ba Petero Iesu ebakaina etibaha, "Ai taba ikoikiai tahabonakia oi mo murimuai taka'a, ba murimuai taka'a hanona taba kata'ina?"

<sup>28</sup> Iesu ehina benakia etibaha, "'Abi tohana au wai nahina benimi. Taba ikoikiai ekia mahamaha raninai, au Maearima Nahuna e'u imia'au nuabina ahanai kamia'au aonai, wai harauhaea rua

muri'uai tuka'a haumi abomo imia'au harau haea rua ahakiai katomia'au, Isaraela itubukia harau haea rua maearimakia kato bakainakia. <sup>29</sup> Hau ha au pau'uai ena itu 'ao uaho'abana haibuna hamana hinana nahuna 'ao ena hano kehabonakia hauna hanona hinabu hinabu ketabu ahi muena, abomo mauri banai banai kea'ina. <sup>30</sup> Ia bo'okia te'uai haukia hanona murihai katetoto, ba bo'okia temurihai haukia hanona katetoto 'uai."

## 20

### *'Abi Ibabataina Aka Haukia Bine Haharuanai.*

<sup>1</sup> "Tirama ena obia aiarana hanona hano poki hauna ha 'abana, raurani 'amarinai ekarahi eao aka haukia etabunakia ena bine haharuanai kateaka. <sup>2</sup> Poki hauna kipokia 'abi tebatohana 'arokia beraura hamona aonai kina harau haea katea'ina, ba euhunakia ena haharua teao. <sup>3</sup> Beraura hoana 9 'abana hanona ekarahi eao aiara ibuanai weia maearima baika tekoroti 'abaea eihanakia. <sup>4</sup> Ba ehinabenakia etibaha, 'Wai abomo tomoao e'u haharuai katoaka, 'arami kahorenakia.' <sup>5</sup> Ba ia abomo teao kateaka. Atiaha ekarahi eao haeamona rabirabi beraura hoana 3 'abana ekarahi mue eao hoahoa hamonamo weiana ebabaina.

<sup>6</sup> Haeamona rabirabi beraura hoana 5 'abana ekarahi eao hanona baika mo tekoroti 'abaea eihanakia, ebakainakia etibaha, 'Aehoma buonai neia tukoroti rabi 'abaea taba ha a'i tubabai 'apuana?' <sup>7</sup> Ena 'abi tebamuena tetibaha, 'Pokina tai ha aka ha a'i ebenamai.' Ba ehinabenakia etibaha, 'Wai abomo tomoao e'u haharuai katoaka.'

<sup>8</sup> Beraura ekaihuna, haharua poki hauna haharua i'imana hauna ehinabena etibaha, 'Teaka haukia koaparinakia 'arokia kobenakia, muri 'akinai temai teaka haukia herekiai koa'i ramana keaomo temai 'uai haukia herekiai kobapuana.' <sup>9</sup> Rabirabi beraurana hoana 5 'abanai tetoto teaka haukia temai ha ha kina harauhaea harauhaea ebenakia tea'i. <sup>10</sup> Ba teaka 'uai haukia temai, ekia raona hanona 'arokia keapa'ua, 'a ia abokiamo ha ha kina harauhaea harauhaea tea'inakia. <sup>11</sup> Ekia moni tea'inakia aonai haharua poki hauna teururuaina, <sup>12</sup> te'abi tetibaha, 'Muriai

temai haukia hanona beraura hoana hamonamo teaka, 'a ai hanona beraura neiana ena aro'ari ena hiabu maikoina tahoaina, ia kipokia 'aramai obaihobona.'

<sup>13</sup> Haharua poki hauna aka hauna ha ena 'abi ebamuena etibaha, 'E'u hau e, heremuai a'i abeho. Aika hararua 'abi aba habatohana koaka beraura hamona aonai kina harau haea kabeni'o. <sup>14</sup> Oi 'eumu hauna moa'ina moao. Au e'u nuataeai muriai emai eaka hauna 'euna kabena oi 'eumu abeni'o hauna ihobonai. <sup>15</sup> Au kipo'u e'u taba kipo'u e'u nuataeai a'i kababaina, u? Au e'u namo paunai nuwae'e aina'u, u?

<sup>16</sup> Taeara ihobonai temurihai haukia kate'uai, 'a te'uai haukia katemurihai.' ”

*Iesu Rani Ibaihauna Ena 'Ari Pouna Ehinana.*

*(Mk 10.32-34; Lk 18.31-33)*

<sup>17</sup> Iesu taearai eka'a niao Ierusalem aonai i'abana haukia harauhaea rua ebakaparenakia haiahaiai ehinabenakia etibaha, <sup>18</sup> “Bariu aika hanona Ierusalem ai kahakara'au, au Maearima Nahuna hanona robe haukia apa'uakia mai rauhubu poki haukia imakiai kateutana'u behoi katehorotina'u kateahu 'arina'u. <sup>19</sup> Au hanona rama haea haukia imakia kateutana'u katebataeaina'u kate'atina'u mai matiu ibiri ropo 'ubinai kateahu 'arina'u, 'a wapu ibaihaunai kamikiri mue.”

*Babi'e Nahuna Paukiai Iesu Enoina.*  
*(Mk 10.35-45)*

<sup>20</sup> Sebedeo nahuna rua hinakia kipokia temai Iesu herena, hinakia Iesu wairanai ekaipehu ena nuatae tabana ha enoiaina. <sup>21</sup> Iesu ia ebakaina etibaha, “Taba nonuatae?” Ia e'abi etibaha, “Mo'abi 'uai here'uai, naha'u neiakia rua ha itipamu tainai ha awarimu tainai katemiati emu kupa aiarana aonai.”

<sup>22</sup> Iesu e'abi etibaha, “Wai a'i to'jobina taba tunoiaina? Haiara 'ereha kainu hauna wai katoinu ketaina, u?” Terarua te'abi, “Katainu ketaina.” <sup>23</sup> Iesu ia ehinabenakia etibaha, “'Abi tohana e'u 'ere hanona katoinu, 'a itipa'u mai awari'u tainai katemiati haukia hanona au a'i katina'anakia, ia 'eka weiana hanona aba Hama'u eba'oruna etina'anakia haukia mo kebenakia.”

<sup>24</sup> I'abana haukia harauhaea aia weiana teona raninai uaho'aba rua weiakia teopuere ainakia. <sup>25</sup> Ua buonai Iesu i'abana haukia ikoikiai eaparinakia temai herena ehina benakia etibaha, “Wai to'jobina rama haeai haukia ekia obia haukia hanona ekia nuataeai maearima tipoki ainakia ekia hau apa'uakia abomo ekia hiabuai tibaehe'au maearima tiaiahunakia. <sup>26</sup> 'A wai heremiiai hanona ua a'i kehoma, hau ha baiatamiiai nenuatae keapa'ua hauna hanona ikoimiai emi ta'ara'i hainai keao. <sup>27</sup> Abomo hau ha baiatamiiai nenuatae ke'uai hauna hanona ikoimiai emi ta'ara ia'inai keao. <sup>28</sup> Ihobona au Maearima Nahuna amai hanona ta'ara'u a'i kateai ia maearima ta'arakia ka'i, abomo e'u mauri kabaibeni maearima ekia ki'ai kabakarahinakia paunai.”

*Iesu Maha Ki'a Haukia Rua Mahakia Ebanamonakia.*

*(Mk 10.46-52; Lk 18.35-43)*

<sup>29</sup> Iesu i'abana haukia kipokia Ieriko tihabona aonai mako rarina ia murinai teka'a. <sup>30</sup> Maha ki'a haukia rua taeara haianai temiati herekiai Iesu ekabanai 'uruna teona raninai, teapari aota tetibaha, “Obiapaka, Davida Nahuna e! Moaoko'o ainamai!” <sup>31</sup> 'A mako ia terikenakia kateunu. 'A terarua teapari aota ki'a, “Obiapaka, Davida Nahuna e! Moaoko'o ainamai!”

<sup>32</sup> Iesu ekoroti eaparinakia temai herena, ba ebakainakia etibaha, “Taba tonuatae 'eumiai kababaina?” <sup>33</sup> Ia te'abi tetibaha, “Obiapaka e, tanuatae mahamai katekaikau.” <sup>34</sup> Iesu eaoko'o ainakia, mahakia ea'i 'apuanakia. Beronai mahakia tekaikau teihaiha, ba Iesu murinai teka'a.

## 21

*Iesu Ierusalem ai Ekatoto Obia 'Arana 'Abana.*

*(Mk 11.1-11; Lk 19.28-40; Io 12.12-19)*

<sup>1</sup> Iesu i'abana haukia kipokia Ierusalem aba wairakiai Betefage ai tekara'au Olibe oeonai, weia Iesu ehore i'abana haukia rua euhu 'uainakia, <sup>2</sup> ehina benakia etibaha, “Katoao aiara aonai toniki ha tetoba 'auna mai nahuna ohi katotabu ahinakia, katorubunakia katomai ainakia here'u. <sup>3</sup> Hau ha 'abi ha kehinana raninai kato'abi, 'Obiapaka nenuatae ainakia,' ba beronai kebenimi.”



<sup>4</sup> Neiana hanona Mahabanai hauna ena 'abi ibatohana etibaha,  
<sup>5</sup> “Siona aiara haukia kohina benakia, Tomoihana, emi obia 'arana nimai heremi. Ia mai 'aiaununa toniki kapenai emia'au, toniki nahuna ahanai emia'au.”

Sek 9.9

<sup>6</sup> I'abana haukia teao Iesu ehina benakia akakia ihobona tebabainakia. <sup>7</sup> Toniki mai nahuna ohi temaiainakia, ekia habuni ahanai teabari 'aunakia ba Iesu emia'au. <sup>8</sup> Mako rarina ekia habuni taearai teabarinakia, baika abomo matiu rekia tehara obonakia taearai teabarinakia. <sup>9</sup> Iesu wairanai mai murinai teka'a haukia teio tetibaha,

“Hosana,\* Davida Nahuna 'euna! Obiapaka atanai nimai hauna Tirama kehore kebanamona! Hosana 'ubi toha tohanai!”

<sup>10</sup> Iesu Ierusalem mai ekatoto raninai aiara haukia te'uri'uri tebakaibakai tetibaha, “Neiana hanona hau tabana?”

<sup>11</sup> Mako te'abi tetibaha, “Neiana hanona Iesu mahabanai hauna Galilea Nasareta ai emai.”

*Iesu Marea Robeai Kawakawa Haukia Eu'u Ahinakia.*

(Mk 11.15-19; Lk 19.45-48; Io 2.13-22)

<sup>12</sup> Iesu marea robe aonai ekatoto weia tikawakawa haukia ikoikiai eu'u ahinakia, moni a'i banai haukia ekia itara mai rauria tikawakawai haukia ekia imia'au etori tori ku'a banainakia. <sup>13</sup> Ehinabenakia etibaha, “Puka robenai aba tererena, 'E'u itu hanona kateaparina bahuba'ari ituna, 'ia wai hanona kakikaki haukia ekia paparo'ai tubaona.”

<sup>14</sup> Mahakia teki'a haukia mai 'ome haukia teao Iesu herena marea robe aonai, ba ia ehore ebanamonakia. <sup>15</sup> Robe haukia apa'uakia mai rauhuhu poki haukia Iesu bamauri hoakia ebagai teihana abomo miori marea aonai teio tetibaha, ‘Hosana Davida Nahuna 'euna!’ raninai ia aokia teopuere, <sup>16</sup> tebakaina tetibaha, “Oi miori ti'abi aiakia hanona nuona?” Iesu ekia 'abi ebamuena etibaha, “‘E, aiakia aba naona. Wai 'abi neiana aba totuabina?”

‘Miori 'oru'orukia mai 'ae tiana miorikia pinakiai

atamu tibanamona.’ ”

Sal 8.2

<sup>17</sup> Ba Iesu ehabonakia aiara apa'uana iekarahi eao Betani ai erabi weia emiaho.

*Iesu Matiu Eururuaina.*

(Mk 11.12-14; 11.20-24)

<sup>18</sup> Erani raurani amarina Iesu emue aiara apa'uana niao aonai mare'a e'ari.

<sup>19</sup> Suke matiuna ha taeara haihanai eihana eao herena. Ia buana ha a'i eihana 'a rau 'abaeakia mo, ba ehinabena etibaha, “Oi a'i kobua'a mue!” Matiu weiana beronai rauna tepaea ba e'ororo.

<sup>20</sup> I'abana haukia hoa weiana teihana hanona teta'u ta'u huri tetibaha, “Aehoma buonai rani a'i ehoma'a matiu weiana aba e'ororo?”

<sup>21</sup> Iesu ehinabenakia etibaha, “‘Abi tohana au wai nahina benimi, patoa'ikakauma aomi a'i patekai'au kai'au raninai, Suke herenai erama hauna ikupaiana mo aha'i, ia kobio patohinabena, ‘Moa'o 'akuai moeno uhu,’ weiana abomo kerama. <sup>22</sup> Taba ikoinai bahuba'ari ai katonoi ainakia mai a'ikakaumami hanona katoa'inakia.”

*Iesu Ena Hiabu Tebakaibakai aina.*

(Mk 11.27-33; Lk 20.1-8)

<sup>23</sup> Iesu haeamona Marea Robe ai ekatoto eba'iobi aonai, robe haukia apa'uakia mai Iuda ekia maearima apa'uakia temai herena tebakaina tetibaha, “Hiabu tabanai aka neiakia nubabai, abomo tai hiabu ebeni'o?” <sup>24</sup> Iesu ekia 'abi ebamuena etibaha, “Au abomo wai bakai bakai hamona kabenimi, e'u 'abi katobamuena raninai au hiabu tabanai aka neiakia nababai haukia kaba'ioibinimi. <sup>25</sup> Ioane ena ba'uere robe hiabuna hanona ae'e ai emai? Kupai emai 'ao maearima herekiai emai?”

Ia kipokia baiatakiai te'abi'abi tetibaha, “Kaha'abi, ‘Kupai emai.’ hanona kebakainaka ketibaha, ‘Aehoma buonai a'i toa'i taeano?’ <sup>26</sup> ‘A kahatibaha, ‘Maearima herekiai emai.’ raninai, to'u haukia neiakia abomo kahata'uainakia, pokina ia ikoikiai tiraonana Ioane hanona mahabanai hauna.” <sup>27</sup> Ua buonai ia Iesu ena 'abi tebamuena tetibaha, “Ai a'i ta'ioibina.” Ba Iesu ehinabenakia etibaha, “Au abo'umo hiabu tabanai aka neiakia nababai hanona a'i kaba'ioibinimi.”

\* 21:9: (9) anina 'Kobamaurinamai'

*Ori Ibabataina Miori Rua.*

<sup>28</sup> “Wai taba na tuhoma? Hau ha nahuna hanona rua, ba eao pakana hauna herena ehinabena etibaha, ‘Naha’u e, bariu beraura neianai koao e’u bine haharuanai koaka.’ <sup>29</sup> Miori hamana ena ‘abi ebamuena etibaha, ‘A’i kaeao.’ ‘A muriai eraonaraona haraina ba eao eaka. <sup>30</sup> Haeamona hamakia eao nahuna ibaruna herena ‘abi ihobonamo ehinana, ba miori e’abi, ‘E, hama’u, kaeao.’ Ia a’i eao. <sup>31</sup> Weiakia terarua hanona aeana hauna hamakia ena nuatae akana ebabaina?” Ia te’abi tetibaha, “Kori ‘uaina hauna.”

Iesu ia ehina benakia etibaha, “‘Abi tohana au wai nahina benimi, moni bararo haukia mai maha porepore babi’ekia hanona Tirama ena obia aiaranai katekatoto ‘uai ba wai. <sup>32</sup> Pokina ba’uere robe hauna Ioane emai heremi bero taearana ebaihanimi, ia wai a’i toa’i taeana ‘a moni bararo haukia mai mahaporepore babi’ekia hanona tea’i taeana. Wai haeamona hoahoa weiana toihana, iamo a’i toraona kabe a’i toa’i taeana.”

*Ori Ibabataina Haharua I’imana Haukia Ki’a Obokia.*

*(Mk 12.1-12; Lk 20.9-19)*

<sup>33</sup> “Tomobahu ‘abi ibabatai ha neiana. Hano hauna ha ena bine haharuana ebabaina, arana eoko kakaiarona, bine buakia kehari ‘iti ‘itina urina ehabina mai bai’ima ituna ebakorina. Haharua hanona biraura haukia baika eba’ima’imanakia, ‘a ia hanona eharima hano haeai eao. <sup>34</sup> Bine buana ia’ina ranina aba ekaibari, poki hauna emikiri ena ta’ara’i haukia baika euhunakia buabua ibararokia teao. <sup>35</sup> Haharua te’imana haukia tehore ta’ara’i haukia tea’i ‘ininakia ha teahu ki’ana ha teahu ‘arina ha piharai tekuina. <sup>36</sup> Haeamona poki hauna ta’ara’i haukia euhunakia teao, ‘uaina hanona bita mo bariu hanona bo’ona teao, ia hoa ihobonamo ia herekia tebabaina.

<sup>37</sup> Muri ‘akinai hanona poki hauna nahuna euhuna eao herekia etibaha, ‘Au naha’u buonai aba katemariakina.’ <sup>38</sup> Haharua te’imana haukia poki hauna nahuna teihana raninai kipokia te’abi’abi tetibaha, ‘Kepoki hauna neiana. Tomai hamahu’arina, haharua hanona aika ‘eukai keao.’ <sup>39</sup> Ba weia tea’ina haharua aonai teberi ahina teaoaina paraburu kape-nai teahu’arina. <sup>40</sup> Ba wai turaonana,

haharua poki hauna kemai raninai haharua te’imana haukia herekia taba kebabaina?”

<sup>41</sup> Ia ena ‘abi tebamuena tetibaha, “Poki hauna kehore i’imana haukia ki’a obokia keahu’ari orenakia, ‘a haharua hanona haharua i’imana haukia haeai kebenakia kate’imana, bine ekia bua’ara raninai buakia kateaoainakia ia ‘euna.”

<sup>42</sup> Iesu ia ehinabenakia etibaha, “Wai puka robena a’i totuabi ‘apuana, u? Na terere aihona,

‘Itu babai haukia tebaki’ana piharana hanona aba pihara apa’uana tohanai eao. Babai neiana hanona Obiapaka ebabaina, nahaihana nahata’u ta’u huri!’

Sal 118.22

<sup>43</sup> Ua buonai au wai nahinabenimi, Tirama ena obia aiarana heremai kea’i parena, buabua nibaramanakia itubuna maearimakia kebenakia. <sup>44</sup> Hau ha ke’eho pihara neiana ahanai hanona kepa’a, ia pihara ke’eho hau ha ahanai hauna hanona ke’iti ‘iti apuroroai keao.”

<sup>45</sup> Robe haukia apa’uakia mai Parisea haukia Iesu ena ‘abi ibabatai weiana ehinana aiana teona hanona te’iobina ia robakia niahuna. <sup>46</sup> Ia tenuatae katea’i ‘inina, ‘a mako teta’uainakia pokina maearima teraonana Iesu hanona mahabanai hauna ha.

## 22

*Ori Ibabataina Hawainibe Mahamaha Tatuna.*

*(Lk 14.16-24)*

<sup>1</sup> Iesu haeamona ‘abi ibabatainai ehinabe muenakia etibaha, <sup>2</sup> “Tirama ena obia aiarana hanona matoha obia hauna ha nahuna ena hawainibe tatuna ebabaina ‘abana. <sup>3</sup> Ia ena ta’ara’i haukia euhunakia tebeau beau enuatae ainakia haukia tehina benakia, ia enuatae ainakia haukia teubo a’i temai. <sup>4</sup> Ba ia haeamona ena ta’ara’i haukia haeai baika euhunakia etibaha, ‘Abeaunakia haukia katohinabe muenakia katotibaha, ‘E’u poromakau mai e’u mahi namokia aba ahunakia aba teiua ‘iti’itinakia taba ikoikia’i aba teba’orunakia, hawainibe tatuna katomai.’

<sup>5</sup> ‘A maearima weiakia hanona ia robana a’i teahuna tekamuri, ha ena uma eao ha ena aka ‘ekana eao. <sup>6</sup> Harina

haukia ta'ara'i haukia tea'i 'ininakia tebatae ainakia ba teahu 'arinakia. <sup>7</sup> Weiana obia hauna eopuere wairai, ba emikiri ena huari haukia euhunakia, ahuahau haukia weiakia teahu 'arinakia ekia aiara abomo tehuhuna.

<sup>8</sup> Ba ia ena ta'ara'i haukia ehinabenakia etibaha, 'Hawainibe anianina aba e'oru, 'a abeaunakia haukia a'i tenamo a'i katemai. <sup>9</sup> Tomoao aiara ibuanai taimo taimo katotabu ahinakia haukia katobeunakia katemai hawainibe neiana tatunai.' <sup>10</sup> Ua buonai ta'ara'i haukia teao aiara ibuanai tetabu ahi maearimakia namo haukia mai ki'a haukia ikoikia temaiainakia, baki baki haukia hawainibe ituna tebabonu 'auna.

<sup>11</sup> 'A obia hauna eao baki haukia eihanakia raninai hau ha eiha tinana hawainibe tatuna habunina a'i ebato-tona. <sup>12</sup> Ebakaina etibaha, 'E'u hau e! Hawainibe tatuna habunina aha'i ia aea ohoma ototo?' Hau weiana ke'abi 'ekana aha'i. <sup>13</sup> Obia hauna ena ta'ara'i haukia ehina benakia etibaha, 'Aena imana katobirinakia atapaka wapuranai katokapo ahina, ua'a kehai mai 'aki'akina kearao'i arao'i.' "

<sup>14</sup> Iesu ena 'abi orenai etibaha, "Bo'ona eaparinakia 'a bita mo etina'anakia."

*Takiti Bakaibakaina.*  
(Mk 12.13-17; Lk 20.20-26)

<sup>15</sup> Parisea haukia teto'u roba teahu aea patehoma Iesu ena 'abiai patebarewana.

<sup>16</sup> Ekia maearima baika mai Heroda murinai ti'au haukia kipokia teuhunakia teao Iesu herena tehinabena tetibaha, "Ba'iobi haumu e, ai ta'jobina oi hanona 'abi tohana haumu, Tirama ena taeara tohana nuba'iobi aina abomo maearima taikia a'i nutai pokina ia aea homakia haukia robakia a'i nuahuna. <sup>17</sup> Ua buonai emu raona taba hanona moba'jobinamai, Takiti monina Kaisara katabena hanona ebero 'ao aha'i?"

<sup>18</sup> Ekia raona ki'a obona weiana Iesu aba e'jobina buonai e'abi etibaha, "Wai bahaorea haumi, aehoma buonai au tuhobona'u? <sup>19</sup> Takiti tubaibeni monina ha tomobaihana'u." Ba silba monina ha temaiaina tebena. <sup>20</sup> Iesu ia ebakainakia etibaha, "Neiana tai aubaubana abomo tai atana?" <sup>21</sup> Ia te'abi, "Kaisara 'euna." Ba Iesu ia ehinabenakia etibaha, "Kaisara 'euna Kaisara katobena, 'a Tirama 'euna Tirama katobena."

<sup>22</sup> 'Abi neiana aiana teona raninai te'arara ki'a ba tehabona teka'a.

*'Ariai Mikiri Mue Bakaibakaina.*  
(Mk 12.18-27; Lk 20.27-40)

<sup>23</sup> Beraura hamona weianai Sadukea haukia temai Iesu herena, ia hanona mikiri mue a'i tibatohana haukia, Iesu tebakaina, <sup>24</sup> tetibaha, "Ba'iobi haumu e, Mose na eba'iobi aihonamai. Hau ha ehawainibe ia nahuna aha'i ebaramana e'ari raninai uaho'abana kehore wapu weiana keatawana miori kebaramana uaho'abana e'ari hauna nahunai keao. <sup>25</sup> Bariu a'a hati haukia ikoinai 'abaihau hamomo baiatamaiai temiaho. Pakana ehawainibe, miori ha a'i ebaramana aonai e'ari wapu uaho'abana ibaruana hauna herenai ehabona, eatawana. <sup>26</sup> Haeamona uaho'abana ibaruana abomo nahuna aha'i e'ari, taeara ihobonai mo erama uaho'abana ibaihauna herenai eao mo iba'abaihau hamomona herenai epua. <sup>27</sup> Puana 'akinai babi'e abomo e'ari. <sup>28</sup> Bariu mikiri mue raninai babi'e weiana hanona tai atawanai keao, pokina haukia 'abaihau hamomo babi'e weiana teatawana?"

<sup>29</sup> Iesu ekia 'abi ebamuena etibaha, "Wai aba tuhaorea pokina Puka robenai terere 'abikia mai Tirama ena hiabu a'i to'jobinakia paunai. <sup>30</sup> Mikiri mue ai maearima hanona a'i katehawainibe. Ia haukia hanona kupa anerukia 'abakiai kateao.

<sup>31</sup> 'Ari haukia katemikiri mue 'abina Tirama ehina benimi hauna a'i totuabina, u? Ia etibaha, <sup>32</sup> 'Au hanona Aberahamo ena Tirama, Isako ena Tirama, Iakobo ena Tirama'. Ia hanona 'ari haukia ekia Tirama aha'i, ia hanona mauri haukia ekia Tirama." <sup>33</sup> Mako 'abi neiana teona raninai ia ena ba'iobi 'abinai teta'u ta'u huri.

*Rauhuhu Apa'uana Tohana.*  
(Mk 12.28-31; Lk 10.25-28)

<sup>34</sup> Iesu Sadukea haukia ebaunu baihanakia pouna Parisea haukia teona raninai ia abomo teto'u. <sup>35</sup> 'Abakia ha rauhuhu hauna Iesu ehobona ebakaina etibaha, <sup>36</sup> "Ba'iobi haumu e, rauhuhu 'abina aeana hauna eapa'ua ki'a baha?"

<sup>37</sup> Iesu e'abi etibaha, "Obiapaka emu Tirama koraona'au aina mai aomu ikoinai mai aubamu ikoinai mai emu raona ikoinai. <sup>38</sup> Neiana hauna hanona rauhuhu

'abina apa'uana abomo kori'uaina.  
<sup>39</sup> Rauhuhu 'abina apa'uana ibaruana hanona neiana, heremu ai hauna ko-raona'au aina kipomu nuraona'au aini'o 'abana. <sup>40</sup> Rauhuhu 'abikia ikoikiai mai mahabanai 'abikia ikoikiai hanona rauhuhu neiakia rua ahakiai tekori 'au."

*Iesu Parisea Haukia Ebakaibakiai ainakia.*

*(Mk 12.35-37; Lk 20.41-44)*

<sup>41</sup> Parisea haukia tito'u ohomo aonai Iesu ia ebakainakia etibaha, <sup>42</sup> "Wai hanona Keriso aea turaona aihona? Abomo ia hanona tai nahuna?" Ia tehinabena tetibaha, "Davida nahuna."

<sup>43</sup> Ba Iesu ebakainakia etibaha, "Aehoma buonai Davida Auba Robeai ebonu hanona ia Keriso eaparina Obiapaka? Pokina Davida e'abi etibaha, <sup>44</sup> 'Obiapaka hanona e'u Obia ehinabena etibaha, "Itipa'u tainai komiati keaomo emu 'ou haukia 'apumu ba'anai kahorotinakia."

Sal 110.1

<sup>45</sup> Davida Keriso eaparina e'u Obia raninai, aea homanai mo Keriso hanona Davida nahunai keao?"

<sup>46</sup> Hau ha Iesu ena 'abi kebamuena hanona a'i etaina, abomo rani weianai hau ha a'i enuako'o, Iesu a'i ebakaina.

## 23

*Rauhuhu Poki Haukia Kate'ima'ima Harainakia.*

*(Mk 12.38-39; Lk 11.43, 46; 20.45-46)*

<sup>1</sup> Weiana Iesu ehore mako mai ia i'abana haukia ehinabenakia etibaha, <sup>2</sup> "Rauhuhu poki haukia mai Parisea haukia hanona Mose ena imia'auai temia'au tipoki. <sup>3</sup> Ua buonai aiakia katoka'aina, tehina benimi akakia ikoikiai katobabai, 'a tibabai hoahoakia hanona a'i katobabai, pokina ia teiroroai akakia hanona a'i tibabainakia. <sup>4</sup> Puma rarikia iebebeai tebiri 'aunakia maearima 'arokiai tihore 'aunakia, 'a ia kipokia katea'i taena hanona imakia riuriuna ituna ha a'i niata 'apuana. <sup>5</sup> Ekia babai ikoikiai hanona maearima kateihanakia kateba apa'uanakia, puka robena 'abikia tererena teutanakia kohukohukia weiakia bahuba'ari aonai paukiai tebiri 'aunakia haukia tibapairi pairinakia abomo ekia

bahuba'ari habunikia buibuikia tibawaro waronakia. <sup>6</sup> Tatu 'ekakiai hanona imia'au namokia 'arikia ti'ari, marea aokiai imia'au 'orukia tenuatae ainakia. <sup>7</sup> Ekia nuatae hanona kawakawa 'ekakiai maearima katehore kateba namonakia mai katemariki ainakia haeamona kate'abi ia hanona maearima apa'uana ha.

<sup>8</sup> Ia maearima a'i teme'abi wai hanona maearima apa'uami, pokina wai emi apa'ua hauna hanona hamona abomo wai ikoimiai hanona a'a mai hati. <sup>9</sup> Hanopakai hau ha a'i katoaparina hamami, pokina wai hamami hanona hamona kupai nemi-aho. <sup>10</sup> Abomo a'i kate'abi, wai hanona poki haumi, pokina wai emi poki hauna hanona hamona Keriso. <sup>11</sup> Baiatamiai ha kebapa'ua hauna wai emi ta'ara ia'ina haunai keao. <sup>12</sup> Hau ha kipona nibapa'uana hauna Tirama kehore ia kebako'i ko'ina, ia kipona nibako'i ko'ina hauna Tirama kehore ia kebapa'uana."

*Iesu Parisea Ekia Bai'oi Hoakia Paukiai Erikenakia.*

*(Mk 12.40; Lk 11.39-42, 44, 52; 20.47)*

<sup>13</sup> Rauhuhu poki haumi mai Parisea haumi bahaorea haumi, heremiai keki'a wairai, Tirama ena obia aiarana pa'abina maearima wairakiai tuka-iabuna, wai kipomi a'i tutoto abomo weiakia tenuatae katetoto haukia tuehe abunakia. <sup>14</sup> Rauhuhu poki haumi mai Parisea haumi, bai'oi haumi, heremiai keki'a wairai, wapu ekia itu tuani 'aunakia, maearima tuba haoreanakia emi bahuba'ari tuba homa'anakia. Ua buonai puma rarina katoa'ina.

<sup>15</sup> Rauhuhu poki haumi mai Parisea haumi bahaorea haumi, heremiai keki'a wairai, hanopaka maikoina tukakaiarona maearima i'abami haukiai katobaonakia, ba weiana tubabaina hanona ia ena ki'a barua tubapa'uana ia tua'i ki'ana keao iruba a'i ni'ao 'apua 'ekana wai 'abana.

<sup>16</sup> Baka'a haumi mahami teki'a haumi, heremiai keki'a wairai, wai tu'abi maearima ha marea robe atana ke'abi'uai hanona robana a'i kateahuna, 'a peia gold weiana marea robe aonai hauna atanai ke'abi'uai hanona kebatohana. <sup>17</sup> Wai po'o abomo mahami teki'a haumi, aeana hauna eapa'ua? Gold 'ao marea



robe weiana gold nibarobena hauna?

<sup>18</sup> Wai haeamona tu'abi, maearima ha itara robena atanai ke'abi'uai hanona robana a'i kateahuna, 'a peia beruberu tabana itara robena ahana hauna atanai ke'abi'uai hanona kebatohana. <sup>19</sup> Wai mahami teki'a haumi, aeana hauna eapa'ua? Beruberu tabana itara robena ahanai hauna 'ao itara robena weiana beruberu tabana nibarobena hauna? <sup>20</sup> Ua buonai itara robena atanai ni'abi'uai hauna hanona itara robena mai ahanai temiaho tabakia ikoinai atakiai ni'abi'uai.

<sup>21</sup> Abomo marea robe atanai ni'abi'uai hauna hanona marea robe mai aonai nemiaho hauna atanai ni'abi'uai. <sup>22</sup> Abomo kupa atanai ni'abi'uai hauna hanona Tirama ena imia'au mai nemia'au hauna atanai ni'abi'uai.

<sup>23</sup> Rauhuhu poki haumi mai Parisea haumi wai bahaorea haumi, heremiai keki'a wairai, uma anianikia weiakia aniani tiba'orimona haukia hanona tubaharau haeanakia hamohamo tubaibeni obi-apaka ena bararoai, 'a rauhuhu akakia apa'uakia, bero, aoko'o mai a'ikakauma tureanakia, ba neiakia patobabai hanona penamo, weiakia abomo a'i patoreanakia.

<sup>24</sup> 'Uai haumi mahami teki'a, nene 'abiai tu'ato ahina ia mahi atana kamela hanona tutonona.

<sup>25</sup> Rauhuhu poki haumi mai Parisea haumi bahaorea haumi, heremiai keki'a wairai, ere mai 'ororo kapekia toutunakia ia aokia hanona bainai mai ripuripu ai toa'i tabakiai tebonu'au. <sup>26</sup> Parisea haumi mahami teki'a, ere mai 'ororo aokia tomoutu 'uainakia ba kapekia abomo aba katemahamaha.

<sup>27</sup> Rauhuhu poki haumi mai Parisea haumi bahaorea haumi, heremiai keki'a wairai, wai hanona 'ariahakia tebaporenakia 'abakia, kapekia temahamaha 'a aokia hanona 'ari haukia huria mai pari ikoinai tebonu'au. <sup>28</sup> Taeara ihobonai mo maearima wai haumi teihanakia bero haumi 'abanai, 'a aomi hanona bai'oi mai ki'a tebonu'au.

*Iesu Parisea Ekia Puma Ehina 'Uaina.*  
(Lk 11.47-51)

<sup>29</sup> Rauhuhu poki haumi mai Parisea haumi bahaorea haumi, heremiai keki'a wairai, mahabanai haukia ekia 'ariahakia tubabai mai bero haukia ekia 'ariahakia tubataitai harainakia. <sup>30</sup> Wai tu'abi,

'Kupumai ekia raniai tamarama raniai mahabanai teahu'arinakia aonai ai hanona a'i pata'i turinakia.' <sup>31</sup> Weiana hanona wai kipomi tohina pounimi, wai hanona mahabanai haukia teahu 'arinakia haukia 'aba'abakia. <sup>32</sup> Kupumi hamami ekia ki'a tea'i ramana hauna wai katobapa'ua haraina. <sup>33</sup> Wai 'erau abomo 'erau nahukia haumi, Tirama ena puma keaoainimi iruba a'i ni'ao 'apua 'ekana herenai aea katokapare aiho?

<sup>34</sup> Mahabanai haukia aobero haukia mai ba'iobi haukia kauhunakia heremi katewahi, baika katoahu'ari, baika matiu ibiri ropoi katokoko 'aunakia, baika marea aokiai kato'atinakia, abomo aiara hai katouranakia kateao aiara ha. <sup>35</sup> Ua buonai bero haukia aruarukia ikoinai hanopaka ahanai ekiki oioi pumana hanona wai ahamiai keriri, aka bero hauna Abela aruarunai kea'i ramana keao mo Berekia nahuna Sekaraia aruaruna ia ikaihuri robena mai itara robena baiatakiai toahu'arina hauna herenai kepua. <sup>36</sup> 'Abi tohana au wai nahinabenimi, ahuhau neiakia ikoikiai ekia puma hanona uru neiana maearimakia ahakiai keriri.

*Iesu Ierusalemehaiaina.*  
(Lk 13.34-35; 19.41-44)

<sup>37</sup> Ierusalemehaiaina e, Ierusalemehaiaina e, mahabanai haukia nuahu'arinakia abomo Tirama iuhubeau euhunakia heremu tewahi haukia piharai nokuinakia, rani babita anuatae nahumu kabaronakia ihobona kokoro'u ha banina ba'anai nahuna ne'umu hao 'abana, 'a a'i onuatae. <sup>38</sup> Ua buonai emu marea robe hanona kahabo 'abaeana abomo ke'aburu. <sup>39</sup> Au oi nahinabenimo, a'i koiha muena'u keao mo oi ko'abi kotibaha, "Tirama kehore Obiapaka atanai nimai hauna kebanamona!"

## 24

*Iesu Marea Robe Kerabutaina Pouna Ehinana.*  
(Mk 13.1-2; Lk 21.5-6)

<sup>1</sup> Iesu marea robeai ekarahi taearai nika'a aonai i'abana haukia teka'a haha herena marea robe ituna robana teahuna. <sup>2</sup> Iesu ia ehina benakia etibaha, "Taba neiakia ikoikiai toihanakia? 'Abi tohana au wai nahinabenimi, pihara ha pihara ha ahanai a'i keno'au a'i kemiaho, ikoikiai hanona kateriri kate'eho."

*Iesu E'abi, Haiara Bo'ona Katerama.*  
(Mk 13.3-13; Lk 21.7-19)

<sup>3</sup> Iesu olibe oeonai emiati aonai i'abana haukia tekabuni teao herena tehinabena tetibaha, "Moba 'iobinamai, taba neiakia aita katerama? Emu mai mue abomo hanopaka puana hoana hanona aea homana?"

<sup>4</sup> Iesu ekia 'abi ebaumena etibaha, "Kato'ima'ima harainimi, hau ha a'i me'oinimi. <sup>5</sup> Pokina au ata'uai maearima bo'ona katemai kate'abi katetibaha, 'Au Keriso neia'u,' ba maearima bo'ona kate'oinakia. <sup>6</sup> Wai hanona huari 'urukia mai poukia kato'o raninai nuami a'i katetae, taba uahomakia katerama ia puana hanona wairai. <sup>7</sup> Hanopaka ha kehore hanopaka ha kehuarina, itubu ha kehore itubu ha ke'oatana. 'Eka haeai haeai 'arobo katerama mai 'eka bo'onai kanokau kateka'a. <sup>8</sup> Neiakia ikoikiai hanona miori nirama haiarana kori'uaina 'abana.

<sup>9</sup> Weiana wai hanona kateaoainimi katebahairanimi, kateahu 'arinimi, au buo'uai hanopaka ikoikiai wai kate'oatanimi. <sup>10</sup> Rani weiana maearima bo'ona ekia a'ikakaumai kate'eho haha kipokia hinahinakia katehina, abomo katebai'oata. <sup>11</sup> Weiana mahabanai haukia bai'oikia bo'ona abomo katewaira tina maearima bo'ona kate'oinakia. <sup>12</sup> Aka ki'a hanona keapa'ua buonai maearima bo'ona ekia raona'au ke'abe'abe. <sup>13</sup> Ia kekori 'ini keao puanai hauna hanona mauri kea'ina. <sup>14</sup> Tirama ena obia aiarana pouna namona neiana hanona hanopaka maikoina aonai kateiroro aina, itubu ikoikiai kate'iohina, ba murinai hanopaka puana kemai.

*Rani Ki'a Obona Tohana.*  
(Mk 13.14-23; Lk 21.20-24)

<sup>15</sup> Ua buonai kaiba'uku ki'a obona tohana weiana mahabanai hauna Daniela robana eahuna hauna 'eka robenai kekoroti katoihana raninai, (tuabi tuabi hauna me'iohina.) <sup>16</sup> weiakia Iudai temiaho haukia hanona oeo aokiai katebeau toto. <sup>17</sup> Weiana itu kapenai hauna hanona a'i keriri ena taba itu aonai haukia a'i kea'inakia. <sup>18</sup> Mai weiana umai nemiaho hauna a'i kemue ena itu ena habuni ia'ina a'i keao. <sup>19</sup> Rani weiakia aokiai babi'e mai nuakia abomo miori 'oru'orukia tiba'enakia babi'ekia herekiai hanona keki'a ki'a baha. <sup>20</sup> Katobahuba'ari Tirama

herenai, emi beau obo ipi mai hiribo 'ao beraura robenai a'i merama paunai. <sup>21</sup> Pokina atetua rarina 'akina kerama, weiana hanopaka ea'i ramana emai mo bariu uahomana ha a'i erama, muriai abomo ihobona ha a'i kerama. <sup>22</sup> Tirama beraura weiakia a'i pebako'onakia raninai maearima ha a'i kemaui, 'a ia ena tina'a maearimakia paukiai beraura weiakia kebako'onakia.

<sup>23</sup> Rani weianai hau ha kehina benimi ketibaha, "Tomoihana Keriso neiana", 'ao 'Ia weiana,' raninai a'i katobatohana. <sup>24</sup> Pokina Keriso bai'oikia mai mahabanai bai'oikia hanona katewaira tina bata'u ta'u huri akakia mai hoa rarikia katebabai, petaina raninai Tirama ena tina'a maearimakia abomo kate'oinakia.

<sup>25</sup> Katoraona 'inina Au aba naba'iohi 'uainimi. <sup>26</sup> Ua buonai ia katehina benimi ketetibaha, 'Keriso weia hano'akunai' raninai a'i katoao, 'ao 'Ia neiana ikaihuri aonai', raninai a'i katobatohana. <sup>27</sup> Pokina kupa neimare taetana niaomo tibotaina 'abana au maearima nahuna e'u mai hoana abomo ua homana.

<sup>28</sup> 'Ari huanina enoti 'ekanai, po'i abomo weia kateto'u.

*Au Maearima Nahuna Kamai.*  
(Mk 13.24-27; Lk 21.25-28)

<sup>29</sup> 'Atetua weiakia kateore murikiai beronai beraura kewapura, nawa a'i kerara, bihiu hanona kupai kate'eho, kupa hiabu tabakia ikoikiai kateibiu ibiu.'

Isa 13.10, 34.4

<sup>30</sup> Weiana maearima nahuna au e'u mai hoana hanona kupai kewaira tina, ba hanopaka maearimakia ikoikiai hanona katehai, au maearima nahuna hiabu mai nuabi rarina aonai auhao ahakiai kamai kateihana'u. <sup>31</sup> Pihiki kateubainakia urukia rarikia aonai e'u aneru kauhunakia kupa puanai keao kupa puana baura bani 'ekakiai atina'anakia maearimakia katebararonakia.

*Kuropouai 'Tobi Kaha'ina.*  
(Mk 13.28-31; Lk 21.29-33)

<sup>32</sup> Kuropou matiuna herenai 'iohi ka-toa'ina. Kuropou kehubu rauna kateahu boa raninai, wai aba kato'iohina hioro aba nikaibari. <sup>33</sup> Taeara ihobonai taba neiakia katoihanakia raninai, wai aba

kato'iobina rani hanona aba herekai au hanona aba pa'abi herenai. <sup>34</sup> 'Abi tohana au wai nahinabenimi, uru neiana a'i ke'ari ore keao mo taba neiakia ikoikiai katerama. <sup>35</sup> Kupa mai hanopaka hanona kate'akauma, ia au e'u 'abi hanona a'i ke'akauma.

*Tai Ha A'i E'iobina Rani Tabanai.*  
(Mk 13.32-37; Lk 17.26-30, 34-36)

<sup>36</sup> E'u mai beraurana abomo beraurana hoana hau ha a'i e'iobina, kupa anerukia a'i te'iobina Nahuna abomo a'i e'iobina, ia Hama'u ikupaiana mo e'iobina. <sup>37</sup> Noa ena raniai 'abana, au maearima nahuna e'u mai ranina abomo ua kehoma. <sup>38</sup> Tou rarina a'i nimai baha aonai maearima hanona teianiani teinuinu tehawainibe eao mo wapu weianai Noa aunohiai etoto. <sup>39</sup> A'i te'iobi 'apuana taba kerama eao mo tou apa'uana ekara 'au, ba ikoikiai tetono 'ari. Au maearima nahuna e'u mai rarina abomo ua kehoma. <sup>40</sup> Rani weianai hau rua umai kateaka, Tirama kehore hamona kea'i taeana 'abana kehabona. <sup>41</sup> Babi'e rua witi ibautuna piharana katebaherena aonai, Tirama kehore hamona kea'itaeana 'abana kehabona. <sup>42</sup> Ua buonai katomaha no'a pokina emi Obiapaka ena mai beraurana hanona a'i to'iobina. <sup>43</sup> Ia neiana katoraona 'inina, itu poki hauna pe'iobina rabi hoana tabanai bainao hauna kemai hanona ia aba pemaha no'a, ba ena itu a'i patetapana a'i patetoto. <sup>44</sup> Ua buonai wai abomimo katoba'oru rani ikoinai, pokina au maearima nahuna hanona rani weiana wai a'i tubahu bahuaina aonai kamai.

*Ta'ara'i Hauna Namona Mai Ta'ara'i Hauna Bai'oina.*  
(Lk 12.42-46)

<sup>45</sup> Tai hanona ta'ara'i hauna namona mai aoberona ia ena poki hauna kehore kea'i taeana ena itu i'imanai keao, ta'ara'i miorikia ekia aniani kebenakia aniani ranina tohanai? <sup>46</sup> Ia aka weiana nibabaina aonai ena poki hauna kemue keihana ranina ia hanona kenamo. <sup>47</sup> 'Abi tohana au wai nahinabenimi, poki hauna kehore ia kea'i taeana ena taba ikoikiai i'imakia haunai kebaona. <sup>48</sup> Ia ta'ara a'i hauna ki'a obona hanona ke'abi ketibaha, 'E'u poki hauna a'i nimai baha.' <sup>49</sup> Ba ia kehore 'abana ta'ara'i haukia keahunakia abomo inuina haukia kipokia kateaniani kateinuina haemo. <sup>50</sup> Rani ha ta'ara'i

hauna weiana ena poki hauna a'i nibahu bahu aina abomo beraura hoana a'i e'iobina aonai ia kekara'au. <sup>51</sup> Poki hauna kehore ia keahu ki'ana keuhu ahina ba haorea haukia kipokia 'eka hamonai, weia ia kehahi mai 'aki'akina kearao'i arao'i."

## 25

*Ori Ibabataina Uaho Harau Haea.*

<sup>1</sup> "Rani weiana Tirama ena obia aiarana hanona matoha uaho harau haea 'abakia, ekia ramepa tea'i teao hawainibe mahamaha hauna kipokia katebaitabu ahi. <sup>2</sup> Ima hanona teaopo'o 'a ima hanona teaobero. <sup>3</sup> Weiana aopo'o uahokia ekia ramepa tea'inakia, ia karatini harikia a'i tea'i. <sup>4</sup> 'A aobero uahokia ekia ramepa tebaharu abomo karatini harikia tea'i. <sup>5</sup> Hawainibe mahamaha hauna hanona a'i emai baha, ba uaho parua ea'i ki'anakia teako rai tenoti teaparua.

<sup>6</sup> Wapuka'a ibuanai io aiana teona etibaha, 'Hawainibe mahamaha hauna aba nimai, tomokarahi kipokia katebaitabu ahi.' <sup>7</sup> Ba uaho ikoikiai teno'a temikiri, ekia ramepa tea'ia'i harai. <sup>8</sup> Weiana ao po'o uahokia tehore ao bero uahokia tenoinakia tetibaha, 'Emi karatini harua tomobenamai emai ramepa aba kate'ao.' <sup>9</sup> Ia ekia 'abi tebamuena tetibaha, 'Aha'i. Wai mai ai kipokia kahabaharu hanona a'i ketaina. Namona hanona tomoao tikawa kawa 'ekanai 'eumi tomokawa.' <sup>10</sup> Ao po'o uahokia kawakawa 'ekana teao aonai hawainibe mahamaha hauna ekara'au, teba'oru uahokia ima kipokia teao hawainibe tatuna aonai tekatoto ba pa'abi tekaibuna.

<sup>11</sup> Murinao ao po'o uahokia temai teapari tetibaha, 'Poki haumu e, Poki haumu e, pa'abi mokaikauna tamatoto.' <sup>12</sup> 'A ia ekia 'abi ebamuena etibaha, "Abi tohana au wai nahina benimi, au wai a'i a'iobinimi.'

<sup>13</sup> Weiana paunai katomaha no'a, beraura mai beraura hoana hanona wai a'i to'iobina.

*'Abi Ibabataina Ta'ara'i Haukia Aihau Moni Te'ima.*  
(Lk 19.11-27)

<sup>14</sup> Haeamona Tirama ena obia aiarana hanona matoha hau ha harima keao 'eka

homa'ana 'abana, ena ta'ara'i haukia eaparinakia, ehinabenakia ena taba ikoikiai kate'imanakia. <sup>15</sup> Poki hauna weiana ehore ena ta'ara'i haukia ha ha ekia tabura ihobokiai moni ebenakia, hamona kina hinabu ima ebena, ha kina hinabu rua, ha hanona kina hinabu hamomo ebena ba ia harima eao. <sup>16</sup> Kina hinabu ima ea'ina hauna hanona beronai eao akana ehabaina ba ahanai kina hinabu ima ha ehabaina. <sup>17</sup> Kina hinabu rua ea'ina hauna abomo uamo ehoma, ba ahanai kina hinabu rua ha ehabaina. <sup>18</sup> 'A kina hinabu hamona ea'ina hauna eao 'uri ehabina poki hauna ena moni ehano abuna.

<sup>19</sup> Rani homa'ana eao murinai ta'ara'i haukia weiakia ekia poki hauna emue emai ena moni ebakai bakai ainakia. <sup>20</sup> Kina hinabu ima ea'i hauna kina hinabu ima ha kipokia emaiainakia etibaha, 'Poki haumu e, kina hinabu ima obena'u. Ba moihana, ahanai kina hinabu ima ha neiakia ababainakia.' <sup>21</sup> Poki hauna e'abi etibaha, 'Ta'ara'i haumu namomu aka bero haumu, obabai harai, taba papakia o'ima harainakia buonai bariu taba apa'uakia i'imakia kabaoni'o. Omai e'u aonamo aonai mototo.'

<sup>22</sup> Kina hinabu rua ea'i hauna abomo emai e'abi etibaha, 'Poki haumu e, kina hinabu rua obena'u. Ba moihana, ahanai kina hinabu rua ha neiakia ababainakia.' <sup>23</sup> Poki hauna e'abi etibaha, 'Ta'ara'i haumu namomu aka bero haumu, obabai harai, taba papakia o'ima harainakia buonai bariu taba apa'uakia i'imakia kabaoni'o. Omai e'u aonamo aonai mototo.'

<sup>24</sup> 'A kina hinabu hamona ea'ina hauna emai e'abi etibaha, 'Obiapaka e, au a'jobina oi hanona hau pahihimu, maearima haeai tebato bato 'ekakia nueueu mai maearima haeai uho tekapo kapo otarai 'ekakia nubararo bararo. <sup>25</sup> Ua buonai au ata'u aeao emu moni hinabu hamona hano aonai ahano abuna ba namaiana. Moihana oi emu moni 'ekanai mo neiana.'

<sup>26</sup> Poki hauna e'abi etibaha, 'Ta'ara'i haumu ki'a obomu abomo o'aboro, oi nuraonana au maearima baika tebato bato 'ekakia naueueu mai maearima tekapo kapo otarai 'ekakia nabararo bararo, 'u? <sup>27</sup> Ua homana raninai moni i'imana haukia herekia pohorotina ba amue amai

raninai ahanai papana ha perama kipokia pa'i haeamona. <sup>28</sup> Bariu hanona herenai kina hinabu hamona tomoa'i boina, kina hinabu harau haea ea'i hauna tomobena. <sup>29</sup> Pokina mai 'euna hauna hanona bo'ona kabena, ena taba kebo'o ki'a, 'a ekapu hauna hanona papana herenai nemiaho hauna abomo ka'i boina. <sup>30</sup> Ta'ara'i hauna neiana ena namo aha'i hauna tomokapo ahina meao 'eka wapuranai weia kehahi mai 'aki'akina kearao'i arao'i.'

### *Bakai Apa'uana Orena 'Akina.*

<sup>31</sup> Au maearima nahuna mai nuabi'u e'u aneru ikoikiai kipokia katamai raninai e'u imia'au nuabina ahanai kamia'au. <sup>32</sup> Hanopakai itubu ikoikiai au waira'uai katebararona, ba au kahore maearima kabahu boanakia, mamoe 'ima hauna mamoe mai nani nibahu boana 'abana. <sup>33</sup> Au kahore mamoe hanona itipa'u tainai, nani hanona awari'u tainai kahorotinakia. <sup>34</sup> Ba au Obia arana kahore itipa'u tainai haukia kahina benakia katibaha, 'Hama'u ebanamonimi haumi, tomaki kupa aiarana neiana hanopaka ehabaina raninai eba'oruna wai 'eumi hauna tomoa'ina wai barimi ai keao. <sup>35</sup> Pokina au mare'a a'ari hanona wai aniani tobena'u ani, 'ako'u e'ororo hanona wai bei tobena'u ainu. Au maearima haeai hau'u hanona wai toa'i taeanu'emi 'ekai. <sup>36</sup> Here'uai habuni aha'i hanona wai habuni tobatotona'u. Au ainawa hanona wai au to'imana'u. Au wapura 'ekanai hanona wai totoana'u.'

<sup>37</sup> Ba bero haukia ena 'abi katebamuena katetibaha, 'Obiapaka e, aita raninai mare'a o'ari, ba tabanianini'o, 'ao aita raninai 'akomu e'ororo ba bei tabeni oinu? <sup>38</sup> Aita raninai tihani'o maearima haeai haumu ba ta'i taeani'o emai 'ekai, 'ao aita raninai heremuai habuni aha'i ba habuni tabeni'o? <sup>39</sup> Aita oinawa 'ao owapura raninai ba tatoani'o?'

<sup>40</sup> Weiana au Obia arana ia kahinabenakia katibaha, 'Abi tohana au wai nahinabenimi. Uaho'aba'u urarukia neiakia ha herekia uai tobabai aihohana au here'uai abomo aba uai tobabai aihona.'

<sup>41</sup> Ba au Obia arana kahore awari'u tainai haukia kahinabenakia katibaha, 'Tirama eururu ainimi haumi, here'uai tomokapare tomoao niara banai banai irubana teba'oruna tiaporo mai ena miori



kipokia 'eukia hauna aonai katototo. <sup>42</sup> Pokina au mare'a a'ari hanona a'i tobanianina'u, abomo 'ako'u e'ororo hanona bei a'i tobena'u a'i ainu. <sup>43</sup> Au maearima haeai hau'u hanona emi 'ekana'i a'i toa'i taeana'u, here'uai habuni aha'i hanona habuni ha a'i tobabatotona'u. Au ainawa mai wapura 'ekana'i hanona a'i totoana'u.

<sup>44</sup> Ia abokiamo ena 'abi katebamuena kate'abi katetibaha, 'Obia arana e, aita raninai taihani'o, mare'a o'ari, 'ao 'akomu e'ororo, 'ao maearima haeai haumu, 'ao habuni heremuai aha'i, 'ao oinawa abomo wapura 'ekana'i, ba a'i tabaraini'o?

<sup>45</sup> Weiana au ia kahinabenakia kati-baha, "Abi tohana au wai nahinabenimi, uaho'aba'u urarukia neiakia ha herekiai ua a'i tobabai aiho raninai au abomo here'uai ua a'i tobabai aiho." <sup>46</sup> Ba ia haukia hanona keuhunakia haiara banaibanai 'ekana kateao, 'a bero haukia hanona keuhunakia mauri banaibanai 'ekana kateao."

## 26

### *Iesu Iahu'arina Taearana Tetabuna.* (Mk 14.1-2; Lk 22.1-2; Io 11.45-53)

<sup>1</sup> Weiana Iesu 'abi neiakia ikoikiai eba-  
puanakia murinai i'abana haukia ehin-  
abenakia etibaha, <sup>2</sup> "Wai to'jobina Ka-  
banai tatuna\* hanona wapu rua mo  
wairai. Weiana au maearima nahuna  
hanona hinahina'u katehina matiu ibiri  
ropoi katekoko 'auna'u ka'ari."

<sup>3</sup> Rani weianai robe haukia apa'uakia  
mai Iuda ekia maearima apa'uakia  
kipokia, robe haukia arakiai hauna atana  
Kaiapasi ena ituai teto'u. <sup>4</sup> Ia terobahu  
temaea hamomo bunianai Iesu katea'ina  
kateahu 'arina. <sup>5</sup> 'A ia kipokia te'abi  
tetibaha, "Tatu aonai a'i kahababaina  
maearima a'i hamaba 'uri'urinakia."

### *Babi'e Ha Tehoroai Iesu 'Arana Eheina.* (Mk 14.3-9; Io 12.1-8)

<sup>6</sup> Iesu Betani ai morumoru hauna Si-  
mona ena ituai emiaho aonai, <sup>7</sup> Babi'e  
ha kabapu mai tehorona 'arana rarina  
pahakawana hauna ea'ina emai Iesu ani-  
ani 'ekana'i emiati hanona arana eheina.  
<sup>8</sup> I'abana haukia teihana raninai teopuere  
tetibaha, "Taba buonai tehorone neiana  
nine'e 'abaeana? <sup>9</sup> Tehorone neiana 'arana

rarina'i pekawa kawaina monina uraru  
haukia pebenakia."

<sup>10</sup> 'A Iesu e'jobina taba robana tiahuna  
hanona ehina benakia etibaha, "Taba  
buonai babi'e aona tuba aro'arina? Ia  
aka namona 'akina au here'uai ebabaina.  
<sup>11</sup> Uraru haukia hanona rani ikoinai wai  
heremiai katemiaho, ia au hanona rani  
ikoinai heremiai a'i kamiaho. <sup>12</sup> Tehoro  
neiana ia eheina au aha'uai hanona  
ihore'u akana ia'i a'i haraina ebabaina.  
<sup>13</sup> 'Abi tohana au wai nahinabenimi,  
hanopaka maikoina aonai pou namona  
kateiroro aina hanona babi'e aka neiana  
ebabaina hauna katehinana ia iraonana  
keao."

### *Iuda Eao Kehinahina.* (Mk 14.10-11; Lk 22.3-6)

<sup>14</sup> Rani weianai i'abana haukia ha-  
rau haea rua 'abakia ha atana Iuda  
Isakariote hauna hanona robe haukia  
apa'uakia herekia eao, <sup>15</sup> ebakainakia  
etibaha, "Iesu imamia kautana raninai  
taba katobena'u?" Weiana silba monikia  
harau aihau tebahunakia tebena. <sup>16</sup> Rani  
weiana eaoaina Iuda taeara etabu rani  
namona tabanai Iesu imakiai keutana.

### *Iesu Kabanai Anianina I'abana Haukia Kipokia Teani.*

(Mk 14.12-21; Lk 22.7-14, 21-23; Io  
13.21-30)

<sup>17</sup> Parawa 'abaeana ikine tatuna berau-  
rana kori'uainai, i'abana haukia temai  
Iesu herena tebakaina tetibaha, "Ka-  
banai tatuna anianina ae'eai kata'ia'i  
haraina koana?" <sup>18</sup> Ia ekia 'abi ebamuena  
etibaha, "Tomoao aiarai hau weiana here-  
nai katohina bena katotibaha, 'Emai poki  
hauna e'abi, "E'u rani aba ekaibari, Ka-  
banai tatuna i'aba'u haukia kipokia emu  
ituai katababaina." ' ' ' <sup>19</sup> Ua buonai  
i'abana haukia Iesu ehinabenakia akana  
ihobonai tebabaina, Kabanai tatuna ani-  
anina tea'ia'i haraina.

<sup>20</sup> Erabirabi aonai Iesu mai i'abana  
haukia harauhaea rua kipokia aniani  
'ekana'i temiati teaniani. <sup>21</sup> Tianiani aonai  
ia e'abi etibaha, "Abi tohana au wai  
nahinabenimi, wai ha hanona au hi-  
nahina'u kohinahina." <sup>22</sup> I'abana haukia  
aokia earo'ari ha ha tehore tebakaina  
tetibaha, "Obiapaka e, nuraonana au,  
u?" <sup>23</sup> Ia e'abi etibaha, "Hau weiana  
imana au ima'u ohi 'ororo hamonai tahao

\* 26:2: (2) Isaraela haukia ekia tatu apa'uana ha.

uta hauna hinahina'u kehinahina. <sup>24</sup> Au maearima nahuna hanona Puka robenai tererena ihobonai ka'ari, ia maearima nahuna hinahinana kehinahina hauna herenai keki'a wairai maearima weiana a'i perama hanona penamo." <sup>25</sup> Ehinahina hauna Iuda etibaha, "Ba'iobi haumu e, nuraonana au, u?" Iesu e'abi etibaha, "Abi mo naiana ohinana."

*Obiapaka Ena Ani To'u.*

*(Mk 14.22-26; Lk 22.15-20; 1Kr 11.23-25)*

<sup>26</sup> Ia tianiani aonai Iesu parawa ea'ina ebanamona ba ehobina, i'abana haukia ebenakia e'abi etibaha, "Tomoa'ina tomoana, neiana hanona au hau'u." <sup>27</sup> Ba 'ere ha ea'ina ebanamona ba etiu benakia e'abi etibaha, "Ikoimiai neiana tomoinu. <sup>28</sup> Neiana hanona au aruaru'u, 'abi 'uai aruaruna mako paukia kekiki oi ki'a ihina haona. <sup>29</sup> Au wai nahina benimi, bine beina neiana au a'i kainu mue keao mo Hama'u ena aiarai bine beina mahamahanana wai kipokia kahainu haeamo."

<sup>30</sup> Weiana hui ha tea'ina murinai tekarahi, Olibe oeona teao.

*Iesu Ehina 'Uaina Petero Ia Kebuniaina.*

*(Mk 14.27-31; Lk 22.31-34; Io 13.36-38)*

<sup>31</sup> Ba Iesu ehinabenakia etibaha, "Bariu rabi neianai emi a'ikakama ke'eho katohabona'u, pokina Puka robenai tererena, 'Au mamoe i'imana hauna kahuna ba mamoe to'una hanona kerama otaraina.' <sup>32</sup> Ia au kamikiri mue murinai au hanona ka'uai kaeao Galilea ba wai katoao." <sup>33</sup> Petero etae e'abi etibaha, "Ikoikiai oi katehaboni'o katebeau re'a, au hanona oi a'i kahabo 'apuani'o." <sup>34</sup> Iesu Petero ena 'abi ebamuena etibaha, "Abi tohana au oi nahina beni'o, bariu rabi neiana kokoro'u a'i kearara baha aonai, oi rani aihau au kobuniai aina'u. Ko'abi oi au a'i o'iobina'u." <sup>35</sup> Petero haeamona e'abi etibaha, "Abina aha'i, hararua paha'ari haeamo, ia au hanona a'i kabuniai aini'o." Ba i'abana haukia abokiamo 'abi hamona weiana tehinana.

*Iesu Getesemaneai Ebahuba'ari.*

*(Mk 14.32-42; Lk 22.39-46)*

<sup>36</sup> Iesu i'abana haukia kipokia teao 'eka atana Getesemane, ba ehina benakia etibaha, "Au kaeao weia kabahuba'ari aonai wai hanona neia katomiati." <sup>37</sup> Ia Petero mai Sebedeo nahuna rua ebaka'anakia teao. Weiana aona e'abe'abe

ena raona eore, <sup>38</sup> ba ehinabenakia etibaha, "Au ao'u hanona ni'abe'abe wairai matoha pa'ari moiaina. Neia katomiaho kipokia kahabai'ima." <sup>39</sup> Eka'a haha 'apua aonai 'anonai e'umuti ebahuba'ari etibaha, "Hama'u e, heremuai ketaina raninai haiara 'erena neiana here'uai poa'i parena. Ia au e'u nuataeai aha'i, oi emu nuatae ai."

<sup>40</sup> Ba emue emai i'abana haukia herekia hanona tiparua eihanakia, ia ehore Petero ehinabena etibaha, "Aehoma buonai wai toaihau beraura hoana hamona kipokia a'i naha bai'ima? <sup>41</sup> Katobai'ima kato-bahuba'ari baihobo aonai a'i tomototo marikina. Aubami hanona nenuatae ia hauanimiti mo ni'abe'abe."

<sup>42</sup> Emue eao rani ibaruana ebahuba'ari mue etibaha, "Hama'u e, haiara 'erena neiana ia'i obona taearana aha'i raninai kainu. Ba emu nuatae akana kerama."

<sup>43</sup> Emue emai raninai tiparua eiha muekia pokina mahakia teparua ki'a baha. <sup>44</sup> Ua buonai ehabonakia emue rani ibaihauna ebahuba'ari, 'abi hamokia mo ehinanakia.

<sup>45</sup> Ba emue emai i'abana haukia herekia ehinabenakia etibaha, "Wai tuparua mai tuarai oho mo? Tomoihana, beraurana aba ekara'au, au maearima nahuna hanona aba ki'a haukia imakiai kateutana'u. <sup>46</sup> Tomomikiri, hamaeao. Tomoihana ehinahinaina'u hauna aba nimai."

*Iesu Tea'i 'Inina.*

*(Mk 14.43-50; Lk 22.47-53; Io 18.3-12)*

<sup>47</sup> Iesu ni'abi ohomo aonai i'abana haukia harau haea rua 'abakia ha Iuda ekara'au, maearima bo'ona kipokia kareba mai pura'a tea'inakia temai. Ia hanona robe haukia apa'uakia mai Iuda ekia maearima apa'uakia teuhunakia haukia. <sup>48</sup> Hinahina hauna hoa ha eba 'iobinakia etibaha, "Kapauna hauna maearimana mo weiana ba katoa'ina."

<sup>49</sup> Iuda beronai eka'a eao Iesu herena e'abi etibaha, "Ba'iobi haumu e, oi onamo?" Ba epauna. <sup>50</sup> Iesu Iuda ena 'abi ebamuena etibaha, "E'u hau e, emu mai akana mobabaina." Ba teka'a haha Iesu tea'i 'ini haraina.

<sup>51</sup> Weiana Iesu te'abana hauna ha etara kipona ena kareba eberi 'auna robe haukia arakiai hauna ena ta'ara'i hauna ha haiana ehara obona. <sup>52</sup> Iesu ia ehinabena etibaha, "Emu kareba 'ekanai mohorotina, pokina karebai ti'au haukia

ikoikiai karebai kate'ari. <sup>53</sup> Au hama'u panoina raninai ia beronai aneru itubuna harau haea rua† peuhunakia here'u hanona a'i o'jobina, 'u? <sup>54</sup> Ua perama aiho raninai, Puka robenai tererena au here'uai kerama toha hauna aea ketoha aiho?"

<sup>55</sup> Rani hamona weianai Iesu ehore to'u ehinabenakia etibaha, "Au kakikaki hau'u buonai wai imami mai karebakia mai pura'akia tomaki katoa'ina'u, 'u? Rani ikoinai au hanona wai kipokia marea robe aonai amiati aba'iohi, ia a'i toa'ina'u a'i tobirina'u. <sup>56</sup> Ia mahabanai haukia ekia rererere ketohana paunai neiakia ikoikiai na terama aiho."

Ba i'abana haukia ikoikiai Iesu tehabona tebeau 'akauma.

*Iesu Bakai 'Ekanai Ekoroti.*

*(Mk 14.53-65; Lk 22.54-55, 63-71; Io 18.13-14, 19-24)*

<sup>57</sup> Weiakia Iesu tea'ina hanona teaoaina robe haukia arakiai hauna Kaipasi herena, rauhuhu poki haukia mai Iuda ekia maearima apa'uakia hanona weia tebararona. <sup>58</sup> 'A Petero ehore ekaiturina atau'a tainai eka'a, teomo robe haukia arakiai hauna ena parabu aonai tekatoto. Ia etoto 'ima haukia kipokia temiati taba kerama hanona keihana.

<sup>59</sup> Robe haukia apa'uakia mai rauhuhu poki haukia hinai bai'oi haukia titabu Iesu beho 'ekani katehorotina kateba'arina. <sup>60</sup> Maearima bo'okia tekarahi bai'oi 'abikia herenai tehina, taba ha a'i tetabu ahina puanai hau rua tekarahi, <sup>61</sup> te'abi tetibaha, "Hau nei ana e'abi Tirama ena marea robe hanona keahu 'iti'itina ba wapu aihau aonai kebakori muena hanona ketaina."

<sup>62</sup> Robe haukia arakiai hauna emikiri Iesu ebakaina etibaha, "Mai emu 'abi ha? Hau neiakia ibabehomu 'abina tehinana hanona ekia 'abi 'arana kobamuena 'ao aha'i?" <sup>63</sup> Ia Iesu 'abi ha a'i ehinana. Robe haukia arakiai hauna haeamona ehinabena etibaha, "Mauri Tiramana atanai nabakaini'o kobatohana. Oi hanona Keriso Tirama nahuna raninai mo'abi!"

<sup>64</sup> Iesu e'abi etibaha, "Abimo naiana aba ohinana. Ikoimiai nahinabenimi, bariu rani nei ana keaoaina au maearima nahuna hiabu Tiramana itipanai kamiati mai kupa aiaranai auhao ahanai kamai

katoihana'u." <sup>65</sup> Ba robe haukia arakiai hauna kipona ena habuni etapana e'abi etibaha, "Ia hanona Tirama atana nia'i ki'ana. Taba buonai hinai 'abikia kahatabu? Bariu kipomi haiamiai Tirama atana ea'i ki'ana aiana aba tona. <sup>66</sup> Wai taba na tuho?" Maearima ena 'abi tebaumena tetibaha, "Ia hanona ebeho buonai ke'ari."

<sup>67</sup> Ba Iesu wairana te'atotina mai teahuna, ba baika tebo'ana, <sup>68</sup> te'abi tetibaha, "Oi Keriso, momahabanai tai ebo'ani'o hauna mohina pouna."

*Petero Iesu Ebuniai Aina.*

*(Mk 14.66-72; Lk 22.56-62; Io 18.15-18, 25-27)*

<sup>69</sup> Rani weianai Petero hanona parabu aonai itu wairanai emiati, ba ta'ara'i uahona ha emai herena e'abi etibaha, "Oi abomo Iesu Galilea hauna o'abana."

<sup>70</sup> Petero maearima ikoikiai wairakiai ebuniai etibaha, "Au a'i a'jobina oi taba robana nuahuna." <sup>71</sup> Ba Petero ekarahi eao pa'abi 'akonai, weia ta'ara'i uahona haeai ha ehore ia eihana ba maearima ehinabenakia etibaha, "Hau nei ana hanona Iesu Nasareta hauna e'abana." <sup>72</sup> Petero haeamona ebuniai mue e'abi'uai pahihia etibaha, "Ubi hauna e'jobina, hau weiana au a'i a'jobina."

<sup>73</sup> Rani a'i ehoma'a murinai weia tekoroiti haukia teao Petero herena te'abi tetibaha, "Abi tohana oi abomo 'abakia ha, pokina oi emu 'abi 'urunai tabai'iohi." <sup>74</sup> Ba ia e'abi'uai pahihia etibaha, "Ubi hauna e'jobina 'abi tohana nahinana. Aha'i raninai Tirama puma kebena'u. Hau naiana au a'i a'jobina." Beronai kokoro'u e'arara. <sup>75</sup> Ba Petero Iesu ena 'abi ehinana hauna eraona tinana, "Kokoro'u a'i ke'arara baha aonai oi rani aihau kobuniai aina'u." Weiana ekarahi eao atapakai ehai ki'a.

## 27

*Iesu Teaoaina Pilato Wairanai.*

*(Mk 15.1; Lk 23.1-2; Io 18.28-32)*

<sup>1</sup> Raurani amarinau robe haukia apa'uakia mai Iuda ekia maearima apa'uakia ikoikiai terobahu 'abi tebamona Iesu kateba'arina. <sup>2</sup> Ba Iesu tebirina tebaka'ana teaoaina Kabana hauna Pilato imanai teutana.

† 26:53: (53) Huari anerukia taha 'abaihu (6,000)

*Iuda Ena 'Ari.*  
(Ih 1.18-19)

<sup>3</sup> Weiana Iuda hinahina hauna Iesu eihana aba puma kea'ina raninai eraona raona haraina, Silba monina harau aihau emueaina eao robe haukia apa'uakia mai Iuda ekia maearima apa'uakia kebenakia, <sup>4</sup> e'abi etibaha, "Au aba ki'a ababaina, pokina ena beho aha'i hauna hinahinana ahinahina." Ia ena 'abi tebamuenta tetibaha, "Weiana hanona ai aha'i oi kipomu emu aro'ari." <sup>5</sup> Ua buonai Iuda moni weiana marea robe aonai ekapo totona ba ia ekarahi eao kipona ebato'ona e'ari.

<sup>6</sup> Robe haukia apa'uakia moni tea'ina te'abi tetibaha, "Neiana hanona aika eka rauhuhu, moni neiana marea robe mauanai a'i kahautana pokina 'ari 'aranai eao." <sup>7</sup> 'Ari boi monina terobahu aina puanai puou babai hauna herenai hano tekawana, hano weiana hanona maearima haeai ekia 'ariahanai keao. <sup>8</sup> Weiana buonai hano atana teaparina 'Aruaru Hanona' emai mo bariu. <sup>9</sup> Ieremia mahabanai hauna rani weiana ena 'abi ehinana hauna emai etohana etibaha, 'Isaraela haukia 'ara teuahina ia 'aranai keao hauna Silba monina harau aihau tea'ina, <sup>10</sup> moni weiana puou babai hauna ena hano tekawana Obiapaka ehina bena'u ihobona.'

*Pilato Iesu Ebakaina.*  
(Mk 15.2-5; Lk 23.3-5; Io 18.33-38)

<sup>11</sup> Rani weianai Iesu Kabana wairanai ekoroti, Kabana hauna ehore Iesu ebakaina etibaha, "Oi hanona Iuda haukia ekia obia arana, u?" Iesu ia ena 'abi ebamuenta etibaha, "E, aba nu'abi mo naiana." <sup>12</sup> Ia robe haukia apa'uakia mai Iuda ekia maearima apa'uakia tehinau aina raninai Iesu hanona ekia 'abi ha a'i ebamuenta. <sup>13</sup> Weiana Pilato ehore Iesu ehinabena etibaha, "Tehinau aini'o 'abikia haeai haeai tehina aiakia a'i nuona?" <sup>14</sup> Ba Iesu 'abi ha a'i ehina 'apuana, buonai Kabana hauna aona earo'ari.

*Pilato E'abi Iesu Kateahu'arina.*  
(Mk 15.6-15; Lk 23.13-25; Io 18.38-19.16)

<sup>15</sup> Kabanai tatukia ranikiai Kabana hauna ena hoahoa tainai maearima wapura hauna katenuatae aina hauna

kebakarahi 'abaeana. <sup>16</sup> Rani weianai wapura hauna wapura itunai emiaho hauna Baraba atana te'iobi haraina. <sup>17</sup> Mako weia teto'u aonai Pilato ebakainakia etibaha, "Tai tonuatae aina kabakarahi 'abaeana, Baraba 'ao Iesu tuaparina Keriso hauna?" <sup>18</sup> Pokina Pilato e'iobi haraina Iuda ekia hau apa'uakia hanona Iesu tewamuruaina paunai imanai teutana. <sup>19</sup> Ia bakai imia'aunai emiati aonai atawana 'abi etiu ahina eao herena, "Hau naiana ena beho aha'i hauna herenai taba ha a'i kobabaina, pokina rabi ia anibi aina hanona ao'u earo'ari ki'a baha."

<sup>20</sup> Aonai robe haukia apa'uakia mai Iuda ekia maearima apa'uakia mako tebahi ahinakia Baraba katenoi aina kebakarahina ia Iesu 'ariai kehorotina. <sup>21</sup> Haeamona Pilato mako ebakainakia etibaha, "Terarua neiakia tai tonuatae aina kebakarahina?" Ia ena 'abi tebamuenta tetibaha, "Baraba." <sup>22</sup> Pilato e'abi etibaha, "Ba Iesu tuaparina Keriso hauna herenai taba kababaina?" Ikoikiai te'abi tetibaha, "Matiu ibiri ropo 'ubinau kokoko 'auna!" <sup>23</sup> Pilato ebakainakia etibaha, "Aehoma, beho tabana ebabaina?" Ia mo teio aota ki'a tetibaha, "Matiu ibiri ropo 'ubinau kokoko 'auna!"

<sup>24</sup> Pilato e'iobina ena hiabu aba aha'i, weiana 'uri'uri rarina aba kerama. Buonai bei eberi hahana mako wairakiai imana eutunakia etibaha, "Au hau neiana ena 'ari buona a'i ka'arana, wai kipomi emi aro'ari." <sup>25</sup> Maearima ikoikiai te'abi tetibaha, "Ia ena 'ari pumana ai mai nahu-mai kipokia tamahoaina." <sup>26</sup> Ba Pilato Baraba ebakarahina eao herekia, ia Iesu ebenakia kate'atina matiu ibiri ropo 'ubinau katekoko 'auna.

*Huari Haukia Iesu Tebapo'ona.*  
(Mk 15.16-20; Io 19.2-3)

<sup>27</sup> Kabana hauna ena huari haukia Iesu tea'ina teaoaina Kabamani itunai, ba huari haukia ikoikiai temai tekori kakaiarona. <sup>28</sup> Ia tehore Iesu ena habuni tebakuri ahina ia habuni birona tebatotona. <sup>29</sup> Aranai kebau'una hauna 'ini boaboai tebahuna aranai tebabau'una. Bitobito ha imana itipanai teba'ina, wairanai tekaipehu tebateaina tetibaha, "Iuda haukia ekia obia arana e, oi onamo?" <sup>30</sup> Ba te'atotina bitobito tea'i boina, aranai te'ati ba te'ati hao 'ati haona. <sup>31</sup> Tebateaina epua habuni birona



weiana tebakuri ahina, ia ena habuni tohakia tebabatotona. Tebaka'ana matiu ibiri ropo 'ubina'i katekoko 'auna.

*Iesu Matiu Ibiriropo 'Ubinai Tekoko 'auna.*  
(Mk 1.21-32; Lk 23.26-43; Io 19.17-27)

<sup>32</sup> Huari haukia Iesu tebaka'ana rani-nai Kurene hauna atana Simona tetabu ahina tebahi ahina Iesu ena matiu ibiri ropo kebuana. <sup>33</sup> 'Eka hai tekara'au atana Kolkota. (Anina hanona 'Ara huriakia 'ekana'.) <sup>34</sup> Weia bine beina mai mura-mura mabina ha ohi tebarai haeamona Iesu tebena keinu, etema hobona mo ia a'i einu. <sup>35</sup> Huari haukia Iesu matiu ibiri ropo 'ubina'i tekoko 'auna epua baiatakiai ena habuni pu'iai tebina'ana. <sup>36</sup> Weiana murinai temiati mahakia hanona ia teiha 'inina. <sup>37</sup> Iesu arana 'ubina'i hinau bai'oi 'abina tererena teahu 'auna tetibaha, 'NEIANA IESU, IUDA HAUKIA EKIA OBIA 'ARANA.'

<sup>38</sup> Rani weianai kakikaki haukia rua Iesu kipokia ha ha ekia matiu ibiri ropo 'ubina'i tekoko 'aunakia, ha itipana tainai mai ha awarina tainai. <sup>39</sup> Maearima weia tekabana'i haukia arakia tekaiai kaiaianakia mai bataeai bataeai 'abikia Iesu herenai tehina, <sup>40</sup> tetibaha, "Oi o'abi marea robe koahu 'iti'itina wapu aihau aonai kobakori muena haumu, oi Tirama nahuna ranina'i kipomu moba maurini'o, matiu ibiri ropo 'ubina'i moriri omai."

<sup>41</sup> Robe haukia apa'uakia rauhuhu poki haukia mai Iuda ekia maearima apa'uakia abomo tebateaina te'abi tetibaha, <sup>42</sup> "Ia maearima baika ebamaurinakia, ia aehoma kipona a'i nibamaurina? Ia hanona Isaraela ekia obia arana, bariu matiu ibiri ropo 'ubina'i meriri emai hanona kaha'ikakaumana. <sup>43</sup> Ia Tirama ea'ikakaumana ba Tirama ia penuatae aina ranina'i bariu mebamaurina, pokina e'abi ia hanona Tirama nahuna." <sup>44</sup> Kakikaki haukia rua matiu ibiri ropo 'ubina'i tekoko 'aunakia haukia abomo ua te'abi pahihi aihou ia herenai.

*Iesu Ena 'Ari.*  
(Mk 15.33-41; Lk 23.44-49; Io 19.28-30)

<sup>45</sup> Atiaha hanona wapura rarina hanopaka maikoinai ekaiabuna eaomo beraura ebaeno hoana 3. <sup>46</sup> Beraura hoana 3 aonai Iesu eio etibaha, "Eloi eloi lama sabakatani!" Anina hanona 'E'u Tirama e, E'u Tirama e, oi aehoma

buonai ohabona'u!' <sup>47</sup> Maearima baika weia tekoroti aiana teona haukia te'abi tetibaha, "Hau neiana hanona Elia nia-parina." <sup>48</sup> Beronai 'abakia ha ebeau eao rora'e ha ea'ina bine beina manoinai ehao uhuna, matiuai etiu taeana Iesu keinu. <sup>49</sup> Ia baika te'abi tetibaha, "Mohabona, Elia kemai kebamaurina re'a kahaihana." <sup>50</sup> Iesu haeamona eio aota ki'a murinai e'ari.

<sup>51</sup> Rani weianai marea robe i'aea hurina habunina etapa boana 'ubiai eriri eao mo ba'ai. Kanokau eka'a pihara tepa'a. <sup>52</sup> 'Ari ahana 'urikia tekaikau Tirama ena robe haukia bo'okia te'ari haukia temikiri temauri mauri. <sup>53</sup> Iesu emikiri mue murinai ekia 'ariahakiai tekarahi Ierusalem a tekatoto maearima bo'okia herekiai tewaira tina. <sup>54</sup> Huari poki hauna ena huari haukia kipokia Iesu te'imana, kanokau eka'a mai taba terama haukia ikoikiai teihanakia ranina'i teta'u wairai te'abi tetibaha, "Abi tohana hau neiana hanona Tirama nahuna."

<sup>55</sup> Babi'e bo'ona abomo weia atau'ai tekoroti teihana, weiakia hanona Galilea ai Iesu murinai te'au mai ta'arana tea'i babi'ekia. <sup>56</sup> Baiatakiai hanona Maria Magadala babi'ena mai Maria ha Iakobo Iosepa ohi hinakia mai Sebedeo nahuna rua hinakia.

*Iesu Tehorena.*  
(Mk 15.42-47; Lk 23.50-55; Io 19.38-42)

<sup>57</sup> Rabirabi weianai kepu hauna ha emai atana Iosepa Arimatea hauna ia abomo Iesu te'abana hauna ha. <sup>58</sup> Ia Pilato herena eao ba Iesu hauanina enoiaina, Pilato 'abi ebaibeni weiana Iesu hauanina Iosepa katebena. <sup>59</sup> Weiana Iosepa Iesu hauanina ea'i obona, habuni mahamahanama namonai e'apana. <sup>60</sup> 'Ariahana mahamahanama pihara ekuina ia kipona 'euna hauna aonai ehorena, pihara apa'uana ha ebaherena eao pa'abina ebahu abuna ba eka'a. <sup>61</sup> Maria Magadala babi'ena 'abana Maria ha ohi hanona weia 'ariahana abihanai temiati teihana.

*Huari Haukia 'Ariahana Te'imana.*

<sup>62</sup> Erani raurani beraura robenai robe haukia apa'uakia mai Parisea haukia teao Pilato herena, <sup>63</sup> te'abi tetibaha, "Hau apa'uana e, ai bai'oi hauna weiana maurinai emiaho aonai ena 'abi ehinana hauna taraona 'inina etibaha, 'Wapu

ibaihaunai kamikiri mue.’ <sup>64</sup> Ua buonai 'abi kobaibeni 'ariahana kate'ima haraina keao mo wapu ibaihaunai. Pokina a'i enamo, i'abana haukia kateao Iesu hauanina katebainao aina ba maearima haiakiai kate'abi 'Ia hanona 'ari haukia baiatakiai aba emikiri mue.’ Bai'oi neiana muriai hauna atetuana keki'a wairai ba 'uaina hauna.” <sup>65</sup> Pilato ehinabenakia etibaha, “Bai'ima haukia tomoaoainakia, 'ariahana kate'ima haraina.” <sup>66</sup> Ua buonai teao 'ariahana ikaiabuna piharana teka-iabu haraina ahanai rauhubu mani'ana tehorotina, ba 'ima'ima haukia weia tehabona kateiha 'inina.

## 28

### *Iesu 'Ariai Emikiri Mue.*

*(Mk 16.1-10; Lk 24.1-10; Io 20.1-18)*

<sup>1</sup> Beraura robe eore murinai hui beraurana kori'uaina raurani amarina, Maria Magadala babi'ena mai Maria ha ohi teao 'ariahana kateihana. <sup>2</sup> Rani weianai kanokau rarina 'akina eka'a aonai Obiapaka ena aneru ha kupai eriri emai 'ariahana pa'abina piharana ebahere parena ahanai emia'au. <sup>3</sup> Ia hauna ea obo matoha 'imare 'abana ena habuni tepore wairai matoha 'auhao porena 'abana. <sup>4</sup> 'Ariahana te'imana haukia aneru teihana raninai teta'u ki'a te'ururu aokia terea te'eho matoha te'ari.

<sup>5</sup> Ia aneru hanona babi'e ehina benakia etibaha, “A'i tomota'u, au a'jobina wai Iesu matiu ibiri ropo ubinai tekoko 'auna hauna tutabuna. <sup>6</sup> Ia hanona neia aha'i. Ia hanona aba emikiri 'uainai ehinabenimi ihobona. Tomai enoti 'ekana tomohana. <sup>7</sup> Ba tomoao biai i'abana haukia katohina benakia, 'Ia hanona 'ari haukia baiatakiai aba emikiri mue ba aba ne'uai niao Galilea, weia katoihana.' 'Abi neiana kabenimi paunai amai.”

<sup>8</sup> Ua buonai babi'e 'ariahanai tekarahi noanoa mai ta'ukia mai aonamokia tebeau i'abana haukia herekia katehina benakia. <sup>9</sup> Taearai tiao aonai Iesu kipokia tebaitabu ahi. Ehinabenakia etibaha, “Raurani namona!” Ba teao herena te'umuti aena tea'i to'o tekutiaina. <sup>10</sup> Ba Iesu ehina benakia etibaha, “A'i tomota'u, katoao uaho'aba'u katohina, benakia kateao Galilea ua'a kateihana'u.”

### *'Ariahana Te'imana Haukia Ekia 'Abi.*

<sup>11</sup> Babi'e taearai teka'a teao aonai, huari haukia 'ariahana te'imana haukia

baika temue aiara apa'uana teao taba terama haukia poukia ikoikiai robe haukia apa'uakia herekiai tehinanakia. <sup>12</sup> Robe haukia apa'uakia hanona Iuda ekia maearima apa'uakia kipokia teto'u te'abi'abi ekia raona tebakorina huari haukia weiakia moni rarina ha tebenakia, <sup>13</sup> ba tehina benakia tetibaha, “Wai kato'abi katotibaha, 'I'abana haukia rabi taparua rea aonai temai Iesu hauanina tebainao aina.’ <sup>14</sup> Pou neiana Kabana hauna keona raninai ai kataba'amena, aona kataba kabanaina keraonana wai hanona emi ki'a aha'i, abomo taba ha aomi a'i kebaro'arina.” <sup>15</sup> Huari haukia moni tea'ina ba tehina benakia ihobona tebabaina. Ua buonai 'abi neiana Iuda haukia baiatakiai tehina otaraina rani weianai emai mo bariu.

### *Iesu 'I'abana Haukia Herekiai Ewaira Tina Aka Ebenakia.*

*(Mk 16.14-18; Lk 24.36-49; Io 20.19-23; Ih 1.6-8)*

<sup>16</sup> Ba i'abana haukia harau haea hamomo teao Galilea Iesu ehina benakia oeona teao. <sup>17</sup> I'abana haukia ia teihana raninai tekuti aina, 'a baika hanona aokia tekai'au kai'au. <sup>18</sup> Iesu eka'a ha ha eao herekia ba ehinabenakia etibaha, “Tirama ehore hiabu ikoinai kupai mai hanopakai hauna aba ebena'u. <sup>19</sup> Ua buonai katoao itubu ikoikiai maearimakia herekia i'aba'u haukia katobaonakia, katoba'uere robenakia Hamana Nahuna mai Auba Robe atakiai, <sup>20</sup> ahinabenimi 'abikia ikoikiai katoba 'iobinakia kateka'ainakia. Tomobahu, au hanona rani ikoinai wai heremiai keao mo hanopaka kepua.”

## Pou Namona MAREKO Ererena Hauna

### *Puka Aona Irerena 'Abina*

Pou namona neiana Mareko ererena, ena 'abi kori'uaikia aokia na e'abi aiho, "Iesu Keriso Tirama Nahuna Pouna Namona." Puka neiana aonai hanona kaha'jobina Iesu hanona mai ena hiabu taba ikoikiai kebabainakia. Maearima nibamarerenakia ranikiai, auba ki'a obokia neu'u ahinakia ranikiai, mai maearima ekia ki'a nehina haonakia ranikiai ena hiabu hanona kahaihana. Iesu kipona eaparina Maearima Nahuna, ia emai kipona kebaibeni aina maearima ikoikiai kekawa muenakia ki'a herenai katerubu 'abaea paunai.

Mareko kipona ena nuatae 'abina hanona bo'ona a'i nehinana, ia beronai Iesu ena aka pouna nehinana. Kori'uaina Mareko ehore Ioane ba'uere robe hauna robana eahuna, mai Iesu aea e'uere robe aiho mai Satani ia ehobona hauna robaha eahuna. Ba Iesu ehore maearima weiakia puma bo'ona tebulanakia haukia eaoko'o ainakia, ba ebamaurinakia mai ebamarere harainakia. Popounai hanona murinai ti'au haukia Iesu taba nibabai obokia a'i teobo, iamo mai 'aiaunukia ia kipokia tekaoao haemo eamo te'iobi haraina. Weiakia ia ti'oatana haukia ekia opuere hanona eao eapa'ua hao apa'ua hao. Puka neiana puanai hanona Iesu ena 'ari mai ena mikiri mue robakia eahuna.

### *Puka Paipana Apa'uakia*

- a. Pou namona ia'i ramana. (1.1-13)
- b. Iesu ena aka maearima herekiai Galilea aonai. (1.14–9.50)
- c. Galilea eamo Ierusalem. (10.1-52)
- d. Hui orena Ierusalem herenai mai aonai. (11.1–15.47)
- e. Iesu ena mikiri mue. (16.1-8)
- e. Obiapaka ena waira tina mai ena kara'au kupa. (16.9-20)

### *Ba'uere Robe Hauna Ioane Eiroro.* (Mt 3.1-12; Lk 3.1-18; Io 1.19-28)

<sup>1</sup> Tirama Nahuna Iesu Keriso pouna namona kori 'uaina hanona neiana. <sup>2</sup> Isaia mahabanai hauna ererena etibaha, "Tirama e'abi,

'E'u iuhubeau hauna nauhu 'uaina kewahi heremu, emu taeara kea'ia'i haraina.'

Mal 3.1

<sup>3</sup> Aia ha hano'akunai neio netibaha, 'Obiapaka ena taeara tomoba'oruna. Ena kaoao boana tomobaberona.'

Isa 40.3

<sup>4</sup> Ua buonai Ba'uere robe hauna Ioane hano'akunai ewaira tina, eba'uere robe mai eiroro etibaha, "Emi ki'ai tomoraona kabe, kato'uere robe, Tirama emi ki'a kehina haonakia." <sup>5</sup> Maearima bo'ona Iudea hanonai mai Ierusalem haukia ikoikiai teao Ioane Ba'uere robe hauna aiana teona, ekia ki'a tehina pou, abomo Ioridana atenai eba'uere robenakia.

<sup>6</sup> Ioane habuni ebatotona hauna hanona Kamela buirana. Huana 'apana hanona Poromakau parua, ena aniani hanona pekaupokau mai hoho beina. <sup>7</sup> Na eiroro aiho maearima wairakiai. "Hau ha au muri'uai kemai hauna eapa'ua ki'a baha ba au. Au hanona a'i anamo kakuti, ena tamaka warona irubunai abomo a'i etaina'u. <sup>8</sup> Au wai beiai naba'uere robenimi, 'a ia hanona Auba Robeai keba'uere robenimi."

### *Iesu E'uere Robe Mai Satani Ehobona.* (Mt 3.13; 4.11; Lk 3.21-22; 4.1-13)

<sup>9</sup> Rani weianai Iesu Nasareta Galileai emai. Ioane ehore eba'uere robeni Ioridana atenai. <sup>10</sup> Iesu beiai ekara'au raninai, kupa epa'a eihana Auba Robe eriri ia ahanai ihana matoha rauria. <sup>11</sup> Abomo aia ha kupai emai etibaha, "Oi hanona Au Naha'u, e'u raona'au. Au oi naonamoai ki'a bahani'o."

<sup>12</sup> Rani a'i ehoma'a murinai Auba Robe Iesu eaoaina hano'akunai. <sup>13</sup> Iesu weia emiaho wapu bariabui, Satani ia ehobona, 'aki tabakia kipokia temiaho, ba aneru temai tebaraina.

### *Iesu Ba'eha Haukia Bani Eaparinakia.* (Mt 4.12-22; Lk 4.14-15; 5.1-11)

<sup>14</sup> Ioane Ba'uere robe hauna wapura itunai tekaiabuna murinai, Iesu hanona eao Galilea ai Tirama ena pou namona eiroro aina. <sup>15</sup> Etibaha, "Abi'uai ranina tohana abekara'au, Tirama ena obia aiarana aba ekaibari, emi ki'ai tomoraona kabe, Pou Namona tomo a'ikakaumana."

<sup>16</sup> Iesu hanona Galilea 'obu poena 'ekana eao raninai, Simona mai hatina Anderea ohi eihanakia, re'e 'obuai tehorena, pokina terarua hanona ba'eha haukia. <sup>17</sup> Iesu ehina benakia etibaha, "Muri'uai tomai, au kahore wai maearima iba'ehakia kaba 'iobinimi." <sup>18</sup> Beronai mo ekia re'e tehabonakia murinai teao.

<sup>19</sup> Ia ekataeana eao Sebedeo nahuna Iakobo mai hatina Ioane ohi eihanakia ahiai ekia re'e tia'ia'i harainakia. <sup>20</sup> Ba Iesu beronai terarua eaparinakia, hamakia Sebedeo mai teba'eha oioi miorikia ahiai tehabonakia murinai teao.

*Iesu Hau Ha Aonai Auba Ki'a Obona Eu'u Ahina.*

*(Lk 4.31-37)*

<sup>21</sup> Iesu mai i'abana haukia kipokia teao Kaperanauma aiaranai. Beraura Robeai Iesu hanona Iuda haukia ekia marea aonai ekatoto ena ba'iohi ea'i ramana. <sup>22</sup> Maearima weiakia ena ba'iohi 'urukia teo'o raninai teta'u ta'u huri, pokina ena ba'iohi hanona mai hiabukia, rauhuhu poki haukia 'abakia aha'i.

<sup>23</sup> Weia hanona hau ha aonai auba ki'a obona etoto hauna marea aonai eio etibaha, <sup>24</sup> "Iesu Nasareta haumu e! Taba heremaiai kobabaina, Oi ai koa'i ki'anamai paunai omai, u? Au oi a'iohini'o, oi hanona Robe haumu Tirama ea'i taeani'o." <sup>25</sup> Iesu auba ki'a obona ehina bena etibaha, "Mounu hau naiana aonai mokarahi." <sup>26</sup> Auba ki'a obona hau weiana eba'ururu ki'ana, mai ioiona hau weiana aonai ekarahi. <sup>27</sup> Maearima weia ikoikiai teta'u ta'u huri, ha ha kipokia tebakai bakai, tetibaha, "Neiana taba? Ba'iohi mo mahamahana ha mai hiabuna. Auba ki'a obokia nehina benakia hanona aiana tiona." <sup>28</sup> Ua buonai Iesu pouna Galilea hanona maikoinai tehina otaraina.

*Iesu Maearima Bo'ona Ebanamonakia.*  
*(Mt 8.14-17; Lk 4.38-41)*

<sup>29</sup> Iesu i'abana haukia Ioane mai Iakobo kipokia marea tehabona berokiai teao Simona mai Anderea ekia ituai. <sup>30</sup> Simona rawana babi'ena einawa, hauna ehiabu ena ituai enoti. Iesu emai raninai, haianai ena inawa pouna tehinana. <sup>31</sup> Iesu eao ia herena, imanai ea'i ebaraina eberi korina. Ena hau hiabu eore, babi'e emikiri ekia aniani eabai.

<sup>32</sup> Beraura ekaihuna rabirabinai inawa haukia mai maearima aokiai auba

ki'a obokia temiaho haukia teaoainakia Iesu herena. <sup>33</sup> Aiara maearimakia ikoikiai temai itu weiana wairanai teto'u. <sup>34</sup> Inawa haeai haeai haukia bo'okia Iesu ebanamonakia, haeamona auba ki'a obokia bo'ona eu'u ahinakia, 'a auba ki'a obokia hanona Iesu te'iohina buonai ekaiabunakia a'i kate'abi.

*Iesu Galileai Eiroro.*  
*(Lk 4.42-44)*

<sup>35</sup> Raurani wapuranai, a'i nirani baha aonai Iesu emikiri itu ehabona, eao 'eka 'abaeana ha, ua'a ebahuba'ari. <sup>36</sup> Ba Simona 'abana kipokia tekarahi itabuna teao. <sup>37</sup> Weia tetabu ahina ba tehina bena tetibaha, "Maearima ikoinai hanona oi titabuni'o." <sup>38</sup> Ia Iesu ekia 'abi ebamuena etibaha, "Aika hamaeao aiara herekai haukia, aokiai abomo kairoro, aka weiana hauna paunai amai." <sup>39</sup> Iesu hanona Galilea aona maikoina ekana, Iuda haukia ekia marea aokiai eiroro mai auba ki'a obokia maearima aokiai haukia eu'u u'u ahinakia.

*Iesu Morumoru Hauna Ebanamona.*  
*(Mt 8.1-4, Lk 5.12-16)*

<sup>40</sup> Morumoru hauna ha emai Iesu wairanai ekai pehu, enoina etibaha, "Ponuatae raninai, pobamaurina'u." <sup>41</sup> Iesu ehore eaoko'o aina, abomo etara ea'i 'apuana, ehina bena etibaha, "E. Au nanuatae konamo. Haumu menamo!" <sup>42</sup> Rani hamona morumoru hanona hau weiana ehabona, hauna enamo. <sup>43</sup> Iesu hau weiana euhuna aonai eharabuna etibaha, <sup>44</sup> "Aia'u nona, hau ha haianai a'i ko'abi 'apua. Beronai koao, Robe hauna herena, haumu keihana. Mose ena rauhuhu ihobona, onamo hanona beruberuna Tirama herenai kobaibeni, oi emu namo ibatohana." <sup>45</sup> 'A hau weiana eao 'eka ikoinai ena namo pouna ekikipa otaraina. Ena kikipa weiana buonai Iesu hanona aiara aokiai a'i ekatoto. 'A 'eka 'abaeakiai mo emiaho, 'eka haeai haeai maearimakia hanona teao herena.

## 2

*Iesu Mero Hauna Ebamikirina.*  
*(Mt 9.1-8; Lk 5.17-26)*

<sup>1</sup> Wapu baika teore murinai Iesu haeamona emue eao Kaperanauma aiarana, maearima pouna teona ia hanona ituai. <sup>2</sup> Maearima bo'ona 'akina temai teto'u



itu ebonu 'auna, 'eka hana ha a'i emi-aho eao mo pa'abi 'akonai epua, ba Iesu neiroro aiana tiona. <sup>3</sup> Hau bani hanona mero hauna ha tebuana teaoaina. <sup>4</sup> Maearima ebo'o ki'a baha buonai, hau weiana kateaoaina Iesu herenai hanona a'i etaina. Ua buonai Iesu 'arana paipana kapeheneai 'erere ha tebabaina. Mero hauna mai 'irena weia tebaririna eao Iesu wairanai. <sup>5</sup> Iesu ekia a'ikakauma weiana eapa'ua ki'a baha eihana buonai, mero hauna ehina bena etibaha, "Naha'u e! Emu ki'a aba ihina hao."

<sup>6</sup> Rauhuhu poki haukia baika weia temiati, kipokia teraona raona. <sup>7</sup> "Taba buonai hau neiana na ni'abi aiho? Ia Tirama herenai ni'abi ki'a. Tirama mo kipona ki'a kehina haonakia." <sup>8</sup> Iesu abahamo aokia e'iohina, ba wairakiai e'abi, etibaha, "Taba buonai 'abi neiana turaonana? <sup>9</sup> Ki'a ihina hao 'abina hanona e'ama'ama, a'i tubatohana re'a, bariu hau neiana kahina bena kemikiri keka'a katoihana. <sup>10</sup> Ba katobatohana, au Maearima nahuna hanona mai hiabu'u hanopakai ki'a kahina haonakia." Ba mero hauna ehina bena etibaha, <sup>11</sup> "Au oi nahina beni'o. Omikiri, emu 'ire moa'i taeana, moka'a emu itu!" <sup>12</sup> Maearima wairakiai emikiri, ena 'ire eouna ea'i taeana eka'a. Ikoikiai teta'u ta'u huri, Tirama tebanamona tetibaha, "Aika hoa nahomana ha a'i haiha 'apuana."

### *Iesu Lebi Eaparina.*

*(Mt 9.9-13; Lk 5.27-32)*

<sup>13</sup> Iesu haeamona emue eao Galilea 'obu poena. Maearima bo'ona 'akina temai herena ba eba'iohinakia. <sup>14</sup> 'A ia eka'a eao aonai, takiti a'i hauna Lebi Alepeo ena aka 'ekanai emiati eihana, Iesu ia ehina bena etibaha, "Muri'uai omai!" Lebi beronai mo emikiri murinai eao.

<sup>15</sup> Lebi ena ituai aniani 'ekanai temiati, takiti a'i haukia mai ki'a haukia bo'okia Iesu mai i'abana haukia kipokia teani-ani, pokina mako Iesu murinai teka'a. <sup>16</sup> Rauhuhu poki haukia Parisea itubunai temai Iesu ki'a haukia mai takiti a'i haukia kipokia teaniani haemo teihanakia raninai, i'abana haukia tebakainakia tetibaha, "Taba buonai Iesu maearima uahomakia kipokia tianiani haemo?" <sup>17</sup> Iesu aiakia eona raninai, ekia 'abi ebamuenakia etibaha, "Maearima a'i teinawa

haukia hanona muramura baibeni hauna a'i tenuatae aina, 'a inawa haukia mo tenuatae aina. Au aka bero haukia paukiai a'i amai, ia au hanona ki'a haukia paukiai amai."

### *Anirobe Bakai bakaina.*

*(Mt 9.14-17; Lk 5.33-39)*

<sup>18</sup> Rani ha ba'uere robe hauna Ioane i'abana haukia mai Parisea haukia hanona teani robe. Ua buonai maearima baika temai Iesu tebakaina tetibaha, "Ba'uere robe hauna Ioane i'abana haukia mai Parisea haukia i'abakia haukia tiani robe, 'a oi i'abamu haukia aehoma buonai a'i tiani robe?" <sup>19</sup> Iesu ekia 'abi ebamuena, etibaha, "Tomoraona haraina! Hawainibe mahamaha hauna ena baki haukia aonamo weiana aonai hanona aea kateani robe aiho? Aha'i baihana! Kipokia temiaho oioi hanona a'i kateani robe. <sup>20</sup> 'A rani kemai aonai hawainibe mahamaha hauna herekiai katea'i parena. Ua raninai ia abomo kateani robe.

<sup>21</sup> Habuni mahamahana puapuana ha habuni 'ai'aina marana a'i kehuri abuna, pokina habuni mahamahana puapuana keberi o'onaina habuni 'ai'aina ketapana. Mara rarina kerama. <sup>22</sup> Abomo bine mahamahana beibe'i 'ai'ainai a'i kebaharuna, pokina bine mahamahana kehore beibe'i 'ai'aina kebua 'iti'itina, bine mai beibe'i ohi kateki'a haemo. Ua buonai bine mahamahana hanona beibe'i mahamahana mo katebaharuna."

### *Beraura Robe Obiana.*

*(Mt 12.1-8; Lk 6.1-5)*

<sup>23</sup> Beraura Robenai Iesu Witi umanai ekabanai, i'abana haukia ka'akiai Witi buakia terurunakia teani. <sup>24</sup> Parisea haukia hanona Iesu tehina bena tetibaha, "Moihana! Taba buonai oi i'abamu haukia hanona Beraura Robe rauhuhuna tia'i ki'ana?"

<sup>25</sup> Iesu ekia 'abi ebamuena etibaha, "Davida ena maearima kipokia rani weianai mare'a te'ari, emikiri taba ebabaina hauna pouna a'i totuabi 'apuana? <sup>26</sup> Abiata Robe hauna ena raniai, Davida emikiri eao Marea Robeai parawa robe weia robe haukia kateani hauna eani, baika ena maearima ebenakia teani."

<sup>27</sup> Iesu haeamona ehinabe muenakia etibaha, "Tirama ehore Beraura Robe ebabaina hanona maearima ena namo

paunai, ia maearima hanona Beraura Robe paunai a'i ebabaina. <sup>28</sup> Ua buonai Maearima Nahuna hanona Beraura Robe abomo keobia aina."

### 3

#### *Hau Ha Imana Ekobekobe.* (Mt 12.9-14; Lk 6.6-11)

<sup>1</sup> Iesu haeamona emue eao Iuda haukia ekia mareai ekatoto, weia hanona hau ha imana kobekobena eihana. <sup>2</sup> Maearima baikā aba weia Iesu te'itimana beho ha kebabaina re'a kateihana, hau weiana kebamaurina Beraura Robeai hanona behoi katehorotina. <sup>3</sup> Iesu ima kobekobe hauna ehina bena etibaha, "Momikiri, omai na'a maearima wairakiai." <sup>4</sup> Iesu ehore maearima ebakainakia etibaha, "Eka Rauhuhu taba e'uahina kahababaina Beraura Robeai? Namo kahababaina 'ao ki'a kahababaina? Maearima kahaba maurina 'ao kahaba'arina?" Weia hanona taba ha a'i tehinana, a'i aia aiakia. <sup>5</sup> Iesu mai opuerena eiha 'ini'ininakia, haeamona eaoko'o ainakia, pokina ekia aopahihi paunai. Ima kobekobe hauna ehina bena etibaha, "Imamu motiu pahihina!" Imana etiu pahihina hanona beronai enamo. <sup>6</sup> Ua buonai Parisea haukia mareai tekarahi, beronai teao Heroda titaina haukia kipokia teto'u, Iesu iahu'arina taearana terobahu aina.

#### *Mako Iesu Murinai Teao.*

<sup>7</sup> Iesu i'abana haukia kipokia tekarahi teao Galilea 'Obuna hanona mako rarina Galileai murikiai teao. <sup>8</sup> Abomo maearima Iudeai, Ierusalemā, Idumeai, Ioridana ate abirana taetana haukia, Turo mai Sidono haukia abomo temai, ena poki hanona Iesu hoa weiakia ebagai poukia teo'o paukiai. <sup>9</sup> Mako rarina 'akina buonai, Iesu i'abana haukia ehina benakia ahi ha kateba'oruna, maearima taeara a'i temekaikai abuna marikina. <sup>10</sup> Iesu maearima bo'ona 'akina ebamaurinakia buonai, inawa haukia taeara tetabu hanona tebaituaina, Iesu katea'i 'apuana na tehoma. <sup>11</sup> Abonamo aokiai auba ki'a obokia temiaho haukia Iesu teihana raninai, temai wairanai te'eho teio tetibaha, "Oi hanona Tirama Nahuna!" <sup>12</sup> 'A Iesu hanona auba ki'a obokia eharabunakia, pouna a'i katehinana ia hanona tai.

#### *Iesu Iuhubeau Haukia Harau Haea Rua Etina'anakia.*

(Mt 10.1-4; Lk 6.12-16)

<sup>13</sup> Iesu oeoai ekara'au enuatae ainakia haukia eparinakia, teao herena. <sup>14</sup> Haukia harauhaea rua ea'i taeanakia, atakia ehinana Iuhubeau haukia, ia kate'abana, keuhu ahinakia kateiroro, <sup>15</sup> abomo hiabu kebenakia auba ki'a obokia kateu'u ahinakia. <sup>16</sup> Harauhaea rua haukia neiakia. Simona (Iesu ata ibaruana ebena Petero), <sup>17</sup> Sebedeo nahuna Iakobo, hatina Ioane ohi (Iesu ata ebenakia hanona Boanere, anina hanona 'Kupa niro'u nahuna.') <sup>18</sup> Anderea, Pilipo, Batolomeo, Mataio, Toma, Alepeo nahuna Iakobo, Tadeo, Simona Kanana hauna, <sup>19</sup> mai Iuda Kariote hauna Iesu hinahinana ehinahina hauna.

#### *Iesu Mai Belesebulo.*

(Mt 12:22-32; Lk 11.14-23; 12.10)

<sup>20</sup> Iesu ituai etoto, maearima haeamona teto'u mue, i'abana haukia kipokia kateaniani hanona a'i etaina. <sup>21</sup> Hatia'ana pouna teona raninai teao katebaka'ana, pokina maearima te'abi ia hanona nibeau 'ari.

<sup>22</sup> Rauhuhu poki haukia baikā Ierusalemā temai haukia te'abi tetibaha, "Auba ki'a obokia ekia poki hauna Belesebulo Iesu aonai etoto, hiabu ebena, auba ki'a obokia neu'u ahinakia." <sup>23</sup> Ua buonai Iesu eparinakia temai herena 'abi ibabataiai ehina benakia etibaha, "Aea homanai Satani hanona Satani keu'u ahina?" <sup>24</sup> Hanopaka ha kipona kebapa'ana ba terarua katehuari raninai, hanopaka weiana hanona a'i kekori 'ini 'apua. <sup>25</sup> Itubu ha abomo kipona kebapa'ana ba kate'au raninai, itubu weiana abomo a'i kekori 'ini. <sup>26</sup> Satani abomo ena itubu kebapa'ana ba kipokia katehuarinakia raninai, ena itubu a'i kekori 'ini, ia kepua.

<sup>27</sup> Hau ha a'i kehore tabura hauna ena itu a'i ketoto 'apua, ena itu kepukia a'i kebainaoai 'apua, keao mo ia kebiri 'uaina ba ena itu tabakia kebainao ainakia.

<sup>28</sup> 'Abi tohana mo au wai nahina benimi, Tirama hanona maearima ekia ki'a ikoikiai abomo ekia 'abi ki'a obokia ikoikiai kehina haonakia mai taearana. <sup>29</sup> 'A hau ha Auba Robe herenai ke'abi ki'a hauna ena ki'a a'i kehina hao 'apuana

kemiaho keao mo banai banai.” <sup>30</sup> Iesu ua e'abi aiho, pokina baik tetibaha, “Ia aonai hanona auba ki'a obona nemiaho.”

*Iesu Hinana Mai Hatina.*  
(Mt 13.1-9; Lk 8.4-8)

<sup>31</sup> Ba Iesu hinana mai hatina temai atapakai tekoro, 'abi mo teuhuna eao herena. <sup>32</sup> To'u rarina 'akina Iesu temia kaiarona haukia tehina bena tetibaha, “Oi hinamu mai hatimu hanona atapakai, tenuatae aini'o.” <sup>33</sup> Iesu ekia 'abi ebaumena etibaha, “Tai hanona au hina'u mai hati'u?” <sup>34</sup> Iesu maearima temia kaiarona haukia eihanakia ba ehina benakia etibaha, “Neiakia hanona au hina'u mai uaho'aba'u. <sup>35</sup> Tirama ena nuatae akakia tibabai haukia hanona au uaho'aba'u, haibu'u mai hina'u.”

## 4

*'Abi Iabataina Batobato Hauna.*  
(Mt 13.1-9; Lk 8.4-8)

<sup>1</sup> Iesu haeamona eao Galilea 'obu poenai eba'iobi mue. To'u rarina 'akina teao herena tekori abuna buonai, Iesu ahi ha ahanai ekara'au emiati. Ahi papana ekarahi 'apua 'ourai, to'u haukia ikoikia hanona poeai tekoro. <sup>2</sup> Iesu hanona taba bo'okia 'abi ibabataiai to'u haukia eba'iobinakia.

Ena ba'iobi aonai na e'abi aiho. <sup>3</sup> “Tomobahu. Birauna hauna ha eao ena uho kebatonakia. <sup>4</sup> Ia uho umai ekapo kapo otarainakia aonai, baik hanona taearai te'eho, ba roborobo temai teani orenakia. <sup>5</sup> Baik hanona bohuai te'eho, te'omu noanoa, pokina 'ano enibinibi 'aki. <sup>6</sup> Ia berauna etae eraranakia hanona tepaea te'ororo, pokina ramukia a'i teriri harai. <sup>7</sup> Baik hanona awa 'ini'inikia aokiai te'eho. Te'omu, ia awa 'ini'inikia teta'a ta'a abunakia buonai, a'i tebua'a. <sup>8</sup> Haeamona baik hanona hano namonai te'eho, ba te'omu harai tebua'a, baik buakia harau aihau, baik imabui harau haea, mai baik hinabu hamomo.” <sup>9</sup> 'Abi puanai Iesu ehina benakia etibaha, “Mai haiana hauna hanona aia keona.”

*Iesu 'Abi Iabatataiai E'abi Ena Poki.*  
(Mt 13.10-17; Lk 8.9-10)

<sup>10</sup> Iesu eikupai aonai, i'abana haukia harau haea rua mai maearima baik murinai ti'au haukia kipokia teao herena tebakaina 'abi ibabatai anikia kehina

harainakia. <sup>11</sup> Iesu ehina benakia etibaha, “Tirama ena obia aiarana 'abikia bunikia hanona wai heremai tewaira tina harai, 'a kapeai temiaho haukia taba ikoikia hanona 'abi ibabataiai mo nahina benakia. <sup>12</sup> Ua buonai, “Teihana ia a'i mo teiha tinana, abomo tibahu aia tiona ia a'i mo te'iohina. Pokina a'i temeraona kabe, Tirama ekia ki'a a'i mehina haonakia marikina.”

Isa 6.9, 10

*'Abi Iabataina Anina.*  
(Mt 13.18-23; Lk 8.11-15)

<sup>13</sup> Iesu haeamona ebakainakia etibaha, “'Abi ibabataina 'ama'amana neiana a'i to'iohina, u? Ba 'abi ibabatai baik hanona aea kato'iobi aihonakia. <sup>14</sup> Birauna hauna uho weiana ekapo kapo otaraina hanona Tirama ena 'abi ekapo kapo otaraina. <sup>15</sup> Uho weiakia taearai te'eho hanona maearima baik 'abana Tirama ena 'abi 'uruna tiona, ia Satani nimai hanona nia'i parenakia. <sup>16</sup> Uho weiakia bohuai te'eho hanona Tirama ena 'abi 'uruna tiona mai aonamokia tia'i taea noanoana haukia 'abana. <sup>17</sup> 'A ramukia a'i teriri harai 'ano aonai buonai, rani papana mo katemiaho, ba Tirama ena 'abi paunai kate'oatanakia 'ao kateba haiaranakia raninai, kate'eho. <sup>18</sup> Uho weiakia awa 'ini'inikia aokiai te'eho haukia hanona maearima baik 'abana Tirama ena 'abi 'uruna tiona. <sup>19</sup> 'A hanopaka ena aoaro'ari mai kepu inuataekia tihore Tirama ena 'abi aokiai haukia tia'i parenakia. Ua buonai buakia hanona aha'i. <sup>20</sup> 'A uho weiakia hano namonai te'eho hanona maearima Tirama ena 'abi 'uruna tiona mai aokiai tia'i taena, buakia tirama baik hanona harau aihau, baik imabui harau haea, baik hinabu hamomo.”

*Ramepa Ihao 'Auna 'Ekanai Kehao 'Auna.*  
(Lk 8.16-18)

<sup>21</sup> Iesu haeamona ehina benakia etibaha, “Hau ha ramepa keba'arana raninai, uro aonai a'i keutana 'ao maua aonai a'i keutana. 'A ramepa ihao 'auna 'ekana tohanai kehao 'auna. <sup>22</sup> Pokina taba tebuni haukia ikoikia katewaira tina, abomo tehore buni tabakia ikoikia hanona katekarahi, taba ha a'i kebuni

'apua. <sup>23</sup> Mai haiana hauna hanona aia keona.”

<sup>24</sup> Haeamona ehina benakia etibaha, “Tuo'o 'abikia hanona tomoraona harainakia. Emi baibeni ihobokiai mo Tirama kebenimi, haeamona weiakia ahakiai harua kehore 'au. <sup>25</sup> Pokina mai ena taba hauna ahanai kehore 'auna kebena, 'a herenai ha aha'i hauna hanona 'eunai papana nemiaho hauna abomo kea'i obona.”

#### *'Abi Iabataina Uho E'omu.*

<sup>26</sup> Iesu e'abi etibaha, “Tirama ena obia aiarana hanona nahomana, hau ha uho umai ekapo kapo otaraina. <sup>27</sup> Hau weiana rabi eparua mararani emiaho, ia uho hanona te'omu tehubu, a'i e'jobina aea te'omu aiho. <sup>28</sup> Hano kipona anina ebaramana, uho eba'omuna, hubuna etae erewa, ba murinai buana ebaramana. <sup>29</sup> Buana ekiro iarina beraurana etaina raninai, biraura hauna ena akiua ea'ina eao, earina.”

#### *'Abi Iabataina Tuaba Uhona.*

*(Mt 13.31-32; Lk 13.18-19)*

<sup>30</sup> Iesu haeamona e'abi mue etibaha, “Tirama ena obia aiarana hanona tabai kahababataina? Ori tabanai 'abi ibabatai kahabaihobona? <sup>31</sup> Tirama ena obia aiarana hanona matoha tuaba uhona 'abana, uho ikoikiai baiatakiai hanona ia mo papana 'aki, ba 'anoai ebatona, <sup>32</sup> muriai ia e'omu raninai, aniani matiukia ikoikiai eberenakia, abomo eapa'ua ki'a. Ia rena rarikia tekarahi, 'ubi roborobokia ikoikiai temai 'arunai tiarai.”

<sup>33</sup> Iesu hanona maearima weiakia ekia 'iobi ihobonai 'abi ibabatai bo'okia eba'io binakia. <sup>34</sup> 'A ia 'abi ibabatai ai mo ehina benakia, i'abana haukia kipokia teikupai hanona 'abi anikia eba'io bi harainakia.

#### *Iesu Baura Mai Roio Eba'omatanakia.*

*(Mt 8.23-27; Lk 8.22-25)*

<sup>35</sup> Beraura weiana mahabu mahabunai Iesu i'abana haukia ehina benakia etibaha, “Hamakabanai hamaeao 'obu abirana.” <sup>36</sup> I'abana haukia to'u tehabona teao, ahi weiana Iesu emia'au aina haunai tehe'au kipokia teao. Ahi baika abomo murikiai teao. <sup>37</sup> Baura rarina 'akina eabu 'au, roio emikiri bei ahi aonai etoto, hereka 'akinai pateuhu. <sup>38</sup> Iesu hanona ena iuna eunana ahi murinai

enoti eparua. I'abana haukia teao herena, tebaona tetibaha, “Ba'io bi haumu e, aika kahatono hauna a'i nuraonana?” <sup>39</sup> Iesu emikiri baura erikena haeamona roio ehina bena etibaha, “Tomo'oro!” Baura e'oro, roio abomo e'omata. <sup>40</sup> Weiana Iesu i'abana haukia ebatanakia etibaha, “Aehoma na tuta'u aiho? Emi a'ikakauma niaha'i oho mo?” <sup>41</sup> 'A ia ikoikiai teta'u ki'a, tebaihamai aina, tetibaha, “Nahuna tai? Baura mai roio abomo aiana tiona!”

## 5

### *Iesu Hau Ha Aonai Auba Ki'a Obokia Eu'u Ahinakia.*

*(Mt 8.28-34; Lk 8.26-39)*

<sup>1</sup> Iesu i'abana haukia kipokia teka banai 'obu abirana teao, Gerasa hanonai tekara'au. <sup>2</sup> Rani weianai Iesu ahiai eriri hanona, hau ha auba ki'a obokia aonai temiaho hauna 'ariahanai ekarahi emai Iesu ohi te baitabu ahi. <sup>3</sup> Ena miaho 'ekana hanona 'ariahana, hau ha tabiri ai kebiri 'inina hanona a'i etaina. <sup>4</sup> Pokina rani bo'ona hanona tabiri mai 'anaua ai tebirina, ia 'anaua ebamohunakia mai tabiri eba pa'anakia, ia ibamamatana hanona hau ha a'i e'jobina. <sup>5</sup> Rabi mai mararani ia hanona 'ariahanai mai oeo ai rani ikoinai eio, abonamo ia kipona hauna wairoai eiuaia 'auna.

<sup>6</sup> Hau weiana Iesu atau'ai nimai eihana raninai, ebeau eao wairanai ekaipehu.

<sup>7-8</sup> Iesu auba ki'a obona ehina bena etibaha, “Auba ki'a obona! Hau niana aonai mokarahi.” Hau weiana eio aota etibaha, “Iesu 'Ubi 'akina Tiramana Nahuna e. Here'u ai taba kobabaina? Tirama atanai nanoini'o, a'i kobahaiarana'u.” <sup>9</sup> Iesu ehore ebakaina etibaha, “Oi atamu hanona tai?” Ia ena 'abi ebamuena etibaha, “Ata'u hanona Mako, pokina ai hanona tabo'o ki'a baha.” <sup>10</sup> Ia Iesu enoi hao noi haona, 'eka weianai a'i keuhu ahinakia.

<sup>11</sup> Aiporo to'una rarina 'akina oeo mekenai tetuatua. <sup>12</sup> Auba ki'a obokia weiakia tehore Iesu tenoina tetibaha, “Kouhunamai, aiporo weiakia aokiai katatoto.” <sup>13</sup> Ua buonai Iesu ena 'abi ai auba ki'a obokia hau weiana aonai tekarahi teao aiporo aokiai tetoto, aiporo to'una hanona taha rua (2,000) tebeau teao papa'ai terobo ahi 'obu ai tetobu, tetono 'ari.



<sup>14</sup> Aiporo 'ima haukia tebeau teao, aiara haukia mai umai teaiara haukia herekiai pou tehinana, ua buonai maearima tera'a teao taba erama hauna kateihana. <sup>15</sup> Teao Iesu herenai tekara'au raninai, 'uainai hau weiana aonai auba ki'a obokia temi-aho hauna aona aba ebero, ena habuni ebatotonakia emiati teihana raninai, teta'u ki'a. <sup>16</sup> Maearima weiakia Iesu taba ebabaina teihana haukia maearima baika herekiai hau weiana auba ki'a obokia aonai temiaho hauna pouna mai aiporo poukia teba 'iobinakia. <sup>17</sup> Aiara haukia tehore Iesu tenoina, ekia hano kehabona.

<sup>18</sup> Iesu ahiai ehe'au hanona auba ki'a obokia aonai temiaho hauna ehore Iesu enoina ke'abana kateao. <sup>19</sup> 'A ia ebaumena etibaha, "Komue koao emu itu haukia herekia, Tirama aea eaoko'oai aihoni'o abomo ebamaurini'o hauna hatia'amu koba'iobinakia." <sup>20</sup> Ua buonai hau weiana eao Tekapoli aiarakia aokiai Iesu taba herenai ebabaina hauna pouna eiroro aina, maearima ikoikiai teta'u ta'u huri.

*Iairo Nahuna Uahona, Mai Iesu Ena Habuni Ea'i 'Apuana Babi'ena.*

*(Mt 9.18-26; Lk 8.40-56)*

<sup>21</sup> Iesu haeamona ahi ai ehe'au, teka-banai 'obu abiranai tebatat 'au, mako rarina hanona weia poeai haeamona teto'u mue. <sup>22</sup> Marea poki hauna ha, atana Iairo, eao weia Iesu eihana aena pokinai ekaipehu, <sup>23</sup> mai aona ikoinai enoi, etibaha, "Naha'u uahouahona hanona aba ke'ari, pahaeao, haunai pohao 'au pemaui." <sup>24</sup> Iesu emikiri Iairo ohi teao, 'a mako rarina hanona Iesu te'opu abuna teka'a. <sup>25</sup> Babi'e ha abomo weia babi'e ekia inawa ehaiara aina ihauna ikoinai harau haea rua. <sup>26</sup> Muramura baibeni haukia bo'okia ia ena inawa katebanamona ia a'i etainakia, ena moni mai kepu bo'ona ebaorenakia, 'a ena inawa a'i enamo, inawa hanona eapa'ua. <sup>27</sup> Ia Iesu pouna eona raninai, mako baiatakiai ia murinai ekataeana, ena habuni ea'i 'apuana. <sup>28</sup> Pokina ia eraonana, 'Ena habuni mo pa'i 'apuana hanona pamaui.' <sup>29</sup> Ena habuni ea'i 'apuana beronai aruaru e'oro, hauna eonobaina ena inawa hanona aba enamo. <sup>30</sup> Iesu beronai eonobaina bamaui hiabuna aonai hauna ekarahi buonai ekori kabe ebakai bakai

etibaha, "Tai e'u habuni ea'i 'apuana?"

<sup>31</sup> I'abana haukia te'abi tetibaha, "Mako rarina 'akina tibai'abi aina heremuai, aehoma buonai nubakai bakai, tai ea'i 'apuani'o." <sup>32</sup> 'A Iesu hanona eihao ihao ia ea'i 'apuana hauna etabuna. <sup>33</sup> Babi'e herenai erama akana aba e'iohina buonai, eta'u ki'a mai 'ururu 'ururuna eka'a eao Iesu wairanai ekaipehu, ena pou maikoina ehinana. <sup>34</sup> Iesu ia ehina bena etibaha, "Naha'u e, emu a'ikakauma buonai aba omaui. Mai baibuamu moao. Emu haiara ikoikiai aba teore."

<sup>35</sup> Iesu ni'abi oho mo aonai, Iairo ena ituai maearima baika temai herena tehina bena tetibaha, "Nahumu hanona aba e'ari. Ba'iohi hauna a'i mobaro'arina." <sup>36</sup> 'A Iesu 'abi weiana eona raninai a'i ea'i taeana, marea poki hauna ehina bena etibaha, "A'i mota'u, moa'ikakauma mo." <sup>37</sup> Ia ehore ikoikiai ebamuenakia, tai ha a'i ke'abana, 'a Petero, Iakobo mai uaho'abana Ioane iamo teaihau kate'abana. <sup>38</sup> Teao marea poki hauna ena ituai tekara'au, maearima eihanakia tehai aoko'o mai tehai apa'ua. <sup>39</sup> Iesu itu aonai ekatoto, maearima ehina benakia etibaha, "Taba buonai tuhai, uru rarina 'akina tubabuana, uaho neiana a'i e'ari, 'a ia hanona niparua." <sup>40</sup> 'A ia hanona Iesu teiriri aina. Maearima ikoikiai ehina benakia tekarahi, epua murinai, uahouaho hamana mai hinana abomo ia mai i'abana haukia aihau kipokia teao uahouaho enoti 'ekanai tetoto. <sup>41</sup> Iesu uahouaho imanai ea'i, ehina bena etibaha, "Tarita Kumi!" (Anina hanona 'Uahouaho e, nahina beni'o, momikiri.) <sup>42</sup> Uaho uaho weiana beronai mo emikiri, ekaoao kaoao. Teihana haukia ikoikiai teta'uta'u huri. Uahouaho ihauna hanona harau haea rua. <sup>43</sup> Iesu ehore eharabunakia pouna a'i katehinana. Haeamona ehina benakia, uahouaho ena aniani katebena.

## 6

*Iesu Nasaretai Tebaki'ana.*  
*(Mt 13.53-58; Lk 4.16-30)*

<sup>1</sup> Iesu 'eka weiana ehabona, i'abana haukia kipokia teao ia ena aiara tohana. <sup>2</sup> Beraura robeai ia ena ba'iohi ea'i ramana. Mareai aiana teona haukia ikoikiai teta'u ta'u huri, tetibaha, "Aotipa neiana tai ebena? Hiabu ae'eai emai

hoa neiakia nibabai.”<sup>3</sup> Ia tebaki'ana, te'abi tetibaha, “Ia hanona kamuta hauna, Maria nahuna, Iakobo, Iosepa, Iuda mai Simona a'akia, haibuna baiatakai temiaho.”<sup>4</sup> Iesu ehina benakia etibaha, “Mahabanai hauna hanona 'eka ikoikiai aokiai katea'i taeara, 'a ena aiara tohanai mai hatia'ana tohakia hanona a'i katea'i taeara.”<sup>5</sup> Weia hanona hoa bo'okia a'i ehabainakia, ia inawa haukia bita 'aki mo ahakiai ehao 'au, ebamaurinakia.<sup>6</sup> Eta'u ta'u huri pokina ekia a'ikakauma aha'i buonai. Ia eao aiara haeai baika aokiai eba'iohi.

*Iesu I'abana Haukia Harau Haea Rua Euhu Ahinakia.*

*(Mt 10.5-15; Lk 9.1-6)*

<sup>7</sup> Haeamona Iesu i'abana haukia harau haea rua eaparinakia temai herena, hiabu eбенakia, rua rua euhunakia auba ki'a obokia kateu'u parenakia.<sup>8</sup> Erobenakia e'abi etibaha, “Emi kaoao aokiai taba ha a'i katoa'inakia, ikai'ini mo hamona katoa'ina. Mahoa, aniani abomo moni ha a'i katoa'ina.”<sup>9</sup> Emi tamaka katoaba'au, ibatoto ibaruakia a'i katoa'inakia.<sup>10</sup> Katokara'au ituna weianai mo katomiaho keao mo aiara weiana katohabona.<sup>11</sup> A'i katea'i taeanimi 'ao aiami a'i kateona raninai katohabonakia, aemi apurorokia katotabu tabu obonakia ekia behoi keao ekia ki'a ibatohana.”<sup>12</sup> Weiana i'abana haukia teao, teiroro maearima katebaraona kabenakia,<sup>13</sup> abomo auba ki'a obokia bo'okia teu'u u'u ahinakia, inawa haukia bo'okia tehoru ai tetaronakia tebamaurinakia.

*Ba'uere Robe Hauna Ioane Ena 'Ari.*

*(Mt 14.1-12; Lk 9.7-9)*

<sup>14</sup> Heroda obia hauna pou weiana eona, pokina Iesu atana aba tehina otaraina. Baika te'abi tetibaha, “Ba'uere robe hauna Ioane 'ari ai aba emikiri mue ba hiabu akakia neiakia nibabainakia.”<sup>15</sup> Haeamona baika te'abi tetibaha, “Neiana hanona Elia.” Baika tetibaha, “Neiana hanona mahabanai hauna ha, mahabanai 'uaikia 'abakia.”<sup>16</sup> 'A Heroda uru weiana eona raninai, e'abi etibaha, “Ioane, 'akona akabe hurina hauna 'ari ai aba emikiri mue.”

<sup>17</sup> 'Uainai Ioane a'i e'ari baha aonai, Heroda hanona aba ebaiuhu, Ioane

tea'ina tebirina wapura itunai teka-iabuna, weiana ehabaina hanona Herodia paunai. Heroda ehore hatina Pilipo atawana Herodia eatawana.<sup>18</sup> Ba Ioane ehore Heroda ehina bena etibaha, “Oi ehore hatimu atawana oatawa boina hanona obeho.”<sup>19</sup> Weiana Herodia hanona Ba'uere robe hauna Ioane eopuere aina, iahu 'arina taearana etabuna, 'a ena taeara aha'i.<sup>20</sup> Pokina Heroda hanona Ioane eta'u aina, e'iohina ia hanona aka bero abomo robe hauna, ua buonai ia ehore e'ima haraina. Rani bo'okia Heroda Ioane ena 'abi 'urukia eo'o, aona earo 'ari, ia enuatae aiana keona.

<sup>21</sup> Heroda ena rama ranina ekara'au buonai tatu apa'uana ha tebabaina, aiara obiakia, huari poki haukia, abomo Galilea maearimakia apa'uakia tebeaunakia temai.<sup>22</sup> Herodia nahuna uahona emai to'u haukia wairakiai ewa. Heroda mai ena baki haukia ikoikiai aokia enamo, ba Heroda ehore uaho weiana ehina bena etibaha, “Nonuatae aina tabana ko'uahina hanona kabeni'o.”<sup>23</sup> Herenai e'abi'uai tabura etibaha, “Taba konuatae aina hanona kabeni'o, e'u hanopaka abirana konoi aina re'a abomo kabeni'o.”

<sup>24</sup> Weiana uaho ekarahi eao hinana ebakaina etibaha, “Au taba kanoiaina?” Hinana e'abi etibaha, “Ba'uere robe hauna Ioane 'arana konoiaina.”<sup>25</sup> Uaho haeamona emue ebeau toto eao Heroda obia 'arana hauna ehina bena etibaha, “Bariu bariu mo Ba'uere robe hauna Ioane 'arana tihu ai koutana, kobena'u.”<sup>26</sup> Heroda obia 'arana hauna aona earo'ari, ia aba e'abi'uai uaho taba kenuatae aina hauna kebaibeni mo, abomo ena baki baki haukia weia teaniani haeamo haukia ena 'abi'uai 'uruna teona buonai keubo hanona taearana aha'i.<sup>27</sup> Ua buonai Heroda obia 'arana hauna huari hauna ha euhuna keao Ba'uere robe hauna Ioane 'arana kemaiaina. Huari hauna weiana eao wapura itunai Ba'uere robe hauna Ioane 'akona ekabe hurina.<sup>28</sup> 'Arana tihu ai eutana eaoaina uaho ebena, uaho ehore eaoaina hinana ebena.

<sup>29</sup> Ba'uere robe hauna Ioane i'abana haukia pouna teona raninai teao huanina tea'ina teaoaina 'ariahanai tehorena.

*Iesu Taha Ima (5,000) Ebanianinakia.*  
*(Mt 14.13-21; Lk 9.10-17; Io 6.1-14)*

<sup>30</sup> Iesu ena iuhubeau haukia temue teao herenai teto'u mue, tebabai tabakia mai teba'iohi 'abikia ikoikia haianai tehinanakia. <sup>31</sup> Mako rarina tia timai buonai i'abana haukia ekia aniani 'ekana aha'i, ia emikiri ehina benakia etibaha, "Eka 'abaeana ha hamaeao, ua'a katoarai." <sup>32</sup> Ua buonai ahiai tehe 'au, tebeau banai 'eka 'abaeana ha teao.

<sup>33</sup> Ekia beau ahi ai maearima bo'ona tehore teihanakia, te'iohinakia, aiara maearimakia ikoikia tebeau raina te'uai teao 'eka weianai tekarahi. <sup>34</sup> Tebahaha 'au aonai Iesu mako ranina eihana hanona eaoko'o ainakia matoha mamoe i'imakia hauna aha'i 'abana. Ua buonai mauri 'abikia eba'iohinakia. <sup>35</sup> Rabirabi beraura aba kekaihuna ba i'abana haukia teao herena, tehina bena tetibaha, "Neiana hanona hano'akuna abomo beraura aba kerabi. <sup>36</sup> Ua buonai maearima neiakia pouhunakia pateao umai abomo aiarai weia ekia aniani patekawa pateani." <sup>37</sup> Iesu ehina benakia etibaha, "Wai kipomi aniani ha tomobenakia, temeani." 'A i'abana haukia ia tehina bena tetibaha, "Ai katahore 200 kina anianina katakawana, katabenakia, 'u?" <sup>38</sup> Iesu ebakainakia etibaha, "Aniani bita heremiai? Tomoao, tomoihana." Teao teiha harai temue temai, tehina bena tetibaha, "Parawa ikine ima mai maia rua."

<sup>39</sup> Iesu i'abana haukia ehina benakia, maearima katewatanakia to'uto'ukia ha ha tubu ahakiai katemiati. <sup>40</sup> Ua buonai maearima ikoikia hinabu ha ha mai imbui ha ha tebamiatinakia. <sup>41</sup> Ba ia ehore parawa ima abomo maia rua ea'inakia ea'a taea kupa eihana aniani ebanamonakia. Parawa ehobinakia i'abana haukia ebenakia tewatenakia mako ikoikia tebenakia. Maia rua abomo ua tewate aihonakia. <sup>42</sup> Teaniani ikoikia teani 'ari. <sup>43</sup> Parawa mai maia harikia tebararonakia, areha ikoinai harau haea rua tebonu. <sup>44</sup> Teaniani haukia baiatakiai hau 'abaeana hanona taha ima (5,000).

*Iesu Bei Kapenai Eka'a.*  
(Mt 14.22-33; Io 6.15-21)

<sup>45</sup> Iesu beronai i'abana haukia euhunakia ahi ai katehe'au kate'uai kateao Betesaida abirana. 'A ia hanona to'u haukia euhunakia. <sup>46</sup> Maearima teka'a

murikiai ia ekara'au eao oeo ai kebahuba'ari. <sup>47</sup> Beraura emahabu mahabu raninai ahi obu ibuanai, 'a ia ikupaiana hanona 'anoai. <sup>48</sup> Ia eihanakia tipara tiaro'ari pokina rani wairakiai emai buonai. Kokoro'u ekia 'arara hoanai Iesu 'aku kapenai eka'a eao herekia matoha ahi pekahaona moioina. <sup>49</sup> Ia teihana 'aku kapenai eka'a eao teraonana biriuia re'a teta'u teio. <sup>50</sup> Ikoikia teihana nuakia etae. Ia beronai ehina benakia etibaha, "Ai tomota'u, tomonua ko'o. Na Au." <sup>51</sup> Ahiai ehe'au ba rani e'oko hanona teta'uta'u huri. <sup>52</sup> Pokina Iesu maearima parawa ebenakia teani, i'abana haukia hoa weiana obona a'i teobo, aokia tetubu abuna.

*Iesu Genesaretai Inawa Haukia Ebanamonakia.*  
(Mt 14.34-36)

<sup>53</sup> Iesu i'abana haukia kipokia ahiai tebeau banai Genesareta poenai to'o tene'ena. <sup>54</sup> Ahiai teriri hanona maearima beronai Iesu te'iohina. <sup>55</sup> Teka otaraina hano weiana aonai ekia inawa haukia toto'eai tebulanakia teao Iesu pouna teona nemiaho 'ekakia. <sup>56</sup> Iesu eao 'ekakia ikoikia aiara papakia mai aiara apa'uakia. Maearima inawa haukia tebulanakia teoainakia kawakawa 'ekakiai tehorotinakia, tenoina ena habuni korina mo pateai 'apuana. Ena habuni tea'i 'apuana haukia ikoikia hanona temauri.

## 7

*Kupukia Ekia Ba'iohi.*  
(Mt 15.1-9)

<sup>1</sup> Parisea mai rauhuhu poki haukia baika Ierusalem mai temai Iesu herenai teto'u. <sup>2</sup> Aonai Iesu i'abana haukia baika imakia a'i teutu, mai 'opukia teaniani, weiana hanona Iuda ekia hoahoi a'i ebero Parisea haukia wairakiai. <sup>3</sup> Parisea mai Iuda haukia ikoikia hanona a'i tianiani 'abaea, ia ekia babai ihobonai imakia teutu 'uai ba tianiani kupukia 'aba'abakia ekia hoahoa ihobona. <sup>4</sup> Kawakawa 'ekakiai timai raninai ekia kawakawa tabakia a'i tiani baha, ia teutu 'uainakia mai ia abokiamo te'uere ba tianiani. Kupukia ekia rauhuhu bo'ona abomo te'ima harainakia matoha 'ere, uro 'ao puou iutukia 'abana. <sup>5</sup> Ua buonai

Parisea mai rauhuhu poki haukia Iesu tebakaina tetibaha, “I'abamu haukia kupuka 'aba'abaka tebabai akakia a'i tibabai, aehoma buonai imakia mai 'opukia tianiani?”<sup>6</sup> Iesu ekia 'abi ebaumena etibaha, “Isaia ena mahabanaiaai wai bahaorea haumi robami eahuna. Na erere aihona.

'Maearima neiakia hanona pinakiai mo Au tibanamona'u.

'A aokia tohana hanona atau'a 'akinai.

<sup>7</sup> Tekutiai 'abaeana'u mo, pokina rauhuhu neiakia maearima tibia'iohinakia hanona maearima tebabai rauhuhukia.'

Isa 29.13

<sup>8</sup> Wai hanona Tirama ena rauhuhu aba tohabonakia, 'a maearima ekia rauhuhu mo tua'i 'ininakia.”

<sup>9</sup> Haeamona ehina benakia etibaha, “Wai emi aotipai Tirama ena rauhuhu toibunina, kipomi emi hoahoa tua'i 'ininakia. <sup>10</sup> Pokina Mose e'abi etibaha, 'Hamamu hinamu komariki ainakia', 'a 'hau ha hamana 'ao hinana herenai ke'abi ki'a hauna hanona katoahu 'arina.' <sup>11</sup> Ia wai tu'abi totibaha, 'Hau ha hamana 'ao hinana kehina bena, barai barai tabakia pabenimi ia aba Koban.' (Koban anina hanona 'Beruberu tabakia Tirama 'euna'.) <sup>12</sup> Ua buonai maearima turauhuhunakia, hamakia hinakia a'i katebarainakia. <sup>13</sup> Hoahoa neiana tubabai hanona wai kipomi emi 'iobiai maearima tuba'iohinakia, Tirama ena 'abi toibunina. Weiana mo aha'i, ia uahomakia bo'okia tubabai.”

### *Maearima Niba'opuna Tabana.*

(Mt 5.10-20)

<sup>14</sup> Haeamona Iesu mako eapari muenakia teao herena, ehina benakia etibaha, “Ikoimia katobahu, kato'iohi haraina.

<sup>15</sup> Taba weiana atapakai nitoto maearima aonai hauna maearima a'i niba'opuna, ia taba weiana maearima aonai nikarahi hauna maearima niba'opuna. <sup>16</sup> Mai haiana hauna aia keona.”

<sup>17</sup> Iesu to'u haukia ehabonakia ituai etoto raninai i'abana haukia teao herena, 'abi ibabatai weiana anina tebakai bakai aina. <sup>18</sup> Iesu ehina benakia etibaha, “Wai aomi a'i niea, 'u? A'i to'iohina? Aniani nitoto maearima aonai hauna maearima a'i niba'opuna. <sup>19</sup> Pokina weiana hanona

aoai a'i nitoto, ia mo'oru aona niao haeamona kekarahi.” (Iesu 'abi nei ana ehinana ena poki hanona aniani ikoinai tenamo kahani, a'i kateba 'opunaka.)

<sup>20</sup> E'abi mue etibaha, “Taba aoai kekarahi hauna kehore maearima keba'opunakia.

<sup>21</sup> Raona ki'a obokia maearima aonai tikarahi tabakia hanona neiakia, nabau, bainao, ahuahu, <sup>22</sup> aniki'a, raonaki'a, bai'oi, rea, wamuru, apa, 'uahi'uahi, mai babai 'abaea. <sup>23</sup> Taba ki'a obokia ikoikia ai aoai tikarahi haukia tihore maearima tibia'iohinakia.”

### *Surofenise Babi'ena Ena A'ikakauma.*

(Mt 15.21-28)

<sup>24</sup> Iesu 'eka weianai ekaobo eao Turo hanonai, ia ena nuatae tai ha a'i ke'iohina ia hanona weia, ua buonai itu ha aonai eka toto, iamo ena pihitaearana aha'i.

<sup>25</sup> Babi'e ha nahuna uahona aonai auba ki'a obona emiaho, Iesu pouna eona raninai, beronai emai aena pokinai ekaipehu.

<sup>26</sup> Babi'e weiana hanona Iuda babi'ena aha'i, 'a ia hanona Helene babi'ena Surofenike ai erama. Iesu enoina auba ki'a obona nahuna aonai hauna ke'u ahina. <sup>27</sup> 'A Iesu ia ehina bena etibaha, “Miori pateaniani 'uai, pokina miori ekia aniani kaha'ina kahakapo ahina wae ha kateani hanona a'i enamo.”

<sup>28</sup> 'A babi'e e'abi etibaha, “Obiapaka e, 'abi tohana, ia wae ha abomo miori tianiani 'ika'ikakia itara ba'anai haukia tiani.” <sup>29</sup> Iesu ia ehina bena etibaha, “Ua nu'abi aiho buonai, momue moao emu itu, auba ki'a obona nahumu aonai hauna aba ekarahi.” <sup>30</sup> Babi'e emue ena itu eao nahuna aba enamo etabu ahina ena parua 'ekanai, auba ki'a obona aba ekarahi.

### *Iesu Haia Po'o Mai Maea 'Orare Hauna Ebanamona.*

<sup>31</sup> Haeamona Iesu Turo ehabona Sidona mai Dekapoli hanokiai ekabanai eao Galilea 'obunai ekarahi. <sup>32</sup> Maearima baika tehore haiana tepo'o abomo

maeana e'orare hauna ha temaiaina Iesu herena, tenoina ahanai kehao'au kebanamona. <sup>33</sup> Iesu ehore hau weiana to'u baiatakiai ebakaparena, ba ia imana riuruna haiana aonai etiu totona, haeamona

imana e'atotina hau weiana maeana ea'i 'apuana. <sup>34</sup> Iesu ea'a taea kupa eihana aona ebahi, ba hau weiana ehina bena etibaha, “Efata!” (Anina hanona



mokaikau!) <sup>35</sup> Beronai hau weiana haiana te'erere abomo maeana ebero e'abi'abi harai. <sup>36</sup> Iesu ehore eharabunakia pou neiana tai ha haianai a'i katehinana. Eharabu 'ari iamo aiana a'i teona, ia pouna tehina hina otaraina. <sup>37</sup> Maearima ikoinai teta'u ta'u huri ki'a, te'abi tetibaha, "Ia taba ikoinai nibabai harai. Haiakia tepo'o haukia aia tiona abomo maea 'orare haukia ti'abi'abi harai."

## 8

### *Iesu Taha Bani (4,000) Ebanianinakia.* (Mt 15.32-39)

<sup>1</sup> Rani weianai maearima bo'ona haeamona teao Iesu herenai teto'u mue. Ia aniani aha'i buonai, Iesu i'abana haukia eaparinakia temai herenai ehina benakia etibaha, <sup>2</sup> "Maearima neiakia hanona naoko'o ainakia, pokina wapu aba ai-hau here'uai temiaho ekia aniani hanona aba eore. <sup>3</sup> Mai mare'akia kauhunakia taearai hanona baika a'i teme'eho, pokina baika hanona 'eka homa'anai temai." <sup>4</sup> I'abana haukia tehina bena tetibaha, "Aika hanona hano'akunai. Aniani ae'e ai kaha'ina, maearima neiakia kahabani aninakia?" <sup>5</sup> Iesu ehore ebakainakia etibaha, "Emi aniani ikoinai bita?" Ia tetibaha, "Parawa 'abaihau hamomo."

<sup>6</sup> Iesu maearima ehina benakia 'anoai katemiati. Ba parawa weiakia 'abaihau hamomo ea'i taeanakia namo 'abina Tirama ebena, ba ehobi 'iti'itinakia i'abana haukia ebenakia katewatena, maearima katebenakia. E'abi ihobona tebabaina. <sup>7</sup> Ekia maia papakia abomo weia, ebanamonakia, ba i'abana haukia ebenakia katewatanakia. <sup>8</sup> Ikoiki'ai teaniani, teani 'ari. I'abana haukia aniani harikia tebararonakia hanona areha 'abaihau hamomo. <sup>9</sup> Haukia hanona ikoinai taha bani (4,000) 'abana.

Ba euhunakia haha ekia 'eka teao. <sup>10</sup> Haeamona i'abana haukia kipokia ahiai tehe'au teao Dalmanuta hanona.

### *Parisea Haukia Tenuatae Hoa Ha Kateihana.* (Mt 16.1-4)

<sup>11</sup> Parisea haukia temai Iesu tebakaina katehobona, hoa ha kebabaina kateihana, katebatohana ena hiabu hanona Tirama herenai emai. <sup>12</sup> Iesu aona ebahi mai aohaiarana, e'abi etibaha, "Taba buonai uru neiana haumi hoa tutabuna? 'Abi

tohana mo au wai nahina benimi, uru neiana haumi hoa ha a'i kabaihanimi." <sup>13</sup> Weiana ia ehabonakia ahiai ehe'au mue ekabanai 'obu abirana eao.

### *Parisea Haukia Mai Heroda Ekia Bakupu Muramurana.* (Mt 16.5-12)

<sup>14</sup> I'abana haukia parawa ikoinai tereanakia, parawa hamona mo ahiai emiaho. <sup>15</sup> Iesu ia erobenakia etibaha, "Mahami katobano'anakia, Parisea haukia mai Heroda ekia bakupu mai ekia aoani hoahoakia a'i tomobabai marikina." <sup>16</sup> I'abana haukia kipokia baiatakiai te'abi'abi tetibaha, "Aniani ha a'i hamaiaina buonai na ni'abi aiho." <sup>17</sup> Iesu e'iohina taba te'uahina, ebatanakia etibaha, "Taba buonai aniani heremi aha'i hauna robana tuahuna? Wai a'i to'iohi bahana abomo obonai a'i tuobo? Aomi hama ua tepahihi aiho? <sup>18</sup> Mai mahami, ia a'i toihana? Mai haiami, ia aiana a'i tuona? Taba a'i turaona 'ini? <sup>19</sup> Au parawa ima ahobi 'iti'itinakia maearima taha ima (5,000) teani 'ari, harikia areha bita tobabonunakia?" Ia te'abi tetibaha, "Areha harau haea rua." <sup>20</sup> Ia e'abi etibaha, "Abomo parawa 'abaihau hamomo ahobi 'iti'itinakia maearima taha bani (4,000) teani 'ari, harikia areha bita tobabonunakia?" Ia te'abi tetibaha, "Areha 'abaihau hamomo." <sup>21</sup> Ia ehina benakia etibaha, "Wai aehoma buonai aomi a'i niea?"

### *Iesu Bedesaidai Maha Ki'a Hauna Mahana Ebanamonakia.*

<sup>22</sup> Temai Betesaida aiaranai tekara'au raninai, maearima baika maha ki'a hauna ha tebaka'ana temai Iesu herena tenoina ahanai kehao'au mahana kebanamonakia. <sup>23</sup> Iesu maha ki'a hauna imanai e'ebe tekarahi aiara murinai, imana e'atotina ia mahana etaronakia epua imana ia mahana ahanai ehao'au ba ebakaina etibaha, "Taba aba noiha?" <sup>24</sup> Maha ki'a hauna ea'a taea, e'abi etibaha, "Maearima naihanakia tikaoao kaoao matoha matiu 'abakia." <sup>25</sup> Haeamona mahanai ehao'au mue, weiana eihao ihao aonai ena ihaiha abenamo, taba ikoinai aba eihā harainakia. <sup>26</sup> Euhuna keao ena itu, ia ehina bena etibaha, "Aiara aonai a'i kokatoto."

*Petero Iesu Ehina Pouna Keriso.*  
(Mt 16.13-20; Lk 9.18-21)

<sup>27</sup> Iesu i'abana haukia kipokia Kaisarea Pilipo aiarakia teao, taearai i'abana haukia ebakainakia etibaha, "Maearima hanona taba na tihoma, au hanona tai?"

<sup>28</sup> Ena 'abi tebamuena tetibaha, "Baika ti'abi tetibaha, oi hanona Ba'uere robe hauna Ioane, 'a baika tetibaha, oi hanona Elia, haeamona baika tetibaha, oi hanona mahabanai hauna ha." <sup>29</sup> Haeamona ia ebakainakia etibaha, "Ia wai hanona taba na tuhoma, au tai?" Petero ia ehina bena etibaha, "Oi hanona Keriso,\* Tirama ena a'i taea haumu." <sup>30</sup> Iesu eharabunakia ia pouna hau ha a'i kateba'iohina.

*Iesu Kehaiara Mai Ke'ari 'Abikia Ehina.*  
(Mt 16.21-28; Lk 9.22-29)

<sup>31</sup> Ia i'abana haukia eba'iohi ramanakia, Maearima Nahuna hanona haiara bo'okia kehoainakia, aiara poki haukia, robe haukia apa'uakia, mai rauhuhu poki haukia kate'oatana abomo kateahu 'arina, ia wapu ibaihaunai hanona kemikiri mue.

<sup>32</sup> 'Abi neiana ehina pou haraina raninai, Petero ehore Iesu eba kaparena haihaiiai ehinabe pahihina. <sup>33</sup> 'A Iesu hanona ekori kabe, i'abana haukia eihanakia, Petero ebatana etibaha, "Satani, Mokapare, muri'u moao! Pokina emu raona hanona Tirama 'euna aha'i, ia maearima 'eukia."

<sup>34</sup> Weiana Iesu mako eaparinakia abomo i'abana haukia kipokia ehina benakia etibaha, "Hau ha kenuatae au ke'abana'u raninai, ia kipona ena mauri kehabona, ena matiu ibiri ropo kea'i taeana kebuana, au muri'u ai keka'a." <sup>35</sup> Pokina ena mauri kea'i 'inina hauna ena mauri keba 'akaumana, 'a au pau'uai mai pou namona paunai ena mauri kene'ena hauna hanona ena mauri kea'ina. <sup>36</sup> Hau ha hanopaka maikoinai pea'ina ia ena mauri peba'akaumana hanona 'eunai ena namo taba? <sup>37</sup> Hau ha taba kebaibeni ena mauri kea'i muena? <sup>38</sup> Hau ha au pau'uai 'ao e'u 'abi paukia nabau abomo aka ki'a uruna neiana wairakiai kehaumaea aina'u hauna, au Maearima Nahuna abomo ia kahaumaea aina Hama'u ena nuabiai ena aneru robekia kipokia katemai raninai."

## 9

<sup>1</sup> Haeamona Iesu ehina benakia etibaha, "Abi tohana mo au wai nahina benimi, baika neia tekoroiti haukia a'i kate'ari baha keao mo Tirama ena obia aiarana mai hiabuna kemai hanona kateihana."

*Iesu Ihana Ebahaeaina.*  
(Mt 17.1-13; Lk 9.28-36)

<sup>2</sup> Beraura 'abaihau teao murinai, Iesu hanona Petero, Iakobo mai Ioane mo ebaka'anakia oeo apa'uana ha ai tekara'au, weia teikupai aonai wairakiai ihana ehaei, <sup>3</sup> ena habuni e'imare 'imare epore obo, epore ki'a baha hanopakai habuni utu hauna ha ua a'i pebapore aihona. <sup>4</sup> Weiana Elia mai Mose ohi tewaira tina ia wairakiai, terarua Iesu kipokia te'abi 'abi. <sup>5</sup> Petero ehore Iesu ehina bena etibaha, "Ba'iohi haumu e, aika neia hanona enamo, i'aua aihau kata babainakia, ha oi 'eumu, ha Mose 'euna, ha Elia 'euna." <sup>6</sup> Pokina teta'u ki'a baha buonai, Petero aea ke'abi aiho hanona a'i e'iohina. <sup>7</sup> 'Auhao ha emai ekaibunakia, abonamo aia ha 'auhao aonai emai, etibaha, "Neiana hanona au naha'u, e'u raona'au hauna, aiana katona." <sup>8</sup> Beronai teiha banai iha banai ia tai ha a'i teihana, Iesu ikupaiana mo ia baiatakiai.

<sup>9</sup> Oeoai teriri raninai, Iesu eharabunakia teiha tabakia hanona hau ha haianai a'i kate'abi, keao mo Maearima Nahuna 'ari ai kemikiri mue. <sup>10</sup> Ena 'abi tea'i 'inina, ia kipokia mo te'abi'abi aina, 'ariai mikiri mue anina hanona taba.

<sup>11</sup> Ia tehore Iesu tebakaina tetibaha, "Taba buonai Rauhuhu poki haukia te'abi Elia hanona kemai'uai?" <sup>12</sup> Iesu ehina benakia etibaha, "Abi tohana. Elia hanona kemai 'uai, taba ikoinai keba'orunakia. Ia taba buonai Maearima Nahuna 'abina Puka Robenai tererena kehaiara ki'a baha abomo kate'oatana? <sup>13</sup> Au wai nahina benimi, Elia hanona aba emai, maearima ekia nuatae akakia ikoinai herenai tebabai, ia 'abina tererena ihobonai."

*Iesu Miori Ha Aonai Auba Ki'a Obona Hauna Ebamaurina.*  
(Mt 17.14-21; Lk 9.37-43)

<sup>14</sup> Temai i'abana haukia baika herekiai raninai, maearima bo'ona 'akina tekori kakaiaronakia, rauhuhu poki haukia mai

\* 8:29: (29) Mesia, Bamauri Hauna weiana tebai'ima hauna.

i'abana haukia kipokia tibaihara tae teihanakia. <sup>15</sup> To'u haukia Iesu teihana raninai, teta'u ta'u huri tebeau herena teao tebanamona. <sup>16</sup> Iesu i'abana haukia ebakainakia etibaha, "Ia kipokia taba tubaihara taeaina?" <sup>17</sup> To'u aonai hau ha e'abi etibaha, "Ba'iobi haumu e! Au naha'u amaiaina oi heremu, pokina aonai maea ki'a aubana nemiaho a'i ni'abi'abi. <sup>18</sup> Rani baika auba ki'a obona nebiu hanona niba'ehona 'anoai nienoti pinana 'uto'uto mai niara rabina hauna nipahihi obo. I'abamu haukia anoinakia, auba ki'a obona kateu'u ahina, ia a'i etainakia."

<sup>19</sup> Iesu ehinabe pahihinakia etibaha, "Uru neiana haumi emi a'ikakauma aha'i, heremiai kamiaho keao mo rani tabanai? Kahau haiara heremiai keao mo rani tabanai? Miori tomaiaina here'u." <sup>20</sup> Miori teoaina Iesu herena, auba ki'a obona Iesu eihana raninai, miori eba'ururu ki'ana, weiana e'eho 'anoai ehene banai here banai, pinana 'uto'uto tekarahi.

<sup>21</sup> Iesu miori hamana ebakaina etibaha, "Aita raninai nahomana ea'i ramana?" Ia e'abi etibaha, "Aba ko'iko'ina raninai. <sup>22</sup> Rani bo'ona auba ki'a obona nihore iruba ahanai nikapo 'auna mai bei'ai nikapo uhuna keba'arina. Kobabaina ketaina re'a, poaoko'o ainamai, po-barainamai." <sup>23</sup> Iesu ehina bena etibaha, "Taba buonai kababaina ketaina na ohoma! Tirama nia'ikakauma hauna herenai taba ikoikiai kebabai hanona ketaina." <sup>24</sup> Beronai miori hamana eio etibaha, "Au hanona aba na'ikakauma, mobaraina'u e'u a'ikakauma papana hauna mobapa'uana." <sup>25</sup> Iesu to'u haukia eihanakia, tera'a herena teao. Weiana ia auba ki'a obona ebatana etibaha, "Maea ki'a mai haia po'o aubana, au oi nahina beni'o. Miori aonai mokarahi, naia a'i kototo mue." <sup>26</sup> Auba ki'a obona eio, miori eba'ururu ki'ana, ba ia ekarahi, miori enoti matoha e'ari, maearima te'abi miori aba e'ari baihana. <sup>27</sup> 'A Iesu miori imanai ea'i eberi taeana, beronai emikiri ekoroti.

<sup>28</sup> Ia itu aonai tekatoto, i'abana haukia bunianai tebakaina tetibaha, "Taba buonai ai auba katau'u ahina hanona a'i etainamai?" <sup>29</sup> Ia ehina benakia etibaha, "Taba nahomakia iu'u ahikia taearana ha aha'i, bahuba'ari mo ikupaiana."

### *Iesu Ena 'Ari Pouna Ehina Muena.* (Mt 17.22-23; Lk 9.43-45)

<sup>30</sup> Iesu i'abana haukia kipokia 'eka weiana tehabona, Galilea hanonai tekabana. Ai enuatae hau ha ke'jobina ia hanona ae'eai, <sup>31</sup> pokina i'abana haukia niba'jobinakia, ehina benakia etibaha, "Hau ha au Maearima Nahuna kehinahina aina'u maearima imakiai keutana'u, kateahu 'arina'u. 'A beraura ibaihaunai au hanona kamikiri mue." <sup>32</sup> 'A ia hanona a'i te'jobina taba e'uahina abonamo katebakaina hanona teta'u.

### *Tai keapa'ua?* (Mt 18.1-5; Lk 9.46-48)

<sup>33</sup> Kaperanauma aiaranai tekara'au, itu aonai Iesu i'abana haukia ebakainakia etibaha, "Bariu taearai hamai hanona taba tobaihara taeaina?" <sup>34</sup> Ia a'i te'abi, pokina taearai temai hanona tai atana keapa'ua hauna tebaihara taeaina. <sup>35</sup> Iesu emiati, i'abana haukia harau haea rua eaparinakia, ehina benakia etibaha, "Tai nenuatae ke'uai hauna, ia kipona muri 'akinai kehorotina abomo maearima ikoikiai ekia ta'ara ia'ina haunai keao." <sup>36</sup> Weiana Iesu miori papana ha ea'ina wairakiai ebakorotina huanai ea'i ba ehina benakia etibaha, <sup>37</sup> "Hau ha au ata'u ai miori papana na homana nia'i taeana hauna au abo'umo nia'i taeana'u, au nia'i taeana'u hauna hanona au mo ikupaia'u aha'i, ia euhuna'u Tiramana abomo nia'i taeana."

### *A'i Ni'oatanaka Hauna Aika 'Abaka.* (Lk 9.49-50)

<sup>38</sup> Ioane ehore ehina bena etibaha, "Ba'iobi haumu e, hau ha taihana, atamuai auba ki'a obokia eu'u ahinakia, ai tahore tahina bena kebaupana, pokina ia hanona aika 'abaka aha'i." <sup>39</sup> Iesu ehina benakia etibaha, "Ai patokaiabuna, pokina au ata'uai hiabu akakia nibabai hauna, muriai au ata'u a'i kea'i ki'ana. <sup>40</sup> Pokina a'i ni'oatanaka hauna hanona aika 'abaka. <sup>41</sup> 'Abi tohana mo au wai nahina benimi. Ata'uai hau ha bei 'aki 'ereai kebenimi katoinu pokina wai hana Keriso 'euna, hau weiana hanona mai 'arana.

### *Baihobo Kebabaina Hauna Herenai Keki'a Wairai.* (Mt 18.6-9; Lk 17.1-2)

<sup>42</sup> “Tai au tia'ikakaumana'u miorikia ha kebabehona hauna hanona iata rarina 'akina ha 'akonai patetoba 'auna patekapo uhuna 'akuai hanona ma enamo ba Tirama ena puma kebaibeni hauna. <sup>43</sup> Imamu kebabehoni'o raninai, kokabe obona, imamu hamonai mauri namona aonai kototo, ba a'i enamo imamu ruai koao iruba a'i ni'ao 'apua 'ekana. <sup>44</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua. <sup>45</sup> Aemu kebabehoni'o raninai, kokabe obona, aemu hamonai mauri namona aonai kototo, ba a'i enamo aemu rua namokiai iruba 'ekanai katekapo totoni'o. <sup>46</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua. <sup>47</sup> Mahamu kebabehoni'o raninai, ko'ipahina, mahamu hamonai Tirama ena obia aiaranai kototo ba a'i enamo mahamu rua namokiai iruba 'ekanai katekapo totoni'o. <sup>48</sup> 'Eka weiana 'erau'eraukia maearima tiani haukia hanona a'i ti'ari 'apua, abomo irubana a'i ni'ao 'apua.

<sup>49</sup> “Weiana puma iruba 'abana kehore maearima ikoikiai kebahiara banainakia matoha kikimaru ai tekapanakia 'abana.

<sup>50</sup> “Kikimaru hanona taba namona, 'a kikimaru a'i ke'aku'aku hanona iba'aku muena taearana aha'i. Wai hanona uahomanai a'i katoao, ia kikimaru katoa'ina baiatamiai, katomiaho oioi mai baibuami.”

## 10

### *Ha Atawana A'i Kebakarahina.* (Mt 19.1-12; Lk 16.18)

<sup>1</sup> Iesu 'eka weiana ehahona eao Iuda hanonai ekabanai eao Ioridana taina. Maearima bo'ona temai Iesu herenai teto'u mue, haeamona eba'iobinakia rani ikoinai nibabai ihobokia.

<sup>2</sup> Parisea haukia baika herena teao tehobona tetibaha, “Eka rauhuhuau hau ha atawana kebakarahina hanona mai ena bero, 'ao?” <sup>3</sup> Iesu ehina benakia etibaha, “Mose ena rauhuhuau hanona taba na ehoma?” <sup>4</sup> Ia ena 'abi tebaumena tetibaha, “Mose ena rauhuhu e'abi, hau ha atawana kebakarahina hanona marerena kererena keao babi'e herena, ba babi'e kebakarahina.” <sup>5</sup> Iesu ehina benakia etibaha, “Pokina emi ao pahihi

paunai Mose rauhuhu neiana ebenimi. <sup>6</sup> Ia Tirama hanopaka ebaramana raninai, maearima ebabainakia hau mai babi'e. <sup>7</sup> Ua buonai hau hanona hamana hinana nihabonakia, ia atawana ohi katemiaho haeamo. <sup>8</sup> Ia terarua hauanikia hanona hamona 'abana. Ua buonai terarua hauanikia hanona hamona, ia rua aha'i. <sup>9</sup> Tirama ehore ebahamomonakia hauna maearima a'i katebapa'ana.”

<sup>10</sup> Teao itu ha aonai, i'abana haukia hanona Iesu herenai 'abi weiana anina tebakai bakai muena. <sup>11</sup> Iesu ehina benakia etibaha, “Hau ha atawana kebakarahina haeamona babi'e ha keatawa muena ia hanona nabau ki'a hauna. <sup>12</sup> Babi'e abomo atawana kehabona hau ha keatawana re'a ia hanona nabau ki'a babi'ena.”

### *Iesu Miori Papakia Ebanamonakia.* (Mt 19.13-15; Lk 18.15-17)

<sup>13</sup> Maearima baika nahukia teaoainakia Iesu herena ahakiai kehao'au kebanamonakia, ia i'abana haukia tehore tebatanakia. <sup>14</sup> Iesu babai weiana eihana raninai eopuere, etibaha, “Miori papakia naiakia tomohabonakia, temai au here'u, a'i tomou'unakia, pokina nahomakia hanona Tirama ena obia aiarana haukia. <sup>15</sup> 'Abi tohana au wai nahina benimi, hau ha Tirama ena obia aiarana ia'inai miori papana 'abanai a'i keao raninai, ia hanona a'i kekatoto 'apua.” <sup>16</sup> Weiana Iesu miori ea'inakia, imana ahakiai ehao'au ebanamonakia.

### *Kepu hauna.* (Mt 19.16-30; Lk 18.18-30)

<sup>17</sup> Iesu taearai eka'a eao aonai, hau ha ebeau turina eao wairanai ekaipehu ebakaina etibaha, “Ba'iobi haumu namomu e, au aea kahoma mauri bainaibanai ka'ina?” <sup>18</sup> Iesu ehore ehina bena etibaha, “Taba buonai au namo'u ohinana? Hau ha a'i enamo, ia Tirama ikupaiana mo enamo. <sup>19</sup> Rauhuhu aba o'iobina. A'i koahuahu, a'i konabau, a'i kobainao, a'i kohinau bai'oi, a'i kobai'oi, hamamu hinamu komariki ainakia.” <sup>20</sup> Hau weiana e'abi etibaha, “Ba'iobi haumu e, rauhuhu naiakia hanona ko'iko'i'u raninai a'ima harainakia emai mo bariu.” <sup>21</sup> Weiana Iesu ia eiha 'ini'inina mai raona'auna ba e'abi etibaha, “Taba hamona okapu aina hanona neiana, emu



kepu kokawa kawainakia, monikia uraru haukia kobenakia weiana kupai 'aramu koa'ina, ba komai muri'uai koka'a." <sup>22</sup> 'Abi weiana eona raninai, wairana ebirabira ekaobo mai ao haiarana, pokina ia hanona kepu hauna.

*Kepu haukia Kupa Katetoto Hanona Kepahihi.*

<sup>23</sup> Iesu eihao ihao, i'abana haukia ehina benakia etibaha, "Taba herekia tebo'o haukia Tirama ena obia aiarana aonai katetoto hanona epahihi ki'a baha."

<sup>24</sup> I'abana haukia 'abi weiana teona hanona teta'u ta'u huri, haeamona ehinabe muenakia etibaha, "Naha'u e, Tirama ena obia aiarana ikatotona hanona epahihi ki'a baha." <sup>25</sup> Kamela kopi ererenai kekuri banai hanona ketaina, 'a obia hauna Tirama ena obia aiaranai ketoto hanona epahihi ki'a baha." <sup>26</sup> I'abana haukia teta'u ta'u huri, kipokia baiatakiai te'abi'abi tetibaha, "Tai hanona mauri kea'ina?" <sup>27</sup> Iesu eiha 'ini'ininakia, ba etibaha, "Taba ibabaikia maearima herekiai a'i ketaina, ia Tirama herenai hanona etaina. Pokina taba ikoikiai ibabaikia Tirama herenai hanona etaina."

<sup>28</sup> Weiana Petero ehore Iesu ehina bena etibaha, "Ai hanona emai taba ikoikiai tahabonakia, oi murimuai taka'a." <sup>29</sup> Iesu e'abi etibaha, "Abi tohana au wai nahina benimi, hau ha kehore au pau'uai 'ao pou namona paunai ena itu, uaho'abana, haibuna, hinana, hamana, nahuna, 'ao ena hano kehabonakia, <sup>30</sup> bariu rani neianai ia hanona taba bo'okia kea'i, ena itu, uaho'abana, haibuna, hinana, hamana, nahuna 'ao ena hano ikoikiai hinabu hinabu kea'i, abomo kateba haiarana, ba rani kemai aonai ia hanona mauri bannaibanai kea'ina. <sup>31</sup> Bariu bo'okia te'uai haukia hanona katemurihai, ia temurihai haukia hanona kate'uai."

*Iesu Ibaihaunai Ena 'Ari Pouna Ehinana.*

*(Mt 20.17-19; Lk 18.31-34)*

<sup>32</sup> Taearai teka'a Ierusalemata teao aonai Iesu hanona e'uai i'abana haukia aokia earo 'ari, abomo murinai teka'a haukia teta'u, weiana Iesu ehore i'abana haukia eapari parenakia, herenai taba kerama hauna pouna wairakiai ehinana. <sup>33</sup> Etibaha, "Aika bariu nahakara'au Ierusalemata weia hau ha au

Maearima Nahuna hinahina'u kehinahina Robe haukia mai Rauhuhu poki haukia herekiai, iahu'ari'u 'abina katebatohana, rama haeai haukia katebenakia. <sup>34</sup> Maearima weiakia au katebatae aina'u kate'atotina'u kate'atina'u ba kateahu 'arina'u, ia wapu ibaihaunai kamikiri mue."

*Iakobo Mai Ioane Ekia Nuatae Ha Iesu Herenai.*

*(Mt 20.20-28)*

<sup>35</sup> Sebedeo nahuna rua Iakobo mai Ioane ohi temai Iesu herena, tehina bena tetibaha, "Ba'iohi haumu e, emai nuatae tabana ha heremu ai katanoiaina hanona kobabaina." <sup>36</sup> Iesu e'abi etibaha, "Taba tonuatae aina heremai kababaina?"

<sup>37</sup> Ia te'abi tetibaha, "Emu nuabi koa'ina raninai, ai tararua ha oi itipamuai ha awarimuai patamiati."

<sup>38</sup> 'A Iesu ia ehina benakia etibaha, "tunoiaina tabana hanona a'i to'iohina. Au kainu 'erena wai katoinu ketainimi? Abomo au kateba'uere robenau 'uere robenau wai kateba'uere robenimi ketaina?" <sup>39</sup> Terarua te'abi tetibaha, "E, ketainamai."

Ba Iesu ehina benakia etibaha, "Au kainu 'erena hanona wai abomimo katoinu, abomo au kateba'uere robenau 'uere robenau wai abomimo kateba'uere robenimi. <sup>40</sup> 'A itipa'uai mai awari'uai katemiati haukia hanona au a'i katina'anakia. Miati 'ekakia weiakia hanona Tirama aba eba'orunakia, ia ena nuatae haukia mo 'eukia."

<sup>41</sup> I'abana haukia harau haea 'uru weiana teona hanona Iakobo mai Ioane ohi teopuere ainakia. <sup>42</sup> Iesu eaparinakia temai herena ehina benakia etibaha, "Wai to'iohina. Rama haeai haukia ekia maearima tiobia ainakia, ia hanona taburai maearima te'uai ainakia, haeamona ekia hiabuai maearima te'imanakia. <sup>43</sup> 'A wai baiatamiai hanona ua homana aha'i, tai apa'ua keraonana hauna hanona ta'arami ia'inai keao. <sup>44</sup> Tai nenuatae ke'uai hauna hanona wai ikoimiai ta'arami ia'ina haunai keao. <sup>45</sup> Pokina au Maearima Nahuna amai hanona ta'ara'u a'i kate'a'i, 'a ta'ara ka'i paunai amai, abonamo e'u mauri kabaibeni maearima bo'ona kakawanakia katemaui."

*Iesu Batimeo Mahana Ebanamonakia.*  
*(Mt 20.29-34; Lk 18.35-43)*

<sup>46</sup> Ia Ierikoai tekara'au. Iesu haeamona i'abana haukia mai maearima bo'ona kipokia Ieriko tihabona, taeara haiantai maha ki'a hauna atana Batimeo (anina hanona Timeo nahuna) emiati weia enoi ba'ame. <sup>47</sup> Hau weiana Iesu Nasareta hauna atana tehinana 'uruna eona raninai, beronai eapari etibaha, "Iesu Davida nahuna e! Moaoko'o aina'u." <sup>48</sup> Maearima tehore terikena 'uruna keaha'i, 'a ia hanona eapari hao apari hao eapari 'aota etibaha, "Davida nahuna e! Moaoko'o aina'u." <sup>49</sup> Iesu ekoroti, ehina benakia etibaha, "Tomoaparina." Ua buonai ia tehore maha ki'a hauna tehina bena, "Aomu menamo, momikiri, ia hanona oi niaparini'o." <sup>50</sup> Beronai ena habuni iro'abuna ene'ena, emikiri eka'a eao Iesu herena. <sup>51</sup> Iesu ia ebakaina etibaha, "Taba nonuatae aina kababaina heremuai?" Maha ki'a hauna e'abi etibaha, "Ba'iobi haumu e. Nanuatae maha'u pobano'ania." <sup>52</sup> Iesu ehina bena etibaha, "Moao, emu a'ikakauma ehore aba eba maurini'o." Mahana aba teno'a, weiana Iesu murinai eka'a.

## 11

### *Iesu Ierusalemiai Ekatoto Obia 'Arana 'Abana.*

*(Mt 21.1-11; Lk 19.28-40; Io 12.12-19)*

<sup>1</sup> Ierusalemia tetabuna teao, temai Olibe oeonai, Betefage Betani herekiai, weia Iesu i'abana haukia rua euhu 'uainakia, <sup>2</sup> e'abi etibaha, "Katoao aiara weiana wairakai hauna aonai katokatoto, doniki nahu ha katotabu ahina hau ha a'i nemia'au 'apua hauna ua'a aba tetoba 'au, katorubuna katomaiaina. <sup>3</sup> Hau ha kebakainimi, ketibaha, "Taba buonai niana tubabaina?" raninai, katohina bena katotibaha, 'Obiapaka nenuatae aina, rani papana haeamona kemueaina.' <sup>4</sup> Terarua teao doniki nahu ha tetabu ahina aiara ibuanai itu ha pa'abina 'akonai itoba 'au teihana. Terubuna aonai, <sup>5</sup> maearima baik weia tekoroti haukia tebakainakia, tetibaha, "Taba buonai doniki nahu torubuna?" <sup>6</sup> Iesu ehinana ihobonai mo maearima weiakia tehina benakia hanona tehabonakia. <sup>7</sup> Doniki nahu temaiaina Iesu herena raninai, kapenai ekia habuni teabari 'aunakia, ba

Iesu emia'au. <sup>8</sup> Maearima bo'ona ekia habuni taearai teabari, 'a baik hanona taeara haiantai matiu raukia tehara huri teabarinakia. <sup>9</sup> Wairanai mai murinai teka'a haukia teio tetibaha, "Hosana! Obiapaka atanai nimai hauna hamabanamona. <sup>10</sup> 'Aba'abaka Davida ena obia aiarana aba nimai hauna hamabanamona. Hosana,\* 'ubi toha tohana Tiramana hamabanamona."

<sup>11</sup> Iesu Ierusalemiai ekara'au Marea Robe aonai ekatoto, taba ikoikiai eihanakia, ia beraura eko'iko'i buonai i'abana haukia harau haea rua kipokia temue teao Betani.

### *Iesu Suke Matiuna Ena.* *(Mt 21.18-19)*

<sup>12</sup> Erani Betani tehabona hanona Iesu mare'a e'ari. <sup>13</sup> Suke mai rauna atau'ai eihana, eao herena keiha haraina buana ha re'a, rau 'abaeakia mo taba aha'i etabu ahina, pokina Suke ekia bua'a ranina aha'i. <sup>14</sup> Iesu matiu weiana ehina bena etibaha, "Oi buabuamu hau ha a'i keani 'apuana keao mo banai banai." I'abana haukia aiana weiana teona.

### *Iesu Marea Robe ai Etoto.* *(Mt 21.12-17; Lk 19.45-48; Io 2.13-22)*

<sup>15</sup> Ierusalemiai tekara'au, Iesu Marea Robe ai ekatoto kawakawa haukia eu'u ahinakia, moni tia'i banai haukia ekia itara ebaku'a banainakia haeamona rauria tikawakawa ainakia haukia ekia imia'au tabakia etori ku'a banainakia. <sup>16</sup> Iesu ekia taeara ekaiabunakia ha ena kawakawa tabana a'i kebua banaina Marea Robe i'aeana aonai. <sup>17</sup> Weiana maearima eba'iobinakia etibaha, "Puka Robenai tererena, Tirama e'abi, 'E'u itu hanona maearima ikoikiai kateaparina ekia bahuba'ari ituna', ia wai aba kakikaki haukia ekia paparo'ai tubaona."

<sup>18</sup> Robe haukia apa'uakia mai Rauhuhu poki haukia 'uru neiana teona buonai, iahu'arina taearana tetabuna, ia teta'u aina pokina maearima ikoikiai hanona ena ba'iobi 'abikia weiakia teonamo ainakia buonai. <sup>19</sup> Rabirabi hanona aiara apa'uana weiana tehabona.

\* **11:10:** (10) anina 'Kebamaurinamai'

*Suke Matiuna Aba Epaea.*  
(Mt 21.20-22)

<sup>20</sup> Raurani tekabanai raninai, Suke weiana teihana aba e'ororo eao mo ramunai epua. <sup>21</sup> Petero eraona tinana ba Iesu ehina bena etibaha, "Ba'iobi haumu e! Moihana. Suke orikena hauna hanona aba e'ororo." <sup>22</sup> Iesu ehina benakia etibaha, "Tirama katoa'ikakauma. <sup>23</sup> 'Abi tohana au wai nahina benimi. Hau ha oeo neiana pehina bena, 'Kipomu momikiri 'aku aonai moeno uhu', kebatohana aona a'i kekai'au kai'au raninai tabana kerama. Ia nenuatae aina hanona kea'ina. <sup>24</sup> Ua buonai au wai nahina benimi, tonuatae ainakia tabakia ikoikiai bahuba'ari ai katonoi, weiana katoa'ikakauma hanona katotabu ahinakia wai 'eumi.

<sup>25</sup> Weiana bahuba'ari aokiai katokoroti raninai, tea'i ki'aniami haukia ekia ki'a katohina haonakia, ba Hamami kupai hauna emi ki'a abomo kehina haonakia. <sup>26</sup> 'A ekia ki'a a'i katohina haonakia raninai, Hamami kupai nemiaho hauna emi ki'a abomo a'i kehina haonakia."

*Iesu Ena Hiabu Tebakai bakai Aina.*  
(Mt 21.23-27; Lk 20.1-8)

<sup>27</sup> Haeamona Ierusalem mai tekara'au, Iesu eao Marea Robe wairanai nika-banai aonai, Robe haukia apa'uakia, Rauhuhu poki haukia, abomo aiara haukia apa'uakia teao Iesu herena. <sup>28</sup> Tebakaina, te'abi tetibaha, "Hiabu tabanai aka neiakia nubabainakia, abomo tai hiabu ebeni'o?"

<sup>29</sup> Iesu e'abi etibaha, "Au abomo bakaibakai ha kabenimi, anina kato-bena'u raninai tai ena hiabu ai aka neiakia nababai hanona kaba'iobinimi. <sup>30</sup> Ioane ena ba'uere robe hanona kupai emai 'ao maearima herekiai emai? Tomo'abi."

<sup>31</sup> Kipokia baiatakiai terobahu aina tetibaha, "'Kaha'abi kupai emai' raninai kebakainaka 'Taba buonai a'i tubatohana?' <sup>32</sup> 'Ao kaha'abi 'Maearima herekiai emai re'a'..." Ia maearima mo teta'u ainakia, pokina maearima ikoinai te'iobina Ioane hanona maha banai hauna tohana. <sup>33</sup> Weiana ia Iesu tehina bena tetibaha, "A'i ta'iobina." Iesu abomo ehina benakia etibaha, "Au abo'umo hiabu tabanai aka neiakia nababai hanona a'i kaba'iobinimi."

## 12

*'Abi Ibabataina Haharua I'imana Haukia.*  
(Mt 21.33-46; Lk 20.9-19)

<sup>1</sup> Iesu ehore 'abi ibabatainai ehina benakia etibaha "Hau ha bine haharuana ebabaina, arana ea'i abuna, bine buakia ibahari 'iti'itikia 'urina ehabina, mai iha 'inina ituna ebabaina. Maearima baik e benakia kate'imana, 'a ia hanona harima eao. <sup>2</sup> Bine te'aiba raninai hau weiana ena ta'ara ia'ina hauna ha euhuna eao haharua te'imana haukia herekia. Bine anikia harua herekiai kea'inakia. <sup>3</sup> 'A haharua i'imana haukia tehore ta'ara ia'ina hauna tea'i 'inina, te'atina, teuhuna imana 'abaeana emue. <sup>4</sup> Haeamona poki hauna ta'ara ia'ina hauna ha euhuna eao herekia hanona 'arana tebamani'ana abomo teba haumaeana. <sup>5</sup> Haeamona ena ta'ara ia'ina hauna ha euhuna eao hanona teahu 'arina. Bo'okia euhunakia teao, baik teahu ki'anakia, ia baik hanona teahu 'arinakia. <sup>6</sup> Hamona emiaho keuhuna hauna hanona nahuna niraona'au aina hauna. Orena 'akinai ia euhuna, e'abi etibaha, 'Naha'u neiana kauhuna keao hanona aba katemariki aina.' <sup>7</sup> Ia haharua i'imana haukia teroba ahu, te'abi tetibaha, "Tomai, neiana hanona haharua poki hauna nahuna, hamahu 'arina, ena haharua neiana hanona aika 'eukai keao.' <sup>8</sup> Ua buonai tea'i 'inina, teahu 'arina, hauanina tekapo banaina haharua murinai."

<sup>9</sup> Iesu ia ebakainakia etibaha, "turaonana, haharua poki hauna hanona taba kebabaina? Ia kemai haharua i'imana haukia keahu 'arinakia, bine haharuana kea'ina maearima baik kebenakia kate'imana.

<sup>10</sup> Puka Robenai tererena hauna a'i totu-abina? Na e'abi aiho,

'Itu ibabaina haukia tebaoao aina piharana hanona itu ibua 'inina kupuana piharana namonai eao.

<sup>11</sup> Neiana hanona Obiapaka ena babai, nahaihana nahata'u ta'u huri! "

Sal 118.22, 23

<sup>12</sup> Iuda haukia apa'uakia Iesu ia'i 'inina teraonana pokina te'iobina 'abi ibabataina hanona ia ahakiai ehinana. Ia maearima teta'u ainakia buonai tehabona teka'a.

*Takiti Baibeni Bakai bakaina.*  
(Mt 22.15-22; Lk 20.20-26)

<sup>13</sup> Muriai ia tehore Parisea haukia mai Heroda titaina haukia baika teuhunakia teao Iesu herena bakai bakai ai katebarewana. <sup>14</sup> Ba teao herena tebakaina tetibaha, “Ba’iobi haumu e, ai ta’iobina oi hanona 'abi tohokia nohina, maearima ekia raona 'abikia a'i nuta'u ainakia, ia aea homakia robakia a'i nuahu, ia Tirama ena taeara tohanai mo nuba’iobi. Ba 'ara kahahore Kaisara herenai hanona ebero 'ao aha'i?”

<sup>15</sup> 'Ara kahahore 'ao aha'i?” Iesu ekia bai'oi weiana e'iohina, ebakainakia etibaha, “Taba buonai tuhobona'u! Moni ha tomaiaina, maihana.” <sup>16</sup> Moni ha temaiaina tebena hanona ebakainakia etibaha, “Neiana hanona tai aubaubana? Mai tai atana?” Ia te'abi, “Kaisara 'euna.” <sup>17</sup> Iesu ehina benakia etibaha, “Kaisara 'euna Kaisara katobena, Tirama 'euna Tirama katobena.” Weiana teona hanona teta'uta'u huri.

*Hawainibe Bakai bakaina Weiana 'Ariai Mikiri Mue Murinai Hauna.*  
(Mt 22.23-33; Lk 20.27-40)

<sup>18</sup> Sadukea haukia mikiri mue a'i tibatohana haukia baika ekia bakaibakai ha teaoaina Iesu herena. <sup>19</sup> Tebakaina tetibaha, “Ba’iobi haumu e, Mose na erere aihona, 'Hau ha nahuna aha'i ke'ari wapuna kemiaho, 'ari hauna hatina kehore wapu weiana keatawana nahuna kebaramanakia 'ari hauna 'euna.’

<sup>20</sup> Ba bariu a'a hati ikoikiai 'abaihau hamomo. Pakana ehawainibe, nahuna aha'i e'ari. <sup>21</sup> Hatina ibaruana wapu weiana eatawana, nahuna aha'i e'ari. Hatikia ibaihauna abomo uahomana herenai erama. <sup>22</sup> Te'abaihau hamomo babi'e weiana hamona teatawana, ia ha nahuna a'i ebaramana. Muri 'akinai babi'e abomo e'ari. <sup>23</sup> Hau 'abaihau hamomo ikoikiai teatawana, ba mikiri mueai hanona tai atawana tohanai keao?”

<sup>24</sup> Iesu ehina benakia etibaha, “Wai hanona tobaho pokina Puka Robena anina a'i to'iohina abomo Tirama ena hiabu a'i to'iohina. <sup>25</sup> 'Ari haukia katemikiri raninai ia hanona aneru kupai haukia 'abakia, a'i katehawainibe.

<sup>26</sup> 'Ariai katemikiri mue 'abina a'i to'iohina, Mose ena Pukai a'i totuabina? Arabu e'ara 'ekanai Tirama Mose ehina bena, 'Bariu Au hanona Aberahamo ena

Tirama, Isako ena Tirama, Iakobo ena Tirama.’ <sup>27</sup> Tirama ua e'abi aiho buonai aika kaha'iohina, Ia hanona 'ari haukia ekia Tirama aha'i, ia mauri haukia ekia Tirama. Wai tohaorea ki'a baha.”

*Rauhuhu Apa'uana Tohana.*  
(Mt 22.34-40; Lk 10.25-28)

<sup>28</sup> Rauhuhu poki hauna ha weia ekia bai-hara tae 'uruna ebahu aina, ebatatana, Iesu Sadukea haukia ekia bakaibakai 'arana ebamue haraina. Ba ia ehore Iesu ebakaina etibaha, “Rauhuhu ikoikiai, aeana hauna ikoikiai 'arakiai?” <sup>29</sup> Iesu ehina bena etibaha, “Ikoikiai 'arakiai hauna neiana. 'Isaraela haumi e, aia tomona. Obiapaka eka Tirama hanona Obiapaka hamomona mo. <sup>30</sup> Obiapaka emu Tirama koraona'au aina, mai aomu ikoinai, mai aubamu ikoinai, mai emu raona ikoinai, mai taburamu ikoinai.’

<sup>31</sup> Ibaruana hanona neiana. 'Heremuai hauna abomo koraona'au aina, kipomu nuraona'au aini'o 'abana.’ Rauhuhu ua'a ha a'i nemiaho neiakia rua 'arakiai.”

<sup>32</sup> Hau weiana e'abi etibaha, “Ba’iobi haumu e, oi hanona obero. O'abi harai, Tirama hanona hamona mo, ha ua'a aha'i. <sup>33</sup> Haeamona Tirama kaharaona'au aina mai aoka ikoinai, mai eka raona ikoinai, mai eka tabura ikoinai, weiana herekai nemiaho hauna kaharaona'au aina hanona eapa'ua ki'a baha ba mahi mai barobe tabakia ikoikiai kahabaibeni Tirama wairanai.”

<sup>34</sup> Iesu hau weiana eihana, e'abi harai buonai ehina bena etibaha, “Oi mai Tirama ena obia aiarana hanona baiatami a'i ehoma'a.” Weiana murinai maearima ia katebakaina hanona teta'u.

*Keriso Ebakai bakai Ainakia.*  
(Mt 22.41-46; Lk 20.41-44)

<sup>35</sup> Iesu Marea Robe aonai eba'iohina raninai maearima ebakainakia etibaha, “Aehoma buonai Rauhuhu poki haukia ti'abi, 'Keriso hanona Davida Nahuna?”

<sup>36</sup> Weiana hanona Auba Robe hiabunai Davida pinanai e'abi etibaha,

'Obiapaka hanona e'u obia ehina bena etibaha, Itipa'u tainai momiatu keao mo emu 'ou haukia ikoikiai 'apumu ba'anai kahorotinakia.’



<sup>37</sup> Davida kipona ehore Keriso eaparina Obiapaka raninai, aea homanai mo ia nahunai keao?" Mako tebahu haukia mai aonamokia ia aiana teona.

*Rauhuhu Poki Haukia Kate'ima 'ima Harainakia.*

*(Mt 23.1-36; Lk 20.45-47)*

<sup>38</sup> Haeamona eba'iobi muenakia, etibaha, "Rauhuhu poki haukia herekiai kato'ima 'ima harainimi, ia hanona habuni homa'akia tibatonakia tika-banai kabanai taearai mai kawakawa 'ekakiai, ekia nuatae hanona maearima ia kateihanakia katemariki ainakia.

<sup>39</sup> Haeamona marea aokiai ekia nuatae imia'au namokiai katemia'au, tatu aokiai abomo 'eka apa'uakia namokiai mo katemia'au.

<sup>40</sup> Wapu ekia itu tiba'arenakia, ekia bahuba'ari tibahoma'a ki'anakia kateihanakia buonai. Maearima uahomakia hanona ki'a rarina 'akina katetabu ahina."

*Wapu Ena Baibeni.*

*(Lk 21.1-4)*

<sup>41</sup> Iesu Marea Robe aonai beruberu mauana wairanai emiati, to'u haukia ekia moni mauai teuta eihanakia, obia haukia bo'ona hanona ekia moni bo'okia teuta. <sup>42</sup> Ia wapu uraruna ha emai, ena moni papakia rua emaiainakia eutanakia, ekia ihobo hanona pene hamona 'abana.

<sup>43</sup> I'abana haukia eaparinakia teao herena ehina benakia etibaha, "Abi tohana au wai nahina benimi, wapu uraruna weiana eutana hauna hanona eapa'ua ki'a baha ba ia ikoikiai teuta haukia. <sup>44</sup> Pokina obia haukia ekia moni tebo'o ia papakia mo teuta, 'a wapu uraruna hanona ena tabu ahi tabana keaniani aina hauna maikoina eutana."

## 13

*Iesu Marea Robe Kerabu Ta'ina Pouna Ehinana.*

*(Mt 24.1-2; Lk 21.5-6)*

<sup>1</sup> Iesu Marea Robeai ekarahi aonai, i'abana hauna ha ehore ehina bena etibaha, "Ba'iobi haumu e, Marea Robe namo abuna piharai tebabaina, moihana." <sup>2</sup> Iesu e'abi etibaha, "Itu rarikia 'akikia neiakia noihanakia? Maikoikiai katerabu tai ore, katehere obo, pihara ha pihara ha ahanai a'i keno'au a'i kemiaho."

*Kate'oinimi Mai Kateba haiaranimi.*  
*(Mt 24.3-14; Lk 21.7-19)*

<sup>3</sup> Iesu Olibe oeonai emiati Marea Robe ewairana, Petero, Iakobo, Ioane mai Anderea abomo teao herena tebakai bunina. <sup>4</sup> "Moba'iobinamai, taba neiakia aita katerama? Haeamona katerama ranina hoana hanona aea homana?"

<sup>5</sup> Iesu ehina benakia, etibaha, "Kato'ima 'ima harainimi, hau ha a'i me'oinimi. <sup>6</sup> Maearima bo'okia au ata'uai katemai kate'abi katetibaha, 'Au hanona Keriso', maearima bo'okia kate'oinakia.

<sup>7</sup> "Huari 'urukia mai poukia kato'o raninai, nuami a'i katetae, taba neiakia katerama, ia puana hanona wairai.

<sup>8</sup> Itubu ha kemikiri itubu ha kehuarina, hanopaka ha kemikiri hanopaka ha kehuarina. Kanokau keka'a 'eka haeai haeai, 'arobo rarikia katerama. Neiakia hanona matoha miori nirama haiarana kori'uaina 'abana.

<sup>9</sup> "Kipomi kato'ima 'ima harainimi, pokina katea'i 'ininimi bakai 'ekakiai katehorotinimi marea aokiai kate'atinimi. Au pau'uai rauhuhu haukia mai hanopaka obiakia wairakiai katokoroti, herekiai pou'u katohinana. <sup>10</sup> Puana hanona a'i kema baha keao mo pou namona kateiroro aina itubu ikoikiai herekiai. <sup>11</sup> Katea'i 'ininimi bakai 'ekanai katehorotinimi raninai, taba katouahina hauna a'i katoraonana, rani ketaina kebenimi 'abina mo katohinana, pokina wai a'i kato'abi, ia Auba Robe ke'abi. <sup>12</sup> A'a hati katehore kipokia hinahinakia katehinahina, hama katehore nahukia hinahinakia katehinahina kateahu 'arinakia. Nahu katehore hinakia hamakia kateba ki'anakia kateaoainakia, kateahu 'arinakia. <sup>13</sup> Au pau'uai maearima ikoinai kate'oatanimi, ia tai kebapahihi keao puanai hauna hanona kemaui.

*Orenai Rani Ki'a Obona Tohana.*  
*(Mt 24.15-28; Lk 21.20-24)*

<sup>14</sup> "Baki'a mai bata'u hauna a'i pekoroti 'ekanai kekoroti katoihana. (Tua-bituabi haumu, 'abi neiiana anina ko'iobi haraina.) Rani weianai Iudeai temiaho haukia hanona katebeau 'akauma kobio kateao. <sup>15</sup> Maearima ha ena itu kapenai re'a ia hanona a'i keriri itu aonai a'i ketoto ena taba a'i kea'inakia, ia kebeau 'akau-mana. <sup>16</sup> Umai niaka hauna abomo a'i kemue itu ena habuni a'i kea'ina. <sup>17</sup> Rani

weiakia aokiai babi'e mai nuakia haeamona batutu babi'ekia herekiai hanona keki'a ki'a baha. <sup>18</sup> Katobahuba'ari Tirama herenai taba neiakia 'ipi mai hiribo aokiai a'i katerama. <sup>19</sup> Pokina rani weiakia ekia ki'a hanona kateki'a ki'a baha, ba Tirama hanopaka ebabai ramana rani-nai emai mo bariu rani neiana ena ki'a kipokia a'i kateihobo 'apua, muriai haeamona uahomana ha a'i kerama mue. <sup>20</sup> A Obiapaka rani weiakia a'i pebako'onakia hanona tai ha a'i pemaui 'apua, 'a ia ena a'itaea maearimakia buokiai rani weiakia kebako'onakia.

<sup>21</sup> "Rani weianai hau ha kehina benimi, 'Tomoihana, Keriso neiana' 'ao 'Tomoihana, Keriso weiana' hanona a'i katobatohana. <sup>22</sup> Pokina Keriso bai'oikia mai mahabanai bai'oikia haukia katemai, hoa haeai haeai mai hiabu haeai haeai katebabai, ekia nuatae hanona Tirama ena a'i taea maearimakia kate 'oinakia, iamo a'i ketainakia. <sup>23</sup> Ua buonai kato'ima 'ima harainimi, wairai ua'a a'i tirama baha tabakia ikoikiai aba naba'iobinimi.

*Au Maearima Nahuna kamai.*  
(Mt 24.29-31; Lk 21.25-28)

<sup>24</sup> "Ki'a weiana keore murinai, Beraura hanona kewapura abuna, nawa a'i kerara.

<sup>25</sup> Bihiu kupai kate'eho, abomo kupai hiabu tabakia haeai haeai kateibiuiuiu.

Isa 13.10; 34.4

<sup>26</sup> Rani weianai maearima hanona au Maearima Nahuna kateihana'u 'auhao ahanai kamai mai hiabu'u abomo mai nuabi'u. <sup>27</sup> Weiana e'u aneru kauhukakia kateao 'uni puakia bani baura timai 'ekakiai, e'u a'itaea maearimakia katebararonakia hanopaka puana keao puana.

*Kuropou Kahaihana.*  
(Mt 24.32-35; Lk 21.29-33)

<sup>28</sup> "Kuropou herenai ihaiha namona katoihana, Kuropou kehubuhubu rauna mahamahakia katoihanakia hanona kato'iobina ihau aba nikaibari. <sup>29</sup> Wai abomimo taba nahomakia katoihanakia raninai kato'iobina ia aba herekai pa'abi 'akonai. <sup>30</sup> 'Abi tohana au wai nahina benimi, uru neiana a'i keore baha keao mo taba neiakia katerama. <sup>31</sup> Kupa mai

hanopaka kate'akauma, ia au e'u 'abi hanona a'i ke'akauma.

*Tai Ha A'i E'iobina Rani Tabanai.*  
(Mt 24.36-44)

<sup>32</sup> "Beraura hoana 'ao ranina tai ha a'i e'iobina, ena aneru kupai a'i te'iobina, Nahuna abomo a'i e'iobina, ia Hamana ikupaiana mo e'iobina.

<sup>33</sup> "Katomaha no'a, katobai'ima pokina rani kemai hanona wai a'i to'iobina.

<sup>34</sup> Ihobona hau ha harima eao raninai, ena ta'ara'i haukia hiabu ebenakia ena itu kate'imana, ha ha ekia aka katebabai abomo pa'abi i'imana hauna ehina bena kemaha no'a kebakai'ima. <sup>35</sup> Ua buonai wai katobai'ima, pokina itu hauna ena mue hanona a'i to'iobina rabi, wapuka'a, kokoro'u ai, 'ao rani tainai kemai. <sup>36</sup> Ia kebata'u kemai re'a, parua reami a'i metabu ahinimi. <sup>37</sup> Wai nahina benimi 'abina maearima ikoikiai abomo nahina benakia natibaha, 'Katobai'ima!'"

## 14

*Iesu Kateahu 'arina Taearana Tetabuna.*  
(Mt 26.1-5; Lk 22.1-2; Io 11.45-53)

<sup>1</sup> Beraura rua wairai temiaho Kabanai mai Parawa 'abaeana tatuna. Robe haukia apa'uakia mai rauhuhu poki haukia tebahamomo terobahu, bunianai taeara tetabu Iesu kate'ina kateahu 'arina. <sup>2</sup> Tetibaha, "Aika tatu weiana aonai a'i kahababaina. To'u haukia 'uri'uri rarina a'i temebabaina ta'una."

*Babi'e Ha Iesu 'Aranai Tehoro Eheina.*  
(Mt 26.6-13; Io 12.1-8)

<sup>3</sup> Iesu hanona Betaniai, Simona morumoru hauna ena ituai, ua'a nianiani aonai, babi'e ha tehoro (atana Nado) timina 'orimona abomo 'arana rarina 'akina hauna kabapu namona 'akina eaoaina. Ba eahu pa'ana Iesu 'aranai eheina. <sup>4</sup> Maearima baika weia hanona teopuere, kipokia baiatakiai te'abi'abi tetibaha, "Taba buonai tehoro neiana nibaore 'abaeana? <sup>5</sup> Mekawakawaina pa'e Kina hinabu aihau petabu ahina, monina weiana hanona uraru haukia pebenakia." Ia tehore babi'e weiana teururuai ki'ana. <sup>6</sup> 'A Iesu ehina benakia etibaha, "Tomohabona! Taba buonai tuopuere aina? Ia hanona aka namona au here'u ai ebabaina. <sup>7</sup> 'A uraru haukia hanona rani ikoinai heremiai

temiaho, katonuatae raninai rani tebo'o emi banamo tabakia katobenakia. Ia au hanona rani ikoinai heremiai a'i kamiaho. <sup>8</sup> Ena 'iobi ihobonai ebabaina here'u ai. Ai tihore bahana'u, ia hau'u tehoroi eutuna, wairai kerama hauna eba'oru baihana. <sup>9</sup> 'Abi toha tohana mo au wai nahina benimi, Pou Namona kateiroro aina hanopaka maikoinai babi'e neiana aka ebabaina hauna abomo katehinana, ia iraonana."

*Iuda Kehinahina Eao.*  
(Mt 26.14-16; Lk 22.3-6)

<sup>10</sup> Iuda Isakariote hauna harau haea rua haukia 'abakia ha eao Robe haukia apa'uakia herekia Iesu hinahinana kehinahina. <sup>11</sup> Robe haukia apa'uakia Iuda herenai 'uru weiana teona hanona aokia enamo ki'a, te'abi'uai moni katebena, ua buonai Iuda taeara etabu, taeara namona tabanai hanona Iesu robe haukia apa'uakia imakiai keutana katea'ina.

*Iesu I'abana Haukia Kipokia Ekia Kabanai Tatuna Teaniani.*

(Mt 26.17-25; Lk 22.7-14, 21-23; Io 13.21-30)

<sup>12</sup> Parawa 'abaeana tatuna wapuna kori'uaina Kabanai tatuna mamoeikia iahu'arikia berauranai, Iesu i'abana haukia tehore tebakaina tetibaha, "Nuraonana Kabanai tatuna anianina ae'e kataba'oruna koani." <sup>13</sup> Iesu i'abana haukia rua euhunakia, e'abi etibaha, "Katoao aiara aonai katokatoto, ua'a hau ha katoihana puou mai beina kebuana, murinai kato'au katoao. <sup>14</sup> Ketoto itunai itu poki hauna katohina bena katotibaha, 'Ba'iobi hauna e'abi, bakibaki ikaihurina ae'e ai? I'aba'u haukia kipokia Kabanai tatuna anianina katani.' <sup>15</sup> Ba ia kipona ikaihuri rarina ha 'ubiai aba e'oru hauna keba ihanimi. Weia eka aniani katoa'ia'i haraina." <sup>16</sup> I'abana haukia teao, aiara aonai tekatoto hanona Iesu ehina benakia tabakia ikoikiai tetabu ahinakia. Kabanai tatuna anianina tea'ia'i haraina.

<sup>17</sup> Rabirabi eaoaina aonai, Iesu i'abana haukia harauhaea rua kipokia temai. <sup>18</sup> Aniani 'ekanai temiati tianiani aonai, Iesu ehina benakia etibaha, "Abi tohana au wai nahina benimi, baiatamiai tararua tianiani oioi hauna ha au hinahina'u kehinahina." <sup>19</sup> I'abana haukia aokia earo'ari, weiana ha ha tebakaina, "Nuraonana au,

'ao?" <sup>20</sup> Iesu ekia 'abi ehamuena etibaha, "Wai harauhaea rua haumi ha, tararua 'ororo hamonai tahao uta hauna. <sup>21</sup> Au Maearima Nahuna hanona ka'ari Puka Robenai ererena ihobona, 'a au Maearima Nahuna hinahina'u kehinahina hauna aoko'ona mo, ki'a rarina 'akina ketabu ahina, a'i perama hanona penamo."

*Obiapaka Ena Anito'u.*

(Mt 26.26-30; Lk 22.14-20; 1Kr 11.23-25)

<sup>22</sup> Teaniani aonai, Iesu ehore parawa ea'ina, Tirama ebanamona ba ehobina, i'abana haukia ebenakia, e'abi etibaha, "Tomoa'ina, tomoana! Neiana hauna au hauani'u." <sup>23</sup> Haeamona 'ere ha ea'ina, Tirama ebanamona i'abana haukia ebenakia, ikoikiai teinu. <sup>24</sup> Iesu e'abi etibaha, "Neiana hanona au aruaru'u maearima bo'okia paukiai kekiki oioi. Au aruaru'u hanona maearima mai Tirama ekia baibua 'abi'uaina mahamahana ibatohana hoana. <sup>25</sup> Au wai nahina benimi, bine beina ha a'i kainu mue keao mo Tirama ena obia aiarana aonai mahamahana kainu."

<sup>26</sup> Epua hui ha tea'ina, ba tekarahi Olibe oeona teao.

*Iesu Petero Kehinana 'Abina Ehina Uaina.*

(Mt 26.31-35; Lk 22.31-34; Io 13.36-38)

<sup>27</sup> Iesu i'abana haukia ehina benakia etibaha, "Ikoimiai katohabona'u katobeau otaraina, pokina Puka Robenai tererena, 'Au kahore mamoe i'imakia hauna kakomo 'arina, weiana mamoe ikoinai katebeau otaraina.'

Sek 13.7

<sup>28</sup> 'A au 'ariai kamikiri mue murinai ka'uai kaeao Galilea." <sup>29</sup> Petero ehore Iesu ehina bena etibaha, "Aba'u neiakia ikoikiai oi katehaboni'o re'a, ia au hanona a'i kahabo 'apuani'o." <sup>30</sup> Iesu Petero ehina bena etibaha, "Abi tohana au oi nahina beni'o, bariu rabi neiana kokoro'u ibaruna a'i ke'arara baha aonai, oi rani ahau au kobuniai aina'u." <sup>31</sup> Petero e'abi pahihi etibaha, "Aika hararua kaha'ari haemo re'a, 'a au hanona oi a'i kabuniai 'apuani'o." I'abana haukia ikoikiai abomo ua te'abi aiho.

*Iesu Getesemane ai Ehabuba'ari.*  
(Mt 26.36-46; Lk 22.39-46)

<sup>32</sup> 'Eka ha atana Getesemane ai tekara'au. Weiana Iesu i'abana haukia ehina benakia etibaha, "Wai na'a tomiati, au kaeao kabahuba'ari." <sup>33</sup> Ba Petero, Iakobo, mai Ioane mo ebaka'anakia, aona e'abe'abe abomo earo'ari. <sup>34</sup> Ua buonai ehina benakia etibaha, "Au hanona auba'u nihaiara matoha pa'ari moioina. Neia kato mياهو, katomaha no'a katobai'ima." <sup>35</sup> Papanā eka'a ha ha 'apua eao, ba 'anoai e'umuti, ebahuba'ari, pe mai taearana haiara ranina weiana ia herenai pekaobo. <sup>36</sup> Ia ebahuba'ari etibaha, "Hama'u e, Hama'u e, taba ikoikia heremuai hanona tetai. 'Ere neiana here'uai poa'i obona. 'A au e'u nuatae aha'i, ia oi emu nuataeai mo."

<sup>37</sup> Iesu emue emai i'abana haukia aihau parua reagia etabu ahinakia, ia ehore Petero ehina bena etibaha, "Simona e, oi nuparua, 'u? Rani papana pomaha no'a pobai'ima a'i petaina?" <sup>38</sup> Katobahuba'ari kato bai'ima, pokina baihubo ai a'i tomtoto. Auba hanona nenuatae tabura, ia hauani mo ni'abe'abe."

<sup>39</sup> Haeamona emue eao ebahuba'ari, ena bahuba'ari 'abikia haeamokia ehina muenakia. <sup>40</sup> Weiana emue emai, teaihau parua reagia etabu ahinakia, pokina mahakia tepuma buonai, herenai 'abi tabana katebamuena hanona a'i te'iohina.

<sup>41</sup> Rani ibaihauna emue emai, ehina benakia etibaha, "Wai tuparua oho mo tuarai. Hinoku'u, tomoihana ranina aba ekara'au. Maearima Nahuna hanona ki'a haukia imakiai aba enouta. <sup>42</sup> Tomomikiri hamaka'a, hinahina'u ehinahina hauna aba nimai."

### *Iesu Tea'i Inina.*

*(Mt 26.47-56; Lk 22.47-53; Io 18.3-12)*

<sup>43</sup> Iesu ni'abi oho mo aonai, Iuda weiana harauhaea rua haukia 'abakia ha hauna ekara'au, mako rarina imakia mai pura'akia abomo mai karebakia murinai te'au, ikoikia hanona Robe haukia apa'uakia mai Rauhuhu poki haukia mai aiara haukia apa'uakia ekia 'abiai teao. <sup>44</sup> Hinahina hauna mako weiana aba ehina benakia etibaha, 'Kapauna hauna hanona hau mo weiana katoa'i 'inina katoaoaina.'

<sup>45</sup> Iuda ekarahi beronai eao Iesu herena, "Ba'iohi haumu e." Ba epauna. <sup>46</sup> Murinai Iesu tea'ina ba tebirina. <sup>47</sup> 'A Iesu kipokia

tekoroti haeamo hauna ha emikiri kareba eberi 'auna, Robe haukia 'arakiai hauna ena ta'ara'i hauna haiana ehara obona. <sup>48</sup> Iesu ehore ehina benakia etibaha, "Wai imami mai karebakia mai pura'akia tomā au katoa'ina'u ihobona kakikaki hau'u ai tubaona'u. <sup>49</sup> Rani ikoikia au hanona wai kipokia Marea Robe aonai aba'iohi, ia a'i toa'ina'u. 'A neiana hanona Puka Robeai terere 'uaina 'abina ketohana paunai." <sup>50</sup> Weiana i'abana haukia ikoikia Iesu tehabona tebeau otaraina.

<sup>51</sup> Hau 'aru'aruna ha Iesu murinai e'au, habuni hamona mo ero'abuna. Maearima tehore hau weiana tea'i 'inina aonai, <sup>52</sup> ena habuni imakiai ehabona hauna 'abaeana ebeau 'akaumana.

### *Iesu Iuda Ekia Obia Haukia Wairakiai Ekoroti.*

*(Mt 26.57-68; Lk 22.54-55; Io 18.13-14, 19-24)*

<sup>53</sup> Ia tehore Iesu tebaka'ana teaoaina Robe haukia 'arakiai hauna herena, ba Robe haukia apa'uakia, aiara haukia apa'uakia mai Rauhuhu poki haukia ikoikia weia teto'u. <sup>54</sup> Petero hanona Iesu ekaiturina, ia mai baiatakia teao Robe haukia 'arakiai hauna ena ara aonai, ua'a bai'ima haukia baika kipokia temiati haeamo, iruba eraranakia.

<sup>55</sup> Weiana Robe haukia apa'uakia mai Iuda ekia obia haukia tehore Iesu iba'arina taearana tetabuna, ia beho ha a'i tetabu ahina. <sup>56</sup> Maearima bo'ona 'akina tehore hināu 'abikia tehina herenai, ia ekia hināu 'abikia hanona ha a'i teihobo. <sup>57</sup> Haeamona maearima baika temikiri ekia bai'oi 'abina neiana tehinana Iesu herenai, tetibaha, <sup>58</sup> "Ai aiana taona, e'abi etibaha, 'Au Marea Robe neiana maearima imakiai tebabaina hauna hanona karubuna, wapu aihau aonai maearima imakiai a'i katebabaina Marea Robena ha kababaina.'" <sup>59</sup> 'A ekia bai'oi 'abikia neiakia abomo a'i teihobo.

<sup>60</sup> Weiana Robe haukia 'arakiai hauna emikiri to'u wairakiai ekoroti Iesu ebakaina etibaha, "Oi emu 'abi ha aha'i 'abi neiakia tehina haukia ahakiai?" <sup>61</sup> 'A Iesu hanona 'abi ha a'i ehinana abomo ena 'abi a'i ebamuena.

Weiana Robe haukia 'arakiai hauna haeamona ebakai muena etibaha, "Oi Keriso, tibanamona Tiramana Nahuna, u?" <sup>62</sup> Iesu e'abi etibaha, "Au mo neia'u, ikoimia hanona au Maearima Nahuna



katoihana'u, hiabu 'ubi tohana Tiramana imana itipanai kamiati, kupa 'auhaonai kamai.”<sup>63</sup> Robe haukia 'arakiai hauna 'abi weiana 'uruna eona raninai aona ehaiara ki'a, kipona ena habuni etapana, eio etibaha, “'Abi tabana nahatabuna?<sup>64</sup> Tirama nia'i ki'ana 'abina aba tona, emi raona taba?” Weiana ikoikiai te'abi, ke'ari.

<sup>65</sup> Weiana baika tehore Iesu te'atotina, haeamona mahana te'apa abuna abomo teahuna, te'abi tetibaha, “Mo'abi, tai ehore eahunio?” 'Ima haukia abomo tebo'ana.

### *Petero Iesu Ebuniai aina.*

(Mt 26.69-75; Lk 22.56-62; Io 18.15-18, 25-27)

<sup>66</sup> Petero hanona ara aonai 'anoai, ba Robe haukia 'arakiai hauna ena ta'ara'i uahona ha emai. <sup>67</sup> Ia Petero iruba nirarana eihana raninai, eiha 'ini'inina ehina bena etibaha, “Oi abomumo Iesu Nasareta hauna o'abana.” <sup>68</sup> 'A Petero hanona ebuniai etibaha, “Taba robana nuahuna hauna hanona au a'i na'iobina.” Ba ekapare eao pa'abi 'akonai. <sup>69</sup> Ua'a uaho weiana haeamona eiha muena, ba baiaruru haukia ehina benakia etibaha, “'Abakia ha neiana.” <sup>70</sup> Ia haeamona ebuniai mue.

Rani a'i ehoma'a Petero kipokia tekoroiti haeamo haukia tehina bena tetibaha, “'Abi tohana, oi abomumo ia 'abakia ha. Pokina oi abomo Galilea haumu.” <sup>71</sup> Weiana Petero ia ehinabe pahihinakia etibaha, “Wai taba to'uahina hauna hanona au a'i na'iobina. Nabai'oi re'a Tirama puma mebena'u.” <sup>72</sup> Ba kokoro'u ibaruana e'arara. Weiana Petero Iesu ehinana 'abina eraona tinana, 'Kokoro'u ibaruana a'i ke'arara baha aonai, oi rani aihau kobuniai aina'u.’ Weiana ia ehai ki'a.

## 15

### *Iesu Pilato Wairanai.*

(Mt 27.1-2, 11-14; Lk 23.1-5; Io 18.28-38)

<sup>1</sup> Raurani wapuranai robe haukia apa'uakia, aiara haukia apa'uakia, rauhuhu poki haukia mai bakai apa'uana haukia ikoikiai 'abi tebahamomona, Iesu tebirina teaoaina Pilato tebena. <sup>2</sup> Pilato Iesu ebakaina etibaha, “Oi Iuda haukia ekia Obia 'arana haumu, 'u?” Iesu e'abi

etibaha, “Aba nu'abi mo naia.” <sup>3</sup> Robe haukia apa'uakia tehore 'abi bo'okia Iesu ahanai tehina. <sup>4</sup> Pilato haeamona Iesu ebakai muena etibaha, “Oi a'i ko'abi, 'u? Oi o'iobina 'abi haeai haeai oi ahamuai tehinanakia.” <sup>5</sup> 'A Iesu 'abi ha a'i ebamuena, weiana buonai Pilato ebaoao.

### *Pilato E'abi Iesu Kateahu 'Arina.*

(Mt 27.15-26; Lk 23.13-25; Io 18.39–19.16)

<sup>6</sup> Pilato ena hoahoa rani ikoinai tatu aokiai maearima wapura hauna ha tenuatae aina hauna hanona nibakarahina. <sup>7</sup> Rani weianai hau ha atana Baraba 'abana kipokia tewapura. Ia hanona Roma haukia te'oatanakia, 'au aonai maearima baika eahu 'arinakia. <sup>8</sup> Ba to'u haukia tehore Pilato tenoina rani ikoinai hoahoa weiana nibabaina hauna kebabaina. <sup>9</sup> Pilato ehore ebakainakia etibaha, “Tonuatae Iuda emi Obia 'arana hauna kabakarahina?” <sup>10</sup> Pokina Pilato aba e'iobina robe haukia apa'uakia hanona Iesu tiwamuru aina buonai tea'ina ia imanai teutana. <sup>11</sup> 'A robe haukia apa'uakia temikiri to'u haukia tekai ta'ata'anakia, kate'abi, Pilato Baraba kebakarahina ia Iesu hanona kemiaho. <sup>12</sup> Pilato haeamona to'u haukia ebakai muenakia etibaha, “'A wai tu'abi Iuda ekia Obia 'arana hauna hanona aea kahomana?” <sup>13</sup> Ikoikiai teio tetibaha, “'Matiu ibiri ropo 'ubinai koba'arina!” <sup>14</sup> Pilato ehore ebakai muenakia etibaha, “'Aea ehoma, ena beho taba?” 'A ia teio aota tetibaha, “'Matiu ibiri ropo 'ubinai koba'arina!” <sup>15</sup> Weiana Pilato hanona to'u haukia aokia ibanamona enuatae aina buonai Baraba erubuna. 'A Iesu hanona e'atina huari haukia ebenakia, matiu ibiri ropo ahanai kateahu 'arina.

### *Huari Haukia Iesu Tebapo'ona.*

(Mt 27.27-31; Io 19.2-3)

<sup>16</sup> Huari haukia Iesu tebaka'ana teaoaina rauhuhu ituna apa'uana aonai ekia hau ikoikiai tebararonakia. <sup>17</sup> Habuni birona tebabatoto aina, abomo 'ini boaboa tea'i kaiarona 'aranai tehore 'auna. <sup>18</sup> Ekia bapo'o po'o tea'i ramana tetibaha, “Iuda obia 'arana e, komauri.” <sup>19</sup> Moheai 'arana te'atina te'atotina, wairanai tekaipehu haeamona tekutiai bai'oina. <sup>20</sup> Tebapo'o nonoana murinai, habuni birona haunai tebakuri ahina, ena habuni tohana

tebabatoto muena tebakarahina matiu ibiri ropo 'ubinau kateahu 'arina teao.

*Iesu Matiu Ibiriropo 'Ubinai Tekoko 'Auna.*

*(Mt 27.32-44; Lk 23.26-43; Io 19.17-27)*

<sup>21</sup> Kurene hauna ha atana Simona 'uniai emai Ierusalemia niao, ia hanona Alesanda mai Rufo hamakia. Huari haukia Simona kipokia tebai tabu ahi aonai tebahi ahina Iesu ena matiu ibiri ropo kebuana.

<sup>22</sup> Iesu tebaka'ana teoaina 'eka ha atana Golgota, anina hanona 'Ara Huri-ana 'Ekana. <sup>23</sup> Ia tehore bine beina mabina mai haiara ibako'iko'ina mura-murana kipokia teu kibukibuna tebena keinu. Iesu hanona a'i einu. <sup>24</sup> Ba Iesu matiu ibiri ropo 'ubinau tekoko 'auna. Epuu murinau huari haukia ena habuni pu'iai tewaterakia ha ha katea'i.

<sup>25</sup> Raurani beraura ehiabu hiabu aonai (9 a.m.) Iesu matiu ibiri ropo 'ubinau tekoko 'auna. <sup>26</sup> Ia 'arana 'ubinau beho marerena na terere aihona.

*'IUDA HAKIA EKIA OBIA 'ARANA.'*

<sup>27</sup> Kakikaki haukia rua Iesu kipokia rani hamomonai matiu ibiri ropo 'ubikiai tekoko 'aunakia, ha itipanai ha awarinai.

<sup>28</sup> Puka Robena 'abina aba etohana etibaha, 'Aka ki'a haukia kipokia tetuabi haeamonakia.'

<sup>29</sup> Tekabanai haukia tehore 'abi ki'a obokia tehina herena, abomo 'arakia tekapokapo te'abi tetibaha, "Oi neiamu haumu Marea Robe korubuna haeamona wapu aihau kobakori muena. <sup>30</sup> Bariu naia matiu ibiri ropo 'ubinau moriri, kipomu mobamaurini'o." <sup>31</sup> Taeara ihobonai mo Robe haukia apa'uakia mai rauhuhu poki haukia Iesu te'abi papura aina tetibaha, "Maearima baika ebamaurinakia, ia kipona kebamaurina hanona a'i nitaina. <sup>32</sup> Keriso Isaraela ekia Obia 'arana, bariu weia matiu ibiri ropo 'ubinau meriri hamaihana ba kaha'ikakaumana." Iesu kipokia matiu ibiri ropo 'ubinau tekokonakia haukia terarua abomo 'abi ki'a obokia tehina herenai.

*Iesu Ena 'Ari.*

*(Mt 27.45-56; Lk 23.44-49; Io 19.28-30)*

<sup>33</sup> Atiaha tohanai hanopaka maikoinai ewapura abuna eao mo beraura ebaeno hoana aihau 'abana. <sup>34</sup> Beraura ebaeno

aonai Iesu eapari aota etibaha, "*Eloi Eloi, lama sabakatani.*" Anina hanona 'E'u Tirama e, E'u Tirama e, taba buonai ohabona'u.' <sup>35</sup> Herenai tekoroti haukia baika Iesu aiana teona, te'abi tetibaha, "Tomobahu, ia hanona Elia niaparina."

<sup>36</sup> Weiana hau ha ebeau eao poame ea'ina bine beina mabina aonai ehao uhuna, hiribo ai ekai to'ona ba etiu taeana Iesu ebena keinu ba e'abi etibaha, "Ham-abai'ima, hamaihana. Elia pa'e kemai kea'i obona." <sup>37</sup> 'A Iesu eio aota, ba e'ari.

<sup>38</sup> Rani weianai Marea Robe aonai i'aea huri habunina ibuanai etapa boana 'ubi ai eriri eao ba'a. <sup>39</sup> Huari poki hauna ha Iesu herena 'akinai ekoroti eihana ia eio aiana eona, ua e'ari aihou raninau e'abi etibaha, "Hau neiana hanona Tirama Nahuna tohana."

<sup>40</sup> Babi'e baika abomo ata'uai tekoroti tebaiaruru, baiatakiai hanona Maria Magadala babi'ena Iakobo ko'iko'i Iosepa ohi hinakia Maria mai Salome. <sup>41</sup> Babi'e neiakia hanona Galileai Iesu murinau teka'a tebaraina. Iesu kipokia Ierusalemia tekara'au haeamo babi'ekia bo'okia abomo weia.

*Iesu Tehorena.*

*(Mt 27.57-61; Lk 23.50-56; Io 19.38-42)*

<sup>42</sup> Wapu weiana hanona Aia'i harai ranina, kerani mara hanona Beraura Robe. Beraura aba kaihu niaoaina aonai, <sup>43</sup> Iosepa Arimatea hauna aona ebanua ko'ona eao Pilato wairanai Iesu huanina enoiaina. Ia hanona Iuda ekia obia hauna ha maearima abomo timariki aina, Tirama ena obia aiarana kemai ne'imana hauna ha. <sup>44</sup> Pilato Iesu e'ari noanoa poua eona raninau eta'u ta'u huri. Ia emikiri huari poki hauna eaparina Iesu ena 'ari ranina ebakai bakai aina. <sup>45</sup> Pilato Iesu ena 'ari 'uruna huari poki hauna herenai eona murinau, Iesu huanina e'uahina Iosepa kea'ina. <sup>46</sup> Iosepa ehore habuni namona tohana ha ekawana, Iesu huanina ea'i obona habuni weianai e'apana eaoaina 'ariahana pihara ikui aonai ehorotina, pihara rarina ha ebaherena ebahu abuna. <sup>47</sup> Maria Magadala babi'ena mai Iosepa hinana Maria terarua Iesu huanina tehrotina 'ekana teihana.

## 16

### *Iesu 'Ariai Emikiri Mue.*

*(Mt 28.1-8; Lk 24.1-12; Io 20.1-10)*

<sup>1</sup> Beraura Robe eore murinai Maria Magadala babi'ena Iakobo hinana Maria mai Salome tehoru timikia 'orimokia tekawa kateao Iesu hauanina kateutuna. <sup>2</sup> Hui beraurana raurani 'amari 'amarinai, beraura nitae aonai, babi'e weiakia taearai teka'a 'ariahana teao aonai, <sup>3</sup> kipokia te'abi'abi tetibaha, "Tai kebarainaka, 'ariahana pa'abi piharana ketori parena." <sup>4</sup> Mahakia eao 'ariahana pa'abina, pihara rarina 'akina aba itori pare teihana. <sup>5</sup> Ia 'ariahana aonai tekatoto hanona hau 'aru'aruna ha habuni porekia eba totonakia itipa tainai emiati teihana raninai teta'u ki'a.

<sup>6</sup> Hau weiana e'abi etibaha, "A'i to-mota'u. Wai Iesu Nasareta hauna tekoko 'auna hauna tutabuna. Ia hanona aba emikiri. Na'a aha'i. Tehorotina 'ekana tomoihana. <sup>7</sup> Tomoao i'abana haukia mai Petero katohina benakia, katotibaha, 'Katoao Galileai, Iesu aba ke'uai ua'a, katoihana e'abi ihobona!'"

<sup>8</sup> Ua buonai babi'e weiakia tekarahi 'ariahana tehabona mai nuataekia haeamona mai ta'ukia. Teta'u buonai tai ha haianai a'i te'abi.

### *Iesu Maria Magadala Herenai Mai Hau Rua Herekiai Ewaira Tina.*

*(Mt 28.9-10; Io 20.11-18)*

[<sup>9</sup> Hui beraurana raurani 'amarinai, Iesu 'ariai emikiri murinai, Maria Magadala babi'ena herenai ewaira tina 'uai, ia hanona 'uainai Iesu auba ki'a obokia 'abaihau hamomo aonai eu'u ahinakia babi'ena. <sup>10</sup> Maria Magadala babi'ena eao Iesu te'abana haukia tiaoko'o tihaihai herekiai Iesu pouna ehinana. <sup>11</sup> Maria herenai pou teona Iesu aba emauri, haeamona eihana na ehoma hanona ena 'abi a'i tea'i taeana.

<sup>12</sup> Muriai Iesu ihana ebahaeaina hau rua taearai teka'a 'uni tiao aonai, herekiai ewaira tina. <sup>13</sup> Ba terarua temue teao 'abakia haiakiai te'abi. Ia abokiamo a'i tebatohanakia.

### *Iesu Harau Haea Hamomo Herekiai Ewaira Tina.*

*(Mt 28.16-20; Lk 24.36-49; Io 20.19-23; Ih 1.6-8)*

<sup>14</sup> Weiana murinai haukia harau haea hamomo tianiani aonai, Iesu ewaira tina herekiai. Ekia a'ikakauma aha'i haeamona ekia ao pahih paunai ebatanakia. Pokina emikiri murinai teihana haukia aiakia a'i tebatohana. <sup>15</sup> Ba ia ehina benakia etibaha, "Katoao hanopaka ikoinai Pou Namona maearima ikoikiai herekiai katoiroro aina. <sup>16</sup> Kea'ikakaumana mai 'uere robe kea'ina hauna hanona mauri kea'ina, 'a a'i kea'ikakaumana hauna hanona puma kehoaina. <sup>17</sup> A'ikakauma haukia hanona bata'uta'u huri akakia nahomakia katebabai. Au ata'uai auba ki'a obokia kateu'u u'u ahinakia, haeamona maea haeai haeai kate'abi, <sup>18</sup> imakiai 'erau katea'inakia, muramura ki'a obokia kateinu ia herekiai taba ha a'i kerama, haeamona imakia inawa haukia ahakiai katehao'au hanona ekia inawa katenamo."

### *Iesu Ea'i Taeana Kupa Eao.*

*(Lk 24.50-53; Ih 1.9-11)*

<sup>19</sup> Obiapaka Iesu ia ehina benakia murinai, ekara'au eao kupa, Tirama itipana tainai emiati. <sup>20</sup> I'abana haukia ikoikiai weia tekarahi 'eka ikoikiai aokiai teiroro. Obiapaka etai turinakia buonai hoa haeai haeai tebabai, aka weianai ekia iroro ebatohanakia.]\*

\* **16:20:** (9-20) Puka baika hanona 'abi neiana a'i terere 'apuana.

## Pou Namona LUKA Ererena Hauna

### *Puka Aona Irerena 'Abina*

Pou namona neiana Luka ererena aonai ebaihanaka Iesu hanona hau weiana aba e'abi'uai aina kemai Isaraela haukia mai hanopaka maearimikia ikoikiai kebamaurinakia hauna. Luka hanona Iesu ena aka kea'i ramana raninai, Auba Robe ia ebaonu, weiana ia keao uraru haukia herekiai Pou Namona kehinana (4.18), haeamona maearima mai ekia puma aea ebarai aihonakia hauna robana eahu haraina. Taba weiakia Iesu ebabainakia hanona maearima neiakia ebaonamo ki'a bahanakia ba ia teonamoai ki'a bahana. Maria ia ebaramana raninai maearima teonamo (1.42-48; 2.10), haeamona puka a'enai Iesu auhao aokiai ekara'au raninai ekia aonamo eapa'ua ki'a baha (24.52).

Puka neiana iro'ana rua aokiai (1—2 mai 9—19) taba baika hanona Luka mo ikupaiana ehina, matoha Aneru mai mamoe iha'ini haukia orina, Iesu miori papanai marea robe aonai, 'abi ibabataikia weiakia Samaria hauna namona mai Miori ha hamana ehabona hauna. Taba baika hanona Luka ehina taburanakia, rani ikoinai kahabahuba'ari tabura taearana, Auba Robe ena aka, mai Tirama ena namoai maearima ikoikiai ekia ki'a ehina hao. Luka ehore babi'e tebabainakia tabakia bo'okia ehinanakia.

Luka ena irere hanona neiamo a'i epua, ia ehore puka weiana 'Iuhubeau haukia ekia aka' abomo ererena weiana hanona Iesu ekara'au kupa eao murinai taba tebabai haukia robakia eahunakia.

### *Puka Paipana Apa'uakia*

- a. Roba ahu. (1.1-4)
- b. Ioane mai Iesu ohi ekia rama mai miorikiai aonai. (1.5—2.52)
- c. Ioane ba'uere robe hauna ena aka. (3.1-20)
- d. Iesu ena 'uere robe mai baihobo. (3.21—4.13)
- e. Iesu ena aka maearima herekiai Galilea aonai. (4.14—9.50)
- f. Galileai eamo Ierusalem. (9.51—19.27)
- g. Hui orena Ierusalem aonai mai herenai. (19.28—23.56)

- h. Obiapaka ena mikiri mue, ena wairatina, mai ena kara'au kupa. (24.1-53)

*Luka Marere Ererena Eao Teofilo herenai.*

<sup>1</sup> Obia haumu Teofilo e. Maearima bo'ona baiatamai ai taba tohakia terama haukia aba tererenakia, <sup>2</sup> bahabanai mahakiai aka neiana teihana mai teiroro aina haukia tehina benamai ihobona. <sup>3</sup> Au abo'umo popouna 'akinai ea'i ramana 'abikia ikoinai atabu harainakia. Ba naraonana enamo buonai au marere ha karerena oi 'eumu. <sup>4</sup> Weiana ko'iobi haraina taba teba'ibini'o 'abikia hanona tohakia.

*Aneru Sakaria Ehinabena Nahuna Ioane Kerama.*

<sup>5</sup> Heroda Iuda eobia aina raninai robe hauna ha weia atana Sakaria, Abia ena itubu hauna, atawana Elisabeta hanona Arona ena rama babi'ena. <sup>6</sup> Terarua hanona aka bero maearimikia Tirama wairanai, Obiapaka ena rauhuhu mai bairobe te'ima harainakia, ki'a ha a'i tebabaina. <sup>7</sup> Iamo terarua hanona nahukia aha'i pokina Elisabeta hanona 'one'one haeamona terarua aba teanepaka.

<sup>8</sup> Sakaria ena itubu haukia ekia aka raninai, ia ehore robe akakia ebabai Tirama wairanai. <sup>9</sup> Robe haukia ekia hoahoa tainai, pu'iai ia tea'i taeana 'eka robena ketoto muramura timina 'orimona kekinena. <sup>10</sup> Ikinena ranina etaina, bahuba'ari haukia ikoikiai atapakai teto'una tibahuba'ari. <sup>11</sup> Obiapaka ena aneru ha herenai ewaira tina muramura timina 'orimona ikinena itarana abihanai itipana tainai ekoroti. <sup>12</sup> Sakaria aneru eihana raninai nuana etae abomo eta'u ki'a baha. <sup>13</sup> Iamo aneru ia ehina bena etibaha, "Sakaria e, a'i kota'u. Emu bahuba'ari 'uruna Tirama aba eona, oi atawamu Elisabeta hanona nahumu hau ha kebaramana, atana koaparina Ioane. <sup>14</sup> Aomu hanona kenamo, mai koaonamo ki'a baha, mako abomo ena ramai kateonamo. <sup>15</sup> Pokina Obiapaka wairanai ia hanona keapa'ua, bine 'ao muramura kirokia a'i keinu, abomo hinana nuana a'i kerama baha aonai Auba Robeai kebonu. <sup>16</sup> Ia kehore Isaraela maearimikia bo'ona 'akina kebaraona



kabenakia Obiapaka ekia Tirama herena kateao. <sup>17</sup> Ke'uai Obiapaka wairanai Elia ena aka mai ena hiabu ihobona, hama mai nahu aokia keba hamomonakia, mai aia o'o aha'i haukia bero haukia ekia aotipa taaranai kebaka'anakia, maearima keba'orunakia Obiapaka 'euna."

<sup>18</sup> Sakaria aneru ebakaina etibaha, "Neiana hanona aea ka'iohi harai aihona? Au hanona aba anepaka mai atawa'u abomo eanepaka."

<sup>19</sup> Aneru ena 'abi ebamuena etibaha, "Au hanona Gabriel, Tirama wairanai nakoroti, euhuna'u pou namona neiana amaiaina heremu kaba'iohini'o. <sup>20</sup> Bariu oi hanona maeamu keki'a a'i ko'abi'abi keaomo taba neiakia ekia rama ranina ketaina. Pokina e'u 'abi rani weianai ketohana hauna a'i obatohana paunai."

<sup>21</sup> Maearima hanona Sakaria te'ima 'arina abonamo aokia earo'ari pokina marea robe aonai rani homa'ana emiaho. <sup>22</sup> Ia ekarahi raninai 'abi kehinana hanona a'i etaina. Weiana te'iohina ia hanona marea robe aonai taba ha eihana. Hoahoa mo ebabai maeana eki'a a'i e'abi'abi. <sup>23</sup> Ena aka beraurana ebaorena hanona emue ena itu eao. <sup>24</sup> Murinai ia atawana Elisabeta epuma, nawa ima itu aonai mo emiaho. <sup>25</sup> E'abi etibaha, "Neiana hanona Obiapaka ena nuatae hoana here'uai, maearima baiatakiai e'u haumaea kea'i parena."

#### *Aneru Maria Ehinabena Iesu Kebaramana.*

<sup>26</sup> Elisabeta nawana 'abaihau aonai Tirama ehore aneru ha atana Gabriel euhuna Galilea aonai aiara ha atana Nasareta eao. <sup>27</sup> Uaho rari ha weia te'abi aina hau ha atana Iosepa keatawana Davida ena rama hauna, uaho weiana atana hanona Maria. <sup>28</sup> Aneru eao herena ehina bena etibaha, "Moaonamo. Oi hanona enuataeai apa'uani'o. Obiapaka hanona oi heremuai." <sup>29</sup> 'Abi weiana Maria aona ebaro'arina, mai eraonaraona banamo weiana anina hanona taba. <sup>30</sup> Ia aneru e'abi etibaha, "Maria e, a'i mota'u, Tirama ena nuatae aba oa'ina. <sup>31</sup> Oi hanona kopuma, miori ha kobaramana, atana koaparina Iesu. <sup>32</sup> Ia hanona ketarahi mai kateaparina 'Ubi toha tohana Hauna Nahuna, Tirama Obiapaka kehore 'aba'abana Davida ena obia kebena. <sup>33</sup> Mai

Iakobo ena itubu keobia aina keaomo banai banai, ena obia hanona a'i kepua."

<sup>34</sup> Maria aneru ebakaina etibaha, "Au hau ha a'i a'iohina. Neiana hanona aea kerama aiho?"

<sup>35</sup> Aneru ehina bena etibaha, "Auba Robe keriri oi ahamuai, 'Ubi toha tohana Hauna ena hiabuai kebahu abuni'o, Robe Hauna kerama atana kateaparina Tirama Nahuna.

<sup>36</sup> Oi hatia'amu Elisabeta te'abi ia hanona 'one'one, ia ena anepakai miori ha ea'ina, bariu nawana aba 'abaihau. <sup>37</sup> Tirama herenai hanona taba ha a'i epahihi."

<sup>38</sup> Maria e'abi etibaha, "Au hanona Obiapaka ena ta'ara'i babi'e'u. Emu 'abi ihobona here'uai merama." Ba aneru Maria ehabona.

#### *Maria Eao Elisabeta Herena.*

<sup>39</sup> Rani weianai Maria ea'i a'i harai mai enoanoa eao oeo aiarana ha Iudea puro'onai. <sup>40</sup> Sakaria ena ituai etoto Elisabeta ebanamona. <sup>41</sup> Elisabeta Maria ena banamo 'uruna eona raninai nuana aonai miori eibiuibiu mai Auba Robe Elisabeta aona ebaonuna. <sup>42</sup> Weiana e'abi aota, "Babi'e ikoikiai baiatakiai oi hanona onamo ki'a baha, miori kobaramana hauna abomo enamo. <sup>43</sup> E'u namo hanona taba e'u Obiapaka hinana here'u emai! <sup>44</sup> Berona 'akinai emu banamo 'uruna aona raninai miori nua'u aonai mai aonamona eibiu ibiu. <sup>45</sup> A'ikakauma babi'emue e, aba onamo pokina Obiapaka ena 'abi ehina heremuai haukia katemai katetoha."

#### *Maria Ena Aonamo Huina.*

<sup>46</sup> Maria e'abi etibaha, "Au ao'u Obiapaka nibanamona. <sup>47</sup> Mai auba'u abomo e'u bamauri Tiramana niaonamo aina, <sup>48</sup> pokina ena uraru mai ta'ara'i babi'e'u eraona tinana'u paunai. Bariu rani neianai keao uru ikoikiai namo'u katehinana, <sup>49</sup> pokina hiabu Tiramana taba rarikia 'eu'uai ebabainakia. Ia atana hanona erobe, <sup>50</sup> uru ha keao uru ha ena aoko'o hanona nibawaira tinana weiakia timariki aina haukia herekia. <sup>51</sup> Ia imanai ena tabura ebakarantina, apa haukia ekia raona

ekipu otarainakia.

<sup>52</sup> Ia ehore obia haukia taburakia ekia obia 'ekakiai ebaririnakia, mai uraru haukia ebakara'aunakia.

<sup>53</sup> Mare'a ti'ari haukia taba namokiai ebonu 'aunakia, ia kepu haukia euhunakia imakia 'abaeakia temue.

<sup>54</sup> Ena 'abi'uai eraona tinana ena ta'ara'i itubuna Isaraela haukia ebarainakia.

<sup>55</sup> 'Aba'abaka herekiai ehinana hauna ena aoko'o ebawaira tinana Aberahamo mai kupuna 'aba'abana herekiai keaomo banai banai.”

<sup>56</sup> Maria Elisabeta ohi temiaho nawa aihau 'abana ba emue eao ena aiara.

### *Elisabeta Nahuna Ioane Ebaramana.*

<sup>57</sup> Elisabeta ena mauri ranina etaina hanona nahuna hau ebaramana.

<sup>58</sup> Herenai temiaho haukia mai hatia'ana pou teona, Obiapaka ena aoko'o rarina 'akina herenai ebawaira tinana hanona kipokia teonamo haeamo.

<sup>59</sup> Wapu iba'ababanina emai hanona ikoikiai temai miori itarena to'una, haeamona hamana Sakaria atana kateaparina. <sup>60</sup> Ia hinana etae etibaha, “Aha'i, ia atana kahaparina Ioane.” <sup>61</sup> Ikoikiai tehina bena tetibaha, “Hatia'amu ha atana uahomana aha'i.” <sup>62</sup> Weiana mahakia tebairu hamana herenai miori ata tabana keaparina. <sup>63</sup> Weiana ia rererere piharana ebakai bakai aina, weia ahanai na erere aihona, “Atana hanona Ioane,” raninai ikoikiai teta'uta'u huri. <sup>64</sup> Mawa'eai pinana ekaikauna, maean a ebero e'abi'abi mue, Tirama ebanamona. <sup>65</sup> Herekiai temiaho haukia ikoikiai teta'u ki'a, mai Iudea oeo aiarakia maikoinai pou neiana tehina otaraina. <sup>66</sup> Pou teona haukia aokiai teraona 'ini'inina tetibaha, “Miori neiana aea homanai keao.” pokina Tirama imana hanona ia ahanai.

### *Sakaria Ena Mahabanai 'Abina.*

<sup>67</sup> Miori hamana Sakaria aona Auba Robe ebonuna, ba Tirama ena 'abi ehinana etibaha,

<sup>68</sup> “Obiapaka Isaraela ekia Tirama kahabanamona, pokina emai ena maearima aba ekawa muenaka.

\* **1:69:** (69) 'ao *Bamauri Pihina*.

<sup>69</sup> Bamauri Pokina\* ebamikirina aika 'euka ena ta'ara'i hauna Davida ena itubuui.

<sup>70</sup> Aba wa'i baha raninai ena 'abi mahabanai robekia pinakiai tehinana 'abana.

<sup>71</sup> Eka 'ou haukia mai 'arika a'i ti'ari haukia ikoikiai imakiai kebamaurinaka.

<sup>72</sup> Kupuka eaoko'o ainakia mai ena 'abi'uai robena eraona 'inina.

<sup>73</sup> Kupuka Aberahamo herenai ena 'abi'uai ehinana:

<sup>74</sup> Eka 'ou haukia imakiai kebamaurinaka,

a'i kahata'u ena aka kahababaina

<sup>75</sup> robeai mai beroai ia wairanai eka miaho ranikia ikoikiai.

<sup>76</sup> “Haeamona naha'u e, oi hanona kateaparini'o

'ubi toha tohanai hauna ena mahabanai haumu.

Pokina oi ko'uai

Obiapaka wairanai ena taeara koa'ia'i haraina,

<sup>77</sup> ena maearima bamauri aoberona koba'iobinakia

ekia ki'a ihina haonai keao.

<sup>78</sup> Aika eka Tirama ena aoko'o paunai.

Beraura nitae eana kupai

keriri kemai hereka,

<sup>79</sup> 'ari aiainai mai wapurai temiaho

haukia ahakiai kerara, weiana

aeka kebaka'anakia baibua

taearanai kebaka totonakia.”

<sup>80</sup> Miori hauaniai eapa'ua mai aubai etabura. Ia hano'akunai emiaho eaomo ekarahi Isaraela mako herekiai.

## 2

### *Iesu Erama.* (Mt 1.18-25)

<sup>1</sup> Rani weiana aonai Augusto obia 'arana rauhuhu 'abina ha euhuna eao Roma ena iha'ini hanopakana maikoinai ata katerere.

<sup>2</sup> Neiana hanona ata rere kori'uaina Kurene Suria hanopakana eiha 'inina raninai. <sup>3</sup> Weiana maearima ikoikiai atakia katebaibeni paunai temue

ikau ena aiara teao. <sup>4</sup> Iosepa abomo Nasareta Galilea hanonai emikiri eao Davida ena Aiara Betelehemu Iudea ai, pokina ia hanona Davida ena itubu mai

ena rama hauna. <sup>5</sup> Atakia katebaibeni paunai ia te'abi aina babi'ena Maria ohi teao, Maria hanona mai nuana. <sup>6</sup> Terarua weia temiaho aonai kemaui ranina etaina. <sup>7</sup> Weiana emauri nuahobo miorina hau ebaramana, habunia tebaro'a abuna poromakau ekia aniani ahiahinai tebaeno utana, pokina 'ima'ima itunai 'eka aha'i.

*Aneru Mamoe 'Ima Haukia Tehina benakia.*

<sup>8</sup> Hano weiana hamona aonai mamoe 'ima haukia baika tubuai rabi aonai ekia mamoe te'imanakia. <sup>9</sup> Obiapaka ena aneru ha herekiai ewaira tina, Obiapaka nuabinai ebaea obonakia raninai teta'u wairai. <sup>10</sup> Aneru ia ehina benakia etibaha, "A'i tomota'u. Au pou namona amaiaina weiana maearima ikoikiai aokia kebaon-amonakia. <sup>11</sup> Bari rani neianai Davida ena aiara emi Bamauri hauna ha erama, ia hanona Keriso\* Obiapaka. <sup>12</sup> Hoana hanona nahomana, miori 'oru'oruna ha katotabu ahina, habunia tero'a abuna poromakau ekia aniani ahiahinai tebaeno utana."

<sup>13</sup> Mawa'eai kupai aneru to'una tewaira tina aneru weiana herenai, Tirama tebanamona tetibaha,

<sup>14</sup> "Kupa 'ubi toha tohanai nuabi hanona Tirama 'euna, hanopakai ena baibua hanona niaonamo ainakia haukia herekiai."

*Mamoe 'Ima Haukia Teao Miori Kateihana.*

<sup>15</sup> Aneru to'una ia herekiai tekaobo temue kupa raninai mamoe 'ima haukia kipokia te'abi'abi tetibaha, "Aika hamaeao Betelehema, Obiapaka eba'iobinaka taba weiana erama hauna kahaihana." <sup>16</sup> Tenoanoa teao Maria Iosepa mai miori 'oru'oruna poromakau ekia aniani ahiahinai enouta tetabu ahinakia. <sup>17</sup> Weiana teihana raninai aneru miori robana eahuna 'abina maearima teba 'iobinakia, <sup>18</sup> mamoe 'ima haukia pou weiana tehinana raninai aia teona haukia ikoikia teta'u ta'u huri. <sup>19</sup> Maria hanona 'abi weiakia ikoikiai aonai eraona 'ininakia mai eraona raona ainakia. <sup>20</sup> Mamoe 'ima haukia temue Tirama tekuti aina mai teapaina pokina taba weiakia 'urukia teo'o mai teiha haukia

ikoikiai ia ehina benakia ihobona tohanai terama.

*Miori Atana Iesu Teaparina.*

<sup>21</sup> Wapu iba'ababaninai ena itare ranina etaina hanona atana teaparina Iesu, aneru ata ebena hinana nuanai a'i erama baha aonai.

*Simeona Mai Ana Marea Robe Aonai Iesu Tera'una.*

<sup>22</sup> Mose ena rauhuhu ihobona ena kopa kopa ahu ranina eore murinai miori teaoaina Ierusalem Obiapaka wairanai katebawaira tinana. <sup>23</sup> Obiapaka ena rauhuhu tererena ihobona, "Hobohobo miorikia hau ikoikiai hanona katebaibeni Obiapaka 'euna." <sup>24</sup> Obiapaka ena rauhuhu e'abi ihobona barobe tabakia katebaibeni mumu rua 'ao rauria nahu rua.

<sup>25</sup> Weia Ierusalem hau ha atana Simeona ia hanona bero hauna haeamona Tirama nimariki aina. Isaraela ena bamauri hauna ne'imana, aona Auba Robe ebonu. <sup>26</sup> Auba Robe ia ehina bena ia a'i ke'ari keaomo Obiapaka ena Keriso keiha 'uaina. <sup>27</sup> Auba Robe ia ebakatonona Marea Robe aonai. Maria Iosepa ohi Iesu teaoaina Marea rauhuhu ena hoahoa katebabaina paunai. <sup>28</sup> Simeona imanai miori era'una Tirama ebanamona etibaha,

<sup>29</sup> "Obiapaka e, emu 'abi'uai ihobona emu ta'ara'i hauna bari mai baibuana aba nuhabona.

<sup>30</sup> Pokina maha'u ai emu Bamauri Pokina aba aihana,

<sup>31</sup> weiana oi aba oba'oruna maearima ikoikiai wairakiai.

<sup>32</sup> Eana neiana hanona rama haeai haukia ibaeakia abomo oi emu maearima Isaraela ibanubakia."

<sup>33</sup> Miori hamana hinana 'abi weiakia teo'o hanona teta'u ta'u huri. <sup>34</sup> Simeona ehore terarua eba namonakia haeamona hinana Maria ehina bena etibaha, "Miori neiana hanona e'oru Isaraela haukia bo'ona iba'ehokiai mai ibamikirikiai keao, abomo ena hoahoi kate'oatana, <sup>35</sup> maearima bo'ona ekia raona bunikia kabakarahinakia. Mai kareba itatona 'abana kehore oi aomu abomo kebahi-iarana."

<sup>36</sup> Weia hanona mahabanai babi'ena ha atana Ana, Panuela nahuna ena

\* 2:11: (11) 'ao Mesia.

itubu hanona Asere, aba eanepaka, ena hawainibe ihauna 'abaihou hamomo atawana ohi temiaho,<sup>37</sup> ba ewapu emiaho bariu ihauna imabui harau aihau bani (84). Ia marea robe a'i ehabo 'apuana Tirama ekuti aina rabi mai mararani eanrobe mai ebahuba'ari.<sup>38</sup> Rani weiana hamona aonai Ana emai marea aonai Tirama ebanamona ba maearima ikoikia Ieruselema kebamaurina hauna te'imana haukia herekiaia miori poua ehinana.

### *Iesu Nasaretai Eapa'ua.*

<sup>39</sup> Iosepa mai Maria ohi Obiapaka ena rauhuhu e'abi ihobonai aka ikoikia tebaorenakia raninai temue Galilea ekia aiara tohana Nasareta teao.<sup>40</sup> Miori eapa'ua mai etabura; aoberoai ebonu, Tirama ena baraibarai ia ahanai emiaho.

### *Miori Iesu Marea Robe Aonai.*

<sup>41</sup> Ihau ikoinai hamana mai hinana Ieruselema teao kabanai tatuna paunai.<sup>42</sup> Iesu ihauna harau haea rua raninai, teaihou teao Ieruselema ekia tatu hoahoana taina.<sup>43</sup> Tatu eore murinai hamana mai hinana temue 'a miori Iesu hanona Ieruselemai emiaho, hamana mai hinana a'i te'iohina.<sup>44</sup> Teraonana ia hanona baiatakiaia, wapu hamona teka'aina murinai tetabu ramana 'abana mai hatia'a herekiaia.<sup>45</sup> A'i tetabu ahina paunai temue teao Ieruselemai weia katetabuna.<sup>46</sup> Wapu aihau teao murinai marea robe aonai tetabu ahina bamarere haukia baiatakiaia emiati aia ebahuai mai ebakainakia.<sup>47</sup> Ena 'iobi mai 'abi bamueai aiana teona haukia ikoikia teta'u ta'u huri.<sup>48</sup> Hamana mai hinana teihana raninai teta'u ta'u huri. Weiana hinana ia ehina bena etibaha, "Naha'u e, taba buonai nahomana heremaiaia obabaina? Au hamamu ohi aomai maihaina tatabu 'arini'o."<sup>49</sup> Iesu ehina benakia etibaha, "Taba buonai wai au tutabuna'u? A'i to'iohina au hanona hama'u ena itu aonai namiaho, u?"<sup>50</sup> 'A ia ena 'abi ehinana hauna obona a'i teobo.

<sup>51</sup> Eriri kipokia teao Nasareta, weia aiakia eka'ai haraina, 'a hinana hanona taba weiakia terama ikoikia aonai eraona 'ininakia.<sup>52</sup> Iesu eapa'ua hauaniai mai aoberoai, abomo Tirama mai maearima ia tenuatae aina.

## 3

### *Ioane Ba'uere Robe Hauna Eiroro.* (Mt 3.1-12; Mk 1.1-8; Io 1.19-28)

<sup>1</sup> Tiberio obia 'arana Roma hanopakana eobia aina ihauna harauhaea ima aonai Pontio Pilato hanona Iudea ekia Kabana. Heroda hanona Galilea eobia aina, abomo hatina Pilipo hanona Iturea mai Trakonito eobia ainakia, Lusania hanona Abilene aiarakia eobia ainakia.<sup>2</sup> Robe haukia arakiaia haukia Ana mai Kaiafa ekia raniai, Tirama ena 'abi emai Sakaria nahuna Ioane herena hano'akunai.<sup>3</sup> Ioane eao Ioridana ate haiana hanokia ikoikia aokia raona kabe 'uere robeno eiroro aina ekia ki'a ihina hao paunai.<sup>4</sup> Isaia mahabanai hauna ena pukai ererena 'abana:

"Aia ha hano'akunai neio netibaha, 'Obiapaka ena taeara tomoa'i a'i haraina, ena ka'a 'ekana tomobaberona.

<sup>5</sup> Tataira ikoikia katepupu abunakia, kobio mai oeo ikoikia katebaririnakia. Taeara tebeho haukia katebero, mai tehiroa hiroa haukia kateta'eta'e.

<sup>6</sup> Weiana maearima ikoikia Tirama ena bamauri kateihana.' "

Isa 40.3-5

<sup>7</sup> Mako tekarahi temai Ioane herena keba'uere robenakia, eiroro benakia etibaha, "'Erau nahukia e, tai ehina benimi opuere nimai hauna herenai katobeau pare? <sup>8</sup> Raona kabe aonai katomiaho buabuami katerama, ia a'i kato'abi 'Aberahamo hanona aika 'aba'abaka.' A'i katoraonana aba katonamo. Pokina au wai nahina benimi, Tirama mai ena hiabu pihara neiakiaia Aberahamo nahuna kebaramanakia.<sup>9</sup> Wapira hanona aba e'oru matiu pokinai, matiu ikoikia buabuakia namokia a'i tibaramanakia haukia hanona kate'uinakia, irubai katekapo 'aunakia."

<sup>10</sup> Ba to'u haukia ia tebakaina tetibaha, "Ba ai taba katababaina?" <sup>11</sup> Ioane e'abi etibaha, "Mai ena ibatoto rua hauna 'abana weiana herena aha'i hauna ha kebena, mai ena aniani hauna abomo ua kebabai aho."<sup>12</sup> Moni bararo haukia abomo temai keba'uere robenakia tebakai bakai tetibaha, "Ba'iohi haumu e, ai taba



katababaina?” <sup>13</sup> Ioane ehina benakia etibaha, “Moni koa'ina raninai ihobonai mo koa'ina, a'i koa'i banaina.” <sup>14</sup> Huari haukia baika abomo tebakai bakai tetibaha, “Ai hanona taba katababaina?” Ioane ehina benakia etibaha, “Aiahuai 'ao 'abi bai'oikia maearima a'i kato'oinakia ekia moni a'i katoa'i. Aomi namonai arami tohana mo katoa'ina.”

<sup>15</sup> Maearima hanona tebai'ima paunai aokia teraona raona Ioane hanona pa'e Keriso. <sup>16</sup> Ioane ikoikia ehina benakia etibaha, “Au hanona beiai wai naba'uere robenimi, 'a muri'uai nimai hauna ena hiabu au eu'u etara haona, ena tamaka warokia karubunakia abomo here'uai a'i etaina. Ia hanona Auba Robe mai iruba ai keba'uere robenimi. <sup>17</sup> Ena ikomo matiuna hanona imanai, witi ahu 'iti'iti 'ekana kea'ia'i haraina, weiana witi uhokia kebararonakia paraboi kero'anakia, 'a hamarakia hanona a'i ni'ao 'apua irubanai kehuhunakia.”

<sup>18</sup> Ioane bairobe 'abikia bo'okia maearima ehina benakia mai pou namona eiroro aina herekiaia.

### *Heroda Ioane Wapura Itunai Eka-iabuna.*

<sup>19</sup> Ioane ehore Heroda obia apa'uana erikena, pokina ia hatina atawana Herodia eatawana mai aka ki'a obokia bo'okia ebabai paunai. <sup>20</sup> Heroda ena ki'a weiakia ikoikia ahakia ki'a mo ha ebabai muena, Ioane wapura 'ekanai ekaiabuna.

### *Ioane Iesu Eba'uere Robena.* (Mt 3.13-17; Mk 1.9-11)

<sup>21</sup> Maearima ikoikia eba'uere robenakia raninai, Iesu abomo eba'uere robenakia. Iesu ena bahuba'ari aonai kupa ekaikau. <sup>22</sup> Weiana Auba Robe rauria huanina ihobonai eriri ia ahanai. Aia ha kupai emai e'abi etibaha, “Oi hanona Au Naha'u. E'u Raona'au, naonamo aini'o.”

### *Iesu Ena Rama Kuputorina.* (Mt 1.1-17)

<sup>23</sup> Iesu ihauna harau aihau hanona ena aka ea'i ramana. Maearima teraonana ia hanona Iosepa nahuna.

Iosepa hamana hanona Heli,

<sup>24</sup> hamana Matata, hamana Lebi, hamana Meleki, hamana Ianai, hamana Iosepa,

<sup>25</sup> hamana Matatia, hamana Amosa,

hamana Nauma, hamana Eseli, hamana Nagai,

<sup>26</sup> hamana Mata, hamana Matatia, hamana Semeina, hamana Ioseka, hamana Ioda,

<sup>27</sup> hamana Ioanana, hamana Resa, hamana Sorobabela, hamana Salatiele, hamana Neri,

<sup>28</sup> hamana Meleki, hamana Adi, hamana Kosama, hamana Elamadama, hamana Ere,

<sup>29</sup> hamana Iosua, hamana Eliesere, hamana Iorima, hamana Matata, hamana Lebi,

<sup>30</sup> hamana Simeona, hamana Iuda, hamana Iosepa, hamana Ionama, hamana Eliakima,

<sup>31</sup> hamana Melea, hamana Mena, hamana Matata, hamana Natana, hamana Davida,

<sup>32</sup> hamana Iese, hamana Obeda, hamana Boa, hamana Salamone, hamana Nasona,

<sup>33</sup> hamana Aminadab, hamana Admina, hamana Areni, hamana Hesarona, hamana Pare, hamana Iuda,

<sup>34</sup> hamana Iakobo, hamana Isako, hamana Aberahamo, hamana Tera, hamana Nahoro,

<sup>35</sup> hamana Seruka, hamana Reu, hamana Peleka, hamana Ebere, hamana Sala,

<sup>36</sup> hamana Kainana, hamana Apasada, hamana Sema, hamana Noa, hamana Lameka,

<sup>37</sup> hamana Metusala, hamana Enoka, hamana Iareta, hamana Mahalale, hamana Kainana,

<sup>38</sup> hamana Eno, hamana Seta, hamana Adamu, hamana Tirama.

## 4

### *Satani Iesu Ehobona.* (Mt 4.1-11; Mk 1.12, 13)

<sup>1</sup> Iesu Ioridana atenai emue emai aona Auba Robe ai ebonu weiana Auba ehore ebaka'ana hano'akuna eaoaina, <sup>2</sup> wapu bariabui weia tiaporo ehore ehobona.

Rani weiakia aniani ha a'i eani 'apuana, puanai ia mare'a e'ari. <sup>3</sup> Tiaporo ehore ia ehina bena etibaha, “Peoi Tirama Nahuna raninai pihara neiakia pohina benakia pohamai pateao.” <sup>4</sup> Iesu ia ehina

benā etibaha, “Aba tererena, ‘maearima hanona pohamai mo a’i kemaui.’ ”

<sup>5</sup> Tiaporo ehore Iesu ebakara'auna eao hano oonai rani papana hanopaka aiarakia ikoikiāi ebaihana. <sup>6</sup> Tiaporo ia ehina benā etibaha, “Au kahore hiabu mai nuabi neiakia maikoinai kabeni'o, pokina ikoikiāi au ima'u ai eutana, haeamona tai nanuatae aina hauna kabena. <sup>7</sup> Weiana oi au kokuti aina'u hanona ikoinai 'eumu.” <sup>8</sup> Iesu ena 'abi ebamuena etibaha, “Aba tererena, ‘Obiapaka oi emu Tirama kokuti aina, iamo kipona ta'arana koa'i.’ ”

<sup>9</sup> Haeamona ebaka'ana eaoaina Ierusalemā marea robe kaipanai ebakori 'auna, ehina benā etibaha, “Poi Tirama Nahuna hanona neia kipomu morobo ahi.

<sup>10</sup> Pokina aba tererena, 'ia ena aneru kehina benakia kate'imani'o.

<sup>11</sup> Abomo ia imakia kate'a'i taeani'o, aemu piharai a'i mokaina ta'una.’ ”

Sal 91.11, 12

<sup>12</sup> Iesu ia ehina benā etibaha, “Aba tererena, ‘Obiapaka emu Tirama baihobo 'ekanai a'i kohorotina.’ ”

<sup>13</sup> Tiaporo ena baihobo ikoinai ebaorenakia hanona ia herenai ekapare keaomo rani namona ha kemai.

*Iesu Ena Aka Ea'iramana Galileai.*  
(Mt 4.12-17; Mk 1.14, 15)

<sup>14</sup> Iesu Auba Robe ena hiabuāi emue eao Galilea weia pouna tehina otaraina hano weiana aiarakia ikoikiāi aokia. <sup>15</sup> Iuda haukia ekia marea aokia eba'io binakia, ikoikiāi tebanamona.

*Nasareta Haukia Iesu Tebaki'ana.*  
(Mt 13.53-58; Mk 6.1-6)

<sup>16</sup> Iesu ena apa'ua aiarana Nasareta eao, ena hoa hoa taina Beraura Robenai Iuda haukia ekia marea aonai etoto, eko-roti Puka ketuabina. <sup>17</sup> Isaia Mahabanai hauna ena puka tebena, weiana puka ekaikauna, na terere aihona 'ekana etabu ahina etuabina etibaha,

<sup>18</sup> “Obiapaka Aubana hanona au aha'uāi, pokina ebatohana'u pou namona kairoro aina uraru haukia herekia. Euhuna'u kairoro tebirinakia haukia irubukia

mai maha ki'a haukia kateiha mue, atetua aonai temiaho haukia kabakarahinakia,

<sup>19</sup> Obiapaka ena maearima kebamaurinakia ihauna aba etaina pouna kairoro aina.”

Isa 61.1, 2

<sup>20</sup> Iesu puka ekaiabuna i'imana hauna ebena ba emiati, marea aonai haukia ikoikiāi mahakia ia teiha 'ini'inina.

<sup>21</sup> Weiana ia ehinabe ramanakia etibaha, “‘Abi tona Puka Robenai hauna bariu rani neianai aba etohana.” <sup>22</sup> 'Abi namokia pinanai ehinanakia paunai ikoikiāi ia tebanamona haeamona teta'u ta'u huri tebakai bakai tetibaha, “Neiana hanona Iosepa nahuna, u?”

<sup>23</sup> Iesu ia ehina benakia etibaha, “‘Abi tohana wai 'abi ibabatai ha katohinana here'u ai, ‘Toketa haumu e, kipomu mobamaurini'o.’ abomo katohina bena'u katotibaha, ‘Taba taba weia Kaperanauma ai obabai urukia tao'o haukia, neia emu aiara tohanai abomo kobabainakia.’ ” <sup>24</sup> Ia etibaha, “‘Abi tohana au wai nahina benimi, mahabanai hauna ena aiara tohanai hanona a'i kate'a'i taeana. <sup>25</sup> 'Abi tohana au wai nahina benimi, Elia ena raniai wapu babi'ekia bo'okia Isaraelai temiaho, kupa ekaiabuna abara a'i etibo ihau aihau mai nawa 'abaihou arobo rarina 'akina erama hano maikoina. <sup>26</sup> Ba Elia a'i euhuna weiakia ha herena a'i eao, 'a eao Sarepata aiarana Sidono hanonai wapu babi'ena ha herena. <sup>27</sup> Abomo mahabanai hauna Elisa ia ena raniai Isaraela aonai weia hanona morumoru haukia bo'okia, ha aha'i enamo, 'a Suria hauna Namana ikupaiana mo enamo.”

<sup>28</sup> Marea aonai maearima ikoikiāi 'abi weiakia teo'o raninai teopuere wairai.

<sup>29</sup> Temikiri aiarai tetori ahina tebaka'ana teaoaina teaiara oona ahanai papa'ai katekapo ahina. <sup>30</sup> Ia hanona to'u ba-iatakia tohanai ekaobo.

*Iesu Hau Ha Aonai Auba Ki'a Obona Eu'u Ahina.*  
(Mk 1.21-28)

<sup>31</sup> Eriro eao Galilea aiarana ha Kaperanauma Beraura Robeai maearima eba'io binakia. <sup>32</sup> Ena ba'io binakia teta'u ta'u huri pokina ena 'abi hanona mai hiabuna.

<sup>33</sup> Hau ha aonai auba ki'a obona etoto hauna weia marea aonai eio aota ki'a, <sup>34</sup> etibaha, "Ai, Iesu Nasareta hauna e, taba heremaiaai kobabaina? Omai hanona ai koahu 'arinamai? Au a'jobina oi hanona Tirama ena Robe hauna."

<sup>35</sup> Iesu ia ebatana etibaha, "Uri'urimu. Ia aonai mokarahi." Ikoikia wairakiai auba ki'a obona hau weiana eba'eho ki'ana ba ekarahi, a'i ebamani'ana. <sup>36</sup> Maearima ikoinai teta'u ta'u huri, tebaihinabe aina tetibaha, "Neiana hanona ba'ioi tabana? Mai hiabuna haeamona mai taburana auba ki'a obokia nehina benakia hanona tikarahi." <sup>37</sup> Hano weiana maikoinai Iesu pouna tehina otaraina.

### *Iesu Simona Rawana Babi'ena Ena Inawa Ebanamona.*

*(Mt 8.14-17; Mk 1.29-34)*

<sup>38</sup> Iesu marea ehabona eao Simona ena itu. Simona rawana babi'ena hau hiabu inawana ea'ina, Iesu tenoina kebaraina. <sup>39</sup> Weiana ia babi'e herenai ekoroti hau hiabu inawana erikena, ba inawa epua, beronai babi'e emikiri ta'arakia ea'i.

### *Iesu Inawa Haeai Haeai Ebanamonakia.*

<sup>40</sup> Beraura kaihu niaoina aonai maearima ikoikia herekiai inawa haeai haeai haukia temai ainakia Iesu herena, imana ha ha ahakiai ehao'au ebamaurinakia. <sup>41</sup> Auba ki'a obokia maearima bo'okia abomo aokiai tekarahi teio tetibaha, "Oi hanona Keriso Tirama Nahuna." Iesu erikenakia eharabunakia a'i kate'abi pokina te'jobina ia hanona Keriso.

### *Iesu Iudea Mareakia Aokiai Eiroro.*

*(Mk 1.35-39)*

<sup>42</sup> Rani nirerena aonai Iesu ekarahi 'eka 'okona ha eao. Mako ia itabuna teao, tetabu ahina raninai tehina bena herekiai a'i pekaobo. <sup>43</sup> 'A Iesu ehina benakia etibaha, "Au hanona Tirama ena obia aiarana pouna kairoro aina aiara haeai haeai herekiai pokina weiana paunai euhuna'u." <sup>44</sup> Ba Iudea mareakia aokiai eiroro.

## 5

### *Iesu I'abana Haukia Bani Eaparinakia.*

*(Mt 4.18-22; Mk 1.16-20)*

<sup>1</sup> Rani ha Iesu Genesareta obu haiantai ekoroti hanona mako tekori kakaiarona Tirama ena 'abi aiana kateona. <sup>2</sup> Ia ahi

rua obu haiantai tetai'au eihanakia, ba'eha haukia tehabonakia poeai ekia re'e teutunakia. <sup>3</sup> Iesu Simona ena ahiai ehe'au, ehina bena papana kekai ahi 'apuana, ia ahi ai emiati ba mako eba'jobinakia.

<sup>4</sup> Iesu ena 'abi eore murinai ia Simona ehina bena, "Oura hamaeao, re'e kohorenakia maia kobarewa." <sup>5</sup> Simona ena 'abi ebamuena etibaha, "Poki haumu e, ai rabi maikoina taro 'ari rani taba ha a'i ta'ina, 'a emu 'abi paunai re'e kabaririnakia." <sup>6</sup> Weiana tebabaina hanona maia bo'ona 'akina tebarewanakia, ekia re'e herekai mo patetapa. <sup>7</sup> 'Abakia baika ahi ha ai haukia tebakonakia katemai katebarainakia, ba temai ahikia rua tebabonunakia herekai mo pateuhu.

<sup>8</sup> Simona Petero hoa weiana eihana raninai Iesu aena pokinai ekai pehu e'abi etibaha, "Obiapaka e, au hanona ki'a hau'u, here'u ai a'i komiaho." <sup>9</sup> Ia mai 'abana kipokia teta'u ta'u huri pokina maia uahomana bo'ona 'akina tebarewanakia buonai, <sup>10</sup> Simona kipokia teba'eha oioi haukia Sebedeo nahuna Iakobo mai Ioane abokiamo teta'u ta'u huri. 'A Iesu Simona ehina bena etibaha, "Ai kota'u. Bariu keaomo waira ranikiai oi hanona maearima koba'eha benakia." <sup>11</sup> Ekia ahi teberi 'aunakia poeai, taba ikoinai tehabonakia Iesu murinai teka'a.

### *Iesu Morumoru Hauna Ebanamona.*

*(Mt 8.1-4; Mk 1.40-45)*

<sup>12</sup> Iesu emiaho aiara ha aonai hau ha hauna maikoinai emorumoru, ba Iesu eihana raninai e'eho aena pokinai e'umuti enoina e'abi etibaha, "Obiapaka e, ponuatae raninai pobanamona'u." <sup>13</sup> Iesu imana etiu ahina ea'i 'apuana, ehina bena etibaha, "Nanuatae, monamo." Beronai morumoru hau weiana ehabona. <sup>14</sup> Ia eharabuna etibaha, "Hau ha haiantai a'i ko'abi, ia koao robe hauna herenai keihani'o, mai banamo baibenina Mose e'abi ihobona tabana kobaibeni, ba maearima katebatohana oi aba onamo." <sup>15</sup> Ia pouna tehina otaraina mai to'u rarikia temai tebararona aiana kateona ekia inawa kebanamonakia. <sup>16</sup> 'A Iesu ekaobo hano 'abaena ha eao ebahuba'ari.

### *Iesu Mero Hauna Ebanamona.*

*(Mt 9.1-8; Mk 2.1-12)*

<sup>17</sup> Rani ha Iesu eba'ioi aonai Parisea haukia mai rauhuhu poki haukia baika

weia temiati, ia hanona Galilea aiara ikoikia, Iudea mai Ierusalem aokiai temai. Obiapaka hiabuna hanona Iesu ahanai inawa haukia ebanamonakia. <sup>18</sup> Maearima baika mero hauna ha toto'eai tebuana teoaina taearana tetabu katetoto aina Iesu wairanai katehorotina. <sup>19</sup> Katetoto aina aonai taeara ha a'i tetabu ahina pokina to'u rarina buonai, ba tekara'au aina teao itu kapenai, kapehene teu kauna mai toto'ena tebaririna Iesu wairanai mako baiatakiai. <sup>20</sup> Iesu ekia a'ikakauma eihana raninai e'abi etibaha, "E'u hau e, emu ki'a aba ihina hao." <sup>21</sup> Rauhuhu poki haukia mai Parisea haukia aokiai teraonaraona tetibaha, "Neiana hanona hau tabana Tirama nia'i ki'ana? Tai ki'a kehina hao, Tirama mo kipona." <sup>22</sup> 'A Iesu ekia raona e'jobina paunai ehina benakia etibaha, "Taba buonai raona nahomakia aomia turaonanakia? <sup>23</sup> Aeana hauna e'ama'ama kahaihana, emu ki'a aba ihina hao 'ao momikiri moka'a. <sup>24</sup> Ia wai kato'jobina Maearima Nahuna hanopakai mai hi-abuna ki'a kehina hao." Ia mero hauna ehina bena etibaha, "Au oi nahina beni'o, momikiri emu toto'e moa'ina moao emu itu." <sup>25</sup> Beronai mo wairakiai emikiri ena toto'e ea'i taeana eao ena itu Tirama ebanamona. <sup>26</sup> Ikoikia teta'u ta'u huri mai Tirama tebanamona, mai ta'ukia te'abi tetibaha, "Bariu taba neiana haeai tohana haihana."

*Iesu Lebi Ena Aka 'Ekanai Eaparina.*  
(Mt 9.9-13; Mk 2.13-17)

<sup>27</sup> Weiana murinai Iesu ekarahi eao moni bararo hauna ha atana Lebi moni a'i 'ekana emiati eihana, eaparina etibaha, "Muri'uai omai." <sup>28</sup> Lebi emikiri taba ikoikia ehabonakia Iesu murinai eka'a.

<sup>29</sup> Lebi ena ituai Iesu kero'ona anianina ha ehabaina, weia moni a'i haukia bo'okia mai maearima haeai baika kipokia temiati teaniani haeamo. <sup>30</sup> Parisea haukia mai rauhuhu poki haukia tehore i'abana haukia herekiai te'abi hara tae tetibaha, "Taba buonai moni a'i haukia mai ki'a haukia kipokia tuaniani mai toinu inu haeamo?" <sup>31</sup> Iesu ekia 'abi ebamuena etibaha, "Ai teinawa haukia hanona toketa hauna a'i titabuna, ia inawa haukia mo toketa hauna titabuna. <sup>32</sup> Au amai hanona bero haukia a'i kaparinakia, ia ki'a haukia kateraona kabe paunai amai."

*Ani Robe Bakai bakaina.*  
(Mt 9.14-17; Mk 2.18-22)

<sup>33</sup> Ia Iesu tehina bena tetibaha, "Ioane i'abana haukia rani bo'okia tiani robe mai tibahuba'ari, Parisea i'abakia haukia abomo ihobona tibabaina, ia oi i'abamu haukia tianiani mai teinuinu." <sup>34</sup> Iesu ehina benakia etibaha, "Wai turaonana hawainibe mahamaha hauna ena baki haukia kipokia temiaho oioi aonai kateani robe hanona ketaina, u? <sup>35</sup> 'A rani kemai aonai hawainibe mahamaha hauna herekiai katea'i parena, rani weiakiai ia hanona kateani robe."

<sup>36</sup> Ia 'abi ibabataiai ehina benakia, "Hau ha habuni maha mahana puana a'i ketapa obona habuni 'ai'aina maranai a'i kehuri abuna pokina habuni mahamahana ketapa obona raninai habuni 'ai'aina mai habuni mahamahana ohi hanona ihakia a'i kateihobo. <sup>37</sup> Hau ha bine beina mahamahana aparua 'ai'ainai a'i kebaharuna, weiana kebabaina raninai bine beina mahamahana kekupu aparua 'ai'aina kebua pa'ana haeamona kekiki oioi mai 'aparua keki'a. <sup>38</sup> 'A bine beina mahamahana hanona aparua mahamahana kebaharuna, ba terarua katenamo. <sup>39</sup> Hau ha bine beina 'ai'aina keinu murinai bine beina mahamahana a'i kenuatae aina pokina ke'abi bine 'ai'aina hanona enamo."

## 6

*Beraura Robe Obiana.*  
(Mt 12.1-8; Mk 2.23-28)

<sup>1</sup> Beraura robenai Iesu mai i'abana haukia kipokia witi umana ha aonai tekabanai, i'abana haukia witi buakia te'ini hurinakia imakia aokiai temutunakia teani. <sup>2</sup> Parisea haukia baika te'abi tetibaha, "Wai taba buonai Beraura Robenai a'i katobabaina akana tubabaina?" <sup>3</sup> Iesu ekia 'abi ebamuena etibaha, "Wai pa'e Davida orina a'i totuabi 'apuana. Ia mai 'abana kipokia mare'a te'ari raninai taba ehabaina? <sup>4</sup> Ia Tirama ena ituai etoto tebarobena parawakia robe haukia ikupaiakia mo kateani haukia ea'inakia eani mai i'abana haukia ebanakia." <sup>5</sup> Haeamona ehina benakia etibaha, "Maearima Nahuna hanona Beraura Robe obiana."



*Iesu Hau Ha Imana Kobekobena Ebanamona.*

(Mt 12.9-14; Mk 3.1-6)

<sup>6</sup> Beraura robe haeai ha ai Iesu Iuda haukia ekia mareai etoto eba'iobi. Hau ha weia imana itipana hanona ekobe kobe. <sup>7</sup> Rauhuhu poki haukia mai Parisea haukia ia te'itimana Beraura Robeai kebamauri 'ao, Iesu beho 'ekana katehorotina taearana tetabu. <sup>8</sup> 'A Iesu ekia raona e'iohina, weiana ima kobe kobe hauna ehina bena etibaha, "Momikiri baiataki ai mokoroti." Ba emikiri ekoroti. <sup>9</sup> Iesu ehina benakia etibaha, "Au wai nabakainimi, aeana hauna ebero Beraura Robeai kahabanamo 'ao kahabaki'a, kahabamauri 'ao kahaba'ari?" <sup>10</sup> Iesu ikoiki ai eiha kaka-iaronakia murinai ima kobe hauna ehina bena etibaha, "Imamu motiu berona." Ia ehabaina hanona imana ebero mue. <sup>11</sup> 'A ia hanona aokia teopuere ki'a, kipokia teroba ahu Iesu herenai taba katebabaina.

*Iesu Iuhubeau Haukia Harauhaea Rua Etina'anakia.*

(Mt 10.1-4; Mk 3.13-19)

<sup>12</sup> Rani weianai Iesu oeoai ekara'au kebakuba'ari, rabi maikoina ebahuba'ari Tirama herenai. <sup>13</sup> Aba rani nimaiana aonai ia i'abana haukia eaparinakia temai, baiataki ai harau haea rua ea'i taeanakia ata ebenakia iuhubeau haukia. <sup>14</sup> Ia hanona Simona atana eaparina Petero mai hatina Anderea ohi, Iakobo mai Ioane ohi, Pilipo mai Batolomeo ohi, <sup>15</sup> Mataio, Toma, Alepeo nahuna Iakobo, mai Simona teaparina Selote hauna ohi, <sup>16</sup> Iakobo nahuna Iuda mai Isakariote hauna Iuda ia hinahinana kehina hauna.

*Iesu Mako Eiroro aina Mai Inawa Haukia Ebanamonakia.*

(Mt 4.23-25)

<sup>17</sup> Iesu i'abana haukia kipokia oeoai teriri hano beronai tekoro ti. I'abana haukia to'una rarina weia mai maearima bo'ona 'akina Iudea hanona 'ekakia ikoiki ai Ierusalem a Turo mai Sidono poe hanokia ikoiki ai temai, <sup>18</sup> aiana kateona mai ekia inawa katenamo. Auba ki'a obokia tebaro 'arinakia haukia abomo temai ebanamonakia. <sup>19</sup> To'u maikoina tebahobona kate ai 'apuana pokina hiabu ia aonai ekarahi ikoiki ai ebamaurinakia.

*Maearima Tabakia Haukia Tenamo.*

(Mt 5.1-12)

<sup>20</sup> Iesu i'abana haukia eihanakia ena 'abi ea'i ramana etibaha,

"Wai touraru haumi tonamo, pokina Tirama ena obia aiarana hanona wai 'eumi.

<sup>21</sup> Wai bariu tumare'a haumi tonamo, pokina wai hanona nuami katebonu.

Wai bariu tuhai haumi tonamo, pokina wai katoiriri.

<sup>22</sup> Maearima Nahuna paunai maearima ti'oatanimi, hoami tihorena, ti'abi ki'a heremiai, atami tia'i ki'anakia raninai wai hanona tonamo.

<sup>23</sup> Rani weianai aomi katenamo katorobo katoanamo wairai, pokina kupai arami rarina 'akina. Weiana ihobona tohanai 'aba'abakia ua tebabai aiho mahabanai haukia herekiai.

<sup>24</sup> "A bariu tuobia haumi heremiai hanona keki'a ki'a baha, pokina emi namo maikoinai aba toa'ina.

<sup>25</sup> Bariu tuani 'ari haumi heremiai hanona keki'a ki'a baha, pokina wai katomare'a.

Bariu toiriri haumi heremiai hanona keki'a ki'a baha, pokina aomi katehaiara mai katohai.

<sup>26</sup> Maearima ikoiki ai atami tibanamona raninai heremiai hanona keki'a ki'a baha, pokina 'aba'abakia babai ihobona tohana tebabaina mahabanai bai'oi haukia herekiai.

*Emi 'Ou Haukia Katoraona'au Ainakia.*

(Mt 5.38-48; 7.12a)

<sup>27</sup> "Iamo aia'u tuona haumi nahina benimi. Emi 'ou haukia katoraona'au ainakia, weiakia 'arimi a'i ti'ari haukia herekiai katobabai harai. <sup>28</sup> Weiakia teururu heremiai haukia katoba namonakia, tibabai ki'a heremiai haukia ahakiai katobahuba'ari. <sup>29</sup> Hau ha mekemu kebo'ana raninai, koke'e banai abirana abomo kobena. Mai hau ha emu kota kea'i parena raninai, emu habuni ibatoto a'i koubo aina. <sup>30</sup> Maearima heremu ai taba tinoi ai haukia kobenakia, mai hau ha emu taba ha ea'ina rea imue aina robana a'i koahuna. <sup>31</sup> Wai emi nuatae maearima ua patebabai aiho heremiai, wai abomo ua katobabai aiho maearima herekiai.

<sup>32</sup> “Weiakia tiraona'au ainimi haukia mo katoraona'au ainakia hanona ena namo taba wai heremiai? Aka ki'a haukia abomo tiraona'au ainakia haukia ua tiraona'auai aihonakia. <sup>33</sup> Weiakia heremiai tibabai harai haukia herekiai mo tubabai harai hanona ena namo taba? Aka ki'a haukia abomo ua tibabai aiho. <sup>34</sup> Weiakia taba katebamue haukia mo tubenakia hanona ena namo taba wai heremiai? Aka ki'a haukia abomo aka ki'a haukia tibenakia weiana 'arakia katebamue. <sup>35</sup> 'A emi 'ou haukia katoraona'au ainakia, mai katobabai harai herekiai, mai katobaibeni tabakia 'arakia ibamuekia a'i katoraonanakia. Weiana 'arami apa'uana katoa'ina, mai wai hanona 'ubi toha tohana Tirama nahunai katoao, pokina Ia hanona a'i tibanamona haukia mai ki'a haukia abokiamo eaoko'o ainakia. <sup>36</sup> Aoko'o akakia katobabai Hamami 'abana, Ia hanona mai ena aoko'o.

*Oi Hau Ha Ena Ki'a Robana Ai Koahuna.*  
(Mt 7.1-5)

<sup>37</sup> “Abami a'i katoba bakainakia ba Tirama abomo wai a'i mebabakainimi, 'abami a'i katobaki'anakia ba Tirama abomo wai a'i mebaki'animi, 'abami ekia ki'a katohina hao ba Tirama abomo wai emi ki'a kehina hao. <sup>38</sup> Katobaibeni 'abami herekiai ba Tirama abomo kebenimi, ihobona taba ha kebonu 'auna 'abana kehao 'inina keahu 'inina kekiki oi oi, ua kebeni aihonimi. Pokina tobaibeni ihobonai Tirama abomo wai kebeni muenimi.”

<sup>39</sup> Iesu 'abi ibabatai neiana ehina benakia etibaha, “Maha 'iau hauna ha kehore maha 'iau hauna ha a'i kebaka'ana, weiana kebabaina raninai terarua 'uri aonai katetoa. <sup>40</sup> Marere miorina ha ena ba'iohi hauna a'i ketara haona, 'a marere miorikia ekia marere katebaore haraina hanona ba'iohi hauna kipokia kateihobo.

<sup>41</sup> “Taba buonai matiu nabunabuna weiana 'abamu mahana aonai noihana, 'a arako'o rarina oi mahamu aonai hauna a'i nuraonana. <sup>42</sup> Oi kipomu mahamu aonai arako'o rarina weiana a'i noihana raninai, aea homanai uaho'abamu kohina bena, 'Uaho'aba'u e, mahamu aonai matiu nabunabuna ma'i ahina.' Bahaorea haumu e, mahamu aonai arako'o rarina moa'i ahi 'uaina, murinai uaho'abamu

mahana aonai matiu nabunabuna koiha haraina koa'i ahina.”

*Matiu Ha Ha Buabuakiai Kaha'iohina.*  
(Mt 7.16-20; 12.33-35)

<sup>43</sup> “Weiana matiu namona buabua ki'a obona a'i kebaramana, abomo matiu ki'a obona buabua namona a'i kebaramana. <sup>44</sup> Pokina matiu haha buabuakiai 'iohi nirama, weiana maearima 'ini boaboai ororo a'i tebubu obona, haeamona awa 'ini'ini'ia 'aruhi a'i tia'ina. <sup>45</sup> Hau namona ehore aonai taba namokia ebararo 'ekanai taba namokia nitara'au, hau ki'a obona ehore aonai ki'a tabakia ebararo 'ekanai ki'a tabakia nitara'au. Pokina aonai taba ebonu hauna pinanai nehinana.

*Itu Bakori Haukia Rua.*  
(Mt 7.24-27)

<sup>46</sup> “Wai taba buonai tuaparina'u, 'Obiapaka e, Obiapaka e,' ia e'u 'abi a'i tua'i ta'eana. <sup>47</sup> Maearima here'u timai mai e'u 'abi aiana tiona mai akana tibabaina haukia kabaihanimi ia hanona aea homakia. <sup>48</sup> Ia hanona matoha hau ha itu ebabaina, 'uri ehabi 'ourana pihara ahanai hoboro ebakorinakia, tou ekarahi raninai itu etorina 'a itu a'i ebaibiuna, pokina itu hanona ebakori harai ki'a bahana. <sup>49</sup> Iamo aia eona akana a'i ebabaina hauna ihobona matoha hau ha itu 'ano ahanai ebakorina hoborona aha'i, tou ekarahi itu etouna, beronai mo itu epobu, itu epobu hanona earu otaraina.”

## 7

*Iesu Roma Huari Poki Hauna Ena Aka Hauna Ena Inawa Ebanamona.*  
(Mt 8.5-13)

<sup>1</sup> Iesu ena 'abi ikoinai ehina orenakia maearima herekiai murinai ekatoto Kaperanauma. <sup>2</sup> Roma huari poki hauna ha weia ena ta'ara'i hauna 'arina e'ari ki'a baha hauna hanona einawa ki'a aba ke'ari. <sup>3</sup> Ia Iesu pouna eona raninai Iuda haukia apa'uakia baika euhunakia katenoina kemai ena ta'ara'i hauna kebamaurina. <sup>4</sup> Temai Iesu herena raninai tenoi hao noi haona tetibaha, “Hau neiana pobaraina hanona penamo. <sup>5</sup> Pokina ia eka itubu niraona'au aina, ia ehore marea ebakorina 'eumai.” <sup>6</sup> Weiana Iesu kipokia teao, bariu Iesu itu ebarina aonai huari poki hauna ena hau euhunakia Iesu tehina bena tetibaha, “Obiapaka e,

a'i koaro'ari, pokina au a'i anamo komai e'u ituai kototo. <sup>7</sup> Ua buonai kawahi heremu abomo a'i etaina. <sup>8</sup> Weiana au hanona hau ha ena hiabu ba'anai, mai huari haukia abomo au ba'a'uai. Au hau nei ana ha nahina bena moao hanona ia niao, 'abana nahina bena omai hanona ia nimai. E'u ta'ara'i hauna nahina bena nei ana mobabaina hanona ia nibabaina."

<sup>9</sup> Iesu aia weiana eona raninai eta'u ta'u huri, ekabe to'u murinai haukia ehina benakia, "Au wai nahina benimi, Israaela aonai a'ikakauma nahomana ha a'i atabu ahina." <sup>10</sup> Weiakia euhunakia haukia temue teao itu raninai, ta'ara'i hauna aba enamo tetabu ahina.

### *Iesu Wapu Nahuna 'Ariai Ebamikirina.*

<sup>11</sup> Rani papana eao murinai Iesu eao aiara ha atana Nain, i'abana haukia mai mako ia kipokia teao. <sup>12</sup> Aiara pa'abina aba tibarina aonai, 'ari hauna ha tehua ahina weiana hanona wapu ha nahuna hamo hamona, aiara haukia bo'okia wapu te'abana. <sup>13</sup> Obiapaka wapu eihana raninai eaoko'o aina, weiana ehina bena etibaha, "A'i kohai." <sup>14</sup> Ia eka'a ha ha eao ko'o ea'i 'apuana, ba ko'o tebuana haukia tekoroiti. Iesu e'abi etibaha, "Hau aruaruna e, au nahina beni'o, momikiri." <sup>15</sup> E'ari hauna emikiri emiati e'abi'abi, Iesu miori hinana ebeni muena. <sup>16</sup> Ikoikiai teta'u wairai, weiana Tirama tebanomona tetibaha, "Mahabanai apa'uana ha baiatakai ewaira tina." Haeamona tetibaha, "Tirama aba emai ena maearima herekia." <sup>17</sup> Iesu pouna nei ana Iudea 'eka maikoina mai herena hanokia ikoikiai aokiai tehina otaraina.

### *Ioane I'abana Haukia Rua Euhunakia Iesu Herena Teao.* (Mt 11.2-19)

<sup>18</sup> Ioane i'abana haukia 'abi nei akia ikoikia tehinanakia ia herenai. <sup>19</sup> I'abana haukia rua eaparinakia euhunakia Obiapaka katebakaina katetibaha, "Kemai hauna hanona oi, 'ao haeai ha kata'imana?" <sup>20</sup> Temai Iesu herena raninai tehina bena tetibaha, "Ba'uere Robe hauna Ioane euhunamai heremu katabakaini'o, 'Kemai hauna hanona oi, 'ao haeai ha kata'ima?" "

<sup>21</sup> Rani weianai Iesu hanona maearima bo'ona 'akina ekia inawa, hau haiara mai auba ki'a obokia aokiai haukia ebanomonia, abomo maha 'iau haukia bo'ona

mahakia ebano'a. <sup>22</sup> Iesu terarua ekia 'abi ebamuena etibaha, "Tomoao, taba toiha mai urukia to'o haukia Ioane katohina bena. Maha 'iau haukia aba teihaiha, 'ome'ome haukia aba tika'a, morumoru haukia aba teta'e ta'e, haia po'o haukia aia aba tiona, 'ari haukia aba temikiri timauri mauri, abomo uraru haukia herekiai pou namona nairoro aina." <sup>23</sup> Haeamona e'abi etibaha, "Aona a'i nikai'au kai'au here'uai hauna hanona enamo."

### *Iesu Ioane Pouna Ehinana.*

<sup>24</sup> Ioane euhunakia haukia temue murinai, Iesu haeamona to'u haukia herekiai Ioane pouna ehinana etibaha, "Toao hano 'akunai hanona taba katoihana? Baura kopura eabunakia katoihanakia, u? <sup>25</sup> Aha'i raninai taba katoihana buonai toao weia? Hau ha habuni 'arana rarina ebatotona katoihana, u? Weiakia habuni namoabukia tibatotonakia mai ekia obia tabakia tebo'o haukia hanona obia arana hauna ena ituai katotabu ahinakia. <sup>26</sup> Taba katoihana buonai toao weia? Mahabanai hauna ha, u? 'E, 'abi tohana, au wai nahina benimi, nei ana hauna ehore mahabanai haukia bo'ona etara haonakia. <sup>27</sup> Weiana hauna pouna Puka Robenai tererena, 'E'u iuhubeau hauna kauhuna ke'uai, emu taeara kea'ia'i harai 'uaina.'

### Mal 3.1

<sup>28</sup> Au wai nahina benimi. Babi'e nuakiai terama haukia ikoikiai baiatakiai ha Ioane a'i etara haona. Ia Tirama ena obia aiarana aonai eko'i ko'i ki'a baha hauna mo Ioane etara haona."

<sup>29</sup> Maearima ikoinai abomo moni bararo haukia Iesu ena 'abi 'uruna teona raninai Tirama ena taeara berona tebatohana, pokina ia hanona Ioane eba'uere robenakia. <sup>30</sup> 'A Parisea haukia mai rauhuhu poki haukia Ioane ena ba'uere robe a'i tenuatae aina buonai Tirama ena nuatae 'eukiai hauna tebaoao aina.

<sup>31</sup> Iesu haeamona e'abi etibaha, "Uru nei ana maearimakia hanona tabai kababainakia? Ia hanona tabai kabaihobonakia? <sup>32</sup> Ia hanona matoha miori papakia aiara ibuanai temiati 'abakia tiaparinakia tetibaha, 'Ai pihi taubainakia, ia wai a'i toewa, 'ari huikia ta'i, ia wai a'i tuhai.' <sup>33</sup> Pokina ba'uere robe hauna

Ioane emai raninai a'i eaniani mai bine beina a'i einu, ba wai to'abi totibaha, 'Ia aonai auba ki'a obona ha nemiaho.'<sup>34</sup> Maearima Nahuna emai nianiani mai neinuinu hanona wai tu'abi totibaha, 'Aniani ki'a mai inuinu ki'a hauna abomo moni bararo haukia mai aka ki'a haukia ekia hau.'<sup>35</sup> 'A Tirama ena aobero hanona katea'i taeana haukia herekiai ena bero kewaira tina."

### *Babi'e Ha Tehoro Timina 'Orimonai Iesu Eheina.*

<sup>36</sup> Parisea hauna ha Iesu enuatae aina ena ituai kateaniani haeamo, ba Iesu eao ituai etoto aniani 'ekana emiati.<sup>37</sup> Aiara weiana aonai aka ki'a babi'ena ha, Iesu Parisea hauna ena ituai kateaniani pouna eona raninai, ia pihara kabapuna aonai muramura timina 'orimona hauna emaiaina.<sup>38</sup> Eao Iesu murinai aena pokinai ekoroti ehai ba mahana beikiai aena ebabeinakia, buinai eba'ororonakia abomo epaunakia, muramura timina 'orimona eheina ahakiai.

<sup>39</sup> Parisea hauna weiana Iesu eaparina hauna babi'e ena babai eihana raninai, kipona aonai eraonana etibaha, "Neiana mahabanai hauna tohana raninai, ia aba pe'iohina, babi'e tabana ia nia'i 'apuana, pokina ia hanona ki'a babi'ena."

<sup>40</sup> Iesu ehore ehina bena etibaha, "Simona e, au 'abi ha oi heremu ai, kahinana." Ia etibaha, "Ba'iohi haumu e, mo'abi." <sup>41</sup> Iesu e'abi etibaha, "Hau rua moni baibeni hauna ha herenai moni tea'inakia, hamona hanona kina hinabu ima\* ea'ina, ha hanona kina imabui ea'ina." <sup>42</sup> Ara katehore a'i etainakia buonai terarua moni katemue ainakia haukia ekakinakia, ba aeana hauna ia 'arina ke'ari ki'a baha?"

<sup>43</sup> Simona e'abi etibaha, "Naraonana, pa'e weiana ena a'i 'uai apa'uana ekakina hauna." Iesu ia ehina bena etibaha, "Aba o'abi harai."

<sup>44</sup> Iesu ekabe babi'e eihana, ba Simona ehina bena, "Babi'e neiana noihana? Au amai emu ituai atoto hanona ae'u beikia a'i obaibeni. 'A ia hanona mahana beikiai ae'u eutunakia abomo buinai eba'ororonakia." <sup>45</sup> Oi a'i opauna'u, 'a babi'e neiana akatoto ramana raninai ae'u ipaukiai a'i e'oro 'apua." <sup>46</sup> Oi

ara'u tehoroi a'i oheina, 'a ia tehorotimina 'orimonai ae'u eheinakia.<sup>47</sup> Ua buonai nahina beni'o, ena ki'a bo'ona 'akina haukia aba ihina hao, pokina ena raona'au eapa'ua paunai, ia tai ena raona'au papana hauna hanona ena ki'a papana ihina hao." <sup>48</sup> Ba Iesu babi'e ehina bena etibaha, "Emu ki'a aba ihina hao." <sup>49</sup> Aniani 'ekana emiati haukia kipokia baiatakiai te'abi'abi tetibaha, "Neiana hanona tai, ba ki'a abomo nehina hao." <sup>50</sup> Iesu babi'e ehina bena etibaha, "Emu a'ikakauma ehore ebamaurini'o, mai baibuamu moao."

## 8

### *Babi'e Baika Iesu Murinai Tek'a.*

<sup>1</sup> Neiana murinai rani a'i ehoma'a Iesu eao aiara apa'uakia mai papakia aokiai Tirama ena obia aiarana pouna namona eiroro aina. I'abana haukia harauhaera hanona te'abana kipokia teao,<sup>2</sup> mai babi'e baika abomo, auba ki'a obokia 'eukiai eu'u ahinakia mai hau haiarai ebanamonakia babi'ekia, ha Maria Magadala babi'ena aonai auba ki'aobokia 'abaihau hamomo eba karahinakia babi'ena,<sup>3</sup> ha Ioanna, atawana Kusa hanona Heroda obia arana ena itu kohukia nipoki ainakia hauna, mai Susanna, mai babi'e bo'okia baika. Babi'e neiakia kipokia ekia tabai Iesu mai i'abana haukia tebarainakia.

### *'Abi Ibabatana Biraura Hauna Ena Uho Ebatonakia.*

*(Mt 13.1-9; Mk 4.1-9)*

<sup>4</sup> Maearima bo'ona aiara ha ha ai temai Iesu herenai to'u rarina tebabaina aonai Iesu 'abi ibabatai neiana ehinana etibaha,<sup>5</sup> "Biraura hauna ha eao ena uho kebatonakia. Ekapo kapo otarainakia aonai baika taearai te'eho, ba maearima ahakia tehe'au haeamona ubi roborobokia teani orenakia." <sup>6</sup> Uho baika bohu ahanai te'eho, te'omu ia tepaea pokina hano a'i emapu mapu. <sup>7</sup> Uho baika awa 'ini'inikia aokiai te'eho, awa 'ini'inikia kipokia te'omu haeamo ba tetara tara abunakia. <sup>8</sup> Uho baika hano namonai te'eho, te'omu harai tehua'a buakia hinabu ha ha 'abana." Iesu ena 'abi puanai e'abi aota etibaha, "Mai haiana hauna hanona ke'iohina."

\* **7:41:** (41) Helene moninai Denari hinabu ima. Denari hamona hanona aka hauna wapu hamona 'arana.



*'Abi Ibabatai Ena Poki.*  
(Mt 13.10-17; Mk 4.10-12)

<sup>9</sup> I'abana haukia Iesu tebakaina 'abi ibabatai neiana anina taba. <sup>10</sup> Ia e'abi etibaha, "Tirama ena obia aiarana 'iobikia bunikia hanona aba wai ebenimi, ia baika herekiai hanona 'abi ibabataiai nahina benakia, weiana, 'kateihana mo ia a'i kateiha tinana aia kateona ia obona a'i kateobo.'

Isa 6.9

*Iesu 'Abi Ibabataina Anina Ehinana.*  
(Mt 13.18-23; Mk 4.13-20)

<sup>11</sup> "Abi ibabatai anina neiana. Uho hanona Tirama ena 'abi. <sup>12</sup> Uho taearai te'eho haukia hanona weiakia, aia tiona ia tiaporo nimai 'abi aokiai nia'i parena pokina a'i teme a'ikakauma mai a'i tememauri ta'una. <sup>13</sup> Uho weiakia bohu ahanai te'eho haukia hanona weiakia, aia tiona raninai 'abi tia'ina mai aonamokia, iamo ramukia aha'i rani papana mo tia'ikakauma ba baihobo nimai raninai ti'eho. <sup>14</sup> Uho weiakia awa 'ini'iniakia aokiai te'eho haukia hanona weiakia, aia tiona ia mauri neiana ena ao aro'ari ena obia tabakia mai ena aonamo tabakiai aokia nikaiabunakia ba buabuakia tēpure. <sup>15</sup> 'A uho weiakia hano namonai te'eho haukia hanona weiakia, aokia beronai mai namonai 'abi uruna tiona tia'i 'inina tibakiro niao mo buabuakia tibarama."

*Ramepa 'Ekana Tohanai Kohao'auna.*  
(Mk 4.21-25)

<sup>16</sup> Iesu haeamona ehina benakia etibaha, "Hau ha ramepa niba'arana raninai uro aonai a'i nibahu abuna 'ao parua itarana ba'anai a'i nikai tina 'a ia ramepa ihao'auna 'ekanai nihao 'auna ba weiakia katetoto haukia hanona ea kateihana. <sup>17</sup> Taba ikoinai tehore buni haukia hanona katekarahi mahanai, taba ikoinai tebahu abu haukia hanona eai katebawaira tinanakia.

<sup>18</sup> Aia aea nuo aihona hanona ko'ima haraina, pokina mai 'euna hauna hanona ahanai baika Tirama kehore 'auna kebena, ia 'euna aha'i hauna hanona herenai papana nemiaho niraonana 'euna hauna abomo kea'i obona."

*Iesu Hinana Mai Uaho'abana.*  
(Mt 12.46-50; Mk 3.31-35)

<sup>19</sup> Ba Iesu hinana mai hatina temai kateihana iamo a'i etainakia pokina to'u

rarina paunai. <sup>20</sup> Hau ha Iesu ehina bena etibaha, "Oi hinamu mai hatimu mahanai tekoroti tēnuatea kateihani'o." <sup>21</sup> Ba ena 'abi ebamuena etibaha, "Neiakia Tirama ena 'abi aiana tiona mai akana tibabaina haukia hanona au hina'u mai hati'u."

*Iesu Rani Mai Roio Eba'omatanakia.*  
(Mt 8.23-27; Mk 4.35-41)

<sup>22</sup> Rani ha Iesu i'abana haukia kipokia ahi ai tehe'au ba ehina benakia etibaha, "Aika hamaeao obu abirana." Ba tebeau ahi. <sup>23</sup> Tebeau oho aonai, Iesu hanona enoti eparua 'ari. Ba kou rarina obu aonai eabu 'au, bei ahi aonai teraku uta hereka 'akinai pateuhu. <sup>24</sup> I'abana haukia teao Iesu tebaona tetibaha, "Poki haumu e, poki haumu e, aika aba kahatono 'ari." Ba ia emikiri baura mai roio erikenakia, baura e'oro roio e'omata. <sup>25</sup> Ba i'abana haukia ehina benakia etibaha, "Emi a'ikakauma ae'e?" Ia teta'u ta'u huri abomo teta'u ki'a kipokia baiatakiai tebakai bakai tetibaha, "Neiana hanona hau tabana, baura mai roio ehina benakia hanona aiana tika'aina."

*Iesu Hau Ha Aonai Auba Ki'a Obokia Eu'u Ahinakia.*  
(Mt 8.28-34; Mk 5.1-20)

<sup>26</sup> Iesu i'abana haukia kipokia ahiai tebeau banai teao Gerasene hanonai weiana hanona Galilea obu abiranai. <sup>27</sup> Iesu ekara'au poeai raninai, aiarai hau ha aonai auba ki'a obokia temiaho hauna emai te baitabu ahi. Aba wa'i baha 'akinai habuni ha'i ebatotona haeamona ituai a'i emiaho, ia 'ari ahanai emiaho. <sup>28</sup> Ia Iesu eihana raninai eio ki'a haeamona e'eho aena pokinai eio aota ki'a etibaha, "Iesu 'ubi tohanai Tiramana Nahuna e, taba nonuatea aina here'uai kobabaina. Nainoini'o puma a'i kobena'u." <sup>29</sup> Pokina Iesu auba ki'a obokia aba ehina benakia hau weiana aonai katekarahi. Rani bo'okia auba ki'a obokia tehaburi abuna, maearima tehore imana aena tabiriai tebirinakia te'ima haraina iamo tabiri eba mohunakia haeamona auba ki'a obokia tebebeau totona hano 'akunai.

<sup>30</sup> Iesu ia ebakaina etibaha, "Atamu tai?" Ia etibaha, "Ata'u hanona Mako." Pokina auba ki'a obokia bo'ona 'akina aonai temiaho. <sup>31</sup> Ia auba ki'a obokia Iesu tenoina a'i keuhunakia a'i kateao 'uri 'ourana aena aha'i hauna aonai.

<sup>32</sup> Aiporo to'una ha weia teba korinakia oeo mekenai teaniani, ba auba ki'a obokia Iesu tenoina keuhunakia kateao aiporo aokiai katetoto buonai euhunakia teao. <sup>33</sup> Ba auba ki'a obokia hau weiana aonai tekarahi teao aiporo aokiai tetoto, aiporo to'una tebeau riri papa'ai terobo ahi, 'obu aonai tetono 'ari.

<sup>34</sup> Aiporo bakori haukia taba weiana erama teihana raninai tebeau 'akauma aiarai mai umai pou neiana tehinana. <sup>35</sup> Maearima teao taba erama hauna kateihana Iesu herenai tekara'au raninai, hau weiana aonai auba ki'a obokia tekarahi hauna Iesu aena pokinai emiati habuni ebatotona abomo aona aba ebero teihana ba ikoikia teta'u ki'a. <sup>36</sup> Weiakia teihana haukia maearima herekia hau weiana aonai auba ki'a obokia tetoto hauna aea enamo aiho hauna pouna tehinana. <sup>37</sup> Gerasene maearimakia ikoikia Iesu tenoina hano weianai kekapare pokina teta'u ki'a. Weiana ia ahiai ehe'au kemue. <sup>38</sup> Hau weiana aonai auba ki'a obokia tekarahi hauna Iesu enoina pe'abana, ia Iesu ehore ehamuena ehina bena etibaha, <sup>39</sup> "Komue emu aiara, Tirama taba ebabaina heremuai hauna pouna kohinana." Ua buonai hau weiana eao aiara maikoinai aokiai Iesu taba ebabaina herenai hauna pouna ehinana.

### *Iairo Nahuna Mai Babi'e Ha Iesu Ena Habuni Ea'i Apuana Hauna.*

*(Mt 9.18-26; Mk 5.21-43)*

<sup>40</sup> Iesu emue raninai, to'u haukia tehore tea'i taena pokina ikoikia ia te'imana. <sup>41</sup> Weiana hau ha atana Iairo marea poki hauna ha emai Iesu aena pokinai ekuti enoina kateao ena itu. <sup>42</sup> Pokina nahuna uahona hamo hamonamo ihauna harauhaea rua hanona aba ke'ari.

Iesu niao oho aonai to'u rarina aonai eka'a. <sup>43</sup> Ba babi'e ha weia, ia hanona babi'e ekia inawa ea'ina aba ihau harauhaea rua, muramura haukia herekia ena kohu ebaorenakia, hau ha ia a'i ebanamona. <sup>44</sup> Ia Iesu murinai ekataeana eao ena habuni puana ea'i 'apuana, beronai mo ena inawa e'oro. <sup>45</sup> Iesu ebakai bakai etibaha, "Tai ea'i 'apuana'u?" Ikoikia tebuniai aonai Petero e'abi etibaha, "Poki haumu e, maearima tekori abuni'o abomo tetuani'o." <sup>46</sup> 'A Iesu e'abi etibaha, "Hau ha ea'i 'apuana'u pokina a'jobina hiabu hau'uai hauna

aba ekarahi." <sup>47</sup> Weiana babi'e e'jobina kepihi taearana aha'i ba eao mai 'ururu 'ururuna e'eho Iesu aena pokinai, taba buonai ea'i 'apuana abomo aea enamo aiho pouna maearima ikoikia wairakiai ehinana. <sup>48</sup> Ba Iesu babi'e weiana ehina bena etibaha, "Naha'u e, emu a'ikakauma ehore aba ebanamoni'o mai baibuamu moao."

<sup>49</sup> Iesu ni'abi ohomo aonai hau ha Iairo ena ituai emai Iairo ehina bena etibaha, "Nahumu aba e'ari. Ba'iohi hauna a'i mobaro 'ari 'abaeana." <sup>50</sup> Iesu aia weiana eona ba Iairo ehina bena etibaha, "A'i kota'u, koa'ikakaumana'u. Nahumu hanona kenamo." <sup>51</sup> Iesu Iairo ena ituai ekara'au raninai maearima ikoikia ebamuenakia, ia Petero, Iakobo, mai Ioane mai uaho hamana hinana mo te'abana tetoto. <sup>52</sup> Weia hanona maearima ikoikia uaho tihai aina mai tiaoko'o aina. Iesu e'abi etibaha, "Hai tomobapuana, uaho hanona a'i e'ari, ia niparua." <sup>53</sup> Maearima Iesu teiriri aina, te'jobina uaho hanona aba e'ari toha. <sup>54</sup> Iesu uaho imanai ea'i eaparina etibaha, "Naha'u e, momikiri." <sup>55</sup> Uaho aubana emue beronai emikiri, ba Iesu ehina benakia taba ha katebena keana. <sup>56</sup> Uaho hamana mai hinana teta'u ta'u huri, 'a Iesu ehara abunakia taba erama hauna hanona tai ha haianai a'i kate'abi.

## 9

### *Iesu I'abana Harau Haea Rua Euhunakia Kateiroro.*

*(Mt 10.5-15; Mk 6.7-13)*

<sup>1</sup> Iesu ehore i'abana haukia harau haea rua eaparinakia, ebato'unakia, tabura mai hiabu ebenakia paipai ki'a obokia ikoikia kateu'u ahinakia mai inawa haeai haeai kateba maurinakia, <sup>2</sup> ba euhunakia Tirama ena obia aiarana pouna kateiroro aina abomo inawa haukia kateba namonakia. <sup>3</sup> Ehina benakia, etibaha "Emi harima ai taba ha a'i katoa'ina, ikai'ini aha'i, maha aha'i, aniani aha'i, moni aha'i, abomo emi ibatoto ibaruakia a'i katoa'inakia. <sup>4</sup> Itu tabanai katokara'au raninai weiamo katomiaho keaomo aiara weiana katohabona. <sup>5</sup> Ba maearima a'i kateai taeanimi raninai 'apumi apurorokia katoahuahu obo ba ekia aiara katohabona ia irobekia 'abinai keao." <sup>6</sup> Ba i'abana haukia temikiri teao aiara haha

aokiai pou namona teiroro aina abomo maearima tebamaurinakia.

*Heroda Ena Nuatae Ke'iobi Haraina Iesu Hanona Tai.*

(Mt 14.1-12; Mk 6.14-29)

<sup>7</sup> Heroda Obia hauna taba ikoinai Iesu ebabai poukia eo'o raninai aona earo'ari, pokina baika tehina bena ba'uere robe hauna Ioane aba 'ariai emikiri mue. <sup>8</sup> Baika tetibaha Elia aba ewaira tina, haeamona baika tetibaha mahabanai hauna 'ai'aina ha bariu emikiri mue. <sup>9</sup> Ia Heroda etibaha, "Ioane 'akona aba akabe hurina, 'a 'uruna naona aka nahomakia nibabai hauna hanona tai?" Ba ena nuatae hanona keihana.

*Iesu Taha Ima (5,000) Ebanianinakia.*

(Mt 14.13-21; Mk 6.30-44; Io 6.1-14)

<sup>10</sup> Iuhubeau haukia temue Iesu herena taba taba tebabai haukia ia wairanai tehinanakia. Weiana ia ehore ebaka'a obonakia ia kipokia teao aiara ha atana Betesaida ai. <sup>11</sup> Ia maearima te'iobina Iesu aba weia hanona ikoikia i muri-nai teao. Ea'i taeanakia, Tirama ena obia aiarana 'abina ehinana abomo mauri tenuatae haukia ebamaurinakia. <sup>12</sup> Beraura aba erabirabi i'abana haukia harau haea rua temai herena tehina bena tetibaha, "Maearima neiakia mouhunakia, temera'a temeao aiara 'ao uma herekai haukia weia katemiaho kipokia ekia aniani katetabu pokina 'eka neiana hanona hano'akuna." <sup>13</sup> Iesu ekia 'abi ebamuena etibaha, "Wai taba ha tomobenakia temeani." Ia tetibaha, "Ai heremaiai temiaho haukia hanona parawa ima maia rua mo, konuatae kataeao aniani katakawanakia maearima neiakia 'eukia, 'u?" <sup>14</sup> Hau 'abaeana hanona ikoinai taha ima (5,000) 'abana.

Iesu i'abana haukia ehina benakia etibaha, "Maearima neiakia haukia imabui imabui katoba miatinakia." <sup>15</sup> Ehinana hauna ihobonai i'abana haukia tebabaina ba maearima ikoikia temiati. <sup>16</sup> Iesu ehore parawa ima mai maia rua ea'inakia ea'a taea kupa eihana ebanamona murinai ehobi 'iti'itinakia. Ba i'abana haukia ebenakia katekaitinakia maearima wairakiai. <sup>17</sup> Weiana ikoikia teaniani eao teani 'ari, i'abana haukia aniani harikia pohea harauhaea rua tebabonunakia.

*Petero Iesu Ehina Pouna Ia Hanona Keriso.*

(Mt 16.13-19; Mk 8.27-29)

<sup>18</sup> Rani ha Iesu kipona ebahuba'ari, i'abana haukia hanona ia herenai temiaho ebakainakia etibaha, "Maearima au aha'uai taba na tihoma?" <sup>19</sup> Ia ena 'abi tebamuena tetibaha, "Baika ti'abi Ioane Ba'uere robe hauna, baika ti'abi Elia, baika ti'abi mahabanai hauna ha aba 'uainai e'ari hauna bariu emauri mue." <sup>20</sup> Ebakainakia, "Ia wai hanona taba na tuhoma? Au hanona tai?" Petero ena 'abi ebamuena etibaha, "Oi hanona Keriso Tirama euhuni'o haumu."

*Iesu Ena 'Ari Pouna Ehinana.*

(Mt 16.20-28; Mk 8.30-9.1)

<sup>21</sup> Ia ehore eharabunakia hau ha a'i katehinabe 'apuana. <sup>22</sup> Haeamona etibaha, "Maearima Nahuna hanona kehaiara ki'a baha, aiara hau apa'uakia, robe haukia apa'uakia mai rauhuhu poki haukia kate'oatana abomo kateahu 'arina, ia wapu ibaihaunai kemikiri mue."

*Iesu Paunai Mauri Kene'ena Hauna Mauri Kea'ina.*

<sup>23</sup> Ikoikia ehinabe muenakia etibaha, "Tai ha nenuatae au ke'abana'u raninai, ia kipona ena mauri kehabona ena matiu ibiri ropo kea'i taeana kebuana rani ikoinai au muri'uai keka'a. <sup>24</sup> Pokina ena mauri kea'i 'inina hauna hanona ena mauri keba'akaumana, 'a au pau'uai ena mauri kene'ena hauna hanona mauri kea'ina. <sup>25</sup> Hau ha hanopaka tabakia maikoinai pea'ina ena mauri peba 'akaumana 'ao pea'i ki'ana raninai ena namo hanona taba? <sup>26</sup> Hau ha au pau'uai 'ao e'u 'abi paukiai kehaumaea raninai, Maearima Nahuna abomo ia kehau-maeaina ena nuabiai abomo Hamana ena nuabiai ena aneru robekia kipokia ekia mai raninai. <sup>27</sup> 'Abi tohana mo au wai nahina benimi, neia tikoroti haukia baika hanona a'i kate'ari keaomo Tirama ena obia aiarana kateihana."

*Iesu Ihana Ebahaeaina.*

(Mt 17.1-8; Mk 9.2-8)

<sup>28</sup> 'Abi neiakia ehinanakia wapu 'ababani teore murikiai Iesu ehore Petero, Ioane mai Iakobo eba ka'anakia oeoai tekara'au kehabuba'ari paunai. <sup>29</sup> Ebahuba'ari aonai ia wairana ehaeai ena habuni epore e'imare 'imare. <sup>30</sup> Hau

rua ia kipokia te'abi'abi, Mose mai Elia.  
<sup>31</sup> Mai nuabikia tewaira tina Iesu kipokia Tirama ena nuatae ihobonai Ierusalem mai ke'ari hauna terobahu aina. <sup>32</sup> Petero 'abana kipokia hanona teparua 'ari ba teno'a, Iesu nuabina mai hau rua herenai tekoroti haukia abomo teihanakia. <sup>33</sup> Hau rua Iesu aba katehabona aonai, Petero ehore Iesu ehina bena etibaha, "Poki haumu e, aika neia nahamiaho hanona enamo ki'a baha! Ai i'aua aihau katababainakia, ha oi 'eumu, ha Mose 'euna, ha Elia 'euna." Ia hanona a'i e'jobina paunai e'abi'abaea.

<sup>34</sup> Ia ni'abi ohomo aonai 'auhao emai ikoinai ekaiabunakia, ba ia 'auhao aonai hanona teta'u ki'a. <sup>35</sup> Aia ha 'auhao aonai emai etibaha, "Neiana hanona Au Naha'u, atina'ana hauna, aiana katona." <sup>36</sup> Aia weiana epua murinai Iesu ikupaiana teihana. I'abana haukia 'abi ha a'i tehina 'apuana, abomo taba teihanakia haukia rani weianai hanona hau ha a'i tehina bena.

*Iesu Miori Aonai Auba Ki'a Obona Eu'u Ahina.*  
*(Mt 17.14-18; Mk 9.14-27)*

<sup>37</sup> Erani ia oeoai teriri Iesu maearima bo'ona kipokia te baitabu ahi. <sup>38</sup> Hau ha maearima baiatakiai eio etibaha, "Ba'iobi haumu e, au oi nanoini'o, naha'u neiana moihana, naha'u hamomona mo neiana. <sup>39</sup> Rani baika auba ha miori neiana nia'ina, beronai neio, niba'ororo abuna, pinanai 'uto'uto tikarahi, a'i nihabona keaomo hauna nimani'a obo. <sup>40</sup> Au ti'abani'o haukia anoinakia auba ki'a obona kateu'u ahina, ba ia a'i etainakia."

<sup>41</sup> Iesu ehina benakia etibaha, "Aikakauma aha'i mai ki'a babai uruna haumi, heremiai kamiaho keaomo aita? Nahumu omaiaina here'u." <sup>42</sup> Miori eka'a haha aonai biriua ki'a obona ehore miori 'anoai e'atiaina eba'ororo abuna, Iesu ehore auba ki'a obona ebatana ba miori ebamaurina, eaoaina hamana ebena. <sup>43</sup> Tirama ena hiabu rarina 'akinai maearima ikoikiai teta'u ta'u huri. Ia Iesu taba ebabaina hauna tiaonamoai ohona aonai i'abana haukia ehina benakia etibaha,

*Iesu Ke'ari 'Abina Ehina Pouna.*  
*(Mt 17.22, 23; Mk 9.30-32)*

<sup>44</sup> "Abi tabana heremiai aba kahinana hauna tomobahuai haraina. Maearima

Nahuna hanona hinahinana katehina maearima herekiai." <sup>45</sup> 'A ia ena 'abi neiana anina a'i te'jobina. Ia herekiai taba e'uahina hauna ebuni buonai obona a'i teobo, ba katebakaina hanona teta'u.

*Tai Hanona Eapa'ua.*  
*(Mt 18.1-5; Mk 9.33-37)*

<sup>46</sup> Rani ha i'abana haukia kipokia mo baiatakiai tebaihara tae tai hanona keapa'ua ki'a baha. <sup>47</sup> Iesu ekia raona weiana e'jobina buonai miori papana ha emaiaina herenai ebakorotina. <sup>48</sup> Ba ehina benakia etibaha, "Tai ha au ata'u'ai miori papana neiana nia'i taeana hauna hanona au nia'i taeana'u, au nia'i taeana'u hauna hanona euhuna'u Tirama abomo nia'i taeana. Wai ikoimiai baiatamiai ha eko'i ko'i ki'a baha hauna ia hanona keapa'ua ki'a baha."

*A'i Ni'oatanimi Hauna Emi Hau.*  
*(Mk 9.38-40)*

<sup>49</sup> Ioane Iesu ehina bena etibaha, "Poki haumu e, ai hau ha taihana oi atamuai auba ki'a obokia eu'u ahinakia. Ba ai tahina bena kebapuanu pokina ia hanona aika 'abaka aha'i." <sup>50</sup> Iesu ehina benakia etibaha, "A'i patoba'orona, pokina a'i ni'oatanimi hauna hanona wai 'abami."

*Samaria Haukia Iesu A'i Tenuatae aina.*

<sup>51</sup> Iesu kemue kupa keao ranina ekaibari aonai ia aona ebatapurana emikiri Ierusalem keao. <sup>52</sup> Ba iuhubeau haukia euhu 'uainakia teao Samaria aiarana ha aonai taba ikoikiai kateba'orunakia. <sup>53</sup> 'A maearima weia haukia a'i tea'i taeana, pokina ia te'jobina Iesu hanona Ierusalem niao. <sup>54</sup> I'abana haukia Iakobo mai Ioane babai weiana teihana raninai tebakaina tetibaha, "Obiapaka e, nonuatae iruba kupai kataparina, keriri keba'ara koukounakia, u?" <sup>55</sup> 'A Iesu ekabe terarua erikenakia, <sup>56</sup> ba ia teao aiara haeai ha.

*Iesu I'abana Hoana Aeahomana.*  
*(Mt 8.19-22)*

<sup>57</sup> Ia taearai teka'a aonai hau ha Iesu ehina bena etibaha, "Au oi aeana nuao hanona murimuai ka'au." <sup>58</sup> 'A Iesu ia ehina bena etibaha, "Waeaha 'aki hanona mai ekia 'uri, 'ubi roborobokia abomo mai ekia ni'i, ia Maearima Nahuna kenoti kearai hanona 'ekana aha'i." <sup>59</sup> Haeamona Iesu hau ha ehina bena etibaha, "Muri'uai



mo'au." 'A hau weiana e'abi etibaha, "Obiapaka e, maeao hama'u mahore 'uaina." <sup>60</sup> Iesu ia ehina bena etibaha, "Ti'ari haukia ekia 'ari temehorena, 'a oi moao Tirama ena obia aiarana pouna koiroro aina."

<sup>61</sup> Haeamona hau mo ha e'abi etibaha, "Obiapaka e, au murimuai ka'au, ia maeao 'uai e'u rama haukia herekiaia haparua mahinana." <sup>62</sup> Iesu ena 'abi ebamuena etibaha, "Hau ha 'ani ihuana imanai nia'ina, 'a keiha kabe to'o baihana hauna hanona Tirama ena obia aiarana akana kebabaina hanona a'i ketaina."

## 10

### *Iesu Maearima Imabui Harau Rua Rua Euhunakia.*

<sup>1</sup> Neiana murinai Obiapaka ehore haukia imabui haraurua rua etina'anakia, ikoikiaia baiatakiaia rua rua euhunakia kate'uai kateao ia kipona keao aiarakia mai 'ekakia ikoikiaia. <sup>2</sup> Ehina benakia etibaha, "Umai aniani aba ebo'o harai ia aka haukia mo a'i ebo'o, ua buonai uma poki hauna katonoina, ia kehore aka haukia keuhunakia ena umai kateaka.

<sup>3</sup> Tomoao! Au wai nauhu ahinimi ihobona mamoe nahukia 'abakia, wae ha 'aki baiatakiaia. <sup>4</sup> Mahoa ihuia hiua, pute 'ao tamaka ha a'i katoa'i. Taearai abomo maearima ha kipokia a'i katokikipa. <sup>5</sup> Itu tabanai katokara'au, katohina 'uaina 'abina hauna neiana, 'Baibua hanona itu neianai!' <sup>6</sup> Hau weiana aona kebaibua raninai, wai emi baibua hanona ia ahanai kemiaho. Ia keaha'i raninai emi baibua hanona kemue heremi. <sup>7</sup> Kipokia itu weianai katomiaho oioi, taba tibaibeni haukia katoani 'ao katoinu, pokina aka hauna mai 'arana hanona enamo. Itu ha ha a'i katoao.

<sup>8</sup> Aiara tabana aonai katokatoto, katea'i taeanimi raninai wairamiai taba tekaitina hauna katoana, <sup>9</sup> aiara weianai inawa haukia katoba maurinakia, abomo katohina benakia, katotibaha, "Tirama ena obia aiarana hanona aba nimai heremi." <sup>10</sup> Ia aiara ha aonai katokatoto, a'i katea'i taeanimi raninai katokarahi taearanai kato'abi katotibaha, <sup>11</sup> 'Emi aiara apurorona weiana etau to'ona 'apumaiaia hauna aba tatabu tabu obona niwahi heremi. Weia kato'ioibina Tirama ena obia aiarana

aba herekai.' <sup>12</sup> Au wai nahina benimi, bakai berauranai Sodoma ena haiara ma kenamo 'apua ba aiara weiana ena haiara keapa'ua.

### *Aiara Haukia A'i Teraona Kabe. (Mt 11.20-24)*

<sup>13</sup> "Korasina e! Heremuai hanona keki'a wairai. Betesaida e! Oi abomo heremuai hanona keki'a wairai. Ba ta'u ta'u huri akakia neiakia heremi ai ababai haukia weia Turo mai Sidono aokiai pababai raninai, aba wa'i baha pateraona kabe, habuni ki'a obokia patebatotonakia rabuai pateata patemiati. <sup>14</sup> Bakai berauranai Turo mai Sidono ekia haiara ma kenamo 'apua ba wai 'eumi keapa'ua.

<sup>15</sup> Kaperanauma e! Oi abomu mo. Kipomu pokara'au poao kupa ubinai na nuhoma. Ia aha'i. Oi hanona katetori oboni'o koriri 'ari 'ekana."\*

<sup>16</sup> Iesu i'abana haukia ehina benakia etibaha, "Wai aiami niona hauna au aia'u abomo aba niona, wai nibaki'aniami hauna au abomo nibaki'ana'u, ia au nibaki'ana'u hauna euhuna'u hauna abomo nibaki'ana."

### *Haukia Imabui Haraurua Rua Temue Iesu Herena.*

<sup>17</sup> Haukia imabui haraurua rua teao haeamona mai aonamokia temue herena te'abi tetibaha, "Obiapaka e, oi atamuai auba ki'a obokia tau'u ahinakia hanona aiamai teona." <sup>18</sup> Iesu ia ehina benakia etibaha, "Au Satani kupai e'eho hanona aihana matoha 'imare 'abana. <sup>19</sup> Au hiabu wai aba abenimi, 'erau 'ao hara katoehe 'ininakia abomo 'ou hauna ena hiabu ikoinai katotara haona, taba ha a'i kebamani'aniami. <sup>20</sup> Auba ki'a obokia aiami teona paunai a'i katoaonamo, 'a atami kupai aba terere hauna katoaonamo aina."

### *Iesu Eaonamo. (Mt 11.25-27; 13.16, 17)*

<sup>21</sup> Rani weianai Iesu Auba Robe paunai aona enamo ki'a e'abi etibaha, "Hama'u e, kupa mai hanopaka Obiana nabanamoni'o, pokina taba neiakia aotipa mai aobero haukia herekiaia obuninakia haukia miori papakia herekiaia obawaira tinana. 'E, hama'u, pokina neiana hanona oi emu raona namona. <sup>22</sup> Taba ikoinai hanona Hama'u aba ebaibeni here'uai, Nahuna hauna tai ha a'i e'ioibina ia

\* 10:15: (15) 'ao Hades.

Hamana ikupaianamo, Hamana hauna tai ha a'i e'jobina Nahuna mai nahuna nenuatae ainakia herekiai kebawaira tinana haukia ikupaiaikia mo."

<sup>23</sup> Weiana Iesu eiha kabe i'abana haukia ehinabe buninakia etibaha, "Taba neiakia toihanakia haumi hanona tutai harai toiha tinanakia. <sup>24</sup> Pokina au wai nahina benimi, mahabanai haukia mai aiara obi-akia bo'okia tenuatae wai toiha haukia pateiha ia a'i teiha, tuo'o haukia pateo'o ia a'i teo'o."

### *Ori Ibabataina Samaria Hauna Namona.*

<sup>25</sup> Weia rauhuhu poki hauna ha emikiri Iesu ehobona etibaha, "Ba'iohi haumu e, taba kababaina hanona mauri banaibanai ka'ina?" <sup>26</sup> Iesu ia ena 'abi ebamuena etibaha, "Rauhuhu pukana aonai aea terere aihona? Aea o'iohi aihona?" <sup>27</sup> Ia ena 'abi ebamuena etibaha, "Obiapaka emu Tirama koraona'au aina mai aomu ikoinai, mai aubamu ikoinai, mai taburamu ikoinai, mai emu raona ikoinai, abomo heremu hauna koraona'au aina oi kipomu nuraona'au aini'o 'abana." <sup>28</sup> Iesu ia ena 'abi ebamuena etibaha, "Emu 'abi hanona ebero, na kobabai aiho hanona komauri."

<sup>29</sup> Rauhuhu poki hauna kipona eapaina ebakai bakai etibaha, "Ba here'u hauna hanona tai?" <sup>30</sup> Iesu ia ena 'abi ebamuena etibaha, "Hau ha Ierusalem a eriri Ieriko eao aonai kakikaki haukia tehe abuna, ena habuni tebakurinakia teahu ki'ana herekai mo pe'ari ba tehabona. <sup>31</sup> Rani weianai Robe hauna ha taeara weianai eka'a eao, eihana raninai taeara haia haianai ekabanai. <sup>32</sup> Ihobonaimo Lebi itubuna hauna ha taeara weianai eao, eihana raninai taeara haia haianai ekabanai.

<sup>33</sup> 'A Samaria hauna ha ena kaoao ai hau weiana herenai ekara'au, eihana raninai eaoko'o aina. <sup>34</sup> Eao herena hauna mani'akia tehoru mai bine beinai etaronakia e'apanakia. Ba ena doniki ahanai ebamia'auna, eaoaina iha'ini itunai ua'a e'imana. <sup>35</sup> Erani hau weiana ehore moni rua etara 'aunakia itu iha'inina hauna ebena ehina bena etibaha, 'Ko'ima haraina, herenai bita kone'e hanona e'u mueai 'arakia kabeni'o.' "

<sup>36</sup> Iesu ia ebakaina etibaha, "Oi taba na nuhoma? Hau weiakia teaihau aonai

aeana hauna kakikaki haukia imakiai enouta hauna herena haunai ebaona?" <sup>37</sup> Ia etibaha, "Weiana eaoko'o aina hauna." Iesu ia ehina bena etibaha, "Moao ebabaina ihobona mo kobabaina."

### *Iesu Eao Mareta Mai Maria Herekia.*

<sup>38</sup> Iesu i'abana haukia kipokia taearai teao aiara haeai tekara'au, weia babi'e ha atana Mareta ehore ea'i taeana ena ituai. <sup>39</sup> Ia hatina atana Maria hanona eao Obiapaka aena pokinai emiati ena ba'iohi 'abikia aiakia nio'o. <sup>40</sup> 'A Mareta baki ia'i taeakia a'i a'i haraina ebabaina hanona aona earo'ari, ba emikiri eao Iesu ehina bena etibaha, "Obiapaka e, oi a'i nuraonana hati'u naiana ehobona'u kipo'u aka ikoinai nababai. Mohina bena mebaraina'u." <sup>41</sup> Obiapaka ia ena 'abi ebamuena etibaha, "Mareta e, Mareta e, oi hanona aomu niaro'ari taba bo'okia paukiai nuatetua, <sup>42</sup> ia taba hamona mo nahanuataeai hauna Maria aba enuatae aina, ia herenai a'i katea'i pare 'apuana."

## 11

### *Iesu Bahuba'ari Eba'iohinakia.* (Mt 6.9-13; 7.7-11)

<sup>1</sup> Rani ha Iesu 'eka ha ai ebahuba'ari, ena bahuba'ari epua murinai i'abana haukia ha ehore ehina bena etibaha, "Obiapaka e, bahuba'ari moba'iohinamai Ioane i'abana haukia eba'iohinakia 'abana." <sup>2</sup> Ba Iesu ia ehina benakia etibaha, "Katobahuba'ari raninai na kato'abi aiho.

'Hamamai e.

Oi atamu hanona katabarobena.

Emu obia aiarana kemai.

<sup>3</sup> Rani ikoinai tanuatae aina anianina kobenamai.

<sup>4</sup> Emai ki'a kohina haonakia, pokina ai tibaki'anamai haukia ekia ki'a tahina haonakia.

Abomo baihobo aonai a'i kobakatotonamai.' "

<sup>5</sup> Ia haeamona ehina benakia etibaha, "Wai haumi ha wapuka'a ibuanai peao ena hau ena ituai penoina petibaha, 'E'u hau e, parawa aihau mo pobena'u.

<sup>6</sup> Pokina e'u hau ha ena kaoao aonai emai here'u, karo'ona ia aniani mo here'u aha'i.' <sup>7</sup> Aonai ua'a ke'abi ketibaha, 'Ai kobaro'arina'u, pa'abi hanona aba ikaiahu abomo au naha'u kipokia hanona taparua.

A'i kamikiri taba ha a'i kabeni'o.' <sup>8</sup> Au wai nahina benimi, ena hau paunai ia a'i kemikiri taba ha a'i kebena, 'a ia ena noi 'ariai 'ariai paunai kemikiri, ia nenuataeai tabakia ikoikiai kebena. <sup>9</sup> Haeamona au wai nahina benimi, katonoi hanona katoa'ina, katotabuna hanona katotabu ahina, katohara hara hanona pa'abi ikaikau 'eumi. <sup>10</sup> Weiakia tinoiai haukia hanona tia'i, weiakia tibaitabu haukia hanona titabu ahi, nihara hara hauna 'eunai pa'abi hanona ikaikau.

<sup>11</sup> Wai hama haumi ha nahumu maia penoi raninai 'erau pobena, u? <sup>12</sup> 'Ao ahoi penoi raninai hara pobena, u? <sup>13</sup> Wai ki'a haumi re'a, taba namokia nahumi ibenikia to'iohi. Namo babita Hamami kupai nemiaho hauna Auba Robe tinoi noi aina haukia kebenakia."

*Baika Te'abi Iesu Belesebulo Hiabunai Niaka.*

*(Mt 12.22-30; Mk 3.20-27)*

<sup>14</sup> Iesu ehore 'aiaunu paipaina hau ha aonai eu'u ahina, paipai weiana ekarahi ba e'aiaunu hauna e'abi'abi, teihana haukia teta'u ta'u huri. <sup>15</sup> Ia maearima baika te'abi tetibaha, "Belesebulo paipai ekia obia arana ena hiabuai ia paipai neiakia eu'u ahinakia." <sup>16</sup> Baikā Iesu tehobona ekia nuatae kupa ena hoa ha pebabaina pateihana. <sup>17</sup> Ia Iesu hanona ekia raona e'iohina, ba ehina benakia etibaha, "Hanopaka kipona niwatena ba nibai'oata hanona keki'a, abomo itubu kipona niwatena ba nibai'oata hanona ke'eho. <sup>18</sup> Satani kipona kewatena ba kipona ke'oatana raninai, ena hanopaka aea kekori 'ini aihō? Neiana nahinana pokina wai tu'abi 'Belesebulo ena hiabuai paipai au'u ahinakia.' <sup>19</sup> Au Belesebulo ena hiabuai paipai nau'u ahinakia raninai, tai ena hiabuai wai i'abami haukia tihore paipai teu'u ahinakia? Ua buonai ia katehore wai kateba beronimi. <sup>20</sup> Ia au Tirama ena hiabuai paipai au'u ahinakia raninai, Tirama ena obia aiarana aba ekara'au heremi.

<sup>21</sup> Tabura hauna mai ena pura'a ena itu ke'imana hanona ena kohu ikoikiai katemiaho harai. <sup>22</sup> 'A etabura ki'a hauna ha ia pehuari bena ba peahuna raninai, ena pura'a imanai kea'i obonakia ena kohu ikoikiai kewate otaraina.

<sup>23</sup> Tai'u a'i nitai hauna hanona au ni'oatana'u, au kipokia a'i tabararo bararo hauna hanona nikapo kapo otarainakia.

*Auba Ki'a Obona Emue Ena 'Eka 'Ai'aina.*

*(Mt 12.43-45)*

<sup>24</sup> "Auba ki'a obona ha hau ha aonai nikarahi raninai, 'eka 'ororokia 'ekakiai nikaoao, ena nuatae kearai ia 'eka mo ha aha'i. Kipona ni'abi netibaha, 'Kamue kaeao amiaho 'uai ituna.' <sup>25</sup> Ba emue eao itu hanona aba itaro abomo aba e'oru harai etabu ahina. <sup>26</sup> Weiana ia eao auba ki'a obokia 'akikia 'abaihau hamomo ebaka'anakia, ba teao tetoto weia temiaho, hau weiana ena mauri 'uainai papana enamo, 'a bariu ena mauri aba eki'a ki'a baha."

<sup>27</sup> Iesu 'abi neiakia nehinanakia aonai babi'e ha mako baiatakiai Iesu eiona etibaha, "Oi ebaramani'o mai oi eba'aeni'o babi'ena hanona enamo." <sup>28</sup> 'A Iesu ena 'abi ebaumena etibaha, "Ua a'i kehoma, ia Tirama ena 'abi tiona abomo te'ini bena haukia tenamo ki'a baha."

*Parisea Haukia Tenuatae Hoa Ha Kateihana.*

*(Mt 12.38-42)*

<sup>29</sup> Maearima Iesu teto'u aina aonai, ena 'abi ea'i ramana etibaha, "Uru neiana hanona uru ki'a obona, bata'u ta'u huri hoakia nitabu, ia ha a'i kerama herekiai, Iona ikupaiana mo bata'u ta'u huri hoanai keao. <sup>30</sup> Iona hanona bata'u ta'u huri hoanai eao Nineba haukia herekiai ihobona mo Maearima Nahuna hanona uru neiana herenai. <sup>31</sup> Bakai ranina aonai obia babi'ena Seba kemikiri uru neiana haukia behoai kehorotinakia, pokina ia hanona hanopaka puanai emai Solomona ena aotipa 'abikia keo'o, ia bariu ha neia hanona Solomona etara haona. <sup>32</sup> Bakai ranina aonai Nineba haukia hanona katemikiri uru neiana haukia behoai katehorotinakia pokina Iona ena iroroai teraona kabe, ia bariu ha neia hanona Iona etara haona.

*Ramepa Ihao'auna 'Ekana Tohanai Kohao'auna.*

*(Mt 5.15; 6.22, 23)*

<sup>33</sup> "Hau ha ramepa keba'arana raninai itu bunianai 'ao uro aonai a'i kekai tina, ia ramepa ihao 'auna 'ekana tohanai kehao 'auna ba weia titoto haukia hanona

ea weiana kateihana. <sup>34</sup> Oi mahamu hanona hauanimu ena ramepa, ba oi mahamu enamo raninai hauanimu maikoina abomo ea aonai, ia mahamu keki'a raninai hauanimu maikoina hanona wapura aonai. <sup>35</sup> Ua buonai ko'ima 'ima haraini'o ea aomuai hauna a'i mewapura abuna ta'una. <sup>36</sup> Oi hauanimu maikoinai niea obo papana ha wapura aonai aha'i raninai, maikoina hanona kea obo harai matoha ramepa eana maikoina nibeni'o nibaeani'o 'abana."

*Iesu Rauhuhu Poki Haukia Erikenakia.*  
(Mt 23.1-36; Mk 12.38-40)

<sup>37</sup> Iesu e'abi nonoa raninai, Parisea hauna ha ia enoina terarua kateaniani haeamo buonai ia etoto eao emiati keaniani. <sup>38</sup> Parisea hauna Iesu eihana hanona eta'u ta'u huri, pokina aniani raninai imana a'i eutu. <sup>39</sup> Weiana Obiapaka ia ehina bena etibaha, "Bariu wai Parisea haumi hanona 'ere mai uro kapekia mo toutu harainakia, 'a ia aomi hanona bainao mai ki'a ebonu 'au. <sup>40</sup> Po'o po'o haumi, ia kapena ebabaina hauna, aona abomo a'i ebabaina, u? <sup>41</sup> Ia aonai temiaho tabakia uraru haukia katobenakia. Ba taba ikoikiai aba terau'a wai 'eumiai.

<sup>42</sup> "Parisea haumi e, heremiai hanona keki'a wairai! Pokina emi aniani iba'orimokia mai ibahiabu hiabukia papakia tubahunakia harauhaea aonai hamomona tubaibeni Tirama herenai, 'a Tirama herenai bero mai raona'au pato babaina hauna tohabona. 'A neiana abomo katobabaina, ia weiana abomo a'i katohabona.

<sup>43</sup> "Parisea haumi e, heremiai hanona keki'a wairai! Pokina emi nuatae hanona marea aonai miati 'ekakia namokiai katomiati, abomo kawakawa 'ekakiai katemariki ainimi katebanamonimi.

<sup>44</sup> 'Heremiai keki'a ki'a baha! Pokina wai hanona ihobona 'ariahakia 'ai'aikia 'akikia, maearima a'i te'iohina ahakiai tiaoaia timaiaina Tirama wairanai aba te'opu."

<sup>45</sup> Rauhuhu poki hauna ha ia ehina bena etibaha, "Ba'iohi haumu e, oi nu'abi aiho hanona ai abomo nubahau-maenamai." <sup>46</sup> 'A ia etibaha, "Rauhuhu poki haumi e, heremiai hanona keki'a ki'a baha! Wai maearima iebebe pumakia tubabuanakia, 'a wai kipomi ha iebebe

weiana ena puma aea homana imami kiri'u kiri'una hamona a'i ni'ata 'apuana.

<sup>47</sup> "Heremiai keki'a wairai! Wai hamami mahabanai haukia teahu 'arinakia, ba wai tuhore ekia 'ariahakia tubabainakia. <sup>48</sup> Ua buonai wai hamami ekia babai tubatoha akakia tubaihanakia, pokina ia teahu 'arinakia, wai hanona ekia 'ariahakia tubabainakia.

<sup>49</sup> "Ua paunai Tirama ena 'iohi 'abina etibaha, 'Au mahabanai haukia mai iuhubeau haukia kauhunakia kateao, baika hanona kateahu 'arinakia, baika katebaki'anakia. <sup>50</sup> Weiana paunai hanopaka erama emai mo bariu mahabanai haukia ikoikiai aruarukia tekiki oioi, pumana hanona uru neiana haukia katehoaina.

<sup>51</sup> Abela aruarunai ea'i ramana emai mo Sakaria aruarunai, ia hanona banamo itarana mai marea robena baiatakiwai teahu 'arina. 'E, au wai nahina benimi, pumana hanona uru neiana haukia katehoaina.

<sup>52</sup> "Rauhuhu poki haumi e, heremiai hanona keki'a wairai! Pokina aotipa taearana aba tokaiabuna, wai kipomi a'i katototo, katetoto haukia ekia taeara abomo toehe abuna."

<sup>53</sup> Iesu 'eka weiana nihabona raninai, rauhuhu poki haukia mai Parisea haukia te'oatana, ekia bakaibakai haeai haeai tehina herenai. <sup>54</sup> Ena 'abi te'itimana, ha kehina ki'ana raninai katebato'ona.

## 12

*Bai'oi Haukia Ekia Hoahoa Taikia A'i Katotai.*

(Mt 10.26, 27)

<sup>1</sup> Rani weianai maearima bo'ona 'akina tebaehe aina, 'a Iesu i'abana haukia eba'iohi 'uainakia etibaha, "Parisea haukia ekia bai'oi akana herenai Kato'ima 'ima harainimi weiana hanona bakupu muramurana 'abana. <sup>2</sup> 'A tebahu abunakia tabakia ikoikiai katekarahi abomo tehore buninakia tabakia ikoikiai kate'iohi. <sup>3</sup> Wapura aonai taba ohinana hauna beraura eanai kateona abomo ikaihuri aonai haianai obatete aina hauna itu kapenai kateiroro aina.

*Tirama Ikupaiana Mo Kahata'u aina.*  
(Mt 10.28-31)



<sup>4</sup> “E'u hau e, au wai nahina benimi. Hauani iahu'arina mo te'jobina ia murinai taba ha ahanai a'i katebabai muena haukia a'i katota'u ainakia. <sup>5</sup> Ia katota'u aina hauna au kahore kaba'jobinimi. Ia hanona hauanimiti keahu 'arina murinai mai ena hiabu ni'ara banai banai irubana aonai kekapo 'aunimiti hauna Tiramana katota'u aina.

<sup>6</sup> Komure ima pahakawanakia 'arakia toea rua mo. 'A Tirama hanona weiakia ha a'i ereana. <sup>7</sup> 'Abi tohana, bui bita aramiai haukia aba etuabi orenakia. A'i katota'u, wai hanona komure bo'okia aba totara haonakia.

*Iesu Pouna Kahahinana, Ia A'i Kaha-haumaeta.*

(Mt 10.32, 33; 12.32; 10.19, 20)

<sup>8</sup> “Au wai nahina benimi. Hau ha au pou'u kehinana maearima wairakiai, Maearima Nahuna abomo Tirama ena aneru wairakiai ia pouna kehinana. <sup>9</sup> 'A maearima wairakiai au kebuniaina'u hauna abomo Tirama ena aneru wairakiai au ia kabuniaina.

<sup>10</sup> Hau ha Maearima Nahuna herenai ke'abi ki'a hanona aba kehina haona ia hau ha Auba Robe herenai ke'abi ki'a hanona a'i kehina haona.

<sup>11</sup> “Kateaoainimiti marea obiakia rauhubu mai hiabu haukia wairakiai raninai, aomu a'i kearo 'ari ekia 'abi aea kobamue aihona 'ao oi aea ko'abi aiho. <sup>12</sup> Pokina rani weianai Auba Robe kehore oi taba ko'uahina hauna aba keba'jobini'o.”

*'Abi Iabataina Kepu Hauna Ao'abaeana.*

<sup>13</sup> To'u aonai hau ha Iesu ehina bena etibaha, “Ba'jobi haumu e. A'a'u mohina bena emai kohu hamamai e'ari boinakia haukia tararua baiatamai ai mewatenakia.” <sup>14</sup> Iesu ia ena 'abi ebamuena etibaha, “Hau e, tai au ea'i taeana'u emi bakai kababaina abomo emi kohu kawatenakia?” <sup>15</sup> Ba maearima ehina benakia etibaha, “Kato'inibeni harainimiti kohu a'i katouhoreai ki'a baha, pokina maearima ena mauri tohana hanona ena kohu bo'onai a'i nimai.”

<sup>16</sup> Iesu 'abi ibabatatai ha ehina benakia. “Herenai kepu ebo'o hauna ha ena hanoai uma anikia bo'ona etabu ahinakia. <sup>17</sup> Ba kipona aonai eraona raona etibaha, “Taba kababaina? 'Eka aha'i, 'eka tabanai e'u ube kahorotinakia.” <sup>18</sup> Haeamona etibaha, ‘Na kababai aiho,

paraboa 'ai'aina karubuna apa'uana ha mahamahana kababaina, ba e'u biraura aniani ubekia mai e'u kohu ikoikiai weia kahorotinakia. <sup>19</sup> Au kipo'u ka'abi katibaha, “Au hanona taba namokia here'u aba ebo'o harai aro'anakia ihau bo'okia 'eukia. Bariu karai kaniani kainuinu kaonamo harai.” <sup>20</sup> 'A Tirama ehore ehina bena etibaha, ‘Po'o haumu e! Bariu rabi neianai au oi emu mauri ka'i obona raninai naiakia oro'anakia haukia hanona tai kea'inakia?’” <sup>21</sup> Ba Iesu ena 'abi orenai etibaha, “Neiana hanona maearima ha kipona ena taba nibararonakia ia kipona 'euna, ia Tirama wairai hanona ena ibararo a'i ebo'o.”

*Aomi A'i Kearo'ari.*

(Mt 6.25-34)

<sup>22</sup> Ba Iesu i'abana haukia ehina benakia etibaha, “Weiana buonai au wai nahina benimi. Emi mauri paunai taba patoana 'ao haumiai taba patobatotona hauna aomi a'i kebaro 'arina. <sup>23</sup> Pokina mauri hanona eapa'ua ba aniani hauani abomo eapa'ua ba habuni. <sup>24</sup> 'Aokakara katoraonanakia. Aniani a'i tibato 'ao eueu berauranai aniani a'i tibararo abomo ekia rerea 'ekana aha'i ia Tirama akia nibenakia. Ia wai hanona roborobo totara haonakia. <sup>25</sup> Oi tai ha emu ao aro'ariai haumu papana pebahoma'ana hanona petaina, 'ao? <sup>26</sup> Weiana taba papakia neiakia ibabaikia a'i to'jobi raninai aehoma buonai taba haeai haeai aomi tibararo 'arinakia.

<sup>27</sup> “Bebetutiti'omu hanona katoihanakia. Kipokia habuni akana a'i tibabaina. Ia au wai nahina benimi. Solomona obia arana ena habuni tenuabi ki'a, iamo bebetu neiana hanona enamo ki'a baha ba Solomona ena habuni. <sup>28</sup> Tirama kipona hano tubukia nibataitainakia bariu timauri mara kate'ororo irubai kahakapo 'aunakia kate'ara. Tirama ehore ua nibataitai aihonakia, ia wai habuni a'i nibabatotonimiti, u? A'ikakauma papana haumi. <sup>29</sup> Aomi taba patoana mai patoinu hauna a'i katotabuna, weiakia aomi a'i katebaro 'arina. <sup>30</sup> Hanopaka neiana aonai Tirama a'i tia'ikakaumana haukia ikoikiai taba neiakia titabunakia, ia Hamami kupai hauna taba neiakia tonuatae ainakia ikoikiai aba e'jobinakia. <sup>31</sup> Tirama ena obia aiarana katotabu 'uaina hanona neiakia ikoikiai wai kebenimii.”

<sup>32</sup> “To'u papana haumi e. A'i katota'u, pokina Hamami mai aonamona ena aiara kebenimi. <sup>33</sup> Emi kohu katokawa kawainakia monikia uraru haukia katobenakia, a'i neki'a 'apua mahoa ihuua ihuana katoba'oruna 'eumi, kupa kepuna a'i niore 'apua hauna katoa'ina. Bainao ha weia a'i niao abomo muhi taba weia ha a'i tia'i ki'ana. <sup>34</sup> Pokina emi kepu nemiaho 'ekana hanona wai aomi abomo weia.”

*Ta'ara'i Hauna Namona Nibai'ima.*  
(Mt 24.45-51)

<sup>35</sup> “Emi habuni katohai 'ininakia abomo emi ramepa hanona katoba'aranakia katobai'ima. <sup>36</sup> Wai hanona ihobona bai'ima haukia 'abakia, ekia poki hauna hawainibe mahamaha 'ekana kemue kemai te'imana. Ba kemai pa'abi kehara harana raninai pa'abi beronai mo katekaikauna. <sup>37</sup> Ta'ara a'i haukia tibai'ima oho aonai ekia poki hauna kemai ketabu ahinakia hanona enamo. 'Abi tohana au wai nahina benimi. Poki hauna kipona ena habuni kehahi 'inina ekia aniani 'ekana kebamiatinakia, kero'onakia ekia aka kebabaina. <sup>38</sup> Rabi wapuka'a 'ao kokoro'u ti'arara aonai ta'ara a'i haukia tibai'ima oho aonai ekia poki hauna ketabu ahinakia hanona tenamo.

<sup>39</sup> Neiana kato'iohi haraina. Itu poki hauna bainao hauna ena mai ranina ke'iohi 'uaina raninai ena itu ke'imana a'i kepa'a. <sup>40</sup> Wai abomo katoba'oru, pokina a'i to'iohina rani tabanai Maearima Nahuna kemai.”

*'Abi Ibabatana, Aka Hauna Namona Mai Aka Hauna Ki'a Obona.*

<sup>41</sup> Petero Iesu ebakaina etibaha, “Obiapaka e, 'abi ibabatana neiana ai ikupaia-mai heremai ai nohinana 'ao maearima ikoikia abomo?” <sup>42</sup> Obiapaka e'abi etibaha, “Tai aia iona mai ao bero hauna, ia ena poki hauna hiabu ebena ena itu kohukia keiha 'ini, weia ta'ara a'i haukia ekia aniani beraurakia tohakai kebenakia? <sup>43</sup> 'Ima'ima hauna weiana ena poki hauna ena mueai ua niaka harai aiho ketabu ahina hanona enamo. <sup>44</sup> 'Abi tohana au wai nahina benimi. Poki hauna kehore 'ima hauna kebapokina ena kohu ikoikia ke'imanakia. <sup>45</sup> Ia 'ima'ima hauna kipona ke'abi ketibaha, “E'u poki hauna a'i kemai baha,” ba ia kehore ta'ara a'i haukia mai babi'ekia ke'atinakia keani ani keinu inu

keinuu 'ari. <sup>46</sup> Rani ha 'ima'ima hauna a'i eraonana a'i eba'oru aonai ena poki hauna kekara'au hanona ia kekabe kabe hurina, puma kebena matoha aia a'i tiona haukia 'abana.

<sup>47</sup> “'Ima'ima hauna ena poki hauna ena nuatae akana e'iohina kebabaina ia a'i eba'oru mai a'i ebabainakia, hau weiana hanona i'ati bo'ona katebena. <sup>48</sup> 'A 'iohi aha'i hauna ena aka ki'a 'arana hanona kate'atina ia i'ati 'ama'amana katebena. Taba bo'ona tebena hauna herenai taba bo'ona katenuataeai, taba bo'ona ke'imanakia hauna herenai taba bo'ona katenoiai.”

*Iesu Emi Hanona Baiata Kehorena.*  
(Mt 10.34-36)

<sup>49</sup> “Au hanona iruba amaiaina hanopaka ahanai, e'u nuatae pe'ara biai. <sup>50</sup> Au hanona 'uererobe ha ka'ina weiana kaopuma aina keaomo kabaore haraina. <sup>51</sup> Wai turaonana Au amai hanona baibua amaiaina hanopaka, 'u? Au wai nahina benimi, aha'i. Baibua aha'i ia hoa hore. <sup>52</sup> Bariu wairaka kahaeoaina, rama ha aonai haukia ima baiatakiai katehoa hore, aihau katehore rua kate'oatanakia abomo rua katehore aihau kate'oatanakia. <sup>53</sup> Ia baiatakiai katehoa hore, hama kehore nahu hauna ke'oatana, nahuna kehore hamana ke'oatana, hina kehore nahuna babi'ena ke'oatana, nahu babi'ena kehore hinana ke'oatana, hinana kehore rawana babi'ena ke'oatana, rawa babi'ena kehore hinana ke'oatana.”

*Maearima Rani Tabana Obo A'i Teobo.*  
(Mt 16.2, 3)

<sup>54</sup> Iesu haeamona to'u haukia ehina benakia etibaha, “Tibotaina tainai 'auhao ha kemikiri katoihana raninai beronai kato'abi katotibaha, 'Abara ketibo,' hanona nirama. <sup>55</sup> Ahitai tibo baurana niabu raninai wai tu'abi totibaha, 'Beraura kehiabu,' hanona nirama. <sup>56</sup> Bahaorea haumi e. Wai hanopakai mai kupai taba Tirama hanona 'abikia to'iohi, ia aehoma buonai bariu rani neianai nirama hauna 'abina a'i to'iohina?

*Bakiai Ehorotini'o Hauna Ohi Emi Aetua Kobaberona.*  
(Mt 5.25, 26)

<sup>57</sup> “Aehoma buonai wai kipomi ibaberomi raonana a'i tubabaina? <sup>58</sup> Oi behoai ehorotini'o hauna keaoaini'o bakai 'ekana, a'i niaoai bahani'o bakai 'ekana

raninai taeara namona kotabuna torarua emi atetua kobaberona, keaha'i raninai keaoaini'o kebabakaini'o hauna herenai, ba ia kehore keaoaini'o habuni hauna herena, ba habuni hauna wapura 'ekanai kehorotini'o. <sup>59</sup> Au wai nahina benimi, weia a'i katokarahi 'apua keaomo 'ara maikoinai katohore orena."

## 13

### *Iesu Maearima Ehina benakia Kateraona Kabe.*

<sup>1</sup> Rani weianai baika Iesu haiantai Galilea haukia poukia tehinana, ekia ibeni tibabaina Tirama herenai raninai Pilato ena huari haukia euhunakia teahu 'arinakia aruarukia mahi aruarukia kipokia teutena. <sup>2</sup> Iesu ekia 'abi ebamuena etibaha, "Pokina Galilea haukia weiakia ua teahu aihonakia, wai turaonana Galilea haukia weiakia te'ari haukia ekia ki'a teapa'ua ki'a baha ba Galilea temiaho haukia ekia ki'a? <sup>3</sup> Au wai nahina benimi. Aha'i. Wai a'i katoraona kabe raninai, ikoimiai hanona ua kato'ari aiho. <sup>4</sup> Wai turaonana weiakia haukia harauhaea 'ababani Siloama ai itu ro'ena epobu aonai te'ari haukia ekia ki'a teapa'ua ki'a baha ba baika Ierusalema ai temiaho haukia ekia ki'a? <sup>5</sup> Au wai nahina benimi. Aha'i. Wai a'i katoraona kabe raninai ikoimiai hanona ua kato'ari aiho."

### *'Abi Iabataina, Matiu Ki'a Obona Buana Aha'i.*

<sup>6</sup> Iesu 'abi ibabatatai ha ehinana etibaha, "Hau ha suke matiuna ha ebatona ena bine haharuana aonai, muriai eao buana erarainakia ia ha a'i etabu ahina. <sup>7</sup> Weiana ia haharua ne'imana hauna ehina bena etibaha, 'Ihau aihau nakai mue matiu neiana buana ararainakia, ia ha a'i natabu ahina. Mo'ui rabu taina. Taba buonai hano namona kebaore 'abaeana?' <sup>8</sup> Haharua ne'imana hauna etibaha, 'E'u poki haumu e. Mohabo 'abaeana ihau neiana hamona memiaho. Au pokina ka'ani kakaiarona kabahuna. <sup>9</sup> Ihau wairai buana baika katerama hanona enamo, aha'i raninai ia hanona i'ui kea'ina."

### *Beraura Robenai Iesu Kapena Ebarara Babi'ena Ebanamona.*

<sup>10</sup> Beraura robenai Iesu Iuda haukia ekia marea ha aonai eba'iohi, <sup>11</sup> babi'e ha weia auba ki'a obona ha ehore

ebainawana ihauna harauhaea 'ababani kapena ebarara, kipona kebaberonanona a'i etaina. <sup>12</sup> Iesu babi'e weiana eihana raninai eaparina etibaha, "Babi'e e! Aba enamo. Emu inawa aba epua." <sup>13</sup> Weiana Iesu imana babi'e ahanai ehao 'au raninai, beronai kapena ebero, ba emikiri Tirama ebanamona. <sup>14</sup> Marea poki hauna eopuere, pokina Iesu beraura robenai ebamauri paunai. Ia maearima ehina benakia etibaha, "Wapu 'abaihanona wai emi aka wapukia. Beraura weiakiai katomai kebamaurinimi, ia beraura robenai aha'i." <sup>15</sup> Obiapaka ia ena 'abi ebamuena etibaha, "Wai bahaorea haumi! Wai ha Beraura robenai emi poromakau 'ao emi toniki 'ekakiai a'i torubunakia bei 'urina a'i tuaoainakia, u? <sup>16</sup> Babi'e neiana hanona Aberahamo ena itubu babi'ena. Satani ia ebainawana ihauna aba harauhaea 'ababani. Ba Beraura robe aonai ia bamauri a'i pea'ina, u?" <sup>17</sup> Iesu ia ena 'abi ua ebamue aihona hanona ti'oatana haukia ikoikiai tehaumaea ki'a, 'a to'u haukia ikoikia teonamo aka nuabikia weiakia ebabainakia paukiai.

### *'Abi Iabataina Tuaba Uhona.* (Mt 13.31, 32; Mk 4.30-32)

<sup>18</sup> Iesu ebakai bakai etibaha, "Tirama ena obia aiarana ibabataina taba? Tabai kababataina? <sup>19</sup> Ia hanona ihobona tuaba uhona papana, weiana hau ha ea'ina ena umai ebatona e'omu matiu rarina eao renai 'ubi roborobokia ekia ni'i terobekia."

### *'Abi Iabataina Bakupu Muramurana.* (Mt 13.33)

<sup>20</sup> Haeamona e'abi etibaha, "Tirama ena obia aiarana tabai kababataina? <sup>21</sup> Ia hanona ihobona bakupu muramurana, weiana babi'e ha ea'ina parawa bo'ona uro aonai kipokia euta haeamona, euna eao mo maikoinai ekupu."

### *Tirama Ena Obia Aiarana Taearana E'omo'omo.* (Mt 7.13, 14, 21-23)

<sup>22</sup> Iesu ena kaoao Ierusalema taearanai eao aonai, aiara apa'uakia mai papakia aokiai maearima eba'iohinakia. <sup>23</sup> Hau ha Iesu ebakaina etibaha, "Obiapaka e! Maearima tebabita 'akimo katemaui, 'ao?" Ia ena 'abi ebamuena etibaha,

24 “Katotabura katoao pa'abi 'omo'omonai katototo. Pokina au wai nahina benimi, maearima bo'ona katenuatae katetoto ia a'i ketainakia. 25 Itu poki hauna kemikiri pa'abi kekaiabuna murinai, wai atapakai katokoroti ba pa'abi katohara harana katotibaha, ‘Obiapaka e, pa'abi mokaikauna tamatoto.’ ‘A ia emi 'abi kebamuena ketibaha, ‘Wai ae'eai tomai, au a'i a'io binimi.’ 26 Ba wai kato'abi katotibaha, ‘Ai oi kipokia hanona haniani mai hainuinu haeamo, abomo emai aiarai oba'io bi.’ 27 ‘A ia ketibaha, ‘Wai ae'eai tomai, au a'i a'io binimi, ki'a ibabaina haumi ikoimiai tomokatu'a here'u ai.’ 28 Weia mahami keao Aberahamo, Isako, Iakobo mai mahabanai haukia ikoiki ai Tirama ena obia aiaranai katoihanakia, ia wai aba katetori ahinimi atapakai raninai, wai hanona katohai 'aki 'akimi katoarao'i arao'i. 29 Maearima hanona taetanai tibo tainai mai toto tainai ahi tainai katemai tatu 'ekana i katemiati Tirama ena obia aiarana aonai. 30 Ba baika temurihai haukia hanona kate'u ai, ia baika te'u ai haukia hanona katemurihai.”

*Iesu Ierusalem a Eako'o aina.  
(Mt 23.37-39)*

31 Rani weianai Parisea haukia baika temai Iesu herena tehina bena tetibaha, “‘Eka neiana kohabona koao 'eka haeai, pokina Heroda nenuatae keahu 'arini'o.’” 32 Iesu ekia 'abi ebamuena etibaha, “‘Tomao, waeha 'aki weiana katohina bena. Au bariu mara hanona auba ki'a obokia nau'u ahinakia mai inawa haukia nabanamonakia, ba rani ibaihaunai e'u aka maikoinai kabaorena. 33 'A au bariu mara mai erani hanona kaka'a kaeao, pokina mahabanai hauna hanona 'eka haeai a'i ke'ari, ia Ierusalem ai mo.’”

34 “Ierusalem a e, Ierusalem a e, oi ohore mahabanai haukia oahu 'arinakia, abomo Tirama euhunakia haukia piharai oahu 'arinakia. Rani bita au anuatae nahumu ikoinai ka'umu abunakia matoha kokoro'u hina nahuna ne'umu abunakia 'abana, ia wai hanona a'i tonuatae aina'u. 35 Weiana emu itu hanona ke'aburu. Au wai nahina benimi, a'i katoiha muena'u keaomo rani ha kemai ba katotibaha, ‘Obiapaka atanai nimai hauna hamabana-mona.’”

## 14

*Iesu Beraura Robeai Hau Ha Ebana-mona.*

1 Beraura robena ha ai Iesu eao Parisea ekia poki hauna ha ena ituai kateaniani haeamo, ba baika hanona ia teiha 'ini haraina. 2 Weia bua haiarana hauna ha Iesu wairanai emiati. 3 Iesu emikiri Parisea haukia mai rauhuhu poki haukia ebakainakia etibaha, “‘Kahabamauri Beraura robenai hanona mai rauhuhuna 'ao aha'i?’” 4 ‘A ia 'abi ha'i tehinana. Ba Iesu emikiri hau weiana ea'ina ebamaurina euhuna eka'a. 5 Haeamona ehina benakia etibaha, “‘Wai ha beraura robenai nahumu 'ao emu poromakau 'uriai petoa raninai, a'i ponoanoa ia a'i poberi 'auna, u?’” 6 Ena 'abi katebamuena taearana aha'i.

*Kipomu A'i Kobapa'uani'o.*

7 Iesu baki haukia ekia miati 'ekakia namokia tetina'anakia eihanakia raninai, 'abi ibabatai neiana ehinabenakia. 8 “‘Hau ha ena beaubeau kemai heremu ena hawainibe tatuna koao raninai, miati 'ekana namona 'akinai a'i komiati, pokina a'i o'io bina tatu poki hauna oi aramuai hauna ha aba ehina bena. 9 Tatu poki hauna torarua ebeaunimi hauna kemai heremu kehina beni'o ketibaha, ‘Imia'au naiana mohabona, hau neiana naia kemia'au.’ Ba oi hanona mai haumaeamu koao muriai temiati haukia herekiai wa'a katomiati. 10 ‘A beaubeau kemai heremu raninai koao muriai komiati, ba ebeauni'o hauna kemai heremu ketibaha, ‘E'u hau e, oi emu imia'au hanona neiana 'ubiai.’ Tatu weiana aonai tetoto haukia ikoiki ai oi mo katebanamoni'o. 11 Hau ha kipona kebapa'uana hanona katebaririna, 'a kipona kebaririna hauna hanona katebapa'uana.’”

*Emu Tatu Aonai Uraru Haukia Kobeau-nakia.*

12 Iesu tatu poki hauna ehina bena etibaha, “‘Atiaha 'ao rabirabi anianina koba'oruna raninai, emu hau, uaho'abamu, hatia'amu 'ao obia haukia a'i kobeau-nakia, pokina ia abokiamo oi katebeauni'o 'eumu 'arana katehorena. 13 'A oi tatu ha kobabaina raninai, uraru, kaiti, 'ome mai 'iau haukia kobeau-nakia. 14 Weianai oi banamo koa'ina, pokina 'eumu 'arana a'i katehorena, ia aka



bero haukia ibamikiri muekiai 'aramu koa'ina."

*Ori Ibabataina Tatu Rarina Ha.*  
(Mt 22.1-10)

<sup>15</sup> Weia kipokia tianiani haeamo hauna ha aia neiana eona, ba ia Iesu ehina bena etibaha, "Tirama ena obia aiaranai kateaniani haukia hanona katenamo."

<sup>16</sup> Iesu ena 'abi ebamuena etibaha, "Hau ha tatu rarina 'akina ha ebabaina, ba maearima bo'okia ebeaunakia. <sup>17</sup> Tatu anianikia teba'orunakia aonai, ena ta'ara a'i hauna euhuna enuatae ainakia haukia kehina benakia etibaha, "Tomai taba ikoikiai aba te'oru."

<sup>18</sup> 'A ia ikoikiai teubo. Ba kori'uaina hauna ta'ara a'i hauna ehina bena etibaha, 'Au hanona hano ha akawana, ua buonai kaeao kaihana. Emu poki hauna kohina bena, a'i kawahi.'

<sup>19</sup> Ha etibaha, 'Au hanona bariumo e'u poromakau harau haea akawanakia, ba aba naeao kabahobonakia, emu poki hauna kohina bena, a'i kawahi.'

<sup>20</sup> Haeamona ha etibaha, 'Au hanona bariu mo ahawainibe, buonai a'i kawahi.'

<sup>21</sup> "Ta'ara a'i hauna emue emai ena poki hauna eba'jobina, ba poki hauna eopuere wairai, ena ta'ara a'i hauna euhuna etibaha, 'Moao biai aiara ibuakiai mai ikariri 'ekakiai, uraru haukia, kaiti haukia, 'iau haukia, 'ome haukia komaianakia.'

<sup>22</sup> "Ba ta'ara a'i hauna eao aka weiana ebabaina emue emai ia ehina bena etibaha, 'Poki haumu e, ohina bena'u akana aba ababaina, ia miati 'ekana mo a'i ebonu.' <sup>23</sup> Ba poki hauna haeamona ena ta'ara a'i hauna ehina bena etibaha, 'Moao aiara aokiai mai ara pokikiai temiati haukia komaianakia, e'u itu katemia bonuna. <sup>24</sup> Au wai nahina benimi. Abeau 'uainakia haukia ha au e'u tatu anianina ha a'i kateani 'apuana.'"

*Koraona Harai 'Uaina Ba Iesu Murinai Ko'au.*  
(Mt 10.37, 38)

<sup>25</sup> Mako rarina Iesu kipokia teao, ba ekori kabe ehina benakia etibaha, <sup>26</sup> "Hau ha here'u kemai raninai ia hamana 'ao hinana, atawana 'ao nahuna, uaho'abana 'ao haibuna, abomo ia kipona ena mauri keraona apa'uana hauna au i'aba'u ai a'i keao. <sup>27</sup> Abomo hau ha kipona ena matiu

ibiri ropo a'i kebuana muri'u a'i kemai hauna hanona au i'aba'u haunai a'i keao.

<sup>28</sup> "Wai ha nonuatae itu ro'ena ha kobakorina raninai, oi komiati 'arana bita hanona kobahu 'uaina, itu weiana kobaorena monina aba ketaina, 'ao?"

<sup>29</sup> Itu weiana eabai ramana, hoborona ebakoroti ia 'ubina a'i kebaorena raninai kateihana haukia ikoikiai kateiriri aina,

<sup>30</sup> kate'abi katetibaha, 'Hau neiana ena itu akana ea'i ramana, ia kebaorena hanona a'i etaina.'

<sup>31</sup> "Ihobona obia 'arana ha pemikiri obia 'arana ha pehuari bena raninai, pemiati 'uai peraona raona ia ena huari haukia taha harau haea ai kehore huari haukia weiakia taha harau rua timai haukia kehuari benakia hanona aba ketaina 'ao?" <sup>32</sup> A'i ketaina raninai, weia atau'ai temiaho oho aonai, ena iuhubeau hauna ha keuhuna keao, baibua 'abina katerobahu aina. <sup>33</sup> Ihobonaimo wai ha emu taba ikoikiai a'i kohabonakia raninai, oi hanona au i'aba'u haumuai a'i koao.

*Kikimaru Ena 'Aku'aku A'i Me'akauma.*  
(Mt 5.13; Mk 9.50)

<sup>34</sup> "Kikimaru hanona taba namona, ia kikimaru 'aku'akuna ke'akauma raninai aea kahaba'aku mue aihona?" <sup>35</sup> Ia hanona hano mai batobato tabakia ibanamokia tabanai aha'i, ia hanona kahane'ena mo. Mai haiana hauna hanona ke'jobina."

## 15

*Ori Ibabataina Mamoe Eka'a 'Akau-  
mana.*  
(Mt 18.12-14)

<sup>1</sup> Moni bararo haukia mai aka ki'a haukia ikoikiai temai Iesu herena aiana kateona. <sup>2</sup> 'A Parisea haukia mai Rauhuhu poki haukia hanona teururu tetibaha, "Hau neiana hanona aka ki'a haukia nia'i taeanakia mai kipokia 'eka hamonai tianiani."

<sup>3</sup> Weianai Iesu ehore 'abi ibabatani neiana ehinana ia herekiai e'abi etibaha, <sup>4</sup> "Hau ha wai baiatamiai ena mamoe hinabu hamomona. Ia hamona pe'akauma raninai, imabui baria bui 'ababani hamomo 'eka 'abaeana pehabonakia, ia weiana e'akauma hauna murinai peao petabuna petabu ahina.

<sup>5</sup> Petabu ahina raninai aronai pebuana mai aonamona, <sup>6</sup> peaoaina ena aiara. Ena

hau mai herenai temiaho haukia pebeau-nakia, patemai herena pehina benakia petibaha, 'Hamaonamo haeamo, pokina e'u mamoe e'akauma hauna aba atabu ahina.'<sup>7</sup> Au wai nahina benimi. Ihobonai mo weia kupai aonamo keapa'ua, pokina neia ki'a hauna hamona eraona kabe paunai, ia bero haukia weiakia imabui bariabui 'ababani hamomo raona kabe a'i tenuatae aina haukia paukiai aha'i.

*Ori Ibabataina Koini E'akauma.*

<sup>8</sup> "Babi'e ha ena Kina harau haea, ba hamona peba'akaumana raninai, ramepa peba'arana, ena itu aona petarona, 'eka maikoina peiha haraina peamo petabu ahina.<sup>9</sup> Petabu ahina raninai, ena hau mai herenai temiaho haukia pebeau-nakia, patemai herena, pe'abi petibaha, 'Hamaonamo, pokina e'u koini hamona e'akauma hauna aba atabu ahina.'<sup>10</sup> Au wai nahina benimi. Ihobonai mo, ki'a hauna hamona keraona kabe raninai, Tirama ena aneru wairakiai aonamo keapa'ua."

*Ori Ibabataina Miori Eka'a 'Akaumana.*

<sup>11</sup> Iesu haeamona etibaha, "Hau ha nahuna rua.<sup>12</sup> Miori i'irina hamana ehina bena etibaha, 'Hama'u e, emu kohu powatenakia, au 'eu'u hanona kobena'u.' Weiana hamana ehore ena kohu ewatenakia terarua herekiai.<sup>13</sup> Wapu baika teao murinai, miori i'irina ena taba ea'i a'i harai, emikiri eao hanopaka haeai ha, weia mauri ki'a obonai ena kohu epapurai 'abaeanakia.<sup>14</sup> Ena kohu ikoikiai ebaorenakia murinai, hano weianai arobo rarina ekara'au, ia hanona aba neuraru.<sup>15</sup> Ba emikiri eao hano weiana hauna ha herenai emiaho, hau weiana ehore euhuna eao aiporo 'ima 'ekanai aiporo e'imanakia.<sup>16</sup> Mare'a e'ari buonai aiporo ekia aniani harua peani nuana ke'ini hauna eraonana, ia tai ha aniani a'i ebena.

<sup>17</sup> "Weiana ia eraona raona harai aonai etibaha, 'Hama'u hanona mai ena aka haukia tebo'o, mai ekia aniani harikia, 'a au neia mare'a keba'arina'u.<sup>18</sup> Au kamikiri kaeao hama'u herena kahina bena katibaha, Hama'u e, Tirama wairanai mai oi wairamuai aba aka ki'a.<sup>19</sup> Nahumuai kaeao hanona a'i ketaina, ia emu aka hauna ha ai kobaona'u.'<sup>20</sup> Weiana emikiri keao hamana herena.

Taeurai nika'a oho aonai, hamana atau'ai mahana eao nahuna nimai eihana eaoko'o aina ebeau eao nahuna huanai era'una epauna.<sup>21</sup> 'A miori etibaha, 'Hama'u e, Tirama wairanai mai oi wairamuai aba aka ki'a. Nahumuai kobaona'u hanona a'i ketaina.'<sup>22</sup> 'A hamana hanona ena ta'ara a'i haukia ehina benakia etibaha, "Tomoao, habuni namoabuna ha tomaiai biaina katobabatotona, imana kiri'unai rini ha katohorotina, mai tamaka abomo ha aenai katobaba'auna.<sup>23</sup> Aniani poromakauna nahu namona ha katomaiaina katoahu 'arina, kahatatu kahaonamo.<sup>24</sup> Pokina naha'u neiana hanona e'ari ia emauri mue, e'akauma ia atabu ahi muena.' Ba aonamo tea'i ramana.

<sup>25</sup> "Beraura weianai hau pakana hanona ua'a umai. Ena mueai, eao itu herenai hanona hui mai ewa 'urukia eo'o.<sup>26</sup> Ba emikiri ta'ara a'i hauna ha eaparina ebakaina, 'Weiana taba nirama?'<sup>27</sup> Ta'ara a'i hauna e'abi etibaha, 'Oi hatimu aba emai, hamamu ehore aniani poromakauna nahu namona ha eahu 'arina, pokina ia hanona maurina abomo namona emue etabu ahina.'<sup>28</sup> Hau pakana aona eopuere, ebaki'a a'i eka-toto. Ba hamana ekarahi eao herena eba'amena.<sup>29</sup> 'A ia hamana ehina bena etibaha, 'Moihana! I hau neiakia ikoikiai au oi ta'aramu a'i emu 'abi ha a'i abaki'ana. Ia oi nani nahu ha a'i obena'u, e'u hau kipokia a'i taonamo.<sup>30</sup> 'A nahumu naiana hanona rea babi'ekia herekiai emu kohu ebaorenakia hauna, emai aiara raninai omikiri aniani poromakauna nahu namona oahu 'arina ia 'euna.'

<sup>31</sup> "Hamana etibaha, 'Naha'u e, oi hanona rani ikoinai au here'uai omiaho, taba neiakia au 'e'u haukia ikoikiai hanona oi 'eumu.<sup>32</sup> Ia aika hanona kahaonamo, kahaonamo ki'a baha, pokina oi hatimu neiana hanona e'ari haeamona emauri, e'akauma haeamona hatabu ahina.'"

## 16

*Ori Ibabataina Kohu 'Ima Hauna Ki'a Obona Ena Aotipa.*

<sup>1</sup> Iesu ehore i'abana haukia ehina benakia etibaha, "Obia hauna ha mai ena kohu i'imana hauna ha, ba maearima baika tehore tehinau aina 'ima hauna

hanona ena poki hauna ena kohu ni-papura ainakia. <sup>2</sup> Ba obia hauna emikiri eaparina emai ehina bena etibaha, 'Emu aka aonai hanona taba ha 'uruna aona, emu bai'ima akakia koba'iohina'u pokina oi e'u kohu i'imakiaia hanona a'i ketaina.'

<sup>3</sup> "Kohu 'ima hauna aonai e'abi etibaha, 'Au bariu aea kababai aiho? E'u poki hauna aka neianai aba keba'okona'u, ka'ani ia a'i mo atabura kanoi ia e'u haumaeamo eabu. <sup>4</sup> Au taeara ha aba naraonana aea kababai aiho. E'u akai kea'i obona'u raninai e'u hau baika katehore katea'i taeana'u ekia ituai.' <sup>5</sup> Weiana ena poki hauna herenai tea'i 'abaea 'uai haukia ha ha eaparinakia. E'uai hauna ebakaina etibaha, 'Oi e'u poki hauna herenai oa'i 'abaea hanona bita?' <sup>6</sup> Ia etibaha, 'Tehoro puoukia hinabu hamomona.' Ba 'ima hauna ehina bena etibaha, 'Oa'i 'abaea 'uai pepana neiana, momiati, naia pepai imabui korereana.' <sup>7</sup> Haeamona hau ibaruana ebakaina etibaha, 'Oi oa'i 'abaea 'uai hanona bita?' Ia etibaha, 'Witi pute taha hamomona.' Ia ehina bena etibaha, 'Oa'i 'abaea 'uai, pepana neiana, momiati, pepai hinabu 'ababani korereana.'

<sup>8</sup> "Poki hauna ehore 'ima hauna ena bai'oi akana ea'i taeana, pokina aka weiana mai aotipana ebabaina. Bariu hanopaka neiana haukia ekia aotipa tehore ea haukia ekia aotipa tetara haonakia.

<sup>9</sup> Au wai nahina benimi, hanopaka ena obia tabakiaia maearima kipokia katobai-hau, ba wai heremiai kekaobo raninai miaho banai banai itunai katea'i taeanimi.

<sup>10</sup> "Aka papana ha ebabai haraina hauna kehore aka apa'uana abomo kebabai haraina, ba aka papana a'i ebabai haraina hauna kehore aka apa'uana abomo a'i kebabai haraina. <sup>11</sup> Hanopaka ena kohu ki'a obokia a'i kato'ima harainakia raninai, tai kehore kupa kohu namokia kebenimi kato'imanakia? <sup>12</sup> Maearima haeai ekia kohu a'i kato'ima harainakia raninai, tai kehore emi kohu tohakia kebenimi?

<sup>13</sup> "Ta'ara'i hauna ha poki rua ta'arakia a'i kea'ina, pokina ha ke'oatana ha keraona'au aina, 'a ha ke'ini bena ha

kebaoaoaina. Tirama mai kepu rani hamonai ta'arakia a'i katoa'ina."

<sup>14</sup> Parisea haukia aia weiana teona raninai Iesu tebatue aina, pokina ia hanona moni 'arikia ti'ari paunai. <sup>15</sup> Iesu ehina benakia etibaha, "Wai hanona maearima wairakiaia kipomi tobero na tuho, 'a Tirama hanona wai aomi e'iohinakia, pokina maearima tiaonamo ai tabakia hanona Tirama nibaoao ainakia.

*Rauhuhu Mai Tirama Ena Obia Aiarana. (Mt 11.12, 13; 5.31, 32; Mk 10.11, 12)*

<sup>16</sup> "Rauhuhu 'abikia mai mahabanai haukia ekia 'abi hanona teiroro ainakia, emai mo Ioane Ba'uere Robe hauna ena raniai. Weiana murinai hanona Tirama ena obia aiarana pouna namona teiroro aina, maearima ikoikiaia taburakiaia taeara tetabu katetoto.

<sup>17</sup> Kupa mai hanopaka kate 'akauma hanona e'ama'ama ia rauhuhu 'abina puana papana ha a'i ke'akauma 'apua.

<sup>18</sup> "Hau ha atawana kebakarahina haeamona babi'e mahamahana ha eatawana hanona nabau hoana ebabaina. Mai hau ha babi'e ibakarahi eatawana hauna abomo nabau hoana ebabaina.

*Ori Ibabataina Obia Hauna Ha Mai Noi Ba'ame Hauna Lasaro.*

<sup>19</sup> "Kepu hauna ha weia habuni namoabukia ebatotonakia abomo rani ikoikiaia aonamo tatukia ebabai. <sup>20</sup> Ena pa'abi 'akonai hanona uraru hauna ha enoti atana Lasaro, ia hauna etua tua obo, <sup>21</sup> ena nuatae hanona kepu hauna ena itara ai aniani puapuakia ti'eho haukia ha peani. Wae ha temai hauna tuakia tetemanakia.

<sup>22</sup> "Rani emai aonai uraru hauna e'ari hanona aneru teaoaina Aberahamo herenai. Kepu hauna abomo e'ari tehorena.

<sup>23</sup> Kepu hauna 'ari 'ekanaia\* weia haiara rarina 'akina aonai emiaho, ea'a taea atau'a 'akinai Aberahamo eihana, Lasaro hanona ia herenai. <sup>24</sup> Ia eapari etibaha, 'Hama'u Aberahamo e, moaoko'o aina'u, Lasaro mouhuna imana kiri'una beiai mekaihuna emai maea'u meba'amarina, pokina au hanona nahaiara ki'a baha iruba neiana aonai.'

<sup>25</sup> "Ia Aberahamo e'abi etibaha, 'Naha'u e, koraonana emu mauri beraurakiaia oi hanona taba namokia oa'i ia Lasaro

\* 16:23: (23) 'ao Hades.

hanona taba ki'a obokia ea'i. 'A bariu ia hanona niaonamo ia oi hanona nuhaiara. <sup>26</sup> Abonamo aika baiatakai hanona 'oura rarina 'akina ha nemiaho, neia haukia na a'i katewahi, naia haukia abomo ha a'i kemai neia.'

<sup>27</sup> "Kepu hauna e'abi etibaha, 'Hama'u Aberahamo e, enamo, nanoini'o Lasaro mouhuna meao hama'u ena itu. <sup>28</sup> Pokina au uaho'aba'u ima weia, keba'io binakia ia abokiamo haiara 'ekana neiana a'i tememai.' <sup>29</sup> Aberahamo e'abi etibaha, 'Mose mai mahabanai haukia hanona weia ia herekiai aiakia temeona.' <sup>30</sup> 'A ia e'abi etibaha, 'Aha'i, hama'u Aberahamo e, ia hau ha 'ariai pemikiri peao herekia raninai aba kateraona kabe.'

<sup>31</sup> "Aberahamo e'abi etibaha, 'Weia Mose mai mahabanai haukia aiakia a'i tiona raninai, neia 'ari hauna ha keao hanona aiana abomo a'i kateona.' "

## 17

### *Kebabehonakia Hauna Keki'a Wairai.* (Mt 18.6, 7, 21, 22; Mk 9.42)

<sup>1</sup> Iesu i'abana haukia ehina benakia etibaha, "Taba maearima kebabehonakia hanona aba timai, 'a hau weiana maearima behoi nihorotinakia hauna ki'ana. <sup>2</sup> Penamo 'akonai iata rarina patetoba 'auna 'akuai patekapo uhuna, pokina papakia neiakia ha a'i mea'i ki'ana.

<sup>3</sup> Kipomi kato'ima 'ima harainimi, uaho'abamu ki'a kebabaina raninai, koao herena korobe haraina. Ia keraona kabe raninai, ena ki'a kohina hao. <sup>4</sup> Beraura hamonai rani 'abaihau hamomo heremuai ki'a kebabaina, haeamona kemue heremuai rani 'abaihau hamomo ke'abi 'Au naraona kabe.' raninai, ena ki'a kohina haonakia."

### *Ta'ara'i Hauna Ena Aka.*

<sup>5</sup> Iuhubeau haukia Obiapaka tehina bena tetibaha, "Emai a'ikakauma pobapa'uanakia." <sup>6</sup> Obiapaka ekia 'abi ebamuena etibaha, "Pe wai emi a'ikakauma matoha sinapi uhona papana 'abana raninai matiu rarina neiana patohina bena, bariu mounu 'auni'o moao 'akuai mo'omu hanona aiami pea'i taeana.

<sup>7</sup> "Turaonana, wai ha emu ta'ara'i hauna 'ani 'ao mamoe 'ima 'ekana'i pemai raninai, pohina bena potibaha, 'Omai biai momiati moaniani?' <sup>8</sup> Aha'i, ua a'i po'abi

aiho, ia po'abi, 'E'u aniani kokai'auna koba'oruna, koa'ia'i harai ko'imana'u, au kaniani e'u arera kainu kepua murinai, ba oi koaniani emu arera koinu.' <sup>9</sup> Ehina bena akakia ebabainakia paunai ena ta'ara'i hauna banamona kebena? Aha'i, <sup>10</sup> Ihobonai wai abomo ehina benimi akakia ikoikia tobaorenakia raninai kato'abi katotibaha, 'Ai hanona ta'ara'i 'abaeamai, emai aka ohina benamai hauna mo tababai.' "

### *Iesu Morumoru Haukia Harau Haea Ebanamonakia.*

<sup>11</sup> Iesu taearai eka'a eao Ierusalem aonai, Samaria mai Galilea baihoakiai ekabanai. <sup>12</sup> Aiara papana ha ai ekatoto aonai, morumoru haukia harauhaea kipokia te baitabu ahi. Ia atau'a tainai tekoroti, <sup>13</sup> Iesu teaparina teio aota tetibaha, "Iesu poki haumu e, moaoko'o ainamai." <sup>14</sup> Iesu eihanakia raninai ehina benakia etibaha, "Tomoao, robe haukia herekia haumi katobaihanakia." Ba tiao herekia aonai hanona haukia tenamo. <sup>15</sup> Baiatakiai hau hamona hauna eihana aba enamo hanona emue emai Tirama ebanamona aiana 'ubi tohanai. <sup>16</sup> Hau weiana Iesu wairanai ekai pehu ebanamona, ia hanona Samaria hauna. <sup>17</sup> 'A Iesu ebakaina etibaha, "Haumi harauhaea tonamo, u? Ia 'ababani hamomo hanona ae'e? <sup>18</sup> Taba buonai rama haeai hauna neiana mo emue emai Tirama ebanamona?" <sup>19</sup> Iesu Samaria hauna ehina bena etibaha, "Momikiri moao, emu a'ikakauma ehore aba ebamaurini'o."

### *Tirama Ena Obia Aiarana Ena Mai Ranina.*

(Mt 24.23-28, 37-41)

<sup>20</sup> Parisea haukia baika Iesu tebakaina tetibaha, "Tirama ena obia aiarana aita kemai?" Ia ekia 'abi ebamuena etibaha, "Tirama ena obia aiarana hanona matoha taba ha nahaihana hauna 'abanai a'i kemai. <sup>21</sup> Hau ha a'i ketibaha, 'Moihana taba mo neiana' 'ao 'taba mo weiana,' pokina Tirama ena obia aiarana hanona wai aomia'i."

<sup>22</sup> Iesu i'abana haukia ehina benakia etibaha, "Rani hanona nimai, emi nuatae Maearima Nahuna ena beraura ha hamona patoihana, ia mo a'i katoihana. <sup>23</sup> Maearima baika katehina benimi katetibaha, "Tomoihana, hauna neiana.' 'ao 'Tomoihana, hauna weiana.' Ia a'i



katoao, murikiai a'i katoka'a. <sup>24</sup> Maearima Nahuna ena mai ranina hanona matoha kupa ne'imare 'abana, bariu mo kupa abiranai ne'imare abamo niao kupa maikoina nibaeana. <sup>25</sup> Ia bariu kori 'uaina hanona katebahaiara ki'a baha, abomo uru neiana haukia katebaki'ana.

<sup>26</sup> "Ihobona Noa ena raniai erama 'abana Maearima Nahuna ena raniai abomo ua kehoma. <sup>27</sup> Maearima hanona teani ani teinu inu hau mai babi'e tehawainibe eao mo Noa aunohi ai etoto, abara etibo tou ekarahi maearima maikoina tetono ore. <sup>28</sup> Lota ena raniai abomo uahomana, maearima hanona teani ani teinu inu tekawa kawa tebato bato mai itu terobe. <sup>29</sup> Rani weianai Lota Sodoma aiarana ehabona ekarahi murinai iruba mai pihara hiabukia kupa 'ubinai te'eho, maikoikiai teba'ari orenakia. <sup>30</sup> Maearima Nahuna kewaira tina ranina abomo ua kehoma.

<sup>31</sup> "Rani weianai, hau ha itu kapenai raninai ia a'i keriri itu aonai ena kohu a'i kea'i parenakia, ihobonai mo hau ha umai raninai ia a'i kemue ena aiara. <sup>32</sup> Lota atawana katoraonana! <sup>33</sup> Hau ha nenuatae ena mauri kea'i 'inina hanona ena mauri keba'akaumana, 'a ena mauri kene'ena raninai ena mauri kea'ina.

<sup>34</sup> "Au wai nahina benimi, rabi weianai maearima rua 'ire hamonai kateparua, hamona kea'i taeana 'abana kehabona. <sup>35</sup> Babi'e rua 'eka hamonai witi iba'iti 'itina piharana katebaherena, ha kea'i taeana 'abana kehabona. <sup>36</sup> Hau rua umai kateaka, ha kea'i taeana 'abana kehabona." <sup>37</sup> 'Abana haukia tehore tebakaina tetibaha "Obiapaka e, ae'eai?" Obiapaka ekia 'abi ebamuena etibaha, "Ari tabakia ae'eai hanona po'i abomo weia tito'u."

## 18

### *'Abi Ibabataina Bakai Hauna Mai Wapu.*

<sup>1</sup> Iesu i'abana haukia 'abi ibabatai ha ehinana kateraonana rani ikoinai kate bahuba'ari ia a'i katehau hororo. <sup>2</sup> Etibaha, "Aiara ha aonai bakai hauna ha emiaho, ia Tirama a'i eta'u aina haeamona maearima a'i eraonanakia. <sup>3</sup> Aiara weiana aonai wapu ha abomo emiaho, rani ikoinai eao bakai hauna herena enoina etibaha, 'Mobaraina'u, e'oatana'u hauna herenai kobaberona.' <sup>4</sup> Rani ehoma'a bakai hauna hanona eubo

taba ha a'i ebabaina, muriai hanona kipona e'abi etibaha, 'Au hanona Tirama a'i nata'u aina abomo maearima a'i naraonanakia. <sup>5</sup> Iamo wapu neiana nibaro 'arina'u paunai ena bakai ibaberona akana mababaina, a'i memue a'i mebaro 'arina'u.' "

<sup>6</sup> Obiapaka etibaha, "Bakai hauna ki'a obona ena 'abi uruna tomo'ona. <sup>7</sup> Tirama ea'i taeanakia haukia tiapari rabina tiapari ranina haukia ekia nuatae a'i kebaberonakia, u? Turaonana a'i kebarai noanoanakia, u? <sup>8</sup> Au wai nahina benimi, Tirama kehore ekia nuatae kebabero noanoanakia. Ia Maearima Nahuna kemai raninai hanopakai a'ikakauma haukia aba ketabu ahinakia? Aha'i."

### *Parisea Hauna Mai Takiti A'i Hauna Tebahuba'ari.*

<sup>9</sup> Abomo Iesu 'abi ibabatai neiana ehinana maearima weiakia kipokia ekia aka bero Tiapa ainakia haeamona maearima haeai teiha hahanakia haukia herekia. <sup>10</sup> "Hau rua teao Marea Robe aonai katebahuba'ari, ha Parisea hauna ha moni bararo hauna. <sup>11</sup> Parisea hauna hanona ekoroti kipona ahanai ebahuba'ari, "Tirama e, au hanona oi nabanamoni'o, pokina au hanona hau baika 'abakia aha'i, kakikaki haukia, babai ki'a haukia, nabau haukia 'ao moni bararo hauna neiana 'abana aha'i. <sup>12</sup> Au hui hamona aonai wapu rua nani robe, abomo e'u tabu ahi ikoikiai harauhaea aonai hamomona nabaibeni oi 'eumu.' <sup>13</sup> 'A moni bararo hauna hanona atau'ai ekoroti, a'i ea'a taea kupa ia era'u ti'ou ekuti etibaha, "Tirama e, moaoko'o aina'u, au hanona ki'a hau'u.' "

<sup>14</sup> Iesu e'abi etibaha, "Au wai nahina benimi, moni bararo hauna hanona Tirama wairanai ebero ba ena itu eao, 'a Parisea hauna hanona aha'i. Pokina kipona ebapa'uana hauna Tirama kehore kebaririna, 'a kipona ebaririna hauna Tirama kehore kebapa'uana."

### *Iesu Miori Papakia Ebanamonakia.* (Mt 19.13-15; Mk 10.13-16)

<sup>15</sup> Maearima baika tehore nahukia papakia teaoainakia Iesu herena ahakiai kehao'au, ia i'abana haukia teihanakia aonai terikenakia. <sup>16</sup> Ia Iesu hanona miori papakia eaparinakia temai herena

ba e'abi etibaha, “Miori papakia hanona au here'u temai a'i tomo kaiabunakia, pokina Tirama ena obia aiarana hanona nahomakia haukia 'eukia. <sup>17</sup> 'Abi tohana au wai nahina benimi, hau ha Tirama ena obia aiarana ia'ina miori papana 'abanai a'i keao raninai, ia hanona a'i kekatoto 'apua.”

*Kepu Hauna Iesu Ohi Te'abi'abi.*  
(Mt 19.16-30; Mk 10.17-31)

<sup>18</sup> Iuda haukia ekia poki hauna ha Iesu ebakaina etibaha, “Ba'iohi haumu namomu e, au taba kababaina hanona mauri banai banai ka'ina?” <sup>19</sup> Iesu e'abi etibaha, “Taba buonai au namo'u ohinana, tai ha a'i enamo Tirama mo ikupaiana. <sup>20</sup> Rauhuhu aba o'iohina, 'a'i konabau, a'i koahu ahu, a'i kobainao, a'i kohinau bai'oi, hamamu hinamu komariki ainakia.” <sup>21</sup> Ia e'abi etibaha, “Rauhuhu naiakia hanona miori'u ai raninai a'ima harainakia emai mo bariu.” <sup>22</sup> Iesu aia weiana eona raninai ehina bena etibaha, “Taba hamona okapu aina hanona neiana. Emu taba ikoikiai kokawa kawa ainakia monikia uraru haukia kobenakia. Weianai kupa kohuna koa'ina, ba komai muri'u ai koka'a.” <sup>23</sup> 'A hau weiana 'abi eona raninai aona earo'ari pokina ia hanona eobia ki'a baha.

<sup>24</sup> Iesu hau weiana ena ao aro'ari eihana ba e'abi etibaha, “Herekiai kepu tebo'o haukia Tirama ena obia aiaranai katekatoto hanona epahihi ki'a baha. <sup>25</sup> Herenai kepu tebo'o hauna Tirama ena obia aiaranai kekatoto hanona epahihi ki'a baha ba kamela kopi\* ererenai kekuri banai.” <sup>26</sup> Aiana teona haukia tebakaina tetibaha, “Ba tai hanona mauri kea'ina?” <sup>27</sup> Iesu ekia 'abi ebamuena etibaha, “Taba katebabaina maearima herekiai a'i ketaina hauna Tirama herenai hanona ketaina.”

<sup>28</sup> Petero, Iesu ehina bena etibaha, “Ai hanona emai taba ikoikiai tahabonakia, oi murimuai taka'a.” <sup>29</sup> Iesu ehina benakia etibaha, “'Abi tohana mo au wai nahina benimi, hau ha ena itu, atawana, uaho'abana, hamana, hinana 'ao nahuna ehabonakia Tirama ena obia aiarana paunai, <sup>30</sup> ia hanona bariu rani neianai taba bo'okia kea'i abomo wairanai rani kemai aonai hanona mauri banai banai kea'ina.”

\* 18:25: (25) nira

*Rani Ibaihauna Iesu Ena 'Ari Pouna Ehinana.*

(Mt 20.17-19; Mk 10.32-34)

<sup>31</sup> Iesu i'abana haukia harauhaea rua ebakaparenakia haia haiiai ehina benakia etibaha, “Aika hanona bariu kahakara'au Ierusalem, mahabanai haukia tererenakia haukia ikoikiai bariu Maearima Nahuna herenai katetoha. <sup>32</sup> Ia hanona rama haesai haukia imakia kateutana, katebapo'ona, kateba opuerena, kate'atotina, kate'atina, mai kateahu 'arina. <sup>33</sup> 'A wapu ibaihaunai ia hanona kemikiri mue.” <sup>34</sup> Ia i'abana haukia taba neiakia obokia a'i teobo 'apua. 'Abi weiana anina ebuni ia herekiai, haeamona a'i te'iohina ia hanona 'abi tabana nehinana.

*Iesu Maha Ki'a Hauna Mahana Ebano'anakia.*

(Mt 20.29-34; Mk 10.46-52)

<sup>35</sup> Iesu Ieriko aiaranai aba kekara'au aonai 'iau hauna ha taeara haianai emiati ninoi ba'ame, <sup>36</sup> maearima bo'ona teka'a urukia eona, ba ebakai bakai weiana taba nirama. <sup>37</sup> Tehina bena tetibaha, “Iesu Nasareta hauna nikabanai.” <sup>38</sup> 'Iau hauna eapari, “Iesu Davida Nahuna e, moaoko'o aina'u!” <sup>39</sup> Maearima wairai teka'a haukia terikena tetibaha, “Oi 'urumu.” 'A ia hanona eapari aota, “Davida nahuna e, moaoko'o aina'u!” <sup>40</sup> Iesu ekoroti ehina benakia hau weiana katemaiana herena. Ia emai herena raninai Iesu ia ebakaina etibaha, <sup>41</sup> “Taba nonuatae oi heremuai kababaina?” Ia e'abi etibaha, “Obiapaka e, au e'u nuatae kaiha iha.” <sup>42</sup> Iesu ia ehina bena etibaha, “Mahamu temeno'a, emu a'ikakauma ehore ebanamoni'o.” <sup>43</sup> Beronai mo mahana teno'a, Tirama ebanamona, Iesu murinai eka'a, maearima ikoinai teihana haukia abomo Tirama tebanamona.

## 19

*Iesu Mai Sakaio.*

<sup>1</sup> Iesu Ieriko ai ekatoto nikabanai aonai, <sup>2</sup> hau ha weia atana hanona Sakaio, takiti a'i haukia ekia poki ha, ia hanona kepu hauna. <sup>3</sup> Ia ena nuatae hanona Iesu keihana, ia a'i etaina pokina maearima ebo'o ia hanona eko'o ko'o. <sup>4</sup> Ua buonai ebeau 'uai eao matiui etae Iesu taeara weianai kekabanai hanona keihana. <sup>5</sup> Iesu emai

'eka weianai ekarahi raninai ea'a taea eihana ehina bena etibaha, "Sakaio e. Moriri biai. Bariu rani neianai au hanona oi emu ituai kamiaho." <sup>6</sup> Ia beronai eriri biai mai aonamona Iesu eaoaina ena ituai ea'i taeana. <sup>7</sup> Maearima ikoikia teihana hanona teururu tetibaha, "Ia hanona aba ki'a hauna ena bakiai niao."

<sup>8</sup> 'A Sakaio ekoroti Obiapaka ehina bena etibaha, "Obiapaka e. Bariu e'u kepu abirana maikoinai uraru haukia kabenakia, abomo hau ha ena kepu a'i 'abaeana hanona rani bani ena kepu 'arana kabamuena." <sup>9</sup> Iesu ia ehina bena etibaha, "Bariu rani neianai bamauri hanona itu neianai aba ekara'au, pokina hau neiana ia abomo Aberahamo nahuna. <sup>10</sup> Maearima Nahuna emai ena poki hanona te'akauma haukia ketabunakia kebamaurinakia."

*'Abi Ibabatana Aka Haukia Gold Monina Tea'ina.*  
(Mt 25.14-30)

<sup>11</sup> Maearima aia weiana tiona aonai 'abi ibabatana ha ehina benakia pokina ia aba emai Ierusalem herenai abomo teraonana Tirama ena obia aiarana hanona aba kewaira tina. <sup>12</sup> Ba Iesu etibaha, "Obia hauna ha eao hanopaka haeai weia ena obia arana hoana katebena ba kemue. <sup>13</sup> A'i eka'a baha aonai ena ta'ara'i haukia harauhaea eaparinakia, gold monikia atakia mina\* ha ha ebenakia etibaha, 'Moni neiakia hanona katoaka ainakia keaomo au kamue.' Ba eka'a.

<sup>14</sup> 'A ena aiara haukia a'i tenuatae aina ekia iuhubeau baika teuhunakia murinai teao katetibaha, 'Ai hau naiana a'i tanuatae aina, emai obia 'aranai a'i keao.'

<sup>15</sup> Hau weiana obia 'arana hoana aba ea'ina emue emai raninai, ena ta'ara'i haukia moni ebenakia haukia eaparinakia aea teaka aihou hauna ke'iohina.

<sup>16</sup> Hau kori 'uaina emai e'abi etibaha, 'E'u poki haumu e, emu mina hamonai mina harauhaea atabu ahinakia.' <sup>17</sup> Poki hauna ia ena 'abi ebamuena etibaha, 'E'u ta'ara'i haumu namomu e, obabai harai. Taba papana 'akina ia o'ima haraina buonai aiara harauhaea ekia obia haunai koao.'

<sup>18</sup> Hau ibaruana emai etibaha, 'E'u poki haumu e, emu mina hamona ahanai mina

ima atabu ahinakia.' <sup>19</sup> Poki hauna ehina bena etibaha, 'Oi hanona aiara ima ekia obia haunai koao.' <sup>20</sup> Haeamona ta'ara'i hauna ha emai etibaha, 'E'u poki haumu e, emu mina hamona neiana, habunia a'apana ahore buni haraina. <sup>21</sup> Au oi ata'u aini'o, pokina oi hanona hau pahihimu, a'i ohoroti tabana nua'i parena haeamona a'i obato tabana nukabe hurina.'

<sup>22</sup> Poki hauna ia ehina bena etibaha, 'Ta'ara'i haumu ki'a obomu, emu 'abiai kababakaini'o, oi o'iohina au hau pahihimu, a'i ahorotina tabana na'i parena haeamona a'i abatona tabana nakabe hurina.

<sup>23</sup> Ba taba buonai e'u mina moni itunai a'i ohorotina, ba amue hanona ahanai ha patabu ahina.' <sup>24</sup> Herenai tekoroti haukia ehina benakia etibaha, 'Ena mina hamona tomopuhu boina, weiana mina harauhaea ehabaina hauna tomobena.' <sup>25</sup> 'A ia te'abi tetibaha, 'Poki haumu e, ia mina harauhaea aba imanai.'

<sup>26</sup> Ekia 'abi ebamuena etibaha, 'Au wai nahina benimi, maearima ha mai ena taba hauna bo'ona katebena, ia taba aha'i hauna hanona herenai papana nemiaho hauna abonamo katea'i obona. <sup>27</sup> Abomo au e'u 'ou haukia, a'i tenuatae, au a'i kaobia haukia tomaianakia neia, au waira'u ai katoahu 'arinakia.'

*Iesu Ierusalem ai Ekara'au Obia 'Arana 'Abana.*

(Mt 21.1-11; Mk 11.1-11; Io 12.12-19)

<sup>28</sup> Iesu 'abi neiakia ehinanakia murikiai e'u ai ainakia Ierusalem teao. <sup>29</sup> Eka'a eao Betefage mai Betani aiarakia aba herekiai Olibe oonai, Iesu i'abana haukia rua euhunakia, <sup>30</sup> ehina benakia etibaha, "Katoao aiara wairakai hauna aonai katokatoto, toniki nahuna ha ua'a tetoba 'auna katoihana, ahanai hau ha a'i nemia'au 'apua, katorubuna katomaiana here'u.

<sup>31</sup> Hau ha kebakainimi, 'Taba buonai naiana torubuna?' Wai katohina bena, 'Obiapaka nenuatae aina.' <sup>32</sup> Euhunakia teao haukia ehina benakia ihobonai mo tetabu ahina. <sup>33</sup> Toniki nahuna terubuna aonai poki haukia tebakainakia, "Taba buonai doniki nahuna torubuna?" <sup>34</sup> Ia ekia 'abi tebamuena tetibaha, "Obiapaka nenuatae aina."

<sup>35</sup> Teaoaina Iesu herena, ekia habuni toniki nahuna kapenai teabari 'aunakia,

\* 19:13: (13) Helene monina, mina hamona hanona aka hauna nawa aihau 'arana 'abana.

ba Iesu emia'au. <sup>36</sup> Eao aonai maearima ekia habuni taearai teabarinakia. <sup>37</sup> Teao aiara aba herekiai, taeara Olibe oeonai eriri 'ekanai ti'abana haukia ikoikiai mai aonamokia teio Tirama tebanamona hi-abu akakia ebabai teiha haukia paukiai. <sup>38</sup> Ia tetibaha, "Aika eka Obia Arana Obiapaka atanai nimai hauna hamabanamona. Baibua kupai, nuabina hanona 'ubi 'akinai."

Sal 118.26

<sup>39</sup> Parisea haukia baika mako baiatakiai Iesu tehina bena tetibaha, "Ba'iohi haumu e, i'abamu haukia morikenakia temeunu." <sup>40</sup> Iesu ekia 'abi ebamuena etibaha, "Au wai nahina benimi, neiakia kateunu rani-nai pihara kateio."

### *Iesu Ierusalemehaiaina.*

<sup>41</sup> Iesu eka'a eao Ierusalemeha herena tainai mahana eao aiara eihana raninai ehai aina. <sup>42</sup> Etibaha, "Ierusalemeha e, bariu rani neianai emu baibua pokina po'iohina hanona penamo, 'a mahamu ebuni. <sup>43</sup> Beraura weiana ketaina aonai, oi emu 'ou haukia 'anoai kekepirimu katekai kakaiarona, katekora kaiaroni'o, haia haia ikoikiai katekaiabunakia. <sup>44</sup> Katekaponi'o koao 'ano tohanai oi mai nahumu emu pihia aonai temiaho haukia maikoinai kate'ari ore, pihara ha a'i katehabona pihara ha ahanai pokina Tirama kemai heremu beraurana a'i o'iohina."

### *Iesu Kawakawa Haukia Marea Robe Aona Eu'u Ahinakia.*

(Mt 21.12-17; Mk 11.15-19; Io 2.13-22)

<sup>45</sup> Ba Iesu Marea Robe aonai ekatoto, weia tikawakawa haukia eu'u ahi ramanakia, <sup>46</sup> Ehina benakia etibaha, "Aba Puka Robenai ererena, 'E'u itu hanona bahuba'ari itunai keao', ia wai hanona kakikaki haukia ekia paparo'ai tubaona."

<sup>47</sup> Rani ikoinai Iesu Marea Robe aonai eba'iohi, 'a robe haukia apa'uakia rauhuhu poki haukia mai aiara obia haukia kipokia taearana tetabuna Iesu kateahu 'arina. <sup>48</sup> Taeara ha a'i tetabu ahina taba katebabaina pokina maearima hanona ia mo ena 'abi ai tearuru reana.

## 20

### *Iesu Tebakaina Hiabu Ae'eai Ea'ina.* (Mt 21.23-27; Mk 11.27-33)

<sup>1</sup> Rani ha Iesu hanona Marea Robe aonai maearima eba'iohinakia mai pou namona eiroro aina, robe haukia apa'uakia rauhuhu poki haukia mai aiara haukia apa'uakia kipokia tebahamomo tekara'au teao Iesu herena. <sup>2</sup> Tehina bena tetibaha, "Mohina benamai, bero tabanai aka neiakia nubabainakia, tai bero neiana ebeni'o?" <sup>3</sup> Iesu ekia 'abi ebamuena etibaha, "Au abomo wai kabakainimi, katohina bena'u. <sup>4</sup> Ioane ena ba'uere robe hanona kupai emai 'ao maearima herekiai emai?" <sup>5</sup> Kipokia baiatakiai te'abi'abi aina tetibaha, "Kaha'abi 'kupai emai,' raninai ia ke'abi, 'Aehoma buonai a'i toa'ikakaumana?' <sup>6</sup> 'A kahati-baha, 'Maearima herekiai emai,' raninai maearima neiakia piharai kateahunaka, pokina ia te'abi, 'Ioane hanona mahabanai hauna.'" <sup>7</sup> Iesu ena 'abi tebamuna tetibaha, "Ai a'i ta'iohina ae'eai emai." <sup>8</sup> Iesu ehina benakia etibaha, "Au abomo wai a'i kahina benimi, taba neiakia tai ena beroai nababainakia."

### *'Abi Ibabataina Bine Haharua I'imana Haukia Ki'a Obokia.*

(Mt 21.33-46; Mk 12.1-12)

<sup>9</sup> Ba Iesu 'abi ibabatai neianai maearima ehina benakia etibaha, "Hau ha bine haharuana ebatona, biraura haukia baika ea'inakia kate'imana, 'a ia hanona ekaobo rani homa'ana hanopaka haeai emiaho. <sup>10</sup> Bine buana ibararona ranina etaina, poki hauna ena ta'ara'i hauna ha euhuna eao haharua i'imana haukia herekiai bine buakia baika katebena. 'A bai'ima haukia tehore ta'ara'i hauna teahuna imana 'abaeana teuhuna emue. <sup>11</sup> Haeamona ena ta'ara'i hauna haeai ha euhuna, ia bai'ima haukia aka hamomona mo tebabaina, teahuna tebahamaeana imana 'abaeana teuhuna emue. <sup>12</sup> Ibaihauna euhuna, 'a bai'ima haukia tehore tebamani'ana teu'u ahina. <sup>13</sup> Weiana haharua poki hauna etibaha, "Tabamo kababaina? Au Naha'u tohana, e'u raona'au kauhuna keao hanona pa'e ia aba katemariki aina." <sup>14</sup> 'A haharua i'imana haukia ia teihana raninai te'abi'abi aina tetibaha, 'Neiana hanona haharua poki hauna nahuna, hamahu 'arina, haharua hanona aika 'eukai keao.' <sup>15</sup> Temikiri teberi ahina haharua kapenai teahu 'arina.



Ba haharua poki hauna taba kebabaina haharua i'imana haukia herekiai? <sup>16</sup> Ia hanona kemai haharua i'imana haukia weiakia keahu 'arinakia haharua hanona maearima haeai kebenakia." Maearima 'abi weiana teona raninai tetibaha, "Neiana ua a'i pehoma."

<sup>17</sup> Iesu eiaha 'ini 'ininakia ba ebakainakia etibaha, "Puka Robenai tererena 'abina anina hanona taba? 'Itu ibakorina haukia tebaoao aina piharana hanona aba itu ibua 'inina piharana\*' eao.'

Sal 118.22

<sup>18</sup> Hau ha ke'eho pihara weiana ahanai hanona keahu ahu hurina, 'a pihara weiana ke'eho hau ha ahanai hanona hau weiana ke'iti 'iti obo matoha apuroro 'abana."

<sup>19</sup> Rani weianai rauhuhu poki haukia mai robe haukia apa'uakia taeara tetabu Iesu katebirina, pokina 'abi ibabatai hanona ia mo ahakiai ehinana, ia maearima teta'u ainakia buonai a'i etainakia.

*Takiti Baibeni Bakai bakaina.*  
(Mt 22.15-22; Mk 12.13-17)

<sup>20</sup> Iesu teiha 'inina, 'abi bai'oi haukia baika teuhunakia katebakai bai'oina matoha bero haukia 'abakia. Ena 'abiai hanona katea'ina, rauhuhu mai hiabu haukia imakiai kateutana. <sup>21</sup> Weiana bai'oi haukia tebakaina tetibaha, "Ba'iobi haumu e, ai ta'iobina oi emu ba'iobi mai emu 'abi hanona tebero ki'a baha, maearima ekia hoahoa hanona oi a'i nuraonanakia, 'a Tirama ena 'abi tohana taaranai nuba'iobi harainamai. <sup>22</sup> Ai takiti monina obia arana katabena hanona ebero 'ao aha'i?" <sup>23</sup> 'A Iesu ekia bai'oi weiana hanona aba e'iobina, ba ehina benakia etibaha, <sup>24</sup> "Moni ha tomobaihana'u. Tai aubaubana mai tai atana?" Ia te'abi, "Obia 'arana 'euna." <sup>25</sup> Iesu ehina benakia etibaha, "Obia 'arana 'euna hanona Obia 'arana katobena, 'a Tirama 'euna hanona Tirama katobena." <sup>26</sup> Maearima wairakiai ena 'abiai katebarewana hanona a'i etainakia, ia ena 'abiai mo teta'uta'u huri, 'abi ha a'i tehina 'apuana.

*'Ariai Mikiri Mue Bakai bakaina.*  
(Mt 22.23-33; Mk 12.18-27)

<sup>27</sup> Sadukea haukia baika weiakia 'ariai mikiri mue a'i tibatohana haukia temai Iesu herena tebakaina tetibaha, <sup>28</sup> "Ba'iobi haumu e, Mose eka rauhuhu na erere aihona, hau ha ke'ari atawana kemiaho nahuna aha'i raninai ia uaho'abana kehore wapu keatawana, miori katebarama e'ari hauna 'euna. <sup>29</sup> Weiana uaho'aba 'abaihau hamomo temiaho, pakana babi'e ha eatawana nahuna aha'i aonai e'ari. <sup>30</sup> Ibaruana wapu weiana eatawana ba e'ari, <sup>31</sup> ibaihauna abomo wapu weiana eatawana, ba taeara hamonaimo haukia 'abaihau hamomo teatawana nahukia aha'i te'ari. <sup>32</sup> Muri 'akinai babi'e weiana abomo e'ari. <sup>33</sup> Ba mikiri mue raninai babi'e weiana hanona tai atawanai keao, pokina ia haukia 'abaihau hamomo ikoikiai teatawana."

<sup>34</sup> Iesu ia ehina benakia etibaha, "Hanopaka neiana haukia hanona ikoikiai tihawainibe. <sup>35</sup> 'A hanopaka weiana haukia 'ariai katemikiri mue haukia hanona a'i katehawainibe. <sup>36</sup> Ia a'i kate'ari mue, pokina ia hanona aneru ihobokia abomo aba 'ariai temikiri mue Tirama nahunai kateao. <sup>37</sup> 'Ariai mikiri mue 'abina hanona Mose abomo ebaihana matiu 'ini'inina arabuna e'ara orina aonai. Ia Obiapaka e'uahina Aberahamo ena Tirama, Isako ena Tirama, Iakobo ena Tirama. <sup>38</sup> Ia hanona 'ari haukia ekia Tiramana aha'i, 'a mauri haukia ekia Tiramana, pokina Ia aonai maearima ikoikai nahamauri."

<sup>39</sup> Iesu ena 'abi teona raninai rauhuhu poki haukia baika te'abi tetibaha, "Ba'iobi haumu e, 'abi tohana mo naiana." <sup>40</sup> Weiana murinai ibakaina tebaoao aina.

*Keriso Ebakai bakai ainakia.*  
(Mt 22.41-46; Mk 12.35-37)

<sup>41</sup> Iesu ehore maearima ebakainakia etibaha, "Aeahoma buonai maearima ti'abi Keriso hanona Davida nahuna?

<sup>42</sup> Davida kipona Salamo pukanai e'abi, 'Obiapaka hanona e'u Obia ehina bena etibaha, Itipa'u tainai momiati,

<sup>43</sup> keaomo oi emu 'ou haukia ikoikiai oi 'apumu iehe'auna tabanai kabaonakia.'

Sal 110.1

\* 20:17: (17) Itu puapuana piharana.

<sup>44</sup> Neiana Davida ehore ia Obiana ehinana ba aea homanai mo Keriso hanona Davida nahuna?”

*Rauhuhu Poki Haukia Kate'ima 'ima Harainakia.*

*(Mt 23.1-36; Mk 12.38-40)*

<sup>45</sup> Maearima ikoinai tibahu aonai, Iesu i'abana haukia ehina benakia etibaha, <sup>46</sup> “Rauhuhu poki haukia herekiai kato'ima harainimi, ekia nuatae hanona habuni homa'akia katebatoto katekaoao kaoao, mai kawakawa 'ekakiai maearima ia kateba namonakia, haeamona mareai mai tatu 'ekakiai imia'au 'ekakia namokiai mo katemia'au. <sup>47</sup> Wapu ekia itu tiani 'aunakia, maearima ia kateihanakia paunai ekia bahuba'ari Tibahoma'anakia. Maearima uahomakia haukia puma rarina katea'ina.”

## 21

*Wapu Ena Baibeni.*

*(Mk 12.41-44)*

<sup>1</sup> Iesu mahana eao kepu herekia tebo'o haukia ekia baibeni marea monina iutana mauana aonai teuta eihanakia. <sup>2</sup> Abomo wapu uraruna ha ena toea papakia rua eutanakia eihana. <sup>3</sup> Iesu e'abi etibaha, “'Abi tohana au wai nahina benimi, wapu uraruna neiana euta tabana eapa'ua ba ikoikiai. <sup>4</sup> Maearima neiakia ikoikiai ekia obiai baibeni tabakia papakia tehoroti, 'a wapu neiana ena uraruai kemiaho aina tabana maikoina ehorotina.”

*Iesu Marea Robe Kerabu Taina Pouna Ehinana.*

*(Mt 24.1, 2; Mk 13.1, 2)*

<sup>5</sup> I'abana haukia baika marea robe terobahu aina ena nuabi piharakia namoabukiai mai baibeni Tirama tebena tabakiai tebabaina. 'A Iesu e'abi etibaha, <sup>6</sup> “Bariu toiha tabakia neiakia rani kemai aonai pihara ha pihara ha ahanai a'i kemiaho maikoinai kateruru ore.”

*Kato'ima Harainimi, Ia Kate'oatanimi.*

*(Mt 24.3-14; Mk 13.3-13)*

<sup>7</sup> Tebakaina tetibaha, “Ba'iobi haumu e, aita raninai taba neiakia katerama? Abomo katerama ranina mai hoana hanona taba?” <sup>8</sup> Iesu e'abi etibaha, “Kato'ima harainimi, a'i teme'oinimi, weiana maearima bo'ona au ata'uai katemai kate'abi, 'Hauna neiana Au,

haeamona 'Rani aba herekai,' hanona murikiai a'i kato'au. <sup>9</sup> Huari mai 'au urukia kato'o hanona a'i katota'u, taba neiakia hanona katerama 'uai, 'a puana hanona wairai.”

<sup>10</sup> Haeamona ia ehina benakia etibaha, “Hanopaka ha kemikiri hanopaka ha ke-huarina, itubu ha kemikiri itubu ha ke-huarina. <sup>11</sup> 'Eka haeai haeai kanokau apa'uakia, arobo, mai inawa ki'a obokia katerama, abomo ta'u tabakia mai hoa rarikia kupai katerama.

<sup>12</sup> “'A taba neiakia ikoikiai a'i katerama baha aonai, au ata'u paunai katea'inimi haeamona katebapo'onimi ba kateaoainimi mareai mai wapura 'ekakiai katehorotini, abomo kateberinimi kateaoainimi obia mai kabamani haukia wairakiai. <sup>13</sup> Ia rani neiana hanona wai Pou Namona katohinana herekiai ranina. <sup>14</sup> Aea kato-bakai aiho paunai, aomi a'i katearo 'ari. <sup>15</sup> Pokina Au kahore aobero 'abikia kabemimi, weiana emi 'ou haukia katebamuenakia 'ao katebuniai ainakia hanona a'i ketaina.

<sup>16</sup> “Hamami, hinami, uaho'abami, hatia'ami, mai emi hau katehore katehina hinainimi, abomo wai baika kateahu 'arinimi. <sup>17</sup> Maearima ikoikiai kate'oatanimi au pau'uai. <sup>18</sup> 'A aramiai bui ha hamona a'i keki'a. <sup>19</sup> Emi bapahihiai wai emi mauri katoa'inakia.

*Iesu Ierusalem Kateahu 'Iti'itina Pouna Ehinana.*

*(Mt 24.15-21; Mk 13.14-19)*

<sup>20</sup> “'A huari haukia Ierusalem katekori kaiarona katoihanakia raninai, aba kato'iohina ena pua ranina aba herekai. <sup>21</sup> Ba weiakia Iudea ai temiaho haukia katebeau kobio kateao, weiakia aiara apa'uana aonai haukia katekarahi mahanai, weiakia mahanai haukia aiara apa'uanai a'i katekatoto. <sup>22</sup> Pokina rani neiakia hanona haiara ranikia taba ikoikiai Puka Robenai tererenakia haukia ibatohakia. <sup>23</sup> 'A rani weiakia aokiai babi'e mai nuakia abomo nahukia 'oru'orukia babi'ekia herekia hanona keki'a ki'a baha, haiara rarina 'akina hano ahanai kerama abomo Tirama ena opuere keriri maearima neiakia ahakiai. <sup>24</sup> Ia baika kareba mahanai kate'ari, ba baika katea'i maurinakia kateaoainakia hanopaka haeai haeai aokiai wapura haukiai kateao, rama haea haukia hanona Ierusalem

katebaripu ripuna keaomo ekia rani Tirama e'uahina hauna ketaina.

*Maearima Nahuna Kemai Ranina.*  
(Mt 24.29-31; Mk 13.24-27)

<sup>25</sup> “Beraura, nawa, mai bihiu aokiai hoa katerama mai 'aku roio mai harapuni urukiai hanopaka haukia ikoikiai aokia kearo 'ari abomo nuakia ke-tae. <sup>26</sup> Hanopakai taba kerama hauna kate'imana aonai maearima kateta'u aokia katerea, pokina kupai hiabu tabakia kateibiu ibiu. <sup>27</sup> Rani weianai maearima hanona Maearima Nahuna kateihana 'auhao ahanai kemai mai hiabuna mai nuabina. <sup>28</sup> 'A taba neiakia katea'i ramana raninai katokoroti arami katoa'i taeana, pokina ibamaurimi aba niherekai.”

*Kuropou Matiunai 'Tobi Kaha'ina.*  
(Mt 24.32-35; Mk 13.28-31)

<sup>29</sup> Ba Iesu 'abi ibabatai neiana ehina benakia etibaha, “Kuropou mai matiu ikoikiai katoihanakia. <sup>30</sup> Raukia hubu hubukia katekarahi katoihanakia raninai kato'jobina hioro aba herekai. <sup>31</sup> Ba ihobonaimo wai abomimo taba neiakia katerama katoihanakia raninai, kato'jobina Tirama ena obia aiarana hanona aba herekai.

<sup>32</sup> “Abi tohana au wai nahina benimi, uru neiana maearimakia a'i kate'ari ore baha aonai taba neiakia ikoikiai katerama. <sup>33</sup> Kupa mai hanopaka kate'akauma, 'a e'u 'abi hanona a'i ke'akauma 'apua.

*Iesu 'Iabana Haukia Ehina benakia Kate'ima 'ima Harainakia.*

<sup>34</sup> “Kipomi kato'ima 'ima harainimi. Tatuai inuinuai abomo hanopaka ena aonianai aomi a'i mebareana marikina, rani kemai hanona aba herekai matoha rio 'abana, a'i mebata'u ta'u hurinimi. <sup>35</sup> Rani weiana kemai hanona maearima ikoikiai hanopakai temiaho haukia ahakiai. <sup>36</sup> Rani ikoinai kato-bai'ima abomo katobahuba'ari, weianai katotabura taba neiakia ikoikiai katerama haukia herekiai katokapare Maearima Nahuna wairanai katokoroti.”

<sup>37</sup> Iesu rani weiakiai mararani hanona marea robe aonai eba'iobi, 'a rabirabi hanona ekarahi eao Olibe oeonai rabi maikoina weia emiaho. <sup>38</sup> Raurani amarikiai maearima ikoikiai teao marea robe aonai aiana kateona.

## 22

*Iesu Ena 'Ari Taearana Tetabuna.*

(Mt 26.1-5, 14-16; Mk 14.1-2, 10-11; Io 11.45-53)

<sup>1</sup> Parawa ibakupu aha'i tatuna beraurana teaparina Kabanai tatuna hanona aba niherekai. <sup>2</sup> Robe haukia apa'uakia mai rauhuhu poki haukia Iesu iahu 'arina taearana tetabu iamo maearima teta'u ainakia.

<sup>3</sup> Satani ehore Iuda Kariote hauna Iesu i'abana haukia harauhaea rua ha aonai etoto. <sup>4</sup> Iuda eao robe haukia apa'uakia mai marea robe te'imana poki haukia kipokia teroba ahu Iesu aea kehinahinai aihona. <sup>5</sup> Ia aokia enamo, ba te'abi'uai moni katebena. <sup>6</sup> Iuda ekia 'abi ea'i taeana, taeara etabu rani namona tabanai to'u aha'i aonai imakiai keutana.

*'Iabana Haukia Rua Kabanai Anianina Teba'oruna.*

(Mt 26.17-25; Mk 14.12-21; Io 13.21-30)

<sup>7</sup> Parawa ibakupu aha'i tatuna wapuna etaina hanona Kabanai banamo mamoeikia kateahu 'arinakia ranina. <sup>8</sup> Iesu Petero mai Ioane euhunakia e'abi etibaha, “Tomoao eka Kabanai anianina aika kahani hauna katoa'ia'i haraina.” <sup>9</sup> Terarua tehina bena tetibaha, “Nonuatae ae'eai kata'ia'i haraina.” <sup>10</sup> Ia ehina benakia etibaha, “Aiara apa'uanai katokatoto aonai hau ha puou mai beina aronai kebuana katoihana, murinai katoao ketoto itunai katokatoto. <sup>11</sup> Weiana itu poki hauna katohina bena, 'Ba'iobi hauna ninoini'o, baki ikaihurina hanona ae'e ai. Weia au mai i'aba'u haukia kipokia emai Kabanai tatuna anianina katana.” <sup>12</sup> Ia kehore ikaihuri apa'uana 'ubiai aba iba'oru hauna kebaihanimi, weia aniani katoa'ia'i haraina.” <sup>13</sup> Terarua tekaobo teao Iesu ehina benakia tabakia ikoinai ihobona tohanai tetabu ahinakia, weia Kabanai tatuna anianina tea'ia'i haraina.

*Obiapaka Ena Anito'u Robe Orena.*

(Mt 26.26-30; Mk 14.22-26; 1Kr 11.23-25)

<sup>14</sup> Beraura hoana etaina Iesu ena iuhubeau haukia kipokia aniani 'ekanai temiati. <sup>15</sup> Ia ehina benakia, etibaha, “Au e'u nuatae tohana hanona Kabanai tatuna anianina neiana kipokia kahaniani oioi 'uaina ba kateba haiarana'u. <sup>16</sup> Pokina au wai nahina beninimi, Au hanona neiana

a'i kani muena keaomo anina tohana Tirama ena obia aiaranai ketohana.”

17 Ba 'ere ha ea'ina ebanamona e'abi etibaha, “Neiana tomoa'ina ikoimiai to-moinu. 18 Pokina au wai nahina ben-imi, bine buana beina a'i kainu mue bariu keaomo Tirama ena obia aiarana kemai.” 19 Parawa ha ea'ina ebanamona haeamona ehobina ebenakia e'abi etibaha, “Neiana hanona au hau'u, wai paumiai nabaibeni. Neiana katobabaina au iraona'u.” 20 Taeara ihobonaimo teaniani murinai ia 'ere ha ea'ina ehina benakia etibaha, “Ere neiana hanona baibua mahamahana ibatohana hoana au aruaru'u ai, wai paumiai kekiki oiioi. 21 Ia au hinahina'u kehinahina hauna imana abomo neia au ima'u kipokia aniani 'ekanai. 22 'Abi tohana Maearima Nahuna hanona keao Tirama ena raona ihobona, 'a hau weiana kehinahina hauna ki'ana herenai ki'a rarina kerama.” 23 Ia kipokia ha ha tebakai bakai baiatakiai, tai hanona aka weiana kebabaina.

### *I'abana Haukia Tebahara tae Tai Keapa'ua.*

24 I'abana haukia kipokia baiatakiai tebahara tae tai hanona keapa'ua. 25 Iesu ehina benakia etibaha, “Rama haeai obia arana haukia hanona ekia maearima Tio-bia ainakia, ekia nuatae weiakia ekia iha 'ini ba'anai temiaho haukia hanona kateparinakia ia maearima namokia. 26 'A wai heremiai hanona ua a'i kehoma, keapa'ua baiatamiai hauna hanona aona mebamiorina, ne'uai ainimi hauna hanona matoha barai barai akana nibabaina hauna 'abana. 27 Tai hanona eapa'ua, weiana aniani 'ekanai nemia'au hauna 'ao barai barai akana nibabaina hauna? Weiana aniani 'ekanai nemiati hauna hanona eapa'ua. Ia au wai baiatamiai hanona barai barai akana nibabaina hauna naeao.

28 “Wai hanona au kipokia hami-aho haeamo baihobo ikoikiai aokiai. 29 Hama'u hiabu ebena'u ena 'eka ka'imana, ihobonai mo bariu Au hiabu kabenimi e'u 'eka kato'imana. 30 Weiana e'u obia aiaranai wai hanona e'u aniani 'ekanai katoaniani katoinuinu, haeamona obia imia'aunai katomia'au Isaraela itubuna harauhaea rua i'imana haumiai katoao.

### *Iesu Petero Ia Kebuniaina 'Abina Ehina 'Uaina.*

(Mt 26.31-35; Mk 14.27-31; Io 13.36-38)

31 “Simona e, Simona e, Satani aba enoinoi ikoimiai kebarobonimi kehobonimi ihobona witi 'abana. 32 Iamo Simona au aba ahamuai abahuba'ari emu a'ikakauma a'i me'eho, ba oi koraona kabe raninai uaho 'abamu abokiamo koba taburanakia.”

33 Petero ehore Iesu ehina bena etibaha, “Obiapaka e, au aba aba'oru oi ka'abani'o kahaeao kahawapura 'ao kaha'ari.”

34 Iesu ena 'abi ebamuena etibaha, “Petero e, au oi nahina beni'o, bariu rabi neianai kokoro'u a'i ke'arara baha aonai, oi rani aihau au kobuniaina'u, au a'i o'jobina'u na kohoma.”

### *Iesu E'abi Imakiai Taba Hauna Katea'ina.*

35 Iesu ehore i'abana haukia ebakainakia etibaha, “Uainai auhu ahinimi, toao mahoa ihuuihiua, mahoa mai tamaka aha'i toka'a raninai taba ha heremiai tokapu, 'ao?” Ia te'abi tetibaha, “Aha'i.”

36 Ia ehina benakia etibaha, “A bariu tai mahoa ihuuihiua herenai hanona kea'ina, mahoa abomo kea'ina, mai tai kareba herena aha'i hauna ena habuni kekawa kawa aina moninai kareba ha kekawana. 37 Pokina au wai nahina ben-imi, tererena 'Kakikaki haunai tebaona, 'abina neiana hanona au here'uai ketohana, taba tererena au aha'uai hauna ibatohana ranina aba nimai.” 38 I'abana haukia te'abi tetibaha, “Obiapaka e, moihana kareba rua neiakia.” Weiana ia ehina benakia, “Abetaina.”

### *Iesu Getesemane ai Ebahuba'ari.*

(Mt 26.36-46; Mk 14.32-42)

39 Iesu nibabai babai bena ihobonai ekarahi Olibe oeona eao, i'abana haukia ia murinai teao. 40 'Eka weianai tekara'au raninai ia ehina benakia etibaha, “Tomobahuba'ari baihobo aonai a'i tomototo.” 41 Herekiai ekaobo baiatakia ena homa'a matoha pihara ha pahakapona peao pe'eho ihobonai weia ekaipehu ebahuba'ari. 42 E'abi etibaha, “Hama'u e, konuatae raninai haiara 'erena neiana here'uai koa'i obona, iamo au e'u nuataeai aha'i, 'a oi emu nuatae mobabaina.”

43 Ba aneru ha kupai emai ia herenai ewaira tina, eataburana.

44 Aona earo'ari, ebahuba'ari haeamona



ebahuba'ari tabura tabura, maorona te'eho 'anoai ihobona aruaru kokoma'akia 'abana. <sup>45</sup> Ena bahuba'ari murinai emikiri eao i'abana haukia herekia, aoko'oai aba temahe harai buonai parua reakia etabu ahinakia. <sup>46</sup> Ehina benakia etibaha, "Taba buonai tuparua? Tomono'a, tomobahuba'ari baihibo aonai a'i tomototo marikina."

*Iesu Tea'i Inina.*

*(Mt 26.47-56; Mk 14.43-50; Io 18.3-11)*

<sup>47</sup> Iesu ni'abi oho mo aonai i'abana harauhaea rua haukia 'abakia ha atana Iuda to'u rarina e'uai ainakia temai, ba ekahaha Iesu herena eao kepauna. <sup>48</sup> 'A Iesu ehore Iuda ehina bena etibaha, "Oi hanona baipauai Maearima Nahuna nohinahinaina, u?"

<sup>49</sup> Weiakia herenai tekoroti haukia taba kerama hauna te'iohina aonai te'abi tetibaha, "Obiapaka e, karebai tamaharanakia, u?" <sup>50</sup> Ba 'abakia ha robe haukia 'arakiai hauna ena ta'ara a'i hauna haiana itipana ehara obona. <sup>51</sup> 'A Iesu e'abi etibaha, "Naiana mepua." Ba ia ehore hau weiana haiana ea'i 'apuana ebanamona.

<sup>52</sup> Iesu ehore robe haukia apa'uakia marea robe 'ima haukia mai aiara hau apa'uakia temai ia katea'ina haukia ehina benakia etibaha, "Mai karebami mai pura'ami tomai matoha bainao hauna katoa'ina 'abana, u?" <sup>53</sup> Rani ikoinai au hanona wai kipokia marea robe aonai, iamo wai a'i toa'i 'inina'u. 'A bariu rani neiana hanona wai emi rani, wapura ena hiabu ranina."

*Petero Iesu Ebuniai aina.*

*(Mt 26.57, 58, 69-75; Mk 14.53, 54, 66-72; Io 18.12-18, 25-27)*

<sup>54</sup> Ia tehore Iesu tea'ina tebaka'ana teaoaina robe haukia 'arakiai hauna ena ituai, 'a Petero hanona murikiai eao ia mo mai baiatakia. <sup>55</sup> Baika tehore ara aona ibuanai iruba teba'arana ba temia kakaiarona, Petero abomo weia baiatakia emiati. <sup>56</sup> Ba ta'ara a'i uahona ha iruba eanai Petero emiati eihana, eia iha haraina e'abi etibaha, "Hau neiana hanona Iesu 'abana ha." <sup>57</sup> 'A Petero ebuniai etibaha, "Uaho e, au ia a'i a'iohina." <sup>58</sup> Rani a'i ehoma'a aonai, hau ha ia eihana e'abi etibaha, "Oi abomo 'abakia ha." Petero e'abi etibaha, "Hau e, au hanona aha'i." <sup>59</sup> Beraura hoana ha eao

'abana hau ha ia eihana ba e'abi tabura etibaha, "Abi tohana hau neiana abomo ia 'abana ha, pokina ia abomo Galilea hauna." <sup>60</sup> Ba Petero e'abi etibaha, "Hau e, au a'i a'iohina oi taba robana nuahuna." Ni'abi oho mo aonai kokoro'u e'arara. <sup>61</sup> Weiana Obiapaka eia kabe Petero eihana. Ba Petero ehore Obiapaka ena 'abi ehinana hauna eraona tinana, "Oi bariu rani neianai kokoro'u a'i ke'arara baha aonai au rani aihau kobuniai aina'u." <sup>62</sup> Weiana Petero ekarahi eao atapakai ehai ki'a.

*Iesu Tebapo'ona.*

*(Mt 26.67, 68; Mk 14.65)*

<sup>63</sup> Hau weiakia Iesu tea'i 'inina haukia tebatate aina. <sup>64</sup> Mahana te'apa abunakia te'atina ba tebakaina tetibaha, "Mohina benamai. Tai oi e'atini'o?" <sup>65</sup> Abomo 'abi ki'a obokia bo'ona herenai tehinanakia.

*Iesu Bakai Te'imana Haukia Wairakiai Ekoroti.*

*(Mt 26.59-66; Mk 14.55-64; Io 18.19-24)*

<sup>66</sup> Erani aonai aiara hau apa'uakia, robe haukia apa'uakia, mai rauhuhu poki haukia kipokia teto'u ba Iesu temaiaina bakai apa'uana weiana wairakiai. <sup>67</sup> Bakai apa'uana haukia tebakaina tetibaha, "Mohina benamai. Oi hanona Keriso, 'ao?" 'A Iesu ia ehina benakia etibaha, "Pahina benimi hanona a'i patobotohana'u. <sup>68</sup> Abomo pabakainimi hanona a'i patobamuena. <sup>69</sup> Ia bariu rani neiana keaoaina hanona Maearima Nahuna hiabu Tiramana imana itipana tainai kemiati."

<sup>70</sup> Ia ikoikiai tebakaina tetibaha, "Ba oi hanona Tirama Nahuna, u?" Weiana Iesu ia ehina benakia etibaha, "E, aba tu'abi mo naia." <sup>71</sup> Ba ia te'abi tetibaha, "Taba buonai hinau 'abikia nahatabunakia? Aika aba ia kipona pinanai Tirama nia'i ki'ana aiana haona."

## 23

*Iesu Pilato Wairanai.*

*(Mt 27.1, 2, 11-14; Mk 15.1-5; Io 18.28-38)*

<sup>1</sup> Weiana bakai apa'uana haukia maikoina temikiri Iesu teaoaina Pilato herena. <sup>2</sup> Weia ena beho 'abikia tea'i ramana tetibaha, "Hau neiana tatabu ahina emai hanopaka maearimakia aokia

niana aiara niba'uri 'urina mai obia arana herenai takiti katabaibeni hauna nikaiabuna, abomo kipona ni'abi ia hanona Keriso, obia arana.”<sup>3</sup> Ba Pilato ehore Iesu ebakaina etibaha, “Oi hanona Iuda haukia ekia obia arana, u?” Ia ena 'abi ebamuena etibaha, “Abimo naiana aba nohinana.”<sup>4</sup> Pilato ehore robe haukia apa'uakia mai to'u haukia ehina benakia etibaha, “Au hau neiana herenai beho ha a'i atabu ahina.”<sup>5</sup> Ia te'abi tabura tetibaha, “Ena ba'ioi 'abikia Iuda maearimasia aba eba'uri 'urinakia, weia Galilea ai ea'i ramana emai mo aba 'eka neianai ekara'au.”

<sup>6</sup> Pilato 'abi weiana 'uruna eona hanona ebakai bakai hau neiana Galilea hauna 'ao.<sup>7</sup> Pilato e'ioi Iesu hanona Heroda ena iha'ini ba'anai buonai euhuna teaoaina Heroda herena, rani weianai Heroda abomo weia Ierusalem ai.

### *Iesu Heroda Wairanai.*

<sup>8</sup> Heroda Iesu eihana raninai aona enamo ki'a pokina aba wa'i baha 'akinai Iesu pouna eona, enuatae ia peihana abomo ena nuatae Iesu hoa baika pebabai peihanakia.<sup>9</sup> Ua buonai 'abi bo'okia ebakaina, 'a Iesu ia ena 'abi ha a'i ebamuena.<sup>10</sup> Robe haukia apa'uakia mai rauhuhu poki haukia weia tekoro te'abi pahih herenai.<sup>11</sup> Ba Heroda mai ena huari haukia kipokia Iesu tebapo'ona, 'abi ki'a obokia haeai haeai tehina murinai, obia habunina ha tebabatona, haeamona temue aina teaoaina Pilato herena.<sup>12</sup> Rani weianai Heroda mai Pilato hanona tebaihau, ia 'uainai terarua hanona tebai'oata.

### *Pilato Ehina benakia Iesu Kateahu 'arina.*

(Mt 27.15-26; Mk 15.6-15; Io 18.39–19.16)

<sup>13</sup> Pilato ehore robe haukia apa'uakia aiara obiakia mai aiara maearimasia eaparinakia ebato'unakia.<sup>14</sup> Ehina benakia etibaha, “Hau neiana tomaiaina here'uai to'abi, maearima aokia niani aiara niba'uri 'urina, ia au wairamiai 'abi weiakia tohina herenai haukia abakaina hanona ena ki'a ha a'i atabu ahina.<sup>15</sup> Heroda abomo ua homana buonai euhuna emue emai hereka, katoihana ia hanona 'ari akana ha a'i ebabaina.<sup>16</sup> Weiana buonai ka'atina ba kahabona keao.”<sup>17</sup> Rani ikoinai Kabanai tatuna

aonai Pilato ena hoa hoa tainai wapura hauna ha ebakarahina.

<sup>18</sup> 'A mako teio haemo tetibaha, “Hau neiana moahu 'arina! Baraba morubuna mobenamai!”<sup>19</sup> Baraba hanona aba ua'a wapura 'ekanai emiaho pokina aiara apa'uana aonai baripuripu mai ahuahe ebaramanakia paunai.<sup>20</sup> Pilato ena nuatae hanona Iesu pebakarahina paunai to'u haukia ehinabe muenakia.<sup>21</sup> 'A to'u haukia teio hao io hao tetibaha, “Matu ibiri ropo 'ubinai me'ari! Matu ibiri ropo 'ubinai me'ari!”<sup>22</sup> Pilato rani ibaihauna to'u haukia ehinabe muenakia, “Hau neiana beho tabana ebabaina? Ia ke'ari hauna behona ha a'i atabu ahina. Ua paunai ka'atina ba kahabona keao.”<sup>23</sup> 'A to'u haukia teio to'o baihana aiakia 'ubi tohanai Iesu matu ibiri ropo 'ubinai ke'ari. Ekia ioai Pilato etara haona.<sup>24</sup> Ua buonai Pilato ehore ekia nuatae ebabaina Iesu behoi ehorotina.<sup>25</sup> Pilato ehore hau weiana baripuripu mai ahuahe ebaramanakia paunai wapura 'ekanai tehorotina hauna ebakarahina ekia noinoi ihobonai, ba Iesu ebenakia ekia nuatae akakia katebabai.

### *Iesu Matu Ibiropoai Tekoko 'auna.*

(Mt 27.32-44; Mk 15.21-32; Io 19.17-27)

<sup>26</sup> Huari haukia Iesu tebaka'ana teaoaina aonai Kurene hauna ha atana Simona ia hanona 'uniai emai Ierusalem niao tetabu ahina ba tea'ina matu ibiri ropo tebabua ahina Iesu murinai eka'a aina.

<sup>27</sup> Maearima bo'ona 'akina Iesu murina te'au baiatakiai babi'e baika ia teako'o aina tehai.<sup>28</sup> Iesu ekabe ehina benakia etibaha, “Ierusalem nahuna babi'emi e, au a'i tomohai aina'u, 'a wai mai nahumi kipokia paumiai tomohai.<sup>29</sup> Pokina rani kemai aonai maearima kate'abi katetibaha, ‘Babi'e te'one 'one miori a'i tebarama, mai a'i teba'ae ba'ae babi'ekia hanona namo tea'ina.’<sup>30</sup> Weiana ‘kobio katehina benakia, “tomo'eho ahamai ai”, mai oeo katehina benakia, “tomobahu abunamai.”’

Hos 10.8

<sup>31</sup> Au matu maurina 'abana here'uai na tibabai aiho raninai, wai matu 'ororona 'abana heremiai aea patebabai aihona?”

<sup>32</sup> Beho haukia rua abomo tebaka'anakia teaoainakia Iesu kipokia kateahu 'arinakia.<sup>33</sup> Temai 'eka atana ‘Ara huriana’

ai tekara'au aonai, Iesu matiu ibiri ropo ahanai tekoko 'auna beho haukia rua kipokia hamona itipanai, ha awarinai. <sup>34</sup> Ba Iesu e'abi etibaha, "Hama'u e, mohina haonakia pokina ia a'i te'jobina taba tibabaina." Weiana huari haukia pu'i ai ena habuni tawatena.

<sup>35</sup> Maearima tekoroiti tebaiaruru, aiara obiakia tehore Iesu tebapo'ona te'abi tetibaha, "Ia maearima haeai eba-maurinakia, ba ia Tirama ena Keriso Tirama etina'ana hauna raninai kipona mebamaurina." <sup>36</sup> Huari haukia abomo tebapo'ona tekahaha herena bine beina manoina tebena. <sup>37</sup> Ba tehina bena tetibaha, "Oi Iuda ekia obia 'arana raninai kipomu mobamaurini'o." <sup>38</sup> Iesu 'arana ubinai marere ha abomo weia na terere aihona,

'NEIANA HANONA IUDA EKIA OBIA  
'ARANA!'

<sup>39</sup> Beho haukia weia tekapa'au haukia ha Iesu ebapo'ona e'abi etibaha, "Oi bamauri haumu 'ao aha'i? Kipomu mobamaurini'o ai abomo mobamaurinaimai." <sup>40</sup> 'A 'abana ehore erikena etibaha, "Oi puma ihobona nua'ina mo Tirama a'i nuta'u aina, u? <sup>41</sup> Aika hararua kaha'ari hanona ebero, pokina puma naha'ina hauna hanona eka babai ihobonai, 'a hau neiana hanona taba ha'i ebagai ki'ana." <sup>42</sup> Haeamona ia e'abi etibaha, "Iesu e, emu obia aiarana kokatoto raninai au korao-nana'u." <sup>43</sup> Iesu ia ehina bena etibaha, "'Abi tohana au oi nahina beni'o, bariu rani neianai oi mai au hararua hanona paradiso aonai kahamiahoho."

*Iesu E'ari.*

*(Mt 27.45-56; Mk 15.33-41; Io 19.28-30)*

<sup>44</sup> Ihobona matoha atiaha hororo aonai beraura ewapura, abomo wapura hanopaka maikoina ekaiabuna eaomo beraura hoana aihau. <sup>45</sup> Abomo marea robe aona i'aea hurina habunina etapa boana rua.

<sup>46</sup> Iesu eapari aota, "Hama'u e, auba'u imamuai nautana." Ua e'abi aihohu murinai e'ari.

<sup>47</sup> Weiana huari poki hauna taba terama haukia eihanakia aonai Tirama ebanomona etibaha, "'Abi tohana hau neiana hanona bero hauna."

<sup>48</sup> Baiaruru haukia weia teto'una taba terama teihanakia raninai, haharakia

teahu ahunakia mai aoko'okia temue aiara teao.

<sup>49</sup> 'A Iesu te'jobina haukia ikoikia mai babi'e weiakia murinai te'au Galileai temai haukia atau'ai tekoroiti taba terama haukia teihanakia.

*Iesu Tehorena.*

*(Mt 27.57-61; Mk 15.42-47; Io 19.38-42)*

<sup>50</sup> Bakai apa'uana hauna ha atana Iosepa ia hau namona abomo aka bero hauna, <sup>51</sup> ena aiara hanona Arimatea Iudea aiarana ha, Tirama ena obia aiarana ne'imana kemai. Ia bakai apa'uana haukia ekia raona mai babai a'i ea'i taeanakia. <sup>52</sup> Hau neiana eao Pilato herena Iesu huanina enoi aina. <sup>53</sup> Weiana ia Iesu huanina ea'i obona habuni imukinai e'apana 'ariahana pihara tekuina 'urina aonai ehorotina, 'uri weiana hanona tai aha'i tihore bahana. <sup>54</sup> Rani weiana hanona a'ia'i harai wapuna abomo beraura robenai aba kea'i ramana.

<sup>55</sup> Babi'e weiakia Iesu kipokia Galileai temai babi'ekia Iosepa murinai teao, 'ariahana mai Iesu huanina aea tebaenoti aihona teiha haraina. <sup>56</sup> Weiana ia temue teao aiara muramura timikia namokia mai hauna katetarona tehorkia teba'orunakia. Ba beraura robenai tearai rauhuhu taina.

## 24

*Iesu 'Ariai Emikiri Mue.*

*(Mt 28.1-10; Mk 16.1-8; Io 20.1-10)*

<sup>1</sup> Hui beraurana kori 'uainai raurani 'amari 'amarinai babi'e muramura timikia namokia teba'orunakia haukia tea'inakia 'ariahana teao. <sup>2</sup> 'Ariahana ikaiabuna piharana aba ehore pare atau'ai teihana.

<sup>3</sup> Ia 'ariahana aonai tetoto raninai Iesu Obiapaka huanina a'i teihana. <sup>4</sup> Weiana paunai tekoroiti aokia earo'ari aonai hau rua ekia habuni 'imare 'imarekia beronai herekia tekoroiti. <sup>5</sup> Babi'e teta'u ki'a tekuti wairakia 'ano eao, hau rua babi'e tebakainakia tetibaha, "Taba buonai emauri hauna 'ari haukia baiatakiai tutabuna. <sup>6</sup> Ia hanona neia aha'i. Ia aba emikiri mue! Galileai emiahoho oho aonai wai ehina benimi 'abina tomoraonana.

<sup>7</sup> Etibaha, 'Maearima Nahuna hanona ki'a haukia imakiai kateutana, matiu ibiri ropo 'ubiai kateahu 'arina haeamona wapu ibaihauna murinai kemikiri mue.' "

<sup>8</sup> Weia ia Iesu ena 'abi teraona tinanakia. <sup>9</sup> 'Ariahanai temue temai raninai taba

neiakia ikoikiai i'abana haukia harauhaea hamomo mai harina baika herekiai tehinanakia. <sup>10</sup> Babi'e neiakia Maria Magadala babi'ena, Ioana, Iakobo hinana Maria, mai babi'e baika te'abanakia haukia kipokia pou neiana iuhubeau haukia herekia tehinana. <sup>11</sup> Iamo iuhubeau haukia babi'e ekia 'abi ori 'abaeana tebaona buonai a'i tebatohana. <sup>12</sup> 'A Petero emikiri ebeu eao 'ariahana. Ekuti aona eribana te'apana habunikia mo weia kipokia tenoti 'abaea eihanakia, emue ena itu eao aonai kipona aona earo'ari taba weiana erama hauna paunai.

*Iesu Emao Taearanai Ewaira Tina.  
(Mk 16.12, 13)*

<sup>13</sup> Rani weiana hamona aonai Iesu i'abana haukia rua tiao aiara ha atana Emao, aiara weiana mai Ierusalemata baiatakia ena homa'a hanona kilometa harauhaea hamomo 'abana. <sup>14</sup> Taearei teka'a aonai taba neiakia ikoikiai terama haukia teraru baiatakiai te'abi 'abi ainakia. <sup>15</sup> Ba teraru te'abi 'abi mai terobahu aonai Iesu kipona emai herekia teka'a oioi. <sup>16</sup> 'A maearimana teihana ia a'i te'iohina ia hanona Iesu.

<sup>17</sup> Iesu ia ebakainakia etibaha, "Wai toraru ka'amiai taba robana tuahuna?" Teraru tekori 'ororo wairakia mai birabirakia. <sup>18</sup> Ha weiana atana Kaleapa ebakai bakai etibaha, "Ierusalemata aonai oi pa'e ikupaianu mo taba rani murikai terama haukia a'i o'iohina?" <sup>19</sup> Ia ebakainakia etibaha, "Aka tabakia?"

Hau rua tetibaha, "Iesu Nasareta hauna pouna. Ia hanona mahabanai hauna, Tirama mai maearima ikoikiai wairakiai ena 'abi mai aka tehiabu wairai. <sup>20</sup> Robe haukia apa'uakia mai aiara haukia apa'uakia ia Roma haukia tebenakia matiu ibiri ropo 'ubina teahu 'arina. <sup>21</sup> 'A ai taraonana ia hanona aika Isaraela hauka kebamaurinaka hauna.

Haemona taba neiakia terama wapu aihau teore. <sup>22</sup> Babi'e baika baiatamai ai tebata'u ta'u hurinamai. Ia raurani amarina teo 'ariahana hanona <sup>23</sup> Iesu hauanina a'i tetabu ahina temue temai te'abi aneru teihanakia abomo aneru weiakia ia tehina benakia, 'Iesu hanona aba emauri mue.' <sup>24</sup> Ba 'abamai baika teo 'ariahana teihana hanona babi'e te'abi ihobonai mo tetabu ahina, 'a Iesu hauanina a'i teihana."

<sup>25</sup> Iesu ehina benakia etibaha, "Hama na topo'o aiho abomo mahabanai haukia taba tehina haukia ibatohakiai aomi temahari. <sup>26</sup> Keriso na kehaiara aiho 'uai ba ena nuabi aonai ketoto, weiana a'i to'iohina, u?" <sup>27</sup> Iesu hanona Mose mai mahabanai ekia rere rereai ea'i ramana Puka Robena aonai ia kipona 'abina maikoinai hau rua eba'iohinakia.

<sup>28</sup> Aiara tiao hauna aba herekiai ba Iesu hanona kekabero na ehoma. <sup>29</sup> 'A teraru tebamuna te'abi tetibaha, "Beraru aba kekaihuna abomo aba kerabi, kipokia pahamiao." Ba ia ekatoto kipokia katemiaho. <sup>30</sup> Weiana aniani 'ekanai kipokia temiati ranina Iesu ehore parawa ea'ina ebanamona ehobina teraru ebenakia. <sup>31</sup> Ba mahakia teno'a aokia tea weia te'iohina ia hanona Iesu, haemona wairakiai e'akauma 'abaea. <sup>32</sup> Ia teraru kipokia te'abi tetibaha, "Taearei ehina benaka abomo Puka Robena 'abikia eba'iohinaka ranina matoha iruba aokai eara, uhe?"

<sup>33</sup> Teraru beronai temikiri temue Ierusalemata teo, i'abana haukia harauhaea hamomo 'abakia kipokia tito'u haukia tetabu ahinakia. <sup>34</sup> Ia hau rua tehina benakia tetibaha, "Obiapaka hanona emikiri toha, Simona herenai ewaira tina." <sup>35</sup> Weiakia teraru taearai taba erama pouna abomo parawa ehobina aonai aokia ea Iesu te'iohina pouna tehinanakia.

*Iesu I'abana Haukia Iesu Teihana.  
(Mt 28.16-20; Mk 16.14-18; Io 20.19-23;  
Ih 1.6-8)*

<sup>36</sup> 'Abi weiakia tehina oho mo aonai Iesu tohana ia baiatakiai ekoroti abomo e'abi etibaha, "Baibua wai heremiai!" <sup>37</sup> Ia ikoikiai teta'ukia mai ubo ea'inakia, teraonana biriua teihana. <sup>38</sup> 'A Iesu ehina benakia etibaha, "Ae homa buonai tuta'u mai aomi tikai'au kai'au. <sup>39</sup> Ima'u mai ae'u tomoihanakia tomoa'i hobona'u tomo'iohina'u, Nahuna au toha'u pokina auba hanona bitiona mai huriana aha'i ia au hanona mai eu'u." <sup>40</sup> 'Abi weiana ehinana murina imana mai aena ebaihanakia. <sup>41</sup> Ia teonamo ki'a baha paunai Iesu a'i tebatoha bahana aokia raona raona ebonu buonai ia ebakainakia etibaha, "Wai taba katoani hauna ha na'a?" <sup>42</sup> Ia maia ha aba eawati hauna



hana papana tebena. <sup>43</sup> Weiana ia ea'ina wairakiai eana.

<sup>44</sup> Ba Iesu ia ehina benakia etibaha, “Au wai heremiai amiaho oho aonai taba robakia ahu haukia neiakia, Au pou'u tererenakia Mose ena rauhubuui mahabanai haukia ekia rere rereai mai Salamo aonai haukia ikoikiai katetoha.” <sup>45</sup> Weiana aokia ebaeanakia Puka Robena obona kateobo. <sup>46</sup> Haeamona Iesu ia ehina benakia etibaha, “Puka Robenai na terere aihona. Bamauri hauna hanona kehau haiara abomo 'ariai kemikiri mue wapu ibaihaunai. <sup>47</sup> Ia atanai raona kabe mai ki'a ihina haokia poukia kateiroro ainakia Ieruselema ai katea'i ramana keaomo hanopaka ikoikiai aokiai. <sup>48</sup> Wai hanona taba neiakia poukia ibatohakia haumi. <sup>49</sup> Aia'u tomona. Hama'u Auba Robe e'uahi 'uaina hauna au kipo'u kauhuna kemai ahamiai, 'a wai hanona Ieruselema aonai katobai'ima keao mo hiabu 'ubiai kemai hauna katoa'ina.”

*Iesu Ea'itaeana Kupa Eao.*

*(Mk 16.19, 20; Ih 1.9-11)*

<sup>50</sup> Iesu ia aiara apa'uanai ebakarahnakia teao Betani herena tainai, ba imana ea'i taea banamo ebenakia. <sup>51</sup> Nibanamonakia aonai Tirama ehore herekiai ea'i taeana eaoaina kupa. <sup>52</sup> Ia tekuti aina ba mai aonamokia temue teao Ieruselema. <sup>53</sup> Rani ikoinai teao Marea Robe aonai temiaho Tirama tebanamona.

## Pou Namona IOANE Ererena Hauna

### *Puka Aona Irerena 'Abina*

Pou namona neiana Ioane ererena aonai ebaihanaka, Iesu hanona Tirama ena 'abi banaibanai hauna, ia hanona maearima hauaninai emai haeamona maearima baiatakiai emiaho (1.14). Ioane ena nuatae hanona maearima Iesu katea'ikakaumana ia Tirama Nahuna, kate'ioibina Iesu hanona Tirama e'abi'uai keuhuna kemai kebamaurinaka hauna. Ioane hanona e'ioibina maearima Iesu tia'ikakaumana haukia hanona mauri banaibanai titabu ahina, ua buonai puka neiana ererena (20.31).

Kori'uaina hanona Ioane nehina benaka Iesu hanona Tirama ena 'Abi, ba bata'u ta'u huri akakia ebagai robana eahuna. 'Abi tohana, maearima baika hanona Iesu tea'ikakauma mai murinai te'au, iamo baika hanona ia ia'ikakaumana teubo aina. Puka iro'ana 13–17 aonai hanona i'oata haukia taearana titabu rabinai robana eahuna, Iesu hanona i'abana haukia kipokia temiaho, ia ehore ba'ioibi namokia ebenakia. Puanai hanona Iesu 'ariai emikiri mue mai i'abana haukia ia teihana mai tea'ikakaumana.

Taba hamona puka neiana aonai kahaiha to'ona hanona ena hoahoa weiana maearima ekia mauri aonai tabakia nia'inakia 'abi ibabataikiai nibaonakia a'ikakauma haukia rani ikoikiai katemaui ainakia, matoha bei, parawa, ea, bine buabuana, mamoe mai 'ima hauna 'abakia.

### *Puka Paipana Apa'uakia*

- a. 'Abi kori'uaina. (1.1-18)
- b. Ioane ba'uere robe hauna mai Iesu i'abana haukia kori'uaikia. (1.19-51)
- c. Iesu ena aka maearima herekiai. (2.1–12.50)
- d. Wapu orekia Ierusalem aonai mai herenai. (13.1–19.42)
- e. Obiapaka ena mikiri mue mai ena waira tina. (20.1-31)
- f. 'Abi orekiai ena waira tina mo ha Galilea aonai. (21.1-25)

*'Abi Hanona Maearima Hauaninai Emai.*

<sup>1</sup> Bahabana 'akinai hanopaka a'i erama baha aonai 'Abi hanona aba ua'a, 'Abi hanona Keriso, 'Abi hana Tirama ohi temiaho, 'Abi hanona Tirama. <sup>2</sup> Ia hana bahabana 'akinai Tirama ohi temiaho. <sup>3</sup> Tirama ebagai tabakia ikoikiai hana 'Abi weianai terama, terama tabakia ikoikiai hanona ha kipona a'i erama. <sup>4</sup> 'Abi hanona mauri pokina, ba mauri weiana hanona maearima ekia ea. <sup>5</sup> Ea hanona e'ara wapura aonai, ia wapura hana ea a'i nihao abuna.

<sup>6</sup> Tirama hau ha euhuna emai, ia atana hanona Ioane. <sup>7</sup> Ia emai maearima herekiai ea pouna kehinana, ia paunai maearima ikoikiai ea pouna kateona ba katea'ikakauma. <sup>8</sup> Ia kipona hanona ea weiana aha'i, ia ea pouna kehinana paunai emai. <sup>9</sup> Ea tohana hanona emai hanopakai maearima ikoinei herekiai kebaeanakia.

<sup>10</sup> Ia hanona hanopaka aonai, hanopaka hanona ia 'eunai erama, iamo hanopaka hanona ia a'i e'ioibina. <sup>11</sup> Ia ena hanopaka tohana haukia herekia emai, ia kipona ena maearima tohakia hanona a'i tea'i taeana. <sup>12</sup> Ia tia'i taeana mai atana tia'ikakaumana haukia ikoikiai hanona bero ebenakia Tirama nahunai kateao. <sup>13</sup> Tirama nahunai teao haukia hanona maearima ekia rama taearanai aha'i, 'ao hauani ena nuataeai aha'i, 'ao maearima ha ena nuataeai aha'i, ia Tirama ena nuataeai terama.

<sup>14</sup> 'Abi weiana hanona maearima hauaninai emai, baiatamai ai kipokia tamiaho. Ena nuabi taihana, nuabina weiana hanona Hamana herenai emai Nahuna hamohamona 'euna, ia aonai aoko'o hoana mai 'abi tohana ebonu 'auna. <sup>15</sup> Ioane ehore ia pouna ehinana eio etibaha, "Au pouna ahinana hauna hanona neiana, atibaha, 'Au muri'uai nimai hauna etara haona'u pokina ia hauna emiaho 'uai ba au arama.'"

<sup>16</sup> Ia aoko'o hoanai ebonu 'auna ba aika ikoikai banamo ia herenai naha'ihao a'ihaona. <sup>17</sup> Tirama rauhuhu ebenaka Mose imanai, ia aoko'o hoana mai 'abi tohana hanona Iesu Keriso herenai temai. <sup>18</sup> Hau ha Tirama a'i eiha 'apuana, 'a Nahuna hamohamona Tirama herena 'akinai nemiaho mai ia kipona abomo Tirama, ia hauna ehore Tirama eba'ioibinaka.

*Ba'uere Robe Hauna Ioane E'abi 'Au Hanona Keriso Aha'i.*

(Mt 3.1-12; Mk 1.1-8; Lk 3.1-18)

<sup>19</sup> Weia Ierusalemi Iuda haukia apa'uakia tehore robe haukia mai Lebi haukia teuhunakia teao Ioane herena katebakaina ia hanona tai. <sup>20</sup> Ioane a'i ebuniai ia ehina pou haraina etibaha, "Au hanona Keriso\* aha'i." <sup>21</sup> Ia tebakaina tetibaha, "Ba oi hanona tai? Oi hanona Elia?" Ia e'abi etibaha, "Au Elia aha'i." Ia tebakai muena tetibaha, "Oi mahabanai haumu 'ao?" Ekia 'abi ebamuena etibaha, "Aha'i." <sup>22</sup> Ua buonai ia tehina bena tetibaha, "Mohina benamai oi hanona tai. Emu 'abi kataeaoaina teuhunamai haukia katahina benakia. Oi kipomu poumu aea nohina aihona?" <sup>23</sup> Ioane ekia 'abi ebamuena etibaha, "Au hanona mahabanai hauna Isaia ena rererere 'abina, ia e'abi etibaha, 'Aia ha hano'akunai eio hauna etibaha, Obiapaka ena ka'a taearana tomobaberona kekana.' "

Isa 40.3

<sup>24</sup> Baika hanona Parisea haukia teuhunakia haukia, <sup>25</sup> haeamona tebakaina tetibaha, "Oi Keriso aha'i 'ao Elia aha'i 'ao mahabanai haumu aha'i raninai aehona buonai nuba'uere robe?" <sup>26</sup> Ioane ehina benakia etibaha, "Au beiai naba'uere robenimi, 'a wai baiatamiai a'i to'jobina hauna ha ekoroti. <sup>27</sup> Ia hanona muri'uai nimai, iamo ia eapa'ua ba au, ia ena tamaka warokia karubunakia abomo here'uai a'i ketaina." <sup>28</sup> Neiakia ikoikiai hanona Ioane Ioridana ate abirana Betaniai eba'uere robe aonai terama.

*Iesu Hanona Tirama Ena Mamoe Nahu.*

<sup>29</sup> Erani Ioane ehore Iesu eka'a herena nimai hanona eihana ba e'abi etibaha, "Tomoihana Tirama ena mamoe nahuna hanopaka ena ki'a ibua parena hauna. <sup>30</sup> Maraniai au robana ahuna hauna neiana atibaha, 'Muri'uai nimai hauna hanona au etara haona'u, pokina ia emiaho 'uai ba au arama.' <sup>31</sup> Au kipo'u ia a'i a'jobina, ia au amai beiai kaba'uere robe hana ia kabawaira tinana Isaraela haukia ia kate'jobina paunai."

<sup>32</sup> Ba Ioane ia pouna ehinana etibaha, "Au Auba Robe aihana rauria 'abana

kupai eriri ia ahanai ehiri'au. <sup>33</sup> Au a'i a'jobi bahana, ia weiana euhuna'u beiai kaba'uere robe na ehoma Tiramana ehina bena'u etibaha, 'Ahanai Auba Robe keriri kehiri'au koihana hauna ko'jobina ia hanona Auba Robe ai kaba'uere robe.' <sup>34</sup> Au maha'uai aba aihana ba nahina pouna neiana hana Tirama Nahuna."

*Iesu I'abana Haukia Kori'uaikia.*

<sup>35</sup> Erani Ioane haeamona weia i'abana haukia rua kipokia tekoroiti. <sup>36</sup> Ia Iesu nikabanai eihana raninai e'abi etibaha, "Tomoihana Tirama ena mamoe nahuna." <sup>37</sup> Ioane i'abana haukia rua ia e'abi aiana teona raninai teao Iesu murinai teka'a. <sup>38</sup> Iesu eiha kabe murinai tika'a haukia eihanakia ba ebakainakia etibaha, "Wai taba tonuatae aina?" Ia ena 'abi tebamuaena tetibaha, "Rapi e, oi ae'eai nomiaho?" (Maeakiai Rapi anina hanona 'ba'jobi hauna.) <sup>39</sup> Ia ehina benakia etibaha, "Tomai tomoihana." Ba teao ena emiaho 'ekana teihana, weiana hanona beraura ebaeno hoana bani, ia kipokia temiaho.

<sup>40</sup> Weiakia terarua Ioane e'abi aiana teona abomo Iesu murinai teao haukia ha hanona Anderea, ia hanona Simona Petero hatina. <sup>41</sup> Anderea beronai a'ana Simona etabu ahina ba ehina bena etibaha, "Ai Mesia aba tatabu ahina." (Mesia anina hanona Keriso, Bamauri hauna.) <sup>42</sup> Ba ia Simona eaoaina Iesu herena. Iesu Simona eiha 'ini 'inina e'abi etibaha, "Oi atamu hanona Simona, Ioane nahuna, bariu oi atamu kateaparina Kepa." (Kepa hanona ihobona Petero, anina hanona pihara.)

*Iesu Pilipo Mai Natanaela Ohi Eaparinakia.*

<sup>43</sup> Erani Iesu enuatae keao Galilea aonai, Pilipo etabu ahina ba ehina bena etibaha, "Muri'uai omai." <sup>44</sup> Pilipo hanona Betsaida hauna Anderea mai Petero 'abakia. <sup>45</sup> Pilipo ehore Natanaela etabu ahina ehina bena etibaha, "Mose rauhuhu aonai pouna ererena abomo mahabanai haukia ekia pukai tererena hauna ai aba tatabu ahina. Ia hanona Nasareta hauna Iesu, Iosepa nahuna." <sup>46</sup> Natanaela ehore ebakai bakai, "Nasareta ai taba namona ha ua'a ha kerama ketaina, u?" Pilipo etibaha, "Omai mo, moihana."

\* 1:20: (20) 'ao Mesia

<sup>47</sup> Iesu Natanaela eka'a herena nimai eihana raninai poua ehinana, "Ia hana Isaraela hauna tohana. Ia aonai bai'oi hoana ha aha'i." <sup>48</sup> Natanaela ehore ebakaina, "Aea o'iobi aihona'u?" Iesu ia ena 'abi ebamuena etibaha, "Oi suke matiuna ba'anai aiha 'uaini'o ba Pilipo eaparini'o." <sup>49</sup> Ba Natanaela e'abi etibaha, "Ba'iobi haumu e, oi hana Tirama nahuna. Oi hana Isaraela ekia obia arana." <sup>50</sup> Iesu ia ehina bena etibaha, "Au a'abi suke matiuna ba'anai aihani'o buonai nua'ikakaumana'u, u? Neiana mo aha'i, wairai oi hana taba rarikia koihanakia." <sup>51</sup> Haeamona ehina benakia etibaha, "Abi tohana au wai nahina benimi, kupa kekaikau Tirama ena aneru katekara'au kateriri au Maearima Nahuna aha'uai katoihanakia."

## 2

### *Kana Aiaranai Hawainibe Tatuna Ha.*

<sup>1</sup> Wapu rua murinai Galilea Kana aiarana aonai hawainibe tatuna ha erama. Iesu hinana hanona weia, <sup>2</sup> Iesu mai i'abana haukia kipokia abomo tebeaunakia teao hawainibe tatuna weianai. <sup>3</sup> Tatu aonai bine beina teinu orena raninai Iesu hinana ehore Iesu haianai e'abi etibaha, "Ia herekiai bine beina aba eore." <sup>4</sup> Iesu e'abi etibaha, "Hina'u, taba buonai ekia aro'ari hauna au nubena'u. Au e'u rani a'i nitai bahana." <sup>5</sup> Ia hinana ta'ara'i haukia ehina benakia etibaha, "Ia taba na keho hanona maikoinai katobabai."

<sup>6</sup> Weia pihara puoukia 'abaihau tekoroti, Iuda haukia ekia hoahoa taikia weia bei katerai'au imakia mai aekia kateutu, puou ha ha aokiai beibebe matoha harau rua 'ao harau aihau 'abakia. <sup>7</sup> Iesu ta'ara'i haukia ehina benakia etibaha, "Puou aokiai bei tomoba bonunakia." Ua buonai teheinakia tebabonu teao 'ako'akokiai. <sup>8</sup> Ba ia ehina benakia etibaha, "Bariu harua tomorai 'aunakia tomoaoaina tatu iha'ini hauna tomobena." Ba harua teraina teaoaina ia tebena. <sup>9</sup> Tatu neiha 'inina hauna bei weiana bine beinai eao hauna einu hobona, ae'e ai emai hanona ia a'i e'iohina, ta'ara'i haukia bei teraina haukia mo te'iohina. Ba iha'ini hauna hawainibe mahamaha hauna eaparina haiahaia, <sup>10</sup> e'abi etibaha, "Maearima ikoikia hanona bine beina namona tibeniuainakia, ba teinu 'ari murinai bine

beina 'ama'amana tibenakia, ia oi hanona bine beina namona obamauaina emai mo bariu obaibeni."

<sup>11</sup> Iesu bata'uta'u huri hoana kori'uaina neiana ebabaina Galilea Kana aonai. Ena nuabi ebawaira tinana ba i'abana haukia ia tea'ikakaumana.

<sup>12</sup> Tatu neiana murinai Iesu hinana hatina mai i'abana haukia kipokia teao Kaperanauma ua'a temiaho wapu baika teao.

### *Iesu Ehore Kawakawa Haukia Marea Robei Eu'u Ahinakia.*

(Mt 21.12, 13; Mk 11.15-17; Lk 19.45, 46)

<sup>13</sup> Iuda haukia ekia Kabanai tatuna beraurana ekaibari buonai Iesu ekara'au Ierusalem eao. <sup>14</sup> Ua'a marea robe aonai hanona poromakau, mamoe, rauria tikawakawa ainakia haukia mai moni tia'i banai haukia temiati eihanakia. <sup>15</sup> Ba i'ati'ati 'anauana ha ebabaina 'anauai marea robe aonai poromakau mai mamoe ikoikia eura ahinakia, moni a'ibanai haukia ekia moni ebarobo otarainakia ekia itara etori ku'a banainakia. <sup>16</sup> Weiakia rauria tikawakawa ainakia haukia herekiai e'abi etibaha, "Neiakia tomoa'i katu'anakia 'eka neianai. Hama'u ena itu hanona wai emi kawakawa 'ekana'i a'i tomobaona!" <sup>17</sup> Ba i'abana haukia Puka robena aba tererena 'abina teraona tinana, "Oi emu itu iraona'au aina hanona au ao'uai iruba niara 'abana."

<sup>18</sup> Ba Iuda haukia apa'uakia tehore Iesu tebakaina tetibaha, "Bata'uta'u huri hoana tabana ai kobaihanamai hanona katabatohani'o oi mai emu bero neiakia ikoikia nubabai." <sup>19</sup> Iesu ekia 'abi ebamuena etibaha, "Marea robe neiana tomoahu 'iti'itina, au wapu aihau aonai kabakori muena." <sup>20</sup> Iuda haukia apa'uakia te'abi tetibaha, "Marea robe neiana tebabaina ihauna hanona bariabui 'abaihau, ia wapu aihau aonai aea kobakori mue aihona?"

<sup>21</sup> 'A Iesu marea robe robana eahuna hauna hanona ia kipona huanina. <sup>22</sup> Weiana Iesu 'ariai emikiri mue murinai ia i'abana haukia ena 'abi ehinana hauna teraona tinana. Ba Puka robena mai Iesu ehina 'abikia tebatohanakia.

### *Iesu Maearima Ekia Hoahoa Aba E'iohinakia.*

<sup>23</sup> Iesu Kabanai tatuna aonai Ierusalem ai emiaho, maearima bo'ona bata'uta'u huri hoakia ebabai teihana hanona



tea'ikakaumana. <sup>24</sup> 'A Iesu kipona hanona maearima a'i ebatohanakia pokina ia hanona ikoinai e'iobinakia. <sup>25</sup> Iesu kipona maearima aokiai temiaho tabakia aba e'iobinakia paunai, hau ha a'i kehore maearima poukia ia herenai a'i kehinanakia.

### 3

#### *Iesu Nikodemo Ohi Te'abi'abi.*

<sup>1</sup> Parisea hauna ha atana Nikodemo ia hanona Iuda haukia ekia hau apa'uana ha. <sup>2</sup> Rabi ha ia eao Iesu herena ehina bena etibaha, "Ba'iohi haumu e, ai ta'iohina oi hanona Tirama herenai omai. Oi bata'uta'u huri hoakia nubabai hanona Tirama ia herenai aha'i hauna ha a'i kebabaina hoakia oi nubabai."

<sup>3</sup> Iesu ia ena 'abi ebamuena etibaha, "'Abi tohana au oi nahina beni'o, maearima ha a'i kerama mue raninai ia hanona Tirama ena obia aiarana a'i keiha 'apuana." <sup>4</sup> Weiana Nikodemo ebakai bakai etibaha, "Maearima aba eapa'ua raninai ia aea kerama mue aiho? 'Abi tohana rani ibaruana ia hinana nu'anai a'i ketoto mue haeamona a'i kerama."

<sup>5</sup> Iesu ia ena 'abi ebamuena etibaha, "'Abi tohana au oi nahina beni'o, maearima hanona beiai mai Auba Robeai a'i kerama mue raninai ia hanona Tirama ena obia aiarana a'i ketoto 'apuana."

<sup>6</sup> Hauani nihore hauani nibaramana, ia Auba Robe nihore auba nibaramana.

<sup>7</sup> Ahina beni'o korama mue 'abina hauna a'i kobaoao aina. <sup>8</sup> Baura niabu nenuatae aina 'ekana niao, ia oi hanona 'uruna mo nuona, ia ae'eai nimai 'ao aeana niao hanona a'i o'iohina. Auba Robe ai terama haukia ikoinai abomo uamo homana."

<sup>9</sup> Nikodemo ehore ia ebakai muena etibaha, "Taba neiakia aea katerama aiho?"

<sup>10</sup> Iesu ia ehina bena etibaha, "Oi hanona Isaraela ena ba'iohi haumu apa'uana ha, ia aehoma buonai taba neiakia obokia a'i nuobo? <sup>11</sup> 'Abi tohana au oi nahina beni'o, ai ta'iohi haukia tahinanakia, ai taiha haukia tahina pounakia, ia emai 'abi tahina pou haukia a'i tua'i taeanakia. <sup>12</sup> Au nahore hanopaka tabakiai nahina benimi hanona a'i tuba tohanakia, iamo kupa tabakiai kahina benimi raninai aea katobatoha aihonakia."

<sup>13</sup> Maearima ha a'i ekara'au 'apua kupa, iamo au Maearima Nahuna ikupaia'u mo

kupai ariri amai. <sup>14</sup> Hano'akunai Mose 'erau aubaubana eihia taeana ihobonai mo au Maearima Nahuna abomo kateihia taeana'u. <sup>15</sup> Weiana tia'ikakaumana'u haukia ikoinai hanona mauri banaibanai katea'ina.

<sup>16</sup> "Pokina Tirama hanopaka eraona'auai ki'a bahana paunai Nahuna hamohamona mo ebaibeni, tia'ikakaumana haukia ikoikiai hanona a'i kate'ari, ia mauri banaibanai katea'ina. <sup>17</sup> Tirama nahuna euhuna hanopakai hanona puma kebaibeni paunai aha'i, ia paunai hanopaka 'arana kebamaurina. <sup>18</sup> Tia'ikakaumana haukia ikoikiai hanona puma a'i katehoaina, ia a'i tia'ikakaumana haukia ikoikiai hanona aba puma tihoaina, pokina Tirama Nahuna hamohamona atana a'i tia'ikakaumana paunai. <sup>19</sup> Bakai hanona na eaka aiho. Ea aba emai hanopaka aonai, 'a maearima wapura 'arina ti'ari ia ea tibaki'ana, pokina ekia hoahoa hanona teki'a. <sup>20</sup> Weiana ki'a tibabai haukia ikoikiai ea ti'oatana ba a'i timai ea aonai pokina ekia hoahoa ki'a obokia a'i temewaira tina ta'una. <sup>21</sup> Ia aka beronai timauri haukia hanona timai ea aonai pokina ekia hoahoa Tirama aiana tika'aina hauna katebawaira tinana."

#### *Ioane Ehore Iesu Pouna Ehinana.*

<sup>22</sup> Neiana murinai Iesu i'abana haukia kipokia tekarahi Iudea hanona teao, ia weia kipokia temiaho beraura baika teao ba eba'uere robe. <sup>23</sup> Ioane ba'uere robe hauna abomo Salima abirana Aenona ai eba'uere robe pokina weia hanona beirarina mai maearima teao eba'uere robenakia. <sup>24</sup> Weiana hanona Ioane wapura 'ekana a'i tekaiabu bahana aonai.

<sup>25</sup> Ba Ioane i'abana haukia baika mai Iuda hauna ha kipokia te'abi baitaeai ekia hoahoa weiana Tirama wairanai katebamaha mahana hauna paunai.

<sup>26</sup> Ua buonai ia temai Ioane herena tehina bena tetibaha, "Ba'iohi haumu e, hau weiana Ioridana atena abiranai kipokia tomiaho pouna ohinana hauna ia bariu niba'uere robe, ba maearima ikoinai tiao herena."

<sup>27</sup> Ioane ekia 'abi ebamuena etibaha, "Maearima hanona Tirama kebaibeni hauna mo ketabu ahina. <sup>28</sup> Wai kipomi abomo aba tubatohana'u au aba ahina benimi, 'au hanona Keriso aha'i, ia au hanona euhu 'uaina'u ia

wairanai.’ <sup>29</sup> Hawainibe mahamahana babi'ena weiana hanona ia niatawana hauna 'eunai, ba hawainibe mahamahana hauna ena hau ia herenai nikoroti hauna hanona aiana niona raninai aonamo ni'opu abuna. Aonamona neiana hanona au 'eu'u, ba bariu ao'uai aba ebonu. <sup>30</sup> Ia hanona keapa'ua keaoaina, ia au hanona ka'aera'aera kaeaoaina.”

<sup>31</sup> “Ubiai emiaho ba emai hauna hanona taba ikoikia 'ubikia, ia hanopakai erama hauna hanona hanopaka 'euna, ena 'abi'abi ai hanopaka mo robana keahuna. Kupai emai hauna hanona taba ikoikia 'ubikia. <sup>32</sup> Ia eiha mai eo'o tabakia poukia nehinanakia, ia ena 'abi hau ha a'i nia'i taeanakia. <sup>33</sup> Ia ena 'abi ea'i taeana hauna hanona ebatohana Tirama hanona 'abi tohana hauna. <sup>34</sup> Tirama euhuna hauna hanona Tirama ena 'abi nehinana, pokina Tirama ehore ia aonai Auba Robe nibabonu 'auna. <sup>35</sup> Hamana ehore nahuna niraona'au aina taba ikoikia ia imanai eutanakia. <sup>36</sup> Nahuna nia'ikakaumana hauna hanona mauri banaibanai ea'ina, ia nahuna nibaoao aina hauna hanona mauri a'i keiha 'apuana, ia Tirama ena opuere ia ahanai nemiaho.”

## 4

### *Iesu Samaria Babi'ena Ohi Te'abi'abi.*

<sup>1</sup> Parisea haukia pou teona hanona Iesu maearima bo'ona nia'inakia ti'abana mai niba'uere robenakia ba Ioane ba'uere robe hauna hanona bita mo ea'inakia. <sup>2</sup> Taba tohana hanona Iesu kipona a'i eba'uere robe, ia i'abana haukia teba'uere robe. <sup>3</sup> Iesu Parisea haukia pou teona hauna e'iohina raninai Iudea ehabona, emue haeamona keao Galilea. <sup>4</sup> Ia bariu hanona Samaria haukia ekia hano aona kekana keao.

<sup>5</sup> Ia emai Samaria aiarana ha atana Sukara, aiara weiana herenai Iakobo ehore nahuna Iosepa hano ebena hauna herenai ekarahi. <sup>6</sup> Iakobo ena bei 'urina hanona weia, ba Iesu taeara homa'ana ekana buonai emahē obo bei 'urina hianai emiati. Beraura hanona aba eatiaha.

<sup>7</sup> Weiana Samaria babi'ena ha emai ena bei kerai, ba Iesu ehore enoina etibaha, “Bei harua mobena'u mainu.” <sup>8</sup> Ia i'abana haukia hanona aiara teao aniani katekawa. <sup>9</sup> Samaria babi'ena ehore ia ehina bena etibaha, “Oi hanona Iuda

haumu ia au hanona Samaria babi'e'u, ba aehoma buonai here'uai bei inu nunoi aina?” (Pokina Iuda maearimakia mai Samaria maearimakia ekia bahamomo hanona aha'i.) <sup>10</sup> Iesu ehore ehina bena etibaha, “Tirama ena beruberu po'iohina mai tai bei ninoi aina heremuai hauna po'iohina raninai, herenai aba ponoina ba ia mauri beina pebeni'o.” <sup>11</sup> Babi'e e'abi etibaha, “Hau apa'uamu e, bei irai tabana heremuai aha'i abomo bei 'urina neiana hanona e'oura. Mauri beina weiana hanona ae'eai koa'ina? <sup>12</sup> Ai 'aba'abamai Iakobo hanona bei 'urina neiana ebena-mai, ia kipona einu, nahuna teinu, ena mamoe mai poromakau abomo teinu, ba oi Iakobo otara haona?” <sup>13</sup> Iesu ena 'abi ebamuena etibaha, “Bei neiana teinu haukia ikoinai hanona 'akokia kate'ororo mue. <sup>14</sup> Ia au kabaibeni beina hau ha keinu hanona 'akona a'i ke'ororo 'apua. 'Abi tohana, au kabaibeni beina hanona ia aonai mauri beinai keao kebuti keharu haru mauri kabaibeni keaomo banaibanai.” <sup>15</sup> Babi'e ehore Iesu enoina etibaha, “Hau apa'uamu e, bei weiana mobena'u, 'ako'u a'i ke'ororo mue abomo bei rai neia a'i kamai mue.”

<sup>16</sup> Iesu ia ehina bena etibaha, “Moao atawamu koaparina torarua katomai.” <sup>17</sup> Babi'e e'abi etibaha, “Au atawa'u aha'i.” Iesu ia ehina bena etibaha, “Oi atawamu aha'i na nuhoma hanona obero. <sup>18</sup> Pokina oi atawamu ikoinai ima, bariu heremuai nemiaho hauna hanona oi atawamu tohana aha'i. Bariu ohinana hauna hanona 'abi tohana.” <sup>19</sup> Babi'e e'abi etibaha, “Hau apa'uamu e, bariu ao'u aba ea, oi hanona mahabanai haumu. <sup>20</sup> Ai kupumai hama-mai hanona oeo neiana ahanai Tirama tekuti aina, ia wai Iuda haumi tu'abi kuti 'ekana hanona hamona Ierusalem mai mo.”

<sup>21</sup> Iesu e'abi etibaha, “Babi'e e, e'u 'abi moa'i taeana, ranina nimaiaina aonai Hamaka katokuti aina hanona oeo neiana 'ubinai 'ao Ierusalem mai mo aha'i. <sup>22</sup> Wai Samaria haumi a'i to'iohina hauna tokuti aina, ai Iuda haumai ta'iohina hauna takuti aina, pokina Tirama ena bamauri taearana hanona Iuda haukia herekia nimai. <sup>23</sup> Ranina aba nimai katekutiai tohana haukia hanona aubai mai aokia maikoinai Hamaka katekuti aina. Bariu ranina aba ekara'au. Pokina Hamaka hanona ua tekutiai aihona haukia nenuatae ainakia. <sup>24</sup> Tirama hanona Auba,

ua buonai tekuti aina haukia hanona aubai mai aokia maikoinai katekuti aina.”<sup>25</sup> Babi'e e'abi etibaha, “Au a'jobina Mesia bamauri hauna atana Keriso kemai, ia kemai raninai taba ikoikiai kehina pou harai herekai.”<sup>26</sup> Ba Iesu ia ehina bena etibaha, “Hauna mo au neia'u bariu nahina beni'o.”

<sup>27</sup> Rani weianai ia i'abana haukia temue temai hanona teta'uta'u huri, pokina Iesu teihana babi'e ha ohi ti'abi'abi. 'A tai ha a'i ebakaina, “Taba nonuatae aina?” 'ao “Aehoma buonai torarua tu'abi'abi?”<sup>28</sup> Ba babi'e ena puou ehabona emue noanoa eao aiarai maearima ehina benakia etibaha,<sup>29</sup> “Tomai hamaeao hau ha tomoiha e'u babai 'uainai ababai haukia ikoikiai ehina pou, iamo taina Keriso mo pa'e weiana?”<sup>30</sup> Ba maearima aiarai tekarahi Iesu herena teao.

<sup>31</sup> Weiana aonai i'abana haukia Iesu tenoina tetibaha, “Ba'iohi haumu e, aniani ha moana.”<sup>32</sup> 'A ia ehina benakia etibaha, “Au mai e'u aniani kani weiana hanona wai a'i to'jobina.”<sup>33</sup> Ba i'abana haukia kipokia te'abi'abi tetibaha, “Pa'e maearima ha aniani emaiaina ebena.”<sup>34</sup> Iesu ehina benakia etibaha, “E'u aniani hanona euhuna'u hauna ena nutae kababaina abomo ia ebena'u akana kabaorena.

<sup>35</sup> Wai tu'abi 'nawa bani temiaho ba ariari ranina ketaina.' Ia au nahina benimi, mahami tomobano'a uma tomoiha harainakia, aniani aba te'oru katearinakia.<sup>36</sup> Ariari hauna 'arana nia'ina ba uma anianina nibararona mauri bannaibanai 'ekanai, weiana buonai ibatona hauna mai iarina hauna terarua kateonamo haeamo.<sup>37</sup> Tehinana 'abina hanona 'abi tohana, 'Nibato bato hauna haeai ia niariari hauna abomo haeai.’<sup>38</sup> Au nahunimi a'i toaro'ari aina umanai aniani katoarina. Baika uma weianai aro'arina aba tebabaina ba wai tuhore ekia aro'ari anianina tua'ina.”

<sup>39</sup> Aiara weiana aonai Samaria haukia bo'ona Iesu tea'ikakaumana pokina babi'e ena batoha 'abina paunai, babi'e etibaha, “Ia ehore e'u babai ikoikiai ehina pounakia.”<sup>40</sup> Ua buonai Samaria maearimakia temai herena, ia tenoina kipokia katemiaho, ba Iesu wapu rua weia emiaho.<sup>41</sup> Weiana ena 'abi aiana teona aonai bo'ona haeamona tea'ikakaumana.<sup>42</sup> Maearima weiakia babi'e tehina bena

tetibaha, “Ai bariu ta'ikakaumana hanona oi o'abi hauna paunai aha'i, ia ai bariu kipomai haiamai taona abomo ai ta'jobina hau neiana 'abi tohana hanopaka ibamaurina hauna.”

### *Iesu Kabamani Hauna Apa'uana Nahuna Ebamaurina.*

<sup>43</sup> Wapu ibaruana eore murinai Iesu emikiri Galilea eao.<sup>44</sup> Iesu kipona e'abi etibaha, “Mahabanai hauna ena aiara tohana haukia hanona a'i katemariki aina.”

<sup>45</sup> Iesu Galileai ekara'au raninai, Galilea haukia tea'i taeana, pokina ia abomo teao Ierusalem mai weia Kabanai tatuna aonai taba ebabai mahakiai teihanakia paunai.

<sup>46</sup> Iesu haeamona emue eao Galilea Kana aiarana ua'a bei ea'i banaina bine beinai eao. Weia Kaperanauma aonai obia 'arana hauna ena maearima ha nahuna hauna papana einawa.<sup>47</sup> Hau weiana Iesu Iudeai emai Galileai pouna eona raninai, ia eao Iesu herena enoina keao nahuna kebamaurina pokina ia aba ke'ari.<sup>48</sup> Iesu ehina bena etibaha, “Wai hoa mai bata'u ta'u huri hoakia a'i katoiha hanona a'i katoa'ikakauma 'apua.”<sup>49</sup> Obia hauna e'abi etibaha, “Hau apa'uana e, hamariri hamaeao naha'u hanona aba ke'ari.”<sup>50</sup> Iesu ia ehina bena etibaha, “Moao, nahumu hanona aba kemaui.” Obia hauna Iesu ena 'abi ebatohana eka'a.

<sup>51</sup> Ia taeara weiana niao aonai ena ta'ara'i haukia temai taearai te baitabu ahi, nahuna emauri hauna pouna tehinana.

<sup>52</sup> Ia ebakai bakai beraura hoana tabanai nahuna emauri mauri, ba ia tetibaha, “Warani rabirabi beraura hoana hamona hanona emauri mauri.”<sup>53</sup> Hamana eraona tinana beraura hoana weianai hanona Iesu ia ehina bena etibaha, “Nahumu hanona aba kemaui.” Ua buonai ia mai ena itu haukia ikoikiai hanona tea'ikakauma.<sup>54</sup> Neiana hanona Iesu bata'uta'u huri hoana ibaruana ebabaina weia Iuda ehabona emai Galilea aonai.

## 5

### *Iesu Hau Ha Ebamaurina Betesaida Obu Haiainai.*

<sup>1</sup> Rani baika teao murinai Iuda haukia ekia tatu ha erama ba Iesu ekara'au eao Ierusalem. <sup>2</sup> Weia Ierusalem ai pa'abi ha atana 'Mamoe pa'abina' herenai obu papana ha Heberu maeakiai

atana teaparina 'Betesaida', ba haianai hanona arai paraboakia ima temia kariarona. <sup>3</sup> 'Eka weiakiai inawa haukia bo'ona tenoti, maha ki'a haukia, 'ome haukia, mero haukia, (tiba'ima bei kebure bure. <sup>4</sup> Pokina rani ha ha aneru neriri obu beina nibabure burena, murinai inawa hauna ha obuai keriri 'uai hauna ena inawa taba ia ninamo.)

<sup>5</sup> Inawa hauna ha 'eka weianai ena inawa ihauna ikoinai harau aihau 'ababani. <sup>6</sup> Iesu ehore inawa hauna weiana enoti eihana raninai e'jobina ia hanona rani homa'ana ua enoti aiho, ba Iesu ia ebakaina etibaha, "Oi nonuatae konamo, u?"

<sup>7</sup> Inawa hauna Iesu ena 'abi ebamuena etibaha, "Hau apa'uana e, bei nebure bure aonai au kebaraina'u hauna ha aha'i buonai au nabahobona kariri aonai hau ha aba ne'uai waira'uai." <sup>8</sup> Ba Iesu ia ehina bena etibaha, "Momikiri, emu 'ire mouna moa'ina moka'a." <sup>9</sup> Beronai hau weiana emauri mauri, ba emikiri ena 'ire eouna ea'ina eka'a.

Weiana hanona beraura robenai hoa neiana erama. <sup>10</sup> Ua buonai Iuda haukia apa'uakia hau weiana inawa ai enamo hauna tehina bena tetibaha, "Bariu hanona beraura robena, ia oi emu 'ire obuana hanona eka rauhuhu nukabena." <sup>11</sup> Ia ekia 'abi ebamuena etibaha, "Ebamaurina'u hauna ehina bena'u etibaha, 'Emu 'ire moa'ina moka'a.'" <sup>12</sup> Ba ia tebakaina tetibaha, "Hau tabana oi ehina beni'o, 'Emu 'ire moa'ina moka'a.'" <sup>13</sup> Emauri mauri hauna a'i e'jobina tai ia ebamaurina pokina Iesu abamo mako aokiai ehe toto eka'a 'akaumana.

<sup>14</sup> Muriai marea robe aonai Iesu hau weiana etabu ahina ehina bena etibaha, "Aia'u mona, oi hanona aba omauri mauri, a'i koaka ki'a mue, taba ki'a obona ha heremuai a'i merama mue marikina." <sup>15</sup> Ba hau weiana eao Iuda haukia apa'uakia herekia ehina benakia ia ebamaurina hauna hanona Iesu.

#### *Tirama Nahuna Ena Hiabu.*

<sup>16</sup> Ua buonai Iuda haukia apa'uakia hanona Iesu te'oatana pokina ia taba ikoikiai beraura robena aonai nibabainakia paunai. <sup>17</sup> Ia Iesu ehina benakia etibaha, "Au Hama'u hanona rani ikoinai niaka to'ona emai mo bariu beraura neiana. Au abo'umo naka." <sup>18</sup> 'Abi neiana paunai Iuda haukia apa'uakia

hanona tenuatae ki'a baha Iesu kateahu 'arina. Beraura robe rauhubuna nikabena paunai mo aha'i ia Tirama niaparina hamana tohana na nihoma abomo ia kipona Tirama ohi nibaihobonakia.

<sup>19</sup> Weiana buonai Iesu ekia 'abi na ebamue aihona, "Abi tohana au wai nahina benimi. Nahuna kipona 'eunai taba ha kebabaina hanona a'i ketaina. Ia hanona Hamana nibabai akakia eihanakia weiakia mo kebabainakia. Hamana nibabai haukia Nahuna abomo nibabai. <sup>20</sup> Pokina Hamana nihore Nahuna niraona'au aina paunai nibabai haukia ikoinai nibaihana. 'E, neiakia mo aha'i taba rarikia baika abomo kebaihana, ba katoihana hanona katota'uta'u huri. <sup>21</sup> Weiana Hamana nihore 'ari haukia nibamikiri muenakia mauri nibenakia ihobonai mo Nahuna nihore nenuatae ainakia haukia mauri nibenakia. <sup>22</sup> Haeamona Hamana kipona tai ha a'i nibabakaina, bakai ena hiabu maikoina aba Nahuna ebena. <sup>23</sup> Hamana timariki aina ihobonai ikoikiai Nahuna katemariki aina, Nahuna a'i nimariki aina hauna hanona Hamana weiana Nahuna euhuna hauna abomo a'i nimariki aina.

<sup>24</sup> "Abi tohana au wai nahina benimi, aia'u niona hauna mai euhuna'u Tiramana nia'ikakaumana hauna hanona mauri banaibanai aba ea'ina puma a'i kehoaina. Ia hanona 'ari aba ehabona ba aba mauri aonai etoto.

<sup>25</sup> "Abi tohana au wai nahina benimi, 'ari haukia Tirama Nahuna aiana kateona ranina hanona aba nimai, weiakia aiana tiona haukia ikoikiai hanona katemaui mue, bariu ranina aba ekara'au. <sup>26</sup> Hamana hanona mauri poki hauna, ihobonai ia ehore Nahuna mauri pokinai ebaona. <sup>27</sup> Tirama ehore Nahuna bakai apa'uana ke'uai aina hiabuna aba ebena pokina ia hanona Keriso Maearima Nahuna paunai. <sup>28</sup> E'u 'abi neiana paunai a'i katota'uta'u huri. Ranina aba nimai weiakia 'ariahakiai temiaho haukia ikoikiai Nahuna aiana kateona, <sup>29</sup> ekia 'ariahakiai katekarahi. Weiakia namo tebabai haukia katemikiri mauri banaibanai katea'ina, ba weiakia ki'a tebabai haukia katemikiri puma katehoaina.

<sup>30</sup> "Au kipo'u eu'uai taba ha kababaina hanona a'i ketaina. Au aia naona hauna mo ihobonai nabakai, ua buonai e'u bakai



hanona ebero, pokina au kipo'u e'u namo a'i natabuna, ia euhuna'u hauna ena nuatae natabuna.

*Iesu Pouna Tehinana Haukia Baika.*

<sup>31</sup> “Au kipo'u pou'u kahinana raninai, e'u pou hina hanona a'i katebatohana.

<sup>32</sup> Weiana au pau'uai pou'u nehinana hauna hanona haeai, ba au a'iohina ia nehinana 'abina hanona tohana.

<sup>33</sup> “Wai aba tobaiuhu Ioane herena ba ia ehore 'abi tohana pouna ehinana. <sup>34</sup> Au pou'u berona hanona maearima herekiai a'i nimai, ia au Ioane ena batoha 'abina na'uahina hanona wai bamauri katotabu ahina paunai. <sup>35</sup> Ioane hanona e'ara ea nibaibeni matoha lamepa 'abana, ia wai hanona rani papana ena ea toaonamo aina.

<sup>36</sup> “Au mai ibatoha'u hoana ha hanona Ioane 'euna etara haona. Nababai akakia neiakia Hama'u ebena'u kababai orenakia haukia tihore Hama'u euhuna'u pouna tehinana. <sup>37</sup> Ba Hama'u euhuna'u hauna Ia kipona ehore au pou'u ehinana. Ia wai rani ha aiana a'i to'o 'apuana abomo wairana a'i toihana, <sup>38</sup> 'ao ena 'abi abomo aomia a'i nemiaho, pokina ia euhuna hauna wai a'i tua'ikakaumana paunai.

<sup>39</sup> “Wai Puka robena tumarereai haraina pokina wai turaonana weiana herenai mauri banaibanai katotabu ahina paunai. Ia Puka robena neiana hanona au mo pou'u nehinana. <sup>40</sup> Wai katomai here'u mauri katoa'ina, iamo toubu aina.

<sup>41</sup> “Au hanona maearima ekia banamo a'i na'i taeanakia. <sup>42</sup> Au a'iohi harainimi, aomia Tirama iraona'au aina a'i nemiaho. <sup>43</sup> Au aba Hama'u atanai amai, ia wai au a'i tua'i taeana'u. Ia hau ha kipona atanai pema raninai wai aba patoa'i taeana. <sup>44</sup> Wai kipomi emi banamo ha ha baiatamiai tutabunakia, iamo Tirama ena banamo weiana ia ikupaiana herenai nimai hauna a'i tutabu ahina, ua homana raninai aea katoa'ikakauma aihona'u?

<sup>45</sup> “Ia aomia a'i katoraanana au Hama'u wairanai kababehonimi. Aha'i. Wai kababehonimi hauna hanona Mose ia ahana wai emi buabeni ekori. <sup>46</sup> Wai Mose tua'ikakauma tohana raninai au abomo kato a'ikakaumana'u, pokina ia hanona au pou'u ererena. <sup>47</sup> Ia ererena hauna a'i mo tua'ikakaumana raninai au

e'u 'abi hanona aea katoa'ikakauma aihona?”

## 6

*Iesu Taha Ima (5,000) Ebanianinakia.*  
(Mt 14.13-21; Mk 6.30-44; Lk 9.10-17)

<sup>1</sup> Rani baika teao murinai Iesu ekabanai eao Galilea 'obu abiranai. (Weiana atana haeai hanona Tiberia 'obuna.) <sup>2</sup> Iesu inawa haukia ebanamonakia, bata'uta'u huri hoakia weiakia teiha paunai mako rarina ia murinai tera'a teao. <sup>3</sup> Ba Iesu oeoai ekara'au eao i'abana haukia kipokia temiati. <sup>4</sup> Iuda haukia ekia Kabanai tatuna hanona aba ekaibari. <sup>5</sup> Iesu mahana eao mako rarina timai herena eihanakia raninai, Pilipo ebakaina etibaha, “Aniani ae'eai kaha kawanakia maearima neiakia kateani?” <sup>6</sup> Ia kebabaina hauna aba eraonana, iamo Pilipo kehobona paunai ua ebakai bakai aiho.

<sup>7</sup> Pilipo ia ena 'abi ebamuena etibaha, “Moni bo'ona 'akinai\* aniani pahakawanakia abomo a'i petaina, papakia 'akimo pateani.” <sup>8</sup> I'abana haukia ha atana Anderea, Simona Petero hatina etae etibaha, <sup>9</sup> “Miori papana ha neia ena parawa papakia ima mai ena maia papakia rua. Ia weiana hanona aeamo kaha homanakia pokina maearima hanona ebo'o ki'a baha?” <sup>10</sup> Iesu i'abana haukia ehina benakia etibaha, “Maearima tomoba miatinakia.” 'Eka weiana hanona panapana 'ekana, maearima ikoiki ai temiati hau 'abaeana ikoinai taha ima (5,000).

<sup>11</sup> Iesu parawa ea'inakia Tirama ebana-mona ba ebenakia weiakia temiati haukia teani eaomo ekia nuatae etaina, ba maia abomo ihobonai ebabaina. <sup>12</sup> Weiana ikoiki ai teani 'ari aonai Iesu i'abana haukia ehina benakia etibaha, “Harikia ikoiki ai katobararonakia ha papana a'i katohabona.” <sup>13</sup> Ua buonai parawa ima teani 'ari harikia weiakia tebararonakia areha harau haea rua tebabonunakia.

<sup>14</sup> Iesu bata'uta'u huri hoana weiana ebabaina teihana murinai maearima te'abi tetibaha, “'Abi tohana, mahabanai hauna kemai hanopakai hauna hanona neiana.” <sup>15</sup> Iesu e'iohina ia ekia taburai katea'i taeana ekia obia 'arana haunai

\* 6:7: (7) Helene moninai Denari hinabu rua

katebaona, ua buonai ia kipona haeamona ekaobo oeoai ekara'au.

*Iesu Bei Ahanai Eka'a.*  
(Mt 14.22-33; Mk 6.45-52)

<sup>16</sup> Erabirabi raninai i'abana haukia teriri teao weia obuai, <sup>17</sup> ahiai tehe'au tebeau banai Kaperanauma tia hanona aba ewapura abuna, Iesu hanona ia baiatakiai aha'i. <sup>18</sup> Baura apa'uana eabu'au roio ebuataea ehurehure ki'a. <sup>19</sup> Ia tepara homa'ana matoha maela aihau 'ao bani 'abana aonai Iesu bei kapenai eka'a herekia eao, teihana raninai teta'u ki'a. <sup>20</sup> Iesu ehina benakia etibaha, "Nahuna au. Ai tomota'u." <sup>21</sup> Ia aokia mai namokia ahiai tebaeheauna, beronai mo tenuatae aina poenai tebahaha'au.

*Maearima Iesu Tetabuna.*

<sup>22</sup> Erani mako weia 'obu abiranai temiaho haukia te'iobina ahi hamona mo ua'a Iesu hanona i'abana haukia baiatakiai a'i ehe'au i'abana haukia ikupaiaikia mo tebeau ahi teka'a. <sup>23</sup> Ba ahi baika Tiberia ai temai Obiapaka parawa ebanamona ebaibeni maearima ebenakia teani 'ekana herenai tebahoa. <sup>24</sup> Weiana mako te'iobina Iesu mai i'abana haukia kipokia wairakia aha'i, ba ahi weiakiai tehe'au Kaperanauma Iesu itabuna teao.

*Iesu Hanona Mauri Parawana.*

<sup>25</sup> Ia 'obu abiranai ua'a Iesu tetabu ahina raninai tebakaina tetibaha, "Ba'iobi haumu e, oi hanona aita mo okabanai omai neia?" <sup>26</sup> Iesu ekia 'abi ebamuena etibaha, "Abi tohana au wai nahina benimi, wai au tutabuna'u hanona bata'uta'u huri hoana toihanakia paunai aha'i ia parawa toani nuami tebonu paunai. <sup>27</sup> Aniani weiana keki'a hauna akanai a'i katoaro'ari ia aniani weiana kemiaho keao mauri banaibanai akanai katoaro'ari, weiana au Maearima Nahuna kabenimi. Hamaka Tirama hanona hiabu weiana ebena'u."

<sup>28</sup> Ba ia tebakaina tetibaha, "Ai Tirama ena aka tabana katababaina?" <sup>29</sup> Iesu ekia 'abi ebamuena etibaha, "Tirama ena aka hanona neiana. Euhuna hauna hamona mo kato a'ikakaumana."

<sup>30</sup> Ua buonai ia tebakaina tetibaha, "Bata'uta'u huri hoana tabana kobabaina kataihana ba kata a'ikakaumani'o? Tabana hauna kobabaina?" <sup>31</sup> Aika 'aba'abaka hano'akunai mana teana,

Puka robenai tererena ihobona, 'Kupai emai parawana hauna Mose ebenakia teana.'"<sup>32</sup> Iesu ehina benakia etibaha, "Abi tohana au wai nahina benimi, kupa parawana ebenimi hauna Mose aha'i, ia au Hama'u ehore kupa parawana tohana wai ebenimi. <sup>33</sup> Tirama ena parawa hanona neiana, ia kupai eriri emai hauna hanopakai mauri nibaibeni." <sup>34</sup> Ia tehina bena tetibaha, "Obiapaka e, aniani neiana hanona rani ikoinai kobenamai." <sup>35</sup> Ba Iesu ia ehina benakia etibaha, "Au hanona mauri anianina, here'u kemai hauna hanona mare'a a'i ke'ari 'apua, abomo kea'ikakaumana'u hauna hanona 'akona a'i ke'ororo 'apua.

<sup>36</sup> Ia au aba ahina benimi, wai aba toihana'u iamo a'i tua'ikakaumana'u. <sup>37</sup> Hama'u nibena'u haukia ikoikiai hanona katemai here'u, ba nimai here'u hauna hanona a'i kau'u ahi 'apua. <sup>38</sup> Pokina au kupai ariri amai hanona kipo'u e'u nuataeai a'i kababaina, ia euhuna'u hauna ena nuataeai akana kababaina. <sup>39</sup> Ba euhuna'u Tiramana ena nuatae hanona neiana, weiakia ebena'u haukia ikoikiai ha a'i kaba'akaumana, ia rani orenai kabamikiri muenakia. <sup>40</sup> 'Abi tohana au Hama'u ena nuatae hanona neiana, Nahuna kateihana mai kate a'ikakaumana haukia ikoikiai hanona mauri banaibanai katea'ina, ba rani orenai hanona kabamikiri muenakia."

<sup>41</sup> 'Abi neiana paunai Iuda haukia ia teururu aina, pokina ia e'abi, "Au hanona mauri anianina kupai ariri amai." <sup>42</sup> Ba ia te'abi tetibaha, "Iesu neiana hanona Iosepa nahuna, hamana mai hinana naha'iobinakia. Ia bariu aehoma buonai na ni'abi aiho, 'Au kupai ariri amai.'?"

<sup>43</sup> Iesu ekia 'abi ebamuena etibaha, "Kipomi baiatamiai ururu naiana tomobapuana. <sup>44</sup> Hau ha ena nuataeai here'u a'i kemai 'abaea ia Hama'u euhuna'u hauna kebaka'anakia haukia katemai here'u, ba au rani orenai kabamikiri muenakia. <sup>45</sup> Mahabanai haukia Puka robenai aba tererena, 'Ikoikiai hanona Tirama aba keba'iobinakia.' Hama'u tibahuaina abomo herenai 'iobi tia'ina haukia ikoikia timai here'u.

<sup>46</sup> Hau ha Hamaka a'i eiha 'apua, ia Tirama herenai emai hauna ikupaiana

mo Hamaka eihana. <sup>47</sup> 'Abi tohana au wai nahina benimi. Tia'ikakaumana'u haukia hanona mauri banaibanai tea'ina. <sup>48</sup> Mauri anianina hanona Au neia'u. <sup>49</sup> Wai 'aba'abami hano'akunai mana teana, iamo ikoikia te'ari. <sup>50</sup> Ia hau ha aniani neiana kupai eriri emai hauna keana hanona a'i ke'ari. <sup>51</sup> Au hanona aniani maurina weiana, kupai ariri amai. Hau ha aniani neiana keana hanona kemaui banaibanai. Aniani neiana au kabaibeni hauna hanona au bitio'u, weianai hanopaka haukia mauri katea'ina."

<sup>52</sup> Weiana Iuda haukia kipokia ba-iatakiai tebaihara tae te'abi tetibaha, "Hau neiana bitiona aea kebeni aihonaka kahana?"

<sup>53</sup> Iesu ehina benakia etibaha, "'Abi tohana au wai nahina benimi. Wai au Maearima Nahuna bitio'u a'i katoana mai aruaru'u a'i katoinu raninai wai aomia mauri a'i kemiaho. <sup>54</sup> Au bitio'u niana mai aruaru'u neinu hauna hanona mauri banaibanai aba nia'ina abomo rani ore-nai hanona kabamaui muena. <sup>55</sup> Pokina au bitio'u hanona inuina tohana abomo aruaru'u hanona inuina beina tohana. <sup>56</sup> Au bitio'u niana mai aruaru'u neinu hauna hanona ia ao'uai nemiaho au abomo ia aonai namiaho. <sup>57</sup> Hama'u nimaui hauna ehore euhuna'u, au hanona Hama'u paunai namaui ihobonai mo au hau'u keana hauna hanona au pau'uai kemaui. <sup>58</sup> Au aniani neia'u hanona kupai ariri amai. 'Aba'abami mana teana 'abana aha'i, teani iamo te'ari, ia hau ha aniani neia'u keanina'u hauna hanona kemaui banaibanai." <sup>59</sup> Iesu Kaperanaumi weia eba'ioi raninai 'abi neiana ehinana Iuda haukia ekia marea aonai.

### *Mauri Banaibanai 'Abikia.*

<sup>60</sup> Aiana teona murinai ti'abana haukia bo'ona te'abi tetibaha, "'Abi neiana hanona epahihi, tai kehore 'abi neiana kea'i taena?" <sup>61</sup> Iesu aba e'ioibina ti'abana haukia 'abi weiana teururu aina ba ehina benakia etibaha, "'Abi neiana aomi nibaro'arina, u? <sup>62</sup> Au Maearima Nahuna pakara'au amiaho 'uai 'ekana paeao patoihana'u raninai aea patohoma? <sup>63</sup> Auba Robe hanona mauri nibaibeni, 'a hauani hanona taba ha a'i nibaramana. Ahina benimi 'abikia neiakia hanona auba 'abikia mai mauri 'abikia. <sup>64</sup> Ia baiatamiai baika hanona

a'i tua'ikakauma." Popounai Iesu aba e'ioibina baiatakiai tai a'i tia'ikakauma mai tai ia hinahinana kehinahinana. <sup>65</sup> Ia haeamona ehina benakia etibaha, "Ua buonai aba ahina benimi atibaha, 'Hama'u maearima a'i kemaiana raninai hau ha kemai here'u taearana aha'i."

<sup>66</sup> Iesu ena 'abi weiana buonai te'abana haukia bo'okia tehabona Iesu murinai a'i teka'a mue. <sup>67</sup> Ba Iesu i'abana haukia harau haea rua ebakainakia etibaha, "Wai abomo tonuatae katohabona'u, u?" <sup>68</sup> Simona Petero ehore ehina bena etibaha, "Obiapaka e, ai tai herena kataeao? 'Abi weiana mauri nimaiana hauna hanona oi heremuai nemiaho. <sup>69</sup> Ai aba ta'ikakauma mai ta'ioibina oi hanona robe haumu tohamu Tirama herenai omai."

<sup>70</sup> Ba Iesu ehina benakia etibaha, "Wai harau haea rua atina'aniami. Ia 'abami hamona hanona tiaporo." <sup>71</sup> Ia e'uahina hauna hanona Iuda Isakariote hauna Simona nahuna, ia i'abana haukia harau haea rua ha Iesu hinahinana kehinahina hauna.

## 7

### *Iesu Uaho'abana Ia A'i Tea'ikakaumana.*

<sup>1</sup> Weiakia murikiai Iesu Galilea aonai ekaoao kaoao, ia a'i enuatae keao Iudea pokina Iuda haukia apa'uakia hanona te'imana kateahu 'arina. <sup>2</sup> Weiana Iuda haukia ekia l'aua tatuna ranina ekaibari. <sup>3</sup> Iesu hatina tehore tehina bena tetibaha, "Eka neiana kohabona koao Iudea ba weia bata'uta'u huri hoakia kobabai ti'abani'o haukia kate ihanakia. <sup>4</sup> Pokina hau ha kipona ibawaira tinana nenuatae aina raninai taba ha buniakiai a'i nibabai, neiakia aba nubabainakia buonai moba karahini'o hanopaka wairakiai teme'ioibini'o." <sup>5</sup> Ua te'abi aiho pokina hatina abokiamo a'i tea'ikakaumana. <sup>6</sup> Ba Iesu ehina benakia etibaha, "E'u rani tohana hanona a'i nimai baha. Ia wai heremiai hanona rani mo 'akina ikoikia tetai. <sup>7</sup> Hanopaka hanona a'i ke'oatanimi ia au ni'oatana'u, pokina au ia pouna nahinana weiana ia nibabaina hauna hanona eki'a. <sup>8</sup> Wai tomoao tatu 'ekana, au hanona a'i kawahi tatu 'ekana niana pokina e'u rani tohana hanona a'i nitai bahana." <sup>9</sup> Ia 'abi neiana ehinana ba Galileai emiaho.

### *Iesu Eao Ierusalemā I'aua Tatuna Aonai.*

<sup>10</sup> Hatina tatu 'ekana teao murikiai ia abomo tatu 'ekana eao bunianai mo to'u wairakiai aha'i. <sup>11</sup> Ba tatu weiana aonai Iuda haukia apa'uakia hanona Iesu titabuna tibakai bakaiaina, "Hauna weiana hanona ae'e?" <sup>12</sup> Weia to'u aonai hanona tebateteaina, baika te'abi, "Ia hanona hau namona." Ia baika te'abi, "Aha'i, ia hanona maearima ne'uaiiai behonakia." <sup>13</sup> Ia Iuda haukia apa'uakia teta'u ainakia paunai, hau ha to'u wairakiai ia 'abina a'i ehina 'apuana.

<sup>14</sup> Weia tatu ranina ibuanai Iesu ekara'au marea robeai eba'iobi ramakia. <sup>15</sup> Ba Iuda haukia apa'uakia teta'uta'u huri te'abi tetibaha, "Hau neiana marere 'ekana ha a'i eao, ia marere mahakia aea e'iobi aihonakia?" <sup>16</sup> Iesu ekia 'abi ebamuena etibaha, "E'u ba'iobi 'abikia hanona au kipo'u 'eu'u aha'i, ia euhuna'u Tiramana herenai timai. <sup>17</sup> Hau ha Tirama ena nuatae akana kebabaina raninai ia aba ke'iobina, au e'u ba'iobi hanona Tirama herenai nimai 'ao au kipo'u e'u 'abi. <sup>18</sup> Hau ha kipona 'euna nehinana hauna hanona kipona ena namo nitabuna 'a euhuna hauna ena namo nitabuna hauna hanona ebero, ia aonai beho aha'i.

<sup>19</sup> Mose rauhuhu aba ebenimi, aonai ha hamomomu rauhuhu neiana a'i to'inibena. Taba buonai katoahu 'arina'u taearana tutabuna?" <sup>20</sup> To'u haukia ena 'abi tebamuena tetibaha, "Oi hanona nubeau 'ari, tai nenuatae keahu 'arini'o?" <sup>21</sup> Iesu ehina benakia etibaha, "Au beraura robenai bata'uta'u huri hoana hamona ababaina, ba wai ikoinai tota'uta'u huri. <sup>22</sup> Mose itare akana wai ebenimi buonai wai miori papakia beraura robenai itare tubenakia. (Itare akana hanona Mose herenai a'i emai, ia wai kupumi 'aba'abami herekiai emai.) <sup>23</sup> Bariu miori beraura robe aonai tutarenakia hanona Mose ena rauhuhu a'i tomokabena marikina. Taba buonai beraura robe aonai hau ha hauna maikoinai abanamona hanona tuopuere aina'u? <sup>24</sup> Taba ihakiai a'i katobaihobo, ia taba ekia bero tohakiai katobaihobo."

### *Ia Hanona Keriso 'Ao?*

<sup>25</sup> Rani weianai Ierusalemā maearimakia baika tebakai bakai tetibaha, "titabuna kateahu 'arina hauna hanona

neiana 'ao? <sup>26</sup> Hauna mo naiana to'u wairakiai neiroro ba 'abi ha ia herenai a'i tehina 'apuana, hau apa'uakia pa'e aba teraona haraina ia hanona Keriso 'ao? <sup>27</sup> Keriso kemai raninai ena mai 'ekana tai ha a'i ke'iobina, ia hau neiana ena mai 'ekana aika naha'iobina."

<sup>28</sup> Ba Iesu marea robe ai niba'iobi aonai eio etibaha, "Wai au to'iobina'u, ae'eai amai abomo to'iobina. Au kipo'u e'u nuatae ai a'i amai Tirama euhuna'u ba amai, ia hanona 'abi tohana. Wai ia a'i to'iobina. <sup>29</sup> 'A au hanona ia na'iobina pokina au ia herenai amai abomo Ia au euhuna'u."

<sup>30</sup> 'Abi neiana teona aonai ia katebirina hanona teraonana 'a hau ha ia ahanai a'i ehao'au pokina ena rani a'i nitai bahana. <sup>31</sup> To'u aonai maearima bo'ona ia tea'ikakaumana ba te'abi tetibaha, "Keriso kemai raninai, bata'uta'u huri hoakia bo'okia kebabai ba hau neiana? Pa'e aha'i."

### *Baika Tenuatae Iesu Katebirina.*

<sup>32</sup> Parisea haukia mako Iesu tebatete aina 'uruna teona ba robe haukia apa'uakia mai Parisea haukia tehore marea robe te'imana haukia teuhunakia Iesu katebirina. <sup>33</sup> Ba Iesu e'abi etibaha, "Au bariu rani papana wai heremai kami-aho ba kamue kaeao euhuna'u hauna herena. <sup>34</sup> Weiana wai katotabuna'u iamo a'i katotabu ahina'u. Au kamiaho 'ekana wai katoao hanona a'i ketaina." <sup>35</sup> Ba Iuda haukia apa'uakia kipokia baiatakiai te'abi'abi tetibaha, "Hau neiana hanona aeana keao, ba ni'abi aika ia a'i kahatabu ahina? Weia Iuda haukia terama otaraina Helene haukia baiatakiai temiaho haukia herekiai keao ba Helene haukia keba'iobinakia, 'ao? <sup>36</sup> Ena 'abi 'Wai hanona katotabuna'u iamo a'i katotabu ahina'u.' abomo 'Kamiaho 'ekana katoao hanona a'i ketaina.' weiana anina hanona taba?"

### *Mauri Kebaibeni Beina.*

<sup>37</sup> Tatu ranina orenai rani apa'uanai Iesu ekoroti e'abi etibaha, "Akona ni'ororo hauna emai here'u bei keinu. <sup>38</sup> Puka robenai tererena 'abana, 'Au nia'ikakaumana'u hauna hanona ia aonai mauri beina keharu ate 'abana.'" <sup>39</sup> Neiana hanona Auba Robe 'abina ehinana ia weiakia tea'ikakaumana haukia muriai kebenakia, pokina Iesu ena nuabi a'i nia'i bahana buonai Auba Robe hanona a'i nibaibeni baha.



### *Maearima Baiatakia Epa'a.*

<sup>40</sup> Iesu ena 'abi neiakia urukia teo'o raninai maearima baikā te'abi tetibaha, "Abi tohana hau neiāna hanona mahābanai hauna." <sup>41</sup> Baikā te'abi tetibaha, "Ia hanona Keriso." 'a baikā tebakai bakai tetibaha, "Ia aea homanai Keriso hanona Galileai kemai?" <sup>42</sup> Puka robenai na a'i e'abi aihō? Keriso hanona Davida nininai kerama Davida emiaho aiarana Betelehema aonai." <sup>43</sup> Ua buonai maearima baiatakia epa'a Iesu paunai. <sup>44</sup> Baiatakiai baikā tenuatae katebirina, ia mo hau ha imana ia haunai a'i ehao'au.

### *Iuda Poki Haukia Iesu A'i Tea'ikakaumana.*

<sup>45</sup> Murinai marea robe te'imana haukia weiakia temue teao robe haukia apa'uakia mai Parisea haukia herekia, ba ia tehore tebakainakia tetibaha, "Aehoma buonai a'i tobaka'ana a'i tomaiaina?" <sup>46</sup> 'Ima'ima haukia ekia 'abi tebamūena tetibaha, "Ua raninai emai mo bariu hau ha ua a'i ni'abi aihō 'apua hau neiāna ni'abi 'abana." <sup>47</sup> Ba Parisea haukia te'abi pahihī tetibaha, "Wai abomimo aba ebaka'a behonimi, uhe?" <sup>48</sup> Wai turaonana hau apa'uakia 'ao Parisea haukia ha ia nia'ikakaumana? Aha'i. <sup>49</sup> To'u haukia weiakia Mose ena rauhūbu a'i te'ioibina haukia hanona Tirama ena puma katehoaina."

<sup>50</sup> Ia 'abakia ha Nikodemo, rani ha eao Iesu herena hauna, ehore ehina benakia etibaha, <sup>51</sup> "Aika eka rauhūbu tainai hau ha puma a'i kahabeni 'abaeana, ia aiana kahao'o 'uaina, ia taba ebabaina hauna kaha'ioibi 'uaina." <sup>52</sup> Ia tehina bena tetibaha, "Oi abomo Galileai omai, u? Puka robenā koraona haraina mahābanai hauna hanona Galileai a'i kemai." <sup>53</sup> [Ba maearima ikoikiai temue ikau ena itu teao.

## 8

### *Enabau Ki'a Aonai Tetabu Ahina Babi'ena.*

<sup>1</sup> 'A Iesu hanona Olibe oeona eao. <sup>2</sup> Erani raurani 'amarinai Iesu haeamona eao marea robe aonai maearima ikoinai ia herena teao teto'una, ba ia emiati eba'ioibinakia. <sup>3</sup> Rauhūbu poki haukia mai Parisea haukia babi'e ha enabau ki'a aonai tetabu ahina temaiaina. To'u wairakiai tebakorotina, <sup>4</sup> ba Iesu tehina bena tetibaha, "Ba'ioibi haumu e, babi'e neiāna hanona ninabau ki'a aonai

tatabu ahina. <sup>5</sup> Ba Mose ena rauhūbu aonai na ehinabe aihonaka, babi'e nahomakia hanona piharai kahahu 'arinakia. Ia bariu oi hanona taba na nuhoma?" <sup>6</sup> Bakaibakai neiāna teaoaina ia herenai hanona weianai patebarewana Iesu behoi patehorotina. Ia Iesu hanona ehiriti imana kiri'unai 'anoai erererere.

<sup>7</sup> Ia tehore tebakai hao bakai haona, ba emikiri ehina benakia etibaha, "Hau ha baiatamiai emu ki'a aha'i haumu, pihara mokapo 'uaina babi'e neiāna moahuna." <sup>8</sup> Haeamona ehiriti 'anoai erere rere mue. <sup>9</sup> Ba 'abi neiāna teona haukia hanona kipokia ekia ki'a teraonanakia ba hamohamo tekaobo kironai ea'i ramana eaomo 'aru'arunai epua, Iesu ikupaiana tehabona babi'e ia herenai ekoroti.

<sup>10</sup> Iesu emikiri tai ha a'i eihana babi'e mo weia, ba ebakaina etibaha, "Babi'e e, maearima neiakia ae'e? Tai ha puma a'i ebeni'o?" <sup>11</sup> Babi'e e'abi etibaha, "Obi-apaka e, tai ha aha'i." Iesu ia ehina bena etibaha, "Au abo'umo oi puma ha a'i kabeni'o, moao ki'a ha a'i kobabai muena."]

### *Iesu Hanona Hanopaka Eana.*

<sup>12</sup> Haeamona Iesu maearima ehinabe muenakia etibaha, "Au hanona hanopaka eana. Hau ha au muri'uai keka'a hauna hanona wapura aonai a'i keka'a, weiana ia hanona mauri eana kea'ina." <sup>13</sup> 'Abi neiāna teona raninai Parisea haukia na tehinabe aihona, "Oi kipomu poumu nohinana, emu pou hanona a'i ebero." <sup>14</sup> Iesu ehina benakia etibaha, "Kipo'u pou'u nahinana hanona ebero pokina amai 'ekana mai kaeao 'ekana au a'ioibina ia wai hanona au amai 'ekana 'ao kaeao 'ekana a'i to'ioibi 'apuana. <sup>15</sup> Wai maearima ekia hoahoa ihobonai au tukai ahina'u. Au hanona tai ha a'i nakaiahina. <sup>16</sup> Ia au e'u kaiahi pababaina re'a, e'u 'abi hanona ebero, pokina au hanona ikupaia'u aha'i, Hama'u euhuna'u hauna abomo here'uai. <sup>17</sup> Emi rauhūbu aonai abomo na erere aihona, maearima rua ekia 'abi kehamona hanona 'abi tohana. <sup>18</sup> Au hau'u kipo'u pou'u nahinana mai Hama'u euhuna'u hauna abomo pou'u nehinana."

<sup>19</sup> Ba ia tebakaina tetibaha, "Hamamu hanona ae'e?"

Iesu e'abi etibaha, "Wai a'i to'ioibina'u buonai Hama'u abomo a'i to'ioibina. Wai

au pato'iobina'u raninai Hama'u abomo pato'iobina.”

<sup>20</sup> Iesu marea robe aonai baibeni monina ihorotina 'ekana'i 'abi neiakia eba'iobi ainakia. Weiana hau ha ia a'i ebirina pokina ia ena rani a'i nitai bahana.

*Au Naeao 'Ekana Wai Katoao A'i Ketaina.*

<sup>21</sup> Iesu haeamona ia ehina benakia etibaha, “Au hanona naka'a 'akaumana, ia wai hanona au katotabuna'u ia emi ki'a aonai kato'ari. Au kaeao 'ekana katoao hanona a'i ketainimi.” <sup>22</sup> 'Abi neiana paunai Iuda haukia apa'uakia kipokia tebakai bakai tetibaha, “Ia na ni'abi aiho, 'Au kaeao 'ekana hanona wai a'i katomai, weiana hanona ia kipona keahu 'arina, 'ao?” <sup>23</sup> Iesu ehina benakia etibaha, “Wai hanona ba'a ai tomai au hanona 'ubiai amai, wai haumi hanona hanopaka neiama 'euna, au hau'u hanona hanopaka neiama 'euna aha'i. <sup>24</sup> Au aba ahina benimi, 'Emi ki'a aonai kato'ari, weiana Au miaho banaibanai hau'u a'i kato a'ikakaumana'u raninai wai hanona emi ki'a aonai kato'ari.”

<sup>25</sup> Ia tebakai bakai tetibaha, “Ba oi hanona tai?” Iesu ekia 'abi ebamuena etibaha, “Au tai hanona aba ahinabe hinabe benimi 'uainai emai mo bariu. <sup>26</sup> Wai paumiai au 'abi bo'ona pahinana abomo puma rarina pabahoainimi, ia euhuna'u hauna hanona toha tohana, au ia herenai naona hauna mo hanopaka nahina bena.”

<sup>27</sup> Ia Hamana robana eahuna hanona obona a'i teobo. <sup>28</sup> Ua buonai Iesu ia ehina benakia etibaha, “Au Maearima Nahuna katotiu taeana'u raninai aba kato'iobina au hanona Keriso, abomo au kipo'u taba ha a'i nababaina ia Hama'u eba'iobina'u haukia mo nahinanakia. <sup>29</sup> Abomo euhuna'u hauna hanona ni'abana'u ia au a'i nihabo 'abaeana'u, pokina ia ena nuatae akakia rani ikoinai nababainakia.” <sup>30</sup> 'Abi neiakia ehinanakia hanona maearima bo'ona ia tea'ikakaumana.

*Aberahamo Bibirana.*

<sup>31</sup> Ba Iesu Iuda haukia tea'ikakaumana haukia ehina benakia etibaha, “E'u 'abi kato'ini benakia raninai wai hanona au i'aba'u haumi tohami. <sup>32</sup> Weiana 'abi tohana kato'iobina, ba 'abi tohana kehore kerubunimi.” <sup>33</sup> Ia Iesu tehina bena tetibaha, “Ai Aberahamo bibirana haumi

abomo tai ha ta'arana a'i ta'i. Aehoma buonai porubunamai na nuho?”

<sup>34</sup> Iesu ehina benakia etibaha, “'Abi tohana au wai nahina benimi, ki'a nibabaina hauna hanona ki'a ena ta'ara ia'ina haunai niao. <sup>35</sup> Ta'ara'i hauna hanona poki hauna ena ituai a'i kemiaho banaibanai, nahuna hanona itu weianai kemiaho banaibanai. <sup>36</sup> Ua buonai Nahuna kehore kerubunimi raninai wai hanona aba erubu tai baihanimi.

<sup>37</sup> Au aba a'iohinimi wai Aberahamo bibirana haumi, ia e'u 'abi aomiai a'i nemiaho paunai tonuatae katoahu 'arina'u. <sup>38</sup> Au hanona Hama'u wairanai aihana hauna nahina benimi, mai wai hanona hamami herenai tuo'o haukia tubabainakia.”

<sup>39</sup> Ia ena 'abi tebamuena tetibaha, “Aberahamo hanona ai hamamai.” Ba Iesu ehina benakia etibaha, “Wai Aberahamo nahuna raninai Aberahamo ebabai akakia patobabai. <sup>40</sup> 'Abi tohana Tirama herenai aona hauna nahina benimi, ia wai hanona taeara'u tutabuna katoahu 'arina'u. Aberahamo hanona na a'i ebabai aiho. <sup>41</sup> Wai hamami ebabai tabakia hanona wai tubabainakia.” Ia Iesu tehina bena tetibaha, “Ai hanona tubu miorimai aha'i, ai hamamai hanona hamona Tirama mo ikupaiana.” <sup>42</sup> Iesu haeamona ehina benakia etibaha, “Wai hamami Tirama raninai au patoraona'au aina'u. Pokina au Tirama herenai akarahi amai neia. Au hanona kipo'u e'u nuataeai a'i amai ia Hama'u euhuna'u.

<sup>43</sup> Aehoma buonai nahinanakia 'abikia hanona aomi a'i tiea? Pokina wai e'u 'abi ia'i taeana a'i tonuatae aina. <sup>44</sup> Wai hamami hanona tiaporo, emi nuatae hanona hamami ena nuatae akana katababaina. Ia hanona ahuahu hauna bahabanai emai mo bariu, 'abi tohanai a'i ekoroti, pokina ia aonai 'abi tohana ha a'i nemiaho. Ia bai'oi nehinana hanona ia ena hoahoa tohana, pokina ia hanona bai'oi hauna abomo bai'oi ikoikiai hamakia. <sup>45</sup> Au 'abi tohana nahinana paunai wai au e'u 'abi a'i tua'i taeana. <sup>46</sup> Ba naia haumi tai ha au e'u ki'a o'iobina raninai 'ekana ko'uahina. Au 'abi tohana nahinana raninai aehoma buonai e'u 'abi a'i tua'i taeana? <sup>47</sup> Tirama nahuna hauna hanona Tirama ena 'abi aiakia nio'o, ia wai aia a'i tuona ena poki hanona wai Tirama nahuna aha'i.”

### *Iesu Mai Aberahamo.*

<sup>48</sup> Iuda haukia apa'uakia Iesu ena 'abi tebamuenta tetibaha, "Oi hanona Samaria haumu aomuai auba ki'a obona nemiaho, weiana hanona aba ta'abi harai 'ao?" <sup>49</sup> Ba Iesu ehina benakia etibaha, "Au ao'uai hanona auba ki'a obona aha'i. Au hanona Hama'u namariki aina ia wai au a'i tumariki aina'u. <sup>50</sup> Au hanona kipo'u e'u nuabi a'i natabuna, ia Tirama kehore e'u nuabi ketabuna abomo bakai kebabaina au pau'uai. <sup>51</sup> 'Abi tohana au wai nahina benimi, e'u 'abi ne'inibena hauna hanona a'i ke'ari 'apua."

<sup>52</sup> Weia Iuda haukia apa'uakia tehina bena tetibaha, "Bariu ai ta'iohi haraini'o, oi hanona aomuai auba ki'a obona nemiaho. Aberahamo e'ari mahabanai haukia abomo te'ari iamo oi nu'abi emu 'abi pe'inibena hauna hanona 'ari abiabina a'i keonobaina. <sup>53</sup> Oi hanona Aberahamo otara haona, u? Ia e'ari mahabanai haukia te'ari, ba nuraonana oi hanona tai?"

<sup>54</sup> Iesu ia ehina benakia etibaha, "Kipo'u pabanuabina'u raninai e'u nuabi anina aha'i. Au Hama'u hauna tohana wai tu'abi 'Emi Tirama' hauna nihore au nibanuabina'u. <sup>55</sup> Wai ia a'i to'iohina au mo a'iohina. Ba au pa'abi au ia a'i a'iohina raninai au hanona bai'oi hau'u wai 'abami. Ia au a'iohina mai ena 'abi na'inibenakia.

<sup>56</sup> Wai hamami Aberahamo e'u rani keihana paunai eonamo, ba eihana hanona aona enamo." <sup>57</sup> Iuda haukia apa'uakia te'abi tetibaha, "Oi ihaumu hanona imabui a'i nia'i bahana, ia Aberahamo aba hamo oihana, u?" <sup>58</sup> Iesu ehore ehina benakia etibaha, "'Abi tohana au wai nahina benimi. Aberahamo a'i erama baha au hanona aba amiaho."

<sup>59</sup> 'Abi weiana teona raninai ia pihara tea'i Iesu kateahuna, ia Iesu hanona kipona epihi to'u baiatakiai ekaobo marea robe ehabona eka'a.

## 9

### *Iesu Maha Ki'a Hauna Mahana Ebanomonakia.*

<sup>1</sup> Iesu taeara ekana eao aonai maha ki'a hauna ha eihana, ia hanona mahana ki'akiai erama. <sup>2</sup> I'abana haukia Iesu tebakaina tetibaha, "Ba'iohi haumu e, tai ena ki'a paunai hau neiana mai 'iauna erama, hau neiana ena ki'ai 'ao hinana

hamana ekia ki'ai?" <sup>3</sup> Iesu ekia 'abi ebaumena etibaha, "Hau neiana ena ki'a aha'i abomo hinana hamana ekia ki'a aha'i, ia Tirama ena hiabu akakia ia haunai kewaira tina hauna kateihana paunai. <sup>4</sup> Au euhuna'u Tiramana ena aka mararani kahababaina. Rabi kemai aonai hau ha keaka hanona a'i ketaina. <sup>5</sup> Au hanopakai namiaho aonai au hanona hanopaka ena ea."

<sup>6</sup> Iesu 'abi neiana ehinana murinai 'anoai e'atoti ba 'atotinai tipu emakana, 'iau hauna mahana rua etaronakia. <sup>7</sup> Ba ehina bena etibaha, "Moao, Siloama obunai wairamu koutuna." (Siloama anina hanona 'baiuhu.) Hau weiana eao wairana eutuna, emue emai mahana aba tenamo.

<sup>8</sup> Herenai haukia mai maearima baika ia 'uainai enoi ba'ame teihana haukia kipokia tebakai bakai tetibaha, "Hau neiana 'uainai weia emiati enoi ba'ame hauna, u?" <sup>9</sup> Harua etibaha, "Hauna mo naiana." Baika tetibaha, "Aha'i, ihana mo ia teaobena." Ia kipona ehina benakia etibaha, "Au mo neia'u."

<sup>10</sup> Ia tehore tebakaina tetibaha, "Bariu mahamu aea tehoma noihaiha?" <sup>11</sup> Ia ekia 'abi ebaumena etibaha, "Hau atana teaparina Iesu hauna tipu emakana maha'u etaronakia, ba ehina bena'u kaeao Siloama obuna waira'u kautuna. Ua buonai aeao waira'u autu ba naiha iha." <sup>12</sup> Ia tebakaina tetibaha, "Hau weiana hanona ae'e?" 'Iau hauna e'abi etibaha, "Au a'i a'iohina."

### *Parisea Haukia Maha Tenamo Hauna Tehobona.*

<sup>13</sup> Ia tehore weiana 'uainai mahana teki'a hauna tebaka'ana teoaina Parisea haukia herekia. <sup>14</sup> Wapu weiana Iesu tipuai 'iau hauna mahana etaronakia tekaikau hanona beraura robena. <sup>15</sup> Ua paunai Parisea haukia abomo ia tebakaina mahana aea tenamo aiho. Maha ki'a hauna e'abi etibaha, "Ia tipuai maha'u etaronakia, autunakia ba bariu aba naihaiha." <sup>16</sup> Parisea haukia baika te'abi tetibaha, "Hau neiana hanona Tirama herenai a'i emai pokina ia beraura robe a'i ne'inibena." Ia baika te'abi tetibaha, "Ki'a hauna ha hoa nahomakia aea kebabai aiho?" Weiana paunai ia kipokia baiatakia epa'a.

17 Haeamona Parisea haukia maha ki'a hauna tebakai muena tetibaha, "Ia ehore mahamu ekaikaunakia, ba oi nuraonana ia hanona tai?" Hau weiana e'abi etibaha, "Ia hanona mahabanai hauna."

18 Iuda haukia apa'uakia maha ki'a hauna mahana aba tenamo hauna a'i tebatohana eao mo hau weiana hinana mai hamana teaparinakia temai. 19 Ba ia tebakainakia tetibaha, "Neiana hanona wai nahumi, u? Mahana ki'a obokiai erama hauna neiana? Ia bariu hanona mahana aea tenamo aiho ba neihaiha?" 20 Hinana mai Hamana ia ekia 'abi tebaumena tetibaha, "Ai ta'iohina ia hanona ai nahumai abomo ia hanona mahana ki'a obokiai erama. 21 Ia bariu aeahoma neihaiha abomo tai ehore ia mahana ekaikaunakia hanona ai a'i ta'iohina. Tomobakaina, ia abeapa'ua kipona robana meahuna." 22 Hinana mai hamana Iuda haukia apa'uakia teta'u ainakia paunai ua te'abi aiho. Iuda haukia aba teroba ahu hau ha Iesu kehina pouna ia hanona Keriso raninai mareai katebakahina. 23 Weiana buonai hinana mai hamana te'abi, "Ia hanona abeapa'ua tomobakaina."

24 Maha ki'a hauna rani ibaruana teaparinana tehina bena tetibaha, "Ko'abi'uai Tirama wairanai ba 'abi tohana kohinana. Ai ta'iohina hau neiana ebanamoni'o hanona ki'a hauna." 25 Hau weiana ekia 'abi ebamuena etibaha, "Ia ki'a hauna 'ao aha'i au a'i a'iohina. Taba hamona au a'iohina hanona maha'u teki'a ia bariu aba naihaiha."

26 Ba ia tebakaina tetibaha, "Oi heremuai taba ehabaina? Mahamu aea ekaikau aihonakia?" 27 Ia ekia 'abi ebamuena etibaha, "Au aba wa'i baha ahina benimi, ia aia'u a'i to'ona. Bariu ae-homa buonai tonuatae kato muena? Wai abomo tonuatae ia i'abana haumiai katoao, u?"

28 Ia tehore terike ki'ana ba na te'abi aiho, "Oi hanona maearima weiana i'abana haumu, ia ai hanona Mose i'abana haumai. 29 Ai ta'iohina Tirama ehore Mose ehina bena, ia maearima naiana ae'e ai emai hanona a'i ta'iohina." 30 Hau weiana ekia 'abi ebamuena etibaha, "Bariu taba haeai tohana erama pokina ia maha'u ekaikaunakia iamo wai hanona ena mai 'ekana a'i to'iohina. 31 Aika ha'iohina Tirama ki'a haukia aiakia a'i

nibahu ainakia. Ia hanona tekuti aina haukia mai weiakia ena nuatae akana tibabaina haukia mo aiakia nibahu ainakia. 32 'Uainai hanopaka erama raninai emai mo bariu hau ha ehore mahana teki'a erama hauna mahana ekaikaunakia pouna ha a'i hao'o 'apuana. 33 Hau neiana Tirama herenai a'i emai raninai ia hanona aka na homana ha a'i pebabaina."

34 Ia ena 'abi tebaumena tetibaha, "Oi hanona ki'a aonai orama ba oi nuhore ai kobamarerenamai, u?" Ia tehore mareai tetori ahina.

### *A'i Tia'ikakauma Haukia Hanona Maha Ki'a Abana.*

35 Iesu hau weiana tetori ahina pouna eona ba etabu ahina raninai ia ebakaina etibaha, "Oi Maearima Nahuna nua'ikakaumana, u?" 36 Hau weiana Iesu ena 'abi ebamuena etibaha, "Hau apa'uana e, ia hanona tai? Mohina bena'u au kahore ia ka'ikakaumana." 37 Iesu e'abi etibaha, "Oi bariu ia aba noihana hauna naiana oi nehina beni'o." 38 Ba hau weiana e'abi etibaha, "Obiapaka e, au na'ikakauma." Ba ia Iesu ekuti aina.

39 Iesu haeamona e'abi etibaha, "Kabakai paunai amai hanopaka neianai, weiakia maha ki'a haukia kateihaiha, ia neiakia teihaiha haukia mahakia kateki'a." 40 Parisea haukia baika ia herenai haukia 'abi weiana teona hanona tebakaina, "Abi tohana ai abomo mahamai teki'a, u?" 41 Iesu ehina benakia etibaha, "Wai mahami pateki'a raninai heremai ki'a peaha'i. Ia bariu wai tu'abi toihaiha buonai emi ki'a hanona 'ekakiai temiaho."

## 10

### *'Abi Iabataina Mamoe 'Ima Hauna.*

1 Iesu e'abi etibaha, "Abi tohana au wai nahina benimi. Hau ha mamoe parabuna pa'abinai a'i nikatoto ia arahuanai nirobanai hauna hanona bainao mai kakikaki hauna. 2 Ia pa'abiai nikatoto hauna hanona mamoe i'imana hauna. 3 Pa'abi iha'inina hauna hanona pa'abi nikaikauna hau weiana 'euna ba ena mamoe hanona ia aiana tiona. Ia ena mamoe ha ha atakia tohakia niaparinakia mai ne'uai ainakia tikarahi. 4 Ia ena



mamoe ikoikiai nibakarahi orenakia raninai, wairakiai nika'a weiana ena mamoe ia murinai ti'au pokina ia aiana te'jobina. <sup>5</sup> Maearima haeai ha murinai a'i kate'au ia katebeau 'akaumana, pokina maearima weiana aiana a'i te'jobina." <sup>6</sup> Iesu 'abi ibabatai neianai ehina benakia, 'a ia taba e'uahina hauna obona a'i teobo 'apua.

### *Iesu Hanona Mamoe 'Ima Hauna Namona.*

<sup>7</sup> Weiana buonai Iesu e'abi mue etibaha, "Abi tohana au wai nahina benimi. Au hau'u hanona mamoe ekia pa'abi. <sup>8</sup> Weiakia ikoikiai temai 'uai haukia hanona bainao mai kakikaki haukia ua buonai mamoe ia aiakia a'i teona. <sup>9</sup> Au hau'u hanona pa'abi, hau ha au ao'uai nikatoto hauna hanona kemauri. Ia hanona kekatoto mai kekarahi aniani ketabu ahina.

<sup>10</sup> "Bainao hauna emai hanona kebainao, keahuahu mai kebpururu paunai emai. Au amai hanona mamoe mauri katea'ina mauri namona maikoinai katea'ina. <sup>11</sup> Au hanona mamoe 'ima hauna namo'u, mamoe 'ima hauna namona hanona ena mauri kebaibeni ena mamoe paukia. <sup>12</sup> 'Ara tabu hauna hanona mamoe 'ima hauna tohana aha'i, mamoe abomo ia 'euna aha'i, ua buonai waeha 'aki nimai neihana raninai ia mamoe nihabonakia nibeau 'akaumana, ba waeha 'aki mamoe ne'urinakia tibeau otaraina. <sup>13</sup> Hau weiana nibeau 'akau-mana pokina ia hanona 'ara tabu hauna mai mamoe robakia a'i niahuna.

<sup>14</sup> "Au hanona mamoe 'ima hauna namo'u, au hanona e'u mamoe a'jobinakia mai e'u mamoe abomo te'jobina'u. <sup>15</sup> Ihobona mo Hama'u au e'jobina'u au Hama'u a'jobina, ba e'u mauri kabaibeni e'u mamoe paukia. <sup>16</sup> Au hanona e'u mamoe haeai baika, weiakia hanona parabu neiana aonai aha'i, weiakia abokiamo kamaiaianakia ia abomo aia'u kateona, weia mamoe to'una kehamomo mai mamoe 'ima hauna hamona. <sup>17</sup> Hama'u niraona'au aina'u pokina au e'u mauri nabaibeni, haeamona au kahore ka'i muena. <sup>18</sup> Hau ha here'uai e'u mauri a'i kea'i boina, 'a au kipo'u e'u nuataeai e'u mauri nabaibeni. Au mai e'u hiabu e'u mauri kabaibeni mai e'u hiabu e'u mauri haeamona ka'i muena. Hama'u ebena'u 'abina hanona weiana."

<sup>19</sup> 'Abi neiakia paukia Iuda haukia ba-iatakia epa'a mue. <sup>20</sup> Maearima bo'ona te'abi tetibaha, "Auba ki'a obona ia aonai nemiaho nibeau 'ari. Taba buonai ia aiana tuona?" <sup>21</sup> Ia baika te'abi tetibaha, "Abi na homakia hanona auba ki'a obona aonai nemiaho hauna ua a'i ke'abi aiho. Ba auba ki'a obona maha ki'a hauna mahana a'i kekaikaunakia."

### *Iuda Haukia Iesu Tebaki'ana.*

<sup>22</sup> Ba Ierusalem a'i marea barobe iraonana tatuna ranina etaina, weiana hanona iaia ranina. <sup>23</sup> Ba Iesu hanona Marea robe aonai itara ha ahanai eka'a, weiana hanona Solomona ena itara. <sup>24</sup> Iuda haukia apa'uakia temai Iesu tekori kaiarona te'abi tetibaha, "Aomai nubakai'au kai'auna, aita raninai kohinabe harainamai? Oi Keriso raninai mohinabe harainamai."

<sup>25</sup> Ba Iesu ekia 'abi ebamuena etibaha, "Au wai aba ahina benimi, ia wai hanona a'i tua'ikakauma. Au Hama'u atanai hiabu akakia ababainakia haukia hanona waira'u tia'i ahina. <sup>26</sup> Ba wai a'i tua'ikakaumana'u pokina wai hanona au e'u mamoe aha'i. <sup>27</sup> E'u mamoe hanona aia'u tiona. Au a'jobinakia, mai ia hanona muri'uai tika'a. <sup>28</sup> Au mauri banaibanai nabenakia, ia hanona a'i kate'ari abomo hau ha ima'uai a'i kea'i boinakia. <sup>29</sup> Hama'u mamoe weiakia ebena'u hauna hanona taba ikoikiai etara haonakia, hau ha Hama'u imanai weiakia ha a'i kea'i boina. <sup>30</sup> Au mai Hama'u tararua hanona hamomomai."

<sup>31</sup> Iuda haukia 'abi neiana teona raninai pihara tea'i taea ia kateahu 'arina. <sup>32</sup> 'A Iesu ehina benakia etibaha, "Aka namokia bo'okia Hama'u herenai haukia abaihanimi, aka neiakia aeana hauna paunai piharai katoahuna'u?"

<sup>33</sup> Ia ena 'abi tebamuena tetibaha, "Ai piharai katahuni'o hanona aka namokia nubabai paunai aha'i, ia Tirama nu'abi ki'aina paunai, pokina oi hanona maearima 'abaeamu ia mo oi kipomu Tiramai nubaoni'o."

<sup>34</sup> Iesu ekia 'abi ebamuena etibaha, "Emi rauhuhu aonai aba tererena, Tirama e'abi, 'Wai hanona tirama.' <sup>35</sup> Tirama ena 'abi emai herekia haukia eaparinakia tirama, ba Puka robena 'abina weiana hanona a'i keikabe. <sup>36</sup> Weiana Tirama ebarobena'u mai euhuna'u amai hanopakai ba a'abi

atibaha, 'Au hanona Tirama Nahuna,' raninai, aehoma buonai tu'abi au Tirama na'abi ki'aina?

<sup>37</sup> Hama'u ena aka a'i pababaina raninai a'i pato a'ikakaumana'u. <sup>38</sup> Ia Hama'u ena aka nababai raninai, wai a'i tua'ikakaumana'u re'a ia aka weiakia nababai haukia tomo a'ikakaumanakia. Weianai wai kato'jobina mai obokia kato'jobo Hama'u hanona au ao'uai mai au hanona Hama'u aonai."

<sup>39</sup> Weiana Iuda haukia apa'uakia taeara tetabu mue Iesu katebirina. Ia hanona herekiai ekaobo.

<sup>40</sup> Iesu ekabanai Ioridana atena abirana eao mue, 'uainai Ioane eba'uere robe 'ekanai weia emiaho. <sup>41</sup> Maearima bo'ona temai ia herena ba te'abi tetibaha, "Ioane hoa ha a'i ebabaina ia mo Ioane hau neiana robana eahuna tabakia ikoikiai hanona tetoha." <sup>42</sup> Ba maearima bo'ona weia Iesu tea'ikakaumana.

## 11

### *Lasaro Aba E'ari.*

<sup>1</sup> Hau ha atana Lasaro, Betani hauna, ia hanona einawa, Betani hanona Maria uaho'abana Mareta ohi ekia aiara. <sup>2</sup> Maria weiana kehore tehoru timina 'orimonai Obiapaka Iesu aena keheinakia ba buinai keutu 'ororonakia babi'ena, ia haibuna hanona Lasaro weiana einawa. <sup>3</sup> Weiana buonai uaho'aba rua 'abi teuhuna eao Iesu herena tetibaha, "Obiapaka e, nuraona'au aina hauna hanona neinawa." <sup>4</sup> 'A Iesu pou neiana eona raninai e'abi etibaha, "Inawa neiana hanona Lasaro a'i keba'ari baiha, ia neiana erama hanona Tirama ena nuabi kewaira tina, weianai Tirama Nahuna nuabi kea'ina."

<sup>5</sup> Iesu hanona Mareta uaho'abana Maria ohi mai haibukia Lasaro kipokia eraona'au ainakia. <sup>6</sup> Weiana Iesu Lasaro ena inawa pouna eona raninai, ia 'ekanai mo weia wapu rua emiaho. <sup>7</sup> Ba Iesu i'abana haukia ehina benakia etibaha, "Aika hamamue hamaeao Iudea." <sup>8</sup> I'abana haukia te'abi tetibaha, "Ba'jobi haumu e, maraniai mo Iuda haukia apa'uakia tenuatae piharai kateahu 'arini'o, ia mo oi emu raona hanona komue koao weia?" <sup>9</sup> Iesu e'abi etibaha, "Mararani hamona aonai beraura hoana hanona harau haea rua, maearima ha mararani nika'a hauna hanona a'i kekai, pokina ia hanona

hanopaka ena ea neihana. <sup>10</sup> Ia rabi keka'a hauna hanona kekai, pokina ia aonai hanona ea aha'i."

<sup>11</sup> Iesu 'abi weiana ehinana murinai e'abi etibaha, "Eka hau Lasaro hanona aba eparua rea. Ia au hanona kaeao kabaona." <sup>12</sup> I'abana haukia te'abi tetibaha, "Obiapaka e, ia neinawa niparua raninai ia hanona aba kenamo mue." <sup>13</sup> Iesu hanona Lasaro ena 'ari robana eahuna, 'a i'abana haukia teraonana ia hanona niparua 'abaea. <sup>14</sup> Weiana buonai Iesu ehinabe mahanakia etibaha, "Lasaro hanona aba e'ari. <sup>15</sup> Wai paumiai au weia aha'i hanona ao'u ninamo, pokina wai katohore au kato a'ikakaumana'u. Aika hamaeao ia herena."

<sup>16</sup> Ba Toma (tiaparina Bai'apaea hauna) 'abana ehina benakia etibaha, "Aika abomo hamaeao, ia kipokia kaha'ari haeamo."

### *Iesu Hanona 'Ariai Mikiri Mue Mai Mauri Pokina.*

<sup>17</sup> Iesu weia ekara'au raninai tehina bena Lasaro hanona aba e'ari hauanina wapu bani uri aonai nemiaho. <sup>18</sup> Ierusalem mai Betani baiatakia hanona a'i ehoma'a matoha maela rua 'abana. <sup>19</sup> Weiana Mareta mai Maria haibukia Lasaro e'ari paunai Iuda haukia bo'okia temai ia herekia aokia katebataburana.

<sup>20</sup> Mareta Iesu emai pouna eona raninai, ia ekarahi eao keihana, ia Maria hanona ituai emiaho. <sup>21</sup> Mareta Iesu ehina bena etibaha, "Obiapaka e, oi neia pomiaho raninai haibu'u hanona a'i pe'ari. <sup>22</sup> Ia au a'jobina bariu taba Tirama herenai kono'i aina hauna ia kehore kebeni'o."

<sup>23</sup> Iesu Mareta ehina bena etibaha, "Oi haibumu hanona kemikiri mue."

<sup>24</sup> Mareta e'abi etibaha, "Au a'jobina ia hanona kemikiri mue rani orenai."

<sup>25</sup> Iesu Mareta ehina bena etibaha, "Au hanona mikiri mue abomo mauri. Au nia'ikakaumana'u hauna hanona 'abi na aha'i pe'ari, ia kemaui. <sup>26</sup> Ba timauri mai tia'ikakaumana'u haukia ikoikiai hanona a'i kate'ari 'apua ia katemaui banaibanai. Oi 'abi neiana nua'ikakaumana, u?"

<sup>27</sup> Mareta e'abi etibaha, "E, Obiapaka, au na'ikakaumani'o, oi hanona Keriso, Tirama Nahuna weiana kemai hanopakai hauna."

### *Iesu Ehai.*

<sup>28</sup> 'Abi neiana ehinana murinai emue eao uaho'abana Maria eapari ke'ena ehina bena etibaha, "Ba'iobi hauna hanona aba emai oi nibakai bakai aini'o." <sup>29</sup> Maria 'abi neiana eona raninai emikiri noanoa eao Iesu herena. <sup>30</sup> Rani weianai Iesu hanona aiarai a'i ekatoto baha, ia weia Mareta ohi tebeitabu ahi 'ekana'i emiaho oho. <sup>31</sup> Iuda haukia weiakia Maria kipokia ituai temiaho aona tebataburana haukia ia teihana emikiri noanoa ekarahi raninai murinai teao, teraonana ia hanona niao 'ariahanai weia kehahi.

<sup>32</sup> Maria hanona Iesu emiaho 'ekana'i ekara'au ba eihana raninai beronai aena pokina'i e'umuti e'abi etibaha, "Obiapaka e, oi neia pomiaho raninai haibu'u hanona a'i pe'ari."

<sup>33</sup> Iesu Maria ehahi eihana mai Iuda haukia weiakia kipokia temai haukia tehai eihanakia hanona aona eaoko'o mai e'abe'abe. <sup>34</sup> Ia ebakainakia etibaha, "Wai ia ae'eai tohorena?" Ia ena 'abi tebaumena tetibaha, "Obiapaka e, omai moi-hana." <sup>35</sup> Ba Iesu ehahi. <sup>36</sup> Weiana Iuda haukia te'abi tetibaha, "Tomoihana hama ua niraona'auai aihona." <sup>37</sup> Ia baika te'abi tetibaha, "Hau neiana maha ki'a hauna mahana ebanamonakia ba ia pehore Lasaro 'ariai peba'orona a'i pe'ari."

### *Iesu Lasaro 'Ariai Ebamikirina Emauri Mue.*

<sup>38</sup> Iesu aona eaoko'o ki'a. Ba eao 'ariahana, 'ariahana weiana hanona pihara paparo'ana ha pihara rarina temaiaina pa'abina tebahu abuna. <sup>39</sup> Iesu e'abi etibaha, "Pihara tomoa'i parena!" Ia 'ari hauna haibuna Mareta e'abi etibaha, "Obiapaka e, timina aba na eki'a, pokina ia tehorena hanona wapuna aba ebani."

<sup>40</sup> Ba Iesu ia ehina bena etibaha, "Au aba ahina beni'o, oi koa'ikakaumana'u raninai Tirama ena nuabi koihana." <sup>41</sup> Ua buonai ia tehore pihara tea'i parena. Ba Iesu ea'a taea e'abi etibaha, "Hama'u e, au nabanamoni'o pokina aia'u aba nuona. <sup>42</sup> Au a'jobina oi hanona rani ikoinai aia'u nuona, ia au neiana nahinana ena poki hanona maearima neiakia neia tekoroti haukia paukiai. Weiana kate a'ikakauma oi ohore au ouhuna'u."

<sup>43</sup> Iesu 'abi neiana ehinana murinai eapari aota etibaha, "Lasaro e, naia mokarahi omai!" <sup>44</sup> Ba 'ari hauna ekarahi

emai, imana mai aena hanona 'ariahana habuninai te'apanakia haeamona wairana abomo habuni ha ai te'apana. Iesu e'abi etibaha, "Ariahana habunikia tomorubunakia, tomohabona meao."

### *Iesu Iahu'arina Raonana Tebabaina.* (Mt 26.1-5; Mk 14.1, 2; Lk 22.1, 2)

<sup>45</sup> Iuda haukia bo'ona temai Maria tetoana haukia hanona Iesu taba weiana ebabaina teihana ba tea'ikakaumana. <sup>46</sup> Ia baika hanona teao Parisea haukia herekia ba Iesu taba ebabaina hauna robana teahuna. <sup>47</sup> Ba robe haukia apa'uakia mai Parisea haukia bakai apa'uana te'imana haukia teaparina kipokia te'abi'abi, "Bariu aika taba kaha babaina hau weiana aba bata'u ta'u huri hoakia bo'ona nibabainakia. <sup>48</sup> Aika ia kahahabona hoa neiakia kebabai hao babai hao raninai maearima ikoinai ia kate a'ikakaumana, ba Roma haukia katemai eka marea robe mai eka hanopaka katea'i boinaka."

<sup>49</sup> Ba ia 'abakia ha atana Kaiafa, ihau weiana aonai ia hanona robe haukia arakiai hauna ha etae e'abi etibaha, "Wai taba ha'i to'iobi 'apuana. <sup>50</sup> Wai obo a'i tuobo, namona hanona hau ha hamona pe'ari maearima paukiai, ba hanopaka maikoina keki'a hanona a'i enamo."

<sup>51</sup> Ia 'abi neiana ehinana hanona ia kipona ena raonai aha'i. 'A ihau weiana aonai ia hanona robe haukia 'arakiai hauna paunai, ena mahabanaia'i ua e'abi aihio Iesu ke'ari Iuda haukia paukiai, <sup>52</sup> Iuda haukia ikupaiakia mo paukiai aha'i, ia Tirama nahuna 'eka haeai haeai temiaho haukia kebararonakia mai kebahamonakia.

<sup>53</sup> Rani weiana ea'i ramana eaoaina aonai Iuda haukia apa'uakia hanona terobahu Iesu kateahu 'arina. <sup>54</sup> Ua buonai Iesu Iuda haukia baiatakiai a'i eka'a maha. Ia weia ekaobo eao hano'akuna haianai aiara ha atana Eperaim, weia i'abana haukia kipokia temiaho.

<sup>55</sup> Iuda haukia ekia Kabanai tatuna aba ekaibari aonai Iuda maearimakia bo'ona aiara haeai haeai ai tekara'au teao Ierusalem a katea'ia'i harai katerobe 'uai ba tatu kerama. <sup>56</sup> Ia Iesu tetabuna ba marea robe aonai tekoroti kipokia baiatakiai tebakai bakai tetibaha, "Wai taba turaonana? Ia tatu kemai 'ao?" <sup>57</sup> 'A robe haukia apa'uakia mai Parisea haukia 'abi tebaibeni, hau ha Iesu ena miaho 'ekana

e'jobina raninai ia keba 'iobinakia, weiana ia katehore katea'ina.

## 12

*Maria Iesu Aena Tehoroai Eheinakia.*  
(Mt 26.6-13; Mk 14.3-9)

<sup>1</sup> Wapu 'abaihau wairai temiaho Kabanai tatuna kerama hanona Iesu eao Betani Lasaro nemiaho aiarana, hau weiana 'ariai ebamikirina hauna. <sup>2</sup> Rabirabi Iesu ia'i taeana hoana anianina ha teba'oruna, ba Mareta hanona ia ta'arakia ea'i, ia Lasaro hanona Iesu mai maearima baika kipokia aniani 'ekana'i temiati. <sup>3</sup> Ba Maria ehore tehoru kawapu hamona arana rarina 'akinai pahakawana hauna ea'ina Iesu aena eheinakia ba buinai Iesu aena eutu 'ororonakia. Tehoro timana 'orimona weiana itu aona maikoinai ebonu 'auna. <sup>4</sup> Iesu i'abana hauna ha Iuda Isakariote hauna wairai Iesu kehinahinaina hauna e'abi etibaha, <sup>5</sup> "Ei, tehoru neiana moni rarina 'akinai\* patekawa kawaina ba monina uraru haukia patebenakia." <sup>6</sup> Ia 'abi neiana ehinana hanona uraru haukia niraonanakia paunai aha'i, 'a ia hanona bainao hauna, moni puteputena weiana ea'ina haunai ia kipona nibaraina. <sup>7</sup> Ba Iesu e'abi etibaha, "Tomohabo 'abaeana, tehoru neiana hanona kebaumauaina keaomo wapu weiana au katehorena'u hauna 'euna. <sup>8</sup> Rani ikoiki'ai uraru haukia hanona wai baiatamiai katemiaho, 'a au hanona rani ikoiki'ai wai baiatamiai a'i kamiaho."

*Lasaro Iahu'arina Raonana Tebabaina.*

<sup>9</sup> Weiana Iuda haukia to'una rarina Iesu pouna teona ia hanona aba Betani ai, buonai teao 'eka weiana. Iesu mo kipona a'i kateihana, ia Lasaro 'ariai ebamikiri muena hauna abomo kateihana. <sup>10</sup> Ia robe haukia apa'uakia teroba ahu Lasaro abomo kateahu 'arina, <sup>11</sup> pokina hoa weiana Lasaro herenai erama hauna paunai Iuda haukia bo'ona ia tehabonakia tekabanai Iesu tea'ikakaumana.

*Iesu Ierusalemiai Ekatoto Matoha Obia Arana Abana.*  
(Mt 21.1-11; Mk 11.1-11; Lk 19.28-40)

<sup>12</sup> Erani wapu weianai to'u rarina tatu paunai temai haukia Iesu pouna teona nimai Ierusalemia. <sup>13</sup> Ua buonai ia 'ari'ari

tea'i tekarahi teao Iesu kipokia katebaitabu ahi, ba teio tetibaha,

"Hosana!

Tirama kehore Obiapaka atanai

nimai hauna kebanamona!

Tirama kehore Isaraela ekia

obia 'arana kebanamona!"

<sup>14</sup> Iesu toniki nahu ha etabu ahina ahanai emia'au. Weiana hanona Puka robenai tererena ihobona etibaha,

<sup>15</sup> "Siona aiara apa'uana haumi e,

a'i katota'u.

Tomoihana,

neiana hanona emi obia arana

toniki nahu ahanai emia'au nimai."

Sek 9.9

<sup>16</sup> Rani weianai i'abana haukia 'abi neiakia obokia a'i teobo eaomo Iesu ena nuabi ai emikiri mue murinai ba ia robana teahuna 'abikia tererenakia haukia mai taba neiakia ia herenai tebabai haukia teraona tinanakia.

<sup>17</sup> Maearima weiakia Iesu Lasaro 'ariai ebamikiri muena teihana haukia tehore ia hauna pouna tehina otaraina.

<sup>18</sup> Maearima bo'ona Iesu bata'u ta'u huri hoana weiana ebabaina pouna teona paunai tekarahi teao kateihana. <sup>19</sup> Ua buonai Parisea haukia kipokia baiatakiai te'abi'abi tetibaha, "Tomoihana, aika hanona a'i ketainaka maearima maikoinai aba ia murinai tika'a."

*Helene Haukia Baika Iesu Titabuna.*

<sup>20</sup> Tatu weiana aonai weiakia teao Ierusalemia Tirama katekuti aina haukia baiatakiai hanona Helene haukia abomo baika. <sup>21</sup> Ia temai Galilea Betesaida hauna Pilipo herena tehina bena tetibaha, "Poki haumu e, ai tanuatae Iesu kataihana."

<sup>22</sup> Pilipo eao Anderea ehina bena ba teraru teao Iesu tehina bena. <sup>23</sup> Iesu ekia 'abi ebamuena etibaha, "Au Maearima Nahuna nuabi apa'uana ka'ina beraurana hanona aba ekara'au. <sup>24</sup> 'Abi tohana au wai nahina benimi, witi uhona ha a'i ke'eho hanoai a'i ke'ari raninai ia hanona uho 'abaeana mo kemiaho. 'A ke'ari raninai uho bo'ona kebaramanakia. <sup>25</sup> Hau ha ena mauri ibanamona niraonana hauna hanona ena mauri keba'akauma, hau ha hanopaka neiana aonai ena mauri ibanamona robana a'i niahuna hauna hanona ena mauri kea'i 'inina keaomo banai banai. <sup>26</sup> Hau ha au ta'ara'u kea'i hauna hanona muri'uai kemai, ba au ae'ei

\* 12:5: (5) Helene moninai Denari hinabu aihau.'



hanona e'u ta'ara'i hauna abomo weia. Hau weiana ta'ara'u nia'i hauna Hama'u kehore ia kea'i taeana.

*Iesu Kipona Ena 'Ari Pouna Ehinana.*

<sup>27</sup> Bariu hanona ao'u niaro'ari ki'a ba taba na kahoma? Au ka'abi, 'Hama'u, beraura hoana neiana aonai mobamaurina'u?' Aha'i. Au amai ena pokina tohana hanona beraura hoana neianai kahaiara. <sup>28</sup> Hama'u e, atamu mobanuabina." Ba aia ha kupai emai etibaha, "Au aba abanuabina, haeamona kabanuabi muena." <sup>29</sup> To'u haukia aia weiana teona raninai te'abi tetibaha, "Kupa niro'u," baika hanona te'abi tetibaha, "Aneru ha Iesu ehina bena."

<sup>30</sup> Iesu ehina benakia etibaha, "Aia neiana emai hanona wai keba namonimi paunai, ia au aha'i. <sup>31</sup> Bariu rani neiana hanona hanopaka kebakai ranina, ba hanopaka neiana niobia aina hauna Satani bariu kateu'u ahina. <sup>32</sup> Weiana au hanopakai katetio taeana'u aonai maearima ikoikiai kaberinakia katemai here'u." <sup>33</sup> Ia 'abi neiana ehinana hanona ia aea ke'ari aiho hauna ehina pouna.

<sup>34</sup> To'u haukia te'abi tetibaha, "Ai rauhubu'ai aia taona e'abi Keriso hanona kemiaho banai banai, ia aea homanai mo oi nu'abi notibaha, 'Au Maearima Nahuna hanona katetio taeana'u.' Tai hanona Maearima Nahuna?"

<sup>35</sup> Ba Iesu ekia 'abi ebaumena etibaha, "Wai hanona rani papana mo ea kipokia katomiaho. Ea toa'ina aonai tomoka'a, weiana wapura kehore a'i mekaiabunimi marikina. Maearima wapura aonai nika'a hauna hanona a'i e'jobina aeana niao. <sup>36</sup> Ea heremiai nemiaho oho aonai tomo a'ikakaumana. Weiana wai hanona ea nahunai katoao." Iesu ena 'abi neiana ebapuna murinai herekia ekaobo eao epihi.

*Iuda Haukia Bo'ona Iesu A'i Tea'ikakaumana.*

<sup>37</sup> Iesu bata'u ta'u huri hoakia bo'okia wairakiai ebabai, iamo to'u haukia ia a'i tea'ikakaumana. <sup>38</sup> Neiana hanona Isaia mahabanai hauna ena 'abi ibatohana na e'abi aiho,

"Obiapaka e, tai emai 'abi tahinana hauna ea'ikakaumana, haeamona Obiapaka imana hiabuna hanona tai herenai kebawaira tinana?"

Isa 53.1

<sup>39</sup> Neiana paunai to'u haukia kate a'ikakaumana hanona a'i etaina. Haeamona Isaia e'abi mue etibaha,

<sup>40</sup> "Obiapaka ehore mahakia eba'iaunakia, mai aokia ebapahihinakia, weiana mahakiai a'i temeiha iha mai ekia raonaraonai obo a'i temeobo, a'i temeraona kabe a'i mabamaurinakia, Tirama ua e'abi aiho."

Isa 6.10

<sup>41</sup> Isaia 'abi neiana ehinana pokina Iesu ena nuabi eihana ba pouna ehinana.

<sup>42</sup> Rani weianai Iuda haukia apa'uakia bo'ona Iesu tea'ikakaumana. Ia Parisea haukia teta'u ainakia buonai ekia a'ikakauma a'i tehina pou, pokina marea aonai a'i temeba karahinakia ta'una. <sup>43</sup> Pokina ekia nuatae hanona maearima ia kateba namonakia, 'a Tirama kebanamonakia hauna a'i tenuataeai haraina.

*Iesu Ena 'Abi Katehore Maearima Kateba bakainakia.*

<sup>44</sup> Ba Iesu eio aota etibaha, "Hau ha au nia'ikakaumana'u hauna hanona au mo a'i nia'ikakaumana'u ia weiana euhuna'u hauna abomo nia'ikakaumana. <sup>45</sup> Hau ha au neihana'u hauna hanona weiana au euhuna'u hauna abomo neihana. <sup>46</sup> Au hanona ea 'abana amai hanopakai, ba maearima tia'ikakaumana'u haukia ikoikiai hanona wapura aonai a'i katemi-aho. <sup>47</sup> Hau ha e'u 'abi aiakia nio'o ia a'i nika'ainakia hauna, au ia a'i kababakaina, pokina au amai hanona hanopaka a'i kababakaina ia hanopaka 'arana kabamaurina. <sup>48</sup> Hau ha au nibaki'ana'u mai e'u 'abi a'i nia'i taeanakia hauna hanona mai ibabakaina hauna ha nemiaho, rani orenai 'abi weiakia ahina haukia katehore ia katebabakaina. <sup>49</sup> Pokina au kipo'u e'u nuataeai a'i a'abi, 'a Hama'u euhuna'u hauna ena 'abi ebaibeni 'abina kahinana abomo kahinahina haraina hauna ahinana. <sup>50</sup> Ba au a'jobina ia ena 'abi ebaibeni hanona keaoainimi mauri banai banai 'ekana, ua buonai 'abi ahinanakia haukia hanona Hama'u mo ehina bena'u 'abikia ahinanakia."

**13**

*Iesu I'abana Haukia Aekia Eutunakia.*

<sup>1</sup> Mara hanona Kabanai tatuna, weiana Iesu e'jobina ena rani aba ekara'au hanopaka kehabona keao Hamana herena. Ia hanopakai ia 'euna haukia rani ikoinai eraona'au ainakia, ia bariu ena raona'au maikoinai kebaihanakia keao mo ke'ari.

<sup>2</sup> Rabirabi teaniani aonai, tiaporo aba Simona nahuna Iuda Isakariote hauna aona eana Iesu hinahinana kehinahinaina. <sup>3</sup> Iesu hanona aba e'jobina Hamana ehore taba ikoikiai aba ia imanai eutanakia, weiana ia hanona Tirama herenai emai haeamona kemue Tirama herena. <sup>4</sup> Weiana Iesu aniani 'ekana emikiri ena ibatoto habuni ahanai hauna ea'i obona ehorotina ba tauera ea'ina huanai ehaina. <sup>5</sup> Bei ebaharu ahina ritiai ba i'abana haukia aekia eutu ramanakia, tauera huanai ehaina hauna aekia eba'ororonakia.

<sup>6</sup> Iesu emai Simona Petero herenai ekara'au raninai Petero e'abi etibaha, "Obiapaka e, oi hanona au ae'u koutunakia, u?" <sup>7</sup> Iesu Petero ena 'abi ebamuena etibaha, "Bariu au taba nababaina hauna oi obona a'i nuobo, 'a keao muriai hanona obona aba kobo." <sup>8</sup> Petero Iesu ehina bena etibaha, "Oi hanona au ae'u a'i koutu 'apuanakia." Iesu Petero ena 'abi ebamuena etibaha, "Aemu a'i kautunakia raninai oi hanona au i'aba'u haumu aha'i." <sup>9</sup> Simona Petero ia ehina bena etibaha, "Obiapaka e, ae'u mo ikupaiakia aha'i, 'a ima'u mai ara'u abomo koutunakia." <sup>10</sup> Iesu ia ehina bena etibaha, "Hau ha aba e'uere hauna hanona hauna maikoina aba emahamaha ba aena mo keutunakia. Wai hanona aba tomahamaha, iamo hamona hanona aha'i." <sup>11</sup> Pokina Iesu e'jobina tai hanona ia kehinahinaina, weiana buonai e'abi etibaha, "Ikoimiai hanona tomahamaha iamo hamona hanona aha'i."

<sup>12</sup> Weiana aekia eutunakia murinai ena ibatoto habuni ea'ina ebatoto muena. Emue 'ekana emiati. Ia ehore ebakainakia etibaha, "Au taba heremiai ababaina hauna anina to'jobina? <sup>13</sup> Wai au tuaparina'u emi ba'iohi hau'u mai Obiapaka, ua tu'abi aihohana ebero, pokina au hanona ua homa'u. <sup>14</sup> Ba au emi Obiapaka mai emi ba'iohi hau'u iamo aemi autunakia raninai wai abomimo 'abami ha ha aekia katoutunakia. <sup>15</sup> Au babai neiana heremiai ababaina toihana hauna ihobonai mo katobabaina. <sup>16</sup> 'Abi

tohana au wai nahina benimi, ta'ara'i hauna hanona ena poki hauna a'i etara haona, ihobona mo iuhubeau hauna hanona euhuna hauna a'i etara haona. <sup>17</sup> Bariu babai neiakia ababainakia anikia aba to'jobinakia, ba taeara ihobonai katobabainakia hanona wai Tirama kebanamonimi.

*Iesu Ehore Ia Kehinahinaina Hauna Ehina Pou 'Uaina.*

(Mt 26.20-25; Mk 14.17-21; Lk 22.21-23)

<sup>18</sup> "Au ikoimiai robami a'i nahuna, ia weiakia atina'anakia haukia hanona a'jobinakia. Ia weiana hanona Puka robe-nai tererena 'abina nibatohana, 'Tararua parawa tani haeamo hauna ehore au ni'oatana'u.' <sup>19</sup> Bariu taba neiana a'i nirama baha aonai naba'iohi baihanimi, pokina taba weiana kerama raninai wai katoa'ikakauma au hanona mi-aho banaibanai hau'u. <sup>20</sup> 'Abi tohana au wai nahina benimi, hau ha au auhuna hauna nia'i taeana hauna hanona au nia'i taeana'u, mai hau ha au nia'i taeana'u hauna hanona euhuna'u hauna abomo nia'i taeana."

<sup>21</sup> Iesu 'abi neiana ehinana murinai ia aona epuma e'abi etibaha, "'Abi tohana mo au wai nahina benimi. Wai hau ha au kohinahinaina'u." <sup>22</sup> Weiana buonai i'abana haukia kipokia tebaiha maiaina a'i te'jobina ia hanona tai robana niahuna. <sup>23</sup> Ia i'abana haukia ha Iesu ena raona'au hauna Iesu herenai emiati. <sup>24</sup> Weiana Simona Petero mahana ebairu ia herenai ba etibaha, 'Mobakaina ia tai robana niahuna.' <sup>25</sup> Ia Iesu herenai emiati hauna eiru haha Iesu herena ebakaina etibaha, "Obiapaka e, oi tai robana nuahuna?" <sup>26</sup> Iesu ia ena 'abi ebamuena etibaha, "Parawa papana 'ororo aonai kakaihuna kabena hauna iamo weiana." Ba Iesu ehore parawa ea'ina 'ororo aonai ekaihuna ba Iuda ebena, ia hanona Simona nahuna Isakariote hauna.

<sup>27</sup> Beronai Iuda parawa ea'ina eana hanona Satani ia aonai etoto. Weiana Iesu Iuda ehina bena etibaha, "Taba kobabaina hauna mobabai biaina." <sup>28</sup> Weiakia aniani 'ekana emiati haukia Iesu Iuda ua ehinabe aihona hanona obona a'i teobo. <sup>29</sup> Iuda hanona moni puteputena e'imana paunai baika teraonana Iesu ia ehina bena taba tatuai tenuatae ainakia haukia kekawanakia, 'ao taba baika uraru haukia

kebenakia. <sup>30</sup> Iuda parawa puana papana ea'ina eana murinai, beronai emikiri ekarahi, ba weiana hanona aba erabi.

### *Rauhuhu 'Abina Mahamahana.*

<sup>31</sup> Iuda ekamuri aonai, Iesu e'abi etibaha, “Bariu hanona au Maearima Nahuna e'u nuabi kewaira tina mai au hau'uai Tirama ena nuabi abomo kewaira tina. <sup>32</sup> Ba au hau'uai Tirama ena nuabi kewaira tina raninai Tirama abomo au Maearima Nahuna e'u nuabi kebawaira tinana, ba beronai mo kebabaina. <sup>33</sup> E'u raona'au miorimi e, au hanona rani papana mo wai kipokia kahamiaho. Ba wai au katotabuna'u. Iuda haukia aba ahina benakia ihobonai bariu wai nahina benimi, au kaeao 'ekana wai katoao hanona a'i ketaina. <sup>34</sup> Au rauhuhu 'abina mahamahana wai nabenimi, wai ha ha katoraona'au ainimi. Au wai araona'au ainimi ihobonai wai abomo ha ha katoraona'au ainimi. <sup>35</sup> Wai ha ha katoraona'au ainimi raninai, maearima ikoikiai kate'jobina wai hanona au i'aba'u haumi.”

### *Iesu Efore Petero Ia Kebuniai aina Hauna Ehina Pou 'Uaina.*

*(Mt 26.31-35; Mk 14.27-31; Lk 22.31-34)*

<sup>36</sup> Simona Petero ia ebakaina etibaha, “Obiapaka e, oi hanona aeana nuao?” Iesu e'abi etibaha, “Au bariu naeao 'ekana oi muri'uai komai hanona a'i ketaina, 'a muriai hanona muri'uai komai.” <sup>37</sup> Petero e'abi etibaha, “Obiapaka e, aehoma buonai bariu murimuai ka'au hanona a'i ketaina? Au hanona aba aba'oru oi paumuai ka'ari.”

<sup>38</sup> Ba Iesu ia ena 'abi ebamuena etibaha, “Oi au pau'uai ko'ari, u? 'Abi tohana au oi nahina beni'o, kokoro'u a'i kearara baha aonai oi rani aihau au kobuniai aina'u.”

## 14

### *Iesu Hanona Hamana Herena Kateao Haukia Ekia Taeara.*

<sup>1</sup> Iesu e'abi etibaha, “Aomi a'i katearo'ari. Tirama kato a'ikakaumana, au abo'umo kato a'ikakaumana'u. <sup>2</sup> Hama'u ena itu aonai miaho 'ekakia hanona ebo'o, peaha'i raninai au wai aba pahina benimi. Au kaeao 'eka ha ka'ia'i haraina wai 'eumi. <sup>3</sup> Weiana au kaeao 'eka ha ka'ia'i haraina wai 'eumi, murinai kamue kamai ka'inimi kahaeao au ae'eai kamiaho hanona wai abomimo weia. <sup>4</sup> Au

kaeao 'eka weiana taearana hanona wai aba to'jobina.”

<sup>5</sup> Toma Iesu ehina bena etibaha, “Obiapaka e, oi koao 'ekana hanona ai a'i ta'jobina, ba katawahi taearana hanona aea kata'jobi aihona?” <sup>6</sup> Iesu Toma ehina bena etibaha, “Taearana hanona au, 'abi tohana abomo au, haeamona mauri abomo au. Hamaka herena kateao haukia ikoikiai ekia taeara hanona au. <sup>7</sup> Wai au pato 'jobina'u raninai, Hama'u abomo aba pato'jobina, bariu waira keaoaina aonai ia aba to'jobina abomo aba toihana.”

<sup>8</sup> Pilipo Iesu ehina bena etibaha, “Obiapaka e, emai nuatae tohana hanona neiana, Hamaka mobaihanamai.” <sup>9</sup> Iesu ena 'abi ebamuena etibaha, “Pilipo e, rani ehoma'a aba kipokia hamiaho oioi, iamo oi hanona au a'i o'jobina'u, u? Hau ha au eihana'u hauna hanona Hama'u aba eihana, ae homa buonai nu'abi, Hamaka mobaihanamai. <sup>10</sup> Pilipo, nua'ikakaumana'u, au hanona Hama'u aonai mai Hama'u hanona au ao'uai. 'Abi neiakia nahinanakia heremiai hanona au kipo'u e'u nuataeai a'i na'abi, weiana hanona Hama'u au ao'uai nemiaho hauna ena aka nibabainakia. <sup>11</sup> Tomo a'ikakaumana weiana a'abi au hanona Hama'u aonai mai Hama'u hanona au ao'uai, aha'i raninai aka ababainakia haukia paukia tomo a'ikakaumana'u.

<sup>12</sup> “'Abi tohana mo au wai nahina benimi, hau ha au nia'ikakaumana'u hauna aka nababainakia haukia ia abomo kebabainakia. Haeamona aka apa'uakia tohakia abomo kebabainakia, pokina au naeao Hama'u herena. <sup>13</sup> Ba au ata'uai taba ikoikiai katonoi ainakia hanona kababainakia. Weiana Hama'u ena nuabi hanona kewaira tina nahuna paunai. <sup>14</sup> Weiana au ata'uai taba ikoikiai katonoi ainakia hanona au kahore kababainakia.

### *Iesu E'abi'uai Auba Robe Keuhuna Kemai.*

<sup>15</sup> “Wai au katoraona'au aina'u raninai e'u rauhuhu 'abikia hanona katobabua 'aunakia. <sup>16</sup> Au kahore Hama'u kanoina ba Baraibarai hauna kebenimi, ia hanona 'abi tohana Auba Robena wai heremiai kemiaho banaibanai. <sup>17</sup> Ia hanona 'abi tohana Auba Robena, hanopaka haukia hanona a'i katea'i taeara pokina a'i teihana mai a'i te'jobina, 'a wai hanona ia

to'jobina pokina ia hanona wai heremiai nemiaho mai wai aomiaia kemiaho.

<sup>18</sup> “Au hanona a'i kahabo 'abaeanimi matoha miori hamana hinana aha'i hauna 'abana, au hanona kamue kamai heremi.

<sup>19</sup> Rani papana murinai hanopaka haukia hanona au a'i kateiha muena'u, ia wai hanona au katoihana'u, pokina au namauri haeamona wai abomimo katomaui paunai. <sup>20</sup> Wapu weiana kemai aonai wai kato'jobina au hanona Hama'u aonai, wai hanona au ao'uai, ihobona mo au hanona wai aomiaia. <sup>21</sup> Hau ha au e'u rauhuhu 'abikia nia'i taeanakia mai nibabua 'aunakia hauna hanona au niraona'au aina'u, ia au niraona'au aina'u hauna Hama'u kehore ia keraona'au aina. Ba au abomo ia karaona'au aina, mai ia herenai kawaira tina.”

<sup>22</sup> Iuda Isakariote hauna aha'i ia Iuda haeai ha hauna Iesu ebakaina etibaha, “Obiapaka e, aehoma buonai ai mo heremaiaia kowaira tina, ia hanopaka haukia herekiaia hanona a'i kowaira tina?” <sup>23</sup> Iesu Iuda ena 'abi ebamuena etibaha, “Hau ha au niraona'au aina'u hauna e'u ba'iohi 'abikia kebabua 'aunakia, Hama'u kehore ia keraona'au aina, haeamona au mai Hama'u ohi katamai herenai kipokia katamiaho. <sup>24</sup> Hau ha au a'i niraona'au aina'u hauna hanona e'u 'abi a'i nibabua 'aunakia. 'Abi neiakia aiakia tuo'o haukia hanona au kipo'u e'u 'abi aha'i ia Hama'u euhuna'u hauna ena 'abi.

<sup>25</sup> “Au wai kipokia hamiaho oioi aonai taba neiakia hanona aba ahinanakia heremiai. <sup>26</sup> 'A Baraibarai hauna Auba Robe, au ata'uai Hama'u keuhuna hauna kehore taba ikoikia keba'iohinimi, mai 'abi weiakia ikoikia ahina haukia kebaraona tinanimi.

<sup>27</sup> “Baibua wai heremiai nahabona. Au e'u baibua wai nabenimi, weiana hanona hanopaka 'euna nibaibeni hauna 'abana aha'i. Aomi a'i kearo'ari mai a'i katota'u. <sup>28</sup> Wai a'abi au kahabonimi hanona aia'u aba to'ona, ia haeamona kamue kamai heremi. Wai au turaona'au aina'u raninai, au naeao Hama'u herena hanona aomi kenamo pokina ia hanona etarahi ba au. <sup>29</sup> Au taba neiakia bariu aba naba'iohi 'uainimi ba muriaia katerama, ba weiakia katerama aonai wai hanona aba katoa'ikakauma.

<sup>30</sup> “Au wai kipokia a'i kaha'abi'abi homa'ana pokina hanopaka neiana nipoki

aina hauna aba nimai. Ia hanona au here'u ai ena hiabu aha'i, <sup>31</sup> ia hanopaka ke'jobina, au hanona Hama'u naraona'au aina mai Hama'u ena 'abi ihobonai au nababaina. Tomikiri hamaka'a.”

## 15

### *Iesu Hanona Bine Matiuna Tohana.*

<sup>1</sup> Iesu e'abi etibaha, “Au hanona bine matiuna toha'u, ia Hama'u hanona haharua poki hauna. <sup>2</sup> Ia nihore au re ikoikia aha'uai a'i tebua'a haukia hanona nikabe obonakia mai re weiakia tebua'a haukia ikoikia ia nihore nirorinakia katemahamaha weiana buakia bo'ona katehore ahinakia. <sup>3</sup> Wai hanona 'abi neiakia ahinabe ainimi haukia paukia aba tomahamaha. <sup>4</sup> Wai au ao'uai katomiaho, au abomo wai aomiaia kemiaho. Re kipona a'i kebua'a 'abaea, ia re hanona bine matiuna ahanai kekomo 'au harai hanona kebua'a. Weiana ihobonai mo wai au hau'uai a'i katokomo 'au harai hanona buami a'i katerama.

<sup>5</sup> “Au hanona bine matiuna wai hanona rena. Hau ha au ao'uai, mai au ia aonai namiaho hauna hanona buabua bo'okia kebaramanakia, au katohabona'u raninai wai taba ha katobabaina hanona a'i ketaina. <sup>6</sup> Hau ha au ao'uai a'i kemiaho raninai, ia hanona katene'ena re 'abana ke'ororo. Ba re uahomakia hanona katebararonakia iruba aonai katekapo totonakia weia kate'ara.

<sup>7</sup> “Wai au ao'uai katomiaho mai e'u 'abi wai aomiaia katemiaho raninai tonuataeai tabakia katonoiia haukia ikoikia Hama'u kehore kebenimi. <sup>8</sup> Wai buabuami katebo'o au i'aba'u haumi ai katoao raninai Hama'u ena nuabi kewaira tina. <sup>9</sup> Hama'u au niraona'au aina'u ihobonai, au abomo wai ua naraona'au aihonimi. Bariu hanona e'u raona'au aonai katomiaho. <sup>10</sup> Au Hama'u ena rauhuhu 'abikia ababua 'aunakia paunai ena raona'au aonai namiaho, ihobonai wai e'u rauhuhu 'abikia katobabua 'aunakia raninai, wai abomo au e'u raona'au aonai katomiaho. <sup>11</sup> Au 'abi neiana aba ahinabe ainimi buonai e'u aonamo hanona wai aomiaia kemiaho, weianai emi aonamo hanona keapa'ua harai. <sup>12</sup> Au e'u rauhuhu 'abina hanona neiana. 'Abami ha ha katoraona'au ainakia ihobona mo au wai araona'au ainimi 'abana. <sup>13</sup> Hau ha ena raona'au keapa'uana ki'a baha ena hau herekiaia raninai, ena mauri kebaibeni



ia paukiai. <sup>14</sup> Au taba a'uahina hauna katobabaina raninai, wai hanona au e'u hau. <sup>15</sup> Bariu keaoaina aonai au a'i kapari muenimi ta'ara'i haumi, pokina ta'ara'i hauna hanona ena poki hauna taba nibabaina hauna ia a'i e'iobina. Ia au wai napaninimi e'u hau, pokina taba Hama'u herenai a'iobi haukia aba aba'iobinimi.

<sup>16</sup> "Wai au a'i totina'ana'u 'a au wai atina'aniami mai a'itaeanimi weiana katoao buabuami katobarama, buabua weikia katemiaho banaibanai. Ba taba au ata'uai katonoi ainakia haukia Hama'u kehore kebenimi. <sup>17</sup> E'u rauhuhu 'abina hanona neiana. 'Abami ha ha katoraona'au ainakia.

### *Hanopaka Haukia kate'oatanimi.*

<sup>18</sup> "Hanopaka haukia kate'oatanimi raninai, kato'iobina ia au te'oata 'uaina'u ba wai ti'oatanimi. <sup>19</sup> Wai hanopaka 'eunai katoao raninai, ia kehore keraona'au ainimi ihobona ia 'euna tohana. Ia wai hanona hanopaka 'euna aha'i. Ia au hanopakai atina'aniami paunai hanopaka nihore wai ni'oatanimi. <sup>20</sup> 'Abi heremiai ahina haukia katoraona 'ininakia, ta'ara'i hauna hanona ena poki hauna a'i etara haona. Au kateba haiarana'u raninai, wai abomimo kateba haiaranimi. Au e'u 'abi katebabua 'aunakia raninai wai abomimo emi 'abi katebabua 'aunakia. <sup>21</sup> Wai hanona au eu'u paunai hoahoa neiakia heremiai katebabainakia, pokina euhuna'u hauna a'i te'iobina.

<sup>22</sup> "Au a'i pamai a'i pahina benakia raninai ia hanona ekia ki'a behona peaha'i. Ia bariu ekia ki'a katebunina taearana hanona aba aha'i. <sup>23</sup> Hau ha au ni'oatana'u hauna hanona Hama'u abomo ni'oatana. <sup>24</sup> Au hoa neiakia hau ha a'i e'abai haukia a'i pababainakia ia baiatakiai raninai ia ekia ki'a hanona peaha'i. Ia bariu hanona hoa neiakia aba teihanakia, iamo au Hama'u ohi tararua ti'oatanamai. <sup>25</sup> 'A ia neiana tebabaina hanona 'abi weiana ekia rauhuhu pukana aonai tererena hauna katebatohana paunai, 'Ia au te'oata 'abaeana'u hanona ena poki aha'i.'

Sal 35:19; 69:4

<sup>26</sup> "Baraibarai hauna 'abi tohana Auba Robena, Hama'u herenai kemai kauhuna kewahi heremi, ba ia hanona au pou'u kehinana. <sup>27</sup> Weiana wai abomimo au

pou'u katohinana pokina kipokia popounai hamiaho emai mo bariu."

## 16

<sup>1</sup> Iesu ehina benakia etibaha, "Au 'abi neiakia ikoinai ahinanakia heremiai ena poki hanona emi a'ikakauma a'i me'akauma marikina. <sup>2</sup> Wai hanona mareai kateba karahinimi. 'Abi tohana beraura ha kemai aonai maearima katehore kateahu 'arinimi, ia kateraonana babai weiana hanona aba Tirama tibana-mona. <sup>3</sup> Taba neiakia katebabainakia heremiai pokina ia hanona Hama'u 'ao au a'i te'iobinamai. <sup>4</sup> Ia 'abi neiakia heremiai ahinanakia hanona ranina kemai aonai au aba'iobinimi 'abikia aba katoraona tinanakia.

### *Auba Robe Ena Aka.*

"Ia 'uainai hanona a'i ahina benimi pokina au wai kipokia hamiaho paunai. <sup>5</sup> 'A bariu au hanona aba naeao euhuna'u Tiramana herena, ia wai hau ha a'i nubakaina'u a'i notibaha, 'Oi hanona aeana nuao?' <sup>6</sup> Ia 'abi neiakia ahinanakia heremiai paunai aomi aoko'o mo ebonu. <sup>7</sup> 'Abi tohana mo au wai nahina benimi, au kaeao hanona wai namo katoa'ina. Pokina au a'i kaeao raninai baraibarai hauna a'i kemai heremi, iamo au kaeao raninai ia kauhuna kemai heremi. <sup>8</sup> Weiana ia kemai raninai hanopaka haukia ki'a, bero mai Tirama ena bakai taearana a'i te'iobina hauna keba'iobinakia. <sup>9</sup> Ia ki'a robana keahuna pokina maearima au a'i tia'ikakaumana'u. <sup>10</sup> Bero robana keahuna pokina au naeao Hama'u herena ba wai hanona au a'i katoiha muena'u paunai. <sup>11</sup> Bakai robana keahuna pokina hanopaka neiana obiana hauna aba bakai ea'ina puma nihoaina paunai.

<sup>12</sup> "Au hanona 'abi bo'ona temiaho wai pahina benimi, iamo katoa'inakia hanona a'i ketainimi. <sup>13</sup> Weiana 'abi tohana Auba Robena kemai raninai, ia kehore ke'uai ainimi 'abi tohana taearana ikoikiyai aokiai. Ia kipona ena nuataeai a'i ke'abi, ia taba niona hauna mo kehinana mai taba kerama hauna wai keba'iobinimi. <sup>14</sup> Ia kehore e'u nuabi kebawaira tinana pokina taba au here'uai kea'i haukia wai keba'iobinimi. <sup>15</sup> Hama'u ena taba ikoikiyai hanona au 'eu'u. Weiana buonai 'abi atibaha, Auba Robe taba 'eu'uai hauna

kea'ina wai keba 'iobinimi. <sup>16</sup> Rani papana aonai wai au a'i katoihana'u, ba rani papana murinai hanona wai au katoihana'u."

### *Aoko'o Mai Aonamo.*

<sup>17</sup> Ia i'abana haukia baika kipokia ba iatakiai tebakai bakai tetibaha, "Ni'abi netibaha, 'rani papana aonai a'i katoihana'u, ba rani papana murinai hanona wai au katoihana'u,' 'pokina au hanona Hama'u herena naeao,' 'abi weiana anina hanona taba?" <sup>18</sup> Ia kipokia te'abi 'abi tetibaha, "Rani papana anina hanona taba? Aika ia taba ne'uahina hauna obona a'i nahaobo."

<sup>19</sup> Iesu e'iobina i'abana haukia tenuatae katebakaina buonai ehina benakia etibaha, "E'u 'abi neiana, 'rani papana aonai a'i katoihana'u ba rani papana murinai wai au katoihana'u' hauna wai kipomi baiatamiai tubakai bakai aina, 'u? <sup>20</sup> 'Abi tohana au wai nahina benimi, wai hanona katohai mai aomi kehahai, iamo hanopaka maearimakia hanona kateonamo. Wai hanona aomi keaoko'o, ia emi aoko'o hanona kebaebo aonamoai keao. <sup>21</sup> Babi'e ha miori kebaramana raninai nihaiara pokina ena mauri ranina aba etaina, ia miori aba erama raninai ena haiara nirea 'iti'itina ia aona ninamo pokina miori ha aba erama hanopakai. <sup>22</sup> Ihobona uahomana bariu hanona emi aoko'o beraurana, ia au hanona wai kaiha muenimi weiana wai katoaonamo, ba hau ha emi aonamo weiana a'i kea'i parena. <sup>23</sup> Rani weiana kemai aonai wai hanona au here'uai taba ha a'i katobakai bakaiaina. 'Abi tohana au wai nahina benimi, tonuatae tabakia au ata'uai Hama'u katonoina hanona kebenimi. <sup>24</sup> Ata'uai a'i tonoi 'apua emai mo bariu. Wai katonoina hanona kebenimi katoa'ina, weiana emi aonamo hanona aomia kebonu 'auna.

### *Iesu Ehore Hanopaka Ehaohaina.*

<sup>25</sup> "Au ahina benimi 'abikia ikoinai hanona 'abi ibabatai ai ahinanakia, ia ranina kemai aonai au wai 'abi ibabatai ai a'i kahina benimi, ia Hama'u pouna kahina haraina. <sup>26</sup> Rani weiana aonai au ata'uai katonoi, ia au a'i na'abi Hama'u kanoina wai kebarainimi, <sup>27</sup> pokina Hama'u kipona wai niraona'au ainimi, weiana

wai au turaona'au aina'u, abomo au Tirama herenai amai hauna tubatohana'u paunai. <sup>28</sup> Au hanona Hama'u herenai ba amai hanopaka neianai namiaho, ia bariu hanona hanopaka nahabona namue naeao Hama'u herena."

<sup>29</sup> Weiana i'abana haukia tehina bena tetibaha, "Bariu emu 'abi hanona ea harai, 'uaina 'abi ibabataiai o'abi 'abana aha'i. <sup>30</sup> Bariu ai hanona oi a'i katabakai mueni'o, ba aba ta'iohina oi hanona taba ikoikiai o'iobinakia, weiana ai nuba a'ikakaumanamai oi hanona Tirama herenai omai."

<sup>31</sup> Iesu ekia 'abi eba muena etibaha, "Bariu mo muri 'akinai tua'ikakaumana'u, u? <sup>32</sup> Rani hanona nimai, ia aba ekara'au, weiana wai ikoimiai katorama otaraina, haha emi aiara katoao. Au katohabona'u kaikupai. Iamo au hanona a'i kaikupai, pokina Hama'u hanona au here'uai. <sup>33</sup> Au wai 'abi neiakiai aba ahina benimi, au wai kipokia kahabahamomo aonai baibua katoa'ina. Hanopaka neiana hanona kebatetuanimi, ia katonuako'o, au hanona hanopaka aba ahaohaina."

## 17

### *Iesu I'abana Haukia Mai A'ikakauma Haukia Ikoikiai Paukiai Ebahuba'ari.*

<sup>1</sup> Iesu 'abi neiana ehinana murinai, ea'a taea kupa eihana ba ebahuba'ari etibaha, "Hama'u e, rani aba ekara'au nahumu ena nuabi mobawaira tinana, ba nahumu abomo oi emu nuabi kebawaira tinana. <sup>2</sup> Pokina oi hiabu obena maearima ikoikiai ke'uai ainakia, maearimakia ikoikia weiakia oi ohore nahumu obena haukia mauri banaibanai kebenakia. <sup>3</sup> Mauri banaibanai hanona neiana, maearima oi kate'iobini'o, oi hanona ikupaiamu mo Tirama tohamu, abomo kate'iobina Iesu Keriso oi ouhuna hauna.

<sup>4</sup> "Aka obena'u kababaina hauna aba abaorena, ba emu nuabi hanopaka ahanai aba abaiha baihaina. <sup>5</sup> Hama'u e, nuabi weiana hanopaka a'i erama baha aonai heremuai hamiaho aina hauna ihobonai bariu wairamuai e'u nuabi mobawaira tinana.

<sup>6</sup> "Au atamu abawaira tinana maearima neiakia wairakiai, ia hanona oi 'eumu oi ohore au obena'u, ba ia emu 'abi aiana teka'aina. <sup>7</sup> Bariu ia aba te'iobina taba ikoikiai obena'u haukia

hanona oi heremuai temai. <sup>8</sup> Pokina 'abi weiakiai ohina bena'u haukia, ia aba'io binakia hanona tea'i taeanakia, ba te'io bina au hanona oi heremuai amai abomo tebatohana oi hanona au ouhuna'u.

<sup>9</sup> “Au ia paukiai nabahuba'ari. Au hanopaka maearimakia paukiai a'i nabahuba'ari, ia weiakia obena'u haukia paukiai, nabahuba'ari pokina ia hanona oi 'eumu. <sup>10</sup> Au 'eu'u haukia ikoikiai hanona oi 'eumu, oi 'eumu haukia ikoikiai hanona au 'eu'u, ba ia paukiai e'u nuabi ewaira tina.

<sup>11</sup> “Au hanona hanopaka nahabona ba kawahi oi heremu, 'a ia hanona hanopakai temiaho oho. Hama'u Robemu e, atamu weiana obena'u hauna hiabunai ko'aeabunakia weiana ia ketehamomo ihobona aika habahamomo 'abana. <sup>12</sup> Au ia kipokia tamiaho aonai a'ima harainakia oi atamu obena'u hauna hiabunai a'aeabunakia. Ha a'i e'akauma, 'a ke'akauma maearimana hamona hauna mo e'akauma, puka robena 'abina kebatohana paunai. <sup>13</sup> Au hanona bariu nawahi oi heremu, ia hanopakai namiaho oho aonai 'abi neiakia nahinanakia, weiana ia aokiai e'u aonamo maikoina katea'ina.

<sup>14</sup> “Emu 'abi aba abenakia ba hanopaka hanona aba ni'oatanakia, pokina au hanona hanopaka 'euna aha'i ihobona ia abomo hanopaka 'euna aha'i. <sup>15</sup> E'u noi hanona hanopakai a'i koa'i parenakia ia tiaporo herenai ko'aeabunakia. <sup>16</sup> Au hanona hanopaka 'euna aha'i ihobonai ia abomo hanopaka 'euna aha'i. <sup>17</sup> Emu 'abiai kobarobenakia emu maearima tohakiai kateao, emu 'abi hanona 'abi tohana. <sup>18</sup> Oi au ouhuna'u amai hanopaka maearimakia baiatakiai amiaho ihobona mo au ia auhunakia teao hanopaka maearimakia baiatakiai temiaho. <sup>19</sup> Ia paukiai au kipo'u abarobena'u oi 'eumu, weiana ia abomo kipokia kateba robenakia oi 'eumu.

<sup>20</sup> “Au e'u bahuba'ari hanona ia mo ikupaiahia ahakiai aha'i, ia ekia 'abiai au katea'ikakauma'u haukia ahakiai abomo nabahuba'ari. <sup>21</sup> Hama'u e, oi hanona au ao'uai mai au hanona oi aomuai, ihobonai ia ikoikiai hanona aokia

kehamona. Ia abomo katemai aika aokai weianai hanopaka maearimakia kate'io bina oi hanona au ouhuna'u. <sup>22</sup> Nuabi obena'u hauna aba ia abenakia, weiana oi mai au aoka ehamona ihobonai ia abomo aokia kehamona. <sup>23</sup> Au hanona ia aokiai mai oi hanona au ao'uai. Ba ia aokia kehamomo harai hanopaka maearimakia kate'io bina oi hanona au ouhuna'u, au oraona'au aina'u ihobonai oi ia abomo nuraona'au ainakia.

<sup>24</sup> “Hama'u e, au nanuatae weiakia obena'u haukia kipokia au ae'eai hanona ia abomo weia, ba ia weia e'u nuabi kateihana, nuabi weiana hanona hanopaka a'i obabai bahana aonai oi au oraona'au aina'u paunai obena'u hauna. <sup>25</sup> Hama'u bero haumu e, hanopaka maearimakia hanona oi a'i te'io bini'o, ia mo au hanona oi a'io bini'o mai e'u maearima neiakia te'io bina oi hanona au ouhuna'u. <sup>26</sup> Au hanona oi atamu aba'io binakia mai rani ikoinai kaba'io bi to'onakia, pokina emu raona'au here'uai hauna hanona ia herekiai abomo kemiaho, ba au abomo ia aokiai kamiaho.”

## 18

### *Iesu Tea'ina Tebirina.*

*(Mt 26.47-56; Mk 14.43-50; Lk 22.47-53)*

<sup>1</sup> Iesu ena bahuba'ari neiana ehinana epua murinai i'abana haukia kipokia Kidron tatairanai tekabanai teao Olibe haharuana aonai tekatoto. <sup>2</sup> Hinahina hauna Iuda abomo 'eka weiana e'io bina, pokina rani bo'ona Iesu mai i'abana haukia kipokia 'eka weianai teto'u. <sup>3</sup> Weiana Iuda ehore robe haukia apa'uakia mai Parisea haukia ekia miori weiakia marea robe teiha 'inina haukia mai huari haukia to'ukiai ebaka'anakia, imakia mai irubakia mai ramepakia abomo huari tabakia tea'i haharua weiana aonai tekatoto. <sup>4</sup> Iesu taba herenai katerama haukia ikoinai aba e'io bina, ua buonai ekahaha eao herekia ebakainakia etibaha, “Wai tai tutabuna?”

<sup>5</sup> Ia te'abi tetibaha, “Iesu Nasareta hauna.” Ba Iesu e'abi, “Au neia'u.” Hinahina hauna Iuda abomo weia kipokia tekoroti. <sup>6</sup> Iesu e'abi “Au neia'u.” raninai ia teta'u tehemue te'eho 'anoai tenoti.

<sup>7</sup> Iesu haemona ebakai muenakia etibaha, “Wai tai tutabuna?” Ba ia te'abi

mue tetibaha, “Iesu Nasareta hauna.”  
 8 Iesu ehina benakia etibaha, “Aba ahina benimi ‘au neia’u.’ Wai au tutabuna’u raninai, hau neiakia katohabonakia kateka’a.” 9 Babai neianai ena ‘abi ‘uaina ehinana hauna “Aba obena’u haukia ikoinai ha a’i aba’akaumana.” hauna ebatohana.

10 Simona Petero hanona mai ena kareba, ba weiana eberi ‘auna, robe haukia arakiai hauna ena ta’ara’i hauna haiana itipana ehara obona. Ta’ara’i hauna weiana atana hanona Malaku.  
 11 Weiana Iesu Petero e’abi pahihi bena etibaha, “Kareba naiana iutana ‘ekana i moutana. Haiara ‘erena neiana Hama’u ebena’u hauna a’i kainu, u?”

#### *Iesu Teaoaina Anna Herena.*

12 Weiana huari haukia ekia poki hauna kipokia mai Iuda haukia apa’uakia marea robe teiha ‘inina haukia kipokia Iesu tea’ina tebirina, 13 Anna herena teaoai ‘uaina, pokina Anna hanona Kaiafa rawana. Kaiafa hanona robe haukia ‘arakiai hauna ihau weianai.  
 14 Weiana ‘uainai Kaiafa ena raonai Iuda haukia apa’uakia ehina benakia etibaha, “Namona hanona hau hamona ke’ari maearima ikoikiai paukiai.”

#### *Petero Rani Kori’uaina Iesu Ebuniai aina.*

(Mt 26.69, 70; Mk 14.66-68; Lk 22.55-57)

15 Simona Petero mai Iesu i’abana hauna ha ohi Iesu murinai teao. I’abana hauna weiana hanona robe haukia arakiai hauna e’iobi haraina paunai ia hanona Iesu murinai robe haukia arakiai hauna ena itu parabuna aonai ekatoto.  
 16 ‘A Petero hanona ua’a pa’abi ‘akonai ebai’ima, i’abana hauna weiana robe haukia arakiai e’iobi haraina hauna emue emai pa’abi ne’imana uahona ehina bena, ba Petero ebatotona parabu aonai.  
 17 Pa’abi ne’imana uahona weiana Petero ebakaina etibaha, “Oi abomo hau weiana i’abana haumu ha, u?” Petero etibaha, “Au aha’i.” 18 ‘Ama ranina buonai ta’ara’i haukia mai marea robe teiha ‘inina haukia iruba teba’arana herenai tekoro i eraranakia haukia katehiabunakia. Petero abomo ia baiatakiyai iruba eraranakia.

#### *Robe Haukia ‘Arakiai Hauna Ehore Iesu Ebakaina.*

(Mt 26.59-66; Mk 14.55-64; Lk 22.66-71)

19 Rani weianai robe haukia ‘arakiai hauna Anna, Iesu herenai i’abana haukia mai ena ba’iobi ‘abikia ebakai bakai ainakia. 20 Iesu ia ena ‘abi ebamuena etibaha, “Au hanona rani ikoikiai mako wairakiai a’abi’abi, au rani ikoikiai Iuda haukia ekia to’u ‘ekakiai weia marea aokiai mai marea robe aonai aba’iobi, au ‘abi ha a’i abuni ‘apuana. 21 Aehoma buonai oi au nubakaina’u? Weiakia e’u ‘abi teona haukia mobakainakia, ia te’iobina au ‘abi tabana ahinana.”

22 Iesu ua e’abi aiho raninai weia marea robe teiha ‘inina hauna ha emikiri Iesu wairana ebo’ana etibaha, “Robe haukia ‘arakiai hauna ena ‘abi ua a’i kobamue aihona.” 23 Iesu e’abi etibaha, “Au ‘abi ha ahina ki’ana raninai, weiana hauna mohina karahina. Ia au ‘abi berona ahinana raninai taba buonai obo’ana’u?”

24 Weiana Anna ehore Iesu euhuna imana ibiri ‘ini eao Kaiafa robe haukia arakiai hauna herena.

#### *Petero Iesu Ebuniai ai Muena.*

(Mt 26.71-75; Mk 14.69-72; Lk 22.58-62)

25 Simona Petero hanona weia iruba herenai ekoroti erarana. Weiana tebakaina tetibaha, “Oi abomo ia i’abana haumu ha, u?” Ia ebuniai etibaha, “Au hanona aha’i.”

26 Robe haukia arakiai hauna ena ta’ara’i hauna haiana Petero ehara obona hauna hatia’ana ha ehore Petero ebakaina etibaha, “Weia haharua aonai oi Iesu kipokia aihanimi, u?” 27 Petero haeamona ebuniai mue aonai, kokoro’u beronai e’arara.

#### *Iesu Pilato Wairanai.*

(Mt 27.1, 2, 11-14; Mk 15.1-5; Lk 23.1-5)

28 Iuda haukia apa’uakia Iesu Kaiafa ena ituai tebakarahina tebaka’ana teaoaina Kabana hauna ena aka itunai. Kabana hauna hanona Romai emai. Weiana hanona aba rani nirerena ba Iuda haukia apa’uakia hanona Kabana ena itu aonai a’i tekatoto, pokina ia hanona ekia hoahoa tainai Tirama wairanai a’i kate’opu Kabanai tatuna aonai kateaniani paunai.  
 29 Ua buonai Pilato ekarahi eao herekia ebakainakia etibaha, “Hau neiana beho taba ebabaina buonai tomaiaina here’u?”  
 30 Ia ena ‘abi tebamuenta tetibaha, “Ia ki’a aha’i ebabaina raninai ai hanona ia a’i patamaiaina oi heremu.”

31 Pilato ehina benakia etibaha, “Wai kipomi tomoaoaina emi rauhuhu



ihobonai tomobabakaina.” Iuda haukia apa'uakia te'abi tetibaha, “Ai hau ha 'ariai katahorotina hanona emai rauhubuui hiabu uahomana aha'i.” <sup>32</sup> Neiana erama hanona Iesu ena 'abi ehinana hauna ia aea ke'ari aiho 'abina ketohana.

<sup>33</sup> Pilato ena aka itunai etoto ba Iesu eaparina, ebakaina etibaha, “Oi hanona Iuda haukia ekia obia 'arana, u?” <sup>34</sup> Iesu ia ena 'abi ebamuena etibaha, “Bakaibakai naiana hanona oi kipomu emu raonai nohinana, 'ao maearima baika au roba'u teahuna heremuai hauna nohinana?”

<sup>35</sup> Pilato Iesu ena 'abi ebamuena etibaha, “Ba oi nuraonana au hanona Iuda hau'u? Oi emu maearima tohakia mai robe haukia apa'uakia oi temaiaini'o here'u. Oi beho taba obabaina?”

<sup>36</sup> Iesu e'abi etibaha, “E'u obia 'ekana hanona hanopaka neiana 'eunai aha'i. Ia e'u obia 'ekana hanopaka neiana 'eunai raninai, e'u maearima pate'au aina'u, Iuda haukia apa'uakia imakiai patebamaurina'u, ia mo e'u obia aiarana hanona hanopaka neianai aha'i.” <sup>37</sup> Pilato ia ebakaina etibaha, “Oi hanona obia 'arana ha, u?” Iesu ia ena 'abi ebamuena etibaha, “'Abi mo naiana aba nohinana, au hanona obia 'arana ha, au arama amai hanopakai ena poki hanona 'abi tohana kabawaira tinana. 'Abi tohana tainai temiaho haukia hanona au aia'u kateona.” <sup>38</sup> Pilato e'abi etibaha, “'Abi tohana hanona taba?”

Ua e'abi aiho, ba ekarahi mue Iuda haukia apa'uakia ehina benakia etibaha, “Hau neiana herenai beho ha a'i atabu ahina.” <sup>39</sup> Weiana wai emi hoahoa tainai Kabanai tatuna ranina nitaina hanona wapura hauna ha nabakarahina heremi. Ba wai tonuatae Iuda haumi emi obia 'arana Iesu neiana kabakarahina, u?” <sup>40</sup> Weiana ena 'abi ioai tebamuena tetibaha, “Aha'i. Hau naiana aha'i. Ai tanuatae Baraba kobenamai.” Baraba hanona kakikaki hauna.

## 19

*Pilato E'abi Iesu Matiu Ibiriropo 'Ubinai Kateahu 'arina.*

*(Mt 27.15-31; Mk 15.6-20; Lk 23.13-25)*

<sup>1</sup> Weiana Pilato 'abi ebaibeni huari haukia Iesu tea'ina teaoaina te'atina. <sup>2</sup> Huari haukia 'ini boa boa tehao kaiarona ia aranai tebabau'una, abomo habuni birona ha ia tebatotona. <sup>3</sup> Weiana tekai

haha kai haha herenai te'abi tetibaha, “Iuda haukia ekia Obia 'arana e, komauri banai banai!” Ba wairana tebo'ana.

<sup>4</sup> Pilato haeamona ekarahi, Iuda haukia apa'uakia ehina benakia etibaha, “Tomobahu, au kahore wairamiai kabakarahina weianai kato'jobina herenai beho ha a'i atabu ahi 'apuna.”

<sup>5</sup> Weiana Iesu ekarahi aonai 'aranai 'ini boaboa ihao kaiaro tebabau'una mai habuni birona tebatotona ia haunai. Pilato ehina benakia etibaha, “Tomoihana, hauna neiana.”

<sup>6</sup> Robe haukia apa'uakia mai marea teiha 'inina haukia Iesu teihana raninai teio tetibaha, “Matiu ibiri ropo 'ubinau tomoahu 'arina, matiu ibiri ropo 'ubinau tomoahu 'arina!” Pilato ia ehina benakia etibaha, “Wai kipomi tomoa'ina, matiu ibiri ropo 'ubinau tomoahu 'arina, pokina au beho ha ia herenai a'i atabu ahina.” <sup>7</sup> Iuda haukia apa'uakia ia ena 'abi tebamuena tetibaha, “Ai hanona mai emai rauhubu. Rauhubu weiana tainai ia hanona ke'ari, pokina ia kipona Tirama nahunai nibaona.”

<sup>8</sup> Pilato aia weiana eona raninai eta'u banaina. <sup>9</sup> Pilato ena aka itunai ekatoto mue, Iesu ebakaina etibaha, “Oi ae'eai omai?” Ia Iesu 'abi ha a'i ehinana. <sup>10</sup> Weiana Pilato e'abi etibaha, “Oi noubo a'i kohina bena'u, u? Oi o'jobina au hanona mai e'u hiabu oi karubuni'o, 'ao matiu ibiri ropo 'ubinau kahu 'arini'o?”

<sup>11</sup> Iesu ia ena 'abi ebamuena etibaha, “Tirama hiabu oi a'i pebeni'o raninai oi au koahu 'arina'u hiabuna hanona heremuai aha'i. Ua buonai hau weiana imamuai eutana'u hauna ena ki'a hanona eapa'ua ki'a baha ba oi 'eumu.” <sup>12</sup> Rani weianai Pilato taeara etatu Iesu kerubuna. Ia Iuda haukia apa'uakia teio to'ona tetibaha, “Hau naiana korubuna raninai oi hanona obia 'arana Kaisa ena maearima aha'i. Hau ha ia kipona obia 'aranai nibaona hauna hanona Kaisa ni'oatana.”

<sup>13</sup> Pilato 'abi neiana eona raninai Iesu ebakarahina, ba ia hanona ena bakai 'ekana imia'aunai emiati, 'eka weiana atana teaparina hanona 'pihara panabana', Heberu maekiai atana hanona 'Gabata'. <sup>14</sup> Rani weiana hanona Kabanai tatuna ia'ia'i haraina ranina, be- raura hanona aba eatiaha, Pilato Iuda haukia ehina benakia etibaha, “Emi obia

'arana neiana tomoihana.” <sup>15</sup> Weiana ia teio tetibaha, “Tomoahu 'arina, tomoahu 'arina, matiu ibiri ropo 'ubinaí tomoahu 'arina!” Pilato ebakainakia etibaha, “Wai au tonuataena'u emi obia 'arana naiana kahu 'arina?” Robe haukia apa'uakia te'abi tetibaha, “Emai obia 'arana ha aha'i, Kaisa mo ikupaiana.” <sup>16</sup> Weiana Pilato ehore Iesu huari haukia imakiai eutana matiu ibiri ropo 'ubinaí kateahu 'arina. Ba huari haukia Iesu tebaka'ana teaoaina.

*Iesu Matiu Ibiriropo 'Ubinai Tekoko 'auna.*

*(Mt 27.32-44; Mk 15.21-32; Lk 23.26-43)*

<sup>17</sup> Kipona ena matiu ibiri ropo ebuana teao 'eka ha atana 'Ara 'ou'ouna', Heberu maeakiai hanona 'Golgota'. <sup>18</sup> Weia Iesu matiu ibiri ropo 'ubinaí tekoko 'auna, hau rua abomo tekoko 'aunakia ha abirai ha abirai, Iesu hanona ibuakiai.

<sup>19</sup> Pilato hanona marere ha weia matiu ibiri ropo 'ubinaí tekoko 'auna na erere aihona,

'IESU NASARETA HAUNA, IUDA HAUKIA EKIA OBIA 'ARANA.'

<sup>20</sup> Iuda haukia bo'okia marere weiana tetuabina, pokina Iesu tekoko 'auna 'ekana mai Ierusalem aiarana hanona baiatakiai a'i eatau'ai ki'a baha. Abomo marere weiana hanona Heberu maeakiai, Roma maeakiai mai Helene maeakiai tererena. <sup>21</sup> Weiana Iuda haukia ekia robe haukia apa'uakia Pilato tehina bena tetibaha, “'Iuda haukia ekia Obia 'arana' a'i porerena. Ia na porere aihona, 'Kipona e'abi, Au hanona Iuda haukia ekia Obia 'arana.'”

<sup>22</sup> Pilato ekia 'abi ebamuena etibaha, “'Abi na aha'i, aba arere 'auna hauna uahomana mo kemiaho.”

<sup>23</sup> Huari haukia Iesu tekoko 'auna murinai ena habuni tea'ina tetapa banina haha puakia tea'i. 'A ena habuni ibatoto aonai hauna hanona itaiore aha'i, maikoina hanona 'ubinaí tetaina emai mo ba'ai epua. <sup>24</sup> Huari haukia kipokia te'abi'abi tetibaha, “'A'i kahatapana ia pu'iai kaha'ioibina tai kea'ina.” Na erama aiho hanona Puka robenai tererena 'abina weiana,

“Ia e'u habuni tewatena,  
e'u ibatoto hanona tepu'i aina”

Sal 22.18

hauna ketohana. Ba huari haukia hanona babai neiana tebabaina.

<sup>25</sup> Matiu ibiri ropo herenai tekoroti babi'ekia hanona Iesu hinana mai hinana hatina, ba Maria Klopa atawana mai Maria Magadala babi'ena. <sup>26</sup> Iesu hinana mai i'abana eraona'au aina hauna weia tekoroti eihanakia, ba hinana ehina bena etibaha, “Hina'u e, nahumu naiana.” <sup>27</sup> I'abana hauna herenai abomo ehina bena etibaha, “Aia'u mona, hinamu naiana.” Rani weianai eaoaina i'abana hauna weiana ehore Maria ebaka'ana ena ituai temiaho.

*Iesu Ena 'Ari.*

*(Mt 27.45-56; Mk 15.33-41; Lk 23.44-49)*

<sup>28</sup> Weiana murinai Iesu e'ioibina aka ikoinai aba ebaorenakia, ba Puka robenai 'abina kebatohana buonai e'abi etibaha, “'Ako'u ni'ororo.” <sup>29</sup> Puou ha weia bine beina mabinai tebabonuna, ba poame ha tea'ina bine beina mabina aonai tehao uhuna, ba hiriboai tebiri 'auna, tetiu taeana eao pinana haianai. <sup>30</sup> Iesu bine beina manoina einu murinai e'abi etibaha, “'Aba eore.” Ba 'ekuna enobo, e'ari baihana.

*Iesu Robuna Tekairuruna.*

<sup>31</sup> Bariu hanona a'ia'i harai wapuna ia mara hanona Kabanai tatuna, a'i kenamo 'ari haukia weia matiu 'ubinaí katemiaho keao mo mara buonai, Iuda haukia apa'uakia Pilato tenoina, matiu 'ubinaí tekoko 'aunakia haukia aekia huriakia kateahu hurinakia hauanikia katea'i obonakia. <sup>32</sup> Weiana huari haukia teao, Iesu kipokia tekoko 'aunakia haukia herekiai, ba hau kori'uaina aena huriakia teahu hurinakia, haeamona teao 'abana ha herenai aena huriakia teahu hurinakia. <sup>33</sup> Ia teao Iesu herenai teiha 'ioibiaina aba e'ari hanona aena huriakia a'i teahu hurinakia. <sup>34</sup> Huari hauna ha ehore Iesu robuna arawai ai ekai ruruna, beronai mo aruaru mai bei tekiki oioi. <sup>35</sup> Mahanai eihana hauna 'abina aba ehinana, ia ena 'abi neiana hanona tohana, ia e'ioibina ehinana hauna hanona tohana, ba wai ia ebatohana hauna kato a'ikakaumana. <sup>36</sup> Aka nejana erama hanona Puka robenai 'abina “Huriana ha hamona a'i tebamohu 'apuana.” hauna ebatohana. <sup>37</sup> Puka robenai ha haeamona e'abi etibaha, “Maearima robuna tekai ruruna hauna kateihana.”

*Iesu Hauanina Tehorena.**(Mt 27.57-61; Mk 15.42-47; Lk 23.50-56)*

<sup>38</sup> Iosepa Arimatea hauna abomo Iesu i'abana hauna ha, iamo kipona a'i ebawaira tinana pokina Iuda haukia apa'uakia eta'u ainakia. Taba weiakia murikiai ia eao Pilato herena enoi Iesu hauanina kea'i obona. Ba Pilato ena 'abiai Iosepa eao Iesu hauanina ea'i obona.

<sup>39</sup> Nikodemo 'uainai rabi ha eao Iesu herena hauna abomo Iosepa e'abana wapaea mai to'ore muramura timikia taburakia rua te'utenakia hauna ea'ina eaoaina, ena puma hanona kilogram harau aihau 'abana.

<sup>40</sup> Weiana ia terarua Iesu hauanina tea'ina muramurai teutuna mai habuni namona 'ari haukia tiapanakia haunai teapana, Iuda haukia ekia 'ari haukia tia'ia'i harainakia akana ihobonai tebabaina.

<sup>41</sup> Iesu teahu 'arina 'ekana herenai hanona haharua ha, haharua weiana aonai 'ariahana mahamahana ha, aonai hanona 'ari hauna ha a'i tihore bahana.

<sup>42</sup> Ba Iesu hanona weia tehorena, pokina 'ariahana weiana hanona herekiai abomo rani weiana hanona Kabanai tatuna a'ia'i haraina ranina.

**20***Iesu 'Ariai Emikiri Mue.**(Mt 28.1-8; Mk 16.1-8; Lk 24.1-12)*

<sup>1</sup> Wapu kori'uaina Hui raurani wapurani Maria Magadala babi'ena eao 'ariahana keihana, mahana eao 'uri teka-iabuna piharana aba tea'i parena eihana.

<sup>2</sup> Ia ebeau emue Simona Petero mai i'abana ha Iesu eraona'au aina hauna herekia e'abi etibaha, "Weiakia Obiapaka 'ariahanai aba tea'i parena, ai a'i ta'iohina 'eka tabanai tehorotina."

<sup>3</sup> Weiana Petero mai i'abana hauna ha temikiri 'ariahana teao.

<sup>4</sup> Terarua tebeau haeamona teao ba ha ehore Pereto ebeau haona e'uai eao 'ariahana.

<sup>5</sup> Ia a'i etoto iamo 'uri 'akonai eriba toto, habuni namokia 'anoai tenoti haukia eihanakia.

<sup>6</sup> Simona Petero murihai ebeau emai beronai eao 'ariahana 'urina aonai etoto, habuni namokia tenoti haukia eihanakia.

<sup>7</sup> Abomo habuni ha Iesu 'arana te'apana hauna hanona iou harai habuni namokia kipokia a'i tenoti haeamo, ia 'eka haeai enoti.

<sup>8</sup> Weiana aonai i'abana ha 'ariahanai ekara'au 'uai hauna etoto eao

eihanakia ba ea'ikakauma.

<sup>9</sup> Iamo Puka robena 'abina 'Ia hanona 'ariai kemikiri mue' hauna obona a'i tiobo baha.

*Iesu Hanona Maria Magadala Herenai Ewaira Tina.**(Mt 28.9, 10; Mk 16.9-11)*

<sup>10</sup> Ba i'abana haukia rua temue ekia itu teao.

<sup>11</sup> Maria hanona 'ariahana haianai ekoroti ehai, ehai aonai eriba toto 'ariahana aona eihana.

<sup>12</sup> Weiana ia aneru rua habuni porekia tebatotonakia eihanakia, Iesu hauanina tehorotina 'ekana temiati, ha hanona aena tainai ha hanona 'arana tainai.

<sup>13</sup> Ia tebakaina tetibaha, "Babi'e e, taba nuhai aina?" Ia e'abi etibaha, "E'u Obiapaka aba tea'i parena, 'ekana a'i a'iohina ae'eai tehorotina."

<sup>14</sup> Ua e'abi aiho ba ekori kabe hanona Iesu weia ekoroti eihana, ia a'i e'iohina weiana hanona Iesu.

<sup>15</sup> Iesu ia ebakaina etibaha, "Babi'e e, taba nuhai aina? Tai nutabuna?" Maria eraonana ia hanona haharua i'imana hauna ha, ba e'abi etibaha, "Obiamu e, oi ia oaoaina ae'eai ohorotina hanona au moba'iohina'u. Ba au kaeao ka'ina."

<sup>16</sup> Iesu eapari, "Maria e!" Maria ekori kabe, Heberu maeana e'abi etibaha, "Raboni!" ('Abi neiana anina hanona 'ba'iohi haumu.)

<sup>17</sup> Iesu Maria ehina bena etibaha, "A'i koa'i 'inina'u, pokina a'i nakara'au baha hama'u herena. Ia koao 'uahoaba'u kohina benakia, au hanona kakara'au au hama'u mai wai hamami abomo e'u Tirama mai emi Tirama herena kaeao."

<sup>18</sup> Weiana Maria Magadala babi'ena eao i'abana haukia ehina benakia ia Obiapaka eihana, haeamona Iesu 'abi ehinana haukia ia ehina benakia.

*Iesu I'abana Haukia Herekiai Ewaira Tina.**(Mt 28.16-20; Mk 16.14-18; Lk 24.36-49)*

<sup>19</sup> Rani weiana hamonai wapu kori'uaina Hui beraura ekaihuna aonai, i'abana haukia ikoinai 'eka hamonai teto'una, itu pa'abina tekaiabunakia, pokina Iuda haukia apa'uakia teta'u ainakia. Ba Iesu eao baiatakiai ekoroti ehina benakia etibaha, "Baibua heremai kemiaho."

<sup>20</sup> 'Abi neiana ehinana murinai imana rua mai robuna ebaihanakia, I'abana haukia Obiapaka teihana buonai teonamo ki'a.

<sup>21</sup> Iesu haeamona ehina

benakia etibaha, “Baibua heremiai kemi-aho. Hama'u au euhuna'u ihobonai, au abomo wai nauhunimi.” <sup>22</sup> Ua e'abi aiho murinai maeabuna ebahi benakia, e'abi etibaha, “Wai Auba Robe tomoa'ina. <sup>23</sup> Maearima ekia ki'a katohina hao raninai ekia ki'a hanona ihina haoai kateao, ia ekia ki'a a'i katohina hao raninai ekia ki'a ihina hao aha'i.”

### *Toma Iesu Eihana.*

<sup>24</sup> I'abana haukia harau haea rua ha atana Toma, tiaparina bai'apaea, Iesu to'u weiana herekiai ewaira tina rabinai ia hanona weia baiatakiai aha'i. <sup>25</sup> I'abana haukia baika ia tehina bena tetibaha, “Ai Obiapaka taihana.” Ia Toma ehina benakia, “Au ikoko mani'akia imanai haukia kaihanakia haeamona ia robunai ima'u katiu totona, uahomana aha'i raninai au hanona ia a'i ka'ikakaumana.”

<sup>26</sup> Wapu 'ababani teao murinai i'abana haukia itu aonai teto'u mue, Toma abomo weia ia kipokia. Pa'abi tekaiabu 'inina. Iamo Iesu hanona eao ia baiatakiai ekoroti e'abi etibaha, “Baibua heremiai kemi-aho.” <sup>27</sup> Ba ia Toma ehina bena etibaha, “Imamu riuriuna emai ima'u neiana moa'i 'apuana, abomo imamu emai robu'uai motiu totona, weiana aomu a'i kekai'au kai'au ia koa'ikakaumana'u.” <sup>28</sup> Toma Iesu ena 'abi ebamuenā etibaha, “Oi hanona e'u Obiapaka, au e'u Tirama!”

<sup>29</sup> Iesu ia ehina bena etibaha, “Aba oihana'u buonai nua'ikakaumana'u. Ia weiakia a'i teihana'u iamo tia'ikakaumana'u haukia hanona tenamo.”

### *Puka Neiana Ena Poki.*

<sup>30</sup> Iesu hiabu hoakia bo'ona i'abana haukia wairakiai ehabainakia haukia hanona puka neiana aonai a'i arere 'aunakia. <sup>31</sup> Ia neiakia mo arerenakia ena poki hanona wai katoa'ikakauma Iesu hanona Keriso, Tirama Nahuna. Weiana ia kato a'ikakaumana hanona atanai mauri katoa'ina.

## 21

### *Iesu I'abana Haukia 'Abaihau Hamomo Herekiai Ewaira Tina.*

<sup>1</sup> Weiana murinai, Iesu Tiberia\* obunai i'abana haukia herekiai ewaira tina mue, na ebawaira tina aihona. <sup>2</sup> Simona Petero, Toma tiaparina bai'apaea, Natanaela

Galilea Kana hauna, Sebedeo nahuna rua, mai i'abana haukia rua abomo weia kipokia 'eka hamonai temiaho. <sup>3</sup> Simona Petero ehina benakia etibaha, “Au aba naeao kaba'eha.” Ia tetibaha, “Ai abomo kipokia hamaeao.” Weiana teao ahiai tehe'au, ia rabi weiana aonai hanona maia ha a'i tebarewana.

<sup>4</sup> Rani nirerena aonai Iesu hanona poe haianai ekoroti, ia i'abana haukia a'i te'iobina weiana hanona Iesu. <sup>5</sup> Ba Iesu ebakainakia etibaha, “E'u hau e, taba ha tobarewana?” Ia te'abi tetibaha, “Taba ha aha'i.” <sup>6</sup> Iesu haeamona ehina benakia etibaha, “Emi re'e ahi itipana'i tomohorena, ba maia baika katobarewanakia.” Weiana tebabaina aonai re'e kateberi 'auna hanona a'i etainakia, pokina maia ebo'o ki'a baha.

<sup>7</sup> Ba Iesu i'abana hauna weiana eraona'au aina hauna ehore Petero ehina bena etibaha, “Weiana hanona Obiapaka.” Simona Petero hanona ena habuni ebakuri ahina eba'eha, ba 'abi neiana 'Ia hanona Obiapaka' hauna eona raninai emikiri ena habuni ehaina beronai obu'ai etobu. <sup>8</sup> I'abana haukia baika hanona ahiai re'e mai maiana ebonu hauna teberi ririna teoaina poe, pokina poe hanona a'i ehoma'a roba hinabu hamomo 'abana.

<sup>9</sup> Ia poeai tekara'au raninai mahakia eao iruba baubaeana ahanai maia ihore'au teihanakia, parawa baika abomo weia. <sup>10</sup> Iesu ia ehina benakia etibaha, “Maia bariu toa'inakia haukia baika tomā ainakia.” <sup>11</sup> Simona Petero emue ahiai ekara'au re'e eberi'auna poeai, re'e aonai maia rarikia mo 'abaeana ikoinai hinabu hamomo imabui aihau, maia rarikia 'abaeana ia ekia re'e hanona a'i etapa.

<sup>12</sup> Iesu ia eaparinakia etibaha, “Tomai, tomoaniani!” Ba i'abana haukia ia katebakaina, ‘Oi tai?’ hauna a'i tenuatae, pokina aba te'iobina ia hanona Obiapaka. <sup>13</sup> Iesu eka'a haha eao herekiai parawa ea'ina ba ebenakia, ihobonai maia abomo ua ebabai aihona.

<sup>14</sup> Neiana hanona Iesu 'ariai emikiri mue murinai rani ibaihauna kipona i'abana haukia herekiai ewaira tina.

### *Iesu Mai Petero.*

<sup>15</sup> Teaniani murinai Iesu Simona Petero ebakaina etibaha, “Simona Ioane nahuna

\* 21:1: (1) 'ao Galilea



e, oi emu raona'au here'uai eapa'ua ki'a baha ba neiakia ekia raona'au, u?" Petero etibaha, "E, Obiapaka, o'iobina au 'arimu na'ari." Ba Iesu e'abi etibaha, "E'u mamoe nahu ko'ima harainakia."

<sup>16</sup> Rani ibaruana ebakai muena etibaha, "Simona Ioane nahuna e, oi au nuraona'au aina'u, u?" Petero etibaha, "E, Obiapaka, o'iobina au oi 'arimu na'ari." Ba Iesu e'abi etibaha, "E'u mamoe ko'ima harainakia."

<sup>17</sup> Iesu rani ibaihauna Petero ebakaina etibaha, "Simona Ioane nahuna e, oi au 'ari'u nu'ari, 'u?" Petero aona ehai hai pokina aba rani aihau ebakaina etibaha, "Oi au nuraona'au aina'u?" Weiana Petero e'abi etibaha, "Obiapaka e, oi hanona taba ikoinai o'iobinakia, o'iobina au oi 'arimu na'ari." Iesu etibaha, "E'u mamoe kobanianinakia."

<sup>18</sup> 'Abi tohana au oi nahina beni'o, 'aru'arumuai raninai oi kipomu emu habuni obatona abomo emu nuatae 'ekana ae'eai hanona oao. Ia koanepaka raninai imamu kotiu ahinakia, hau ha kehore emu habuni kebabatoni'o, keaoaini'o a'i nonuatae aina 'ekana.

<sup>19</sup> Iesu 'abi neiana ehinana hanona Petero aea ke'ari aiho Tirama ena nuabi kebawaira tinana. Ba ehina bena etibaha, "Muri'uai omai."

### *Iesu I'abana Eraona'auai Ki'a Bahana Hauna Ena 'Abi.*

<sup>20</sup> Petero eihā kabe hanona Iesu i'abana niraona'au aina hauna eihana, ia hanona ani to'uai Iesu haunai ekape'au, ba ebakaina etibaha, "Obiapaka e, tai oi hinahinamu kehinahina?" <sup>21</sup> Petero hau weiana eihana raninai Iesu ebakaina etibaha, "Obiapaka e, hau weiana hanona aea keho?" <sup>22</sup> Iesu ehore Petero ehina bena etibaha, "Panuatae ia pemiaho peaomo au pamue pamai, iamo oi emu aka hanona taba ia herenai? Oi hanona muri'uai omai." <sup>23</sup> 'Abi neiana paunai i'abana haukia kipokia baiatakiai te'abi'abi aina, i'abana hauna weiana a'i ke'ari na ehoma. Iamo Iesu hanona ua a'i e'abi aiho hau weiana a'i ke'ari, 'a ia e'abi, "Panuatae ia pemiaho peaomo au pamue pamai, iamo oi emu aka hanona taba ia herenai?"

<sup>24</sup> I'abana hauna weiana ehore 'abi neiakia ikoinai ehinanakia haeamona ererenakia, ba ha'iobina 'abi neiakia ehina haukia hanona tohakia.

<sup>25</sup> Iesu hanona hoa bo'ona 'akina ebabainakia. Au naraonana weiakia ikoikiai hamohamo temerere 'aunakia raninai, hanopaka maikoinai puka neiakia patebararonakia hanona 'ekana aha'i.

## IUHUBEAU EKIA AKA

### *Puka Aona Irerena 'Abina*

Puka neiana hanona Pou namona Luka ererena hauna murinai ererena. Puka neiana aonai kahaihana hanona Auba Robe ehore iuhubeau haukia taeara kateka'aina hauna ebaihanakia, weiana ia tehore Iesu pouna namona teiroro aina Ierusalem mai Iudeai mai Samariai mai hanopaka puana 'eka baika herekiai (1.8). Puka neiana hanona Keriso ena maearima to'ukia robakia eahuna, weiana Iuda haukia kipokia baiatakiai ea'i ramana, ba eapa'ua raninai, hanopaka maearima ekia a'ikakaumi eao. Luka hanona Keriso ena mauri robana eahu haraina mai ia murinai te'au haukia abomo, weiana hanona Keriso ehore Tirama ena 'abi'uai aba'uainai Isaraela haukia ebenakia hauna maikoina ebatoha haraina.

Puka neianai taba apa'uana ha robana eahuna weiana hanona Auba Robe ena aka, ia eriri emai iuhubeau haukia herekiai, ba e'uai ainakia mai ebataburanakia. Taeara neianai Pou namona tea'i taeara, a'ikakauma haukia ekia bo'o hanona eapa'ua. Puka neiana aonai hanona iuhubeau haukia bo'ona orikia, haemona Petero mai Paulo ekia aka tebabai 'abikia hanona tebo'o. Petero hanona iuhubeau hauna mai ia hanona Iesu e'abana. Iamo Paulo hanona uahomana aha'i. Kori'uainai Paulo ebatabura Iesu ena maearima kea'i ki'anakia. Iamo Iesu ia eaparina aonai eraona kabe, ba ta'ara'i haunai eao Iesu ena aka mo ebabainakia.

### *Puka Paipana Apa'uakia*

- a. Ba'oru 'abi tohana ihina pou. (1.1-26)
  1. Iesu ena 'abi mai 'abi'uai orekia. (1.1-14)
  2. Iuda 'ekana ia'ina hauna ha ia'i taea. (1.15-26)
- b. Ierusalem 'abi tohana ihina pou. (2.1-8.3)
- c. Iudea mai Samariai 'abi tohana ihina pou. (8.4-12.25)
- d. Paulo ena aka maearima herekiai. (13.1-28.31)
  1. Iroro akana harimana kori'uaina. (13.1-14.28)
  2. Ierusalem to'u 'abi'abina. (15:1-35)

3. Iroro akana harimana ibaruana. (15.36-18.22)
4. Iroro akana harimana ibaihauna. (18.23-21.16)
5. Paulo wapura hauna Ierusalem, Kaisareai, mai Romai. (21.17-28.31)

### *Iesu E'abi'uai Auba Robe Keuhuna Kemai.*

<sup>1</sup> Teofilo e, e'u puka 'uaina aonai Iesu ena aka mai ena ba'iobi ea'i ramanakia haukia, <sup>2</sup> emai mo ea'i taea kupa keo ranina pouna ikoikiai arerenakia. Ai ea'i taea baha aonai, Auba Robe hiabunai ena iuhubeau ia etina'anakia herekiai aka kate babainakia haukia robakia eahunakia. <sup>3</sup> Ena 'ari murinai, katebatohana ia hanona emauri toha paunai wapu bariabui aonai ia kipona rani bo'ona ewaira tina maearima wairakiai, abomo wairakiai Tirama ena obia aiarana pouna ehinana. <sup>4</sup> Rani ha ekia miato'uai Iesu 'abi neiana ebenakia etibaha, "Ierusalem a'i katohabona, ia Hama'u e'abi'uai aina Auba Robena kato'imana, 'abina weiana au wai aba ahina benimi. <sup>5</sup> Ioane hanona beiai maearima eba'uere robenakia, 'a wapu a'i kebo'o aonai wai hanona Auba Robe ai kato'uere robe."

### *Iesu Ekara'au Kupa Eao.*

<sup>6</sup> Iesu i'abana haukia kipokia teto'u raninai ia tebakaina tetibaha, "Obiapaka e, bariu rani neianai Isaraela hanopakana ena hiabu kobeni muena, u?" <sup>7</sup> Iesu ekia 'abi ebamuena etibaha, "Rani mai wapu hanona Hama'u kipona ena hiabu ai aba eba'orunakia, wai emi bero aha'i taba neiana aita kerama hauna kato'iobina. <sup>8</sup> 'A Auba Robe keriri wai ahamiai raninai hiabu katoa'ina, au pou'u katohinahina otaraina Ierusalem, Iudea mai Samaria aiarakia maikoinai, abomo keaomo hanopaka puana."

<sup>9</sup> Iesu 'abi neiana ehinana murinai, ia mahakia tohanai ea'i taeara ekara'au kupa eao teihana, ba 'auhao ha ia eka-iabuna, weiana ia ai teiha muena. <sup>10</sup> Ia kupai ekara'au 'ekana teiha 'ini'inina aonai, beronai hau rua habuni porekia tebatotonakia hanona ia tekori turinakia. <sup>11</sup> Ba tehina benakia tetibaha, "Galilea haumi e. Taba buonai neia tukoroti tua'a taea kupa toihana? Iesu bariu

heremiai ea'i taeana kupa eao hauna haeamona kemue kemai bariu ekara'au toihana ihobonai."

### *Iuhubeau Hauna Ha Tea'itaeana Iuda Ekanai.*

<sup>12</sup> Ba iuhubeau haukia Olibe oeonai teriri teao Ierusalem, 'eka weiakia baiatakia ena homa'a hanona kilometa hamona 'abana. <sup>13</sup> Ierusalem ai tekatoto raninai temiaho aina ituna ikaihuri 'ubiai weiana hauna teao. Maearamakia atakia hanona neiakia, Petero, Ioane, Iakobo, Anderea, Pilipo, Toma, Batolomeo, Mataio, Iakobo Alepeo, Simona Selote hauna, mai Iuda Iakobo. <sup>14</sup> Ia ikoikiai tea'i to'u 'eka hamonai, babi'e baikia abomo ia baiatakiai mai Iesu hinana Maria mai hatina kipokia tebahuba'ari to'ona.

<sup>15</sup> Rani weiana a'ikakauma haukia 'abaeana haukia ikoinai hinabu hamomo harau rua teto'una, aonai wairakiai Petero emikiri ekoroti eirononakia. <sup>16</sup> Etibaha, "Uaho'aba'u e! Puka Robena 'abina kemai ketohana hauna Auba robe ehore Davida pinanai Iuda robana aba hamo eahu 'uaina Iesu ia'ina kateao haukia hanona ia ke'uai ainakia. <sup>17</sup> Iuda hanona 'abamai ha, pokina ia abomo etina'ana kipokia taka haeamo aka neiana aonai."

<sup>18</sup> (Iuda ena aka ki'a moninai hano ha tekawana, ba weia e'eho 'arana benu eao mo'oruna epou maikoina ekiki atapakai. <sup>19</sup> Ierusalem ai temiaho haukia ikoikiai pou neiana teona, ua buonai hano weiana atana teaparina 'Akeledama', maeakiai 'abi weiana anina hanona 'Aruaru Hanona'.)

<sup>20</sup> "Pokina Salamo pukanai aba irere'au etibaha,

'Ena itu hanona ke'oko.

Tai ha ua'a a'i kemiaho.'

Sal 69.25

Haeamona ererena,

'Ia 'ekana hanona hau ha kehore

kea'ina.'

Sal 109.8

<sup>21</sup> Ua buonai bariu hanona aika 'abaka ha baiatakai kipokia hamiaho Obiapaka Iesu ena kaoao maikoina eihana hauna mai <sup>22</sup> Ioane ena ba'uere robe eramana raninai emaimo Iesu ekara'au kupa eao hanona ia abomo ua'a hauna kaha'i taeana. Ai kipokia kataka haeamo Iesu ena mikiri mue pouna ihinanai."

<sup>23</sup> Weiana hau rua tenuatae ainakia ha katea'i taeana, ha atana Iosepa baikia tiaparina Barasaba haeamona tiaparina Iusto, mai ha hanona atana Matia. <sup>24</sup> Weiana ia tebahuba'ari tetibaha, "Obiapaka e! Oi hanona maearama ikoinai aokia o'iohina, hau neiakia teraru baiatakiai hanona aeana otina'ana hauna bariu kobaihanamai. <sup>25</sup> Ia hanona barabarai mai iuhubeau akana neiana Iuda ehabona hauna kebabaina, pokina Iuda hanona aba ekaobo ena 'eka tohana eao." <sup>26</sup> Ba tepu'i, aonai ata ewaira tina hanona Matia, ba iuhubeau haukia harau hae hamomo hanona ebaharau hae ruanakia.

## 2

### *Auba Robe Emai Pentekoste Raninai.*

<sup>1</sup> Pentekoste berauranai a'ikakauma haukia ikoikiai 'eka hamomonai teto'una.

<sup>2</sup> Weia kupai 'uru rarina ha biaimo emai ta'uainakia, matoha rani rarina ha eabu 'uruna 'abana, ia temia to'u ituna ebabonu 'auna. <sup>3</sup> Mai abonamo taba ha teihana ihana matoha iruba upana maeano 'abana eao ha ha kaipakia 'ubinai. <sup>4</sup> Ia ikoikiai Auba Robe ai aba tebonu, ba Auba Robe ebenakia ihobonai aiara haeai haeai maeakiai te'abi.

<sup>5</sup> Ua raninai Iuda haukia Tirama marikina temariki haukia hanopaka haeai haeai temiaho haukia temai Ierusalem. <sup>6</sup> 'Uru weiana teona raninai, 'eka hamomonai teto'una abomo to'u hanona rarina 'akina, to'u haukia tehaorea, pokina ha ha maeakia tohanai a'ikakauma haukia pou weiana tehinana hauna teona. <sup>7</sup> Ikoikia teta'u ta'u huri mai aokia tearo 'ari tetibaha, "Ai, neiakia ti'abi haukia hanona Galilea haukia, u? <sup>8</sup> Aehoma buonai aika ikoikai hanona haha maeaka tohanai ti'abi aiakia nahaona? <sup>9</sup> Aika hanona hanopaka haeai haeai ai hamai, Patia, Media, Elama ai, Mesopotamia, Iudea, Kapadokia ai, Ponto, Asia ai, <sup>10</sup> Furugia, Pamfulia ai, Aigupito ai abomo Kurene ai, ia hanona Libia ekia 'eka ha. Roma ai tamai haumai, baikia hana Iuda haumai baikia hana Iuda haukia aha'i ia kuti taaranai Iuda haukia tibaonakia haumai, <sup>11</sup> ai baikia hanona Krete mai Arabia ai tamai. Hau weiakia maeaka tohanai Tirama hoa apa'uana ebabaina hauna tehinana 'uruna haona." <sup>12</sup> Ikoikiai

teraona raona mai aokia a'i etaina, ia ha ha kipokia tebakai bakai tetibaha, "Neiana hanona taba?" <sup>13</sup> 'A baika hanona a'ikakauma haukia teiriri ainakia tetibaha, "Aba bia teinu 'ari."

*Petero Pentekoste Raninai Eiroro.*

<sup>14</sup> Weiana Petero mai 'abana harauhaea hamomo kipokia temikiri, ia aiana ebapa'uana eiroro benakia etibaha, "Iuda haumi mai Ierusalemia tomiho haumi e. Aia'u tomobahu bahu aina. Taba neiana aea erama aiho hauna pouna kaba'iobinimi. <sup>15</sup> Ai neiamai hanona a'i tainu 'ari, wai turaonana 'abana aha'i, abomo bariu hanona raurani beraura hoana 'ababani hamomo. <sup>16</sup> Ia mahabanai hauna loel na e'abi aiho etibaha,

<sup>17</sup> "Tirama etibaha, Hanopaka ena pua raninai, Au Auba'u hanona maearima ikoikia ahakiai kabakiki oioina. Nahumi hau haukia mai babi'ekia kateobero,

emi hau 'aru'arukia hanona katemahabanai, abomo emi anepaka katenibi.

<sup>18</sup> Haeamona rani weianai au e'u ta'ara ia'ina haukia mai babi'ekia ahakiai au Auba'u kabakikina weiana kateobero.

<sup>19</sup> Ta'u tabakia baika kupa 'ubinai kabawaira tinanakia, hanopaka ahanai abomo taba baika katerama, weiana aruaru, iruba abomo hiabu imukina.

<sup>20</sup> Obiapaka ena beraura apa'uana mai nuabina kekaibari raninai, beraura hanona kewapura abuna, nawa hanona kebiro

matoha aruaru 'abana.

<sup>21</sup> 'A Obiapaka atana kateaparina haukia katemaui.'

Iol 2.28-32

<sup>22</sup> "Isaraela haumi e, tomobahu aia'u tomona. Iesu Nasareta hauna hiabu akakia haeai haeai mai hoa akakia haeai haeai ebabainakia hanona Tirama ia aonai eaka, hoahoakia wai baiatamiai ua tewaira tina aiho haukia aba to'iobi harainakia. <sup>23</sup> Iesu neiana Tirama ena nuatae abomo ena 'iobi uai baha aba eba'oruna taearana wai ebenimi. Wai tohore maearima ki'a obokia imakiai toutana weiana matiu ibiri ropo 'ubinai tokoko 'auna toahu 'arina. <sup>24</sup> 'A Tirama

ehore ebamikiri muena 'ari ena haiara ikoinai ebapuanakia, pokina 'ari ia kea'i 'inina ua'a wapura 'ekanai hanona a'i etaina. <sup>25</sup> Davida abomo ia pouna ehinana etibaha,

'Obiapaka hanona rani ikoinai waira'uai aihana.

Pokina ia hanona au itipa'u tainai, a'i kaibiu 'apua.

<sup>26</sup> Ua buonai ao'u ena aonamo hanona eapa'ua ki'a baha.

Maea'u hanona aonamo 'abikia ehinanakia, hau'u hanona buabeni aonai kemiaho.

<sup>27</sup> Pokina auba'u hanona 'ari haukia ekia 'ekai a'i kohabona, abomo emu Robe hauna ua'a a'i kohabona a'i kepari.

<sup>28</sup> Oi ohore mauri taearana obaihana'u, emu waira tina hanona e'u aonamo kebapa'uana.'

Sal 16.8-11

<sup>29</sup> "Uaho'aba'u e! 'Aba'abaka Davida ena pou mahina haraina. Tomo'iobina ia hanona aba e'ari tehorena, ena 'ariahana hanona bariu neia aika hereherekai.

<sup>30</sup> 'A Davida hanona mahabanai hauna e'iobina Tirama ena 'abi'uai pahihina ebena, ia 'aba'abana ha hanona ia ena imia'au 'ekanai ua'a kemia'au. <sup>31</sup> Davida ehore Tirama taba kebabaina hauna eia 'uaina Keriso\* ena mikiri mue 'abina ehinana etibaha,

'Ia hauna hanona 'ariahana aonai ua'a a'i kehabona, ia hauna a'i kepari.'

Sal 16.10

<sup>32</sup> Iesu neiana hauna Tirama ehore 'ariai ebamikiri muena. Ai ikoimaiai taihana abomo ta'iobina. <sup>33</sup> Ia hana Tirama ehore ea'i taeani imana itipanai nemiaho.

Auba Robe weiana Hamana e'abi 'uai aina hauna ea'ina. Weiana hana aba euhu ririna, bariu ena hiabu mahamiai aba toihana, haiamiai aba tuona. <sup>34</sup> Pokina Davida hanona kupai a'i ekara'au aonai e'abi etibaha,

'Obiapaka hanona e'u Obia

ehina bena etibaha,

Au itipa'u tainai momiati,

<sup>35</sup> keaomo oi emu 'ou haukia kaehe rabu tainakia aemu ba'anai

\* 2:31: (31) 'ao Mesia



kahorotinakia.’

Sal 110.1

<sup>36</sup> “Ua buonai, Isaraela haumi ikoimiai kato'iohi haraina, Iesu wai matiu ibiri ropo 'ubinai tokoko 'auna hauna Tirama ehore aba Obiapaka mai Kerisoai ebaona.”

*Maearima Bo'ona Teraona kabe Ba'uere Robe Hoana Tea'ina.*

<sup>37</sup> Weiana 'abi neiakia teo'o raninai nuakia tetae, ia Petero mai iuhubeau haukia tebakainakia tetibaha, “Uaho'abamai e! Ai aea katababai aihō?” <sup>38</sup> Petero ia ehina benakia etibaha, “Katoraona kabe, ha ha Iesu Keriso atanai kato'uere robe emi ki'a ihina hao hoana. Weiana Auba Robe ena beruberu aba katoa'ina. <sup>39</sup> Pokina 'abi'uai neiana hanona wai 'eumi, nahumi 'eukia, abomo atau'ai temiaho haukia weiakia Obiapaka eka Tirama keaparinakia haukia ikoikiai 'eukia.”

<sup>40</sup> Petero 'abi bo'okia maearima ehinabe harainakia abomo eba taburanakia etibaha, “Uru ki'a obona neiana aonai katokaobo hanona katomauri.” <sup>41</sup> Petero ena 'abi tea'i taena haukia ikoikiai 'uere robe hoana tea'ina, rani weianai maearima hanona ikoinai taha aihau (3,000) a'ikakauma haukia ekia to'u aonai tetoto.

*A'ikakauma Haukia Ikoikiai Aokia Hamonai 'Eka Hamonai Temiaho.*

<sup>42</sup> Ia hanona rani ikoinai iuhubeau haukia herekiai 'iohi tetabuna, ekia miato'u mai 'abi'abi aokia ia abokia mo weia, kipokia teaniani haemo, 'eka hamonai tehabuba'ari. <sup>43</sup> Iuhubeau haukia hoa haehaehai mai babai haehaehai tebabainakia hanona maearima ikoikiai Tirama teta'u aina. <sup>44</sup> Weiana a'ikakauma haukia ikoikiai 'eka hamonai teto'u, ekia taba ikoikiai 'eka hamonai tewate harainakia. <sup>45</sup> Ekia kepu mai hano tekawakawa ainakia monikia hanona tewate wate nuatae ihobonai ha ha tebenakia. <sup>46</sup> Rani ikoinai wapu ha ha mai aokia hamonai marea robe aonai teto'u, abonamo ekia ituai mai aonamokia mai aokia hamonai teaniani haemo, <sup>47</sup> Tirama teba namona, maearima ikoikiai ia teonamo ainakia. Obiapaka ehore ebamaurinakia haukia rani ikoikiai a'ikakauma haukia kipokia eba hamomonakia.

### 3

*Petero 'Ome Hauna Ha Ebanamona.*

<sup>1</sup> Rani ha rabirabi beraura hoana aihau 'abana bahuba'ari ranina, Petero mai Ioane ohi Marea robe teao. <sup>2</sup> Weia 'ome hauna ha rani ikoinai temaiaina ua'a marea robe pa'abina atana 'Nuabi pa'abina' 'akonai tebamiatina. Ia hinana nuanai uahomanai erama. Maearima marea robe teao haukia ikoikiai herekia moni enoi. <sup>3</sup> Petero mai Ioane ohi marea robe ai katekatoto raninai eihanakia ba enoinakia taba ha katebena. <sup>4</sup> 'A Petero mai Ioane ohi teiha 'ini'inina, weiana Petero ehinabena etibaha, “Ai tararua moihanamai!” <sup>5</sup> Ua buonai 'ome hauna ia eihanakia ena raona hanona taba ha katebena. <sup>6</sup> Petero ia ehina bena etibaha, “Au hanona moni here'uai aha'i. Ia here'uai nemiaho hauna neiana. Iesu Keriso Nasareta hauna atanai momikiri moka'a!” <sup>7</sup> Ba Petero ia imana itipanai ea'i ebaraina eberi taena, beronai aena mai aena 'eku'ekukia tetabura. <sup>8</sup> Ia erobo tae ekoroti, eka'a hobo. Ia kipokia marea robe aonai tekatoto, eka'a abomo erobo taea erobo taea Tirama ebanamona. <sup>9</sup> To'u haukia ikoikiai wairakiai eka'a Tirama ebanamona teihana. <sup>10</sup> Weiana te'iohina ia hanona rani ikoinai marea robe pa'abina atana 'Nuabi pa'abina' 'akonai emiati enoi ba'ame hauna, teta'uta'u huri hoa haehai tohana herenai erama paunai.

*Petero Marea Robe Aona Solomona Ena Itarai Eiroro.*

<sup>11</sup> Aena enamo hauna ehore Petero mai Ioane e'aberenakia aonai, maearima bo'onona 'akina tebeau teao itara ha atana Solomona ena itarai weia teihana teta'u ki'a. <sup>12</sup> Petero ia eihanakia etibaha, “Isaraela haumi e, taba buonai taba neiana nibata'u ta'u hurinimi? Abomo taba buonai ai tuarurunamai? Turaonana ai kipomai emai hiabuai 'ao emai auba hiabukiai hau neiana tabamikirina nika'a, u? <sup>13</sup> Aberahamo, Isako mai Iakobo ekia Tirama abomo aika 'aba'abaka ekia Tirama ena banamo nuabina ena ta'ara'i hauna Iesu ebena. 'A wai tohore Pilato tobena, abomo Pilato enuatae kerubuna raonana ebabaina hanona wai a'i tonuatae. <sup>14</sup> Robe mai aka bero hauna a'i tonuatae aina, 'a tonoina ahuahua hauna erubuna wai 'eumi. <sup>15</sup> Wai tohore mauri pokina hauna toahu 'arina, ia Tirama ehore 'ari ai ebanamiki muena, ai

taihana haumai neiamai. <sup>16</sup> Iesu atana hiabunai 'ome hauna neiana etabura mue, hau neiana aba toihana abomo to'jobina. 'Abi tohana Iesu ta'ikakaumana buonai hau neiana ebanamona wai ikoimiai wairamiai.

<sup>17</sup> "Uaho'aba'u e, a'jobina wai emi obia kipokia Iesu herenai ua tobabai aiho hanona a'i to'jobina buonai. <sup>18</sup> 'A Tirama hanona mahabanai haukia ikoikiai pinakiai Keriso ena haiara pouna aba tehinana. Taeara weianai 'abi weiana aba etohana.

<sup>19</sup> "Ua buonai tomoraona kabe, Tirama herena katomai, weiana emi ki'a kea'i obo. Obiapaka mauri mahamahana kebenimi. <sup>20</sup> Tirama kehore Iesu haeamona keuhuna kemai wai heremi, 'uainai etina'ana Keriso wai 'eumi. <sup>21</sup> Iesu kupa 'ubina kemiaho keaomo Tirama taba ikoinai kebamaha mahanakia. Aba wa'i baha ia ena mahabanai haukia robekia pinakiai aba te'abi ihobona.

<sup>22</sup> "Mose e'abi etibaha, 'Obiapaka emi Tirama hanona mahabanai hauna ha kea'i taeana au ihobo'u wai hatia'ami kipokia baiatamiai, ia kehina 'abikia ikoikiai hanona aiana katona. <sup>23</sup> 'A mahabanai hauna weiana aiana a'i kateona haukia ikoikiai hanona Tirama ena maearima baiatakia kate'ari ore.' <sup>24</sup> 'Abi tohana, mahabanai haukia ikoikiai weiakia Samuela ena rani ai emai mo bariu aba te'abi 'uai aina beraurana hanona neiana.

<sup>25</sup> "Wai hanona mahabanai haukia 'aba'abakia. Tirama ena 'abi'uai ia herekiai hanona wai 'eumi, Tirama 'aba'abami banamo ebenakia hauna wai katoa'ina. Ia Aberahamo ehina bena etibaha, 'Oi 'aba'abamu paukiai hanopaka maearima ikoinai katenamo.' <sup>26</sup> Tirama ehore ena Ta'ara'i hauna etina'ana euhuna emai 'uai wai heremi, wai ikoimiai kebanamonimi mauri ki'a obokia taearakia katohabonakia paunai."

## 4

### *Petero Mai Ioane Hau Apa'uakia Ekia To'u Wairanai Tekoroti.*

<sup>1</sup> Petero mai Ioane maearima tehina benakia aonai, robe haukia mai marea robe i'imana hauna abomo Sadukea haukia hanona terarua herekia temai. <sup>2</sup> Iesu ena mikiri mue paunai 'ari haukia katemikiri mue pouna maearima wairakiai teba'ioi aina buonai ia terarua teopuere ainakia.

<sup>3</sup> Weiana ia terarua tea'inakia tebirinakia wapura itunai tekaiabunakia keaomo mara, pokina aberabirabi buonai. <sup>4</sup> 'A ekia 'abi weiana teona mai tea'i taeana haukia hanona ikoinai taha ima (5,000) 'abana.

<sup>5</sup> Erani hanona aiara obiakia mai aiara hau apa'uakia mai rauhuhu poki haukia ikoikiai Ierusalem mai teto'una. <sup>6</sup> Robe haukia 'arakiai hauna Ana weia, Kaiafa mai Ioane mai Alesanda abomo weia, robe haukia 'arakiai hauna ena itubu haukia ikoikiai abomo weia. <sup>7</sup> Weiana wairakiai terarua teba korotinakia tebakainakia tetibaha. "Hiabu tabanai mai tai atanai aka neiakia tubabai?"

<sup>8</sup> Petero hanona Auba Robe ai ebonu 'auna, weiana ekia 'abi eba muena etibaha, "Aiara toiha 'inina mai to'uai aina haumi e. <sup>9</sup> Wai ai tubakainamai 'ome hauna aea enamo aiho hanona robana katahuna wairamiai raninai, <sup>10</sup> wai kato'jobina abomo Isaraela haukia ikoikiai kate'jobina, Iesu Keriso Nasareta hauna, wai toahu 'arina ba Tirama ehore 'ariai ebamikiri muena hauna atanai 'ome hauna neiana abenamo wairamiai ekoroti toihana. <sup>11</sup> Iesu hanona 'itu ibabaina haumi tobaki'ana piharana, itu kupuana piharana eao.'

Sal 118.22

<sup>12</sup> Bamauri hanona ia kipona mo aonai nemiaho, pokina hanopaka ikoinai aonai Tirama ata haeai ha a'i ebaibeni aika kebamaurinaka."

<sup>13</sup> Iuda obiakia teraonana Petero mai Ioane ohi marere 'ekana apa'uana ha a'i teao 'apua ekia 'iohi aha'i haukia, iamo a'i teta'u 'abi tehina haraina teihanakia hanona teta'uta'u huri. Abomo te'jobina terarua hanona Iesu te'abana. <sup>14</sup> Ia terarua mai 'ome hauna abenamo hauna kipokia wairakiai tekoroti haeamo buonai katebakai muenakia taearana ha aha'i.

<sup>15</sup> Ia Petero Ioane mai 'ome hauna tehina benakia bakai 'ekana katekarahi, ba tekarahi murinai weiakia ikupaikiai te'abi'abi. <sup>16</sup> Tetibaha, "Ia terarua herekiai taba kahababaina? Pokina Ierusalem mai temiaho haukia ikoikiai aba te'jobina ia hanona bata'uta'u huri akakia tebabai, aika kahabuni ainakia 'ekana aha'i. <sup>17</sup> Pou neiana a'i memata maearima ikoikiai a'i teme'jobina marikina, terarua kahaba ta'unakia abomo kaharauhuhu ainakia Iesu atana hanona a'i katehinana hau ha

herenai.”<sup>18</sup> Epuā terarua teapari muenakia tetoto, terauhūbunakia Iesu atana a'i kateiroro aina abomo a'i kateba'iobi aina aha'i 'akina.

<sup>19</sup> 'A Petero mai Ioane ohi ekia 'abi tebamuena tetibaha, “Wai kipomi tomobabataina. Wai aiāmi kata'i taeana 'ao Tirama aiāna kata'i taeana. Tirama wairanai aeana hanona ebero? <sup>20</sup> Ai taiha mai tao'o tabakia katabuninakia hanona a'i ketaina.”

<sup>21</sup> Ia terarua tehinabe pahihinakia ba teba karahinakia, kateba wapuranakia hanona taearana ha a'i tetabu ahina pokina maearima ikoikiāi Tirama tebanomona hoā weiakia terama buokiai. <sup>22</sup> Hau neiāna herenai hoā apa'uana erama enamo hauna ihauna hanona bariabui mai reana.

#### *A'ikakauma Haukia Ekia Bahuba'ari.*

<sup>23</sup> Teba karahinakia murinai, terarua teao 'abakia herekiai, robe haukia apa'uakia mai obia apa'uakia taba ŋa tehoma 'abikia ikoinai tehinabenakia.

<sup>24</sup> Aiakia teona murinai, ikoikia aiakia tebahamomona Tirama tebahuba'ari bena tetibaha, “‘Ubi tohana Obiana e, kupa hanopaka 'akupaka mai aokiai temiaho tabakia hanona oi mo obabainakia. <sup>25</sup> Emu 'abi Auba Robe ena hiabuāi emu ta'ara'i hauna 'aba'abamai Davida pinanai e'abi etibaha,

'Rama haeai haukia  
taba buonai tiopuere,  
abomo taba buonai maearima  
taba tohakia aha'i haukia  
tiraona apa'uanakia?

<sup>26</sup> Hanopaka obiakia temikiri  
abomo aiara obiakia kipokia  
tibahamomo Obiapaka ena Keriso  
ohi ti'oatanakia.’

Sal 2.1, 2

<sup>27</sup> “‘Abi tohana, Heroda mai Pontio Pilato hanona rama haeai haukia mai Isaraela haukia kipokia aiara neiāna aonai aba teto'una. Emu ta'ara'i hauna robena Iesu oi tehoroi 'aranai oheina\* Kerisoai eao hauna kate'oatana. <sup>28</sup> Ia hanona Oi emu hiabu mai nuatae aba oba'oruna akana kerama hauna tebabaina. <sup>29</sup> Ua buonai, Obiapaka e, ekia bata'u 'abikia moraoanānakia, ai emu ta'ara'i haumai tabura mobenamāi, a'i katata'u ainakia emu 'abi

katahinana. <sup>30</sup> Imamu motiu ahina emu hiabu mobawaira tinana inawa haukia mobamaurinakia, haeamona hoā akakia mai bata'uta'u huri hoakia kobabai oi emu ta'ara'i hauna robena Iesu atanai.”

<sup>31</sup> Ia tebahuba'ari murinai temia to'u ituna eibiūbiū, ia hanona Auba robe ai tebonu, mai nuako'okia Tirama ena 'abi tehinana.

#### *A'ikakauma Haukia Kipokia Tebaraibarai.*

<sup>32</sup> A'ikakauma haukia ikoikiāi hanona ao'aokoikia mai aokia hamona, ha kipona ena taba a'i euhore aina 'a ekia taba ikoikiāi hanona tebina'anakia ha ha baiatakiai. <sup>33</sup> Iuhubeau haukia mai hiabukia rarina Obiapaka Iesu ena mikirimue mahakiai teihana hauna pouna teiroro aina. Ba Tirama ena banamo hanona ia ikoikiāi ahakiai. <sup>34</sup> Ia baiatakiai hanona tai ha'i ekapu, pokina weiakia mai ekia hano 'ao itu haukia hanona tekawakawa ainakia monikia weiakia teoainakia, <sup>35</sup> iuhubeau haukia imakiai teutanakia, weiāna tewate harainakia ha ha ena uraru ihobonai.

<sup>36</sup> Hau ha atana Iosepa, Lebi itubuna hauna Kupuro ai erama, iuhubeau haukia hanona ia atana teaparina Banaba (anina hanona 'Batabura hauna'). <sup>37</sup> Ena hano ekawakawaina monina ikoinai eaoaina iuhubeau haukia imakiai eutana.

## 5

#### *Anania Mai Sapira Ekia Bai'oi.*

<sup>1</sup> Weiāna hau ha atana Anania atawana Sapira ohi ekia hano ha tekawakawaina.

<sup>2</sup> Ia hano weiāna monina abirana ea'i 'inina hanona atawana ohi te'jobina, abirana mo eaoaina iuhubeau haukia imakiai eutana. <sup>3</sup> Weiāna Petero ia ehina bena etibaha, “Anania e! Aehoma buonai Satani aomu eana, Auba Robe o'oina hano monina abirana oa'i 'inina? <sup>4</sup> A'i okawakawaina raninai hano hanona oi 'eumu, okawakawaina raninai monina abomo oi 'eumu. Bariu rani neiānai hanona aea oraona aiho? Pinamuai moni maikoina ŋa nuhoma, oi hanona maearima a'i o'oinakia, ia Tirama o'oina.”

<sup>5</sup> Anania aia weiāna eona raninai e'eho e'ari baihana, uru weiāna teona haukia ikoikiāi teta'u ki'a. <sup>6</sup> Hau 'aru'arukia baika temikiri temai habuniai hauanina teapana tea'i ahina teoaina tehorena.

\* 4:27: (27) 'Uainai maearima tea'itaeana hoā apa'uakia tebena hanona tehoroi 'arana teheina.

<sup>7</sup> Beraura hoana aihau murinai babi'e ekatoto, atawana herenai taba erama hauna a'i e'iohina. <sup>8</sup> Petero babi'e ebakaina etibaha, "Mohina bena'u, torarua emi hano tokawa kawaina hanona 'arana mo weiana, u?" Ia e'abi etibaha, "E, 'arana mo naiana." <sup>9</sup> Weiana Petero ia ehina bena etibaha, "Taba buonai atawamu ohi aomi tobahamona Obiapaka Aubana tuhobona? Aia'u nuona, atawamu tehorena miorikia pa'abi 'akonai tekoroiti, oi abomo katebuanio kateaoainio." <sup>10</sup> Ia beronai e'eho Petero aena pokinai e'ari baihana. Hau 'aru'arukia tetoto temai teihana abe'ari toha, ba tebuana atawana herenai tehorena. <sup>11</sup> Rani weianai a'ikakauma haukia ikoikia mai pouna teona haukia ikoikia teta'u wairai.

### *Iuhubeau Haukia Hoa Haeai Haeai Tebabainakia.*

<sup>12</sup> Hoa mai babai haeai haeai iuhubeau haukia maearima wairakiai tebabainakia, ikoikia mai aokia hamonai Solomona ena itarai teto'u. <sup>13</sup> 'A maearima baika hanona teta'u ainakia herekia a'i teao, ia aokia hanona ia temariki ainakia. <sup>14</sup> Iamo hau mai babi'e bo'okia Obiapaka tea'ikakaumana haukia teao hanona ia haukia tebabo'o hao bo'o haona.

<sup>15</sup> Inawa haukia teaoainakia airabuanai tehorotinakia mai ieno'aukia mai 'irekia tebaenotinakia taearai. Weiana Petero herekia kekabanai raninai aiaiana keao ahakiai. <sup>16</sup> Ierusalemaherena aiarakia haukia bo'okia abomo temai teto'u, inawa haukia mai auba ki'a obokia aokia tetoto haukia temaiainakia weia, ba ikoikia temauri.

### *Iuhubeau Haukia Te'oatanakia.*

<sup>17</sup> Robe haukia arakiai hauna mai 'abana weiakia Sadukea itubuna haukia kipokia hanona iuhubeau haukia tewamuru ainakia. <sup>18</sup> Ba iuhubeau haukia tebirinakia teaoainakia wapura ituna aonai tekaiabunakia. <sup>19</sup> 'A rabi weianai Obiapaka ena aneru ha ehore wapura ituna pa'abina ekaikauna eba karahinakia, <sup>20</sup> etibaha, "Tomoao, Marea Robe aonai mauri maha mahana pouna neiana maikoina katohinana maearima wairakiai." <sup>21</sup> Aia weiana teona ihobona tebabaina, raurani amarina Marea Robeai tekatoto maearima teba 'iobinakia.

Rani weianai robe haukia arakiai hauna mai 'abana kipokia teao bakai apa'uana

haukia abomo Isaraela hau apa'uakia kipokia teto'u, 'abi teuhuna eao iuhubeau haukia wapura itunai katemaiainakia. <sup>22</sup> Teuhunakia teao wapura itunai hanona wairakia aha'i, haeamona temue teao bakai apa'uana haukia haiakiai te'abi tetibaha, <sup>23</sup> "Taeao raninai pa'abi hanona ikaiabu, pa'abi i'imana haukia abomo weia tekoroiti, ia pa'abi takaikauna takatoto hanona tai ua'a aha'i 'akina."

<sup>24</sup> 'Abi weiana teona raninai, Marea Robe poki hauna mai robe haukia apa'uakia teraona raona 'ari ki'a baha, hoa weiana anina hanona taba. <sup>25</sup> Weiana hau ha eao herekia ehina benakia etibaha, "Wapura itunai tokaiabunakia haukia hanona aba Marea Robe aonai tekoroiti maearima tiba'iobinakia." <sup>26</sup> Marea Robe poki hauna mai ena miori kipokia teao iuhubeau haukia tebaka'anakia, ia a'i teaiahu benakia pokina maearima katehore piharai a'i temeahunakia marikina.

### *Iuhubeau Haukia Hau Apa'uakia A'i Teta'u ainakia.*

<sup>27</sup> Teaoainakia bakai apa'uana wairanai teba korotinakia, ba robe haukia arakiai hauna ehore ebakainakia. <sup>28</sup> Etibaha, "Ai wai taharabunimi, hau neiana atanai a'i katoba'iohi. Ia bariu emi ba'iohi 'abikiai Ierusalemaherena pou neiana hanona abeapa'ua, abomo ena 'ari hanona ai tukaiahinamai."

<sup>29</sup> Petero mai iuhubeau haukia te'abi tetibaha, "Tirama aiana kahaona hanona enamo, 'a maearima aiana kahaona hanona a'i enamo. <sup>30</sup> Iesu wai tohore matiu 'ubinai tokokona toahu 'arina hauna, aika 'aba'abaka ekia Tirama ehore 'ariai aba ebamikiri muena. <sup>31</sup> Tirama ia ea'i taeana imana itipana tainai eba miatina i'uaiaika mai ibamaurika haunai ebaona Isaraela haukia ibaraona kabekia mai ekia ki'a ihina haokia paunai. <sup>32</sup> Ai hanona taba neiakia taihanakia haumai, Auba Robe weiana Tirama aiana tiona haukia ebenakia hauna abomo ihobona."

### *Gamaliel Eiroro Iuhubeau Haukia Katehabonakia.*

<sup>33</sup> 'Abi weiana teona raninai, teopuere wairai ekia nuatae hanona iuhubeau haukia pateahu 'arinakia. <sup>34</sup> 'A Parisea hauna ha atana Gamaliel, rauhuhu poki hauna ia bakai apa'uana hauna ha



maearima ikoikiaia abomo timariki aina hauna, emikiri iuhubeau haukia ehina benakia katekarahi atapakai katebai'ima rani papana. <sup>35</sup> Weiana ia ehina benakia etibaha, “Isaraela haumi e, katoiha haraina hau neiakia aea katohomanakia. <sup>36</sup> 'Uaina raninai Teuda emikiri e'abi ia abomo hau mo ha, weiana maearima ikoinai hinabu bani 'abana murinai teka'a. Ia teahu 'arina raninai ena maearima ikoikiaia tebeau otaraina, ha a'i emiaho 'apua. <sup>37</sup> Ia murinai Galilea hauna ha atana Iuda, maearima atakia irerena raninai emikiri, maearima bo'okia aokia eana ia murinai teka'a, 'a ia abomo teahu 'arina, weiana murinai teka'a haukia ikoinai terama otaraina. <sup>38</sup> Ua buonai nahina benimi, hau neiakia hanona katohabonakia kateao, pokina 'abi hoahoa mai aka neiakia hanona maearima 'eukiaia katemai raninai anikia a'i katerama. <sup>39</sup> Ia Tirama 'eunai kemai raninai, wai hanona a'i katoba'oro 'apuana.

Kato'ima 'ima harainimi, Tirama a'i to-mohuarina.” <sup>40</sup> Ia Gamaliel aiana tea'i taean, weiana iuhubeau haukia teaparinakia tetoto, te'atinakia murinai terauhuhunakia Iesu atanai a'i kateba'iohi muena, teba karahinakia. <sup>41</sup> Iuhubeau haukia bakai 'ekana tehabona mai aonamokia, pokina Tirama ena banamo aonai ia hanona Iesu atanai tehaiara. <sup>42</sup> Rani ikoinai Marea Robe aonai mai itu aokiaia, pou namona teba'iohi aina mai teiroro aina Iesu hanona Keriso.\*

## 6

### *Hau 'Abaihau Hamomo Tea'itaeanakia Katebaraibarai.*

<sup>1</sup> Rani baika teao murikiaia a'ikakauma haukia ekia bo'o hanona ekara'au raninai Iuda maearimakia Helene maeanai ti'abi haukia mai Heberu maeanai ti'abi haukia baiatakiaia atetua erama, pokina aniani iwatekia raninai ekia wapuwapu hanona a'i tiraonanakia. <sup>2</sup> Weiana iuhubeau harauhaea rua tehore Iesu tia'ikakaumana haukia ikoikiaia tebatounakia tetibaha, “Ai enamo Tirama ena 'abi iroro akana kaha habona aniani 'ao kohu iwatekia paunai. <sup>3</sup> Ua buonai uaho'abamai e, wai baiatamiaia hau 'abaihau hamomo poukia tenamo haukia Auba Robe mai aotipai tebonu haukia katoa'i taeanakia

aka neiana katobenakia kate'uai aina. <sup>4</sup> 'A ai hanona rani ikoinai bahuba'ari mai iroro akakia mo katababainakia.”

<sup>5</sup> Iuhubeau ekia raona 'abina tebatohana, ba hau neiakia tea'i taeanakia, Stefanofano a'ikakauma mai Auba Robeai ebonu hauna, Pilipo, Porokoro, Nikanoro, Timona, Pamena, mai Nikolao ia hanona rama haeani hauna Antiokai emai Iuda haunai tebaona hauna. <sup>6</sup> Haukia 'abaihau hamomo teaoainakia iuhubeau haukia wairakiaia teba korotinakia, ba iuhubeau haukia tehore imakia 'arakiaia tehao'au tebahuba'ari tebanamonakia.

<sup>7</sup> Weiana Tirama ena 'abi hanona tehina otaraina, Iesu tia'ikakaumana haukia tebo'o hao bo'o hao Ierusalem aonai, robe haukia bo'okia abomo Iesu tea'ikakaumana.

### *Stefano Tea'ina Tebakaina.*

<sup>8</sup> Stefano hanona Tirama ena aoko'o hoana mai hiabunai ebonu, ia ehore hoa mai bata'uta'u huri akakia maearima wairakiaia ebabainakia. <sup>9</sup> 'A hau baika hanona ia te'oatana, maearima weiakia hanona 'Karahi 'abaea Mareana' haukia, ia hanona Iuda maearimakia Kurene, Alesandereai temai, abomo Kilikia, Asiai temai haukia, baika tehore Stefano kipokia te'abi baitaeai. <sup>10</sup> Ia Stefano a'i te'abi haona pokina aotipai mai Auba Robe hiabunai ehina benakia. <sup>11</sup> Ua buonai ia tehore baika aokia teani kate'abi katetibaha, “Ai hanona ia ena 'abi ki'a obokia ehina Mose mai Tirama ohi ahakiaia hauna taona.” <sup>12</sup> Uahomanai aiara haukia mai aiara haukia apa'uakia abomo rauhuhu poki haukia teba opuerenakia, ia temikiri teao Stefano tea'ina teaoaina bakai apa'uana haukia herekia. <sup>13</sup> Ba ia temaiainakia hinau bai'oi haukia baika tehore tehina benakia tetibaha, “Hau neiana hanona Robe 'ekana mai Mose ena rauhuhu ia'iki'akia 'abina a'i nibapua 'apuana. <sup>14</sup> Ai aiana taona etibaha, Iesu Nasareta hauna kehore Marea Robe neiana kerubuna abomo Mose ena rauhuhu ebenaka haukia ikoinai kebahaekainakia.” <sup>15</sup> Bakai 'ekanaia temiati haukia ikoikiaia Stefano teiha 'ini'inina wairana ihana hanona matoha aneru ha wairana 'abana.

\* 5:42: (42) 'ao Mesia

## 7

*Stefano Eiroro Bakai Apa'uana Wairanai.*

<sup>1</sup> Robe haukia arakiai hauna Stefano ebakaina etibaha, “Ekia 'abi hanona tohana, u?” <sup>2</sup> Stefano ena 'abi ebamuena etibaha, “Uaho'aba'u mai hama'u ikoimiai, aia'u tomona. Aika 'aba'abaka Aberahamo Harana a'i eao baha Mesopotamiai emiaho raninai, nuabi Tiramana ia herenai ewaira tina, <sup>3</sup> ehina bena etibaha, ‘Emu hano mai hatia'amu kohabonakia, au ka'uahina hanona aeana hanomo weiana koao.’ <sup>4</sup> “Ua buonai Aberahamo ehore Kaldea haukia ekia hano ehabona, emikiri eao Haranai emiaho. Weia emiaho eaomo hamana e'ari, ba Tirama ehore ebaka'ana emaiaina bariu tomiaho aina hano neianai ebakarahina. <sup>5</sup> Tirama Aberahamo ena hano tohana ha a'i ebena, 'apuna ihobona abomo ha a'i e'uahina. 'A Tirama hanona e'abi'uai hano weiana ia kipona mai 'aba'abana kebenakia. Rani weianai hanona Aberahamo nahuna aha'i. <sup>6</sup> Tirama haeamona ehina bena etibaha, ‘Oi kupumu 'aba'abamu hanona hano neiana katehabona hano haeai haukia ekia hanoai katemiaho, hano weiana haukia ta'aragia katea'i ihau hinabu bani aonai ia hanona katehau haiara.’ <sup>7</sup> Tirama e'abi mue etibaha, ‘Ekia ta'ara ia'inai katebaonakia haukia au kahore kabakainakia, murinai ia hanona katekarahi neia au katekuti aina'u.’ <sup>8</sup> Ba Tirama Aberahamo ehina bena itare katebabaina weiana hanona Tirama ena 'abi'uai apa'uana ibatohana hoana. Ua buonai Isako erama wapuna 'ababani aonai itare hoana ebabaina. Isako nahuna Iakobo ebaramana, abomo Iakobo nahuna harauhaea rua Isaraela itubu arakia terama.

<sup>9</sup> “Itubu arana haukia tehore hatikia Iosepa tewamuru aina, Aigupito haukia herekiai tekawa kawaina ta'ara'i hanonai eao. 'A Tirama hanona Iosepa e'abana, <sup>10</sup> abomo ena hau haiara ikoikiai aokiai ebamaurina. Hoahoa namona mai aotipa ebena Parao Aigupito obia 'arana wairanai, weiana Parao ehore Iosepa hiabu ebena Aigupito hanopakana mai ena itu haukia ikoikiai kepoki ainakia.

<sup>11</sup> “A arobo rarina erama Aigupito mai Kanana hanokia maikoinai haiara

rarina 'akina. Aika 'aba'abaka aniani ae'e katea'ina 'ekana aha'i. <sup>12</sup> Iakobo 'uru eona Aigupito hanonai mai ekia aniani, ba nahuna aika 'aba'abaka euhunakia ekia rani kori'uaina. <sup>13</sup> Ekia rani ibaruanai Iosepa kipona ebawaira tinana uaho'abana wairakiai, Parao abomo e'jobina Iosepa hatia'ana. <sup>14</sup> Ba Iosepa 'abi euhuna hamana Iakobo mai hatia'ana ikoikiai katemai Aigupito, haukia imabui haraurua ima. <sup>15</sup> Ua buonai Iakobo emikiri eao Aigupito, weia e'ari murinai aika 'aba'abaka abomo weia te'ari. <sup>16</sup> 'A ekia 'ari haukia hanona teaoainakia Sekem 'ariahanai tehorenakia. 'Ariahana weiana hanona Aberahamo ehore Hamoro nahuna imakiai moniai ekawana.

<sup>17</sup> “Tirama ena 'abi'uai Aberahamo herenai ibatohana ranina ekaibari aonai, aika 'aba'abaka Aigupitoai terama ahi rama ahi abomo tebo'o ki'a baha. <sup>18</sup> Eaomo puanai obia haeai ha Aigupito eobia aina, ia hanona Iosepa a'i e'jobina. <sup>19</sup> Obia weiana 'aba'abaka ebapo'onakia, ebahaiaranakia abomo ebahi ahinakia kipokia nahukia 'oru'orukia katene'enakia kate'ari. <sup>20</sup> Rani weianai Mose erama, miori papana namona Tirama wairanai, hamana ena ituai te'imana nawa aihau. <sup>21</sup> Weiana atapakai tehabona murinai Parao nahuna uahona ea'ina ebapa'uana nahunai eao. <sup>22</sup> Ua buonai Aigupito haukia ekia 'iobi ikoinai Mose teba'jobina, ba Mose ena 'abi abomo ena aka hanona mai hiabukia.

<sup>23</sup> “Mose ihauna bariabui ea'ina aonai eraonana hatia'ana Isaraela haukia keihanakia. <sup>24</sup> Ia 'abana ha eihana Aigupito hauna ehore nia'i ki'ana, buonai eao hau weiana ebaraina Aigupito hauna eahu 'arina. <sup>25</sup> Mose ena raona hanona hatia'ana kate'iobi haraina Tirama kehore Mose imanai ia arakia kebamaurinakia, ia a'i te'iobi 'apuana. <sup>26</sup> Erani Isaraela haukia rua te'au, Mose eao herekia ebairarao etibaha, ‘Wai torarua hanona hatia'a, taba buonai kipomi tuba haiaranimi?’ <sup>27</sup> Etabura hauna ehore Mose etori parena ebakaina etibaha, ‘Tai oi ea'i taeani'o, ai kopoki ainamai abomo kobakainamai? <sup>28</sup> Nonuatae au koahu 'arina'u, warani Aigupito hauna oahu 'arina 'abana?’ <sup>29</sup> Mose 'abi weiana

eona raninai, beronai e'uru eao Midian hanonai emiaho hano haeai hauna 'abana, weia nahuna hau rua terama.

<sup>30</sup> “Ihau bariabui teore murinai, hano'akunai Sinai oeo herenai matiu 'ini'ininai iruba eupu aonai aneru ha ewaira tina Mose wairanai. <sup>31</sup> Mose eihana raninai eta'uta'u huri, eka'a haha eao herena keiha haraina aonai, Obiapaka aiana eona. <sup>32</sup> Etibaha, ‘Au hanona 'aba'abamu Aberahamo, Isako mai Iakobo ekia Tirama.’ Mose eta'u ki'a e'ururu 'ururu, a'i enuatae keihana. <sup>33</sup> Obiapaka ehore ehina bena etibaha, ‘Emu tamaka moa'i obonakia, pokina okoroti 'ekana hanona Tirama nemiaho hanona erobe. <sup>34</sup> Au e'u maearima Aigupitoai tihau ha-

iara aihanakia abomo ti'arara aiakia aona, ua buonai ariri amai kabamaurinakia, bariu 'omikiri kauhuni'o koao Aigupito.’ <sup>35</sup> “Mose mo neiana tebaki'ana te'abi, ‘Tai oi ea'i taeani'o ai kopoki ainamai abomo kobakainamai?’ hauna Tirama ehore euhuna ekia poki abomo ibamaurikia haunai keao, matiu 'ini'inina e'ara aonai ewaira tina aneruna ena baraibarai ai. <sup>36</sup> Mose weiana hauna Israela haukia Aigupitoai ebakarahnakia, bata'uta'u huri akakia abomo hoa akakia haeaihaeai ebabainakia Aigupitoai, 'Aku Bironai abomo ihau bariabui hano'akunai. <sup>37</sup> Mose mo weiana ehore Israela haukia ehina benakia etibaha, ‘Tirama kehore mahabanai hauna ha kebamikirina wai baiatamiai, matoha au 'abana.’ <sup>38</sup> Hau weiana hanona Israela haukia hano'akunai temia to'u raninai Sinai Oeo 'ubinai e'abi aneruna mai 'aba'abaka baiatakiai, mauri 'abina ea'ina ebakabanaina aika 'euka.

<sup>39</sup> “Ia aika 'aba'abaka hanona Mose aiana iona 'arina a'i te'ari teubo, ekia nuatae patemue Aigupito. <sup>40</sup> Weiana ia tehore Arona tehina bena, ‘Tirama baika mobabainakia aika 'euka kate'uai ainaka, pokina a'i ta'jobina Mose Aigupitoai ebaka'anaka hamai hauna bariu aehoma?’ <sup>41</sup> Rani weianai ia tehore poromakau nahu aubaubana ha tebabaina, banamo tabakia temaiainakia kaiba'uku weiana wairanai tehorotinakia, imakiai tebabaina tabana wairanai teonamo. <sup>42</sup> Weiana Tirama ia herekiai ekaobo ehabonakia kipokia kupa tabakia katekuti

<sup>39</sup> “Ia aika 'aba'abaka hanona Mose aiana iona 'arina a'i te'ari teubo, ekia nuatae patemue Aigupito. <sup>40</sup> Weiana ia tehore Arona tehina bena, ‘Tirama baika mobabainakia aika 'euka kate'uai ainaka, pokina a'i ta'jobina Mose Aigupitoai ebaka'anaka hamai hauna bariu aehoma?’ <sup>41</sup> Rani weianai ia tehore poromakau nahu aubaubana ha tebabaina, banamo tabakia temaiainakia kaiba'uku weiana wairanai tehorotinakia, imakiai tebabaina tabana wairanai teonamo. <sup>42</sup> Weiana Tirama ia herekiai ekaobo ehabonakia kipokia kupa tabakia katekuti

ainakia. Mahabanai hauna ena pukai tererena 'abana etibaha,

‘Israela haumi e, ihau bariabui hano'akunai beruberu mai banamo mahikia hanona au a'i tobanamo aina'u.

<sup>43</sup> Wai hanona tirama atana Molok ena ro'e ituna abomo emi bihiu tiramana atana Refan aubaubana tobuankia, weiakia tobabainakia katokuti ainakia.

Ua buonai Au kahore wai kabaibiunimi Babulono puana 'akinai.’

Amo 5.25-27

<sup>44</sup> “Aika 'aba'abaka herekiai Tirama ibawaira tinana ro'e ituna\* ha hano'akunai, ro'e weiana hanona Mose ebabaina Tirama ebaihana ihobonai. <sup>45</sup> Muriai 'aba'abaka hamakia imakiai ro'e ituna weiana tea'ina tebuana Iosua kipokia teao rama haeai haukia ekia hanoai tekara'au, Tirama ehore wairakiai hano haukia eu'u parenakia, ia temiaho aina emai mo Davida ena raniai. <sup>46</sup> Tirama ena banamo hanona Davida ebena, ba ia Tirama enoina Iakobo ena Tirama ena itu ha kebabaina. <sup>47</sup> Ia itu hanona Solomona ehore ebakorina.

<sup>48</sup> “A 'ubi toha tohanai Tiramana hanona maearima imakiai tebabaina ituna aonai a'i nemiaho. Mahabanai hauna ena 'abi ihobona etibaha,

<sup>49</sup> ‘Obiapaka na e'abi aihō, Kupa hanona e'u mia'au 'ekana, hanopaka hanona ae'u ihorotina 'ekana.

Itu aehomana katobabaina Au eu'u? E'u arai 'ekana hanona aeana?

<sup>50</sup> Taba neiakia ikoikiai hanona Au ima'uai a'i ababai, u?’

Isa 66.1, 2

<sup>51</sup> “‘Ara pahihī haumi, aomi mai haimi tokaiabu harai matoha Tirama a'i te'jobina haukia 'abakia. Rani ikoinai wai tuhore Auba Robe tuhao abuna. 'Aba'abami ekia aka a'i torea 'apuana toa'i 'ini baihana. <sup>52</sup> Wai 'aba'abami mahabanai hauna ha a'i te'oatana, u? Aka bero hauna kemai 'abina tehinana haukia teahu 'arinakia, bariu wai tohore tohina hinaina bero hauna toahu 'arina. <sup>53</sup> Wai rauhuhu weiana Tirama ena aneru ebaibeni hauna aba toa'ina iamo kipomi a'i toa'i taeanā.”

\* 7:44: (44) Itu robena weiana habuniai tebabaina.

*Piharai Stefano Teahu 'arina.*

<sup>54</sup> Iuda ekia obia haukia Stefano aiana teona raninai teopuere wairai 'aki'akikia teara 'ini'ini. <sup>55</sup> Ia Stefano hanona Auba Robei ebonu, weiana ea'a taea kupa eihana, Tirama nuabina abomo Iesu Tirama itipana tainai ekoroti eihana. <sup>56</sup> Ia etibaha, "Tomoihana! Kupa aba ekaikau naihana abomo Maearima Nahuna Iesu Tirama itipana tainai ekoroti."

<sup>57</sup> Weiana ia teio aota imakiai haiakia tekaiabunakia ikoikiai tebeau teo Stefano herena, <sup>58</sup> tea'ina aiara aonai teberi ahina atapakai ba piharai teahu ramana, hinau bai'oi haukia weiakia hanona ekia habuni tero'a ahinakia haukia tebakuri ahinakia hau 'aru'aruna ha atana Saulo aena pokinai tehoroti. <sup>59</sup> Piharai teahuna aonai Stefano ebahuba'ari etibaha, "Obiapaka Iesu e, au auba'u moa'i taeana." <sup>60</sup> Weiana ekaipehu eio etibaha, "Obiapaka e! Ki'a neiana 'arana a'i kobenakia." Ua e'abi aiho murinai e'ari.

## 8

1 Saulo ehore Stefano teahu 'arina hanona ebatohana.

*Saulo Tirama Ena Marea Haukia E'oata Ramanakia.*

Rani weianai bai'oata ranina erama, a'ikakauma haukia Ierusalemiai temiaho haukia ikoikiai tebeau otaraina teao Iudea, Samaria hanokiai temiaho, 'a iuhubeau haukia kipokia mo Ierusalemiai temiaho. <sup>2</sup> Tirama timariki aina haukia baika Stefano tea'ina tehaiaina ba teoaina 'ariahanai tehorena. <sup>3</sup> 'A Saulo enuatae a'ikakauma haukia kea'i ki'anakia, itu ha ha aokiai etoto, hau mai babi'e eberi beri ahinakia, eaoainakia wapura ituna aonai ekaibunakia.

*Pou Namona Samariai Teiroro aina.*

<sup>4</sup> A'ikakauma haukia tebeau otaraina haukia hanona pou namona teiroro aina eka ha ha aokiai. <sup>5</sup> Pilipo eao Samaria aiara apa'uanai ekarahi, weia Keriso pouna eiroro aina maearima herekiai. <sup>6</sup> Maearima ikoikiai Pilipo aiana teona abomo hoa haeihaeai akakia ebabai haukia teihana raninai mai aokia ikoinai tea'i taeana. <sup>7</sup> Maearima aokiai auba ki'a obokia temiaho haukia eu'u ahinakia tekarahi mai ioiokia, abomo mero mai 'ome haukia ebamaurinakia. <sup>8</sup> Ua buonai

aonamo rarina 'akina erama aiara weiana aonai.

<sup>9</sup> 'Eka weianai hau ha atana Simona 'uaina raninai nepu akakia ebabai Samaria haukia ebata'unakia. Ia kipona ebapa'uana, <sup>10</sup> abomo maearima ikoikiai apa'uana eao mo papanai epua iamo aiana teona tetibaha, "Hau neiana hanona Tirama ena hiabuui niaka." <sup>11</sup> Rani homa'ana ena mea hoakia terama buonai aiana teona. <sup>12</sup> 'A Pilipo Tirama ena obia aiarana pouna namona mai Iesu Keriso atana eiroro aina, weiana maearima hanona ia aiana tea'i taeana, ba hau mai babi'e eba'uere robenakia. <sup>13</sup> Simona abomo ea'ikakauma 'uere robe ea'ina murinai, Pilipo e'abana tekaoao aonai hoa haeihaeai mai babai haeihaeai akakia ebabainakia eihanakia hanona nuana etae.

<sup>14</sup> Iuhubeau Ierusalemiai temiaho haukia pou teona Samaria haukia abomo Tirama ena 'abi tia'i taeana, ua buonai Petero mai Ioane teuhunakia teao Samaria. <sup>15</sup> Terarua Samariai tekatoto raninai, a'ikakauma haukia ahakiai tebahuba'ari Auba Robe katea'ina paunai, <sup>16</sup> pokina rani weianai Auba Robe hanona ia ahakiai a'i eriri baha, ia 'uere robe 'abaeana mo tea'ina Obiapaka Iesu atanai. <sup>17</sup> Ua buonai Petero mai Ioane ohi imakia ia ahakiai tehao'au tebahuba'ari raninai Auba Robe tea'ina.

<sup>18</sup> Ba Simona Iuhubeau haukia eihanakia imakia a'ikakauma haukia ahakiai tehao'au tebahuba'ari Auba Robe tea'ina raninai, ia ehore moni baika emaiainakia iuhubeau haukia nibenakia netibaha, <sup>19</sup> "Hiabu naiana au abo'umo patobena'u, ba weiakia ikoikiai ima'u ahakiai pahao'au pabahuba'ari raninai ia abokiamo Auba Robe pate'ina."

<sup>20</sup> 'A Petero ia ehina bena etibaha, "Oi emu moni ohi kato'ari haeamo pokina oraonana Tirama ena beruberu tabana hanona moniai kokawana. <sup>21</sup> Aka neiana aonai oi 'ekamu 'ao itaumu hanona aha'i pokina aomu a'i ebero Tirama wairanai. <sup>22</sup> Emu ki'ai moraona kabe, Obiapaka monoina, pa'e emu raona ki'a obona kehina haona. <sup>23</sup> Pokina naihani'o, oi aomuai hanona wamuru ebonu 'auna abomo aka ki'a aba ebiri haraini'o." <sup>24</sup> Simona nepu hauna iuhubeau haukia enoinakia etibaha,



“Obiapaka tomobahuba'ari bena au pau'uai taba tohinana hauna here'uai a'i merama.” <sup>25</sup> Petero mai Ioane Obiapaka ena 'abi tehina waira tinana abomo teiroro aina murinai, haeamona temue Ierusalem. Ekia mueai hanona Samaria aiarakia bo'okia aokia pou namona teiroro aina.

### *Pilipo Etiopia Hauna Apa'uana Ha Eba'uere Robena.*

<sup>26</sup> Obiapaka ena aneru ha Pilipo ehina bena etibaha, “Omikiri ahi taina moao, taeara weiana Ierusalem eao Gasā taeara weiana hanona hano'akuna.”

<sup>27</sup> Pilipo emikiri taearai eao aonai Etiopia hauna ha eihana. Ia hanona hau apa'uana ha Etiopia obia 'arana babi'ena Kandake ena kohu i'imana hauna. Aba eao Ierusalem eabahubari, <sup>28</sup> ba ena mueai ena rerueai emia'au Isaia mahabanai hauna ena puka ekaikauna netuabina. <sup>29</sup> Weiana Auba Robe ehore Pilipo ehina bena etibaha, “Moao rerue weiana hauna herenai.” <sup>30</sup> Pilipo ebeau eao aonai Isaia mahabanai hauna ena puka netuabina aiana eona. Ba ebakaina etibaha, “Notuabina hauna anina nubabataina, u?” <sup>31</sup> Hau apa'uana weiana etibaha, “A aea ka'iohi aihona? Iba'iohi'u hauna aha'i.” Ba ia ehore Pilipo enoina kekara'au herenai kemiatu.

<sup>32</sup> Puka Robena etuabina aonai 'abina hanona na terere aihona.

“Ia hanona matoha mamoe 'abana katebaka'ana kateaoaina kateahu 'arina pinana a'i ekaikauna, 'ao matoha mamoe nahu buirana katekabena hauna 'uru'uruna aha'i 'abana, pinana a'i ekaikauna 'abi ha a'i ehina 'apuana.

<sup>33</sup> Ena 'aiaunu buonai bakai aonai ena bero tea'i obona. Tai ha ena itubu robana a'i keahuna pokina ena mauri hanona huanai epua hanopakai aba ea'i obona.”

Isa 53.7, 8

<sup>34</sup> Hau apa'uana weiana Pilipo ebakaina etibaha, “Moba'iohina'u, mahabanai hauna hanona tai robana eahuna? Ia kipona pouna ehinana 'ao hau ha pouna ehinana?” <sup>35</sup> Weiana Pilipo

ehore puka etuabina hauna 'ekanai ea'i ramana, Iesu pouna namona eba'iohina.

<sup>36</sup> Terarua taearai teao aonai bei 'ekanai ha tekara'au, ba hau apa'uana weiana etibaha, “Moihana, bei weiana, au ka'uere robe a'i ketaina pokina hana taba?”

<sup>37</sup> (Pilipo etibaha, “Koa'ikakauma mai aomu ikoinai raninai, 'uere robe koa'ina hanona enamo.” Ba hau apa'uana weiana etibaha, “Mai ao'u ikoinai na'ikakauma Iesu Keriso hanona Tirama Nahuna.”)

<sup>38</sup> Ba ehina bena rerue ebakorotina, Pilipo mai hau apa'uana terarua teriri teao bei aonai, Pilipo ehore hau weiana eba'uere robena. <sup>39</sup> Terarua beiai tekara'au raninai, Obiapaka Aubana ehore Pilipo ea'i parena. Ba hau apa'uana weiana Pilipo a'i eia muena, ia taearai eao mai aonamona. <sup>40</sup> 'A Pilipo hanona

Asoto aiaranai ewaira tina, ba ekatoto aiarakia ikoikia aokia pou namona eiroro aina eaomo Kaisarea aiaranai ekara'au.

## 9

### *Saulo Eraona Kabe. (Ih 22.6-16; 26.12-18)*

<sup>1</sup> Rani weianai weia Ierusalem aonai Saulo ena ao haiara ikoinai hanona Obiapaka te'abana haukia kebata'unakia 'ao keahu 'arinakia, buonai eao robe haukia 'arakia hauna herena. <sup>2</sup> Enoina marere ha kererena kebena keao Damaseko marea herekia. Weia Iesu tia'ikakauma taearana neianai teka'aina haukia hau mai babi'e kebirinakia keaoainakia Ierusalem wapura 'ekana. <sup>3</sup> Saulo taearai eao Damaseko aiara aba ebarina aonai mawa'eai mo ea ha kupai eriri ia ebarara ahina. <sup>4</sup> Saulo e'eho 'anoai, aia ha eona etibaha, “Saulo e! Saulo e! Taba buonai au nu'oatana'u?” <sup>5</sup> Saulo ebakai bakai etibaha, “Obiapaka e, oi tai?” Ena 'abi ebamuena etibaha, “Au Iesu nu'oatana'u hau'u. <sup>6</sup> Bariu momikiri koao aiara aonai, weia hau ha kehore oi kobabainakia haukia akakia keba'iohini'o.”

<sup>7</sup> Te'abana haukia ikoikia tekoroti a'i 'uri'urikia, pokina aia mo teona ia tai ha a'i teihana. <sup>8</sup> Saulo 'anoai emikiri mahana ebano'anakia, ia taba ha a'i eia 'apuana. Ua buonai imanai te'ebe tebaka'ana teoaina Damaseko. <sup>9</sup> Weia

wapu aihau emiaho taba ha a'i eihana, aniani ha a'i eana, bei abomo a'i einu.

<sup>10</sup> Ba a'ikakauma hauna ha Damasekoai atana Anania, ena mahabanaiai Obiapaka ia eaparina etibaha, "Anania e!" Anania eo'o e'abi etibaha, "'E! Obiapaka. Au neia'u." <sup>11</sup> Ba Obiapaka Anania ehina bena etibaha, "Momikiri koao airabuana atana 'Bero' weia Iuda ena ituai Taso hauna atana Saulo kobakai bakai aina. Pokina ia hanona nibahubari nemi-aho. <sup>12</sup> Ia emahabanai hanona hau ha atana Anania eihana nimai ia ahanai kehao'au kebahubari hanona mahana katenamo."

<sup>13</sup> Ia Anania Obiapaka ena 'abi ebamuena etibaha, "Hau neiana pouna rani bo'ona aona, Ierusalem ai emu maearima robekia bo'okia ebahaiara ki'anakia. <sup>14</sup> Ba bariu robe haukia apa'uakia hiabu tebena, kemai neia abomo oi atamu tiaparina haukia ikoikiai kebirinakia." <sup>15</sup> Obiapaka ia ehina bena etibaha, "Moao. Pokina au aba ia atina'ana ta'ara'u ia'inai keao, rama haeihaeai haukia, aiara obiakia abomo Isaraela haukia wairakiai au ata'u keiroro aina. <sup>16</sup> Haeamona au kahore kabaihana ia kehaiara ki'a baha au ata'u paunai."

<sup>17</sup> Ua buonai Anania emikiri eao, itu ai etoto, imana rua Saulo ahanai ehao'au etibaha, "Uaho'aba'u Saulo e! Obiapaka Iesu taearai omai heremuai ewaira tina hauna euhuna'u amai, oi mahamu kateno'a koiha mue abomo Auba Robeai kebabonuni'o paunai." <sup>18</sup> Beronai matoha maia unakia 'abana Saulo mahanai te'eho, ba mahana tenamo, ena ihaiha enamo mue. Emikiri eao teba'uere robena. <sup>19</sup> Ba eaniani murinai hanona huanina etabura mue.

### *Saulo Damaseko ai Eiroro.*

Wapu baika Damaseko ai emiaho a'ikakauma haukia herekiai. <sup>20</sup> Rani a'i ehoma'a aonai, Saulo emikiri Iuda haukia ekia marea ha ha aokiai eiroro ramana Iesu hanona Tirama Nahuna. <sup>21</sup> Aiana teona haukia ikoikiai teta'u ta'u huri tetibaha, "Neiana hanona Ierusalem ai Iesu tekuti aina haukia ea'i ki'a ki'a bahanakia hauna. Ba emai neia baika abomo kebirinakia keaoainakia robe haukia apa'uakia herekia, 'u?"

\* **9:22:** (22) 'ao *Mesia*

<sup>22</sup> 'A Saulo ena iroro hanona ehi-abu e'ariai 'ariai, ia ebatohana Iesu hanona Keriso.\* Ua buonai Iuda haukia Damasekoai temiaho haukia ena 'abi katebamuena taearana aha'i.

### *Saulo Epihi.*

<sup>23</sup> Wapu baika teao murinai, Iuda haukia teta'u Saulo iahu 'arina robana teahuna, <sup>24</sup> ia Saulo hanona ekia robahu aba e'jobina. Ia hanona aiara parabuna pa'abina te'ima rabina te'ima ranina Saulo kateahu 'arina paunai. <sup>25</sup> Ia murinai tika'a haukia rabi aonai Saulo areha aonai teutana parabu 'ubinai waroai tebaririna.

### *Saulo Eao Ierusalem.*

<sup>26</sup> Ba Saulo eao Ierusalem ai ekara'au raninai ena nuatae hanona a'ikakauma haukia kipokia kateto'u, ia ikoikiai teta'u aina pokina a'i te'jobina ia hanona aba Iesu nia'ikakaumana. <sup>27</sup> Ia Banaba ehore ebaraina ebaka'ana eaoaina iuhubeau haukia herekia. Saulo taearai Obiapaka aea eihana, mai Obiapaka ehore ia ehina bena hauna, haeamona Damaseko ai Iesu pouna aea eiroro ai hona mai taburana hauna poukia ehinanakia. <sup>28</sup> Weiana buonai Saulo weia kipokia Ierusalem ai temiaho, ena kaoaoai Iesu atana eiroro aina mai taburana. <sup>29</sup> Iuda maearimakia Helene maeanai tehinana haukia Saulo kipokia te'abi 'abi hanona tebaiara, buonai taearana tetabu kateahu 'arina. <sup>30</sup> Uaho'abana baika pou weiana te'jobina aonai, Saulo tebaka'ana teaoaina Kaisarea weia teuhuna eao Taso.

<sup>31</sup> Weiana Iudea, Galilea mai Samaria hanokia ikoikiai Tirama ena marea haukia aokiai baibua erama Obiapaka temariki aina mai Auba Robe baraiarai ebenakia ihobonai ekia tabura eapa'ua haeamona Tirama ena marea haukia ekia bo'o hanona ekara'au.

### *Petero Mero Hauna Aenea Ebanamona.*

<sup>32</sup> Petero hanona aiara ha ha aokiai ekananai eao mo Rudai Tirama ena maearima herekiai ekara'au. <sup>33</sup> Eka weianai mero hauna ha etabu ahina atana Aenea. Ia hanona uahomana enoti ihau aba 'ababani. <sup>34</sup> Ba Petero e'abi etibaha, "Aenea e! Iesu Keriso bariu oi nibamauri maurini'o. Momikiri, emu taba moa'i a'i harainakia." Beronai mo Aenea emikiri. <sup>35</sup> Ruda mai Saronai temiaho haukia ikoikiai hoa

weiana teihana raninai, teraona kabe Obiapaka herena teao.

*Petero Tabita Ebamauri Maurina.*

<sup>36</sup> Iopa aiaranai a'ikakauma babi'ena ha emiaho, atana hanona Tabita. (Helene maeakiai hanona Doreka.)<sup>†</sup> Rani ikoikiai aka namokia ebabai uraru haukia ebarainakia. <sup>37</sup> Rani weianai ia hanona einawa ba e'ari. Epuia teba'uere haraina ba itu aonai ikaihuri ha 'ubiai hauna aonai tebaenotina. <sup>38</sup> Ruda mai Iopa baiatakia hanona a'i ehoma'a. Ua buonai Iopa ai a'ikakauma haukia baika te'iobina Petero hanona weia Ruda ai, ba temikiri hau rua teuhunakia teao Petero herena, tenoina keao biai herekia. <sup>39</sup> Ua buonai Petero emikiri kipokia teao, ba tekara'au raninai teaoaina itu aonai ikaihuri ha 'ubiai hauna aonai tebakara'auna. Wapu baika abomo weia tekoroti tihai, Doreka maurinai habuni ibatoto mai iro'abu etainakia haukia Petero tebaihana. <sup>40</sup> Petero ehore euhunakia tekarahi ba ekaipehu ebahuba'ari. Murinai 'ari babi'ena ewairana e'abi etibaha, "Tabita e! 'Omikiri." Weiana ia mahana eba no'anakia Petero eihana ba emikiri emiati. <sup>41</sup> Petero ehore imanai ea'i ebaraina, emikiri ekoroti. A'ikakauma haukia mai wapu eaparinakia temai herena, babi'e ebamauri maurina hauna ebaihanakia. <sup>42</sup> Pou nei ana hanona Iopa aiarana ikoinai tehina otaraina, ba maearima bo'ona Obiapaka tea'ikakaumana. <sup>43</sup> Petero weia Iopai Simona poromakau paruakia nitainakia hauna herenai rani homa'ana emiaho.

## 10

*Aneru Korenelio Herenai Ewaira Tina.*

<sup>1</sup> Kaisarea aiaranai Roma huari hauna ha atana Korenelio, Italia huari haukia ikoinai hinabu hamomo ekia poki hauna. <sup>2</sup> Ia mai ena itu haukia kipokia hanona Tirama timariki aina mai ena nuatae tika'i haraina, ia ena taba bo'okia Iuda haukia uraru haukia eberuberu benakia, abomo rani ikoinai ebahuba'ari Tirama herenai. <sup>3</sup> Rani ha atiaha abiranai be- raura hoana aihau 'abana, ia emahabanai hanona Tirama ena aneru ha eihara haraina emai ia ena ituai etoto ehina bena etibaha,

"Korenelio e." <sup>4</sup> Ia mai ta'una aneru eihara 'ini'inina e'abi etibaha, "Obiapaka e, omai hanona taba?"

Aneru ia ehina bena etibaha, "Emu bahuba'ari mai emu beruberu uraru obarainakia haukia Tirama aba ea'i taeanakia ba ia hanona oi a'i nireani'o. <sup>5</sup> Bariu emu miori baika mouhunakia temeao Iopa, hau ha atana Simona atana ibaruana Petero katehina bena kipokia katemai. <sup>6</sup> Ia hanona Simona ha poromakau paruakia taba haeaihaeai nitainakia hauna ena 'ekai nemiaho, ena itu hanona poe haianai."

<sup>7</sup> Aneru 'abi weiana ebaibeni ba eka'a, murinai Korenelio ehore ena ituai ta'ara'i miorikia rua mai huari hauna ha Obiapaka ena nuatae nika'aina hauna kipokia eaparinakia. <sup>8</sup> Weiana Korenelio herenai terama haukia maikoinai hau weiakia teaihau ehina benakia, epua euhunakia Iopa teao.

*Petero Mahabanai Tabana Ha Eihana.*

<sup>9</sup> Wapu ibaruana atiahanai maearima weiakia Iopa aba tebarina hana Petero ekara'au eao itu kapena arai 'ekanai ua'a kebahuba'ari. <sup>10</sup> Mare'a e'ari, enuatae taba ha pehaea peana, aniani tiba'oru ohonamo aonai ia taba ha eihana matoha nenibi 'abana. <sup>11</sup> Kupa ikaikau eihana mai taba ha habuni panabana rarina 'abana puana bani banikiai ia'i to'o ibariri nimai hanopaka. <sup>12</sup> Habuni weiana aonai mahi aekia bani bani haukia ikoikiai, hanopakai tikara haukia ikoikiai mai 'ubiai tirobo roborobokia ikoikiai weia aonai iuta'au. <sup>13</sup> Ba aia ha ia ehina bena etibaha, "Petero e, omikiri moahu moani." <sup>14</sup> 'A Petero aia weiana ena 'abi ebamuena etibaha, "Obiapaka e, aha'i 'akina, au mahi Tirama wairanai te'opu haukia 'ao a'i terobe haukia ha a'i nani 'apuana." <sup>15</sup> Aia weiana haemona Petero ehina bena etibaha, "Tirama aba ebamaha mahanakia haukia oi 'opukia a'i kohinana." <sup>16</sup> Hoa nei ana rani aihau ewaira tina ba beronai habuni weiana hanona iberi'au emue eao kupa.

<sup>17</sup> Petero mahabanai weiana anina niraonana aonai, Korenelio euhunakia haukia Simona ena itu tetabu ahina ba temai ena ara pa'abina 'akonai tekoroti.

<sup>†</sup> 9:36: (36) Tabita mai Doreka hanona mahi atana Dia.

18 Weiana teapari tebakai bakai Simona atana ha Petero hanona weia nemiaho 'ao. 19 Petero mahabanai weiana niraona ohona aonai Auba Robe ehore ia ehina bena etibaha, "Petero e, maearima aihau hanona oi titabuni'o. 20 Momikiri, moriri moao herekia, aomu a'i kearo'ari kipokia katoao, pokina ia haukia au auhunakia."

21 Petero eriri eao hau weiakia ehina benakia etibaha, "tutabuna hauna hanona au neia'u. Emi raona ha buonai tomai, 'u?"

22 Ba ia ena 'abi tebamuena tetibaha, "Ai hanona Korenelio huari haukia hinabu hamomo nipokinakia hauna euhunamai tamai. Ia hanona bero hauna mai Tirama nimariki aina hauna Iuda haukia ikoikia hanona ia timariki aina. Tirama ena aneru ha ia ehina bena kebaiuhu koao ena itu, weiana oi taba ko'uahina hanona aiamu keona." 23 Petero ehore hau weiakia ebatotonakia ituai kipokia teparua. Erani rauraninai Petero eba'oru ba temikiri teka'a, a'ikakauma haukia baika Iopai temiaho haukia abomo ia te'abanakia kipokia teao.

#### *Petero Eao Korenelio Ena Itu.*

24 Erani ba rani haeai hanona ia Kaisarea aiaranai tekara'au. Korenelio hanona hatia'ana mai ena hau tohakia baika ebeaunakia ia kipokia Petero kate'imana. 25 Petero ituai ekara'au ba Korenelio ohi te baitabu ahi aonai Petero aena pokinai e'umuti ekuti aina. 26 Ia Petero Korenelio eberi taeana ehina bena etibaha, "Omikiri, au hanona maearima 'abaea'u oi 'abana." 27 Weiana terarua mai 'abi'abikia ituai tekatoto aonai maearima bo'ona teto'una eihanakia.

28 Ba Petero ehina benakia etibaha, "Wai to'iobi ki'a bahana Iuda hauna hanona rama haeai hauna ohi a'i katemi-aho haeamo, abomo a'i keao herena mai rauhubuna. Ia Tirama ebaihana'u hau ha 'opuna 'ao a'i erobe hauna a'i kahina 'apuana. 29 Weiana buonai emi beaubeau eao hanona beronai amai a'i aubo. E'u bakai bakai hanona neiana, taba buonai tobaiuhu au amai?"

30 Korenelio ia ena 'abi ebamuena etibaha, "Wapu bani aba teao aonai, atiaha abiranai beraura hoana aihau 'abana bariu ihobona nahomanai e'u ituai abahuba'ari aonai beronai mo hau ha ena habuni 'imare'imarena waira'uai ekoroti. 31 Ba ehina bena'u etibaha, 'Korenelio e, Tirama hanona

emu bahuba'ari aiana abeona abomo emu beruberu akakia uraru herekia haukia niraona 'ini'ininakia. 32 Ua buonai 'abi kauhuna keao Iopa, Simona atana ha Petero kemai, ia hanona hau ha poromakau paruakia nitai hauna atana Simona ena ituai nemiaho weia poe haianai.' 33 Weiana buonai 'abi auhu noanoana ewahi, ba omai hanona enamo. Ai ikoimaiai neia Tirama wairanai aba tato'una, Obiapaka oi ebahi ahini'o 'abikia ikoikia kohinanakia aiamu kataona."

#### *Petero Korenelio Ena Ituai Eiroro.*

34 Petero ena 'abi ea'i ramana etibaha, "Abi tohana, bariu a'iobi haraina Tirama hanona maearima ha a'i nitaina ia ikoikia ihoboai niba ka'anakia. 35 'Abina aha'i itubu tabana hauna ia Tirama nimariki aina abomo bero akakia nibabai hauna Tirama nihore nia'i taeana. 36 Tirama 'abi euhuna eao Isaraela maearimakia herekia hanona neiana, baibua pouna namona hana Iesu Keriso aonai nimai, ia hanona maearima ikoikia ekia Obiapaka. 37 Wai aba to'iobina hoa neiana hanona Galilea ai ea'i ramana, Ioane maearima wairakiai ba'uere robe eiroro aina murinai Isaraela hanona maikoina aonai erama. 38 Wai Iesu Nasareta hauna to'iobina, Tirama ehore Auba Robe mai hiabu ia ahanai ebakikina, Iesu eao 'ekakia ikoikia namo ebabai, mai Satani ea'i ki'anakia haukia ikoikia ebamaurinakia, pokina Tirama hanona ia e'abana. 39 Iuda aiarakia maikoina aonai mai Ierusalem mai ebabai tabakia ikoikia mahamaiai taihanakia. Iuda haukia tehore matiu ibiri ropo 'arunai tekoko 'auna e'ari. 40 Ia wapu ibaihaunai Tirama ehore Iesu 'ariai ebamikirina mai ebawaira tinana, 41 maearima ikoikia wairakiai aha'i, ai Tirama aba etina'anamai haumi wairamaiai mo. Ia 'ariai emikiri murinai kipokia taniani haeamo abomo bei tainu haumi neiamai hanona ia pouna tahinana. 42 Ia ai ehina benamai maearima herekia pou namona katairoro aina haeamona katahina pou haraina weiana Tirama ehore ia ea'i taeana mauri haukia mai 'ari haukia kebabakainakia haunai ebaona. 43 Mahabanai haukia ikoikia ia pouna aba tehina haraina, weiakia ikoikia Iesu kate a'ikakaumana haukia hanona ia atanai ekia ki'a kehina hao."



*Rama Haeai Haukia Auba Robe Tea'ina.*

<sup>44</sup> Petero 'abi neiakia nehina ohonakia aonai, weiakia tibahu haukia ikoikiai ahakiai Auba Robe eriri. <sup>45</sup> Iuda haukia weiakia Iesu tia'ikakaumana mai Petero ti'abana haukia teta'uta'u huri, pokina Auba Robe ena beruberu hanona rama haeai haukia ahakiai abomo eba ririna, <sup>46</sup> haeamona ia aiakia teona maea haeaihaeai ti'abi'abi mai Tirama tibanamona. Weiana Petero e'abi etibaha, <sup>47</sup> "Maearima neiakia hanona Auba Robe aba tea'ina aika ha'ina ihobonai. Ba tai ia kebamuenakia beiai a'i kate'uere robe?" <sup>48</sup> Weiana Petero ia ehina benakia Iesu Keriso atanai kate'uere robe. Ba te'uere robe murinai Petero tenoina wapu baika weia herekiai kemiaho.

**11***Petero Taba Erama Hauna Ehina Haraina Ierusalem.*

<sup>1</sup> Iuhubeau haukia mai uaho'aba Iudeai temiaho haukia hanona rama haeai haukia abomo Tirama ena 'abi aba tea'i taean hauna pouna teona. <sup>2</sup> Weiana Petero emue Ierusalem ekara'au raninai, Iuda haukia weiakia Iesu tia'ikakauma haukia ia herenai te'abi pahih, <sup>3</sup> tetibaha, "Oi a'i tetarenakia haukia herekia oao ekia ituai kipokia toaniani haeamo, 'u?"

<sup>4</sup> Weiana Petero ehore taba terama haukia ikoikiai ia wairakiai ehina harainakia. <sup>5</sup> Ia e'abi etibaha, "Iopai ua'a rani ha e'u bahuba'ari aonai amahabanai, ba taba ha kupai eriri aihana ihana matoha habuni rarina 'akina 'abana, puana bani banikiai ia'i to'o ibariri here'u. <sup>6</sup> Aihaiha haraina aona tabakia ikoikiai hanona mahi aekia banibani tika'a haukia, hanopakai tikara tabakia mai 'ubiai tirobo roborobokia aihanakia. <sup>7</sup> Ba aia ha aona ehina bena'u etibaha, 'Petero e, omikiri moahu 'ari moani.' <sup>8</sup> Ia au a'abi atibaha, 'Obiapaka e, aha'i 'akina, au 'opu tabakia 'ao a'i terobe tabakia ha pina'uai a'i nani 'apuana.' <sup>9</sup> Iamo aia ibaruana haeamona kupai emai etibaha, 'Tirama ebamaha mahanakia tabakia hanona oi 'opukia a'i kohinanakia.' <sup>10</sup> Hoa neiana rani ibaihauna ewaira tina. Ba taba weiakia ikoikiai mai habunina haeamona iberi'au mue kupa eao.

<sup>11</sup> Rani weianai hau aihau Kaisareai teuhunakia temai here'u haukia beronai

amiaho itunai tekara'au. <sup>12</sup> Aonai Auba Robe ehina bena'u a'i kabaoao ia kipokia kataeao. Uaho'abaka neiakia 'abai hau kipokia taeao Kaisareai hau weiana atana Korenelio ena ituai takatoto. <sup>13</sup> Ia ehina benamai, aneru ha ena ituai ewaira tina ba ia ehina bena etibaha, 'Hau harua kouhunakia kateao Iopa ai ua'a Simona atana ha Petero katehina bena kemai. <sup>14</sup> Ia kehore 'abi kemaiaina, weiana oi mai emu itu maearimakia kipokia ibamaurimi.' <sup>15</sup> E'u 'abi a'iramana aonai Auba Robe ia ahakiai eriri ihobona 'uainai aika ahakai eriri 'abana. <sup>16</sup> Weiana aonai Obiapaka ena 'abi araona tinana, 'Ioane beiai eba'uere robe 'a wai hanona Auba Robeai kato'uere robe.' <sup>17</sup> Weiana aika Obiapaka Iesu Keriso ha'ikakauma aonai Tirama ena beruberu ebenaka ihobonai beruberuna hamona ia abomo ebenakia. Ba au maearima aea homa'u Tirama ena aka weiana kakaiabuna?"

<sup>18</sup> Iuda a'ikakauma haukia 'abi neiana teona raninai ekia baoao baoao tebapuanakia iamo Tirama tebanamona tetibaha, "Tirama ehore rama haeai haukia abomo aba bero ebenakia weiana ekia ki'ai kateraona kabe raninai mauri kebenakia."

*Antioka Haukia Keriso Ena Maearimai Teao.*

<sup>19</sup> Stefano ena 'ari murinai a'ikakauma haukia terama otaraina, baika atau'a tohana teao Foenikia, Kupuro hanokia mai Antioka, Iuda haukia kipokia mo baiatakiai pou namona teba'iobi aina. <sup>20</sup> Ia a'ikakauma haukia baika hanona Kupuro mai Kurene haukia. Ia teao Antioka ai tekara'au raninai rama haeai haukia abomo tehina benakia. Obiapaka Iesu pouna namona teiroro aina. <sup>21</sup> Obiapaka ena hiabu hanona ia herekiai paunai maearima bo'ona 'akina tea'ikakauma Obiapaka herena teao.

<sup>22</sup> Pou neiana eao Ierusalem a'ikakauma haukia teona, weiana Banaba teuhuna Antioka keao. <sup>23</sup> Ia Antiokai ekara'au Tirama maearima ua ebanamo harai aihonakia eihana raninai ia aona hanona enamo, haeamona ikoikiai eataburanakia Obiapaka aiana kateka'aina mai aokia ikoinai. <sup>24</sup> Banaba hanona hau namona Auba Robeai ebonu mai ena a'ikakauma etabura. Ua buonai maearima bo'ona temai Obiapaka herena.

<sup>25</sup> Weiana murinai Banaba emikiri Taso eao Saulo ketabuna. <sup>26</sup> Etabu ahina raninai eaoaina Antioka. Ihau hamona terarua ua'a, a'ikakauma haukia kipokia teto'u abomo maearima bo'ona teba'iobinakia. Weia Antiokai Iesu tia'ikakaumana haukia weiakia atakia teapari ramana Keriso ena maearima.\*

<sup>27</sup> Rani weianai mahabanai haukia baika Ierusalemairi teriri temai Antioka. <sup>28</sup> Ha atana hanona Agabo emikiri Auba Robe ena hiabuai arobo rarina 'akina hanopaka maikoinai kerama hauna pouna ehinana. (Arobo weiana hanona Klaudio ena obia raninai erama toha.) <sup>29</sup> Weiana a'ikakauma haukia weia Antiokai hanona aokia tebahamona tenuatae ia ha ha ekia tabura ihobonai barairarai katetiu ahina uaho'abakia Keriso aonai weia Iudea ai temiaho haukia 'eukia. <sup>30</sup> Ba ua tebabai aiho. Ekia beruberu hanona Banaba mai Saulo imakiai teutana ba ia terarua tehore beruberu weiana teaoaina Iudeai a'ikakauma haukia te'uai ainakia haukia katebenakia.

## 12

### *Heroda Iakobo Eahu 'arina Ba Petero Tebawapurana.*

<sup>1</sup> Ua raninai Heroda Obia hauna ehore Tirama ena marea haukia baika ea'inakia enuatae kea'i ki'anakia paunai. <sup>2</sup> Ia ehore Ioane a'ana Iakobo akiua ai ehara 'arina, <sup>3</sup> Heroda Iuda haukia eihanakia babai weiana hauna teanonamo aina, ua buonai ia ehore Petero abomo ea'ina. Rani weiana hanona Iuda haukia ekia tatu ha Parawa ibakupu aha'i tatuna ranina. <sup>4</sup> Ea'ina wapura itunai eka-iabuna, huari haukia harau haea 'abai-hau imakiai eutana, bani bani kate'imana. Heroda ena raona hanona tatu murinai kebakarantina mako wairakiai kebapakaina. <sup>5</sup> Ua buonai Petero wapura itunai te'imana, ia a'ikakauma haukia hanona Tirama tenoi tabura taburana Petero paunai.

### *Aneru Petero Ebaraina Wapura Itunai Ebakarantina.*

<sup>6</sup> Heroda eraonana kebakarantina na ehoma rani weiana a'i nimai baha rabinai, Petero hanona huari haukia rua baiatakiai enoti eparua mai ibirikia rua. Ba huari haukia rua pa'abi 'akonai

tebai'ima. <sup>7</sup> Aonai biai mo Obiapaka ena aneru ia herenai ekoroti eana ikaihuri ebaeana, aneru ehore Petero robuna eati 'apuana, ebaona etibaha, "Omikiri biai," raninai imana rua tabiri te'eho. <sup>8</sup> Aneru ehore Petero ehina bena etibaha, "Emu habuni mobatotona, emu tamaka moaba'au." Petero ua ebabai aiho, aneru e'abi mue, "Emu iro'abu moa'ina moro'abuni'o, muri'uai koka'a." <sup>9</sup> Petero wapura ituna ikaihurina ekarahi aneru murinai eka'a, ia a'i ebabatina aneru ena aka weiana hanona tohana 'ao nimahabanai. <sup>10</sup> 'Ima haukia kori 'uaina mai ibaruana tekaboinakia teao auri pa'abina weiana katekarahi aiarai katetoto hauna kipona ekaikauna, ba terarua tekarahi aiara taearana teka'a teao aonai beronai aneru Petero herenai ekaobo.

<sup>11</sup> Weiana Petero aona ea e'abi etibaha, "Bariu au a'iohi haraina Obiapaka ehore ena aneru euhuna, Heroda ena hiabu ba'anai mai Iuda haukia ekia raona weiana here'uai katebabai aokiai ebaumaurina'u." <sup>12</sup> Kipona aonai eraona raona haraina, ba beronai Maria ena itu eao, Maria weiana hanona Ioane Mareko hinana, a'ikakauma haukia bo'ona weia teto'una tibahuba'ari. <sup>13</sup> Petero itu weiana pa'abinai ehara hara, ba ta'ara'i uahona ha atana Roda eao pa'abi kekaikauna. <sup>14</sup> Uaho Petero aiana e'iohina raninai, aona enamo ki'a baha, pa'abi a'i ekaikauna ia ebeau emue eao ehina benakia etibaha, "Petero hanona pa'abi 'akonai ekoroti." <sup>15</sup> Ia uaho tehina bena tetibaha, "Oi nuao 'abaea!" 'A uaho e'abi tabura weiana hanona tohana. Ua buonai ia te'abi tetibaha, "Na pa'e Petero ne'imana aneruna."

<sup>16</sup> 'A Petero ehara hara oho paunai, ia pa'abi tekaikauna ba teihana raninai teta'u ta'u huri. <sup>17</sup> Petero imanai ehara abunakia urukia keaha'i, ba Obiapaka wapura itunai aea ebakarahi aihona hauna pouna ehinana, abomo ehina benakia Iakobo mai uaho'abakia herekiai pouna katehinana. Ba ekaobo 'eka ha eao.

<sup>18</sup> Raurani 'amarinai atetua rarina erama huari haukia kipokia baiatakiai tebakai bakai Petero herenai taba erama. <sup>19</sup> Heroda e'abi katetabuna, ia a'i tetabu ahina, ua buonai i'imana haukia

\* 11:26: (26) Nao maeana 'Christian'.

ebakainakia ba ena 'abiai teahu 'arinakia. Neiana murinai Heroda Iudea ehabona eao Kaisarea ua'a emiaho.

### *Heroda E'ari.*

<sup>20</sup> Heroda hanona Turo mai Sidono maearimakia eopuereai ki'anakia, ua buonai ikoikiai aokia tebahamona herena kateao. Kori'uaina Heroda ena itu nipoki aina hauna atana Blasto herena teao teba'amena temaiaina ia taikiai, ba teao Heroda herena baibua tenoi aina. Pokina ekia aniani hanona obia hauna weiana ena hanoai nimai.

<sup>21</sup> Heroda etina'ana wapunai, ia ehore ena obia habunina ebatotona ena obia imia'aunai emia'au maearima eiroronakia. <sup>22</sup> Ba aiara maearimakia ia teioaina tetibaha, "Neiana hanona Tirama ha aiana, ia maearima ha aiana aha'i." <sup>23</sup> Weiana aonai Obiapaka ena aneru beronai Heroda eahu obona pokina ia Tirama a'i ebanamona paunai, 'erau'erau ia hauanina teana ba e'ari.

<sup>24</sup> Ia Tirama ena 'abi hanona etabura haemona erama otaraina, a'ikakauma maearimakia hanona ebo'o hao bo'o hao.

<sup>25</sup> Banaba mai Saulo ekia aka weiana moni tebenakia hauna tebaorena raninai Ierusalemata tehabona, Ioane atana ha Mareko abomo tebaka'ana kipokia Antioka teao.

## 13

### *Banaba Mai Saulo Teuhu Ahinakia.*

<sup>1</sup> Antioka mareana aonai mahabanai mai bamarere haukia baika atakia neiakia, Banaba, Simeona (hau umuna), Lukio (Kurene hauna), Manaen (Heroda ohi tekiro haemo) mai Saulo. <sup>2</sup> Ia tehore Obiapaka tekuti aina mai teani robe aonai, Auba Robe ehina benakia etibaha, "Banaba mai Saulo ohi katoa'i taeanakia au pau'uai, au anuatae aina akana katebabaina." <sup>3</sup> Weiana teani robe mai tebahuba'ari murinai, imakia ia terarua ahakiai tehao 'au ba teuhu ahinakia.

### *Kupuro ai Teiroro.*

<sup>4</sup> Auba Robe ehore Banaba mai Saulo ohi eahunakia teriri teao Seleukia ai, weia haemona aunohiai tebeau ahi teao Kupuro kereibuanai. <sup>5</sup> Salami ai tekara'au weia Tirama ena 'abi Iuda haukia ekia marea aokiai teiroro aina Ioane Mareko abomo weia herekiai ia ebarainakia.

<sup>6</sup> Kereibua maikoinai tekabanai teao Pafu ai hanona hau ha tetabu ahina, Iuda haukia ekia mea hauna mai mahabanai bai'oina hauna ha atana Bariesu. <sup>7</sup> Ia hanona kereibua weiana ena Kabana hauna Seregio Paulo aobero hauna ena hau. Kabana hauna ehore Banaba mai Saulo eparinakia wairanai, pokina ena nuatae Tirama ena 'abi aiana keona. <sup>8</sup> 'A Bariesu atana ibaruana Eluma (Helene maeanai anina hanona mea hauna) ia terarua ekaiabunakia Kabana hauna ekia 'abi paunai a'i mea'ikakauma. <sup>9</sup> 'A Saulo, atana ibaruana hanona Paulo, Auba Robe ai ebonu 'auna, mea hau weiana eiha 'ini'inina, <sup>10</sup> ehina bena etibaha, "Oi Tiaporo nahuna! Oi hanona taba namokia ikoikiai nu'oatanakia aomu bai'oi mai ki'a akakiai ebonu. Obiapaka ena 'abi tohakia ikoinai nua'i banai bai'oi ai nubaonakia. <sup>11</sup> Bariu Obiapaka imana hanona oi ahamuai kehore 'auna aonai mahamu kateki'a, rani papana beraura eana a'i koihana." Beronai Eluma eonobaina 'abu mai wapura mahana tekaiabuna, maearima enoinakia ibaka'ana hauna ha pehaea imanai pe'ebe pebaka'ana. <sup>12</sup> Kabana hauna hoa weiana erama eihana raninai ea'ikakauma, pokina Obiapaka ena ba'iobi 'abikiai eta'uta'u huri.

### *Paulo Mai Banaba Teao Pisidia Hanona Antiokai Teiroro.*

<sup>13</sup> Paulo mai te'abana haukia kipokia Pafu ai tebeau ahi teao Perega, Pamfulia hanonai tekara'au, weia Ioane Mareko ia ehabonakia emue Ierusalemata eao. <sup>14</sup> Paulo mai Banaba ohi Perega ai temikiri teao Pisidia hanona Antioka ai tekara'au. Weia beraura robe aonai teao Iuda haukia ekia mareai tekatoto temiati. <sup>15</sup> Mose ena rauhuhu pukana mai mahabanai haukia tererenakia pukakia tetuabinakia murinai marea poki haukia tebaiuhu eao herekiai tetibaha, "Uaho'abamai e, emai nuatae emi batabura 'abina ha re'a maearima neiakia herekiai patohinanakia."

<sup>16</sup> Paulo emikiri imanai etori abunakia etibaha, "Isaraela haumi mai rama haesai Tirama tokuti aina haumi e, aia'u tomona. <sup>17</sup> Isaraela hauka eka Tirama ehore kupuka 'aba'abaka etina'anakia abomo haukia ebabo'onakia ekia miaho Aigupito aonai, haemona ia ena hiabu

apa'uanai Aigupito ai ebakarahinakia.  
<sup>18</sup> Ihau bariabui 'abana hano'akunai herekiai ebapahihi. <sup>19</sup> Ia ehore Kanana hanopakakia 'abaihau hamomo ebapuru-runakia. Hanokia ewatenakia Isaraela hanokiai teao ihau hinabu bani reana imabui 'abana aonai. <sup>20</sup> Taba neiakia murikiai bakai haukia ebamikirinakia kate'uainakia emaimo mahabanai hauna Samuela ena rani ai.

<sup>21</sup> "A ia tehore obia 'arana ha tenuatae aina hanona Tirama ehore Beniamina itubuna hauna ha, Kisa nahuna Saulo ebenakia, ihau bariabui aonai eobia.

<sup>22</sup> Tirama Saulo ea'i obona murinai Davida ea'i taeana ekia obia 'aranai eao. Ia pouna ehinana etibaha, 'Iese nahuna Davida abatabu ahina anuatae aina, ia hanona e'u nuatae akakia ikoikiai kebabainakia.'

<sup>23</sup> Tirama ena 'abi'uai ihobonai Davida ena rama haunai Isaraela maearimakia kebamaurinakia hauna ebamikirina, weiana hanona Iesu.

<sup>24</sup> "Iesu ena aka a'i ea'i rama bahana aonai Ioane hanona aba eiroro 'uai Isaraela maearimakia ikoikiai ekia ki'ai kateraona kabe mai kate'uere robe. <sup>25</sup> Ioane ena aka aba kepua aonai maearima ehina benakia etibaha, 'Wai turaonana au hanona tai? Au hanona Keriso aha'i. Ia hanona muri'uai nimai, au hana a'i anamo ena tamaka warokia a'i karubunakia.'

<sup>26</sup> "Uaho'aba'u Aberahamo ramana haukia nahukia abomo wai rama haeai Tirama tokuti aina haumi e, Tirama ehore bamauri 'abina neiana aba euhuna emai aika herekai. <sup>27</sup> Ierusalem a'i temiaho haukia mai te'uai ainakia haukia a'i te'iohina Iesu hanona bamauri hauna. Abomo beraura robe ai rani ikoikiai tetuabina 'abina weiana mahabanai haukia tererena hauna obona a'i teobo, Iesu aka ki'a haunai tebaona, weiana hanona mahabanai haukia ekia 'abi aba etohana. <sup>28</sup> Iesu kateahu 'arina ena pokina ha a'i tetabu ahina, weiana Pilato tenoina 'ari 'ekanai kehorotina. <sup>29</sup> Ia 'abina puka robenai terere 'uainakia ihobonai akakia ikoikiai tebaorenakia murinai, ia e'ari hauanina matiu ibiri ropo 'ubina tea'i obona 'ariahanai tehorena. <sup>30</sup> Ia Tirama ehore Iesu 'ariai ebamikiri muena.

<sup>31</sup> Weiana murinai, Iesu hanona rani bo'ona kipokia teka'a Galilea ai ecomo Ierusalem ai haukia herekiai ewaira tina.

Bariu maearima weiakia hanona ia mahakiai teihana hauna pouna tehinana Isaraela haukia wairakiai.

<sup>32</sup> "Ua buonai ai abomo pou namona weiana Tirama 'aba'abaka herekiai e'abi'uai aina hauna tamaiana wai heremi. <sup>33</sup> Tirama hanona Iesu 'ariai ebamikirina weianai ena 'abi'uai 'aba'abakia herekiai ebatohana. Salamo ibaruana aonai abomo Iesu pouna ehinana etibaha,

'Oi hanona au Naha'u.  
 Bariu rani neianai  
 au hanona oi Hamamu.\*

Sal 2.17

<sup>34</sup> Tirama Iesu 'ariai ebamikirina, ba 'ariahana aonai a'i keburu buru. Weiana hanona ena 'abi puka robenai hauna ebatohana,

'Au kahore Davida herenai  
 a'abi'uai aina weiana erobe mai  
 etohana hauna wai kabenimi.'

Isa 55.3

<sup>35</sup> Salamo haeai aonai abomo na e'abi aiho,

'Emu robe hauna hanona  
 a'i kohabo 'abaeana a'i  
 keburu buru.'

Sal 16.10

<sup>36</sup> Davida ena mauriai hanona Tirama ena nuatae akakia ebabai, murinai e'ari kupuna 'aba'abana herekiai tehorena, haeamona hauanina 'uriai eburu buru.

<sup>37</sup> Ia Tirama 'ariai ebamikiri muena hauna hanona 'uriai a'i eburu buru.

<sup>38</sup> Ua buonai uaho'aba'u e, tanuatae kato'iohina Iesu paunai ki'a ihina haona pouna hanona wai heremiai tairoro aina.

<sup>39</sup> Tirama ehore Iesu tia'ikakaumana haukia hanona bero ebenakia, pokina Mose ena rauhubu'ai 'ekakia ikoikiai wai bero a'i katotabu ahina. <sup>40</sup> Ua buonai kato'ima 'ima harainimi mahabanai haukia 'abi tabana tehinana hauna heremiai a'i merama. Na te'abi aiho,

<sup>41</sup> "Uahi'uahi haumi,  
 tomota'uta'u huri ba  
 tomo'ari baihana.

Au emi raniai taba ha kababaina,  
 hau ha pekikipa haraina  
 iamo a'i kato a'ikakaumana.' "

Hab 1.5

<sup>42</sup> Paulo mai Banaba marea ai tikarahi aonai, maearima ia tenoinakia pou neiakia waira rani robenai katehina mue herekiai. <sup>43</sup> To'u epua murinai,

\* 13:33: (33) 'ao abaramani'o.



Iuda maearimakia mai rama haeai maearimakia Tirama tekuti aina ba Iuda haukia baiatakiai tetoto haukia bo'okia Paulo mai Banaba murikiai te'au. Ia terarua maearima weiakia tebahi ahinakia Tirama ena aoko'o hoana aonai katemiaho.

<sup>44</sup> Rani robena ibaruanai aiarai temiaho haukia ikoinai temai tebararona Tirama ena 'abi aiana kateona. <sup>45</sup> 'A Iuda haukia hanona to'u haukia teihanakia raninai tewamuru ki'a, Paulo 'abi ehinankia haukia tea'i ki'anakia haeamona 'abi ki'a obokia tehina ia herenai. <sup>46</sup> Ia Paulo mai Banaba te'abi tabura tetibaha, "Tirama ena 'abi hanona wai pato'iobi 'uaina, ia wai hanona tubaki'ana haeamona kipomi ki'a 'ekanai tuhorotini mauri banaibanai ai tonuatae aina, ua buonai ai aba rama haeai haukia herekia taeao. <sup>47</sup> Obiapaka na ehinabe aihonamai, 'Au oi nahorotini'o rama haeai haukia ibaeakia ai koao, abomo bamauri koaoaina hanopaka puana.' "

Isa 49.6  
<sup>48</sup> Rama haeai haukia aia weiana teona raninai aokia enamo ba Obiapaka ena 'abi tebanamona. Weiakia Tirama etina'anakia mauri banaibanai katea'ina haukia hanona tea'ikakauma. <sup>49</sup> Ba Obiapaka ena 'abi hanona hano weiana maikoina aonai teuhu otaraina. <sup>50</sup> Ia Iuda haukia tehore obia babi'ekia weiakia Tirama tekuti aina haukia mai aiara haukia apa'uakia aokia teani tekai ta'a ta'anakia, Paulo mai Banaba ohi te'oatanakia haeamona hano weiana aonai teu'u ahinakia. <sup>51</sup> Paulo mai Banaba hanona baki'a aiarana weiana herenai aekia apurorokia teahuahu obonakia ba teao Ikonio. <sup>52</sup> A'ikakauma haukia weiakia Antioka ai temiaho haukia aokiai enamo mai Auba Robe ai tebonu.

## 14

### *Paulo Mai Banaba Ikonio ai.*

<sup>1</sup> Antiokai tebabaina ihobonai Ikonio ai abomo Paulo mai Banaba ohi Iuda haukia ekia marea aonai tekatoto teiroro, Auba Robe ena baraiharai ai weiana ekia iroro harai buonai Iuda haukia mai rama haeai haukia bo'ona 'akina tea'ikakauma. <sup>2</sup> 'A Iuda haukia baika a'i tea'ikakauma haukia tehore rama haeai haukia haiakia tekui tea'ikakauma haukia kate'oatanakia. <sup>3</sup> Terarua rani homa'ana

weia temiaho mai taburakia Obiapaka pouna tehinana abomo hoa mai bata'uta'u huri akakia tebabainakia, weianai Obiapaka hanona ena aoko'o hoana 'abina teiroro aina hauna ebatohana. <sup>4</sup> Weiana aiara apa'uana aonai maearima kipokia tewatenakia, baika teao Iuda haukia herekia harua teao iuhubeau haukia herekia. <sup>5</sup> 'A rama haeai haukia mai Iuda haukia ekia aiara te'uai aina haukia kipokia teroba ahu, iuhubeau haukia rua katebatae ainakia abomo piharai kateahu 'arinakia. <sup>6</sup> Terarua pou teona raninai te'uru Lukaonia hanona aonai Lusterama mai Derebe aiarakia herekia teao. <sup>7</sup> Weia pou namona teiroro aina.

### *Paulo Mai Banaba Lusterama ai.*

<sup>8</sup> Lusterama aiaranai 'ome hauna ha, ia erama hanona a'i eka'a uahomana mo emiaho. <sup>9</sup> Hau weiana Paulo e'abi'abi aiana ebahuaina. Paulo hanona hau weiana eiha 'ini'inina ba ebabatana hau weiana ena a'ikakauma Tirama herenai hauna kehore aba kebamaurina. <sup>10</sup> E'abi aota etibaha, "Momikiri mokoroti!" Hau weiana beronai erobo taea ekoroti haeamona ekaoao kaoao.

<sup>11</sup> Mako hoa weiana Paulo ebabaina hauna teihana raninai Lukaonia maeanai teio tetibaha, "Tirama hanona aba maearimai teao teriri temai herekai." <sup>12</sup> Temikiri Banaba teaparina Deo, weiana ekia tirama ha atana, Paulo teaparina Hereme, weiana abomo ekia tirama ha atana teaparina pokina ia hanona 'abi ihinana hauna. <sup>13</sup> Deo ena marea hanona aiara apa'uana pa'abina 'akona wairanai, ena robe haukia poromakau koa baika mai taitaikia teoainakia pa'abi 'akonai, weia maearima kipokia kuti akakia katebabainakia iuhubeau haukia herekiai.

<sup>14</sup> Paulo Banaba ohi pou weiana teona raninai ekia habuni tetapanakia tebeau toto to'u haukia baiatakiai teio tetibaha, <sup>15</sup> "Emai hau e, taba buonai hoa neiana tubabainakia? Ai hanona maearima 'abaeamai wai ihobomi. Ai tamai neia pou namona tahinana hanona wai kuti akakia ki'a obokia neiakia herekiai katokapare, mauri Tiramana weiana kupa hanopaka mai akupaka ebabainakia abomo aokia tabakia ikoikiai ebabainakia hauna kato a'ikakaumana. <sup>16</sup> Tirama hanona 'uaina raninai hanopaka haeai

haeai haukia ehabonakia kipokia ekia nuatae taearakiai katemauri. <sup>17</sup> Iamo kipona ibawaira tinana, aka namokia ia ebagai abara kupai nibatibona heremiai, hano anikia ekia rani tohakiai nibenimi, nuami niba kironakia mai aomi niba aonamona.” <sup>18</sup> Terarua ua te'abi aiho iamo mai aro'arikiai to'u haukia kuti akana katebabaina haukia tebamuenakia.

<sup>19</sup> Ia Iuda haukia baika ua'a Pisidia Antioka mai Ikonioai temai haukia tehore to'u haukia aokia teani epua temikiri Paulo piharai teahuna teberina teaoaina aiara apa'uana parabuna kapenai, teraonana ia hanona aba e'ari. <sup>20</sup> Ia a'ikakauma haukia tehore herena tekori kaiarona raninai, Paulo emikiri ba eao aiara apa'uana aonai ekatoto mue. Erani hanona Banaba ohi temikiri teao Derebe.

### *Paulo Mai Banaba Temue Teao Suria Hanona Antioka.*

<sup>21</sup> Paulo mai Banaba weia Derebeai pou namona teiroro aina ba maearima bo'ona temaiainakia Iesu i'abana haukiai teao. Weiana murinai temue teao Lusteria Ikonio mai Pisidia Antioka. <sup>22</sup> Eka weiakiai ia tehore Iesu i'abana haukia teba taburanakia abomo aokia tebakironakia a'ikakauma tohanai katemiaho, tehina benakia tetibaha, “Aika hanona atetua bo'okia nahomakia aokiai kahatoto 'uai ba Tirama ena obia aiaranai kahakatoto.” <sup>23</sup> Tirama ena marea ha ha aokiai Paulo mai Banaba hanona 'uai haukia tea'i taeanakia mai anirobekiai tebahuba'ari ba tia'ikakaumana Obiapakana imanai teutanakia.

<sup>24</sup> Murinai terarua temikiri Pisidia hanonai tekabanai temai Pamfulia hanonai tekara'au. <sup>25</sup> Ba weia Peregai pou namona teiroro aina murinai teriri teao Atalia aiaranai. <sup>26</sup> Weia terarua aunohiai tehe'au tebeau temue Antioka, 'uainai Antioka neianai tea'i taeanakia Tirama ena aoko'o hoana aonai kateaka, ba aka neiana hauna bariu aba tebaorena. <sup>27</sup> Antiokai tekara'au raninai terarua tehore a'ikakauma haukia teba to'unakia, Tirama taba ebagai ia imakiai hauna mai rama haeai haukia ekia a'ikakauma taearana ekaikauna hauna wairakiai pouna tehinana. <sup>28</sup> Terarua rani homa'ana weia a'ikakauma haukia kipokia temiaho.

## 15

### *Ierusalemmai Tirama Ena Marea Haukia Teto'una.*

<sup>1</sup> Iuda haukia tia'ikakauma haukia baika Iudeai temai Antiokai a'ikakauma haukia teba'io binakia tetibaha, “Mose ena rauhuhu ihobonai a'i katetarenimi raninai wai hanona bamauri a'i katoa'ina.”

<sup>2</sup> 'Abi weiana paunai Paulo mai Banaba ohi maearima weiakia kipokia tebaihara tae eaomo tebaiara ki'a, ua buonai Tirama ena marea haukia tehore Paulo mai Banaba ohi tea'i taeanakia a'ikakauma haukia baika kipokia kateao Ierusalem, weia iuhubeau haukia mai 'uai haukia herekiai 'abi weiana katebakai bakaiaina.

<sup>3</sup> Tirama ena marea haukia tehore ia teuhunakia, weiana Foenikia mai Samaria hanokiai tekabanai aonai, rama haeai haukia ekia mauri aea tebaibenai aiho hauna pouna tekikipana. Pou neiana teona hanona a'ikakauma haukia ikoikiai teonamo ki'a.

<sup>4</sup> Ia Ierusalemmai tekara'au raninai Tirama ena marea haukia, iuhubeau haukia, mai 'uai haukia tehore ia tea'i taeanakia, ba Paulo mai Banaba ohi Tirama taba ebagai ia imakiai hauna ikoikiai wairakiai pouna tehinana.

<sup>5</sup> A'ikakauma haukia baika weiakia Parisea itubunai tekarahi haukia temikiri te'abi tetibaha, “Rama haeai haukia kahatarenakia abomo kahahina benakia Mose ena rauhuhu hanona kate'ima haraina hanona mauri banaibanai katea'ina.”

<sup>6</sup> Weiana iuhubeau haukia mai 'uai haukia kipokia teto'u atetua 'abina weiana teroba ahuaina. <sup>7</sup> Rani homa'ana tebaihara tae murinai Pereto emikiri e'abi etibaha, “Uaho'aba'u e, aba to'io bina Tirama ehore wai baiatamiai au etina'ana'u pina'uai pou namona kahinana rama haeai haukia kateona katea'ikakauma. <sup>8</sup> Maearima aokia e'io binakia Tiramana ehore aika herekai ebagai ihobonai rama haeai haukia abomo Auba Robe ebenakia, hoa weianai Tirama ia ea'i taeanakia hauna eba-tohana. <sup>9</sup> Ia mai aika kipokia baiataka a'i ebahaeaina, Tirama ehore ekia a'ikakauma paunai aokia ebaumaha mahanakia ia wairanai. <sup>10</sup> Ia aehoma buonai Tirama tuhobona 'aba'abaka 'ao aika Mose ena rauhuhu ika'aina pumana habuana a'i etainaka hauna a'ikakauma haukia ahakiai tuhore 'auna?

11 Aika naha'ikakauma, ia bamauri tia'ina ihobonai, Obiapaka Iesu ena aoko'o hoana paunai bamauri kaha'ina."

12 To'u haukia ikoikiai 'uru'urukia aha'i, ia Banaba mai Paulo ohi imakiai Tirama hoa mai bata'uta'u huri akakia rama haeai haukia herekiai ehabainakia haukia poukia tehinanakia hanona aiakia tiona.

### *Iakobo Ena Iroto.*

13 Ia ekia 'abi eore murinai Obiapaka hatina Iakobo emikiri e'abi etibaha, "Uaho'aba'u e, aia'u tomona.

14 Simona\* aba ehinabe harainaka Tirama ehore rama haeai haukia eraonanakia, kori'uaina ia baiatakiai maearima aea ea'i taea aihonakia ia 'euna. 15 Babai neiana hanona mahabanai haukia ekia 'abi kipokia teihobo, na terere aihona,

16 'Neiana murinai au kamue kamai, Davida ena obia aiarana e'eho hauna kabakori muena. Te'iti'iti haukia kabamahamaha muenakia.

17 Weiana maearima harina temauri haukia ikoinai mai rama haeai haukia weiakia ata'uai aparinakia au 'eu'u ai kateao haukia ikoikiai hanona au Obiapaka katetabuna'u.

18 Obiapaka ua e'abi aiho, 'abi neiana hanona aba ua'i baha eba'iohi aina.'

Amo 9.11, 12

19 Ua buonai e'u raona hanona rama haeai haukia weiakia Tirama herena timai haukia ekia taeara a'i kahabapahihi ki'a bahana. 20 Namona hanona marereai kahahina benakia, kaiba'uku teberuberu benakia tabakia Tirama wairanai te'opu haukia a'i kateani, a'i katenabau ki'a, mai mahi 'akokia tebato'o 'arinakia haukia a'i kateani, abomo aruarukia a'i kateinu. 21 Pokina 'uaina raninai emai mo bariu Mose ena rauhuhu weiakia hanona beraura robe ikoikiai aokiai tetuabina marea ha ha aokiai abomo pouna teiroro aina aiara ikoikiai aokiai."

### *To'u Haukia Rama Haeai Haukia Herekiai Marere Tetiu ahina.*

22 Ba iuhubeau haukia mai 'uai haukia Tirama ena marea haukia ikoikiai kipokia teraonana weia baiatakiai maearima baikia katea'i taeanakia Paulo mai Banaba kate 'abanakia Antioka kateao, ba tea'i

taeanakia haukia neiakia, Iuda atana tea-parina Barasaba mai Sila, terarua hanona maearima i'uaiakia haukia uaho'abakia baiatakiai. 23 Marere na terere aihona ka'a haukia tebenakia,

"Ai iuhubeau mai 'uai haumai, ai uaho'abami, emai banamo 'abina niwahi wai uaho'abamai rama haeai ai torama Antiokai Suriai mai Kilikiai tomiaho haumi heremi.

24 Ai poumi aba taona 'abamai baikia neia tewahi, ekia 'abiai aomi tiba hariaranakia abomo aomi tibar'o'arinakia, ia ai hanona 'abi uahomana a'i tabenakia. 25 Ua buonai ai tato'una emai raona tabahomona hau baikia kata'i taeanakia katauhunakia eka raona'au haukia Banaba mai Paulo kipokia katewahi. 26 Neiakia Banaba mai Paulo terarua hanona ekia mauri a'i tiraonanakia aika eka Obiapaka Iesu Keriso atanai. 27 Iuda mai Sila tauhunakia marere tarerena hauna ia pinakiai katehinana abomo katebatohana. 28 Auba Robe mai ai kipokia na taraona aihona, ai puma haeai a'i katabenimi rauhuhu neiakia ahakiai. 29 Kaiba'uku wairanai tehoroti anianikia a'i katoani, mahi mai aruarukia a'i katoani, mahi 'akokia tebato'o 'arinakia haukia a'i katoani, abomo nabau akakia a'i katobabai. Wai taba neiakia a'i katobabai hanona emi aka kebero. Tarere nonoa. Haparua."

30 Marea haukia tehore hau naiakia teuhunakia, ia teriri teao Antiokai, a'ikakauma haukia tebato'unakia ba marere tebenakia. 31 Marere tetuabi aonai batabura 'abikia aiakia teo'o hanona aokia enamo wairai. 32 Iuda mai Sila hanona mahabanai haukia terarua 'abi namokia tehina a'ikakauma haukia aokia tebakironakia mai teba taburanakia. 33 Ia rani baikia weia temiaho murinai, a'ikakauma haukia ia tebaparuanakia temue teao Ierusalemia ia teuhunakia haukia herekia. 34 (Ia Sila enuatae buonai emiaho.) 35 Paulo mai Banaba hanona Antiokai temiaho, ia mai maearima bo'okia kipokia Obiapaka ena 'abi teba'iohi aina abomo pou namona teiroro aina.

*Paulo Mai Banaba Baiatakia Epa'a.*

\* 15:14: (14) Petero

<sup>36</sup> Wapu baika teore murikiai Paulo Banaba ehina bena etibaha, “Aika hamamue hamaeao aiara weiakia Obiapaka pouna hairoro aina haukia aokiai uaho'abaka weia aea tibabai aiho hanona kahaihanakia.” <sup>37</sup> Ba Banaba ena nuatae hanona Ioane weiana tiaparina Mareko hauna kipokia kateao haeamo. <sup>38</sup> Ia Paulo ena raona, ia kipokia kateao hanona a'i enamo pokina ia Pamfuliai weia hanona eubo ekia akai a'i e'abanakia. <sup>39</sup> Weiana buonai terarua tebaiara baiatakia epa'a. Banaba ehore Mareko ea'ina aunohiai tehe'au Kupuro teao. <sup>40</sup> Ia Paulo ehore Sila enuatae aina kateka'a aonai uaho'abakia tehore Obiapaka ena aoko'o hoanai tebanamonakia. <sup>41</sup> Ia terarua teao Suria mai Kilikia hanokiai tekabanai, Tirama ena marea maearimakia weia haukia teba taburanakia.

## 16

### *Timoteo, Paulo Mai Sila Ohi E'abanakia.*

<sup>1</sup> Paulo eao Derebe ba haeamona eao Lusterai ai ekara'au, a'ikakauma hauna ha weia nemiaho ia atana hanona Timoteo, hinana hanona Iuda babi'ena Iesu nia'ikakaumana, ia hamana hanona Helene hauna. <sup>2</sup> A'ikakauma haukia weia Lusterai mai Ikonio ai temiaho haukia Timoteo ena namo pouna tehinana. <sup>3</sup> Paulo enuatae Timoteo ia kebaka'ana kipokia kateao, ba etarena pokina Iuda haukia weia temiaho haeamona te'jobina ia hamana hanona Helene hauna. <sup>4</sup> Aiara ha ha aokiai tekabanai aonai iuhubeau haukia mai 'uai haukia Ierusalemiai temiaho haukia rauhuhu weiakia tebatohanakia haukia ia terarua tehore tehinanakia maearima kateka'aina. <sup>5</sup> Ua buonai Tirama ena marea haukia ekia a'ikakauma hanona etabura abomo maearima ekia bo'o epa'ua hao apa'ua hao beraura ha ha aokiai.

### *Paulo Mahabanaiai Makedonia Hauna Eihana.*

<sup>6</sup> Paulo mai 'abana kipokia teao Furgai mai Galatia hanokia aokiai tekabanai pokina Auba Robe ehore ekaiabunakia Asia hanonai Tirama ena 'abi a'i kateiroro aina. <sup>7</sup> Teao Musia hano hoanai tekara'au aonai teraonana Batunia hanona kateao, ia Iesu Aubana ebamuenakia. <sup>8</sup> Weiana buonai Musia aiaranai tekabanai teriri teao Toroa aiarana. <sup>9</sup> Rabi weianai Paulo

emahabanai, ena mahabanai aonai Makedonia hauna ha eihana ia wairanai ekoroti enoina etibaha, “Komai Makedoniai ai kobarainamai.” <sup>10</sup> Paulo ena mahabanai weiana murinai ai tanoanoa taeara tatabu kataeao Makedonia, pokina ai ta'jobina Tirama hanona eaparinamai pou namona weia katairoro aina.

### *Ludia Keriso Ena Maearimai Eao.*

<sup>11</sup> Weia Toroai hanona aunohiai taehe'au tabeau berona taeao Samotrake. Haeamona erani hanona tabeau taeao Neapoliai takara'au. <sup>12</sup> 'Eka weiana tahabona taka'a taeao aiara apa'uana Pilipo, weiana hanona aiara kori'uaina Makedonia hanona aonai Roma ena iha'ini ba'anai emiaho. Ba wapu baika weia tamiaho. <sup>13</sup> Beraura Robenai aiara pa'abinai takarahi taeao ate haianai taraonana bahuba'ari 'ekana ha weia. 'Eka weianai tamiati babi'e baika weia teto'u haukia kipokia ta'abi'abi. <sup>14</sup> Weiakia aiamai teona babi'ekia baiatakiai ha atana Ludia ena aiara hanona Tutatira. Ia hanona habuni birokia nikawa kawainakia. Ia abomo Tirama nekuti aina babi'ena ha. Obiapaka ehore aona ebaeana ba Paulo ena 'abi ea'i taeana. <sup>15</sup> Weia ia mai ena itu haukia ikoikiai taba'uere robenakia murinai enoinamai kataeao ena itu ba e'abi etibaha, “Aomiaia tua'i taeana'u au Obiapaka ia'ikakaumana babi'e'u ha raninai patomai e'u ituai weia patomiaho.” Ena bahiahi 'abina eaoainamai ena itu.

### *Pilipoai Paulo Mai Sila Tebawapurranakia.*

<sup>16</sup> Rani ha bahuba'ari 'ekana taeao aonai ta'ara'i uahona ha aonai auba ki'a obona nemiaho uahona kipokia tabaitabu ahi. Uaho weiana hanona taba wairai katerama haukia ihina poukiai ena poki hauna ena kepu bo'okia ebabainakia. <sup>17</sup> Uaho neiana Paulo mai ai murimaimai eka'a eio etibaha. “Hau neiakia hanona 'ubi 'aki'akinai nemiaho Tirama ena iuhubeau haukia, bamauri taearana teiroro aina heremiai.” <sup>18</sup> Rani bo'okia aokiai ia ua ebabai aiho. Ba Paulo haiana ebapo'ona buonai ekori kabe auba ki'a obona ebatana etibaha, “Iesu Keriso atanai nahina beni'o, uaho naiana aonai mokarahi!” Beronai auba ki'a obona uaho ehabona ekarahi.



19 Uaho ena poki hauna e'jobina ena kepu tabu ahi taearana aba epua, weiana Paulo mai Sila tea'inakia teberinakia teoainakia maearima ekia to'u 'ekana Roma haukia apa'uakia herekiai. 20 Hau apa'uakia wairakiai teba korotinakia ba te'abi tetibaha, "Maearima rua neiakia hanona Iuda haukia, eka aiara aonai ripuripu tibabaina. 21 Abomo hoahoa tiba'jobinaka haukia hanona aika Roma hauka eka rauhubu tainai a'i kaha'i taeanakia mai a'i kahaka'a ainakia haukia." 22 To'u haukia temikiri Paulo mai Sila herekiai 'abi ki'a obokia tehinanakia, ba bakai te'uai aina haukia 'abi tebaibeni terarua ekia habuni katetapanakia mai kate'atinakia. 23 Te'ati ki'anakia epua murinai teoainakia wapura itunai tetori totonakia, wapura ne'imanakia hauna tehina bena kekaiabu 'ini harainakia. 24 Ua tehinabe aihona buonai wapura 'ima hauna terarua eaoainakia ikaihuri aona 'akinai hauna aonai ehorotinakia, aekia matiu baiatakiai ebahutanakia ebiri 'ini harainakia.

25 Rabi wapuka'a ore'akuai Paulo mai Sila tebahuba'ari mai ekia huiwai Tirama tebanamona, wapura haukia hanona ia aiakia tebahuaina. 26 Beronai kanokau rarina eka'a wapura ituna maikoina ebaibiuna, pa'abi ikoikiai tekaikau mai wapura haukia imakia aekia tabirikia ikoinai teta'i. 27 Wapura ituna ne'imana hauna parua eno'a, pa'abi ikoikiai tekaikau eihanakia raninai emikiri ena kareba eberi 'auna kipona keahu 'arina pokina ia eraonana wapura haukia hanona aba tebeau 'akauma. 28 'A Paulo eio aota etibaha, "Kipomu a'i moahu 'arini'o, ai ikoimaiai neiamai tamiaho." 29 Wapura ituna ne'imana hauna eapari ramepa katemaiaina, ebeau toto eao eta'u buonai mai 'ururu 'ururuna Paulo mai Sila wairakiai ekaipehu. 30 Ba eba karahinakia eaoainakia mahanai ebakainakia etibaha, "Hau apa'uami e, taba kababaina hanona bamauri katabu ahina?"

31 Terarua tehina bena tetibaha, "Obiapaka Iesu Keriso koa'ikakaumana hanona bamauri koa'ina oi mai emu itu haukia ikoikiai." 32 Ba terarua Obiapaka ena 'abi teiroro aina ia mai ena itu haukia ikoikiai wairakiai. 33 Rabi weiana aonai terarua

eaoainakia, haukia tebamani'anakia 'ekakia eututu harainakia, ba beronai Paulo mai Sila tehore ia mai ena itu haukia ikoikia teba'uere robenakia. 34 Wapura i'ima hauna terarua eaoainakia ena ituai ero'onakia, ba ia mai ena itu haukia ikoikiai teonamo pokina Tirama tia'ikakaumana paunai.

35 Erani raurani aonai bakai te'uai aina haukia ekia 'abi tebaibeni habuni haukia teuhunakia teao wapura 'ima hauna herena tetibaha, "Hau neiakia kobakarahnakia kateka'a." 36 Wapura i'ima hauna Paulo ehina bena etibaha, "Bakai te'uai aina haukia 'abi tebaibeni, oi mai Sila ohi kaba karahinimi katoka'a, ua buonai tomokarahi mai baibuami tomoao." 37 Ia Paulo bakai te'uai aina haukia ekia habuni haukia ehina benakia etibaha, "Ai hanona Roma maearimamai, emai beho aha'i bakai 'ekanai a'i teba korotinamai ia maearima wairakiai teahunamai haeamona wapura itunai tekaikau 'abaeana-mai. Ba bariu hanona bunianai kateba karahinamai, u? Ai ketai 'apuana, ia kipokia katemai kateba karahinamai."

38 Habuni haukia temue teao bakai te'uai aina haukia haiakiai te'abi ia terarua hanona Roma maearimakia, 'abi neiana teona raninai bakai te'uai aina haukia teta'u wairai. 39 Bakai te'uai aina haukia temikiri teao terarua haiakiai te'abi 'abi harai a'i teme'opuere, ba teba karahinakia, tenoinakia aiara weiana katehabona. 40 Paulo mai Sila wapura itunai tekarahi teao Ludia ena itu weia a'ikakauma haukia baika kipokia te baitabu ahi, batabura 'abikiai tehina benakia ba teka'a.

## 17

### *Tesalonikai Iripu Rarina Erama.*

1 Paulo mai Sila ohi teao Amfipoli mai Apolonia hanokiai tekabanai teao Tesalonika weia hanona Iuda haukia ekia marea ha. 2 Paulo ena hoa hoa tainai eao marea aonai etoto. Weia beraura robe aihau aokiai maearima kipokia teroba ahu Puka Robenai terere 'abikia tohakiai e'abi'abi, 3 ehina hina harainakia, 'abikia ebawaira tina harainakia Keriso hanona kehau haiara mai 'ariai kemikiri mue, etibaha, "Iesu neiana au pouna

\* 17:3: (3) 'ao *Mesia*

nahinana wai heremiai hauna hanona Keriso.”\* <sup>4</sup> Iuda haukia baika aokia teba kabanainakia Paulo mai Sila kipokia tebahamomo, Helene maearimakia Tirama timariki aina haukia bo'okia abomo kipokia tebahamomo baiatakiai hanona obia babi'ekia bo'okia.

<sup>5</sup> Ia Iuda haukia baika tewamuru buonai aru 'abaea haukia ekia hoa teki'a haukia kawakawa 'ekanai tebararonakia tebato'unakia iripu rarina aiara apa'uana aonai teba ramana. Hau ha atana Iason ena itu teao Paulo mai Sila katetabunakia kateba karahinakia maearima wairakiai. <sup>6</sup> Ia a'i tetabu ahinakia buonai Iason mai a'ikakauma haukia baika itu weianai teberi ahinakia temaiainakia aiara apa'uana tipoki aina haukia wairakia teio tetibaha, “Hau baika hanopaka maikoinai ripuripu tibabai haukia bariu temai eka aiara apa'uana aonai. <sup>7</sup> Ba Iason hanona ea'i taeanakia ena ituai ebatotonakia. Hau weiakia hanona Kaisa ena rauhuhu tikabenakia, te'abi tetibaha, Obia 'arana haeai ha nemiaho. Ia atana hanona Iesu.” <sup>8</sup> 'Abi neiana teona raninai maearima to'una mai aiara apa'uana tipoki aina haukia kipokia 'uru rarina tebabuana. <sup>9</sup> Aiara apa'uana tipoki aina haukia tehore Iason mai 'abana kipokia tehina benakia moniai bakai arana tehorena ba tehabonakia kateka'a.

### *Iuhubeau Haukia Teao Berea.*

<sup>10</sup> Rabi weiana aonai a'ikakauma haukia tehore Paulo mai Sila teuhunakia Berea teao. Weia tekara'au raninai berokiai Iuda haukia ekia marea teao. <sup>11</sup> Iuda haukia weiakia Bereai temiaho haukia hanona mai ekia aia o'o ba Tesalonika maearimakia, aokia tohanai pou namona teona ba rani ikoinai Puka Robena 'abikia temarere ainakia kate'jobina Paulo ehina haukia hanona tohakia. <sup>12</sup> Ua buonai bo'okia tea'ikakauma, Helene obia babi'ekia bo'okia mai Helene haukia bo'okia abomo tea'ikakauma.

<sup>13</sup> Ia Iuda haukia Tesalonikai temiaho haukia Paulo Tirama ena 'abi Berea aonai neiroro aina pouna teona raninai temai weia mako tebahi ahinakia tebaripu ripu. <sup>14</sup> Beronai mo a'ikakauma haukia tehore Paulo teuhuna poe taina eao. Ia Sila mai Timoteo ohi hanona Bereai temiaho. <sup>15</sup> Maearima baika Paulo tebaka'ana haukia Paulo kipokia teamo Atene, ba ia

hanona temue teao Berea, Paulo ena 'abi teaoaina Sila mai Timoteo herekia kateao biai Paulo herena.

### *Paulo Ateneai Eiroro.*

<sup>16</sup> Paulo Ateneai Sila mai Timoteo ne'imanakia aonai aiara apa'uana aonai kaiba'uku ebo'o ki'a eihanakia hanona aona ehaiara ki'a. <sup>17</sup> Ua buonai Paulo hanona marea aonai Iuda haukia mai Helene haukia Tirama tekuti aina haukia kipokia teroba ahu, haeamona rani ikoikiai hanona kawakawa 'ekanai tikaoao kaoao maearimakia mo 'akina kipokia terobahu. <sup>18</sup> Epikuro haukia mai Stoiko 'iobi haukia baika Paulo kipokia te'abi baitaeai. Baika tebakai bakai tetibaha, “Abi 'abaea 'abi 'abaea hauna neiana taba ne'uahina?” Baika te'abi, “Ia hanona hanopaka haeai tiramakia robakia niahuna.” 'Abi neiana tehinana pokina Paulo hanona Iesu mai ena mikiri mue pouna namona eiroro aina. <sup>19</sup> Ua buonai Paulo tea'ina teaoaina to'u 'ekana ha atana Areopago ai weia tehina bena tetibaha, “Ai tanuatae kata'jobina oi ba'iobi mahamahana tabana neiana robana nuahuna? <sup>20</sup> Taba baika nohina 'urukia tao'o hanona heremaiai tehaeai ki'a baha, ua buonai ai tanuatae anikia taba hanona kata 'jobinakia.” <sup>21</sup> (Atene haukia mai atau'ai temai haukia 'eka weianai temiaho haukia hanona taba haeai haeai robakia a'i tiahu, ia rani ikoinai taba mahamahakia poukia tio'o mai robakia tiahu.)

<sup>22</sup> Paulo 'eka weiana Areopago to'u haukia wairakiai ekoroti e'abi etibaha, “Wai Atene haumi e, au naihanimi hanona wai taeara ikoinai kuti akakiai tutabura. <sup>23</sup> E'u kaoao kaoao emi aiara apa'uana aonai emi kuti 'ekakia aihanakia aonai emi itara robena ha ahana na terere aihona 'Ai ha'jobina Tiramana herena' hauna atabu ahina. Weiana wai a'i to'jobina hauna tokuti aina, iamo bariu wai heremiai kairoro aina.

<sup>24</sup> “Tirama weiana hauna hanopaka mai aona tabakia ikoikia ebabainakia, ia hanona kupa mai hanopaka Obiapakana ba maearima imakiai tebabai mareakia aokiai a'i nemiaho. <sup>25</sup> Abomo ia taba ha a'i nikapu aika taba imakai pahabena hauna a'i niraonana, pokina ikupaiana mauri maebu mai taba haeai haeai ikoinai maearima nibenakia. <sup>26</sup> Hau hamona

herenai itubu haeai haeai maearimakia ikoikiai ebabainakia hanopaka maikoina aonai katemiaho. Ia kipona ehore ekia miaho ranikia tohakia mai ekia hano hoakia eba'oru 'uainakia. <sup>27</sup> Tirama aka neiakia ebabainakia hanona maearima ikoinai katemai herena ia katetabu ahina, 'abi tohana Tirama hanona ata'uai aha'i ia aika herekai. <sup>28</sup> Maearima baika na ti'abi aiho,

'Ia aonai nahamauri nahaibiu ibiu mai nahamiaho.'  
Matoha emi ori kikipa haukia te'abi 'abana,

'Aika hanona ia nahuna.'

<sup>29</sup> Ba aika Tirama nahuna raninai Tirama hanona weiakia gold 'ao silba 'ao pihara maearima aotipakia imakiai tebabainakia 'abakiai a'i kahabaona.

<sup>30</sup> "Tirama hanona maearima ia a'i te'iohina raninai ekia po'o aba eihā haonakia, ia bariu hanona 'eka ikoinai maearima ikoikiai nehinabe pahihinakia kateraona kabe. <sup>31</sup> Weiana ia bakai ranina ha aba eba'oruna, ena maearima ha ea'i taeana, hauna kehore hanopaka maikoina taeara beronai kebabakaina. Tirama ehore hau weiana 'ariai ebamikiri muena hanona maearima ikoikiai wairakiai aka neiana ebatohana."

<sup>32</sup> 'Ariai emikiri mue 'abina Paulo ehinana aiana teona raninai, baika ia teiriri aina, ia baika hanona te'abi, "Ai tanuatae 'abi'abi neiana kohina muena aiamu kataona." <sup>33</sup> Weiana murinai Paulo 'eka weianai ekapare.

<sup>34</sup> Maearima baika Paulo kipokia teba-haeamo abomo tea'ikakauma. Baiatakiai hanona bakai hauna ha atana Dionusio, ia bakai 'ekana Areopago tipoki aina haukia ha, haeamona babi'e ha atana Damari mai maearima haeai baika abomo tea'ikakauma.

## 18

### *Paulo Korintoai Eiroro.*

<sup>1</sup> Weiana murinai Paulo Atene aiarana ehabona eao Korinto aiarana. <sup>2</sup> Weia Iuda hauna ha atana Akula ohi tebaitabu ahi, ia hanona Pontoai erama, bariu tainai mo atawana Priskila ohi Italiai temai, pokina rani weianai obia 'arana hauna atana Klaudio 'abi ebaibeni Iuda haukia ikoikiai Roma katehabona. Paulo eao ia keihanakia, <sup>3</sup> weia kipokia temiaho mai teaka, pokina ia hanona parae itukia etai

hauna ia terarua 'abakia. <sup>4</sup> Paulo hanona beraura robe ikoikiai Iuda haukia ekia marea aonai pou namona 'abina terobahu aina pokina ena nuatae hana Iuda mai Helene haukia aokia keba kabanainakia katea'ikakauma.

<sup>5</sup> Sila mai Timoteo Makedoniai temai murinai, Paulo hanona rani ikoinai 'abi weiakia eiroro ainakia Iuda haukia wairakiai ehina pouna weiana Iesu hanona bamauri hauna Keriso. <sup>6</sup> Weiana ena 'abi teahu taeanakia mai herenai 'abi ki'a obokia tehina raninai eopuere ena habuni apurorokia eahu ahunakia, ehina benakia etibaha, "Wai kato'ari raninai weiana hanona wai kipomi emi beho, 'a au hanona behona a'i ka'arana. Bariu rani neianai keaoaina aonai au hanona rama haeai haukia herekia kaeao." <sup>7</sup> Ba marea ehabona eao rama haeai hauna ha atana Tito Iusto ena ituai ua'a kemiaho, ia hana Tirama nekuti aina hauna, mai ena itu hana marea herenai. <sup>8</sup> Marea poki hauna Kerisopo mai ena itu haukia kipokia Obiapaka tea'ikakaumana haeamona Korinto haukia bo'okia abomo Paulo ena iroro aiana teona raninai tea'ikakauma mai teba'uere robenakia. <sup>9</sup> Rabi ha aonai Obiapaka mahabanai ai Paulo ehina bena etibaha, "Ai kota'u, ia ko'abi to'o baihana a'i kounu. <sup>10</sup> Pokina Au hana oi heremuai. Tai ha oi a'i kea'i ki'ani'o. Aiarā apa'uana neiana aonai au e'u maearima hanona ebo'o." <sup>11</sup> Weiana buonai Paulo ihau hamona mai nawa 'abaihau weia emiaho Tirama ena 'abi maearima eba'iohinakia.

<sup>12</sup> Kabana hauna Galio Akaia hanona eihā 'inina aonai, Iuda haukia temikiri haeamo Paulo tea'ina teaoaina bakai 'ekana tehorotina. <sup>13</sup> Te'abi tetibaha, "Hau neiana hana maearima aokia ni-ani taeara haeai Tirama katekuti aina Iuda haumai emai rauhuhu kate'oatana." <sup>14</sup> Paulo aba ke'abi aonai Galio ehore Iuda haukia ehina benakia etibaha, "Wai Iuda haumi, hau neiana beho ebabainakia 'ao hoahoa ki'a obokia ebabainakia raninai wai aiami ka'i taeana ketaina. <sup>15</sup> Ia neiana hana 'abi mai ata mai wai kipomi emi rauhuhu atetuakia raninai, wai kipomi tomoba berona. Taba nahomakia hana au robakia a'i kahu." <sup>16</sup> Weiana ia ena 'abiai Iuda haukia bakai 'ekana teu'u ahinakia. <sup>17</sup> Ia ikoinai temikiri marea poki hauna Sostene tea'i 'inina bakai 'ekana wairanai teahuahu banaina. Iamo Galio hanona

aka weiana robana a'i eahuna.

*Paulo Emue Eao Suria Hanona Antioka.*

<sup>18</sup> Paulo wapu baik Korintoai emiaho murinai, uaho'abana ehabonakia Priskila mai Akula hanona ia te'abana kipokia aunohiai tebeau banai Suria teao. Aunohiai a'i tebeau ahi aonai Kenkrea aiaranai buina maikoina terehe obona pokina 'abi'uai ha Tirama wairanai ebabaina hauna ebaorena paunai. <sup>19</sup> Epesoai tekara'au aonai Paulo ehore Priskila mai Akula weia ehabonakia. Ia ikupaiana eao Iuda haukia ekia mareai ekatoto weia Iuda haukia kipokia teroba ahu. <sup>20</sup> Weiana Iuda haukia Paulo tenoina herekiai rani homa'ana kemiaho, ia eubo. <sup>21</sup> Ia aba keka'a aonai ehina benakia etibaha, "Tirama kenuatae raninai kamue kamai heremi." Epu aunohiai ehe'au Epeso ehabona. <sup>22</sup> Paulo Kaisareai ekara'au ba eao Ierusalem mai ua'a Tirama ena marea haukia etoanakia epua eriri Antioka eao.

<sup>23</sup> Weia Antiokai rani baik emiaho murinai eao Galatia mai Furugia hanokia maikoina aonai eka'a 'eka ha ha aokiai a'ikakauma haukia ikoinai ebataburana.

*Apolo, Epesoai Eiroro.*

<sup>24</sup> Weiana Iuda hauna ha atana Apolo ia hanona Alesanderei erama hauna emai Epeso. Ia hanona 'abi'abi harai hauna abomo Puka robena 'abikia e'iobi harainakia hauna. <sup>25</sup> Ia hana Obiapaka ena ba'iobi taaranai 'iobi ea'ina mai Iesu pouna namokia berokia eba'iobiai mai aona tohanai eiroroai, iamo ia ena 'iobi hana Ioane ena ba'uere robeaimo epua. <sup>26</sup> Ia hanona mai nuako'ona Iuda haukia ekia marea aonai eiroro, Priskila mai Akula ia aiana teona raninai tebaka'ana teoaina ekia ituai Tirama ena 'abi taarana tohana ia herenai tehinahina haraina. <sup>27</sup> Apolo enuatae keao Akaia aiarana raninai Epesoai temiaho a'ikakauma haukia temikiri ia tebataburana, epua marere ha tererena eao Akai temiaho a'ikakauma haukia herekiai, weiana ia keao weia raninai aonamoai katea'i taana. Ia weia ekara'au raninai Tirama ena aoko'o hoanai tea'ikakauma haukia herekiai barai barai hauna tohanai eao. <sup>28</sup> Ia ena 'abi taburai hanona Iuda haukia mako wairakiai 'abi baihara

taeai eba 'ehonakia, ia Puka robena 'abinai ebatoha tohana Iesu hanona bamauri hauna Keriso.

## 19

*Paulo, Epesoai Eiroro.*

<sup>1</sup> Apolo Korintoai emiaho oho aonai, Paulo hanona Asia hanona oeokia ibuakiai ekabanai eao Epeso. Weia a'ikakauma haukia baik kipokia tebaitabu ahi. <sup>2</sup> Paulo ebakainakia etibaha, "Toa'ikakauma aonai Auba Robe emai heremi, 'ao?" Ia te'abi, "Aha'i. Ai hanona Auba Robe 'abina uruna ha a'i tao 'apuana." <sup>3</sup> Ba ia ebakai muenakia etibaha, "Ba'uere robe tabanai teba'uere robenimi?" Ia te'abi tetibaha, "Ba'uere robe weiana Ioane e'uahina haunai teba'uere robenamai."

<sup>4</sup> Paulo e'abi etibaha, "Ioane ena ba'uere robe hanona raona kabe hoana. Ioane maearima ehina benakia ia murinai nimai hauna kate a'ikakaumana, weiana hanona Iesu." <sup>5</sup> 'Abi weiana teona raninai Obiapaka Iesu atanai teba'uere robenakia. <sup>6</sup> Paulo imana ahakiai ehao'au aonai Auba Robe eriri ahakiai, ba temikiri maea haeai haeai te'abi'abi haeamona temahabanai Tirama pouna tehinana. <sup>7</sup> Maearima weia haukia ikoinai hanona harau haea rua 'abana.

<sup>8</sup> Nawa aihau aonai Paulo eao Iuda haukia ekia mareai maearima herekiai mai taburana e'abi 'abi Tirama ena obia aiarana pouna eba'iobinakia aokiai kebakabanaina paunai. <sup>9</sup> Ia maearima baik hanona aokia teba pahihinakia a'i tea'ikakauma haeamona to'u wairakiai 'abi ki'a obokia tehina ba'iobi neiana Iesu katea'ikakauma taarana herenai. Ua buonai Paulo maearima weiakia ehabonakia, ia a'ikakauma haukia mo ebaka'anakia teao Turano ena marere ituna aonai ua'a rani ikoinai eba marerenakia. <sup>10</sup> Ihau rua hanona weia ebamarere, weiana Iuda haukia mai Helene haukia Asia hanonai temiaho haukia maikoinai Obiapaka ena 'abi pouna teona.

*Skeba Nahuna Auba Ki'a Obona Tebahobona.*

<sup>11</sup> Tirama ehore Paulo hiabu ebena hoa haeai 'akikia ebabai. <sup>12</sup> Maearima Paulo ena muko mai ena habuni ihai hauaninai temiaho haukia teoainakia inawa haukia ahakiai tehore 'au hanona ekia inawa



tenamo abomo aokiai auba ki'a obokia tekarahi.

<sup>13</sup> Iuda haukia baika ekia aka hanona mea, ia aiara aokiai tekabanai kabanai Obiapaka Iesu atana tehinana tebahobona auba ki'a obokia kateba karahinakia. Na tehinabe aihonakia, "Iesu weiana pouna Paulo neiroro aina hauna atanai nahinabe pahihini'o. Mokarahi!"

<sup>14</sup> Iuda haukia ekia robe hauna apa'uana Skeba nahuna 'abaihau hamomo hanona aka neiana tebabaina. <sup>15</sup> Rani ha auba ki'a obona ekia 'abi ebamuena etibaha, "Au Iesu a'iohina, Paulo abomo a'iohina. Ia wai hanona tai?" <sup>16</sup> Ba hau weiana aonai auba ki'a obona nemiaho hauna erobo taea hau weiakia eba'ehonakia, ia etabura ki'a baha buonai, eahu ki'anakia, ena ituai tebeau ahi mai haukia abomo mai mani'akia. <sup>17</sup> Iuda mai Helene maearimakia Epesoai temiaho haukia pou neiana teona raninai ikoinai teta'u ki'a, ba Iesu Obiapaka atana tebanamona 'ubi tohanai. <sup>18</sup> Tirama tea'ikakaumana haukia bo'ona temai ekia ki'a tebabai haukia tehina pounakia. <sup>19</sup> Weia nepu haukia bo'ona ekia mea pukakia temaiainakia, maearima wairakiai tehuhunakia. Puka weiakia 'arakia tebahuna hanona taha imabui (50,000) Kina\* 'abana. <sup>20</sup> Taeara neianai hanona Obiapaka ena 'abi erama otaraina haemona etabura hao tabura hao.

### *Paulo Aona Ea'ia'i Haraina Keao Ierusalem.*

<sup>21</sup> Taba neiakia ikoikiai terama murinai Paulo aona ea'ia'i haraina enuatae Makedonia mai Akaia hanokiai kekabanai keao Ierusalem. Ia kipona e'abi etibaha, "Kaeo 'uai weia, ba muriai hanona kaeo Roma abomo kaihana." <sup>22</sup> Paulo ena baraibarai haukia rua Timoteo mai Erasto euhunakia te'uai teao Makedonia, ia Paulo hanona rani papana weia Asiai emiaho 'apua.

### *Epesoai Atetua Rarina Erama.*

<sup>23</sup> Rani weianai Obiapaka ena taeara paunai atetua rarina Epesoai erama. <sup>24</sup> Hau ha weia atana Demeterio ia hanona silba akana ehabaina, ena aka haukia tehore tirama babi'ena Atemi ena itu silbai temakanakia, aka weianai moni bo'ona tea'inakia. <sup>25</sup> Rani ha

Demeterio ehore ena aka haukia mai maearima baika aka ihobona tibabaina haukia eaparinakia temai ia herena, ba ehina benakia etibaha, "E'u hau e, wai to'iohina aika hanona aka neianai eka moni namokia nahatabu ahi. <sup>26</sup> 'A hau neiana Paulo hanona neia Epesoai mai Asia hanona maikoina aonai maearima bo'ona aokia nibakabanaina mai niba kaparenakia hanona aba toihana mai uruna tona, ia ni'abi tirama weiakia maearima imakia tibabainakia haukia hanona tirama tohakia aha'i. <sup>27</sup> Wairai ki'a ha kerama eka aka neiana atana namona hauna kea'i ki'ana, ia tirama babi'ena apa'uana Atemi ena marea mai ia kipona atana abomo kea'i ki'anakia. Ia hanona Asia hanona maikoina aonai mai hanopaka maikoina aonai tekuti aina hauna ena apa'ua aba ke'akauma 'abaea."

<sup>28</sup> Maearima to'una 'abi weiana teona raninai teopuere ki'a teio tetibaha, "Epeso haumai emai tirama babi'ena Atemi e, oi hanona oapa'ua ki'a baha!" <sup>29</sup> Aiara apa'uana aonai maearima maikoina teio raina temikiri Gaio mai Aristako tea'inakia. Maearima neiakia terarua hanona Makedonia haukia Paulo kipokia tekaoao kaoao haukia, maearima ikoinai ia teberinakia teaoainakia to'u ituna aonai. <sup>30</sup> Paulo ena nuatae kekarahi keao to'u haukia wairakiai, ia a'ikakauma haukia ia tekaibuna. <sup>31</sup> Abonamo 'eka weianai poki haukia baika hanona Paulo ena 'iohi haukia, ia 'abi teuhuna eao Paulo herena teba'amena to'u ituna weiana aonai a'i kekatoto.

<sup>32</sup> 'A to'u haukia taba katebabaina hanona a'i te'iohina, maearima baika taba ha teioaina, baika hanona taba haeai mo ha teioaina. Iamo maearima bo'ona hanona a'i te'iohina taba buonai teao weia. <sup>33</sup> Iuda haukia baika hau atana Alesanda teaoaina maearima wairakiai tebakorotina. Alesanda imana ea'i taeara to'u haukia ekia io tebapuana, ba ia Iuda haukia beho a'i patehoaina maearima wairakiai kehinana. <sup>34</sup> Ia te'iohina Alesanda hanona Iuda hauna raninai, teio mue 'abi hamonamo tehina to'ona beraura hoana rua 'abana teio tetibaha, "Epeso haumai emai Tirama babi'ena Atemi e, oi hanona oapa'ua ki'a baha!"

\* 19:19: (19) Drakoma taha imabui. Drakoma hamona hanona silba koini hamona aka hauna wapu hamona 'arana.

<sup>35</sup> Murinai aiara ena 'abi irerena hauna to'u haukia ehina benakia 'uri'uri katebapuana ba e'abi etibaha, "Epeso haumi e, hanopakai maearima ikoinai aba te'jobina Epeso hauka hanona tirama babi'ena Atemi ena Marea mai ia aubaubana weiana kupai emai hauna naha'imanakia. <sup>36</sup> Taba neiana hanona a'i kahabuniai aina hauna, ua buonai 'uri'urimi mepua. Haeamona noanoai taba ha a'i katobabai ki'ana. <sup>37</sup> Maearima neiakia tomaianakia haukia hanona marea tabakia ha a'i tebainaoaina, haeamona eka tirama babi'ena herenai 'abi ki'a obona ha a'i tehinana. <sup>38</sup> 'A Demeterio mai ena aka haukia kipokia tēnuatae maearima ha beho 'ekana kate horotina re'a, bakai ranikia hanona tēmiaho mai bakai poki haukia abomo tēmiaho, ia katehore beho weiana katetabuna. <sup>39</sup> Taba ha nemiaho robana katoahuna raninai, ua'a aiara haukia ekia to'u taearana tohanai katebaberona. <sup>40</sup> Poki haukia 'uri'uri neiana bariu nirama hauna paunai aika a'i temeba atetuanaka. Ua kehoma raninai ekia 'abi kahaba muena taearana aha'i, pokina to'u neiana hanona ena bero aha'i." <sup>41</sup> Ia 'abi neiana ehinana murinai, to'u haukia maikoina euhunakia terama otaraina.

## 20

### *Paulo Eao Makedonia Mai Helene.*

<sup>1</sup> Atetua eore murinai, Paulo ebaiuhu a'ikakauma haukia temai herena, aokia ebataburanakia ba haparua ehinana ehonakia eao Makedonia. <sup>2</sup> 'Eka weiakia haeai haeai aokiai 'abi bo'okiai a'ikakauma haukia ebataburanakia ba Helene ai ekara'au. <sup>3</sup> Nawa aihau weia Helene ai emiaho, eba'oru aunohiai kehe'au Suria keao aonai Iuda haukia baika terobahu kateahu 'arina pouna eona, buonai Paulo haeamona eraonana Makedonia kekabanai keao Suria. <sup>4</sup> Maearima kate'abana haukia hanona neiakia. Puro nahuna Sopatere ia hanona Berea hauna, Aristako mai Sekundo ia hanona Tesalonika haukia, Gaio Derebe hauna, Tukiko mai Trofimo ia hanona Asia haukia, mai Timoteo. <sup>5</sup> Maearima neiakia te'uai teao Toroa ai tebai'ima. <sup>6</sup> Parawa 'abaeana tatuna murinai Pilipo ai aunohiai tabeau ahi wapu ima murinai

weia Toroa ai tabaitabu ahi. Weia hui hamona tamiaho.

### *Toroai Paulo Eutuko Ebamauri maurina.*

<sup>7</sup> Hui weianai wapu kori'uaina aonai ikoimaiai tamiato'u parawa robena katana. Paulo to'u haukia eba'abi 'abinakia eaomo wapuka'a, pokina kerani hanona ia kehonakia. <sup>8</sup> Ai ikoimaiai hanona ikaihuri ha 'ubiai hauna aonai ta'abi'abi, ikaihuri weiana aonai hanona lamepa bo'ona te'ara. <sup>9</sup> Hau 'aru'aruna ha atana Eutuko hanona weia riba ahi 'ekana emiati. Paulo e'abi'abi homa'ana aonai, Eutuko hanona eparua rea itu weiana itarana ibaihauna 'ubiai haunai e'eho eao 'ano. Tea'itaeana hanona aba e'ari. <sup>10</sup> Paulo eriri eao Eutuko ahanai eno'au imana huanai era'u huri, e'abi etibaha, "Aomi a'i kearo'ari ia hanona mauri maurina nemiaho." <sup>11</sup> Ba Paulo ekara'au mue eao itu 'ubinai Parawa ehobina teani. E'abi'abi homa'a herekiai eaomo raurani 'amari 'amarinai, ba eka'a. <sup>12</sup> Hau 'aru'aruna mai mauri maurina teaoaina aiara buonai aokia etabura ki'a.

### *Toroa Tehabona Tebeau Ahi Teao Mileto.*

<sup>13</sup> Paulo e'abi ia hanona aenai keao Aso paunai, ena 'abi ta'i taeana ai aunohi ai taehe'au tabeau ta'uai taeao, weia ta'imana kehe'au. <sup>14</sup> Ba Aso ai tabaitabu ahi aonai kipokia aunohiai taehe 'au taeao Mitulene. <sup>15</sup> Erani tabeau taeao Kioso kereibua haianai takara'au ba wapu ibaruanai takabanai taeao Samo ba wapu ibaihaunai hanona Mileto ai takara'au. <sup>16</sup> Paulo ena raona hanona Epeso katabeau banai, a'i enuatae weia Asia hanonai a'i tamamiaho 'abaea, pokina kenoanoa Pentekoste berauranai hanona Ierusalem ai kekara'au biai.

### *Paulo Baparua Irorona Ehinana Epeso Ena Marea Kiro Haukia Herekiai.*

<sup>17</sup> Weia Mileto ai Paulo ebaiuhu Epeso marea ena kiro haukia herekia katemai herena. <sup>18</sup> Ia tekara'au aonai ehina benakia etibaha, "Au wapu kori'uaina Asia hanonai akara'au emai mo bariu beraura maikoina wai baiatamiai aea amiaho aiho hanona to'iohi haraina. <sup>19</sup> Iuda haukia baika ekia aibara tehobonakia here'uai ranikiai, mai 'aiaunu'u maha'u mai beina Obiapaka ena aka ababaina. <sup>20</sup> Wai aba to'jobina ibaraimi 'ekakiai hanona e'u

iroro ai mai e'u ba'iobi ai to'u wairakiai mai itu ha ha aokiai, ha a'i ahore bunina. <sup>21</sup> Au Iuda haukia mai Helene haukia herekiai ahina karahi haraina ia kateraona kabe kateao Tirama herena eka Obiapaka Iesu kate a'ikakaumana. <sup>22</sup> Bariu hanona Auba Robe aiana ika'ainai kaeao Ierusalem, ia a'i na'iobina weia taba here'uai kerama. <sup>23</sup> Au a'iobina hana aiara ha ha aokiai Auba Robe ehina bena'u atetua pahihina mai wapura hanona waira'uai nimai.

<sup>24</sup> Iamo kipo'u e'u mauri ena namo a'i natabuna, ia au nanuatae e'u mauri orenai hanona Obiapaka Iesu aka ebena'u hauna kabaore haraina, aka weiana hanona Tirama ena aoko'o hoana pouna namona kahina karahina.

<sup>25</sup> "Ikoimiai baiatamiai akabanai kabanai Tirama ena obia aiarana airoro aina, bariu a'iobina wai hanona au a'i katoiha muena'u. <sup>26</sup> Ua buonai bariu wairamiai nahina karahina hau ha ke'ari ki'a 'ekana keao hanona behona a'i ka'arana. <sup>27</sup> Pokina Tirama ena nuatae maikoina aba airoro aina heremi taba ha a'i abunina. <sup>28</sup> Kipomi katoiha 'ini harainimi mai a'ikakauma haukia kato'ima harainakia matoha mamoe i'imana hauna mamoe ne'ima harainakia 'abana. Auba Robe aka weiana ebenimi Tirama ena marea haukia ibaka'a haraikia haumiai ebaonimi, weiakia hanona Tirama Nahuna ena 'ariai aba ekawanakia. <sup>29</sup> A'iobina kahabonimi murinai, ba'iobi haukia bai'oikia baika waeha 'aki aiahukia 'abakia katemai baiatamiai a'ikakauma haukia weiakia mamoe 'abakia kateai ki'anakia. <sup>30</sup> Abomo maearima baika kipokia tuaka haeamo haukia katemikiri bai'oi 'abikiai a'ikakauma haukia baika katebahureanakia kateba kaparenakia ia murikiai kateka'a. <sup>31</sup> Ua buonai kato'ima harainimi, rani ikoinai katoraona 'inina ihau aihau aonai maha'u mai beina rabi mai mararani wai ikoimiai ha ha aba'iobinimi a'i a'oro 'apua.

<sup>32</sup> "Bariu wai Tirama imanai mai ena aoko'o hoana 'abinai nahorotini, 'abi weiana hanona ikoimiai kebakori 'ininimi mai hiabuna Tirama ena banamo kebenimi ena maearima robekia ikoikiai ha ha 'eukia kebenakia ihobonai.

<sup>33</sup> Au baiatamiai aonai hau ha ena moni 'ao habuni ha a'i anuataeai 'abaeana.

<sup>34</sup> Wai kipomi aba to'iobina au i'aba'u

haukia mai au e'u nuatae tabakia ikoikiai hanona ima'u neiakiai mo ababainakia. <sup>35</sup> Au taba maikoina aba abaihanimi taeara neianai wai abomo katoaka tabura haukia te'abe'abe haukia katobarainakia, Obiapaka Iesu 'abi ehinana hauna katoraona 'inina na e'abi aiho, 'Baibeni hanona ena namo eapa'ua ba ia'ina hanona ena namo eko'iko'i.' "

<sup>36</sup> Paulo 'abi neiana ehinana murinai, kipokia tekaipehu haeamo tebahuba'ari.

<sup>37</sup> Ikoikiai mai haihaikia huanai tera'u huri tepauna baparua hoana. <sup>38</sup> Ia teaoko'oai ki'ana pokina ia e'abi wairana a'i kateiha muena. Weiana te'abana kipokia teao weia aunohi ai kehe'au.

## 21

### *Paulo Ebeau Ahi Keao Ierusalem.*

<sup>1</sup> Ia herekiai haparua tahinana murinai, aunohi ai tabeau ahi beromaiai taeao Koso, rani ibaruanai takabanai taeao Rodo ba taeao Patara ai takara'au. <sup>2</sup> Weia aunohi ha Foenikia keao hauna tatabu ahina ba taehe'au tabeau ahi. <sup>3</sup> Ba Kupuro kereibuana ahitainai tabeau banai kataeao Suria aonai, Turo ai tabahaha'au weia aunohi kohuna kate-taranakia. <sup>4</sup> A'ikakauma haukia baika weia tatabu ahinakia kipokia hui hamona tamiaho. Ia Auba Robe ena hiabuai Paulo tehina bena Ierusalem a'i keao. <sup>5</sup> Ia emai miaho beraurana eore aonai, tahabonakia taka'a. A'ikakauma haukia ikoinai atawakia mai nahukia kipokia te'abanamai takarahi aiara murinai, weia poeai takaipehu tabahuba'ari. <sup>6</sup> Ha ha kipokia haparua tahinana murinai takara'au aunohiai taehe'au, ba ia temue ekia aiara teao.

### *Mahabanai Hauna Agabo Emahabanai Paulo 'Euna.*

<sup>7</sup> Turo ai beromaiai tabeau taeao Tolemaia ai takara'au, a'ikakauma haukia kipokia tabaitabu ahi ba wapu hamona weia kipokia tamiaho. <sup>8</sup> Erani weia tahabona taeao Kaisarea ai takara'au. Ebaneria hauna Pilipo ena itu ai tamiaho, ia hanona diakono haukia 'abaihou hamomo 'abakia ha. <sup>9</sup> Ia nahuna uahokia bani hanona mahabanai uahokia.

<sup>10</sup> Weia tamiaho wapu baika teore murinai mahabanai hauna ha atana Agabo

Iudea ai emai. <sup>11</sup> Ia emai heremai-  
iai hanona Paulo huana ihaina ea'ina  
kipona imana mai aena ebirinakia e'abi  
etibaha, “Auba Robe e'abi, Ierusalem  
Iuda haukia katehore ihai neiana pok-  
ina hauna na katebiri aihona rama haeai  
haukia katebenakia.”

<sup>12</sup> 'Uru neiana taona raninai, ai mai  
maearima weia haukia kipokia Paulo  
tanoina a'i keao Ierusalem. <sup>13</sup> Ba Paulo  
ai emai 'abi ebamuena etibaha, “Taba  
buonai tuhai ao'u tuba'abe'abena? Au  
hana aba aba'oru, ia Ierusalem katebi-  
rina'u 'ao kateahu 'arina'u re'a Obiapaka  
Iesu atanai.” <sup>14</sup> Ia aiamai a'i ea'i taeana  
paunai tahabona ba tatibaha, “Obiapaka  
ena nuatae hanona merama.”

#### *Paulo Ekara'au Ierusalem.*

<sup>15</sup> Neiana murinai, wapu baik teore ba  
taba'oru ba takarahi kataeao Ierusalem.  
<sup>16</sup> A'ikakauma haukia baik Kaisareai  
te'abanamai taeao Nasona ena itu ai  
weia katamiah. Ia hanona Kupuro  
hauna abomo a'ikakauma hauna ha  
'ai'aina. <sup>17</sup> Ierusalem takara'au raninai,  
uaho'abaka teba katotonamai mai aon-  
amokia.

<sup>18</sup> Erani hanona Paulo kipokia taeao  
Iesu hatina Iakobo kataihana, weia marea  
ena kiro haukia ikoinai abomo tewaira  
tina. <sup>19</sup> Paulo ia imakia ea'inakia murinai,  
ia ena aka aonai Tirama taba eabai rama  
haeai haukia herekiai haukia ikoikiai  
poukia ehinanakia.

#### *Hau Apa'uakia Paulo Tehina bona Keao Marea Robe.*

<sup>20</sup> 'Abi neiana teona raninai Tirama  
tebanamona. Weiana ia Paulo ha-  
ianai te'abi tetibaha, “Uaho'abamai  
e, aba o'jobina Iuda haukia bo'okia  
tia'ikakauma, ia haukia ikoikiai Mose  
ena rauhuhu ia'itaeana hanona tiraona  
apa'uana. <sup>21</sup> Ia Iuda haukia neiakia  
hanona pou bai'oina nahomana teona,  
Iuda haukia rama haeai haukia ba-  
iatakiai temiaho haukia ohina benakia  
Mose ena rauhuhu herenai katekapare,  
miorikia a'i katetarenakia, haeamona  
Iuda haukia ekia hoa hoa a'i kateka'aina.  
<sup>22</sup> Ia aba poumu kateona oi hanona  
omai. Bariu aea kahababai aiho? <sup>23</sup> Ua  
buonai katahina beni'o akana kobabaina.  
Emai maearima bani hanona Tirama  
wairanai ekia 'abi'uai aba tehorotina.  
<sup>24</sup> Maearima neiakia koaoainakia ekia

'opu ia'jobona to'una aonai, ekia to'u  
'arakhia kohorenakia buikia katekabe  
obonakia. Weiana maearima ikoinai  
kate'jobina 'abi weiakia oi ahamuai tehina  
haukia hanona tohakia aha'i, ia oi hanona  
Mose ena rauhuhu tainai nomiaho.  
<sup>25</sup> Rama haeai haukia weiakia bariu  
tia'ikakauma haukia herekiai hanona  
emai raona taraonana hauna marere ai  
aba tarerena tatiu ahina taba 'jobinakia,  
weiana aniani tibiaeni tirama bai'oikia  
herekiai haukia a'i kateani, haeamona  
mahi tiaruaru haukia a'i kateani, mahi  
'akokiai teto'o 'ari haukia a'i kateani,  
mai a'i katenabau 'abaea nabau 'abaea.”  
<sup>26</sup> Erani Paulo maearima neiakia bani  
ebaka'anakia kipokia teao 'opu ia'jobona  
to'una aonai tetoto, ba eao marea robe  
aonai etoto eba'jobinakia rani tabanai  
hanona 'opu ia'jobona akana ranina  
keore, haeamona wapu ha ha kipokia ekia  
baibeni katebabai.

#### *Iuda Haukia Marea Robeai Paulo Tea'i Inina.*

<sup>27</sup> Wapu 'abaihau hamomo aka weiana  
aba keore aonai, Iuda haukia baik Asia  
hanonai temai haukia Paulo marea robe  
aonai teihana raninai, ia mako tebahi  
ahinakia Paulo tea'ina, <sup>28</sup> teio tetibaha,  
“Isaraela haumi e, tomobarainamai! Hau  
neiana hanona 'eka ikoikiai aokiai ena  
ba'jobi maearima ikoinai herekiai eka  
maearima mai Mose ena rauhuhu mai  
marea robe neiana ni'oatanakia, abomo  
bariu hanona rama haeai haukia nima-  
iainakia marea robe ai 'eka robena neiana  
tiba'opuna.” <sup>29</sup> Ua te'abi aiho pokina  
'uainai Paulo Trofimo Epeso hauna ohi  
Ierusalem aiarana aonai temiaho tei-  
hanakia, ba teraonana ebaka'ana eaoaina  
marea robe aonai.

<sup>30</sup> 'Abi neianai aiara maikoina 'uri'uri  
rarina ebaramana maearima taeara haeai  
haeiai tebeau temai Paulo tea'ina teberi  
karakarana marea robe ai tekarahiaina,  
murinai marea robe pa'abina tekaiabuna.

#### *Roma Huari Haukia Paulo Tea'ina.*

<sup>31</sup> Paulo iahu'arina akana tibabaina  
aonai pouna eao Roma ekia huari poki  
hauna eona Ierusalem maearimakia  
atetua rarina tibabaina. <sup>32</sup> Beronai  
huari te'uai aina haukia mai huari  
haukia eaoainakia tebeau to'u tekokina.  
Maearima weiakia huari poki hauna  
mai ena huari haukia teihanakia raninai  
Paulo iahunai te'oro 'abaea. <sup>33</sup> Huari



poki hauna eka'a eao Paulo ea'ina, ba ena 'abiai tabiri rua ai tebirina. Weiana ebakainakia ia hanona tai haemona taba ebabaina. <sup>34</sup> To'u ranina aonai maearima baika teio 'abi haeai tehina haemona baika 'abi haeai mo tehina, weiana 'uri'uri rarina 'akina tebabuana buonai, huari poki hauna 'abi tohana ha'i eona hanona e'abi Paulo katebaka'ana kateaoaina huari haukia ekia miaho 'ekana. <sup>35</sup> Paulo tebaka'ana itataea ai ehe'au raninai to'u haukia teaibara ki'a baha buonai, huari haukia tehore Paulo tebuana teao. <sup>36</sup> Mako ia murinai teao haukia mai ioiokia te'abi tetibaha, "Tomoahu 'arina!"

### *Paulo To'u Wairanai Ena Pou Ehinana.*

<sup>37</sup> Huari haukia Paulo aba ekia parabuai katebakatotona aonai Paulo huari poki hauna enoina etibaha, "Penamo hamu e'u 'abi ha pahinana." Ba huari poki hauna ebakai bakai etibaha, "Oi Helene maeana ona, u?" <sup>38</sup> Oi Aigupito haumu weiamu atetua obaramana ahua huaria haukia ikoinai taha bani (4,000) obato'unakia obaka'anakia toao hano'akunai, 'u?" <sup>39</sup> Paulo ia ena 'abi ebamuena etibaha, "Aha'i. Au hanona Iuda hau'u, Kilikia hanona Taso ai arama, aiara apa'uana weiana maearima'u. Nanoini'o, maearima neiakia pahina benakia." <sup>40</sup> Huari poki hauna Paulo bero ebena ke'abi, ba Paulo itataeai ehe'au imana ea'i taea maearima kateunu. To'u 'uri'uri tebapuana raninai, Paulo Heberu maeana ehina benakia.

## 22

<sup>1</sup> "Uaho'aba'u mai hama'u ikoimiai, tomobahu e'u pou mahinana aia'u tomona." <sup>2</sup> Heberu maeana ehina benakia hanona ikoikiai tebahu harai ia e'abi hanona aiana teona. <sup>3</sup> E'abi mue etibaha, "Au hanona Paulo, Iuda hau'u e'u rama aiarana hanona Taso Kilikiai, ia aiara neiana Ierusalem tebapuana'u.

Au hanona Gamaliel ebamarerena'u, 'aba'abaka ekia rauhuhu aea homakia ikoikiai eba'iohina'u abomo Tirama ena aka ataburaina matoha bariu wai tutabura 'abana. <sup>4</sup> Au Iesu tea'ikakaumana haukia mai babi'ekia a'oatanakia, taeara neiana teka'aina haukia baika kateahu 'arinakia, baika abirinakia wapura itunai akapo

totonakia. <sup>5</sup> E'u 'abi hanona robe haukia arakiai hauna mai bakai apa'uana haukia katebatohana. Ia tehore marere tebena'u aeao uaho'abaka Damaseko ai haukia herekia, weia a'ikakauma haukia kamaianakia Ierusalem katewapura.

### *Paulo Eraona kabe Pouna Ehinana.* *(Ih 9.1-19; 26.12-18)*

<sup>6</sup> "Atiaha 'abana taearai aeao Damaseko aba here'uai hanona ea rarina 'akina ha kupai eriri ebarara kakaiarona'u. <sup>7</sup> Beronai a'eho 'anoai, aia ha aona etibaha, 'Saulo e, Saulo e, taba buonai au nu'oatana'u?' <sup>8</sup> Au abakai bakai atibaha, 'Obiapaka e, oi tai?' Ia etibaha, 'Au Iesu, Nasareta hau'u, nu'oatana'u.' <sup>9</sup> Te'abana'u haukia ea weiana teihana, ia aia weiana au ehina bena'u hauna a'i teona.

<sup>10</sup> "Au abakaina, 'Obiapaka e, au taba kababaina?' Ia etibaha, 'Momikiri, koao Damaseko, weia hau ha ua'a taba ke'uahina hanona akakia ikoikiai kobabainakia.' <sup>11</sup> Te'aba'u haukia ima'uai te'ebe tebaka'ana'u taeao Damaseko, pokina ea weiana 'imare 'abana maha'u eba'iaunakia.

<sup>12</sup> "Hau ha atana Anania emai ehana'u. Ia hanona rauhuhu 'abikia ne'ima harainakia hauna, Iuda haukia weia temiaho haukia ikoikiai hanona ia timariki aina. <sup>13</sup> Ia emai here'uai ekoroti ehina bena'u etibaha, 'Uaho'aba'u Saulo e, emu ihaiha moa'i muena.' Rani weianai beronai maha'u enamo au ia aihana. <sup>14</sup> Ba ia etibaha, 'Aika 'aba'abaka ekia Tirama etina'ani'o ena nuatae ko'iohina abomo aka bero hauna Iesu koihana, ia pinanai ke'abi hanona aiana kona. <sup>15</sup> Weiana oi hanona ia pouna ihinanai koao, taba ona 'ao oihana hauna maearima ikoikiai kohina benakia. <sup>16</sup> Bariu taba naha'imana? Momikiri Obiapaka koaparina atanai ko'uere robe, emu ki'a keuhu obonakia.'

### *Obiapaka Paulo Euhuna Rama Haeai Haukia Herekia.*

<sup>17</sup> "Muriai au amue aeao Ierusalem, marea robe aonai abahuba'ari hanona amahabanai. <sup>18</sup> Obiapaka aihana ba ehina bena'u etibaha, 'Monoanoa. Bariu bariu mo Ierusalem kohabona, pokina e'u pou kohinana hanona maearima neiakia emu 'abi a'i katea'i taeara.' <sup>19</sup> Au atibaha, 'Obiapaka e, ia aia'u kateona, pokina maearima neiakia hanona te'iohina'u au aeao marea ha ha aokiai tia'ikakaumanio

haukia ahunakia, abirinakia wapura itu-nai ane'etinakia. <sup>20</sup> Oi poumu ihinana hauna Stefano aruaruna ekiki oioi raninai au abomo weia kipokia takoroti haeamo teahu 'arina haukia abatohanakia abomo ekia habuni aiha 'ininakia.' <sup>21</sup> Weiana Obiapaka ehina bena'u etibaha, 'Aha'i, oi hana moao, au oi nauhuni'o rama haeai haukia atau'ai temiaho haukia herekia.' "

### *Paulo Hanona Roma Hauna Erama.*

<sup>22</sup> Maearima hanona Paulo aiana tebahu aina eaomo 'abi neiana ehinana raninai aiakia tebakara 'aunakia teio tetibaha, "Hau neiana kahahu 'arina! Neia hanopakai kemiaho hanona ena namo aha'i." <sup>23</sup> Ia tebakoko ekia habuni tekapo abomo 'ano te'iti tekapo 'ubi teao.

<sup>24</sup> Weiana huari poki hauna ena huari haukia ehina benakia Paulo teaoaina aka 'ekana, weia kate'atina ba katebakaina taba buonai teioaina. <sup>25</sup> Temikiri tebirina kate'atina aonai, Paulo huari haukia hinabu nipoki aina hauna ia herenai ekoroti hauna ehina bena etibaha, "Roma hauna bakai a'i nia'i bahana, ia kate'atina hanona mai ena bero, 'u?"

<sup>26</sup> Huari hauna weiana aia eona raninai eao ia ena poki hauna ehina bena etibaha, "Hau weiana hanona Roma hauna na niho. Aea kobabai aiho?" <sup>27</sup> Weiana huari poki hauna eao Paulo ebakaina etibaha, "Oi Roma haumu?" Paulo e'abi, "E."

<sup>28</sup> Huari poki hauna e'abi etibaha, "Au Roma hau'uai aeao hanona moni rarina 'akina 'ara ahore." Ia Paulo e'abi etibaha, "Au hanona Roma hau'u arama." <sup>29</sup> Weia tekoroiti katebakaina haukia beronai tehe mue, huari poki hauna e'jobina hanona eta'u, pokina Paulo hanona Roma hauna, iamo tabiriai ebirina paunai.

### *Paulo Bakai Apa'uana Wairanai Ekoroti.*

<sup>30</sup> Erani huari poki hauna ena nuatae ke'ioi haraina Iuda haukia taba buonai Paulo tekaiahina. Weiana robe haukia apa'uakia mai bakai apa'uana haukia ebato'unakia, ba Paulo erubuna eaoaina wairakiai ebakorotina.

## 23

<sup>1</sup> Paulo bakai apa'uana haukia eiha 'ini'ininakia e'abi etibaha, "Uaho'aba'u e, ao'u tohana beho ha a'i ababaina Tirama wairanai amiaho emai mo bariu."

<sup>2</sup> Weiana Anania robe haukia 'arakiai hauna 'abi neiana eona hanona Paulo herenai tekoroiti haukia ehina benakia pinana kateahu 'iti'itina. <sup>3</sup> Ba Paulo ia ehina bena etibaha, "Kaita'ata'a haumu, Tirama keahuni'o, rauhubuai naia omiati, au kobabakaina'u, ia oi haeamomu mo rauhuhu obakai hurina, o'abi kateahuna'u."

<sup>4</sup> Paulo herenai tekoroiti haukia tehore tehina bena tetibaha, "Oi hama Tirama ena robe haukia 'arakiai hauna herenai nu'abi ki'a?" <sup>5</sup> Paulo etibaha, "Uaho'aba'u, a'i a'jobina ia hanona robe haukia 'arakiai hauna. Weiana puka robenai na erere aiho, 'Emu obia hauna herenai a'i ko'abi ki'a.' "

<sup>6</sup> Paulo bakai apa'uana haukia eiha 'ioi ainakia baika Parisea haukia baika Sadukea haukia hanona wairakia eio 'aota etibaha, "Uaho'aba'u e! Au hanona Parisea hau'u, Parisea nahukia, e'u raona raona 'ari haukia katemikiri mue paunai bariu bakai 'ekanai nakoroti."

<sup>7</sup> 'Abi neiana ehinana raninai baiara rarina 'akina erama, ia tehe boana Parisea haukia 'abaeana mo mai Sadukea haukia 'abaeana mo. <sup>8</sup> Pokina Sadukea haukia hanona 'ari haukia ekia mikiri mue a'i tibatohana, aneru 'ao auba abomo aha'i, ia Parisea haukia hanona ikoikiiai tibatohanakia. <sup>9</sup> Atetua rarina erama, Parisea haukia aokiai rauhuhu poki haukia baika temikiri teio 'aota tetibaha, "Hau neiana ena beho ha a'i tatabu ahina. Pa'e aneru 'ao auba mo hau neiana ehina bena."

<sup>10</sup> Baiara erarina 'akina. Huari poki hauna Paulo a'i temetapa 'iti'itina ta'una, huari haukia euhunakia teriri teao Paulo herekiai tepuhu boinakia, teaoaina huari haukia ekia 'eka.

<sup>11</sup> Rabi weiana Obiapaka Paulo herenai ekoroti e'abi etibaha, "Kotabura! Ierusalem pou'u ohinana 'abana Roma ai abomo pou'u kohinana."

### *Iuda Haukia Paulo Kateahu 'arina.*

<sup>12</sup> Erani raurani Iuda haukia teto'u terobahu te'abi'uai Tirama wairanai, aniani ha a'i kateana abomo bei ha a'i kateinu keao mo Paulo kateahu 'arina. <sup>13</sup> Haukia ikoinai bariabui reana hanona ua te'abi aiho. <sup>14</sup> Teao robe haukia apa'uakia mai aiara maearima apa'uakia herekiai te'abi tetibaha, "Ai aba ta'abi'uai Tirama wairanai, aniani ha a'i katana keao mo

Paulo katahu 'arina. <sup>15</sup> Bariu wai mai bakai apa'uana haukia 'abi tomouhuna meao huari poki hauna herena katobai'oi kato'abi, Paulo kemai na'a heremi 'abi berona katoa'ina na katohoma. Ia na kemai a'i kekarahi baha aonai ai aba ta'oru katahu 'arina."

<sup>16</sup> 'A Paulo uana Paulo hinahina tehinahina 'uruna eona, ua buonai eao huari haukia ekia 'ekai, Paulo haianai e'abi. <sup>17</sup> Ba Paulo huari haukia hinabu nipoki ainakia hauna ha eaparina ehina bena etibaha, "Hau 'aru'aruna neiana kobaka'ana koaoaina huari poki hauna herena, ia mai ena 'abi ha ua'a kehinana herenai." <sup>18</sup> Ua buonai huari hauna weiana Paulo uana eaoaina huari poki hauna herena e'abi etibaha, "Paulo wapura hauna ebaiuhu aeao herena, enoina'u hau 'aru'aruna neiana kamaiana heremu ia mai ena 'abi ha haiamuai kehinana."

<sup>19</sup> Huari poki hauna Paulo uana imanai e'ebe teao haiahai ai ba ebakaina, "Emu nuatae 'abina taba haia'uai kohinana?" <sup>20</sup> Ia e'abi etibaha, "Iuda haukia aba tehina haeamona katenoini'o, 'Mara Paulo koaoaina bakai apa'uana haukia herekia, katebakai haraina herenai 'abi berona katea'ina.' na katehoma. <sup>21</sup> Ia aiakia a'i kona pokina maearima haukia ikoinai bariabui reana hanona katebai'ima Paulo katehe abuna. Te'abi'uai Tirama wairanai a'i kateani 'ao bei 'a'i kateinu keao mo Paulo kateahu 'arina. Bariu maearima weiakia hanona aba te'oru kate babaina, ekia noi mo koa'i taeana hanona tibahubahu aina." <sup>22</sup> Huari poki hauna hau 'aru'aruna weiana eharabuna etibaha, "Ohina bena'u 'abina neiana pouna hanona hau ha haianai a'i kohinana." Ba euhuna eka'a.

### *Paulo Teaoaina Kaisarea Kabana Hauna Feliki Herenai.*

<sup>23</sup> Weiana huari poki hauna ehore huari haukia hinabu tipoki ainakia haukia rua eaparinakia ehina benakia etibaha, "Huari haukia hinabu rua, hoti ai tehuari haukia ikoinai imabui harau rua mai 'arawai haukia ikoinai hinabu rua katoba'orunakia. Bariu rabi beraura hoana 'ababani hamomo hanona katoao Kaisarea. <sup>24</sup> Hoti baika abomo katoba'orunakia Paulo kemia'au, kato'ima haraina katoaoaina Kabana hauna Feliki

herena." <sup>25</sup> Ba huari poki hauna marere ha ererena keao Kabana hauna herena, na erere aihona.

<sup>26</sup> "Au Klaudio Lusia, ao'u namonai oi Feliki Kabana haumu namomu banamo nabeni'o.

<sup>27</sup> Iuda haukia hau neiana tea'ina teahuna aba kateahu 'arina aonai, e'u huari haukia kipokia taeao 'arana tabamaurina. Pokina a'ioibina ia hanona Roma hauna. <sup>28</sup> Au anuatae ka'ioibina taba buonai tikai ahina buonai aeaoaina Iuda haukia ekia bakai apa'uana aonai. <sup>29</sup> Weia a'ioibina hau neiana taba ua'a ha a'i ehabaina weiana ke'ari 'ao kewapuraina, ia kipokia ekia rauhuhu aonai bakaibakai baika buokiai tea'ina. <sup>30</sup> Haeamona Iuda haukia baika terobahu kateahu 'arina na teho, pouna aona raninai beronai mo auhuna heremu. Tehinau aina haukia abomo ahina benakia ekia hinau 'abikia katewahi ainakia heremu."

<sup>31</sup> Ua buonai huari haukia ekia poki hauna aiana teka'aina ihobonai rabi weiana aonai Paulo teaoaina Antipatri ai tekarahi. <sup>32</sup> Erani hanona aekiai teka'a haukia temue ekia aka 'ekana teao, ia hotiai haukia Paulo teaoaina. <sup>33</sup> Hotiai teao haukia Kaisareai tekara'au raninai, marere weiana Kabana hauna atana Feliki tebena, ba Paulo abonamo Feliki ena iha'ini ba'anai tehabona. <sup>34</sup> Kabana hauna marere weiana etuabina murinai, ia Paulo ebakaina ia hanona 'eka tabana hauna. Ia e'ioibina Paulo hanona Kilikia hauna raninai, <sup>35</sup> e'abi etibaha, "Oi beho 'ekanai tihorotini'o haukia katemai raninai, oi emu pou kohina aiamu kaona." Epuia ia ena huari haukia ehina benakia Paulo weia Heroda obia hauna ena itu aonai kateiha 'inina.

## 24

### *Paulo Tehinau aina.*

<sup>1</sup> Wapu ima teore murinai Anania robe haukia arakiai hauna, aiara haukia apa'uakia mai Roma ekia rauhuhu e'ioibi haraina hauna atana Teretulo kipokia teriri teao Kaisarea, Kabana hauna Feliki wairanai Paulo katehinau aina. <sup>2</sup> Ba Feliki 'abi euhuna eao Paulo temaiaina, weiana Teretulo emikiri ena hinau 'abina ea'i ramana etibaha, "Feliki, Kabana haumu namomu e, ihau rarina o'uai ai harainamai baibua aonai tamiaho. Emu

aotipai emai hano neiana aonai taba namokia bo'okia terama. <sup>3</sup> Ua buonai 'eka maikoinai mai taeara ikoikiai ai hanona oi ta'i taeani'o. Feliki Kabana haumu namomu, ai mai aomai ikoikiai oi tabanamoni'o.

<sup>4</sup> Bariu a'i kabaro'arini'o, ia nanoini'o koaoko'o ainamai, emai 'abi papana uruna kona. <sup>5</sup> 'Abina hanona neiana. Hau neiana tatabu ahina ia hanona ripuripu hauna. Hanopaka maikoina aonai Iuda maearimakia ikoikiai herekiai atetua nibarama barama bena hauna, abomo Nasareta maearimakia ki'a obokia ne'uai ainakia ekia a'i to'u aokiai. <sup>6</sup> Ia nihore Marea Robe niba'opuna buonai ta'ina. (Emai rauhuhu tainai katababakaina. <sup>7</sup> Ia Lusua huari poki hauna apa'uana emai ebatabura ki'a heremaiai epuhu boina. <sup>8</sup> Ba tehinau aina haukia ehina benakia katewahi heremu.) Ba oi kipomu hau naiana kobakaina, ai ia tahinau aina hauna aiana kona hanona ko'jobina." <sup>9</sup> Weiana Iuda haukia abomo Teretulo tebaruana te'abi ena 'abi ikoikiai hanona tohakia.

*Paulo Feliki Kabana Hauna Wairanai Kipona Pouna Ehinana.*

<sup>10</sup> Kabana hauna 'ekuna ekaina Paulo ke'abi, ba Paulo e'abi etibaha, "Ihau rarina eka hanopaka aonai bakai bo'ona obabainakia buonai au ao'u namonai kipo'u pou'u kahinana oi wairamuai. <sup>11</sup> Oi kipomu 'uri'uri neiana pokina kotabuna raninai aba ko'jobina, weiana wapu harau haea rua aba teao aonai au akara'au Ierusalem aeo kabahuba'ari. <sup>12</sup> Aonai Iuda haukia here'uai beho ha a'i tetabu ahina, marea robe aonai hau ha ohi a'i tabaiara 'ao marea aokiai 'ao aiara weiana aonai a'i abatetua. <sup>13</sup> Hau neiakia bariu tehinau aina'u 'abikia hanona a'i mo kateba tohanakia oi wairamuai.

<sup>14</sup> "Iamo au wairamuai kahina pouna hanona neiana, hau neiakia ti'abi kuti bai'oina taearanai au hanona 'aba'abamai ekia Tirama nakuti aina, taba ikoikiai Mose ena rauhuhu mai mahabanai haukia ekia pukai tererenakia ikoikiai na'i taeanakia. <sup>15</sup> E'u buabeni Tirama herenai hanona ihobonamo maearima neiakia. Emai buabeni hanona bero haukia mai ki'a haukia ikoikiai 'ariai katemikiri mue. <sup>16</sup> Ua buonai rani ikoinai nabatabura ao'u

beronai kamiaho Tirama mai maearima wairakiai.

<sup>17</sup> "Ihau baika atau'ai amiaho murinai amue aeo Ierusalem a e'u maearima herekia beruberu kaeao ainakia uraru haukia kabenakia haeamona ki'a ihina haona banamona kababaina paunai. <sup>18</sup> Au hanona robe hoahoana ababaina abamaha mahana'u aonai marea robe ai teihana'u, mako ua'a aha'i, abomo 'uri'uri ua'a ha a'i ababaina. <sup>19</sup> Ia Iuda haukia baika Asiai temai haukia abomo weia, e'u beho ha teihana raninai bariu wairamuai patewaira tina patehina pouna. <sup>20</sup> Aha'i raninai Iuda haukia neiakia aba temai haukia teme'abi, bakai apa'uana haukia wairakiai tebabakaina'u aonai e'u beho tabana tetabu ahina. <sup>21</sup> Ia wairakiai akoroti raninai aio 'abi ha neiana ahinana atibaha, "Ari haukia katemikiri mue mo paunai bariu toa'ina'u bakai 'ekanai tohorotina'u.' "

<sup>22</sup> Ba Feliki a'ikakauma taearana e'iohi haraina paunai bakai ekaiabuna ba e'abi etibaha, "Huari poki hauna Lusua kemai raninai emi bakai karaonana." <sup>23</sup> Ia ehore huari haukia hinabu nipoki ainakia hauna ehina bena Paulo keiha 'ini haraina, ia a'i kekaiabu ki'a bahana, ena hau katemai katetoana haeamona ena nuatae tabakia re'a katebabai.

*Paulo Wapura Itunai Tekaiabuna Ihau Rua.*

<sup>24</sup> Rani baika teao murinai Feliki atawana Drusila ohi temai, Drusila hanona Iuda babi'ena Feliki ebaiuhu eao Paulo emai, ba Paulo a'ikakauma Keriso Iesu aonai hauna pouna ehinana aiana teona. <sup>25</sup> Ia Paulo ehore aka bero, bakiro mai bakaibakai rarina kemai hauna robakia eahuna, weiana Feliki hanona eta'u e'abi etibaha, "Abetaina naia, bariu hanona komue koao, rani ha namona kehaea 'eu'uai raninai kapari mueni'o." <sup>26</sup> Rani weianai Feliki eraonana Paulo moni baika ia kebena ba keba karahina, weiana buonai rani bo'ona ebaiuhu Paulo eao terarua te'abi'abi.

<sup>27</sup> Weiana ihau rua teao murinai Porokio Festo ehore Feliki 'ekana ea'ina. Ia Feliki Iuda haukia aokia keana paunai Paulo wapura itunai ehabona.



## 25

### *Paulo Enuatae Kaisa Wairanai Kekoroti Kebakai.*

<sup>1</sup> Festo ke'imana hanonai ekara'au ena aka ea'i ramana wapu aihau murinai Kaisareai eao Ierusalem. <sup>2</sup> Robe haukia apa'uakia mai Iuda haukia apa'uakia teao herenai ua'a Paulo tehinau aina. <sup>3</sup> Festo teba'amena tēnuatae bariu Paulo keuhuna kemai Ierusalem. Pokina Paulo kekara'au hanona kateba'oru, taearai katehe abuna kateahu 'arina teraonana. <sup>4</sup> Ia Festo e'abi etibaha, "Paulo hanona Kaisarea wapura itunai tekai abuna, rani papana haeamona aba kamue kaeao. <sup>5</sup> Namona hanona teuai ainimi haukia katemai kipokia kataeao Kaisareai hau weiana mai ena beho re'a katehinau aina."

<sup>6</sup> Wapu 'ababani 'ao harau haea 'abana kipokia temiaho murinai Festo eao Kaisarea. Erani eao bakai 'ekana emiati 'abi euhuna eao Paulo kate maiaina. <sup>7</sup> Ba Paulo emai raninai, Iuda haukia Ierusalem mai temai haukia teao Paulo tekori kaiarona 'abi bo'okia pumakia 'akikia tehina herenai, ikoikiai a'i mo katebatoha 'abikia 'abaeana. <sup>8</sup> Paulo ekia 'abi arana ebamuena etibaha, "Au taba ha a'i ababaina, Iuda haukia ekia rauhuhu a'i mo abakai hurina, marea robe abomo a'i a'iki'ana, 'ao Roma ekia obia 'arana Kaisa herenai beho mo ha a'i ababaina."

<sup>9</sup> Ia Festo Iuda haukia ketainakia aokia kebanamona na ehoma Paulo ebakaina, "Nonuatae kokara'au koao Ierusalem hinau 'abikia neiakia paukia ua'a waira'uai kobakai?" <sup>10</sup> Paulo e'abi etibaha, "Au bariu Kaisa ena bakai 'ekana nakoroti, au bariu mo neianai mebakaina'u. Pokina oi o'ioi ki'a bahana, Iuda haukia herekia taba ha a'i a'iki'ana. <sup>11</sup> Ia pabeho mo ba beho 'arana 'ari pate'uahina, a'i naubo pa'ari. Ia Iuda haukia ekia hinau 'abikia aha'uai tene'eti ikoikiai a'i tetoha, hau ha ena bero aha'i kea'ina'u ia imakia keutana. Nanoi Kaisa wairanai kakoroti kabakai." <sup>12</sup> Festo bakai haukia kipokia terobahu epua hanona Paulo ehina bena etibaha, "Oi onoi Kaisa herenai buonai koao Kaisa herena kobakai."

<sup>13</sup> Wapu baika teao murinai obia 'arana hauna Agripa haibuna Berenike ohi Festo itoana ibanamona paunai teao Kaisarea. <sup>14</sup> Rani homa'ana temiaho aonai Festo ehore Paulo robana eahuna obia 'arana Agripa herenai, "Feliki wapura hauna ha na'a ehabona wapura itunai. <sup>15</sup> Aeao Ierusalem raninai, robe haukia apa'uakia mai Iuda haukia apa'uakia kipokia temai here'u tehinau tenoina'u kabawapurana. <sup>16</sup> Ahina benakia atibaha, 'Roma haukia ekia hoahoa hanona nahomana aha'i, maearima hanona a'i takaiabu 'abaeana keao mo ehinau aina hauna ohi bakai 'ekana katekoroti ia mai ena bero kipona pouna kehinana.'

<sup>17</sup> Kipokia tamai neia raninai, a'i abahoma'ana erani aeao bakai 'ekana, abaiuhu eao hau weiana kemai, ba emai. <sup>18</sup> Tehinau haukia temikiri te'abi raninai beho araonakia haukia a'i tehina. <sup>19</sup> Ia ae'emo ekia bahuba'ari taearana te'uri'uri aina mai 'ari hauna ha atana Iesu e'ari weiana Paulo e'abi emauri hauna buonai kipokia tebaiara hauna robana teahuna. <sup>20</sup> Taba neiana itabuna ababatana here'uai a'i etaina buonai, Paulo abakaina, kenuatae re'a keao Ierusalem ua'a kebakai. <sup>21</sup> 'A enoi ena bakai Kaisa keihana, ua buonai a'abi katekaiabuna wapura itunai kemiaho keaomo kauhuna keao Kaisa herena." <sup>22</sup> Ba Agripa ehore Festo ehina bena etibaha, "Au abomo nanuatae hau weiana aiana kipo'u haia'uai kaona." Festo ia ena 'abi ebamuena etibaha, "Mara ia aiana aba kona."

<sup>23</sup> Erani Agripa mai Berenike ekia habuni namokia mai nuabikia ekia apa'ua hoana ibawaira tinana haukia tebatotona, huari poki haukia mai aiara haukia apa'uakia kipokia tetoto teao to'u ituna. Festo ena 'abiai Paulo temaiaina. <sup>24</sup> Festo emikiri e'abi, "Obia arana haumu Agripa mai towaira tina haumi ikoimia! Hau neiana toihana. Iuda haukia Ierusalem ua'a mai neia Kaisareai temiaho haukia maikoina hau neiana here'uai tehinau aina teioaina tetibaha, 'Ia kemiaho hanona ena namo aha'i, ia ke'ari.' <sup>25</sup> Ia beho tabai ke'ari hanona au a'i atabu ahina, haeamona kipona enoina'u ena bakai Kaisa keihana buonai, naraonana kauhuna keao Roma. <sup>26</sup> Ia a'i na'iohina

*Festo Paulo Eaoaina Agripa Wairanai.*

ahanai 'abi tabana mo karere keao Kaisa herena. Ua buonai amaiaina ikoimiai wairamiai, tohana hana obia 'arana hauna Agripa wairamuai, kahabakai haraina ia 'abina namona kahatabu ahina karerena. <sup>27</sup> Naraonana a'i ebero wapura hauna kauhu 'abaeana ia ena beho a'i karere pouna."

## 26

### *Paulo Agripa Wairanai Kipona Pouna Ehinana.*

<sup>1</sup> Agripa ehore Paulo ehina bena etibaha, "Aba bero nabeni'o kipomu poumu mohinana." Ba Paulo imana ea'i taeanakia e'abi etibaha, <sup>2</sup> "Obia 'arana hauna Agripa e, au kipo'u nababatana bariu rani neianai oi wairamuai akoroti hanona enamo, pokina Iuda haukia ekia hinai 'abikia here'uai hauna kipo'u pouna kahinana. <sup>3</sup> Neiana hanona taba tohana, oi o'jobina Iuda haukia ekia hoahoa mai ekia atetua, ua buonai nanoini'o kobai'ima au ka'abi.

<sup>4</sup> "Iuda haukia ikoikiai te'jobina'u ko'iko'i'uai a'iramana emai mo bariu, e'u miaho maurina kipo'u e'u aiarai abomo Ierusalem ai. <sup>5</sup> Aba wa'i baha te'jobina'u abomo au hanona Parisea haunai tebaona'u, ekia kuti rauhukia pahihikia katebabai aokiai au abomo baiatakiai, ia katenuatae hanona katehina pouna. <sup>6</sup> Bariu bakai 'ekanai akoroti, pokina Tirama e'abi 'uai 'aba'abaka herekiai hauna nabuabena paunai. <sup>7</sup> Itubu harauhaea rua rabi mai mararani Tirama nahakuti aina mai 'abi'uai neiana nahabuabena kerama. Hau apa'uana e, buabeni weiana paunai Iuda haukia au tehinai aina'u. <sup>8</sup> Taba buonai wai tu'abi Tirama nihore maearima 'ariai nibamikiri muenakia a'i katoa'i taeana na tuho?

<sup>9</sup> "Au abomo ao'uai aranonana Iesu Nasareta hauna atana a'oatana ia'i ki'ana akakia bo'ona pababai hanona penamo. <sup>10</sup> Au Ierusalem ai ua ababai aiho, robe haukia apa'uakia hiabu tebena'u, aeao Tirama ena maearima a'inakia abawapuranakia, abomo kateahu 'arinakia 'abina tehinana au ima'u a'itaeana. <sup>11</sup> Rani bo'ona aeao marea ha ha aokiai ahunakia abahaiaranakia, abahobona ahina benakia ekia a'ikakauma kate bunaiaina,

au aopuereai ki'a bahanakia, weiana hanopaka haeai abomo aeao ahunakia.

### *Paulo Eraona kabe Pouna Ehinana. (Ih 9.1-19; 22.6-16)*

<sup>12</sup> "Raona neiana paunai au rani ha robe haukia apa'uakia hiabu tebena'u teuhuna'u kaeao Damaseko. <sup>13</sup> Obiamu, taearai atiaha tohanai ea ha aihana kupa 'ubinai, ea ki'a baha ba be- raura, te'abana'u haukia kipokia ebaea obonamai. <sup>14</sup> Ikoimiai ta'eho 'anoai aia ha aona Heberu maeakia ehina bena'u etibaha, 'Saulo e, Saulo e, taba buonai au nu'oatana'u? Au nubaki'ana'u hanona kipomu kobahaiarani'o akana nubabaina.' <sup>15</sup> Abakaina atibaha, 'Obi- apaka e, oi tai?' Obiapaka e'abi, 'Au Iesu oi nu'oatana'u hau'u. <sup>16</sup> Momikiri aemu tohanai mokoroti, au heremuai awaira tina hanona ka'itaeaini'o e'u ta'ara'i haunai koao, bariu oi aea oiha aihona'u abomo wairai kabaihani'o haukia poukia maearima kohina benakia. <sup>17</sup> Au Iuda mai rama haeai haukia imakiai oi kabamaurini'o, haeamona kauhuni'o rama haeai haukia herekiai. <sup>18</sup> Mahakia kobano'anakia wapurai koba kabanainakia katemai ea, ba Satani ena hiabuai katekabanai katemai Tirama herena, weiana kate a'ikakaumana'u ekia ki'a ihina hao mai ekia 'eka kate'ina Tirama ena maearima robekia baiatakiai.'

### *Paulo Ena Aka Robana Eahuna.*

<sup>19</sup> "Obia 'arana haumu Agripa e, kupai aia weiana aona hauna aka'ai tohana. <sup>20</sup> Kori'uaina hanona weia Damasekoai, haeamona Ierusalem ai mai Iudea aiarakia ikoinai eamo rama haeai haukia herekiai airoro aina kateraona kabe katemue Tirama herenai, aka namokia katebabainakia weiana ia aba teraona kabe haukia katebatohanakia. <sup>21</sup> Weiana buonai Iudea haukia marea robe aonai tea'ina'u, ekia nuatae hanona kateahu 'arina'u. <sup>22</sup> Au hanona Tirama ebarai to'ona'u emai mo bariu au wairamiai akoroti nabatohana, maearima papakia 'ao apa'uakia ikoikiai herekiai teihobo. Au nahinana hauna hanona taba hamona mo mahabanai haukia mai Mose ia robana teahuna kerama hauna. <sup>23</sup> Keriso hanona kehaira ba 'ariai kemikiri 'uai, Isaraela haukia mai rama haeai haukia ikoikiai herekiai ena bamauri eana kemaiaina."

*Paulo Agripa Ehina bena Kea'ikakauma.*

<sup>24</sup> Paulo kipona pouna nehinana aonai Festo eio etibaha, “Paulo e, oi hanona aba nubeau 'ari, emu aotipa apa'uana ehore aba ebabeau 'arini'o.” Paulo ia ehina bena etibaha, <sup>25</sup> “Festo Apa'uamu e, au hanona a'i nabeau'ari, au nahina haukia hanona 'abi tohafia abomo mai anikia. <sup>26</sup> Au ahina 'abikia hanona obia 'arana hauna abomo neiakia e'iohi buonai au mai ao'u ikoinai na'abi. Au a'iohina ia neiakia ikoikiai aba ea'i harainakia, pokina taba neiakia hanona eua'a haiahaia a'i terama. <sup>27</sup> Agripa Obia haumu e, oi mahabanai haukia nubatohanakia? Au a'iohina oi ia nubatohanakia.”

<sup>28</sup> Agripa Paulo ehina bena etibaha, “Rani papana neiana aonai oi nuranana au Keriso ena maearama ai aba kobaona'u, 'u?” <sup>29</sup> Paulo e'abi etibaha, “Rani eko'o ko'o 'ao rani ehoma'a, ia au Tirama nanoina, oi ikupaiamu aha'i, ia aia'u tuona haumi ikoimiai bariu be- raura neianai hanona patomai au 'abanai patoao, iamo heremiai tabiri hamona nahomana a'i nanuatae aina.”

<sup>30</sup> Ba Obia 'arana hauna, Kabana hauna, Berenike mai weia temiati haukia ikoikiai temikiri, <sup>31</sup> ikaihuri weiana tehabona tekarahi, ha ha te'abi'abi tetibaha, “Hau neiana taba ha a'i ebabai ki'ana weiana ia ke'ari 'ao kewapura hauna a'i ebabaina.” <sup>32</sup> Agripa ehore Festo ehina bena etibaha, “Hau neiana hanona pahabakarantina, ia Kaisa mo atana ehinana ua'a kebakai.”

## 27

*Paulo Aunohiai Tebaehe'auna Kateao Roma.*

<sup>1</sup> Weiakia ekia raona tebatohana ai hanona aunohi ai kataeao Italia, ba Paulo mai wapura haukia baika hanona huari haukia hinabu ha ne'imanakia hauna ha atana Iulio imanai teutanakia, ia hanona obia 'arana Augusto ena huari hauna ha. <sup>2</sup> Ai Adramutio aunohina ha ai taehe'au ba Asia 'abirakia poekia katabeauna tabeau ahi, Aristako Makedonia hauna weia Tesalonika ai emai hauna abomo ai baiatamai ai. <sup>3</sup> Erani hanona Sidono ai tabeau'au, ba weia hanona Iulio ena namo hoana Paulo herenai ebabaina ehabona keao ena hau herekia keihanakia ena nuatae tabakia re'a katebena. <sup>4</sup> 'Eka weiana tehabona tabeau ahi mue 'akupakanai taeao Kupuro

kereibua murinai tabeauna pokina baura wairamaiai emai paunai. <sup>5</sup> 'Akupaka 'abaeana tabeauna Kilikia mai Pamfulia poekia tahabonakia taeao Lukia hanonai 'eka atana Mura ai tabeau 'au.

<sup>6</sup> Weia hanona huari poki hauna weiana Alesanderea aunohina ha Italia niao hauna etabu ahina, ba weia ebaehe bannainamai. <sup>7</sup> Wapu bo'ona maharimahari tabeau ba mai aro'arimai taeao Kenido ai tabeau 'au. Emari nuatae 'ekana tabeau bena aonai baura wairamaiai emai paunai Salmone pauna tabeau banai tabeau taeao Krete kereibua bunianai. <sup>8</sup> Mai aro'arimai poe haiana tabeauna tamai 'eka ha atana 'Ihoahoa Namoabuna', 'eka weiana mai Lasea aiarana baiatakia hanona a'i ehoma'a.

<sup>9</sup> Wapu bo'ona hanona ua'a eore ba rani ena ki'ai 'akuai bea hanona aba keki'a ki'a baha pokina bariu Iuda haukia ekia ani robe ranina hanona aba ekabanai. Ua buonai Paulo eba'iohi baihanakia etibaha, <sup>10</sup> “Hau ikoimiai e, au eka harima nahana bariu neia keao hanona aba keki'a ki'a baha eka taba rarina hanona kate 'akauma aunohi ke'iti'iti mai eka mauri abomo kahane'enakia.” <sup>11</sup> Iamo huari poki hauna Paulo e'abi hanona aiana a'i ebatohana ia aunohi pokina hauna mai aunohi kapena hauna mo aiakia eka'aina. <sup>12</sup> 'Amari rarina 'akina aunohi weia ketai'au hanona emari miaho a'i kenamo, ua buonai hau bo'okia hanona tenuatae patabeau ahi mue ba petaina raninai Foenikia ai patabeau 'au ba 'amari rarina ranina hanona weia mo patamiaho. Krete aonai ihoahoa weiana mo enamo pokina ahitaina tibotaina ohi baiatakia mai tototaina tibotaina ohi baiatakia taina ewairana.

*Kou Eabu'au Emari.*

<sup>13</sup> Tibo baurana namona eabu rani- nai, ia teraonana ekia nuatae baurana aba eabu 'au, buonai to'o teberi 'auna ba Krete poena haiahaiana tabeauna taeao. <sup>14</sup> Iamo tabeau ahi homa'ana aha'i hanona baura taburana 'akina atana Kou hanona kereibua tainai eabu 'au emari. <sup>15</sup> Kou weiana aunohi etabu ahina rani- nai, aunohi Kou ketarina hanona a'i etai 'apuana, ua buonai ta'i 'ororo ia baura mo eabunamai taeao. <sup>16</sup> Kereibua pa- pana ha atana Kauda abirana ahitainai

taru banai raninai, tai'oro papana tatabu ahina, emai 'epi tabiri 'auna aonai aro'ari takai ai haraina. <sup>17</sup> Ba ia weiakia 'epi teberi 'auna raninai 'anaua baika aunohi ba'anai teberi banainakia tebiri 'ininakia, weiana Libia poenai bauru ai a'i metoto ta'una parae teba ririnakia mai to'o tane'ena, ba aunohi earu eao. <sup>18</sup> Kou ki'a obona hanona ekai 'inina eao wapu ibaruanai hanona maearima ekia taba baika tekapo uhunakia. <sup>19</sup> Haeamona eao wapu ibai-haunai hanona aunohi tabana tohakia tekapokapo uhunakia. <sup>20</sup> Wapu bo'ona aokiai beraura mai bihiu ha a'i taihana mai Kou pahihina eabu a'i epua 'apua, emai raona eore taraonana a'i katamauri.

<sup>21</sup> Hau ikoikiai a'i teaniani 'apua rani ehoma'a ki'a murinai Paulo wairakiai ekoroti e'abi etibaha, "Hau ikoimiai e, wai au aia'u patona Krete ai a'i pahabeau ahi raninai, ki'a neiana a'i pahatabu ahina taba ha a'i peki'a mai taba ha a'i pahaba 'akaumana. <sup>22</sup> Ia bariu au wai nanoinimi, aomi katoba taburanakia, pokina neia hau ha ena mauri a'i ke'akauma, ia aunohi kipunamo ke'akauma. <sup>23</sup> Pokina warani rabi e'u Tirama nakuti aina hauna ena aneru euhuna emai here'uai ekoroti, <sup>24</sup> ba e'abi etibaha, 'Paulo e, a'i kota'u. Oi hanona Kaisa wairanai kokoroti kobakai, Tirama ena banamo oi heremuai paunai maearima naiakia aunohiai toehe'au haukia ikoikiai katamauri.' <sup>25</sup> Ua buonai hau ikoimiai aomi katoba taburanakia, au hanona Tirama nabatohana ia ehina bena'u ihobonai kebabaina. <sup>26</sup> Iamo aika hanona kaharu kahaeao kereibua ha ai kahabure 'au."

<sup>27</sup> Wapu ibaharau haea banina rabinai ai hanona Adria 'akupakai tabure ohomo. Wapuka'a ibuanai aunohi haukia weiana tebabatana hanopaka aba tabarina. <sup>28</sup> Buonai 'anaua tebaririna roio ena 'oura tehobona hanona roba harau rua, tamiaho 'apua homa'ana aha'i haeamona 'oura tehobo muena hanona aba emue roba harau haea ima. <sup>29</sup> Weia aunohi haukia teta'u emai aunohi pi-harai a'i meahu 'auna paunai to'o bani tebaririnakia, ba tenuatae perani biai. <sup>30</sup> Aunohi ai tiaka haukia tenuatae katebeau 'akauma, 'epi ha tebaririna ba tebai'oi matoha aunohi paunai to'o baika katebaririnakia. <sup>31</sup> Aonai Paulo huari

haukia mai ekia poki hauna ehina benakia etibaha, "Hau neiakia aunohi ahanai a'i katemiaho raninai wai hanona a'i katamauri." <sup>32</sup> Ua buonai huari haukia 'epi warona tekabe hurina ba tehabona e'eho roioai earu ahina.

<sup>33</sup> Aba kerani aonai, Paulo ikoikiai enoinakia aniani ha kateana ba e'abi etibaha, "Bariu wapu harau haea bani aba teao wai hanona tobai'ima tomiaho mo taba ha a'i toana. <sup>34</sup> Bariu hana nanoinimi aniani baika katoani, katoaniani hanona mauri katoa'ina. 'Aramiai bui ha hamona a'i ke'akauma." <sup>35</sup> Neiana ehinana murinai, Paulo parawa baika ea'inakia ia ikoikiai wairakiai banamo 'abina Tirama herenai ehinana murinai ehobina eani ramana. <sup>36</sup> Ikoikiai aokia eataburanakia kipokia abomo aniani teani. <sup>37</sup> Aunohiai taehe'au haumai ikoinai hanona hinabu rua imabui harau rua 'abaihau (276). <sup>38</sup> Ikoikiai teaniani eao teani 'ari harai raninai aunohi kateba'ama 'amana hanona aniani tekapo kapo uhunakia 'akuai.

### *Aunohi Epa'a.*

<sup>39</sup> Rani ererena aonai, hano teihana ia 'eka tabana a'i te'iohina, iamo aopaka ha poe namona teihana, ba aokia tea'ia'i haraina aunohi hanona poe weianai patebahaha 'auna. <sup>40</sup> To'o warokia tekabe hurinakia, to'o tehabonakia 'akuai hari warona tebatataenakia ba parae teberi taeana baura kehao uta kateao poeai katebahaha 'au. <sup>41</sup> Ia aunohi hanona rema ai ebamia'auna wairana hanona eahu to'ona a'i eibiuiuiu 'apua, aonai roio apa'uakia tehore aunohi murina teahu 'iti'itina. <sup>42</sup> Huari haukia ekia raona hanona wapura haukia kateahu 'arinakia pokina a'i temena'u 'au a'i temebeau 'akaumana paunai. <sup>43</sup> Ia huari haukia ekia poki hauna enuatae Paulo kebamaurina paunai huari haukia ekia raona akana katebabaina hauna ekaiabuna. Ba ehina benakia na'u te'iohina haukia katerobo uhu 'uai katena'u kateao poe. <sup>44</sup> Ia harina maikoina hanona aunohi bahana puapuakia tea'i baika aunohi tabana papakia tea'i tena'u. Ena tebabai aiho hanona ikoikiai poeai tekara'au mai namokia.

## 28

*Paulo Melita Kereibuanai Ekara'au.*



<sup>1</sup> Ikoimaiai namomai poeai takoroti raninai ta'jobina kereibua weiana atana hanona Melita. <sup>2</sup> Kereibua weiana haukia terabo harai heremaiai. Abara etibo mai 'ama rarina buonai ia iruba teba'arana ikoimai haumai ehiabu tea'i taeanamai. <sup>3</sup> Paulo matiu mai i'akena ea'ina iruba ahanai ehore 'auna, 'erau iruba hiabuna eonobaina hanona erobo ahi Paulo imanai e'uri to'o ekapa oreore. <sup>4</sup> Kereibua weiana haukia 'erau Paulo imanai teihana raninai ha ha te'abi tetibaha, "Pa'e hau nei ana hanona ahuahu hauna, 'akuai a'i e'ari maurinai ekara'au, bariu nei ana erama hanona ena beho 'arana." <sup>5</sup> 'A Paulo ehore imanai 'erau weiana ebaure obona eao iruba aonai e'eho, ia haiara ha a'i eonobaina. <sup>6</sup> Maearima weia haukia teraonana imana kebua 'ao kebata'u ke'eho ke'ari, ia tebai'ima rani ehoma'a ia herenai taba ha a'i erama, ba aokia tebahaeina tetibaha, "Ia tirama mo ha."

<sup>7</sup> Ia temiaho herena tainai ua'a hanona kereibua obiana hauna atana Pubilio ena 'eka, mai aonamona ebakara'aunamai ena ituai, ba wapu aihau ai hanona ia ena baki haumai e'ima harainamai. <sup>8</sup> Weiana Pubilio hamana hanona enoti itu aonai, ena inawa hanona hau hiabu mai me'ime'i, Paulo eao ena ikaihuri aonai etoto ahanai ebahuba'ari, imana ia ahanai ehao 'au ena inawa enamo. <sup>9</sup> Hoa weiana erama murinai inawa maearimania kereibua weiana aonai haukia ikoikiai temai ba eba namonakia. <sup>10</sup> Tamariki ainamai taeara haeaihaeai ai tebanamonamai, abomo katabeau ahi raninai taearai tanuatae ainakia tabakia ikoikiai hanona teuta 'aunakia.

### *Paulo Romai Ekara'au.*

<sup>11</sup> Nawa aihau murikiai ai hanona Alesanderea aunohinai taehe 'au tabeau ahi 'akupakai. Aunohi atana hanona 'Bai'apaea', weiana hanona 'ama rarina kereibuai weia etai'au emiaho. <sup>12</sup> Surakuse ai takara'au, weia tamiaho wapu aihau. <sup>13</sup> Weia emai parae takaina tabeau ahi taeao Regio ai tabahaha 'au, erani hanona baruru eabu, ba tabeau ahi wapu ibaruanai hanona ai Puteoli ai tabeau 'au. <sup>14</sup> Weia uaho'abaka baikata tabu ahinakia, tebaka'anamai taeao herekiai tamiaho hui hamomo, weia tamikiri hanona taeao Roma. <sup>15</sup> Uaho'abaka baikata weia poumai teona hanona temai mo aiara baikata wairai

atakiatia 'Apio kawakawa 'ekana' mai 'Pariki aihau' hanona weia kipokia tabaitabu ahi. Paulo hau neiakia eihanakia raninai Tirama ebanamona abomo aona ekiro.

<sup>16</sup> Roma ai takara'au raninai Paulo hanona ikupaiana ena 'eka teba haeaina, huari hauna ha ia ke'imana.

### *Paulo Romai Pou Namona Eiroro aina.*

<sup>17</sup> Wapu aihau teore murikiai Paulo ehore Iuda te'uai aina haukia eaparinakia teto'u aonai, Paulo emikiri e'abi etibaha, "Uaho'aba'u ikoimiai, au eka maearima a'i mo abareana 'ao 'aba'abaka ekia hoahoa a'i mo abakai hurina, ia au hanona weia Ierusalem a'i ia tebirina'u Roma haukia imakiai teutana'u. <sup>18</sup> Roma haukia tebakaina'u ekia nutatae kateba karahina'u pokina ki'a ha a'i tetabu ahina weia au ka'ari. <sup>19</sup> Ia Iuda haukia bakai ena 'abi tebaki'a, au hanona tebahi ahina'u mo Kaisa atana ahinana, wairanai kakoroti kabakai naho. 'A au e'u maearima kahinahina ainakia hanona aha'i. <sup>20</sup> Nei ana paunai au aparinimi kaihanimi mai kipokia kaha'abi'abi. Isaraela maearimania ia tebuabena hauna buonai tabiri nei ana au aha'uai."

<sup>21</sup> Ia ena 'abi tebamuea tetibaha, "Oi 'abimu marerena weia Iudea ai ha a'i emai a'i tatabu ahina, 'ao uaho'abaka abomo ua'a ha 'abi a'i emaiaina 'ao oi emu babai ki'a obona ha pouna a'i ehinana. <sup>22</sup> Bariu ai hanona tanuatae oi emu raona 'abina kohinana aiama kataona, pokina ai ta'jobina oi a'ito'u naiana nubabaina hauna eka maikoina maearima a'i tenuatae aina."

<sup>23</sup> Ba Paulo mai to'u haukia kipokia wapu ha teba'oruna, wapu weiana etaina hanona maearima bo'ona tera'a temai Paulo nemiaho 'ekanai teto'u mo raurani eamo erabi. Paulo ehore Tirama ena obia aiarana hauna robana eahuna maearima herekiai mai Iesu pouna Puka robenai tererena hauna eba'iobi aina Mose ena rauhuhu pukakia aokiai mai mahabanai haukia ekia pukakiai. <sup>24</sup> Maearima baikata ena 'abi teona hanona aokia eaoaina, 'a baikata hanona ena 'abi a'i tea'i taeanai. <sup>25</sup> Aokia a'i ehamona katera'a, ekia ra'ai Paulo 'abi hamona nei ana ehinana e'abi etibaha, "Auba Robe Isaia mahabanai hauna pinana hama ehina harai ki'a bahana 'aba'abami herekiai etibaha,

<sup>26</sup> 'Moao maearima neiakia  
herekiai kotibaha,  
Aia neiana kato'o o'o bena  
ia obona a'i katobo,  
katoihaiha bena  
ia a'i katoiha tinana.

<sup>27</sup> Pokina uru neiana haukia aokia  
hanona tetubu abu haiakia  
hanona tepo'o, mahakia te'iau.  
Ua a'i katehoma raninai,  
mahakiai kateihana,  
haiakiai kateona,  
aokia kate'iobi,  
kateraona kabe  
katekabe katemai here'u  
au mauri kabenakia.'

Isa 6.9, 10

<sup>28</sup> Ua buonai kato'iobi haraina, Tirama  
ena bamauri 'abina hanona aba euhuna  
rama haeai haukia herekia, ia kateona.”  
<sup>29</sup> (Paulo ua e'abi aiho murinai Iuda  
haukia terama otaraina, 'a ikoikiai 'abi  
weiana kipokia tebaiara aina.) <sup>30</sup> Paulo  
ihau maikoikia rua weia emiaho, itu emi-  
aho aina hauna kipona 'arana ehorena,  
herena temai kateihana haukia ea'i  
taeanakia. <sup>31</sup> Ia Tirama ena obia aiarana  
'abina eiroro aina mai Obiapaka Iesu  
Keriso pouna eba'iobi aina mai taburana,  
hau ha a'i ekaiabuna.

## Paulo Ena Marere ROMA Haukia Herekiai

### *Puka Aona Irerena 'Abina*

Paulo ehore puka neiana ererena pokina ena nuatae hanona keao a'ikakauma haukia to'ukia baika Roma aiara apa'uanai haukia keihanakia. Ena nuatae hanona keao kipokia katemiaho 'apua ba keao Speini (15.23, 24). Puka neiana aonai Paulo ehore Keriso pouna namona ehina pou haraina, mai weiakia Iesu murinai ti'au haukia ekia mauri aea katehoma.

Kori'uainai hanona banamo 'abina a'ikakauma haukia to'ukia Romai temiaho herekiai ehinana. Epuā puka 'abina anina tohana na ehina harai aihona, "pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana." (1.17) Haeamona Paulo e'abi, maearima weiakia Iuda haukia 'ao rama haeai haukia ikoikiai hanona ki'a haukia. Weiana Tirama ehore ia eaoko'oai ki'anakia, eapari muenakia Iesu Keriso katea'ikakaumana haukia hanona Tirama kehore ia kebamaurinakia.

Puka iro'ana 5—8 aonai Paulo ehore Tirama ena rauhūbu anina mai Auba Robe a'ikakauma haukia ekia mauri aonai hauna robakia eahunakia. Iro'ana 9—11 hanona Paulo kipona ena puma apa'uana ha robana eahuna, weiana Iuda haukia weiakia Tirama etina'anakia ia ena maearimai kateao haukia bo'ona Iesu tekamuri aina. Haeamona rama haeai haukia hanona temai Iesu i'abana haukiai teao, iamo Iuda haukia hanona aha'i. 'A Paulo ena a'ikakauma hanona muriai Iuda haukia katemai Iesu ena maearimai kateao. Puka neiana a'enai hanona Paulo ehore hoahoa mai babai weiana a'ikakauma haukia kateka'ai haukia robakia eahuna.

### *Puka Paipana Apa'uakia*

- Roba ahu mai 'abi'abi apa'uana. (1.1-17)
- Maearima bamauri katea'ina hanona taba apa'uana. (1.18—3.20)
- Tirama ena bamauri taearana. (3.21—4.25)

- Mauri mahamahana Keriso aonai. (5.1—8.39)
- Isaraela haukia Tirama ena raona aonai. (9.1—11.36)
- A'ikakauma maurina. (12.1—15.13)
- 'Abi orekia mai banamo 'abikia. (15.14—16.27)

### *Paulo Ena Iuhubeau Akana Pouna Ehinana.*

<sup>1</sup> Au Paulo e'u marere neiana. Iesu Keriso ena ta'ara ia'ina hau'u, ena iuhubeau haunai kaeao paunai Tirama etina'ana'u eaparina'u ena pou namona kairoro aina.

<sup>2</sup> Pou namona neiana hanona Tirama ehore aba wa'i baha e'abi'uai aina ena mahabanai haukia pinakiai tehinana Puka Robena aonai tererena, <sup>3</sup> ia Nahuna pouna, eka Obiapaka weiana Iesu Keriso, hauaniai hanona Davida nininai erama, <sup>4</sup> ia aubana robenai hanona 'ariai ebamikirina raninai ebatohana mai hiabuna ia hanona Tirama Nahuna. <sup>5</sup> Iesu Keriso paunai mai ia atanai baraibarai apa'uana abomo iuhubeau hoana aba ta'ina, weiana rama haeai haukia baiatakiai maearima ikoikiai kataparinakia a'ikakaumai aia kateka'ai. <sup>6</sup> Wai abomimo weia Iesu Keriso 'eunai Tirama ehore eaparinakia haukia baiatakiai.

<sup>7</sup> Roma ai tomiaho Tirama eraona'au ainimi eaparinimi ena maearimai ebaonimi haumi ikoimiai, Hamaka Tirama mai Obiapaka Iesu Keriso herekiai aoko'o hoana abomo baibua katoa'ina.

### *Paulo Enuatae Keao Roma.*

<sup>8</sup> E'u 'abi kori 'uaina neiana: Iesu Keriso atanai e'u Tirama nabanamona wai ikoimiai paumiai, pokina wai emi a'ikakauma pouna hanopaka ikoinai abateona. <sup>9</sup> Tirama weiana Nahuna pouna namona nairoro aina aonai ta'arana na'i mai ao'u ikoinai hauna e'iohina e'u bahūba'ari ai au wai naraonanimi, <sup>10</sup> rani ikoinai e'u bahūba'ari ai Tirama nanoina ena nuataeai taeara'u pekaikauna rani ha pawahi paihanimi. <sup>11</sup> Pokina au nanuatae ki'a baha kaihanimi, auba ena beruberu kabaibeni katotabura. <sup>12</sup> Weiana hanona au mai wai kipoka kahabarainaka, eka a'ikakaumai ha ha kahataburanaka.

<sup>13</sup> Uaho'aba'u e, au nanuatae wai kato'iohina, rani bo'ona anuatae kawahi heremi, buabua katabu ahi ihobona

rama haeai haukia baika ekia mauri tebaibeni aihanakia 'abana, ia taba baika tehore tekaiabuna'u emaimo bariu. <sup>14</sup> Au hanona pou namona ihinanai 'ara kahore maearima ikoikiai herekiai, Helene haukia mai ea aha'i haukia abomo ao 'abaea haukia mai aotipa haukia herekiai. <sup>15</sup> Weiana buonai au nanuatae ki'a baha wai Roma ai tomiaho haumi wairamiai abomo pou namona kairoro aina.

<sup>16</sup> Au pou namona a'i nahaumaea aina, pokina ia hanona Tirama ena hiabu, a'ikakauma haukia ikoikiai kebamaurina koriauaina hanona Iuda haukia, muriai hanona rama haeai haukia. <sup>17</sup> Pokina pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana, puka robenai tererena 'abana, "Aka bero hauna hanona a'ikakaumai kemaui."

#### *Tirama Ena Opuere Maearima Herekiai.*

<sup>18</sup> Maearima ekia kamuri mai babai ki'a paukiai Tirama ena opuere kupai emai ewaira tina, weiakia ekia babai ki'ai 'abi tohana tihao parena haukia herekiai. <sup>19</sup> Tirama i'iohina hanona aba emahanai harai herekiai, pokina Tirama ehore ebaihanakia. <sup>20</sup> Hanopaka erama popounai emaimo bariu Tirama 'eunai a'i nahaihanakia tabakia ena hiabu banai banai mai ena auba maurina hanona ia ebabai tabakia aokia tewaira tina harai teihanakia te'iohinakia, weiana paunai maearima kebuniai hanona taearana aha'i.

<sup>21</sup> Tirama te'iohina iamo a'i tea'i taearana abomo a'i tebanamona ia hanona Tirama, ia ekia ao 'abaea mai ekia ao po'oai wapura ehore aokia ekaiabuna. <sup>22</sup> Ia kipokia teraonana teaotipa, iamo po'o haukiai teao. <sup>23</sup> Miaho banai banai Tirama ikuti aina tehabona, ia maearima aubaubakia a'i katemiaho banai banai haukia, roborobo, mahi, mai tikara tabakia haukia, aubaubakia imakiai tebabai tabakia tekuti ainakia.

#### *Maearima Aka Ki'a Obokia Haeai Haeai Tibabai.*

<sup>24</sup> Weiana buonai Tirama ehore aokia ki'a tenuatae ainakia 'ekanai ehonakia, weiana kipokia ekia babai ki'a obokia parikia akakia katebabai ha ha herekia. <sup>25</sup> Tirama ena 'abi tohana hanona ia tehore bai'oi tabanai tebaona, iamo

'ekanai hanona taba ebarama tabakia tekuti ainakia ta'arakia tea'i. Iamo ebabainakia hauna Ia ikupaiana kaha-banamona keaomo banai banai. Amen.

<sup>26</sup> Tirama ehore ehonakia teao ekia babai ki'a obokia aonai. Ekia babi'e tehore babi'e tenabau ainakia weiana ua a'i pehoma hauna tebabaina. <sup>27</sup> Taeara ihobonai hau abomo babi'e kipokia hawainibena tehabona, ia hau tehore hau tenuatae ai ki'anakia. Hau kipokia 'abakia herekiai babai ki'a obokia tebabai. Weiana hanona ekia babai ki'a 'arana kipokia pumana tehoa aina.

<sup>28</sup> Ia tehore aokia Tirama iraona 'ininai a'i tenuatae aina, weiana Tirama ehore ekia ao 'abaeai ehonakia, a'i patebabai akakia tebabai. <sup>29</sup> Aka ki'a obokia haeai haeai aokia tebonu, babai ki'a obokia, uhore mai raona ki'a obokia, wamuru, ahua, 'au, bai'oi mai ao bahaiara akakiai tebonu. Teuahiua, <sup>30</sup> mai 'abi'abiai ha ha atakia tia'i ki'anakia, Tirama ti'oatana, tiaiahu 'abaea, tiapa, abomo tibaroe, raona ki'a obokia 'eka baikai tiraonanakia katebabai. Hamakia mai hinakia aiakia a'i tio'o. <sup>31</sup> Ia hanona ekia raonaraona aha'i, ekia 'abi'uai a'i tibatohanakia, mai maearima herekiai namo 'ao aoko'o a'i tiba ihanakia. <sup>32</sup> Tirama ena rauhuhu aba te'iohina maearima 'eka ua homanai temiaho haukia hanona kate'ari. Ia ki'a weiakia tibabai to'o baihanakia abomo maearima baika tibabai ranina tianamo ainakia.

## 2

#### *Tirama Ena Bakai Berona.*

<sup>1</sup> Weiana buonai 'abiai hau ha behoi nuhorotina haumu, emu bero 'abina ha aha'i. Oi 'abiai hau ha behoi nuhorotina hanona kipomu puma nubeni'o. Pokina ia behoi ohorotina akana ihobonai oi abomo nubabaina. <sup>2</sup> Aika ha'iohina Tirama hanona mai ena bero ua tibabai aiho haukia behoi kehorotinakia. <sup>3</sup> Weiana oi 'abiai hau ha behoi nuhorotina ia akana ihobona nubabaina haumu, oi nuraonana Tirama behoi kehorotini'o 'ekanai aba kokapare, u? <sup>4</sup> 'Ao aehoma a'i o'iohina Tirama ena namo apa'uana weiana ehore e'uai aini'o raona kabe taearanai ena namo apa'uana, ena baiha hao mai ena bakiro oiha ta'erainakia? <sup>5</sup> Ia aomu etubu, emu raona kabe aha'i paunai oi kipomu emu



puma nubararona, Tirama ena opuere mai ena bero bakai beraurana kekara'au raninai emu puma weia kewaira tina. <sup>6</sup> Tirama kehore maearima ha ha ekia babai ihobohobokiai arakia kebenakia. <sup>7</sup> Maearima baika aka namokiai tibapahihi haukia abomo nuabi mai mariki abomo a'i kepua maurina titabuna haukia hanona Tirama kehore mauri banaibanai kebenakia. <sup>8</sup> Ia maearima baika tiani ki'a mai 'abi tohana tibaoao aina, aka behokia tia'i taeanakia haukia hanona Tirama ena opuere mai ena puma ahakiai kebaririna. <sup>9</sup> Aka ki'a obona tibabaina haukia ikoikiai hanona atetua mai haiara katehoaina Iuda haukia mo aha'i rama haeai haukia abokia mo. <sup>10</sup> Ia aka namona tibabaina haukia ikoikiai hanona Tirama kehore nuabi, mariki mai baibua kebenakia, kori'uaina hanona Iuda haukia, muriai hanona rama haeai haukia. <sup>11</sup> Pokina Tirama hanona maearima ha a'i nitaina.

<sup>12</sup> Mose ena rauhuhu kapenai temiaho haukia tiaka ki'a hanona weianai aka ki'a haiarana katea'ina, 'a rauhuhu aonai temiaho haukia tiaka ki'a hanona rauhuhu kebabakainakia. <sup>13</sup> Rauhuhu uruna tio 'abaeana haukia hanona Tirama wairanai bero a'i katea'ina, ia rauhuhu akana tibabaina haukia hanona berokia kehinana. <sup>14</sup> Rama haeai haukia herekiai Mose ena rauhuhu aha'i, ia aokiai rauhuhu hoana ihobona tebabaina raninai, rauhuhu herekiai aha'i re'a, ia kipokia rauhubuui teao. <sup>15</sup> Ia aokiai rauhuhu 'abina tererena hauna ekia hoahoai niwaira tina aokia abomo weiana nibatohana, ekia raonaraona weiana nihore behokia nehinana 'ao berokia nehinana. <sup>16</sup> Pou namona airoro aina ihobonai, beraurana kekara'au raninai Tirama kehore maearima ekia raona bunikia kebabakainakia Iesu Keriso paunai.

### *Iuda Haukia Teraonana Rauhuhu Kebarainakia.*

<sup>17</sup> Ia wai kipomi tu'abi Iuda haumi, rauhubuui tukori 'ini abomo Tirama tuapaina, <sup>18</sup> abomo Tirama taba nenuatae aina hauna to'jobina mai bero nimai 'ekana to'jobina pokina wai rauhuhu tomarere aina. <sup>19</sup> Turaonana wai hanona maha'iau haukia ibaka'a haraikia mai wapurai temiaho haukia ekia ea <sup>20</sup> abomo po'o haukia irobekia mai a'i

temarere haukia iba'jobikia haumi, pokina rauhuhu aonai aotipa mai 'abi tohana maikoinai totabu ahinakia. <sup>21</sup> 'Abami tuba'jobinakia ia aehoma wai kipomi a'i tubatohana? Toiroro a'i katebainao, ia wai tubainao? <sup>22</sup> Tu'abi a'i katenabau, ia wai tunabau? Kaiba'uku 'arikia a'i tu'ari, ia wai ro'e\* aona tabakia tubainao ainakia? <sup>23</sup> Wai rauhuhu nemiaho paunai tuapa, ia rauhuhu tukabena hanona Tirama atana tua'i ki'ana. <sup>24</sup> Puka robena aonai e'abi, "Wai Iuda haumi paumiai rama haeai haukia Tirama atana tia'i ki'ana."

<sup>25</sup> Rauhuhu koka'ai haraina raninai emu itare hanona namo kebeni'o, ia rauhuhu kokabena raninai oi hanona ihobona itare a'i oa'ina 'abana. <sup>26</sup> Rama haeai hauna ha a'i tetarena ia Tirama ena rauhuhu 'abina keka'ai haraina raninai Tirama kehore itare ea'ina haunai kebaona. <sup>27</sup> Weiana hauaniai a'i etarena ia rauhuhu eka'ai haraina hauna kehore oi Iuda haumu behoai kehorotini'o, pokina rauhuhu tererena hauna heremuai abomo itare oa'ina ia rauhuhu nukabena. <sup>28</sup> Maearima hauaniai ihaihana Iuda hauna ia Iuda hauna tohana aha'i abomo hauaniai itare tea'ina hanona itare tohana aha'i. <sup>29</sup> 'A aona nibamaha mahana hauna ia hanona Iuda hauna tohana, abomo itare hanona aoai kebabaina Auba Robeai, ia rauhubuui aha'i. Maearima uahomana hanona banamo Tirama herenai kea'ina, ia maearima herekiai aha'i.

## 3

### *Tirama Ikupaiana Keibatoha.*

<sup>1</sup> Uahomana raninai Iuda haukia ekia namo hanona taba? Itare ena namo hanona taba? <sup>2</sup> Taeara bo'okiai. Kori 'uaina hanona Tirama ena 'abi Iuda haukia herekiai ehorotina kate'imana. <sup>3</sup> Weiana baika ekia a'ikakauma peaha'i raninai aehoma? Ekia a'ikakauma aha'i buonai Tirama kipona ena 'abi'uai a'i kebatohana, u? <sup>4</sup> Ua a'i kehoma. Maearima ikoikiai katebai'oi, ia Tirama ikupaiana keibatoha. Puka robenai tererena ihobona, "Emu 'abiai kobatohani'o obero. Weiana kateba bakaini'o raninai kotara haonakia."

Sal 51.4

\* 2:22: (22) marea robe

<sup>5</sup> 'A aika eka ki'a kehore Tirama ena babai berona kebawaira tinana raninai, taba na kahahoma? Weiana Tirama puma 'ekanai nihorotinaka hanona nibeho, u? Aha'i. Ua a'i kehoma. (Neiana hanona maearima ekia raonaraona nahinana.)  
<sup>6</sup> Ua homana aha'i. Tirama a'i kebero raninai, hanopaka aea kebabakai aihona?  
<sup>7</sup> Baika te'abi, "Au e'u bai'oi pehore Tirama ena 'abi tohana pebawaira tinana abomo ena nuabi pebapa'uana raninai, taba buonai au aka ki'a pumana kahoaina ki'a hauna 'abana?"  
<sup>8</sup> Baika ai tekai ahi 'abaeana mai te'abi ai hanona na ta'abi aihona, "Namo ibaramana paunai ki'a akakia kahababai." Ekia bai'oi pumana katehoaina hanona kenamo.

*Hau Ha A'i Ebero Ki'a Baha.*

<sup>9</sup> Uahomana raninai taba na kahahoma? Aika Iuda hauka hanona hanamo ba rama haeai haukia? Aha'i 'akina. Pokina Iuda mai rama haeai haukia hanona ki'a aonai nahamiaho 'abina aba hahinana.  
<sup>10</sup> Puka Robenai tererena ihobonai, "Maearima ha a'i ebero ki'a baha Tirama wairanai, tai ha aha'i 'akina.

<sup>11</sup> Abomo ao bero hauna ha aha'i, Tirama itabuna hauna ha aha'i.  
<sup>12</sup> Ikoikiai aba tekaobo aba ki'a aonai tetoto haeamo aka namo hauna ha aha'i, tai ha aha'i.

Sal 14.1-3

<sup>13</sup> Ekia 'abi timikia hanona teki'a matoha 'ariahana ikaikau, maeakia bai'oi 'abikia tehinanakia. Pinakia 'abinai hanona 'abakia tibahaiarakia matoha 'erau ekia ba'ari muramurana 'abana.

Sal 5.9

<sup>14</sup> Pinakia hanona ururu mai aomabi 'abikia tebonu.

Sal 10.7

<sup>15</sup> Ia tinoanoa maearima kateba haiaranakia mai kateahu 'arinakia.

<sup>16</sup> Eka tabana kateao hanona maearima kateba 'oatanakia mai kateba atetuanakia.

<sup>17</sup> Abomo baibua taearana hanona a'i te'iohina.

Isa 59.7, 8

<sup>18</sup> Tirama a'i tita'uai 'apuana."

Sal 36.1

<sup>19</sup> Aika ha'iohina rauhuhu taba ne'uahina hanona weiakia rauhuhu ba'anai temiaho haukia nehina benakia,

weianai maearima ekia ba'ame 'abikia aha'i, hanopaka maikoinai Tirama ena bakai aonai katetoto.  
<sup>20</sup> Tirama wairanai hau ha a'i ebero rauhuhu ika'ai haraina paunai, ba rauhuhu hanona keba 'iohinakia aika ki'a hauka.

*Maearima Kea'ikakauma Hauna Berona Katehinana.*

<sup>21</sup> Bariu Tirama maearima bero kebenakia taearana aba ebawaira tinana, rauhuhu aha'i, weiana hanona rauhuhu mai mahabanai haukia tebatohana.  
<sup>22</sup> Bero Tirama herenai nimai hanona Iesu Keriso tia'ikakaumana haukia ikoikiai katetabu ahina maearima ikoinai herekia ha a'i ehaeai.  
<sup>23</sup> Pokina ikoikiai aba teaka ki'a, buonai Tirama ena nuabiai tetara kapu.  
<sup>24</sup> Iamo Tirama ena aoko'o hoana ebaibeni 'abaea, ikoinai bero tea'ina Keriso Iesu paunai, pokina ia ehore ekawa muenakia.  
<sup>25</sup> Tirama ehore Iesu euhuna emai hanopakai e'ari baibua hoanai eao, Iesu e'ari eka ki'a paunai hauna kaha'ikakaumana haukia eka ki'a kehina hao. Neiana ebabaina hanona ena bero ebaiha baiha aina. Aona ea'i 'inina, 'uainai maearima teaka ki'a haukia eia haonakia puma a'i ebenakia.  
<sup>26</sup> Bariu rani neianai Tirama hoa weiana ebabaina kipona ena bero ebaiha baiha aina, taera weianai Iesu tia'ikakaumana haukia abomo bero kebenakia.

<sup>27</sup> Uahomana raninai taba hauna kahapaina? Ba taeara tabanai? Rauhuhu ika'ainai? Aha'i. Taba ha ai aha'i. Ia a'ikakauma taearanai.  
<sup>28</sup> 'Abi tohana aika ha'iohina Tirama maearima a'ikakaumai bero nibenakia, ia rauhuhu ika'ainai aha'i.

<sup>29</sup> Tirama hanona Iuda haukia mo ikupaiakia ekia Tirama, u? Ia rama haeai haukia ekia Tiramai a'i keao, u? Aha'i. Ia rama haeai haukia abokia mo ekia Tirama.  
<sup>30</sup> Weiana Tirama hanona hamona itare haukia a'ikakaumai bero kebenakia mai itare aha'i haukia abomo a'ikakauma ihobonai bero kebenakia.  
<sup>31</sup> Ua homana raninai aika hanona a'ikakauma neianai rauhuhu nahaba 'akaumana, u? Aha'i 'akina. Aika hanona rauhuhu nahabakori 'inina.

**4**

*A'ikakauma ai Aberahamo Bero Hauna.*

<sup>1</sup> Uahomana raninai taba kaha'uahina 'aba'abaka Aberahamo 'eunai? A'ikakauma hoana hanona aea etabu ahi aihona?

<sup>2</sup> Aberahamo ena aka paukiai bero haunai peao raninai, taba weiakia paukiai peapa, ia Tirama wairanai aha'i. <sup>3</sup> Puka robena taba na ehoma?

“Aberahamo hanona Tirama ea'ikakaumana paunai Tirama ehore ia bero haunai ebaona.”

Gen 15.6

<sup>4</sup> Aka hauna mai 'arana weiana hanona beruberu tabana aha'i, ia ena hau hariara 'arana. <sup>5</sup> Hau ha aka namona a'i nibabaina, ia Tirama nihore ki'a hauna bero nibaibeni Tiramana nia'ikakaumana hauna hanona ena a'ikakauma paunai bero haunai kebaona. <sup>6</sup> Maearima aka paunai bero a'i tea'ina ia Tirama here-nai bero tea'ina haukia ekia namo 'abina neiana Davida ehinana.

<sup>7</sup> “Weiakia ekia aka ki'a obokia ehina hao mai ekia ki'a ea'i obo haukia hanona tenamo.

<sup>8</sup> Obiapaka kehore ekia ki'a a'i ketuabi haukia hanona tenamo.”

Sal 32.1, 2

<sup>9</sup> Banamo neiana hanona tetarenakia haukia mo katea'ina 'ao a'i tetarenakia haukia abokiamo katea'ina? Aika aba ha'abi, “Aberahamo ena a'ikakauma paunai Tirama ehore berona ehinana.”

<sup>10</sup> Rani tabanai bero haunai ebaona? Itare wairanai 'ao murinai? Tirama Aberahamo ena bero ehina 'uaina ba tetarena. <sup>11</sup> Aberahamo hanona a'i tetare bahana aonai ena a'ikakaumai bero ea'ina, muriai tetarena, weiana hanona a'ikakauma hoana ibatohana.

Ua buonai Aberahamo hanona mai ekia a'ikakauma haukia weiakia Tirama bero haukia ebaonakia haukia ikoikiai hamakia. <sup>12</sup> Ba tetarenakia haukia abomo hamakia hanona Aberahamo. Ia tetarenakia haukia maikoikiai aha'i, baika hamaka Aberahamo a'i tetare bahana aonai ea'ikakauma, taearana weiana ihobonai kateka'a haukia hamakia.

*Kaha'ikakauma Hanona Tirama Ena 'Abi'uai Kaha'ina.*

<sup>13</sup> 'Abi'uai hanona ebaibeni Aberahamo mai 'aba'abana kipokia hanopaka maikoinai katea'ina ia 'eukia, weiana hanona rauhuhu paunai a'i ebena, ia bero weiana a'ikakaumai nimai hauna paunai ebena. <sup>14</sup> Pokina rauhuhu tia'i taearana haukia 'abi'uai pate'ina ia 'eukiai peao raninai a'ikakauma hanona ena

namo aha'i, 'abi'uai abomo anina aha'i. <sup>15</sup> Rauhuhu nikabena hanona Tirama ena opuere nibaramana, ia rauhuhu peaha'i raninai beho atetuakia abomo pateaha'i.

<sup>16</sup> Weiana buonai 'abi'uai hanona a'ikakaumai nimai baraibarai apa'uana ihobona, Aberahamo 'aba'abana ikoinai katea'ina, rauhuhu tika'ai haraina haukia mo aha'i, ia Aberahamo ea'ikakauma ihobonai tia'ikakauma haukia ikoikiai herekiai. Pokina Aberahamo hanona aika ikoikai hamaka. <sup>17</sup> Puka robenai na terere aihona, “Au oi hanopaka bo'ona hamakiai nabaoni'o.” Ua buonai Aberahamo hanona aika hamaka Tirama wairanai. Aberahamo ehore Tirama weiana 'ari haukia ebamaurinakia abomo a'i terama tabakia ebaramanakia hauna ea'ikakaumana.

<sup>18</sup> Tirama Aberahamo miori kebena weiana raona ikoinai anikia aha'i 'ekana'i Aberahamo hanona ea'ikakauma ena raona ikoinai, ua buonai ia hanona hanopaka bo'ona hamakiai eao, Puka robenai e'abi ihobona, “'Aba'abamu hanona bihiu 'abana ua kebo'o aiho.”

<sup>19</sup> Aberahamo ihauna hanona hinabu hamomo buonai eonobaina matoha 'ari hauna 'abana mai Sara abomo miori kebaramana 'ekana aha'i, ia Aberahamo ena a'ikakauma hanona a'i eba'abe'abena.

<sup>20</sup> Weiana Aberahamo Tirama ena 'abi'uaiai aona a'i ebakai'au kai'auna ena a'ikakaumai ekori 'ini weianai etabura Tirama ebanamona. <sup>21</sup> Haeamona e'iohi haraina Tirama hanona mai hiabuna ena 'abi'uai kebabaina. <sup>22</sup> Neiana buonai, “Tirama Aberahamo ena a'ikakaumai eba tohana, bero haunai ebaona.”

<sup>23</sup> Ia ebatohana bero haunai ebaona 'abina tererena hanona Aberahamo ikupaiana paunai aha'i. <sup>24</sup> Ia aika abomo bero haukai kebaonaka pokina Iesu eka Obiapaka, 'ariai ebamikiri muena Tiramana naha'ikakaumana paunai. <sup>25</sup> Tirama Iesu ebaibeni aina e'ari aika eka ki'a paunai, haeamona ebamikiri muena emauri aika bero kebenaka paunai.

## 5

*Beroka Ehinana Paunai Kahaonamo.*

<sup>1</sup> Weiana eka a'ikakaumai bero ha'ina buonai Tirama kipokia baibuai kahami-aho Iesu Keriso eka Obiapaka paunai.

<sup>2</sup> Aika naha'iobina a'ikakauma taearana weianai hatoto ia paunai aoko'o

hoana neiana aonai aba nahamiaho, raona apa'uana weiana Tirama ena nuabi aonai kahatoto hauna nahaonamo aina. <sup>3</sup> Weiana mo aha'i, ia haiara ranikiai abomo nahaonamo, pokina naha 'iobina haiara nihore bakiro nibaramana, <sup>4</sup> Bakiro nihore rabo harai nibaramana, abomo rabo harai nihore raona apa'uana nibaramana. <sup>5</sup> Raona apa'uana neiana hanona abiabika a'i kea'i ki'ana, pokina Tirama ena raona'au Auba Robeai eheina aika aokai, Auba Robe weiana hanona Tirama ebaibeni aika 'euka.

<sup>6</sup> Aika kipoka bero kahatabuna a'i etaina aonai Tirama enuatae ranina tohanai Keriso e'ari aka ki'a hauka paukai. <sup>7</sup> Hau ha bero hauna paunai ke'ari hanona kepahihi. Pa'e baika katenuatae re'a namo hauna paunai kate'ari. <sup>8</sup> Ia ki'ai hamiaho oho aonai Keriso e'ari aika paukai, Tirama ena raona'au ua ebaiha aihonaka. <sup>9</sup> Ua buonai Keriso e'ari aruarunai Tirama bero ebenaka. Aika naha'iobi haraina ia paunai Tirama ena opuere aonai kebamaurinaka. <sup>10</sup> Aika hanona Tirama ena 'ou haukai haeao aonai Nahuna e'ari paunai kipokia habaibua, aba habaibua hauka naha'iobi haraina Keriso ena mauriai kebamaurinaka. <sup>11</sup> Weiana mo aha'i, aika abomo Tirama aonai nahaonamo eka Obiapaka Iesu Keriso paunai bariu aika Tirama kipokia aba habaibua.

### *Adamu 'Eunai 'Ari Emal Ia Keriso 'Eunai Mauri Emal.*

<sup>12</sup> Hau hamona paunai ki'a hanopakai etoto, ki'a ehore 'ari etoto aina, ua buonai 'ari emal maearima ikoikiai herekia, taeara weianai ikoikiai teaka ki'a. <sup>13</sup> Ki'a hanona aba erama 'uai hanopakai, ba rauhuhu tebaibeni. Rauhuhu aha'i paunai ki'a hanona ki'ai a'i tebaona. <sup>14</sup> Ia 'ari hanona epoki Adamu ena raniai emal mo Mose ena raniai, maearima ikoinai Adamu ena aka ki'a ihobonai a'i tebabai ki'a haukia abomo te'ari.

Ua buonai Adamu hanona muriai kemai hauna ibabataina. <sup>15</sup> Ia Tirama ena beruberu hanona Adamu ena ki'a 'abana aha'i. Pokina hau hamona ena ki'a paunai maearima bo'ona te'ari, ia Tirama ena aoko'o hoana hanona eapa'ua ki'a baha, Adamu ena ki'a etara haona

weiana hanona ena aoko'o hoana beruberuna hau hamona Iesu Keriso paunai bo'ona katemauri. <sup>16</sup> Haeamona Tirama ena beruberu apa'uana mai hau hamona ena babai ki'a terarua hanona a'i teihobo, hau hamona ena babai ki'ai beho bakaina emal, ia beruberu apa'uana emal bero ebaramana. <sup>17</sup> Hau hamona ena aka ki'a paunai 'ari ehore epoki ainakia, aika naha'iobi haraina weiakia Tirama ena aoko'o hoana apa'uana eba'oruna hauna mai bero beruberuna katea'ina haukia mauri banaibanai aonai katepoki hau hamona Iesu Keriso paunai.

<sup>18</sup> Weiana buonai hau hamona ena aka ki'ai maearima ikoikiai puma tea'ina, abomo hau hamona ena aka beroai bero emaiaina maearima ikoikiai mauri banaibanai ebenakia. <sup>19</sup> Hau hamona ena aia o'o aha'i paunai maearima bo'ona ki'a haukia teao, abomo hau hamona ena aia o'oai maearima bo'ona bero haukia kateao.

<sup>20</sup> Rauhuhu ekori hanona maearima ekia ki'a kateiha haraina ia ekia ki'a eapa'ua hao apa'ua hao. Ia ki'a eapa'ua 'ekana Tirama ena aoko'o hoana hanona eapa'ua haonakia. <sup>21</sup> Weiana buonai ki'a epoki 'ari taearanai abomo Tirama ena aoko'o hoana bero taearanai kepoki keaoainaka mauri banaibanai 'ekana Iesu Keriso eka Obiapaka paunai.

## 6

### *Ki'a 'Eunai Kaha'ari Ia Keriso 'Eunai Kahamauri.*

<sup>1</sup> Uahomana raninai aika 'abi tabana kaha'uahina? Tirama ena aoko'o hoana keapa'ua paunai ki'a kahababai to'o baihana, u? <sup>2</sup> Ua a'i kehoma. Aika ki'a herenai aba ha'ari ki'a hiabunai hakaobo ba aehoma buonai ki'a aonai kahamiahomue? <sup>3</sup> Aika Keriso Iesu kipokia aba eba'uere robenaka hauka hanona ena 'ariai abomo kipokia aba eba'uere robe haeamonaka, weiana a'i to'iobina, u? <sup>4</sup> Ua buonai 'uere robeai aika hanona ia kipokia ha'ari abomo ia kipokia tehore-naka, weiana Keriso Hamana nuabina hiabunai 'ariai ebamikiri muena. Ua buonai aika abomo mauri mahamahanai kahamiahomue.

<sup>5</sup> Aika ia kipokia ha'ari haeamo raninai ia 'ariai emikiri mue ihobonai aika abomo

\* 6:6: (6) 'ao eka mauri 'ai'aina



'ariai kahamikiri mue. <sup>6</sup> Aba ha'jobina aika hauka 'ai'aina\* Keriso kipokia matiu ibiri ropo 'ubinaia aba te'ari hanona hauka ena ki'a hiabuna aba weia ia'i obo, ba aika hanona ki'a ta'arana a'i kaha'i mue. <sup>7</sup> Pokina e'ari hauna hanona ki'a hiabunai aba irubu.

<sup>8</sup> Bariu aika Keriso kipokia ha'ari raninai, naha'jobi tohana aika hanona ia kipokia kahamiaho oioi. <sup>9</sup> Pokina naha'jobina Keriso hanona 'ariai emikiri mue ba a'i ke'ari mue, 'ari hanona ia a'i kepoki ai muena. <sup>10</sup> 'Ari ia e'ari aina hauna hanona ki'a ikoikia kebaorenakia paukia rani hamonai e'ari, ia mauri nimaui aina hauna hanona Tirama nuabina paunai nimaui. <sup>11</sup> Taeara ihobonai wai abomimo kipomi kato'jobinimi, ki'a herenai aba to'ari, ia Tirama 'eunai aba tomaui Keriso Iesu aonai.

<sup>12</sup> Weiana buonai ki'a kehore hau-nimi ke'ari hauna a'i kepoki aina ena nuatae akakia ki'a obokia a'i katoa'i taea. <sup>13</sup> Abomo hauanimi papana ha ki'a aonai a'i katohorotina, ki'a akakia tabanai a'i keao, ia kipomi katobaibeni ainimi Tirama herenai ihobona weiakia 'ariai temauri mue haukia 'abana, hau-nimi maikoina katobena, ia kehore bero akakia tabanai kebaonimi. <sup>14</sup> Ki'a hanona wai emi poki haunai a'i keao, pokina wai hanona rauhuhu ba'anai a'i tomiaho, ia Tirama ena aoko'o hoana ba'anai tomiaho.

### *Bero Tohana Ta'arana Kaha'i.*

<sup>15</sup> Ba aea kahahoma? Rauhuhu ba'anai a'i nahamiaho ia Tirama ena aoko'o hoana ba'anai nahamiaho buonai ki'a kahababai, u? Aha'i 'akina. <sup>16</sup> Wai aba to'jobina weiana kipomi tubaibeni ainimi hau ha herenai aiana tuona raninai ena ta'ara ia'inai tuao 'abana. Ua buonai ki'a ena ta'ara ia'inai niao ainimi 'ari 'ekana 'ao Tirama aiana ionai niao ainimi bero 'ekana. <sup>17</sup> Tirama kahabanamona. Pokina 'uainai wai hanona ki'a ena ta'ara ia'inai toao, ia bariu wai aomi maikoina teba'jobinimi 'abina weiana toa'i taeana. <sup>18</sup> Wai ki'a herenai aba eirubunimi, bariu bero ena ta'ara ia'inai tuao. <sup>19</sup> Maearima 'abi'abinai na'abi pokina aomi a'i niea paunai. 'Uainai hauanimi tobaibeni aina aka ki'a obokia mai ripuripu ta'arakia

ia'inai toao ihobonai, bariu hanona hau-nimi bero ena ta'ara ia'inai tomobaibeni, wai katorobe.

<sup>20</sup> Wai ki'a ena ta'ara ia'inai toao aonai wai hanona bero tohabo 'abaeana. <sup>21</sup> Rani weiakia aka ki'a obokia buabuakia hanona taba taba ahina? Bariu tuhau-maeai tabakia mo. Taba weiakia puakia hanona 'ari. <sup>22</sup> Ia wai bariu hanona ki'ai aba irubu obo, ba Tirama ena ta'ara ia'ina haumiai tuao. Ua buonai buabuami hanona robe taearana tohanai, puana hanona mauri banaibanai. <sup>23</sup> Pokina ki'a 'arana hanona 'ari, ia Tirama ena beruberu apa'uana hanona mauri banaibanai Keriso Iesu aika eka Obiapaka kipokia.†

## 7

### *Keriso Rauhuhu ai Erubunaka.*

<sup>1</sup> Uaho'aba'u e, au hanona wai rauhuhu to'jobina haumi nahina benimi, wai aba to'jobina rauhuhu hanona maearima nipoki aina maurina nemiaho aonai mo.

<sup>2</sup> Rauhuhu paunai babi'e ha atawana herenai kemiaho hau ena mauri beraurakia ikoikia, ia hau ke'ari raninai ia hanona hawainibe rauhuhuna herenai aba irubu ta'i. <sup>3</sup> Weiana buonai hau nemiaho oho aonai babi'e kemikiri hau haeai ha keatawana raninai ia hanona nabau babi'ena kahahinana. Ia hau ke'ari raninai ia hanona rauhuhu herenai aba irubu ta'i. Hau haeai ha keatawana re'a ia nabauna a'i kahahinana.

<sup>4</sup> Weiana buonai uaho'aba'u e, wai abomo Keriso ena 'ari paunai rauhuhu 'eunai to'ari, ba Keriso 'ariai emikiri hauna herena tuao, buabuaka katerama Tirama 'eunai. <sup>5</sup> Aika hauani ena nuataeai hamiaho aonai, raona ki'a obokia terama rauhuhu 'eunai teaka hauanikai ba buabuakia habaramanakia puana hanona 'ari. <sup>6</sup> Ia aika ebiri 'ininaka tabana herenai aba ha'ari buonai bariu rauhuhu herenai aba terubu ta'inaka, weiana buonai aika hanona taeara mahamahana Auba Robe 'eunai ta'ara kaha'i, ia rere rere 'ai'ainai aha'i.

### *Ki'a Ehore Eba'arinaka.*

<sup>7</sup> Ua buonai taba kaha'uahina? Rauhuhu hanona eki'a? Aha'i 'akina. Rauhuhu ehore au eba'jobina'u ki'a hanona taba. Rauhuhu a'i kehina bena'u, "Oi taba ha a'i konuataeai 'abaeana." raninai, au a'i ka'jobina nuatae 'abae

† 6:23: (23) 'ao aonai

hanona taba. <sup>8</sup> Ia ki'a ehore taeara'u etabu rauhuhu 'abinai weia nuatae 'abaea haeai haeai ao'uai ebaramanakia, ia rauhuhu keaha'i raninai, ki'a hanona e'ari 'abana ena hiabu aha'i. <sup>9</sup> 'Uainai au hanona rauhuhu a'i a'jobina aonai araanana namo'u ai amauri amiaho, iamo rauhuhu 'abina a'jobina aonai ki'a hanona aihā tinana emauri mauri, au hanona a'ari 'abana. <sup>10</sup> Rauhuhu neiāna hanona mauri ebaihanaka tabana, ia au 'eu'uai ia hanona 'ari tabanai eao. <sup>11</sup> Pokina ki'a ehore taeara'u etabu rauhuhu'ari e'oina'u ba 'ari hau'u ai ebaona'u.

<sup>12</sup> Ia rauhuhu kipona hanona erobe, rauhuhu 'abina kipona abomo erobe, weiakia hanona tebero mai tenamo. <sup>13</sup> Uahomana raninai taba namona weiana hauna ehore au e'u 'ari tabanai eao, u? Aha'i 'akina. Rauhuhu 'abina namonai ki'a ehore au here'uai 'ari ebaramana buonai, ki'a hanona i'io'io'io haraia'i keao, rauhuhu 'abina paunai ki'a hanona ki'a tohanai eao.

#### *Ki'a Eka Mauri Nipoki aina.*

<sup>14</sup> Ha'jobina rauhuhu hanona Tirama 'eunai emai, ia au hanona hauani 'eunai aeao, ki'a ehore ekawana'u ena ta'ara ia'inai naeao. <sup>15</sup> Au taba nababaina hauna obona a'i naobo, pokina nanuatae aina kababaina hauna a'i nababaina, ia taba 'arina a'i na'ari hauna nababaina. <sup>16</sup> Rauhuhu ehore namo mai ki'a ebaihanaka. Ba taba a'i nanuatae aina hauna nababaina raninai, au nabatohana rauhuhu hanona enamo. <sup>17</sup> Ua buonai nababaina hanona au kipo'u toha'u aha'i, ia ki'a ao'uai nemiaho hauna. <sup>18</sup> Au na'jobina taba ha namona ao'u ai a'i nemiaho, weiana hauani'u ena nuataeai a'i nemiaho, pokina au taba namona nanuatae aina kababaina ia ibabainai hanona a'i nitaina. <sup>19</sup> Aka namona nanuatae aina kababaina hauna a'i nababaina, haeamona aka ki'a obokia ibabaikia a'i nanuataeai haukia nababai to'o baihana. <sup>20</sup> Ia taba a'i nanuatae aina hauna nababaina raninai, nibabaina hauna hanona au toha'u aha'i, ia ki'a ao'uai nemiaho hauna niaka.

<sup>21</sup> Weiana au aka taearana ha atabu ahina, au e'u nuatae aka namona kababaina, ia aka ki'a obokia mo tiwaira tina. <sup>22</sup> Ao'u tohana Tirama ena rauhuhu niaonamo aina. <sup>23</sup> Ia hauani'u ai rauhuhu haeai niaka aihana, rauhuhu weiana

rauhuhu ao'uai nemiaho hauna nehuarina, weiana hanona hauani'u ai niaka ki'a ena rauhuhu ba'anai nebirina'u nibawapurana'u. <sup>24</sup> Au ki'a'u, aoko'o'u! Tai kehore au hauani'u neiāna niaoaina'u 'ari 'ekanai hauna herenai kebamaurina'u? <sup>25</sup> Ia Tirama napaina Iesu Keriso eka Obiapaka eba maurina'u paunai. Ua buonai e'u mauri hanona nahomana, au ao'u tohana hanona Tirama ena rauhuhu ta'arana ia'inai niao, ia hauani'u hanona ki'a ena rauhuhu ta'arana ia'inai niao.

## 8

### *Keriso Eka Ki'a Ea'i Obo Ia Auba Robe Ebenaka.*

<sup>1</sup> Weiana buonai bariu Keriso Iesu aonai temiaho haukia hanona puma ha a'i katehoaina. <sup>2</sup> Pokina Keriso Iesu paunai Auba Robe rauhuhuna mauri nimaiaina hauna ehore ki'a mai 'ari rauhuhuna 'eukiai aba erubu obona'u. <sup>3</sup> Hauani ena 'abe'abe paunai rauhuhu'ari a'i ketaina 'ekanai Tirama ehore ebabaina. Ia ehore Nahuna hamomona euhuna, ki'a hauna 'abana ki'a 'aranai eao, maearima ekia puma ikoinai ehoaina. <sup>4</sup> Weiana hanona aika hauani ena aka ki'a obokia a'i nahababai, Auba Robe ena nuataeai nahamiahauka aokai rauhuhu ena nuatae bero akana kebaore haraina.

<sup>5</sup> Hauani ena nuataeai temiaho haukia hanona hauani tabakia mo tiraonanakia, ia Auba Robe ena nuataeai temiaho haukia hanona Auba Robe ena aka tabakia tiraonanakia. <sup>6</sup> Hauani ena raona ke'uai aina puana hanona 'ari, ia Auba Robe ena raona ke'uai aina puana hanona mauri banaibanai mai baibua. <sup>7</sup> Hauani ena raona ne'uai aina hanona Tirama ni'oatana, pokina weiana hanona Tirama ena rauhuhu a'i nika'aina abomo kebabaina a'i ketaina. <sup>8</sup> Weiakia hauani ena raonai temiaho haukia hanona Tirama ibaonamonai hanona a'i ketaina.

<sup>9</sup> Ia wai Tirama ena Auba Robe aomia'i nemiaho raninai, wai hanona hauanimi a'i nibaka'animi, ia Auba Robe nibaka'animi. Ia hau ha aonai Keriso ena Auba aha'i hauna hanona Keriso ena maearima aha'i. <sup>10</sup> Aomia'i Keriso nemiaho raninai hauanimi hanona abe'ari ki'a paunai, ia aubami hanona emauri bero paunai. <sup>11</sup> Ia Tirama Aubana weiana Iesu 'ariai ebamikirina hauna aomia'i nemiaho raninai Keriso Iesu 'ariai ebamikirina

Tiramana kehore wai hauanimiti kate'ari haukia abomo keba maurinakia ena Auba Robe aomia nemiaho paunai.

*Auba Robe Eaoainaka Tirama Nahunai Haeao.*

<sup>12</sup> Weiana paunai uaho'aba'u e, aika hanona kahaka, ia hauani 'euna 'ara horeai aha'i, abomo hauani ena nuataeai a'i kahamauri. <sup>13</sup> Pokina hauani ena nuatae 'ekakiai komiaho raninai oi hanona ko'ari Tirama wairanai, ia Auba Robe ena nuataeai hauani ena aka ki'a obokia koba 'arinakia raninai oi hanona komauri banaibanai. <sup>14</sup> Pokina weiakia Tirama ena Auba Robe ne'uai ainakia haukia hanona Tirama nahuna. <sup>15</sup> Wai hanona ta'ara'i mai ta'u aubana a'i toa'ina ia Auba Robe toa'ina, weiana hanona niaoainimi Tirama nahunai\* tuao, Auba Robe weiana hiabunai Tirama nahaparina, "Hama'u,† au Hama'u." <sup>16</sup> Auba Robe weiana aika aubaka ohi tibatohana aika hanona Tirama nahuna. <sup>17</sup> Bariu aika Ia nahuna raninai aika hanona barina kaha'ina haukia. Tirama barina kaha'ina hanona Keriso kipokia Ia nahunai kaha'ina Tirama barina kaha'ina. Weiana Keriso kipokia ena haiara kahahaiara aina raninai ia nuabina abomo kaha'ina.

*Wairai Kupa Aiaranai Nuabi Aonai Kahamiaho.*

<sup>18</sup> Au naraonana bariu rani neiana aika nahahau haiara aina hanona taba papakia, ia nuabi weiana muriai aika 'eukai kewaira tina hauna keapa'ua ki'a baha. <sup>19</sup> Tirama eababai tabakia ikoikiai hanona tibai'imai ekia nuatae apa'uana Tirama nahuna katewaira tina. <sup>20</sup> Pokina terama tabakia ikoikiai hanona taba anikia aha'i ba'anai temiaho, 'a ekia nuataeai aha'i, ia Tirama ena nuataeai. <sup>21</sup> Terama tabakia hanona hauani parina ena ibiri 'iniiai kateirubu, Ba Tirama nahuna ekia nuabi irubuna aonai katemiaho haeamo.

<sup>22</sup> Weiana aika ha'iohina terama tabakia maikoinai hanona mai ao pumakia matoha babi'e miori keba ramana haiarana 'abana emai mo bariu rani neiana. <sup>23</sup> Iamo ikupaiaha aha'i, Tirama ena buabua kori'uaina Auba Robe ha'ina haukia abomo aoka niao puma mai nahabai'ima Tirama nahunai kebaonaka mai hauanika maikoina kebamaurinakia. <sup>24</sup> Aika nuatae apa'uana neianai mauri ha'ina. Ia

nuatae apa'uana weiana aba haihana raninai a'i kahanuatae aina. Tai hanona taba aba ea'ina hauna nuatae apa'uana kebaona? <sup>25</sup> Ia taba a'i naha'i bahana hauna nahanuataeai apa'uana raninai, aika hanona mai bakiroka kahabai'ima.

<sup>26</sup> Taeara ihobonai Auba Robe hanona nibarainaka eka 'abe'abe aokiai, aika aea kahabahuba'ari aiho hanona a'i naha'iohina, ia Auba Robe kipona nihore nibahuba'ari mai ao pumana maearima ke'abi a'i ketaina haunai ninoinoi aika paukai. <sup>27</sup> Abomo maearima aokia nei-hanakia Tiramana hanona Auba Robe ena raona tabana e'iohina, pokina Auba Robe hanona Tirama ena maearima paukiai ninoinoi Tirama ena nuatae ihobonai.

<sup>28</sup> Aika naha'iohina Tirama eabainakia tabakia ikoikiai hanona tiaka haeamo Tirama tiraona'au aina haukia mai ena nuataeai eaparinakia haukia ibanamokiai. <sup>29</sup> Pokina Tirama weiakia e'iohi 'uainakia haukia eba'orunakia Nahuna ihobonai kateao, ba Keriso hanona hau pakanai keao uaho'abana ikoikiai baiatakiai. <sup>30</sup> Eba'orunakia haukia ia ehore eaparinakia, eaparinakia haukia ia ehore beroai ebaonakia, beroai ebaonakia haukia ia ehore ena nuabi ebenakia.

*Taba Ha Tirama Ena Raona'au Herenai A'i Kea'iparenaka.*

<sup>31</sup> Uahomana raninai taba neiakia aea kaharoba ahuai aihonakia? Tirama aika nitainaka raninai tai hanona aika ke'oatanaka? Tai ha aha'i. <sup>32</sup> Ia nahuna hamomona a'i eubo aina, aika ikoikai paukai ebaibeni ai 'abaeana. Nahuna ebenaka buonai taba ikoikiai abomo kebeni 'abaeana.

<sup>33</sup> Tai kehore Tirama ena a'itaea haukia atetua 'ekanai kehorotinakia? Tai ha aha'i. Tirama hanona ia niba tohanakia a'i tebeho. <sup>34</sup> Ba tai hanona puma kebenakia? Tai ha aha'i. Pokina Keriso Iesu e'ari, haeamona emikiri mue, ia hanona Tirama itipana tainai nemiaho, aika paukai ninoinoi. <sup>35</sup> Tai kehore Keriso ena raona'au ai kea'iparenaka? Atetua kehore 'ao bahaiara kehore 'ao bai'oata kehore 'ao arobo kehore 'ao uraru kehore 'ao ta'u kehore 'ao kareba kehore 'ao? Tai ha aha'i. <sup>36</sup> Atetua weiakia hanona Puka Robenai tererena ihobona etibaha,

\* 8:15: (15) 'ao bakiro nahunai † 8:15: (15) 'ao "Papa"

“Ai hanona oi paumuai rani  
 ikoikiai 'ari tawairana,  
 ai hanona mamoe ai tibaonamai  
 kateahu 'arinamai.”

Sal 44.22

<sup>37</sup> Ia taba neiakia ikoikiai aokiai aika  
 hanona hatarahi, niraona'au ainaka  
 hauna paunai. <sup>38</sup> Pokina au aba a'ioi  
 tohana, weiana 'ari 'ao mauri, anerukia  
 'ao hiabu aubakia,‡ bariu temiaho tabakia  
 'ao wairai katemai tabakia, hiabu haeai  
 haeai, <sup>39</sup> hano 'ubinai 'ao hano ba'anai,  
 terama tabakia ikoinai ha kehore Tirama  
 ena raona'au herenai a'i kea'i parenaka,  
 pokina aika eka Obiapaka Iesu Keriso  
 aonai nahamiaho paunai.

## 9

### *Tirama Isaraela Haukia Etina'anakia.*

<sup>1</sup> 'Abi tohana nahinana Keriso aonai, au  
 hanona a'i nabai'oi Auba Robe abomo ao'u  
 e'iohina. <sup>2</sup> E'u ao ko'o hanona eapa'ua, ao  
 aro'ari ao'uai hauna ena pua aha'i. <sup>3</sup> Au  
 kipo'u nanuatae hanona peururu aina'u  
 Keriso 'eunai pa'eho 'ekanai uaho'aba'u  
 weiakia e'u itubu haukia patemaui pau-  
 nai. <sup>4</sup> Ia hanona Isaraela haukia, Tirama  
 nahunai teao mai ena nuabi ebawaira  
 tinana herekiai, herekiai 'abi'uai robeno  
 ebabaina rauhuhu ebenakia, marea robe  
 tohanai tekuti mai 'abi'uai tea'ina. <sup>5</sup> Ia  
 'aba'abakia hanona maearima apa'uakia,  
 ia ekia kupuai hanona Keriso hauaniai  
 erama, ia hanona taba ikoikiai nipoki  
 ainakia Tiramana, kahabanamona ba-  
 naibanai. Amen.

<sup>6</sup> Au a'i natibaha Tirama ena 'abi'uai  
 hanona e'eho, pokina Isaraela kupunai  
 terama haukia re'a ikoikiai Isaraela  
 haukia tohakia aha'i. <sup>7</sup> Aberahamo  
 'aba'abanai mo ia ikoikiai hanona nahuna  
 tohakia aha'i. Pokina Tirama Aberahamo  
 ehina bena “Isako herenai katerama  
 haukia mo 'aba'abamu ai kateao.” <sup>8</sup> Anina  
 hanona miori hauaniai terama haukia  
 hanona Tirama nahuna aha'i. Ia Tirama  
 ena 'abi'uaiai katerama miorikia hanona  
 Aberahamo nahuna tohakiai kateao.  
<sup>9</sup> 'Abi'uai hanona na ehina aihona, “Ihau  
 wairai rani nahomanai au kamue hanona  
 Sara miori ha keba ramana.”

<sup>10</sup> Weianai mo aha'i, ia Rebeka nahuna  
 bai'apaea terama hamakia hamona Isako  
 aika 'aba'abaka ena raniai abomo ihobo.

‡ 8:38: (38) auba ki'a obokia taburakia

<sup>11</sup> Ia miori a'i terama baha mai taba ha  
 namona 'ao ki'a obona a'i tebabai bahana  
 aonai, Tirama ena a'itaea hanona aba ena  
 nuataeai ebabaina. <sup>12</sup> Ekia babai paunai  
 aha'i ia ena apariai ebabaina, Tirama Re-  
 beka ehina bena etibaha, “Hau pakana  
 kehore hau i'irina ta'arana kea'i.” <sup>13</sup> Puka  
 robenai tererena ihobona etibaha, “Au  
 Iakobo araona'au aina ia Esau 'arina a'i  
 a'ari.”

<sup>14</sup> Uahomana raninai taba kaha'uahina?  
 Tirama hanona ena babai a'i tebero, u?  
 Aha'i akina. <sup>15</sup> Tirama ehore Mose ehina  
 bena etibaha,

“Au pabarainakia haukia hanona  
 kabarainakia mai paoko'o ainakia  
 haukia hanona kaoko'o ainakia.”

Eso 33.19

<sup>16</sup> Ua buonai Tirama maearima etina'ana  
 hanona hau ha ena nuataeai 'ao aro'ariai  
 aha'i, ia Tirama ena aoko'oai. <sup>17</sup> Puka  
 robenai Tirama Parao ehina bena  
 etibaha, “Au oi obia aranai ahrotini'o  
 ena poki hanona neiana. E'u hiabu  
 heremuai kabaiha baihaina, weianai  
 hanopaka maikoinai au ata'u katehi-  
 nana.” <sup>18</sup> Weiana buonai Tirama mo ena  
 nuatae ihobonai keaoko'o ainakia haukia  
 niaoko'o ainakia, aokia keba pahihinakia  
 haukia aokia niba pahihinakia.

### *Tirama Ena Opuere Mai Aoko'o.*

<sup>19</sup> Uahomana raninai wai ha au ko-  
 hina bena'u kotibaha, “Ua nihoma ran-  
 inai, aehoma buonai Tirama eka beho  
 nitabunakia? Tai kehore Tirama ena nu-  
 atae kekaiabuna?” <sup>20</sup> E'u hau e, oi hau aea  
 homamu, Tirama ena 'abi nubamuena?  
 Uro a'i kehore ebabaina hauna a'i kehina  
 bena, “Taba buonai na obabai aihona'u?”  
<sup>21</sup> Uro babai hauna hanona mai ena bero  
 ia kehore tipu hamonai uro kebabainakia,  
 ha hanona uro namona aka apa'uakiai  
 keaka, ha hanona uro 'abaeana aka pa-  
 pakiai keaka.

<sup>22</sup> Tirama hanona matoha uro babai  
 hauna 'abana ena nuatae hanona ena  
 opuere mai ena hiabu kebaiha baiha  
 aina, iamo aona nia'i 'inina niopuere  
 ainakia haukia herekiai keaomo 'ari  
 ranina eba'oruna hauna kemai. <sup>23</sup> Abomo  
 enuatae ena nuabi apa'uana kebawaira  
 tinana niaoko'o ainakia haukia herekiai  
 hanona mai ena bero, weiakia aba



eba'orunakia haukia hanona ena nuabi katea'ina. <sup>24</sup> Uro hanona aika eaparinaka hauka, Iuda haukia mo aha'i, 'a rama haeai haukia baiatakiai abomo. <sup>25</sup> Mahabanai hauna Hosea ena pukai ehinana ihobona etibaha, "E'u maearima tohokia aha'i haukia kaparinakia 'e'u maearima.' Itubu weiana a'i naraona'au aina hauna kaparina 'e'u raona'au."

Hos 2.23

<sup>26</sup> Ehina benakia, wai hanona au e'u maearima aha'i 'ekanai haemona keaparinakia ia hanona Mauri Tiramana nahuna."

Hos 1.10

<sup>27</sup> Mahabanai hauna Isaia haukia poukia ehinana etibaha, "Isaraela maearimakia patebo'o ki'a poe 'anona 'abana, ia harina bita 'akimo bamauri katea'ina.

<sup>28</sup> Obiapaka kehore noanoai bakai 'abina hanopakai kehore hore haraina."

Isa 10.22, 23

<sup>29</sup> Ihobonai mo Isaia ehina 'uaina 'abana, "Tabura Obiapakana 'aba'abamai baikai a'i pehabonakia raninai ai hanona Sodoma mai Gomora ihobokiai pataeao."

Isa 1.9

*Rama Haeai Haukia Tea'ikakauma Ia Isaraela Haukia A'i Tea'ikakauma.*

<sup>30</sup> Ua buonai taba na kahahoma? Rama haeai haukia bero a'i titabuna ia aba tea'ina, weiana hanona a'ikakaumai tea'ina. <sup>31</sup> Ia Isaraela haukia rauhuhu taaranai bero tetabuna, ia a'i tetabu ahina. <sup>32</sup> Taba buonai a'i tea'ina? Pokina a'ikakaumai a'i tetabuna ia teraonana akai katetabu ahina. Ia haukia kaikai rea piharanai weia tekai. <sup>33</sup> Puka Robenai tererena ihobona etibaha, "Moihana Siona oeo aonai pihara ha ahorotina weianai maearima kebakai kai reanakia, haemona wairo piharana weiana kehore keba'ehonakia. Ia tai nia'ikakauma hauna hanona a'i kehaumaea."

Isa 8.14; 28.16

## 10

*Isaraela Tirama Ena Aka A'i Teiha Tinana.*

<sup>1</sup> Uaho'aba'u e, mai ao'u ikoinai e'u nuatae abomo e'u bahuba'ari niao Tirama herena, Isaraela haukia hanona patemaui. <sup>2</sup> Au a'ioibina ia hanona aokia tohanai Tirama tenuatae aina, ia 'abi tohana herenai ekia 'iobi aha'i. <sup>3</sup> Ia a'i te'ioibina bero hanona Tirama herenai nimai, ia kipokia mo ekia bero tebakori haukia tia'i 'ini. Weiana buonai Tirama ena bero a'i tea'i taena. <sup>4</sup> Ia Keriso hanona rauhuhu ebaorena, ba katea'ikakauma haukia ikoikiai hanona bero katea'ina.

<sup>5</sup> Mose ehore rauhuhu ai bero kea'ina robana eahuna etibaha, "Hau ha rauhuhu taina ketai hanona ia aba kemaui."

<sup>6</sup> Ia bero a'ikakaumai nimai hauna na e'abi aihou, "Aomia a'i kato'abi, Tai kekara'au keao kupa?" (Weia Keriso kebaririna.) <sup>7</sup> 'Ao, "Tai keriri keao 'uri aonai?" (Weia Keriso 'ari haukia baiatakiai kebakara'auna.) <sup>8</sup> Taba e'uahina hauna hanona neiana, "Tirama ena 'abi hanona wai heremiai, pinamia mai aomia." Weiana hanona a'ikakauma 'abinai, ai tahore tairoro aina. <sup>9</sup> Pou hanona nahomana, oi pinamui kohina pouna 'Iesu hanona Obiapaka,' abomo Tirama hanona ia 'ariai ebamikirina hauna aomui koa'ikakauma raninai oi hanona komau. <sup>10</sup> Pokina aomui oa'ikakauma hanona aba obero Tirama wairanai, abomo pinamui kohina pouna hanona komau.

<sup>11</sup> Weiana Puka Robenai e'abi etibaha, "Ia katea'ikakaumana haukia ikoikiai hanona a'i katehaumaea." <sup>12</sup> Iuda mai rama haeai haukia baiatakia ekia haeai hanona aha'i. Pokina Tirama hanona hamona ikoikiai ekia Obiapaka abomo atanai tekuti haukia ikoikiai hanona banamo nibenakia. <sup>13</sup> Puka Robenai e'abi ihobonai, "Obiapaka atanai tiapari haukia ikoikiai hanona katemaui."

Iol 2.32

<sup>14</sup> Ba weiakia herenai a'i tia'ikakauma haukia hanona aea kateapari aihona? Haemona pouna a'i teona haukia hanona aea katea'ikakauma aihona? Abomo hau

ha herekiai a'i keiroro raninai pou aea kateo'o aihona? <sup>15</sup> Mai pou ihinana haukia a'i kateuhunakia raninai pou hanona aea kateiroro ai aihona? Puka Robenai tererena ihobonai, "Pou namona timaiaina haukia hanona aekia hama ua tenamo aiho!"

*Isaraela Haukia Pou Namona Ai Tea'itaeana.*

<sup>16</sup> Ia Isaraela haukia bo'ona hanona pou namona a'i tea'i taeana. Isaia e'abi ihobona, "Obiapaka e. Tai hanona emai pou tea'ikakaumana? Tai aha'i."

<sup>17</sup> Weiana buonai a'ikakauma hanona pou ionai nimai, mai aia o'o hanona Keriso ena 'abiai nimai.

<sup>18</sup> Ia au nabakai bakai, pou a'i teona, u? Aha'i. Pou hanona aba teona. Puka Robenai e'abi, "Aiakia hanona aba ekarahi eao hanopaka ikoikiai aokiai, abomo ekia 'abi hanona hanopaka puana abira abira etabu ahinakia."

Sal 19.4

<sup>19</sup> Haeamona nabakai bakai, Isaraela haukia obo a'i teobo, u? Aha'i, obo teobo. Kori 'uaina Tirama ena 'abi Mose ehinana, "Wai kabawamurunimi hanopaka haeai maearimakia atakia aha'i haukia herekia, mai wai kabaopuerenimi hanopaka weiakia ekia aotipa Tirama herenai aha'i haukia herekiai."

Deu 32.21

<sup>20</sup> Abomo Isaia aona ebataburana e'abi etibaha, "Weiakia a'i tetabuna'u haukia hanona tetabu ahina'u. Abomo a'i tenoina'u haukia herekiai kipo'u abawaira tinana'u."

Isa 65.1

<sup>21</sup> Ia Isaraela 'abikia ehinana etibaha, "Beraura hamona maikoina ima'u atiu ahina weiakia aia a'i tio'o mai tikamuri haukia na'imanakia katemue."

Isa 65.2

## 11

*Tirama Isaraela Eaoko'o ainakia.*

<sup>1</sup> Ua buonai au haeamona nabakai bakai, Tirama ena maearima ebaki'anakia,

\* 11:6: (6) 'ao a'i keaka.

u? Aha'i 'akina. Au abomo Isaraela hau'u, Aberahamo 'aba'abana, Beniamina ena itubu hau'u. <sup>2</sup> Tirama ena maearima etina'a 'uainakia haukia hanona a'i ebaki'anakia. Puka Robenai mahabanai hauna Elia robana eahuna 'abina wai aba to'jobina. Elia ehore Tirama wairanai Isaraela haukia ehinau ainakia etibaha, <sup>3</sup> "Obiapaka e, ia emu mahabanai haukia aba teahu 'arinakia, mai emu itara robekia aba terubu 'iti 'itinakia, au mo ikupaia'u namiaho, abomo titabuna'u kateahu 'arina'u." <sup>4</sup> 'A Tirama Elia ena 'abi ebamuena taba na ehoma? Ia etibaha, "Au hanona kipo'u e'u maearima aba taha 'abaihau hamomo (7,000) bai'oi tiramana Baala a'i tekuti aina haukia abauhu ahinakia."

<sup>5</sup> Weiana bariu abomo taeara ihobonai maearima harina Tirama ena aoko'o hoanai ea'i taeanakia haukia temiaho. <sup>6</sup> Tirama ena a'itaea hanona ena aoko'o hoana paunai, ia maearima ekia aka paukiai aha'i. Ekia aka paukiai ea'i taeanakia raninai Tirama ena aoko'o hoana hanona anina aha'i.\*

<sup>7</sup> Uahomana raninai taba na kaha-homa? Isaraela haukia taba titabuna hauna hanona a'i tetabu ahina, ia Tirama ea'i taeanakia haukia tebabita mo weiana tetabu ahina. Ia harina bo'ona hanona aokia teba pahihina. <sup>8</sup> Puka Robenai tererena ihobona etibaha, "Tirama ehore aokia eba paruanakia, mahakiai a'i teihaiha mai haiakiai aia a'i teona emaimo bariu."

Deu 29.4; Isa 29.10

<sup>9</sup> Abomo Davida Tirama ehina bena etibaha, "Ekia tatu 'itarana hanona rio mai ba'ai kate'aeana ba katebato'onakia kate'eho puma katea'ina.

<sup>10</sup> Mahakia kobaparua 'arinakia a'i kateiha, mai kapekia kobabehe baihanakia rani ikoinai."

Sal 69.22, 23

*Tirama Ena Bamauri Rama Haeai Haukia Tea'ina.*

<sup>11</sup> Uahomana raninai haeamona nabakai bakai, ia hanona rioai teto'o te'eho aba tepua baihana, u? Aha'i



Tai hanona ia ena bairobe  
haunai eao?

Isa 40.13

<sup>35</sup> Tai kehore taba ha  
Tirama kebeni 'uaina  
ba Tirama taba weiana 'arana  
kehorena?"

Job 41.11

<sup>36</sup> Taba ikoikiai ibaramakia hanona  
Tirama, taba ikoikiai Ia paunai  
tekarahi, abomo taba ikoikiai  
Ia 'eunai kateao.  
Nuabi hanona Tirama herenai  
keaomo banaibanai. Amen.

## 12

### *Eka Kuti Hoana Tohana.*

<sup>1</sup> Ua buonai uaho'aba'u e, Tirama ena  
aoko'o rarina 'akina paunai nanoinimi,  
hauanimi mai aomi maikoina Tirama ka-  
tobena, baibeni tabakia mauri maurikiai  
kateao, katerobe Tirama aona katebana-  
mona. Emi kuti hoana tohana\* hanona  
weiana. <sup>2</sup> Hanopaka neiana ena ho-  
hoa a'i katohobo hobo aina, 'a aomi ka-  
tobamaha mahanakia emi mauri kato-  
bahaeaina, weianai Tirama ena nuatae  
hanona taba, ia niaonamo aina hanona  
taba mai namona tohana hanona taba  
kato'iobi haraina.

### *Tirama Ena Ibeni Ebeni'o Hauna Akana Kobabaina.*

<sup>3</sup> Barai barai apa'uana ebena'u paunai,  
au wai ikoimiai nahina benimi. Kipomi  
a'i katoraona apa'uanimi, ia kipomi ka-  
toraona raona, aomi katebero, Tirama  
ehore ha ha emi a'ikakauma aea homakia  
ebenimi ihobokiai. <sup>4</sup> Aika hauanika  
hanona hamona ia puana hanona ebo'o,  
ia ekia aka hanona haeai haeai. <sup>5</sup> Taeara  
ihobonai aika hanona habo'o, ia Keriso  
aonai hanona hauani hamona, puakia  
haeai haeai nahabahamomo.

<sup>6</sup> Tirama ena aoko'o hoanai beruberu  
tabakia haeai haeai aba ebenaka, hau  
ha ena beruberu hanona mahabanai  
re'a ia kemahabanai ena a'ikakauma  
ihobonai. <sup>7</sup> Hau ha ena beruberu ta'ara  
a'i re'a ta'ara kea'i, hau ha ena beruberu  
ba'iobi re'a keba'iobi. <sup>8</sup> Batabura hauna  
kebabura, baibeni hauna kebaibeni  
mai aona ikoinai, 'uai hauna ke'uai mai  
bakirona, aoko'o hauna keaoko'o mai  
aonamona.

\* **12:1:** (1) 'ao *Aubami kuti hoana*

### *Aoka Tohanai Uaho'abaka Ka- haraona'au aina.*

<sup>9</sup> Emi raona'au hanona katobato-  
hana. Ki'a tabakia 'arikia a'i kato'ari,  
namo tabakia kato babainakia. <sup>10</sup> Ha  
ha katoraona'au ainimi uaho'abami  
'abana, abomo ha ha katomariki ainimi.

<sup>11</sup> Katoaka tabura a'i kato'aboro. Auba  
hiabunai Obiapaka ena ta'ara katoa'ina  
mai aomi ikoinai. <sup>12</sup> Nuatae apa'uana  
aonai katoaonamo. Aro'ari ranikiai  
katotabura. Rani ikoikiai katobahuba'ari.

<sup>13</sup> Tirama ena maearima teuraru haukia  
katobarainakia. Baki haukia katoa'i  
taeanakia emi ituai.

<sup>14</sup> Ti'oatanimi haukia Tirama katonoina  
kebanamonakia, a'i katoururu ainakia,  
ia katoba namonakia. <sup>15</sup> Tiaonamo  
haukia kipokia katoaonamo, weiakia ti-  
haihai haukia kipokia katohai. <sup>16</sup> Ikoimiai  
emi miahoai aomi katehamomo. A'i ka-  
toapa, 'aiaunu haukia kipokia katomiaho  
haeamo. Kipomi emi aotipa a'i katoa-  
painakia.

<sup>17</sup> Hau ha ena aka ki'a heremiai hauna  
'arana ki'ai a'i katobamuena, ia maearima  
ikoikiai wairakiai aka namokia katoba-  
bainakia.

<sup>18</sup> Ketainimi taearanai, maearima  
ikoikiai kipokia baibuai katomiaho. <sup>19</sup> E'u  
hau e, ki'a 'arana kipomi a'i katoba-  
muena, katohabona Tirama ena opuere  
kebabaina. Pokina Puka robenai aba  
tererena, "Obiapaka e'abi, 'Ara hore  
hanona au ima'u ai, au kahore 'arana  
kabamuena." <sup>20</sup> Haeamona tererena,  
"Emu 'ou hauna mare'a ni'ari  
raninai aniani kobena,  
abomo 'akona ni'ororo  
raninai bei kobena.  
Babai neiana kobabaina  
hanona ia kobahaumaena  
ihobona matoha 'aranai iruba  
nuhore 'auna."

Her 25.21, 22

<sup>21</sup> Aka ki'a kehore wai a'i kehaoti boanimi,  
ia emi aka namokiai aka ki'a katohaoti  
boana.

## 13

### *Aika Kabamani Ena Hiabu Ba'anai Ka- hamiaho.*

<sup>1</sup> Maearima ikoikiai hanona tipoki  
ainakia haukia aiakia katea'i taeanakia.



Pokina poki hanona kipona a'i erama ia Tirama herenai emai, poki haukia ikoikiai hanona Tirama ehore ebakorinakia. <sup>2</sup> Weiana hau ha poki hauna ni'oatana hanona ihobona mo Tirama ebakorina hauna ni'oatana, bai'oata akana nibabaina hauna hanona kipona ena puma ketabu ahina. <sup>3</sup> Pokina aka namona tibabaina haukia hanona poki haukia a'i tita'u ainakia, ia beho babai haukia mo. Oi nonuatae poki hauna a'i kota'u aina? Ua homana re'a aka namokia kobabai, ba ia kehore oi kebanamoni'o. <sup>4</sup> Ia hanona Tirama ena ta'ara a'i hauna emu namo akana nibabaina. 'A pobabai ki'a hanona ia pota'u aina. Pokina ia hanona tare a'i ea'i 'abaeana. Ia hanona Tirama ena ta'ara a'i hauna babai ki'a haukia 'arakia kebenakia. <sup>5</sup> Ua buonai poki haukia aiakia kahaona, puma herenai kahakapare paunai mo aha'i, ia raona bero paunai abomo.

<sup>6</sup> Ua buonai wai abomo takiti monina tubaibeni, pokina ia hanona Tirama ena ta'ara a'i haukia, rani ikoinai barai barai akana neiana tibabaina. <sup>7</sup> Taba kato-baibeni Kabamani herekiai haukia kato benakia. Moni bararo haeai haeai haukia katobaibeni, tita'u aina hauna katota'u aina, timariki aina hauna katomariki aina.

#### *'Abami 'Ariki Kato'ari Toha.*

<sup>8</sup> Hau ha herenai taba ha a'i koa'i 'abaea 'uaina, ia taba kahababai to'o baihana hauna hanona ha ha kaharaona'au ainaka. Herena hauna niraona'au aina hauna hanona rauhuhu aba nika'ai haraina. <sup>9</sup> Rauhuhu neiakia, 'A'i kon-abau ki'a, a'i koahuahu, a'i kobainao, abomo hau ha ena taba a'i konuataeai 'abaeana' mai rauhuhu baika kipokia teba hamomonakia hanona 'abina apa'uana hamona neiana, 'Heremu hauna ko-raona'au aina ihobona kipomu nuraona'au aini'o 'abana.' <sup>10</sup> Hau ha mai ena raona'au hauna nihore herena hauna a'i nia'i ki'ana. Ua buonai katoraona'au hanona rauhuhu maikoinai aba tubatohana.

#### *Ea Taearanai Kahaka'a.*

<sup>11</sup> Rani neiana tabana hanona to'ioibina paruai katono'a raona'au akana katobabaina ranina aba ekara'au. Pokina

popounai ha'ikakauma raninai ibamaurika beraurana hanona atau'ai 'a bariu hanona aba herekai. <sup>12</sup> Rabi aba niore mararani Iesu ena mai ranina hanona aba herekai. Ua buonai wapura akakia hamahabonakia, ia ea ena huari hoakia hama'inakia. <sup>13</sup> Eka hoahoa patenamo ihobona mararani nahababai 'abana. A'i kaharipu ripu, a'i kahainu 'ari, a'i kahan-abau, a'i kaharea, a'i kaha'au, a'i kahawamuru. <sup>14</sup> Obiapaka Iesu Keriso hanona emi huari habuninai katobaona, ia hau-nimi ekia nuatae akakia ki'a obokia a'i katoa'i taeanakia.

## 14

### *Uaho'abami Puma A'i Katobena.*

<sup>1</sup> Hau ha ena a'ikakauma e'abe'abe hauna katoa'i taeana, ia ena raonaraona weiana hauna a'i kato'abi baitaeai aina. <sup>2</sup> Hau ha mai ena a'ikakauma taba ikoikiai niani, ia ha ena a'ikakauma e'abe'abe hauna uma tabakia mo niani. <sup>3</sup> Taba ikoikiai niani hauna a'i niani hauna herenai a'i kea'i ki'ana abomo uma anianikia mo niani hauna taba ikoikiai niani hauna a'i ke'uahina, pokina Tirama ehore ia ter-arua aba ea'i taeanakia. <sup>4</sup> Oi hanona tai, hau ha ena ta'ara a'i hauna no'uahina? Ia kekori 'ini 'ao ke'eho re'a weiana hanona poki hauna ena hiabu. Ia hanona kekori 'ini pokina Obiapaka hanona mai hiabuna kebakori 'inina.

<sup>5</sup> Hau ha niraonana beraura ha hanona etara ahi ba beraura baika, mai hau ha niraonana beraura ikoikiai hanona ihobo. Ha ha kipokia ekia raona raona katebakori harainakia. <sup>6</sup> Hau neiana niraonana beraura ha epa'ua Obiapaka paunai, hau weiana taba ikoikiai niani Obiapaka paunai, pokina kateaniani raninai Tirama tibanamo 'uaina. Mai hau ha Obiapaka paunai aniani baika nibaki'anakia, ia abomo Tirama nibanamona.

<sup>7</sup> Pokina aika baiatakai hau ha a'i nimaui ia kipona paunai, abomo hau ha a'i ni'ari ia kipona paunai. <sup>8</sup> Nahamaui hanona Obiapaka paunai nahamaui abomo kaha'ari hanona Obiapaka paunai kaha'ari. Ua buonai kahamaui 'ao kaha'ari re'a aika hanona Obiapaka 'euna. <sup>9</sup> Neiana buonai Keriso e'ari abomo emauri mue, 'ari mai mauri haukia ekia Obiapakai keao.

<sup>10</sup> 'A oi aehoma buonai uaho'abamu behoai nuhorotina? Aehoma buonai nua'i ki'ana? Aika ikoikai hanona Tirama wairanai ena bakai 'ekanai kahakoroti.

<sup>11</sup> Puka robenai tererena ihobona, "Obiapaka ni'abi;

Au namauri toha buonai, maearima ikoikai au waira'u ai katekaipehu, abomo maearima ikoikai pinakiai katehina pouna'u Au hanona Tirama."

Isa 45.23

<sup>12</sup> Ua buonai aika ikoikai ha ha Tirama wairanai kipoka pouka kahahina.

### *Uaho'abami A'i Katoba'ehona.*

<sup>13</sup> Ua buonai aika ha ha kipoka behoai a'i kahahorotinaka. Abomo uaho'abaka ia'i ki'ana 'ao iba'ehona ki'a aonai raonana a'i kaharaonana. <sup>14</sup> Au Obiapaka Iesu aonai a'iohina abomo nabatohana aniani tabakia ha kipona a'i eki'a Tirama wairanai, 'a hau ha niraonana aniani tabana ha eki'a raninai aniani weiana hanona eki'a ia kipona hereinai. <sup>15</sup> Ia emu aniani tabana buonai uaho'abamu aona nubahaiarana raninai, oi hanona raona'au taearanai a'i nuka'a. Uaho'abamu weiana paunai Keriso e'ari hauna emu aniani koana hauna buonai a'i moai ki'ana. <sup>16</sup> Ua buonai nuraoana hoahoa oi heremuai enamo hauna ko'ima haraina ki'a obona a'i temehinana. <sup>17</sup> Pokina Tirama ena obia aiarana hanona aniani mai inuina tabana aha'i, ia bero, baibua mai aonamo, weiakia hanona Auba Robe nimaiainakia. <sup>18</sup> Hau ha taeara neiakiai Keriso ta'arana nia'i hauna hanona Tirama ia niaonamo aina maearima abomo ena namo tibatohana.

<sup>19</sup> Ua buonai rani ikoinai mai taburaka baibua taearakia kahatabu, abomo ha ha kahaba taburanaka. <sup>20</sup> Aniani paunai Tirama ena aka a'i koa'i ki'ana. Aniani ikoikai hanona tenamo, iamo oi aniani tabana ha nuana paunai 'abamu ki'a aonai ketoto raninai ki'a hanona oi heremuai. <sup>21</sup> Uaho'abamu aona ibaro'arina akana a'i kobabaina hanona enamo, mahi weiakia a'i koani a'i koinu 'ari. <sup>22</sup> Ua buonai raona neiakia emu a'ikakaumai ko'ima harainakia Tirama mai oi torarua baiatamiai. Hau ha taba ha kipona niraonana ebero hauna nibabaina aonai, aka weiana paunai aona a'i kearo'ari hauna hanona enamo. <sup>23</sup> 'A aona mai

kai'au kai'auna nianiani hauna hanona Tirama ia puma nibena, pokina aniani weiana aonai ia a'i nia'ikakauma paunai. A'ikakaumai a'i tibabainakia tabakia ikoikai hanona teki'a.

## 15

### *Kipoka A'i Kahabaonamonaka 'Abaka Kahabarainakia.*

<sup>1</sup> Aika a'ikakaumai hatabura hauka hanona a'ikakaumai te'abe'abe haukia ekia puma kahabuana. Aika kipoka eka aonamo mo a'i kahatabu. <sup>2</sup> Ha ha hereka haukia kahaba aonamonakia kipokia ekia namo paunai, weiana kehore ekia a'ikakauma kebaburana. <sup>3</sup> Pokina Keriso abomo kipona ena aonamo mo a'i etabuna. Puka Robenai tererena ihobona etibaha, "Bapo'o po'o 'abikia oi tebapo'o aini'o haukia au abomo tebapo'o aina'u."

Sal 69.9

<sup>4</sup> 'Uainai terere tabakia hanona aika ibamarereka paunai tererenakia, weiana Puka robenai kahatuabina hanona aika bakiro mai tabura kebenaka keaomo nuatae apa'uana kahatabu ahina. <sup>5</sup> Au nabahuba'ari bakiro mai batabura nibaibeni Tiramana kehore Keriso Iesu murinai katoka'a raninai aomi keba hamomonakia. <sup>6</sup> Ba ikoimiai mai aomi hamona abomo aia hamonai Tirama aika eka Obiapaka Iesu Keriso Hamana katobanamona.

### *Pouna Namona Rama Haeai Haukia Herekiai Abomo Teihobo.*

<sup>7</sup> Ua buonai 'abami katoa'i taeanakia ihobona Keriso ea'i taeanimi 'abana, babai weianai Tirama kahabanamona. <sup>8</sup> Au wai nahina benimi, Keriso hanona Tirama ena 'abi tohana paunai Iuda haukia\* ekia ta'ara ia'ina haunai eao, Tirama ena 'abi 'uai 'aba'abakia herekiai haukia ibatohakia paunai, <sup>9</sup> abomo rama haeai haukia Tirama katebanamona ena aoko'o paunai. Puka robenai tererena Davida e'abi ihobona,

"Ua buonai rama haeai haukia baiatakiai kabanamoni'o, abomo Oi atamu kahui aina."

Sal 18.49

<sup>10</sup> Haeamona Mose e'abi etibaha, "Rama haeai haumi e,

\* 15:8: (8) 'ao itare tea'ina haukia

Tirama ena maearima kipokia katoaonamo haeamo.”

Deu 32.43

<sup>11</sup> Haeamona Davida e'abi etibaha, “Rama haeai haumi ikoimiai, Obiapaka katobanamona. Abomo maearima ikoimiai, ia katohui aina.”

Sal 117.1

<sup>12</sup> Haeamona Isaia e'abi, “Iese ena rama nininai hau ha kewaira tina, rama haeai haukia kepoki ainakia. Rama haeai haukia katehore ia ikupaiana katenuataeai apa'uana.”

Isa 11.10

<sup>13</sup> Au nabahuba'ari, nuatae apa'uana ni-baibeni Tiramana kehore emi a'ikakaumai aonamo mai baibua ikoinai kebabonunimi. Weiana Auba Robe hiabunai emi nuatae keba apa'uana rani ikoinai.

*Paulo Rama Haeai Haukia Ekia Aka Haunai Eao.*

<sup>14</sup> Uaho'aba'u e, au a'iohi haraina wai hanona emi hoa namokia tebo'o, mai ikoimiai hanona a'ikakauma taearana to'iohi haraina buonai, kipomi ha ha katoba'iohinimi hanona ketaina. <sup>15</sup> Ia marere neiana aonai taba baika mai tabura'u arere benimi hanona wai ibaraonami, neiana hanona Tirama ena aoko'o hoana ebena'u paunai. <sup>16</sup> Au hanona Keriso Iesu ena ta'ara a'i hau'u ai aeao rama haeai haukia 'eukiai, kaka matoha robe hau'u Tirama ena pou namona kairoro aina, weiana Auba Robe ena barobe hiabunai rama haeai haukia hanona baibeni tabakiai kateao Tirama kea'i taeanakia.

<sup>17</sup> Ua buonai Tirama ena aka nababaina hanona napa Keriso Iesu aonai. <sup>18</sup> Au 'abi haeai haeai a'i kahinanakia, ia 'abi hamonamo kahinana, Keriso au ebaraina'u kairoro mai kaka rama haeai haukia herekiai kamaianakia Tirama herena aiana kateka'aina hauna mo, <sup>19</sup> au e'u aka weiana aonai Auba robe hiabunai hoa mai babai hiabukia tewaira tina. Weiana Ierusalem mai akakaiaro aeao mo Iluriko 'eka maikoina Keriso pouna namona airo-roai orena. <sup>20</sup> Rani ikoinai e'u raona apa'uana hanona neiana, pou namona kairoro aina Keriso atana a'i te'iohina 'ekakiai. Weiana hanona hau ha ena hoboro ebakorina hauna ahanai e'u itu

a'i mabakorina paunai. <sup>21</sup> Puka robenai tererena ihobona etibaha,

“Pouna a'i teona haukia hanona kateihana, abomo aiana a'i teona haukia hanona kate'iohina.”

Isa 52.15

*Paulo Eraonana Keao Roma.*

<sup>22</sup> Aka weiana ehore rani bo'okia eba'orona'u buonai, a'i awahi heremi. <sup>23</sup> 'A bariu 'eka neianai e'u aka aba abaorenakia, abomo ihau bo'ona anuatae kawahi kaihanimi. <sup>24</sup> Ua buonai au nanuatae kakabanai Speini kaeo raninai kaihanimi, mai aonamo'u wai kipokia kahamiaho rani papana, murinai katobaraina'u kaeo weia.

<sup>25</sup> Ia au bariu Ierusalem naeao Tirama ena maearima weia temiaho haukia ibaraikia paunai. <sup>26</sup> Pokina Tirama ena marea maearimakia weiakia Makedonia mai Akaia hanokia haukia kipokia ekia nuataeai beruberu tabakia tebararo Tirama ena robe maearimakia Ierusalem mai teuraru haukia 'eukia. <sup>27</sup> Ia aka weiana tebabaina mai aonamokia. Ia ua tebabai aiho hanona ebero. Pokina Iuda haukia aubakia ena banamo rama haeai haukia kipokia tewatena buonai rama haeai haukia hauani ena banamo tabakia baika Iuda haukia Keriso tia'ikakaumana haukia katebenakia hanona ebero.

<sup>28</sup> Aka neiana kabaorena, moni tebararona hauna kipo'u kaeoaina Ierusalem haukia kabenakia murinai, kawahi kaihanimi ba Speini kaeo. <sup>29</sup> Au na'iohina, kawahi heremi raninai Keriso ena banamo maikoinai kawahi aina.

<sup>30</sup> Uaho'aba'u e, eka Obiapaka Iesu Keriso paunai abomo raona'au weiana Auba robe ebenaka hauna paunai nanoinimi, emi bahuba'ari ai kipokia kahabamomo Tirama katonoina au pau'u ai. <sup>31</sup> Emi bahuba'ari ai Tirama katonoina Iudea aonai Iesu Keriso a'i tia'ikakaumana haukia imakiai kebamaurina'u, abomo Tirama ena maearima weia Ierusalem temiaho haukia e'u aka neiana katea'i taeanai mai aonamokia. <sup>32</sup> Uahomana raninai Tirama ena nuataeai kawahi heremi mai aonamo'u, abomo kipokia kahabatabura haeamonaka.

<sup>33</sup> Baibua nibaibeni Tiramana ikoimiai heremiai kemiaho. Amen.

## 16

### *Paulo Ena Banamo 'Abikia.*

<sup>1</sup> Au wai naba'iohinimi haibuka Foibe niwahi, ia hanona Kenkrea aiara apa'uana Tirama ena marea ena aka\* babi'ena ha. <sup>2</sup> Nanoinimi Obiapaka atanai katoa'i taeana, ihobona Tirama ena robe maearimakia tua'i taeanakia 'abana, abomo ena nuatae akanai hanona kato-baraina, pokina ia ehore maearima bo'ona ebarainakia, au abomo ebaraina'u. <sup>3</sup> E'u banamo Priskila mai Akula katobenakia, ia hanona au kipokia Keriso Iesu ena aka tababaina haukia. <sup>4</sup> Terarua au pau'uai ekia mauri a'i teraonana. Banamo 'abina nabenakia, aumo ikupaia'u aha'i, ia rama haeai haukia ekia Tirama ena marea haukia ikoikiai abomo banamo 'abina tebaibeni. <sup>5</sup> E'u banamo terarua ekia ituai tito'u haukia weiakia Tirama ena marea haukia abomo katobenakia. E'u banamo e'u raona'au hauna Epaineto katobena, ia hanona Asia aonai hau kori'uaina ena mauri ebaibeni Keriso 'euna. <sup>6</sup> E'u banamo Maria katobena, ia hanona wai paumiai aka apa'uana ebabaina. <sup>7</sup> E'u banamo hatia'a'u Androniko mai Iunia katobenakia, ia terarua mai au kipokia wapura itu-nai tamiaho. Iuhubeau haukia ia terarua te'iohi harainakia, ia hanona Keriso tea'ikakauma 'uaina ba au hanona muriai. <sup>8</sup> E'u banamo Ampilia katobena, Obiapaka aonai naraona'au aina. <sup>9</sup> Abomo e'u banamo Urebano katobena, taka haeamo Keriso aonai, e'u raona'au hauna Staku abomo e'u banamo katobena. <sup>10</sup> Abomo e'u banamo Apele katobena, ia hana atetua terama ranikiai ena a'ikakaumai ekori 'ini Keriso aonai. E'u banamo Aristobulo ena itu haukia katobenakia. <sup>11</sup> E'u banamo hatia'a'u Herodiona katobena, e'u banamo Nakiso ena itu haukia katobenakia, ia hanona Obiapaka aonai haukia. <sup>12</sup> E'u banamo Trupena mai Truposa katobenakia,

ia hanona Obiapaka paunai aka tebabai harai babi'ekia. E'u banamo e'u raona'au babi'ena Peresi katobena, ia hanona Obiapaka aonai aka rarina 'akina ebabaina. <sup>13</sup> E'u banamo Obiapaka etina'ana hauna Rufo mai hinana ohi katobenakia, ia hinana hanona au hina'u ai eao. <sup>14</sup> E'u banamo Asunukrito, Pilegon, Hereme, Patroba, Herema mai kipokia temiaho haeamo haukia katobenakia. <sup>15</sup> E'u banamo Pilologo, Iulia, Nerea haibuna ohi abomo Olumupa mai Tirama ena robe maearimakia ikoikiai ia kipokia temiaho haeamo haukia katobenakia. <sup>16</sup> Ha ha baipau robenai kipomi katobanamonimi. Keriso ena marea maearimakia ikoikiai ekia banamo tetiu ahina heremi.

### *Baraona 'Ini 'Abina Orena Ebenakia.*

<sup>17</sup> Uaho'aba'u e, nabahi ahinimi, hoa hore abomo emi a'ikakauma tia'i ki'ana haukia mai 'iohi weiana toa'ina hauna ti'oatana haukia katoihia 'ininakia, abomo herekiai katokapare. <sup>18</sup> Pokina maearima uahomakia haukia hanona Keriso aika eka Obiapaka ena aka a'i tibabaina, 'a kipokia ekia nuatae akakia tibabai, ekia 'abi namokiai abomo bahao rea 'abi'abikiai maearima weiakia ki'a herenai ekia 'iohi aha'i haukia tibahao reanakia. <sup>19</sup> Wai pou namona aiana tuka'aina hanona maearima ikoikiai pouna aba teona, weiana buonai au hanona wai naonamo ainimi. Au nuatae wai hanona taba namokia herekiai katoaotipa, ia taba ki'a obokia ibabaikiai a'i katoraonana. <sup>20</sup> Baibua Tiramana kehore rani a'i kehoma'a Satani aba kehe amataina wai 'apumi ba'akiai. Au nabahuba'ari, aika eka Obiapaka Iesu ena aoko'o hoana heremiai kemiaho.

### *A'ikakauma Haukia Baika Ekia Banamo 'Abikia.*

<sup>21</sup> Timoteo, au tararua taka haeamo hauna mai hatia'a'u Luka, Iason, Sosipatro ekia banamo tetiu ahina heremi ai. <sup>22</sup> Au, Teretio, Paulo ehina 'abikia marere neianai arerenakia hau'u abo'umo Obiapaka atanai nabanamonimi.

\* 16:1: (1) *Diakono*



- <sup>23</sup> Gaio ia herenai namiaho, neia ena ituai Tirama ena marea maearimamai tato'u haumai nibarainamai mai aonamomai tamiaho, ena banamo netiu ahina heremi, aiara apa'uana monina ne'imana hauna Erasto mai uaho'abaka Koato terarua ekia banamo abomo tetiu ahinakia heremi.
- <sup>24</sup> Au nabahuba'ari, eka Obiapaka Iesu Keriso ena aoko'o hoana hanona ikoimiai heremiai kemiaho. Amen.

*Tirama Kahabanamona.*

- <sup>25</sup> Tirama kahabanamona, ia hanona mai taburana kebakori 'ininimi emi a'ikakaumai, Iesu Keriso pouna namona nairoro aina hauna taearanai, mai 'abi tohana bunina 'uainai rani homa'ana tebunina hauna ebawaira tinana taearanai. <sup>26</sup> 'A bariu 'abi tohana weiana hanona miaho banai banai Tiramana ena 'abiai mahabanai haukia ekia rere rere aonai ewaira tina, maearima ikoikiai 'abi tohana weiana teba'iobinakia, ua buonai hanopaka ikoikiai Tirama kate a'ikakaumana abomo aiana kateka'aina.
- <sup>27</sup> Aobero Tiramana hamo hamona kahabanamona Iesu Keriso paunai Ia nuabina kemiaho banai banai! Amen.

**Paulo Ena Marere  
Kori'uaina  
KORINTO  
Haukia Herekiai**

*Puka Aona Irerena 'Abina*

Paulo ena raniai, Korinto hanona aiara apa'uana Akaia hanona aonai Helene 'ekana. Paulo kipona hanona maearima kori'uaina Iesu pouna namona Korintoai eiroro, iamo ekaobo eao 'eka baika ena aka kebabaina aonai a'ikakauma haukia baiatakiai atetua apa'uakia baika terama.

Ua buonai marere neiana ererena, herekiai kehina pou haraina mai ekia atetua abomo kebaberonakia. Ena ta'u apa'uana hanona ekia a'ikakaumai a'i teme'eho marikina, haeamona ekia hoahoa namokia hanona ki'a obokiai a'i temeao. Taeara namona weiana tehawainibe haukia katemaui aina hauna ehina pou haraina, haeamona weiana hanona taba apa'uana ba katebabaina hanona kenamo. Abomo Paulo ni'abi, atetua neiakia maearima herekiai tirama pokina Auba Robe ekia mauri ke'uai aina hanona a'i tenuatae paunai. Paulo ni'abi, taeara namonai kahamiaho haeamo mai Auba Robe ena beruberu a'ikakauma haukia herekiai hauna robakia eahu. Weiakia 'ari haukia ekia mikiri mue robakia eahuna. Neiakia ikoinai hanona Korinto haukia ekia atetua tabakia. Paulo ehore 'abi namokia bo'okia ebenakia weiana Tirama ena nuatae kate'iohina.

Puka neiana iro'ana 13 aonai hanona Paulo ehore taearana namona weiana maearima iraona'auaikia robana eahuna, weiana hanona Auba Robe ena ibeni tabana namona ibeni tabakia ikoikiai 'arakiai, ba Tirama kipona nihore ena maearima nibenakia.

*Puka Paipana Apa'uakia*

- a. Roba iahu. (1.1-9)
- b. Hoa horekia Tirama ena marea aonai. (1.10-4.21)
- c. Nabau hoahoakia ki'a obokia mai itu maurina. (5.1-7.40)
- d. A'ikakauma haukia mai ki'a haukia. (8.1-11.1)
- e. Marea maurina mai kuti taearana. (11.2-14.40)

- f. Keriso mai a'ikakauma haukia ekia mikiri mue. (15.1-58)
- g. A'ikakauma haukia ekia beruberu Iudea 'eukia. (16.1-4)
- h. Paulo ena nuatae 'abina mai 'abi orekia. (16.5-24)

*Banamo 'Abina.*

<sup>1</sup> Au Paulo, Keriso Iesu ena iuhubeau hau'u Tirama ena nuataeai eaparina'u, mai a'ikakaumai uaho'abaka Sostene ohi, <sup>2</sup> marere neiana tarerena niwahi Tirama ena marea maearimami Korinto aiaranai haumi heremiai, wai Keriso Iesu aonai etina'aniami eaparinimi Tirama ena robe haumiai katoao, mai weiakia 'eka ikoikiai eka Obiapaka Iesu Keriso atana tiaparina tekuti haukia ikoikiai herekiai. Iesu Keriso hanona ia mai aika eka Obiapaka. <sup>3</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua katebenimi.

*Paulo Namu 'Abina Tirama Eben.*

<sup>4</sup> Au rani ikoinai Tirama namu 'abina nabena wai paumiai pokina Keriso Iesu aonai Tirama ena aoko'o hoana ebaihanimi. <sup>5</sup> Pokina Keriso aonai wai hanona taeara ikoikiai aokiai, emi 'abi 'abi ikoikiai mai emi 'iobi ikoikiai aba ebaobianakia. <sup>6</sup> Keriso pouna tahinana hauna aomiaia aba etabura. <sup>7</sup> Ua buonai bariu wai hanona Auba Robe ena beruberu ha a'i tokapu aina ia tubai'ima keaomo eka Obiapaka Iesu Keriso kemai mue. <sup>8</sup> Iesu kehore kebakori 'ininimi keaomo puanai, ba ia ena mai wapunai wai hanona beho aha'i haumiai katoao. <sup>9</sup> Tirama hanona aia ibabua 'auna hauna, ia ehore wai eaparinimi katoao Nahuna Iesu Keriso aika eka Obiapaka ohi katobahaeamo.

*Tirama Ena Marea Haukia Baiatakiai Hoa Tihore.*

<sup>10</sup> Uaho'aba'u e, eka Obiapaka Iesu Keriso atanai nanoinimi, ikoimiai emi 'abi 'abi kehamomo weiana baiatami a'i kepa'a, ia katobahamomo harai aomiaia abomo emi raonaraonai. <sup>11</sup> Uaho'aba'u e, Koloe ena itu haukia baika tehina bena'u wai baiatamiai hanona baiara baiara tirama. <sup>12</sup> Au taba na'uahina hauna anina neiana, ha nu'abi notibaha, "Au hanona Paulo 'euna," ha nu'abi, "Au hanona Apolo 'euna," ha nu'abi, "Au hanona Petero"

\* 1:12: (12) 'ao Geba

'euna,” ha nu'abi “Au hanona Keriso 'euna.”<sup>13</sup> Ba Keriso hanona tehobina, 'u? Paulo wai paumiai matiu ibiri ropo ubinai teahu 'arina, 'u? 'Ao Paulo atanai wai 'uere robe toa'ina, 'u? <sup>14</sup> Tirama namo 'abina nabena pokina au wai ha a'i aba'uere robenimi, ia Krispo mai Gaio mo aba'uere robenakia. <sup>15</sup> Weiana buonai hau ha a'i ko'abi oi hanona au ata'uai o'uere robe. <sup>16</sup> 'E, Stefano ena itu haukia abomo aba'uere robenakia, ia murinai a'i na'iohina hau ha aba'uere robena 'ao aha'i. <sup>17</sup> Keriso euhuna'u hanona ba'uere robe paunai aha'i ia pou namona kairoro aina, ba maearima ena aobero 'abinai a'i kairoro, pokina Keriso ena 'ari matiu ibiri ropo ubinai hauna hiabuna a'i meaha'i marikina.

*Keriso Hanona Tirama Ena Hiabu Mai Ena Aobero.*

<sup>18</sup> Keriso ena 'ari matiu ibiri ropo ubinai pouna hanona aubai te'ari haukia herekiai hanona po'o 'abinai niao, ia aika nibamaurinaka hauka herekai weiana hanona Tirama ena hiabu. <sup>19</sup> Puka robenai aba tererena, “Aobero haukia ekia aobero kabapururuna, mai aotipa haukia ekia aotipa hanona taba aha'iai kabaona.”

Isa 29.14

<sup>20</sup> Ba aobero hauna hanona ae'e? Marere harai hauna hanona ae'e? Rani neianai 'abi eaotipaina hauna hanona ae'e? Tirama ehore hanopaka haukia ekia aotipa hanona po'oai ebaona.

<sup>21</sup> Weiana Tirama ena aobero hanona nahomana, hanopaka haukia ekia aobero ai hanona Tirama a'i kate'iohina, ia Tirama ena aonamo hanona iroro weiana po'o 'abinai tibaona haunai katea'ikakauma haukia kebamaurinakia. <sup>22</sup> Iuda haukia ekia nuatae hanona hoa apa'uakia kateihanakia ba Tirama katebatohana, 'a Helene haukia hanona aobero titabuna. <sup>23</sup> Ia ai hanona Keriso matiu ibiri ropo ubinai e'ari hauna tairoro aina, weiana hanona Iuda haukia nibakaikai reanakia mai rama haeai haukia herekiai hanona po'oai tibaona. <sup>24</sup> Ia weiakia Iuda haukia mai Iuda haukia aha'i haukia baiatakiai Tirama eaparinakia haukia herekiai Keriso hanona Tirama ena hiabu abomo Tirama ena aobero. <sup>25</sup> Tirama ena taba weiana po'oai tibaona hauna

ehore maearima ekia aobero ekahaona, abomo Tirama 'eunai 'abe'abe tabanai tibaona hauna ehore maearima ena tabura ekahaona.

<sup>26</sup> Uaho'aba'u e, wai maearima aea homamiai Tirama eaparinimi hauna katoraonana, maearima ekia ihaihai hanona bo'omi a'i toaobero, bo'omi a'i totabura, abomo bo'omi obiai a'i torama. <sup>27</sup> Ia Tirama ehore hanopaka haukia wai po'o haumiai tibaonimi haumi etina'aniami aobero haukia keba haumaeanakia, haeamona wai 'abe'abe haumiai tibaonimi haumi etina'aniami tabura haukia keba haumaeanakia. <sup>28</sup> Hanopaka haukia maearima weiakia tiba'abaea 'abaeanakia haukia teiha ta'ereainakia taba aha'i ai tibaonakia haukia Tirama ehore etina'anakia, maearima weiakia hanopaka haukia tihore tibapa'uanakia haukia kea'i ki'anakia. <sup>29</sup> Weiana paunai maearima ha Tirama wairanai keapa 'ekana aha'i. <sup>30</sup> Ia wai hanona Tirama emaiainimi Keriso Iesu ohi ebahamomonimi. Keriso hanona Tirama herenai emai eka aoberoai eao, ba ia haunai hanona habero harobe mai ki'a 'ekanai ebamaurinaka. <sup>31</sup> Weiana paunai Puka robenai aba ererena, “Niapa hauna hanona Obiapaka meapaina.”

Ier 9.24

## 2

*Paulo Keriso Matiu Ibiriropoi Hauna Robana Eahuna.*

<sup>1</sup> Uaho'aba'u e, au awahi heremi Tirama ena 'abi bunikia airoro ainakia raninai, 'abi aotipakiai mai maearima ekia aobero ai a'i airoro. <sup>2</sup> Pokina wai kipokia hamiaho aonai au ao'u a'ia'i haraina taba ha a'i ka'iohina ia Iesu Keriso mai ena 'ari matiu ibiri ropo ai hauna mo ka'iohina. <sup>3</sup> Au awahi naia hamiaho aonai mai 'abe'abe'u mai ta'u ta'u'u mai 'ururu 'ururu'u. <sup>4</sup> E'u 'abi mai e'u iroro hanona maearima ena aobero mai bahiahi 'abikiai aha'i, ia Auba Robe ena hiabu ai abawaira tinanakia. <sup>5</sup> Pokina wai emi a'ikakauma hanona maearima ekia aobero ai a'i kekori 'au, ia Tirama ena hiabu ai kekori 'au.

*Tirama Ena Aobero.*

<sup>6</sup> Ia a'ikakaumai tetabura haukia herekiai aobero 'abikia tairoro ainakia. Aobero weiana hanona hanopaka neiana

'euna aha'i 'ao hanopaka tipoki aina haukia 'eukia aha'i, poki haukia neiakia hanona ekia hiabu katepua. <sup>7</sup> Ia ai hanona Tirama ena aobero weiana maearima herekiai ebuni hauna tahinana, weiana hanopaka a'i erama baha aonai Tirama hanona aobero weiana aba eba'oruna aika eka nuabiai keao. <sup>8</sup> Aobero weiana hanona hanopaka tipoki aina haukia a'i te'iohina, pate'iohina raninai Tirama ena nuabiai nemiaho Obiapakana matiu ibiri ropo ubinai a'i pateahu 'arina. <sup>9</sup> Puka robenai tererena 'abana, "Taba weiana kerama hauna hau ha a'i eihana, 'ao 'uruna a'i eona, 'ao hau ha a'i eraonana hauna Tirama aba eba'oruna weiakia ia tiraona'au aina haukia 'eukia."

Isa 64.4

<sup>10</sup> Ia Tirama hanona ena Auba Robe ai taba bunina weiana aika herekai ebawaira tinana. Auba Robe hanona taba ikoikiai nitabunakia buonai Tirama ena raona bunikia abomo ketabu ahinakia. <sup>11</sup> Tai ha maearima ha ena raona a'i ne'iohina, ia kipona aubana nihore ena raona ikoinai ne'iohinakia. Ihobona mo Tirama ena Auba hanona Tirama ena raona ikoinai e'iohinakia. <sup>12</sup> Aika hanona hanopaka ena raonaraona a'i ha'ina, ia Auba Robe weiana Tirama herenai emai hauna ha'ina, ua buonai Tirama ena aoko'o hoana ebenaka tabakia ikoikiai kaha'iohinakia. <sup>13</sup> Taba neiakia ai tahina haukia hanona maearima ena aobero ai teba 'iohinamai 'abikiai a'i ta'abi, ia 'abi weiakia Auba Robe eba'iohinamai haukiai ta'abi. Auba tabakia hanona Auba Robe tea'ina haukia herekiai tahinanakia.

<sup>14</sup> Maearima aonai Auba Robe aha'i hauna Tirama ena Auba Robe herenai timai tabakia ikoikiai a'i nia'i taeanakia, taba weiakia ia herenai hanona po'o tabakiai nibaonakia, abomo obokia a'i niobo, pokina weiakia hanona Aubai mo kaha 'iohinakia. <sup>15</sup> Maearima aonai Auba Robe nemiaho hauna taba ikoikiai anikia ke'iohi, ia hau ha aonai Auba Robe aha'i hauna hanona maearima weiana aonai Auba Robe nemiaho hauna ena mauri obona a'i keobo. <sup>16</sup> Puka robenai tererena 'abana, "Tai Obiapaka ena raona e'iohi ba ia kehore Obiapaka bairobe kebena?"

Isa 40.13

Iamo aika hanona Keriso ena raona aba ha'ina.

### 3

#### *Hoa Hore Tirama Ena Marea Aonai.*

<sup>1</sup> Uaho'aba'u e, maearima weiakia Auba Robe ai tebonu haukia herekiai a'abi 'abana hanona wai heremiai a'i kahinankia, ia wai hanona hanopaka neiana haumi 'abanai nahina benimi, matoha miori 'oru'oruna Keriso aonai 'abana. <sup>2</sup> Wai ba'iohi abenimi hanona ihobona 'ae 'abana weianai abanianinimi ia pohama pahihikiai aha'i, pokina wai hanona pohama weiana ianinai a'i tutabura baha, bariu abomo katoana hanona a'i ketaina. <sup>3</sup> Pokina wai haumi hanona hanopaka haukia ekia miaho ai tomiaho ohomo, wai baiatamiai wamuru mai baiara baiara temiaho, ba babai neiakiai hanona wai hanopaka 'eunai tuao, ena miaho paipanai tomiaho. <sup>4</sup> Wai baiatamiai ha notibaha, "Au hanona Paulo murinai naka'a," ha nu'abi "Au hanona Apolo murinai naka'a." Weiana wai hanona hanopaka haukia ekia babai tubabaina.

<sup>5</sup> Ba Apolo hanona tai, mai Paulo abomo tai? Ai hanona Tirama ta'arana ta'i haumi, ai emai aka haunai hanona wai tohore Tirama tua'ikakauma, ai ha ha hanona Obiapaka aka ebenamai hauna mo tababaina. <sup>6</sup> Au hanona uho abatona, Apolo hanona beiai eheina, ia Tirama ehore uho eba'omuna. <sup>7</sup> Ba batobato hauna mai hei hei hauna hanona a'i kaha apa'uanakia, ia Tirama mo kaha'i taeana pokina ia nihore taba weiakia niba'omunakia. <sup>8</sup> Batobato hauna mai hei hei hauna ekia aka hanona a'i tehaei, Tirama kehore ha ha ekia aka ihobonai 'arabia kebenakia. <sup>9</sup> Ai tararua hanona Tirama ena aka haumi, wai hanona Tirama ena uma haeamona ena itu.

<sup>10</sup> Tirama ibeni ebena'u ihobonai au hanona itu bakori harai haunai aeao itu kupuana aba aba'oruna, ba baika hanona weiana ahanai itu tirobena, iamo itu katerobena hanona aea katerobe aihona hauna kateraona harai 'uaina. <sup>11</sup> Pokina Tirama hanona aba Iesu Keriso weiana ebakorotina itu kupuanai eao, ua buonai hau ha itu kupuana haeai ha a'i kebakorotina. <sup>12</sup> Itu kupuana ahanai hanona maearima baika gold, silba 'ao pihara



'imarekiai itu tirobena, ia baika hanona matiu ai 'ao tubu ai 'ao aho ai itu tirobena. <sup>13</sup> Ia maearima ha ha ekia aka hoana hanona bakai wapuna weiana kehore kebawaira tinanakia, wapu weiana hanona mai irubana kemai maearima ikoinai ekia aka keakabi ahinakia mai irubai kehobonakia ekia aka ena namo hauna kewaira tina. <sup>14</sup> Itu kupuana weiana ahanai maearima ha ha taba tebabai haukia irubai a'i kate'ara 'akauma raninai ia ekia aka hanona 'arakia katea'i. <sup>15</sup> Ia hau ha ena aka weiana iruba keba'ara 'akaumana raninai ia hanona kekapu, iamo ia kipona hanona kemaui ihobona ia hanona iruba aonai ebeau ahi.

<sup>16</sup> To'jobina wai hanona Tirama ena marea robe abomo Tirama Aubana weiana hanona wai aomia nemiaho. <sup>17</sup> Hau ha Tirama ena marea robe kea'i ki'ana raninai Tirama kehore hau weiana kea'i ki'ana, pokina Tirama ena marea robe hanona erobe ba wai naiami hanona marea robe weiana.

<sup>18</sup> Kipomi a'i tomo'oinimi. Baiatamiai hau ha niraonana ia hanona eaotipa ki'a baha hanopaka neiana maurina aonai raninai, ia hanona kipona po'o haunai kebaona, weiana ia hanona aotipa hauna tohanai keao. <sup>19</sup> Pokina hanopaka neiana aotipana hanona po'o tabana Tirama wairanai. Puka robenai na terere aihona, "Tirama ehore kipokia tiraonana teaotipa haukia ekia aotipai ebato'onakia."

Iob 5.13

<sup>20</sup> Haeamona etibaha,  
"Obiapaka hanona e'jobina  
aotipa haukia ekia raona hanona  
anikia aha'i."

Sal 94.11

<sup>21</sup> Weiana paunai maearima ha a'i kahapaina. Taba ikoikiai hanona wai 'eumi. <sup>22</sup> Paulo 'ao Apolo 'ao Petero,\* mai hanopaka neiana 'ao mauri 'ao 'ari, mai bariu tirama tabakia 'ao wairai katerama tabakia, ikoikiai hanona wai 'eumi, <sup>23</sup> ba wai hanona Keriso aonai tomiaho, Keriso hanona Tirama aonai nemiaho.

## 4

### *Keriso Ena Iuhubeau Haukia.*

<sup>1</sup> Ua buonai maearima hanona ai Keriso ena aka haumai abomo Tirama ena

raona 'abikia bunikia i'imakia haumai katebaonamai. <sup>2</sup> Aka uahomana i'imana hauna hanona poki hauna kebatohana ena aka kebabai haraina mai aona ikoinai. <sup>3</sup> Ia bariu wai 'ao maearima ha bakai ai pehorotina'u hanona a'i naraona apa'uana, haeamona au kipo'u abomo bakai ai a'i nahorotina'u. <sup>4</sup> Au kipo'u behoai a'i nahorotina'u, ia hoahoa weiana hauna hanona au a'i niba berona'u, Obiapaka mo kipona au kebabakaina'u. <sup>5</sup> Weiana paunai bakai ranina a'i nimai baha aonai hau ha bakai ai a'i katohoroti bahana katobai'ima keaomo Obiapaka kemai, ba ia kehore weiakia wapurai tebuni tabakia eai kebakarakinakia, abomo maearima aokiai tebuninakia haukia kebawaira tinanakia. Ba rani weianai maearima ha ha Tirama herenai banamo 'abina katea'ina.

<sup>6</sup> Uaho'aba'u e, wai paumiai au mai Apolo ohi ibabataimiai 'abi neiakia ahinanakia, pokina ai heremai ai "Puka robenai tererena hauna a'i katokahaona" 'abina anina kato'iohi haraina, hau ha a'i katoapaina mai hau ha a'i kato'baki'ana. <sup>7</sup> Tai ehore baika baiatakiai wai ebapa'uanimi? Abomo taba naiana heremiai hauna Tirama a'i ebenimi tabana ha, u? Taba weiana toa'ina hauna Tirama ebenimi raninai aehoma buonai tuapa?

<sup>8</sup> Wai turaonana nuatae tabakia ikoinai aba toa'i. Turaonana wai aba taba heremiai tebo'o haumi. Wai turaonana wai hanona aba obia haumiai toao ia ai hanona aha'i. Au naraonana wai patobia toha hanona penamo, ba ai wai kipokia pahaobia oioi. <sup>9</sup> Ia au naraonana Tirama ehore ena iuhubeau haumai hanona muri 'akinai ehorotinamai, ihobona ki'a haukia weiakia to'u wairakiai kateahu 'arinakia. Ai hanona baiha baiha tabakiai kataeao hanopaka maikoina aonai maearima mai aneru ikoikiai katearurunamai. <sup>10</sup> Wai turaonana Keriso paunai ai hanona po'o ai taeao, ia wai Keriso aonai hanona tuaotipa. Wai turaonana ai hanona ta'abe'abe, ia wai hanona tutabura, wai hanona timariki ainimi, ia ai hanona te'uahinamai. <sup>11</sup> Rani ikoinai emai mo bariu ai hanona mare'a ta'ari, 'akomai ti'ororo, emai habuni aha'i, tiahunamai,

\* 3:22: (22) 'ao Geba

emai miaho 'ekana aha'i taruao aruao. <sup>12</sup> Ai hanona kipomai taburamai tohanai tamiaho. Maearima teururu ainamai raninai tabanamonakia, ti'otanamai raninai tabakiro, <sup>13</sup> atamai tia'i ki'anakia raninai ai hanona ta'abi'abi harai ia herekia. Ai hanona ihobona hanopaka haena mai taba ikoikia hamarakia ai tibaonamai emai mo bariu.

<sup>14</sup> Au 'abi neiakia narerenakia hanona wai kaba haumaeanimi paunai aha'i, ia wai e'u raona'au miorimi paunai narobenimi katoraona 'inina a'i katoapa. <sup>15</sup> Heremiai iba'iolemi haukia pebo'o ki'a Keriso aonai, ia hamami hanona a'i kebo'o. Ia pou namona airoro aina mauri toa'ina paunai au hanona hamami ai aeao Keriso Iesu aonai. <sup>16</sup> Weiana buonai nanoinimi, au e'u babai ihobokia katobabai. <sup>17</sup> Neiana paunai Timoteo nauhuna niwahi heremi, ia hanona au e'u raona'au miorina mai ena a'ikakauma Obiapaka aonai. Ia kehore e'u mauri taearana Keriso Iesu aonai amiaho aina hauna weiana 'eka ikoinai aeao Tirama ena marea aokiai aba'iolemi hauna wai kebaraona 'ininimi.

<sup>18</sup> Baiatamiai baika hanona tiapa pokina tiraonana au a'i kawahi mue heremi. <sup>19</sup> Ia Obiapaka kenuatae raninai, au hanona aba kawahi heremi, ba au kipo'u naiakia tiapa haukia ekia hiabu taba katebabai hauna ka'iolemi, ia taba taba te'uahi haukia robakia a'i kahunakia. <sup>20</sup> Pokina Tirama ena obia aiarana hoahoana hanona 'abi'abi 'abaeakia aha'i, ia mai hiabuna nemiaho. <sup>21</sup> Wai taba tonuatae? Ima'u mai matiuna kawahi kababeronimi, 'ao raona'au mai 'aiaunu hoahoanai kawahi heremi?

## 5

### *Nabau Ki'a Tirama Ena Marea Haukia Baiatakia Erama.*

<sup>1</sup> Bariu emi babai hanona pouna aba aona wai baiatamiai nabau ki'a hoana erama hau ha hinana i'irina ohi tinabau, ba babai weiana hanona babai ki'a obona maearima atapakai haukia abomo ua a'i tibabai aiho. <sup>2</sup> Ia wai hanona tuapamo, ia a'i tuhai, hau neiana baiatamiai ua ebabai aiho hauna ibakarantina robana patoahuna penamo.

<sup>3</sup> Au wai baiatamiai aha'i, iamo raonaraonai hanona au aba wai heremiai, ba hoa weiana ebabaina hauna hanona aba puma abena 'abana ihobona matoha au aba naia heremiai. <sup>4</sup> Eka Obiapaka Iesu atanai katoto'u raninai au abomo raona raonai aba naia wai kipokia, eka Obiapaka Iesu ena hiabu kewaira tina herekai, <sup>5</sup> ba maearima naiana hauna Satani kahabena, ia hauanina ki'a obona kea'i ki'ana ia aubana hanona kemaui Obiapaka ena mai raninai.

<sup>6</sup> Wai tuapa hanona a'i ebero, wai aba to'iolemi bakupu muramurana papana 'aki kehore parawa maikoina kebakupuna ihobona ki'a papana kehore mauri maikoina kea'i ki'ana. <sup>7</sup> Wai bakupu muramurana 'ai'aina weiana ki'a 'abana katone'ena raninai wai hanona parawa mahamahana weiana aonai bakupu muramurana aha'i haunai katoao. Pokina aika eka Kabanai tatuna mamoenana Keriso weiana hauna aba teahu 'arina eka ki'a ia'iolemi paukia, weiana buonai wai hanona aomia bakupu muramurana aha'i haumiai toao. <sup>8</sup> Weiana paunai aika eka Kabanai tatuna kahababaina parawa aonai bakupu muramurana aha'i haunai, pokina bakupu muramurana 'ai'aina hanona ki'a mai babai ki'a obokia ebenaka, ia parawa weiana aonai bakupu muramurana aha'i hauna hanona raona bero mai 'abi tohana parawana.

<sup>9</sup> E'u marere weiana arerena hauna aonai aba ahina benimi, nabau haukia kipokia hanona a'i katobahaemo. <sup>10</sup> Au a'i natibaha hanopaka maearimakia neiakia tinabau, tianiki'a, tibainao, mai kaiba'uku tekuti ainakia haukia kipokia a'i katobahaemo. Herekia katopihi raninai wai hanona hanopaka neiana katohabona kato'ari. <sup>11</sup> Au wai narere benimi natibaha, wai baiatamiai hau ha kipona netibaha, ia hanona a'ikakauma hauna iamo ninabau, niani ki'a, kaiba'uku nekutai, ni'abi ki'a, neinu 'ari, mai nibainao, maearima uahomana hauna kipokia a'i katoaniani haemo 'apua. <sup>12</sup> Atapakai temiaho haukia a'i kababakainakia pokina weiana hanona au e'u aka aha'i. Ia wai emi aka hanona Tirama ena marea aonai temiaho haukia katoba bakainakia. <sup>13</sup> Tirama kehore atapakai

temiaho haukia kebabakainakia. Puka robenai e'abi etibaha, "Aka ki'a hauna hanona baiatamiai katobakarahina."

## 6

*'Abaka A'i Kahaba bakainakia Atapaka Haukia Wairakiai.*

<sup>1</sup> Wai a'ikakauma haumi baiatamiai hau ha uaho'abana ohi tiatetua raninai, aehoma buonai niaoaina atapaka haukia wairakiai tibabakaina? Ia taba buonai a'i niaoaina a'ikakauma haukia herekiai a'i tibaberona? <sup>2</sup> Wai aba to'iohina Tirama ena maearima hanona hanopaka maearimakia kateba bakainakia, ba wai hanopaka maearimakia katoba bakainakia haumi aehoma buonai atetua papakia baika baiatamiai hanona a'i tuba beronakia? <sup>3</sup> Wai aba to'iohina wairai aika hanona aneru kahaba bakainakia. Ua buonai 'abi tohana mauri neiana tabakia kahaba beronakia hanona ketaina. <sup>4</sup> Atetua uahomakia heremiai tirama raninai taba buonai tuaoainakia bakai haukia weiakia Tirama ena mareai atakia aha'i haukia herekia? <sup>5</sup> Au na na'abi aihohana wai haumaea hoahoakia tobabai, naia wai baiatamiai aobero hauna ha nemiaho raninai, ia pehore a'ikakauma haukia naiakia pebaberonakia. <sup>6</sup> Ia a'ikakauma hauna ha nihore 'abana ni'oatana ba bakai 'ekana niaoaina, wai tuhore atapaka haukia wairakiai ua tubabai aihohana.

<sup>7</sup> Weiana paunai wai a'ikakauma haumi baiatamiai atetua uahomana tubabaina raninai ikoimiai hanona aba to'eho. 'Abina aha'i, tibabehonimi 'ao ti'oinimi re'a patobapahihi hanona penamo. <sup>8</sup> Iamo uaho'abami herekiai tubeho abomo tu'oinakia, herekiai tubabai ki'a hanona a'i enamo.

<sup>9</sup> Wai aba to'iohina aka ki'a haukia hanona Tirama ena obia aiaranai a'i kate-toto. Ia a'i teme'oinimi, weiakia nabau haukia, kaiba'uku tekuti aina haukia, maearima atawakia tinabauai haukia, mai hau rua tinabau, babi'e rua tinabau haukia, <sup>10</sup> bainao haukia, ani ki'a haukia, inu 'ari haukia, 'abi ki'a haukia, kakikaki haukia, weiakia hanona ha Tirama ena obia aiaranai a'i ketoto 'apua. <sup>11</sup> Wai baika abomo 'uainai uahomami, ia bariuhanona Obiapaka Iesu Keriso atanai mai eka Tirama ena Aubai emi ki'a aba eutu

obonakia, aba ebarobenimi, abomo aba bero ebenimi.

*Hauanimi Hanona Tirama Ibanuabina Akana Katobabaina.*

<sup>12</sup> Hau ha ke'abi ketibaha, "Au taba ikoikiai kababai hanona ketaina," 'abi tohana, iamo ikoikiai hanona a'i tenamo heremiai. "Taba ikoikiai kababai hanona ketaina," ia weiakia ha hanona au e'u mauri a'i kepoki aina. <sup>13</sup> Pohama hanona mo'oru 'euna, mai mo'uru hanona pohama kea'ina. Weiana hanona 'abi tohana, iamo Tirama kehore terarua keba-pururunakia. Huanika hanona nabau tabanai a'i keao, pokina huanika hanona Obiapaka 'euna, mai Obiapaka hanona huanika ke'imana hauna. <sup>14</sup> Tirama ehore ena hiabuai Obiapaka Iesu 'ariai ebamikiri muena, ihobonai aika abomo hiabu weianai kebamikirinaka.

<sup>15</sup> 'Abi tohana to'iohina wai ha ha huanimi hanona Keriso huanina 'ete'etekiataubahamona hauani hamonai tuao. Ba au a'i kahore Keriso hauna 'ete'etena ha a'i kaeaoaina nabau babi'ena ohi a'i kaba-haeamona. Aha'i 'akina. <sup>16</sup> Wai to'iohina hau ha nabau babi'ena ohi tibahaeamo hanona terarua hauani hamona, pokina Puka robena aonai na terere aihona, "Rua tibahamomo hanona hauani hamona." <sup>17</sup> Ia hau ha Obiapaka ohi tibahaeamo hauna hanona terarua aubai hanona hamona. <sup>18</sup> Nabau herenai kato'uru, pokina hau ha ki'a haeai haeai nibabai ikoikiai hanona ia kipona huanina a'i nia'i ki'ana, ia nabauai hanona kipona huanina nia'i ki'ana. <sup>19</sup> Wai aba to'iohina huanimi hanona Auba Robe ena marea robe, ia hanona wai aomiai nemiaho, Tirama ehore Auba Robe ebenimi. Ua buonai wai kipomi a'i katopoki ainimi. <sup>20</sup> Pokina Tirama hanona aba ekawanimi mai 'arami. Ua buonai huanimiai katobabai tabakia ikoikiai aokiai hanona Tirama nuabina katobawaira tinana.

## 7

*Hawainibe 'Abi'abina.*

<sup>1</sup> Bariu taba weiakia emi marereai tobakai bakai ainakia haukia 'arakiabamuenakia. Hau a'i patehawainibe hanona penamo. <sup>2</sup> Ia nabau 'abaea nibo'o ki'a paunai hau hanona kipona atawana tohana herenai kemiaho, abomo babi'e hanona

kipona atawana tohana herenai kemi-aho. <sup>3</sup> Hau kehore atawana herenai ena hawainibe hoana kebabaina, ihobona mo babi'e abomo kehore atawana herenai ena hawainibe hoana kebabaina. <sup>4</sup> Babi'e hanona kipona hauanina a'i kepoki aina ia atawana abomo kepoki, ihobona mo hau kipona hauanina a'i kepoki aina, ia atawana abomo kepoki. <sup>5</sup> Atawami herenai hauanimi a'i katoubo aina ia torarua aomi etaina hanona katomiaho 'abaea rani papana, hauanimi katerobe bahuba'ari paunai, ba murinai katobahamomo mue, weiana Satani 'ekana a'i katohorena a'i mehobonimi, pokina hauanimi kato'ima haraina a'i ketaina paunai. <sup>6</sup> Au 'abi neiana nahinana heremiai hanona rauhubu 'abina aha'i ia barai barai 'abina. <sup>7</sup> Au e'u nuatae maearima ikoinai au ihobo'uai pateao a'i patehawainibe. Ia Tirama hanona ibeni ha ha ebenaka, ha hanona ena ibeni neiana ebena a'i kehawainibe, ha hanona ena ibeni weiana ebena kehawainibe.

<sup>8</sup> Bariu hanona maearima weiakia a'i tihawainibe haukia mai babi'ekia, wapakia mai hau koaekia nahina benakia. A'i katehawainibe katemiaho 'abaea au 'abana hanona enamo. <sup>9</sup> Iamo ia kipokia hauanikia kate'ima haraina a'i ketainakia raninai, katehawainibe. Katehawainibe hanona enamo ba nabau raona raonana weiana ekia mauri a'i mea'i ki'ana.

<sup>10</sup> Tohawainibe haumi nahina benimi, 'abi neiana hanona au aia'u aha'i ia Obiapaka aiana. Babi'e hanona atawakia herekiai a'i katekaobo 'abaea. <sup>11</sup> Ekaobo babi'ena hanona ibaubo kemiaho, 'ao aha'i raninai haeamona kemue keao atawana herena. Hau abomo atawana a'i kebakarrahina.

<sup>12</sup> Harina ikoimiai e, neiana Obiapaka ena 'abi aha'i ia au wai haiamiai nahinana. A'ikakauma hauna ha hanona a'i nia'ikakauma babi'ena eatawana, ba babi'e weiana nenuatae atawana ohi katemiaho raninai, hau weiana atawana a'i kebakarrahina. <sup>13</sup> A'ikakauma babi'ena ha a'i nia'ikakauma hauna eatawana, ba hau weiana nenuatae atawana ohi katemiaho raninai, babi'e weiana atawana a'i kebakarrahina. <sup>14</sup> A'i nia'ikakauma hauna atawana a'ikakauma babi'ena ohi tebahamomo paunai hau weiana aba erobe, mai a'i nia'ikakauma babi'ena atawana a'ikakauma hauna

ohi tebahamomo paunai ia aba erobe. Ia ua a'i pehoma raninai, nahumi hanona pate'opu Tirama wairanai, ia hoa weiana paunai nahumi hanona aba terobe. <sup>15</sup> Ia a'i nia'ikakauma hauna 'ao babi'ena nenuatae atawana a'ikakauma babi'ena 'ao hauna kehabona raninai a'i katokaiabuna, hoa na homakia aokiai a'ikakauma hauna 'ao babi'ena buona a'i kehoaina. Tirama hanona aika eaparinaka baibuai kahamiaho. <sup>16</sup> A'ikakauma babi'emu e, oi a'i o'iohina atawamu pa'e oi paumuai mauri kea'ina, abomo a'ikakauma haumu e, oi a'i o'iohina atawamu pa'e oi paumuai mauri kea'ina.

### *Oi Aea Homamuai Tirama Eaparini'o Hanona Uahomamu Komiaho.*

<sup>17</sup> Maearima ha ha Obiapaka ia ebena maurina ihobonai, abomo ha ha Tirama eaparinakia maurina ihobonai katemiaho. Rauhubu 'abina neiana hanona Tirama ena marea haukia ikoikia herekiai naba'iohi aina. <sup>18</sup> Aba tetarena hauna Tirama ena aperi ea'i taeana raninai ena itare a'i kebunina, ia a'i tetarena hauna Tirama ena aperi ea'i taeana raninai katetarena raonana a'i keraonana. <sup>19</sup> Tetarena 'ao a'i tetarena hanona taba apa'uana aha'i. Ia taba apa'uana hanona Tirama ena rauhubu mo kahaka'ai harainakia. <sup>20</sup> Maearima ha ha mauri weiana temiaho aina aonai Tirama eaparinakia ihobonai katemiaho. <sup>21</sup> Oi ta'ara'i haumu aonai Tirama eaparini'o raninai, weiana aomu a'i kearo'ari, ia irubumu ranina ha kehaea raninai weiana koa'i taeana. <sup>22</sup> Ta'ara'i hauna weiana Obiapaka ehore eaparina hauna hanona ta'ara'i hauna aha'i Obiapaka aonai. Ihobona mo, maearima ta'ara a'i nia'i hauna weiana Keriso ehore eaparina hauna hanona Keriso ena ta'ara ia'ina hauna. <sup>23</sup> Wai hanona Tirama abakawanimi mai 'arami rarina, paunai maearima 'eukiai a'i katoao. <sup>24</sup> Uaho'aba'u e, ha ha mauri weiana tomiaho aina aonai eaparinimi ihobonai uahomami Tirama kipokia katomiaho.

### *A'i Tehawainibe Haukia Ekia 'Abi.*

<sup>25</sup> Bariu a'i tihawainibe maearimakia 'abi'abina hanona neiana. Obiapaka ena 'abi aha'i ia au e'u 'abi wai heremiai nahinana. Ia Obiapaka ena aoko'oai



aobero ebena'u paunai wai katobato-hana'u. <sup>26</sup> Bariu hanona atetua ranikia, ua buonai au naraonana wai aea tomiaho aiho uahomanai mo katomiaho hanona kenamo. <sup>27</sup> Ohawainibe haumu atawamu a'i kobakarahina, ia a'i ohawainibe haumu hawainibe a'i koraonana. <sup>28</sup> Ia kohawainibe raninai oi ki'a a'i nubabaina, abomo uaho rari kehawainibe raninai ia ki'a a'i nibabaina. Ia hawainibe haukia hanona aro'ari bo'ona katea'inakia ekia mauriai, weiana paunai nabaraonanimi.

<sup>29</sup> Uaho'aba'u e, na na'abi aiho, rani puana hanona aba kemai, ba bariu keaomo waira ranikiai tehawainibe haukia katemiaho matoha a'i tehawainibe 'abana Tirama ena aka katebabaina. <sup>30</sup> Taeara ihobonai, weiakia tihai haukia katemiaho matoha aokia a'i tiaoko'o 'abana. Tiaonamo haukia katemiaho matoha a'i tiaonamo. Tikawakawa haukia taba weiakia tekawanakia hanona robakia a'i kateahu matoha 'eukia aha'i. <sup>31</sup> Mai maearima weiakia bariu hanopaka tabakia bo'okia tiakaina haukia hanona kateraonana matoha aka weiakia hanona herekiai taba aha'i 'abana. Pokina hanopaka neiana mai bariu nahamiaho aina maurina hanona aba kepua.

<sup>32</sup> Au e'u nuatae hanona wai aomi a'i katearo'ari. A'i ehawainibe hauna hanona Obiapaka mo ena aka nibabaina, ena raona ikoinai Obiapaka aona kebanamona. <sup>33</sup> Ia ehawainibe hauna hanona hanopaka mo tabakia niraonanakia, pokina ena nuatae hanona atawana aona kebanamona. <sup>34</sup> Abomo ena raona hanona nibaruana atawana aona kebanamona mai Obiapaka aona kebanamona. Ia a'i ehawainibe babi'ena 'ao uahona hanona Obiapaka ena aka mo niraonana, pokina hauaniai mai aubai kerobe. Ia ehawainibe babi'ena hanona hanopaka tabakia niraonanakia, pokina ena nuatae hanona atawana aona kebanamona. <sup>35</sup> Au na na'abi aiho ena poki hanona wai emi namo paunai, ia a'i narauhunimi. Au nanuatae wai hanona mauri beronai katomiaho, Obiapaka ena aka tubabaina rani-nai aomi a'i kerua.

<sup>36</sup> Hau ha aonai niraonana nahuna uahona\* herenai a'i nibabai harai aba emiaho ki'a baha, ia hau ena nuatae nahuna weiana pehawainibe raninai taeara ketabu kehawainibena, weiana

hanona ki'a a'i nibabaina. <sup>37</sup> Ia hau weiana kipona aona ea'ia'i haraina abomo aona ebapahihina nahuna uahona a'i kehawainibe, ba a'i ebahawainibena abomo ebero. <sup>38</sup> Ba hau weiana nahuna uahona ebahawainibena hanona ebabai harai, iamo hau weiana nahuna uahona a'i ebahawainibena hanona ebabai harai ki'a baha.

<sup>39</sup> Babi'e hanona atawana taina ketai kemiaho rani ikoinai. Ia atawana ke'ari raninai, ia hanona aba ebabi'e 'abaea, ba kenuatae kehawainibe re'a a'ikakauma hauna keatawana Obiapaka aonai. <sup>40</sup> Ia e'u raonaraona hanona nahomana, wapu weiana a'i kehawainibe hanona keaonamo ki'a baha. Au naraonana Obiapaka Aubana hanona au ao'uai, buonai neiana nahinana.

## 8

### *Kaiba'uku Ekia Aniani 'Abi'abina.*

<sup>1</sup> Bariu neiana hanona baibeni anianikia kaiba'uku tebena hauna 'abina. 'Abi tohana aika ha'jobina, "Ikoikai hanona mai eka aotipa." Ba aotipa nihore apa nibabua taeara, 'a raona'au nihore a'ikakauma haukia niba taburanakia. <sup>2</sup> Hau ha kipona niraonana ia hanona mai ena 'iobi taba baika e'io binakia, iamo pe'io bin tohanakia hauna a'i e'io binakia. <sup>3</sup> 'A hau ha Tirama niraona'au aina hauna hanona Tirama abomo hau weiana e'io bin aina.

<sup>4</sup> Ua buonai baibeni anianina kaiba'uku tebena ba nahani hauna 'abina neiana. Aika ha'jobina kaiba'uku hanona tirama tohana aha'i hanopaka neiana aonai, ha'jobina Tirama tohana hanona hamona mo. <sup>5</sup> Maearima tihore tiramai tibaonakia haukia baika kupai mai hanopakai, (weiana 'tiramakia' mai 'auba obiakia' nahomakia hanona tebo'o.) <sup>6</sup> Iamo aika hanona mai eka Tirama hamona, Hamaka. Ia hanona taba ikoikiai ebabainakia, ba ia paunai nahamiaho. Abomo Obiapaka hanona hamona Iesu Keriso. Ia paunai taba ikoikiai terama, ba ia paunai aika nahamiaho.

<sup>7</sup> Ia a'ikakauma haukia baika 'abi tohana neiana a'i te'jobina. Bariu rani neianai baika hanona kaiba'uku ena aka aba temamatai haraina buonai aniani uahomakia tiani raninai ia tiraonana weiana

\* 7:36: (36-38) 'ao ena mahoheni babi'ena

hanona kaiba'uku 'euna, ekia raonaraonai aokia a'i nibero, tiraonana aniani weiana teani hauna aba eba'opunakia Tirama wairanai. <sup>8</sup> Aniani hanona a'i keaoainaka Tirama herena, a'i kahaniani re'a Tirama wairanai ena ki'a aha'i 'ao kahaniani re'a Tirama wairanai ena namo aha'i. <sup>9</sup> Iamo kato'ima 'ima harainimi, pokina emi 'iobiai tuaniani weiana kehore ekia a'ikakauma te'abe'abe haukia a'i meba'ehonakia ki'a aonai.

<sup>10</sup> Pokina hau ha ena a'ikakauma e'abe'abe hauna oi aotipa haumu kaiba'uku ena itarai nuaniani keihani'o raninai, ia aona nuba taburana niraonana kebeho mo kaiba'uku ekia aniani keani. <sup>11</sup> Ba uaho'abamu ena a'ikakauma e'abe'abe hauna weiana ia paunai Keriso e'ari hauna hanona oi emu aotipa weiana kehore ia aubana kea'i ki'ana. <sup>12</sup> Oi emu babai weianai uaho'abamu aona nua'i ki'ana ia niraonana eki'a hauna kebabaina, weianai oi uaho'abamu herenai nubeho abomo Keriso herenai nubeho. <sup>13</sup> Weiana paunai aniani weiana ehore uaho'aba'u eba'ehona raninai, au aniani weiana a'i kani mue pokina a'i maba'ehona.

## 9

### *Paulo Pou Namona Paunai 'Arana Ai Nitabuna.*

<sup>1</sup> Au hanona ta'ara ia'ina hau'u aha'i. Au hanona iuhubeau hau'u. Au eka Obiapaka Iesu aihana. Wai hanona Obiapaka ena aka nababaina hauna buabuana haumi. <sup>2</sup> Maearima baika herekiai au hanona iuhubeau hau'u aha'i, ia wai heremiai au hanona iuhubeau hau'u, pokina wai Obiapaka tua'ikakaumana hauna nihore nibatohana au hanona iuhubeau hau'u.

<sup>3</sup> Te'uahina'u haukia ekia 'abi na kabamue aihona. <sup>4</sup> Au mai e'u bero e'u aka 'arana aniani mai bei pa'i. <sup>5</sup> Iuhubeau haukia baika mai Obiapaka hatina mai Petero tibabai ihobokia pababai, atawa'u a'ikakauma babi'ena pabaka'ana e'u kaoao aokiai hanona mai e'u bero. <sup>6</sup> 'Abamai baika a'i kateaka iamo au Banaba ohi ikupaiamai hanona kipomai emai aniani akana kataka, 'u? <sup>7</sup> Huari hauna tabana kipona ena aka 'arana kehorena? Birauro hauna tabana kipona ena uma anianina a'i keani? Mamoe

bakori hauna tabana ena mamoe 'aena a'i keinu?

<sup>8</sup> Au ibabatai rani ikoikiai nahaiha haukia mo a'i na'abi'abi, Tirama ena rauhuhu abomo 'abi ihobona ehinana. <sup>9</sup> Mose ena rauhuhu pukanai na erere aihona, "Poromakau witi iba'iti'itina akana nibabaina aonai pinana a'i kobiri abuna ia kohabona keaniani."

Deu 25.4

'Abi weiana hanona Tirama poromakau niraona ki'a bahanakia paunai, 'u? Aha'i. <sup>10</sup> Weiana ehinana hanona aika e'uahinaka. 'Abi tohana 'abi weiana hanona aika paukai ua terere aihona. Ni'ani hauna mai nieueu hauna terarua ekia aka tibabaina hauna buabuana tebuabena hana katea'ina. <sup>11</sup> Ai hanona auba ena ube tabatona wai heremiai, ba hauani ibanamona tabakia heremiai kata a'inakia hanona a'i ebero, 'u? <sup>12</sup> Ia baika baraibarai tobenakia hanona mai ekia bero raninai, ai abomo emai beroai barai barai apa'uana heremiai kata'ina.

'A ai uahomana a'i tababaina. 'A ai hanona taba ikoikiai herekiai tabapahihi pokina Keriso ena pou namona a'i tamakaiabuna marikina. <sup>13</sup> Wai aba to'iohina marea robeai tiaka haukia ekia aniani weia marea robeai tia'ina, abomo itara robenai tibarai barai haukia baibeni anianina weia hauna tiwatena. <sup>14</sup> Ba taeara ihobonai mo Obiapaka e'abi weiakia pou namona teiroro aina haukia ekia mauri ibanamona tabakia hanona ua'a pou namona tia'i taeara haukia herekiai katea'ina.

<sup>15</sup> Ia au e'u bero weiana panoinimi hauna akana a'i ababaina. Mai bariu narere benimi hanona e'u bero weiakia ka'inakia paunai aha'i. Au pa'ari hanona penamo ba hau ha ke'abi au e'u apa neiana anina aha'i. <sup>16</sup> Pou namona nairoro aina paunai kapa hanona a'i ebero. Pokina au nairoro aina hanona Obiapaka ehina bena'u kababaina akana nababaina. Ba pou namona a'i kairoro aina raninai here'uai hanona keki'a ki'a baha. <sup>17</sup> Au kipo'u e'u nuataeai aka neiana pababaina raninai 'ara'u patabuna, ia weiana Obiapaka ena aka ebena'u raninai, aka neiana hanona Tirama au ebapokina'u kababaina mo. <sup>18</sup> Ba 'ara'u

hanona taba? Pou namona airoroai 'abaeana 'ara'u robana a'i nahuna mai pou namona akana nababaina aonai e'u bero a'i natabunakia. Au 'ara'u hanona aonamo neiakia.

<sup>19</sup> Au hanona hau ha ta'arana a'i na'i, 'a au kipo'u e'u nuataeai maearima ikoikiai ekia ta'ara'i hau'uai naeao, weiana maearima bo'okia kamaianakia Iesu kate a'ikakaumana. <sup>20</sup> Iuda haukia kipokia tamiaho aonai au hanona Iuda haukia ihobokiai naeao, weiana ia kamaianakia Iesu kate a'ikakaumana. (Abomo au hanona Mose ena rauhuhu ba'anai a'i namiaho,) iamo weiakia rauhuhu ba'anai temiaho haukia kipokia tamiaho aonai au rauhuhu ba'anai temiaho haukia ihobokiai naeao, weiana ia kamaianakia Iesu kate a'ikakaumana. <sup>21</sup> Taeara ihobonai Mose ena rauhuhu a'i te'ioibina haukia kipokia tamiaho aonai au rauhuhu a'i te'ioibina haukia ihobokiai naeao, weiana rauhuhu a'i te'ioibina haukia kamaianakia Iesu kate a'ikakaumana. (Iamo 'abi tohana au Tirama ena rauhuhu a'i ahabona, au hanona Keriso ena rauhuhu naka'aina.) <sup>22</sup> Ekia a'ikakauma te'abe'abe haukia herekiai namiaho aonai au abomo na'abe'abe ia ihobokiai naeao, weiana baika kamaianakia Iesu kate a'ikakaumana. Ua buonai au hanona taba ikoikiai ihobokiai naeao maearima ikoikiai herekiai, ba taeara tabana ketaina haunai baika kamaianakia bamauri katea'ina Keriso herenai. <sup>23</sup> Au taba neiakia ikoikiai nababainakia hanona pou namona paunai, ba au abomo ia kipokia banamona weiana kata'i haeamo.

<sup>24</sup> Wai to'ioi haraina beau baitaeai aonai beau haukia bo'ona tibeau, ia hamona mo 'uai 'arana nia'ina. Ua buonai katobeau hanona 'uai beauna katobeau. <sup>25</sup> Beau baitaeai aokiai titoto haukia ikoikiai beau baitaeai weiana ena bairobe pahihina tia'ina. Weiana tibabaina hanona 'uai 'arana weiana a'i kemiaho homa'a hauna katea'ina paunai, 'a aika aka nahababaina hanona 'uai 'arana weiana kemiaho banaibanai hauna kaha'ina paunai. <sup>26</sup> Ua buonai au nabeau bero baihana naeao mo beau pua irerenai kakara'au, abomo au hanona 'au hauna weiana a'i nikapo 'abaea kapo 'abaea hauna 'abana. <sup>27</sup> Au kipo'u hau'u nabataburana nabapahihina mai ao'u keka'ai haraina, pokina baika herekiai

pou namona kairoro aina murinai au a'i temebaki'ana'u 'ara a'i ma'ubo aina ta'una.

## 10

### *Kaiba'uku A'i Kahakuti ainakia.*

<sup>1</sup> Uaho'aba'u e, au nanuatae 'aba'abaka Mose murinai te'au haukia herekiai taba erama hauna a'i katoreana. Tirama ehore ikoikiai 'auhao ba'anai ebaka'anakia ba 'Aku Birona aonai tekabanai. <sup>2</sup> Ia ikoikiai 'auhao aonai mai 'aku aonai te'uere robe Mose i'abana haukiai teao. <sup>3</sup> Ikoikiai hanona anianina weiana Tirama ebe-nakia hauna ihobona mo teani. <sup>4</sup> Abomo ikoikiai bei weiana Tirama ebenakia hauna ihobona mo teinu. Tirama ena pihara weiana kipokia teka'a haeamo, piharana weiana haunai bei eharu ahi teinu, ba pihara weiana hanona Keriso. <sup>5</sup> Babai namokia weiakia ebabai, iamo bo'ona 'akina hanona Tirama aona a'i tebanamona, ua buonai hano'akunai te'ari ore huanikia hanona 'eka haeai-haeai teno uraru.

<sup>6</sup> Taba neiakia ikoikiai hanona ibabatai aika 'euka, kateba raonanaka taba ki'a obokia a'i kahanuataeai 'abaea ia tebabaina 'abana. <sup>7</sup> Kaiba'uku hanona a'i katokuti ainakia baika tebabaina 'abana, pokina Puka robenai aba ererena, "Maearima hanona temiati teaniani teinu ba temikiri hau mai babi'e kipokia ewa ki'a obokia tebabai." <sup>8</sup> Aika hanona a'i kahanabau ki'a baika weia tebabaina 'abana, ba rani hamona aonai ikoikiai taha harau rua aihau (23,000) te'ari. <sup>9</sup> Aika hanona Obiapaka a'i kahahobona baika weia ia tehobona 'abana, weiana 'erau tehore teara 'arinakia. <sup>10</sup> Abomo aika a'i kaha'arara 'arara ia te'arara 'arara 'abana, weiana ahuahua aneruna ehore eahu 'arinakia.

<sup>11</sup> Taba neiakia terama ia herekiai hanona ibabatai aika 'euka, 'abikia tererenakia hanona aika ibaraonaka hanopaka ena pua nimai aonai. <sup>12</sup> Ba oi nuraonana aba okori 'ini harai raninai, ko'ima haraini'o a'i mo'eho. <sup>13</sup> Baihobo weiakia wai heremai tirama haukia hanona maearima herekiai tirama haukia ihobokia. 'A Tirama hanona aia ibabua 'auna hauna. Ia a'i kehabo 'abaeanimi baihobo weiana emi tabura nitara haona haunai a'i tomo'eho marikina. Ba baihobo tua'ina raninai, ia taeara ha kebenimi katokapare, weianai katokori 'ini.

<sup>14</sup> Ua buonai, e'u raona'au haumi e, kaiba'uku ikuti aikia hanona katobabonakia. <sup>15</sup> Wai hanona aobero haumi nahina benimi, e'u 'abi kipomi abomo katobabataina au taba na'uahina. <sup>16</sup> 'Ere weiana Obiapaka ena anito'u aonai naha'ina ba Tirama namo 'abina nahabena hauna nahainu raninai, aika ikoikai Keriso aruaruna nahainu haeamo. Abomo Parawa nahahobina ha ha nahani raninai, aika ikoikai Keriso hauanina nahani haeamona. <sup>17</sup> Parawa hanona hamona Keriso hauanina, aika hanona habo'o ia hauani hanona hamona, pokina aika ikoikai parawa weiana hamona nahani haeamona. <sup>18</sup> Isaraela haukia ekia hoahoa kaharaonana, itara robenai tekine mahikia tiani haukia ikoikai hanona itara robenai akana tibabai haeamo.

<sup>19</sup> Au taba na'uahina, baibeni tabana weiana kaiba'uku tibena hauna hanona mai anina, 'u? Abomo kaiba'uku hanona tirama tohana, 'u? <sup>20</sup> Aha'i 'akina. Rama haeai haukia ekia baibeni hanona auba ki'a obokia 'eukia, ia Tirama 'euna aha'i. Au nanuatae wai auba ki'a obokia kipokia a'i katobahaeamo. <sup>21</sup> Wai Obiapaka ena 'ereai toinu haumi auba ki'a obokia ekia 'ereai a'i katoinu. Wai Obiapaka ena itarai tuani haumi auba ki'a obokia ekia itarai a'i katoaniani. <sup>22</sup> Aika Obiapaka aona kahabahaiarana hanona a'i kenamo, pokina ena puma kebawaira tinana aonai kahakaobo taearana aha'i.

<sup>23</sup> Wai tu'abi "taba ikoikai kahababai hanona ketaina," ia au na'abi ikoikai hanona a'i mo katebanamonaka, wai tu'abi "taba ikoikai kahababai hanona ketaina," ia na'abi ikoikai hanona a'i mo katebarai harainaka eka a'ikakauma aonai. <sup>24</sup> Wai ha kipona ena namo mo a'i ketabuna, ia 'abana baika ekia namo abomo ketabuna. <sup>25</sup> Mahi kawa 'ekana tikawa kawainakia mahikia hanona katoani, ia a'i katobakai bakai weiana hanona kaiba'uku herenai tebaibeni hauna 'ao aha'i, aomi a'i temearo'ari. <sup>26</sup> Pokina Puka robenai tererena 'abana, "Hanopaka mai aonai temiaho tabakia ikoikai hanona Obiapaka 'euna."

Sal 24.1

<sup>27</sup> A'i nia'ikakauma hauna ha kebeauni'o torarua katoaniani ba oi nonuatae koao raninai, wairamuai taba ehoroti haukia ikoikai hanona koani, a'i kobakai bakai

aomu a'i mearo'ari. <sup>28</sup> Ia hau ha kehina beni'o, "Aniani neiana hanona kaiba'uku tebena hauna" raninai, aniani weiana hauna a'i koani, weiana ehina beni'o hauna paunai mai aona a'i mearo'ari paunai. <sup>29</sup> Au a'i na'abi oi haumu nubeho, ia ehina beni'o hauna keraonana oi nubeho.

Weiana hau ha kipona kebakai bakai, aehoma buonai maearima ha ena raonaraonai au e'u bero kebakai bakai aina? <sup>30</sup> E'u aniani Tirama abanamona ba nani raninai, aehoma buonai hau ha au aniani abanamona nani hau'u ne'uahina'u?

<sup>31</sup> Ia taba taba tuani toinu 'ao tubabai, weiakia ikoikai hanona Tirama ena nu'abi ibawaira tinana paunai katobabaina.

<sup>32</sup> Emi miaho aokiai weiakia Iuda haukia, rama haeai haukia 'ao Tirama ena marea maearimakia iba'ehokia akakia a'i katobabai. <sup>33</sup> Wai au nababaina 'abana katobabaina au maearima ikoikai aokia kabanamona taeara ikoikai aokiai. Kipo'u e'u namo a'i natabuna, ia ikoikai ekia namo natabuna, weiana hanona ia bamauri katea'ina paunai.

## 11

<sup>1</sup> Au Keriso ehabaina ihobona nababaina, wai abomo au nababaina ihobona katobabaina.

*Babi'e 'Arakia Katebahu Abuna Hoana Bahuba'ari Aonai 'Abina.*

<sup>2</sup> Au wai nabanamonimi, pokina taba ikoikai aokiai turaona 'ini to'o baihana'u abomo ba'iobi abenimi haukia tua'i 'ininakia. <sup>3</sup> Bariu au nanuatae wai kato'iobi haraina, hau ikoikai 'arakiai hauna hanona Keriso, babi'e 'aranai hauna hanona ia atawana, Keriso 'aranai hauna hanona Tirama. <sup>4</sup> Ua buonai hau ikoikai 'arakia mai ibahu abukia tibahuba'ari 'ao Tirama ena 'abi tehinana hanona 'arakiai hauna Keriso a'i timariki aina. <sup>5</sup> Abomo babi'e 'arana ibahu abu aha'i nibahuba'ari 'ao Tirama ena 'abi nehinana babi'ena hanona atawana ia 'aranai hauna a'i nimariki aina, matoha ia buina terehe obona 'abana. <sup>6</sup> 'A babi'e ha 'arana a'i nibahu abuna raninai, ia hanona buina mekabena. Babi'e buina kerehe obona 'ao buina kekabena hanona mai haumaeana buonai babi'e 'arana hanona kebahu abuna. <sup>7</sup> Hau hanona bahuba'ari aonai 'arana a'i kebahu abuna, pokina ia hanona Tirama ihaihana abomo



ena nuabi nibawaira tinana, 'a babi'e hanona hau ena nuabi nibawaira tinana.

<sup>8</sup> Tirama hanona babi'e hauaninai hau a'i ebabaina, ia hau hauaninai babi'e ebabaina. <sup>9</sup> Haeamona Tirama hanona babi'e paunai hau a'i ebabaina, ia hau paunai babi'e ebabaina. <sup>10</sup> Ua buonai babi'e hanona 'arana kebahu abuna, ba hoa weianai aneru kate'iobina ia hanona atawana ena hiabu ba'anai nemiaho.

<sup>11</sup> Eka mauri Obiapaka aonai haunai, babi'e hanona hau herena a'i kehe ahi ikupaiana a'i kemiaho abomo hau hanona babi'e herenai a'i kehe ahi ikupaiana a'i kemiaho. <sup>12</sup> Babi'e hanona hau hauaninai emai, abomo hau hanona babi'e hauaninai nirama. Ia taba ikoikiai hanona Tirama herenai timai.

<sup>13</sup> Kipomi aba tusuraonana, babi'e 'arana a'i ebahu abuna ba maearima wairakiai nibahuba'ari hanona a'i ebero. <sup>14</sup> Hanopaka maurina aonai aika aba ha'iobina bui homa'ana hau herekiai hanona haumaea tabana, <sup>15</sup> ia bui homa'ana hanona babi'e ena nuabi tabana. Tirama ehore babi'e ebena 'arana ibahu abunai keao. <sup>16</sup> Ia hau ha nenuatae hoahoa neiana kebaihara taeaina re'a, au na'abi natibaha, ai mai Tirama ena marea maearima ikoikiai kipokia heremai hanona kuti hoahoana haeai ha aha'i.

### *Obiapaka Ena Anito'u Robena 'Abina.*

*(Mt 26.26-29; Mk 14.22-25; Lk 22.14-20)*

<sup>17</sup> Bariu e'u ba'iobi 'abina neiana nahina benimi aonai au hanona wai a'i nabamonimi, pokina emi marea to'ukia tua'i haukia hanona babai ki'a bo'ona tibabai ia ekia barai'arai aha'i maearima herekiai.

<sup>18</sup> Kori'uaina hanona wai poumi aona emi marea to'ukia tua'i aokiai hanona hoa tuhore, 'abi neiana papana nabatoha 'apuana. <sup>19</sup> (Hoa hore hanona katerama a'i keaha'i ba weianai 'abi tohana tehinana haukia hanona kahaiha tinanakia.)

<sup>20</sup> Weiana paunai 'eka hamonai tusuto'u ani robe tua'ina, iamo weiana hanona Obiapaka ena aniani robena a'i tuani. <sup>21</sup> Pokina tuani raninai, ha ha emi aniani mo tuani 'abami a'i to'imanakia, weiana buonai baika hanona mare'a ti'ari 'a baika teinu 'ari. <sup>22</sup> Emi ituai patoaniani mai patoinu. Tirama ena marea haukia tubataeainakia mai herekia taba aha'i haukia tuba haumaeainakia. Aea kahinabe aihonimi? Turaonana aka neiana

tubabaina hanona kabanamonimi, 'u? Aha'i 'akina.

<sup>23</sup> Ba'iobi neiana wai abenimi hauna hanona Obiapaka herenai a'ina hauna ihobona. Hinahinana ehina rabinai Obiapaka Iesu parawa ea'ina, <sup>24</sup> namo 'abina Tirama herenai ehinana. Epua hanona parawa ehobina ba e'abi etibaha, "Neiana hanona au hauani'u nabaibeni wai 'eumi. Na katobabai aiho au iraona 'ini'u." <sup>25</sup> Teianiani murinai taeara ihobonai mo 'ere ea'i taeana ba e'abi etibaha, "Ere neiana hanona Tirama ena 'abi'uai apa'uana mahamahana, au e'u 'ari aruarunai nabatohana. Neiana katobabaina katoinu au iraona 'ini'u ranikia ikoikiai aokiai." <sup>26</sup> Parawa neiana tuana mai 'ere neianai toinu ranikia ikoikiai, wai hanona Obiapaka ena 'ari pouna tohinana keaomo ia kemai.

<sup>27</sup> Ua buonai, hau ha ena raona a'i ebero aonai parawa keana 'ao 'ereai keinu raninai, ia hanona aba ebeho Obiapaka hauanina mai aruaruna herekiai.

<sup>28</sup> Weiana paunai hau ha kipona aona ketabu harai 'uaina ba parawa keana mai 'ereai keinu. <sup>29</sup> Pokina ia parawa niana mai 'ereai neinu iamo Obiapaka hauanina a'i nibabatana raninai ia hanona Tirama ena bakai anianina niana mai inuina neinu. <sup>30</sup> Weiana buonai, wai bo'omi hanona toinawa, tu'abe'abe abomo bo'okia aba te'ari. <sup>31</sup> Ia aika kipoka aoka kahatabu harai 'uaina raninai, Tirama ena bakai aonai a'i kahatoto. <sup>32</sup> Ia Obiapaka aika nibabakainaka mai puma nibenaka hanona nirobenaka, weiana hanopaka maearimakia kipokia puma a'i kahahoai haeamona paunai.

<sup>33</sup> Ua buonai, uaho'aba'u e, tuto'u Obiapaka ena aniani robena katoani raninai 'abami kato'imanakia. <sup>34</sup> Hau ha mare'a ke'ari raninai, ia hanona ena ituai keaniani ba kemai, weiana katoto'u raninai wai Tirama ena bakai aonai a'i katototo.

'Abi baika hanona muriai au kawahi aonai kahina benimi.

## 12

### *Ibeni Tabakia Auba Robe Herenai Timai.*

<sup>1</sup> Uaho'aba'u e, bariu au e'u nuatae wai Auba Robe ena ibeni tabakia hanona kato'iobi harainakia. <sup>2</sup> Wai to'iobina, a'i toa'ikakauma baha aonai, kaiba'uku

weiakia a'i timauri mauri haukia tehore te'uai ainimi abomo tebaka'a parenimi. <sup>3</sup>Ua buonai au wai nahina benimi, Tirama ena Auba ena baraibarai ai ni'abi'abi hauna hanona Iesu a'i neururu aina a'i netibaha, "Iesu hanona eki'a," abomo Auba Robe ena baraibarai ea'ina hauna pinanai ni'abi netibaha, "Iesu hanona Obi-apaka."

<sup>4</sup>Auba Robe ena ibeni tabakia hanona haeai haeai, iamo Auba Robe hamona mo weiana nihore nibaibeni. <sup>5</sup>Obiapaka ena aka ibabaikia taearakia hanona haeai haeai, iamo Obiapaka hamona mo ta'arana naha'i. <sup>6</sup>Maearima eka mauri aonai Tirama ena aka taearakia hanona haeai haeai, iamo Tirama hamona mo nihore ena maearima ikoikai iriara nibenaka ia ena aka kahababai. <sup>7</sup>Auba Robe nihore a'ikakauma maearimakia ha ha hiabu nibenakia hanona Tirama ena marea maearimakia ikoikai ibaraikia ekia namo paunai. <sup>8</sup>Auba Robe nihore hau ha aobero 'abikia nibena kehina, Auba Robe ihobona mo weiana nihore ha aotipa 'abikia nibena kehina. <sup>9</sup>Auba Robe ihobona mo weiana nihore hau ha a'ikakauma nibena, Auba Robe hamona mo weiana nihore ha inawa ibanamokia hiabuna nibena inawa 'ao haiara kebanamonakia. <sup>10</sup>Auba Robe weiana nihore hau ha hiabu nibena bata'uta'u huri hoakia kebabai, ha hanona mahabanai 'abikia kehina, haeamona ha hiabu nibena auba haeai haeai ekia haeai kehina pouna, ha hiabu nibena maea haeai haeai ke'abi, ha hanona hiabu nibena maea haeai haeai tehinana anikia kea'i banainakia. <sup>11</sup>Taba neiakia ikoikai hanona Auba Robe hamona ia ikupaiana nibabainakia, ia nihore maearima ikoikai ha ha ibeni haeai haeai nibenakia ia kipona ena nuatae ihobonai.

### *Aika Ikoikai Hanona Hauani Hamona Puapuana.*

<sup>12</sup>Maearima hauanina hanona hamona, iamo 'ete'etena hanona ebo'o, ba 'ete'etekia weiakiai hanona hauani hamonai teara 'au. Ba Keriso abomo uamo homana. <sup>13</sup>Ihobonaimo aika ikoikai Iuda haukia 'ao Helene haukia, ta'ara'i haukia 'ao ta'ara a'i tia'i haukia Auba Robe hamona ehore hauani hamonai eba'uere robenaka, aika ikoikai hanona Auba Robe hamona ha'ina aokai nemiaho.

<sup>14</sup>Maearima hauanina hanona 'etena hamona aha'i ia 'etena ebo'o. <sup>15</sup>Ba ae pe'abi petibaha, "Au hanona ima aha'i buonai au hanona hauani 'etena ha aha'i," ba 'abi weiana pehinana re'a ae hanona hauani 'etena ha ai a'i keibao taearana aha'i. <sup>16</sup>Mai haia petibaha, "Au hanona maha aha'i buonai, au hanona hauani 'etena ha aha'i," ba 'abi weiana pehinana re'a haia hanona hauani 'etena ha ai a'i keibao taearana aha'i. <sup>17</sup>Ba hauani maikoinai maha ai peao raninai, aia aea peo'o aihona? 'Ao hauani maikoinai haia ai peao raninai, timi aea peo aihona? <sup>18</sup>Ua homana aha'i. Tirama ena nuatae ihobonai hauani 'etena ikoikai 'ekakia tohakiai ehorotinakia ba ha ha ekia aka tohakia katebabai. <sup>19</sup>Ba 'ete ikoikai hanona 'ete hamonai pateao raninai, hauani hanona ae'e? <sup>20</sup>Hauani hanona ua homana aha'i. Hauani hanona hamona ia 'etena hanona ebo'o.

<sup>21</sup>Ua buonai maha hanona ima a'i kehina benakia a'i ketibaha, "Au wai a'i nanuatae ainimi," 'Ara abomo ae a'i kehina benakia a'i ketibaha, "Au wai a'i nanuatae ainimi." <sup>22</sup>Aha'i. 'Ete weiakia huaniai ti'abe'abe haukia pateaha'i raninai hauani hanona a'i keaka harai. <sup>23</sup>Abomo hauani 'etena baika naharaonana ekia aka a'i teapa'ua haukia naha'ima harainakia, 'a 'ete weiakia nahahaumaeai haukia hanona habuniai nahabahu abu harainakia. <sup>24</sup>'A 'etekia ihakia tenamo haukia hanona robakia a'i naha ahunakia. Tirama hauani na eabai aihona hanona 'ete ikoikai ebahamonakia hauani hamonai, te'abe'abe haukia abomo ne'ima harainakia. <sup>25</sup>Ua buonai hauani aonai hanona hoa hore aha'i, ia 'ete ikoikai hanona katebahaeamo ha ha katebarai barai. <sup>26</sup>Ba 'ete ha kehaiara raninai 'ete ikoikai hanona ia kipokia katehaiara haeamo, ba 'ete ha atana katebanamona raninai ikoikai ia kipokia kateamamo haeamo.

<sup>27</sup>Bariu wai ikoimiai hanona Keriso hauanina, ba wai ha ha hanona ia hauanina 'etena ha. <sup>28</sup>Tirama ehore ena marea aonai maearima ea'i taeanakia, kori'uaina hanona iuhubeau haukia, ibaruana hanona mahabanai haukia, ibaihauna hanona ba'iobi haukia, ba hiabu hoakia haeai haeai katebabai haukia, ia murikiai hanona inawa katebanamo haukia, baika barai barai haukia,

baika 'uai haukia, ba weiakia maea haeai haeai kate'abi haukia. <sup>29</sup> Ia ikoikiai hanona iuhubeau haukia mo aha'i, ikoikiai hanona mahabanai haukia mo aha'i. Ikoikiai hanona ba'iobi haukia mo aha'i. Ikoikiai hanona hiabu hoakia katebabai haukia mo aha'i. <sup>30</sup> Ikoikiai hanona inawa katebanamo haukia mo aha'i. Ikoikiai maea haeai haeai kate'abi haukia mo aha'i. Ikoikiai maea haeai haeai anikia katea'i banai haukia mo aha'i. <sup>31</sup> Auba Robe ena ibeni apa'uakia haukia katonuatae ainakia.\*

Bariu au kahore taeara namona tohana hauna kabaihanimi.

## 13

### *Raona'au.*

<sup>1</sup> Au maea haeai haeai mai aneru maeakiai pa'abi re'a, iamo here'uai raona'au aha'i raninai, au hanona matoha kapa 'ao irarabu weiakia tiahau 'urukiamo tebua haukia 'abakia. <sup>2</sup> Au mahabanai ibenina pa'ina 'ao Tirama ena 'abi bunikia mai aotipa ikoinai pa'iobinakia, abomo e'u a'ikakauma petabura ki'a baha kobio paba ibiunakia re'a, iamo here'uai raona'au aha'i raninai, au hanona taba aha'i. <sup>3</sup> E'u taba ikoikiai uraru haukia pabenakia, abomo hauani'u pabaibeni 'abaea irubai patehuhuna pe'ara obo re'a, iamo here'uai raona'au aha'i raninai, weiakia ikoikiai ekia namo aha'i au here'uai.

<sup>4</sup> Raona'au hoana hanona bakiro mai rabo harai, raona'au hoana hanona a'i niwamuru 'ao a'i nibaro'e 'ao a'i niapa.

<sup>5</sup> Raona'au hoana hanona a'i nibapairi pairi, a'i eani ki'a, a'i niopuere noanoa mai maearima ekia beho a'i niraona 'ini.

<sup>6</sup> Raona'au hoana hanona aka ki'a a'i niaonamo aina, 'a ia hanona bero akana niaonamo aina. <sup>7</sup> Raona'au hoana hanona taba ikoikiai aokiai a'i nihaba'au, ena a'ikakauma a'i ni'abe'abe, rani ikoinai buabeniai nemiaho mai nibapahihi taba ikoikiai aokiai.

<sup>8</sup> Raona'au hanona kemiaho ba-naibanai. Mahabanai 'abikia katehina iamo aba katepua, maea haeai haeai kate'abi iamo aba katepua, aotipa 'abikia katehina ia abomo aba katepua. <sup>9</sup> Pokina eka aotipa hanona teko'iko'i mai eka mahabanai 'abikia teko'iko'i mo a'i tebero 'au

harai, <sup>10</sup> ia ebero 'auna tohana kemai raninai, weiakia a'i tebero 'au harai haukia hanona kate'akauma. <sup>11</sup> Au miori'uai raninai e'u 'abi'abi, e'u raonaraona, e'u 'iobi ikoikiai hanona temiori, 'a bariu au aba ahau aonai miori ekia hoahoa weiakia ikoikiai aba ahabonakia. <sup>12</sup> Taba bariu nahaiha hanona matoha oreore 'abu'abunai oreoreka nahaihana 'abana, muriai hanona katewaira tina harai kahaiha harainakia. Taba ikoikiai bariu hanona papakia mo na'iobinakia, 'a muriai hanona ka'iobi 'aunakia, matoha Tirama au e'iobi 'auna'u 'abana. <sup>13</sup> Bariu taba aihau neiakia hanona katemiaho banaibanai, a'ikakauma, buabeni, mai raona'au. Ia neiakia aihau baiatakiai apa'uana 'akina hanona raona'au.

## 14

### *Mahabanai Ibenina Mai Maea Haeai Ni'abi Ibenina.*

<sup>1</sup> Raona'au taearanai katoka'a, Auba Robe ena ibeni tabakia hanona katonua ki'ainakia, iamo mahabanai ibenina katonuataeai apa'uana weianai Tirama pouna katohinana. <sup>2</sup> Pokina hau ha maea haeai ai ni'abi hanona maearima a'i nehina benakia ia Tirama nehina bena, 'abi tohana ena 'abi obokia a'i kateobo, ia hanona taba bunikia nehinanakia Auba Robe ena hiabuai. <sup>3</sup> Ia nimahabanai hauna hanona Tirama ena 'abi nehinana maearima herekiai, nibarainakia, aokia nibataburana, abomo aokia nibakirona.

<sup>4</sup> Hau weiana maea haeai ni'abi hauna ia kipona mo nibaraina, ia nimahabanai hauna hanona Tirama ena marea maearimakia ikoikiai nibarainakia. <sup>5</sup> Au nanuatae ikoimiai maea haeai haeai kato'abi iamo e'u nuatae tohana hanona katomahabanai, nimahabanai hauna hanona epa'ua ba maea haeai haeai ni'abi hauna, pokina maea haeai weiana kea'i banai hauna aha'i raninai Tirama ena marea maearimakia ikoikiai ibaraikia taearana aha'i. <sup>6</sup> Uaho'aba'u e, au pawahi heremiai maea haeai haeai pa'abi, iamo 'abi weiakia Tirama ebawaira tina haukia, aotipa 'abikia, mahabanai 'abikia, 'ao ba'iobi 'abikia baika a'i pawahi ainakia raninai, maea haeai ai ka'abi ena namo hanona taba wai heremiai? Ena namo aha'i tohana.

\* 12:31: (31) 'ao tonuatae ainakia.

<sup>7</sup> Ihobona taba baika a'i timauri mauri ia 'uru nahababuana tabakia weiakia, remoremo 'ao kita, 'urukia a'i katebero harai raninai maearima aea kate'iobi aihona hui tabana 'uruna tibabuana. <sup>8</sup> Ihobona huari pihina neubaina hauna pihia a'i keubai haraina raninai tai keba'oru huari kekori abuna? <sup>9</sup> Heremiai abomo uamo homana, wai maeamiai 'abi a'i katohina harai raninai hau ha aea ke'iobi aihona wai taba to'uahina? Weiana hanona wai aba tu'abi 'abaea 'abi 'abaea mo. <sup>10</sup> 'Abi tohana hanopaka neiana maikoina aonai maea haeai haeai hanona tebo'o, ba ikoikiai mo hanona mai anikia. <sup>11</sup> Hau ha maea weiana nehinana ba au a'i na'iobina raninai, ni'abi hauna hanona au here'uai hanopaka haeai hauna, au abomo hanopaka haeai hau'u ia herenai. <sup>12</sup> Heremiai abomo uamo homana. Wai tonuatae ki'a baha Auba Robe ena ibeni tabakia katoa'inakia buonai, ibeni weiakia Tirama ena marea maearimakia katebarainakia mai kateba taburanakia haukia katonoi ai taburanakia Tirama herenai.

<sup>13</sup> Maea haeai ni'abi hauna hanona mebahuba'ari Tirama menoina 'abi ia'i banaikia me'iobina ba 'abi nehinanakia haukia kea'i banainakia. <sup>14</sup> Pokina au maea haeai nabahuba'ari raninai, auba'u hanona nibahuba'ari ia au ao'u hanona nemiaho 'abaea. <sup>15</sup> Ba au taba kababaina? Au auba'u ai kabahuba'ari hanona ao'u ai abomo kabahuba'ari. Au auba'u ai kahui hanona ao'u ai abomo kahui. <sup>16</sup> Ba oi aubamuai Tirama namo 'abina nubena raninai, maearima 'abaeana ha emu namo 'abina bahuba'arina weiana obona a'i keobo hauna "Amen" aea kehina aihona. <sup>17</sup> Emu namo 'abina bahuba'arina Tirama herenai hauna enamo ki'a baha, ia maearima baika hanona a'i nibarainakia. <sup>18</sup> Au namo 'abina Tirama herenai nahinana, pokina au rani bo'okia maea haeai haeai nahina ba wai ikoimiai. <sup>19</sup> Au nanuatae Tirama ena marea to'una aonai maea haeai haeai 'abi taha harau haea (10,000) a'i kahinana, ia 'abi ima obokia kateobo haukia kahinanakia katebarainakia ekia 'iobi kerama.

<sup>20</sup> Uaho'aba'u e, taba neiakia herekiai miori ekia raonaraonai a'i katoraonaraona ainakia, 'a ki'a ibabaikiai wai hanona miori 'oru'orukia 'abakiai katoao, ia emi raonaraonai wai hanona hau apa'uakia

'abakiai katoao. <sup>21</sup> Puka robenai na erere aihona, "Obiapaka ni'abi netibaha, maea haeai haeai haukia mai hanopaka haeai haukia pinakiai au kahore maearima neiakia herekiai e'u 'abi kahinana. Iamo Iuda haukia neiakia hanona au aia'u a'i kateona."

Isa 28.11, 12

<sup>22</sup> Ua buonai maea haeai kate'abi hanona a'i tia'ikakauma haukia kate'iobina hoa weiana hanona Tirama herenai ni-mai, ia tia'ikakauma haukia paukiai aha'i, iamo mahabanai hanona a'ikakauma haukia hoa weianai ekia a'ikakauma katetabura, ia a'i tia'ikakauma haukia paukiai aha'i.

<sup>23</sup> Weiana Tirama ena marea maearimami ikoimiai katoto'u aonai, maea haeai haeai kato'abi ba maearima taba neiakia obokia a'i tiobo haukia mai a'i tia'ikakauma haukia to'u weiana aonai a'ikakauma haumi maea haeai haeai tu'abi aiama kateona raninai, ia kate'abi wai hanona tubeau 'ari. <sup>24</sup> Ia ikoimiai mahabanai 'abikia katohina aonai, maearima taba neiakia obokia a'i tiobo haukia 'ao a'i tia'ikakauma haukia aiama kateona raninai kate'iobina ia hanona ki'a haukia. Ba 'abi teona hauna kehore ia keba bakainakia, <sup>25</sup> ia ekia raona bunikia ikoikiai katekere, ba katekute Tirama katebanamona kate'abi katetibaha, "Abi tohana Tirama hanona neia wai baiatamiai."

### *Tirama Ena Marea Ena Aka Paipana.*

<sup>26</sup> Ua buonai, uaho'aba'u e, taba na kahahoma? Wai tuto'u tubahuba'ari hanona hui ha tua'ina, ha ba'iobi nibaibeni, ha hanona Tirama taba ha herenai ebawaira tinana hauna pouna nehinana, ha maea haeai ni'abi, abomo ha hanona maea haeai 'abina weiana nia'i banaina. Taba neiakia ikoikia tubabai hanona Tirama ena marea maearimakia ibaraikia mai ibataburakia. <sup>27</sup> Maea haeai tu'abi raninai, maearima hamona, rua 'ao aihau mo kato'abi, ia rani hamonai a'i kato'abi, ha ke'abi 'uai ba ha murinai ko'abi, abomo hau ha kehore 'abi tohinana hauna kea'i banaina. <sup>28</sup> Ia maea haeai 'abikia ia'i banaikia hauna aha'i raninai, maea haeai ai ni'abi hauna a'i ke'abi aota marea to'una weiana aonai, ia kipunamo herenai mai Tirama herenai ke'abi. <sup>29</sup> Mahabanai



hamona, rua 'ao aihau mo kateiroro ba 'abakia baika hanona 'abi weiakia tehina haukia kateraonaraona ainakia. <sup>30</sup> Tirama ena 'abi ha kemai temiati tibahu haukia ha herenai kewaira tina raninai, weiana eiroro 'uai hauna ke'oro ba Tirama ena 'abi emai hauna aiana kateona. <sup>31</sup> Taeara neianai mahabanai haumi ikoimiai hamo hamo Tirama ena 'abi katohinana, weiana maearima ikoikiai kate'ioibina abomo katetabura. <sup>32</sup> Mahabanai 'abikia katehinanakia haukia ia kipokia pinakia kate'imanakia keaomo ekia rani ketaina ba kate'abi. <sup>33</sup> Pokina Tirama hanona bahuahurea Tiramana aha'i, 'a ia hanona baibua Tiramana. Tirama ena maearima ekia marea to'ukia ikoikiai aokiai tibabaina 'abana, <sup>34</sup> babi'e hanona a'i kate'abi marea to'ukia aokiai. Ia hanona ekia bero aha'i a'i kate'abi, Mose ena rauhuhu e'abi ihobona ia hanona a'i katepoki. <sup>35</sup> Babi'e tenuatae taba ha kate'ioibina raninai ekia ituai ua'a atawakia katebakainakia, pokina babi'e ha Tirama ena marea to'unai ke'abi hanona mai haumaeana. <sup>36</sup> Turaonana Tirama ena 'abi hanona wai Korinto haumi heremiai ekarahi? 'Ao waimo ikupaiami paumiai emai? Aha'i 'akina. <sup>37</sup> Hau ha niraonana ia hanona mahabanai hauna 'ao Auba Robe ena ibeni ha ea'ina hauna, ia ke'ioibi haraina au taba narere benimi haukia hanona Obiapaka ena rauhuhu 'abina. <sup>38</sup> 'A ia rauhuhu neiakia a'i kea'i taeanakia raninai wai abomo ia aiana a'i katoa'i taeanana. <sup>39</sup> Ua buonai, uaho'aba'u e, mahabanaiai Tirama ena 'abi ihinana hanona katohau aroaina, ia maea haeai kate'abi haukia a'i katoba'oronakia. <sup>40</sup> Taba ikoikiai hanona taeara beronai haeamona paipakia tohakiai katobabainakia.

## 15

### *Keriso Ena Mikiri Mue.*

<sup>1</sup> Uaho'aba'u e, bariu au nanuatae pou namona airoro aina heremiai hauna toa'ina weiana ahanai emi a'ikakaumai tikori 'ini hauna kabaraonanimi. <sup>2</sup> Pou namona weiana heremiai airoro aina hauna katoa'i 'inina hanona bamauri katoa'ina, weiana hanona wai a'i tua'ikakauma 'abaea. <sup>3</sup> Au pou namona a'ina hauna wai abenimi, neiana hanona taba apa'uana 'akina.\* Weiana Keriso hanona aika

eka ki'a paukiai e'ari Puka robenai tererena ihobona, <sup>4</sup> weiana ia tehorena, ba wapu ibaihaunai emikiri mue emauri Puka robenai tererena ihobona. <sup>5</sup> Ia hanona Petero† herenai ewaira tina 'uai muriai iuhubeau haukia harau haea rua herekiai ewaira tina. <sup>6</sup> Weiana murinai ia hanona a'ikakauma haukia hinabu ima abihana ikoikiai rani hamonai herekiai ewaira tina, maearima weiakia bo'ona hanona bariu timauri ohomo, 'a baika hanona aba te'ari. <sup>7</sup> Ba ia ewaira tina Iakobo herenai, muriai iuhubeau haukia ikoikiai herekiai ewaira tina.

<sup>8</sup> Orena 'akinai hanona here'uai abomo ewaira tina, au hanona rama taearana tohanai a'i arama hau'u. <sup>9</sup> Iuhubeau haukia ikoikia baiatakiai au hanona ako'iko'i 'aki, ba au e'u bero aha'i kateaparina'u iuhubeau hau'u, pokina au Tirama ena marea maearimakia a'oatanakia. <sup>10</sup> Ia Tirama ena aoko'o hoana paunai au hanona iuhubeau hau'uai naeao, mai ena aoko'o hoana ebena'u hauna buona a'i eaha'i. Au hanona aka ki'a baha ba iuhubeau haukia ikoikia, iamo weiana hanona au kipo'u a'i aka, 'a Tirama ena aoko'o hoana au here'uai hauna ebatabarana'u aka. <sup>11</sup> Weiana buonai au airoro aina 'ao iuhubeau haukia baika teiroro aina re'a, ia Iesu e'ari haeamona emikiri mue pouna ai tairoro aina hauna wai toa'ikakaumana.

### *Aika Eka Mikiri Mue.*

<sup>12</sup> Bariu ai hanona Keriso 'ariai emikiri mue hauna pouna tairoro aina, ba aehoma buonai wai baika tu'abi 'ariai a'i katemikiri mue na tuhoma? <sup>13</sup> Ba 'ariai mikiri mue aha'i raninai Keriso abomo 'ariai a'i pemikiri. <sup>14</sup> Keriso 'ariai a'i pemikiri raninai, ai emai iroro hanona anina aha'i, ba wai emi a'ikakauma abomo anina aha'i. <sup>15</sup> Weiana ahanai, ai hanona aba bai'oi haumaiai pataeao pokina Tirama pouna tahinana ia hanona Keriso 'ariai ebamikiri muena. Ia 'ariai mikiri mue aha'i raninai, Tirama abomo Keriso 'ariai a'i pebamikiri muena. <sup>16</sup> Pokina 'ariai mikiri mue aha'i raninai, Keriso abomo a'i pemikiri mue. <sup>17</sup> Ba Keriso a'i pemikiri mue raninai, wai emi a'ikakauma hanona anina aha'i, wai hanona ki'a aonai patomiaho ohomo.

\* **15:3:** (3) 'ao kori'uaina. † **15:5:** (5) 'ao Geba

18 Ba neiana anina hanona Keriso tea'ikakaumana te'ari haukia hanona aba pate'akauma. 19 Bariu hanopaka maurina neiana ikupaiana mo paunai eka buabeni Keriso herenai hahorotina raninai, aika hanona pateako'oai ki'a bahanaka ba hanopaka maearimafia ikoikiai.

20 Iamo 'abi tohana Keriso hanona 'ariai emikiri mue. Weiana hanona 'ari haukia ekia mikiri mue hoana kori'uaina. 21 'Ari hanona maearima hamona ena babai paunai emai, ihobonai 'ariai mikiri mue abomo maearima hamona ena babai paunai nimai. 22 Adamu ena babai ki'a paunai maearima ikoinai ti'ari, ihobonai Keriso ena babai harai paunai maearima ikoikiai katemaui. 23 'A mikiri mue paipana tohanai Tirama kehore ha ha kebamikiri muenakia. Kori'uaina hanona Keriso, muriai hanona ia ena mai mue raninai weiakia Keriso tia'ikakumana haukia.

24 Weiana murinai hanopaka puana kemai. Rani weianai Keriso kehore auba ki'a obokia ekia poki haukia ikoikiai, obia haukia ikoikiai, mai hiabu haukia ikoikiai keba pururunakia, ba ia ena obia aiarana kebamuena Hamana Tirama imanai keutana. 25 Keriso hanona keobiai kemiaho keaomo Tirama kehore 'ou haukia ikoikiai Keriso 'apuna ba'anai kehorotinakia. 26 'Ou hauna orena Iesu kehore keba pururuna hauna hanona 'ari. 27 Puka robenai na e'abi aiho, "Tirama taba ikoikiai ia 'apuna ba'anai ehorotinakia." "Taba ikoikiai' na niho hanona aika naha'iobi haraina Tirama kipona hanona Keriso 'apuna ba'anai aha'i, Tirama ehore taba ikoikiai Keriso 'apuna ba'anai ehorotinakia. 28 Taba ikoikiai Nahuna ena iha'ini ba'anai teao ore murinai, Nahuna kipona kehore keaoaina Hamana ena iha'ini ba'anai kemiaho. Ba taba ikoikiai hanona Tirama kepokiai ore haraina.

29 Mikiri mue peaha'i raninai, maearima weiakia tiba'uere robenakia aba te'ari haukia irakonakiai hanona taba tebuabena paunai ua tihoma? 'Ari haukia a'i katemikiri mue toha raninai, aeahoma buonai weiakia tiba'uere robenakia 'ari haukia paukiai? 30 Aehoma buonai ai rani ikoinai 'arimo wairamaiai nemiaho hauna a'i tata'u aina? 31 Uaho'aba'u e, weiana emi mauri Keriso Iesu aonai hauna au napaina paunai 'abi tohana nahina benimi. Au

hanona 'ari mo waira'uai nemiaho rani ikoinai. 32 Au Epesoai maearima weiakia matoha mahi aibarakia 'abana haukia kipokia maearima ekia raona paunai ta'au raninai, ena namo hanona taba au here'uai? 'A 'ari haukia a'i katemikiri mue raninai, 'abi neiana rani ikoinai tehinana hauna hamababaina, "Aika hamaniani mo, hamainuinu mo, pokina mara hanona kaha'ari."

33 Ua ti'abi aiho haukia a'i teme'oinimi. "Maearima ki'a obokia kipokia bahaeamona hanona emi hoahoa namokia kea'i ki'anakia." 34 Tomoraona raona harai ki'a akakia tomohabonakia, pokina neiana nahinana hanona keba haumaeanimi, wai baika hanona Tirama a'i to'jobina.

### *Mikiri Mue Hauanina Hanona Haeai.*

35 'A hau ha kebakai bakai ketibaha, "Ari haukia aea katemikiri mue aiho? Hauani tabanai kateao?" 36 Neiana hanona po'o bakai bakaina. Uho tubatona hauna a'i ke'ari 'uai raninai, ia hanona a'i kemaui. 37 Taba nubatona hauna hanona uho 'abaeana, pa'e witi uhona 'ao uho haeai ha, ia matiu weiana ke'omu hauna maikoina a'i nubatona. 38 'A Tirama nihore uho weiana hauanina ha nibena ia ena nuatae ihobonai, ia nihore uho ha ha hauanikia tohakia mo nibenakia. 39 Mauri tabakia hauanikia ikoikiai hanona ihobo aha'i. Maearima hauanikia haeai, mahi hauanikia haeai, roborobo hauanikia haeai, maia hauanikia abomo haeai. 40 Kupa tabakia hauanikia ikoikia, mai hanopaka tabakia hauanikia abomo ikoikia. Ia kupa tabakia hauanikia ekia nuabi hanona haeai, hanopaka tabakia hauanikia ekia nuabi abomo haeai mo. 41 Beraura ena nuabi hanona ehaei, nawa abomo ena nuabi haeai mo, bihiu ekia nuabi abomo ha mo. Ba bihiu ha ha ekia nuabi abomo haeai haeai mo.

42 Ba 'ari haukia katemikiri mue abomo uamo homana, hauani nahahorena aonai ia hanona nipari ni'akauma, 'a kemikiri mue hanona kemaui banaibanai a'i keki'a. 43 Nahahorena aonai, ihana eki'a abomo e'abe'abe, 'a kemikiri mue aonai ihana hanona kenuabi abomo ketabura. 44 Hanopaka hauaninai nahahorena, nemikiri mue hanona auba hauaninai.

Hanopaka hauanina ha ikoina, mai auba hauanina abomo ha ikoina. 45 Puka robenai aba tererena 'abana, "Hau kori

'uaina Adamu hanona ibabai maearima maurimaurina." 'A Adamu murihaina hauna Keriso hanona auba mauri ni-baibeni hauna. <sup>46</sup> Auba hauanina a'i emai 'uai, ia hanopaka hauanina e'uai ba murinai hanona auba hauanina emai. <sup>47</sup> Hau kori'uaina Adamu hanona hanopaka apuroronai ebabaina, 'a hau ibaruana Keriso hanona kupai emai. <sup>48</sup> Hanopaka haukia hanona hanopakai emai hauna ihobona, kupa haukia hanona kupai emai hauna ihobona. <sup>49</sup> Hanopakai emai hauna ihaihanai nahaeao ihobona, aika abomo kupai emai hauna ihaihanai kahaeao.

<sup>50</sup> Uaho'aba'u e, au taba na'uahina hauna neiana, hauani weiana bitio mai aruaruai erama hauna Tirama ena obia aiaranai a'i kekatoto, abomo hauani ke'ari hauna hanona a'i kemaui bannaibanai. <sup>51</sup> Tomobahu, au taba bunina ha naba'iobinimi, aika ikoikai hanona a'i kaha'ari ore, ia aika ikoikai Tirama kehore kebaheainaka, <sup>52</sup> kenoanoa ki'a baha matoha maha nahahaba 'ununa 'abana pihi orena ke'arara aonai. Pihi 'uruna kebua raninai Tirama kehore 'ari haukia kebamikiri muenakia a'i kate'ari haukia kateao, ba aika ikoikai kebaheainaka. <sup>53</sup> Pokina hauani kepari hauna kebaheainaka a'i kepari haunai keao, abomo hauani ke'ari hauna kebaheainaka a'i ke'ari haunai keao. <sup>54</sup> Ba hauani kepari hauna kehaei hauani a'i kepari haunai keao abomo hauani ke'ari hauna kehaei hauani a'i ke'ari haunai keao raninai, Puka robenai tererena 'abina hanona ketohana,

"Tirama ehore 'ari ena hiabu ebapururuna 'ari ebapua baihana."

Isa 25.8

<sup>55</sup> "Ari e, oi koba'ari hiabuna hauna ae'e?  
'Ari e, oi kobahaiara hiabuna hauna ae'e?"

Hos 13.14

<sup>56</sup> 'Ari ena bahaiara hiabuna hanona ki'a herenai nia'ina, 'a ki'a ena hiabu hanona rauhuhu herenai nia'ina. <sup>57</sup> Namu 'abikia Tirama kahabena! Ia ehore aika herekai 'ari ena hiabu ebapururuna eka Obiapaka Iesu Keriso haunai.

<sup>58</sup> Ua buonai, uaho'aba'u ki'ami e, katokori 'ini, tai ha a'i kebaibiunimi, rani ikoinai Obiapaka ena aka katobabai to'o

baihana, pokina wai to'jobina Obiapaka ena aka tubabaina hanona a'i tuaka 'abaea.

## 16

*Tirama Ena Maearima Ibaraikia Monina.*

<sup>1</sup> Bariu wai Tirama ena maearima Iudeai temiaho haukia ibaraikia paunai moni katobararo 'abina hanona neiana, Tirama ena marea maearimikia Galatia hanonai temiaho haukia ahina benakia moni tebararo taearana ihobona katobabaina. <sup>2</sup> Hui ha ha wapukia kori'uaikia ikoikai aokiai wai ha ha emi itabu ahi ihobonai moni papakia baika katohore parenakia katobararona keapa'ua, ba au kawahi raninai moni bararo ha a'i kahababaina. <sup>3</sup> Au heremiai kakara'au raninai toa'i taeanakia haukia poukia ihinana marerena karerena kabenakia ba kahauhunakia, emi beruberu monikia kateaoainakia Ierusalem. <sup>4</sup> Ba au ia kipokia kataeao hanona kenamo raninai, ia au kate'abana'u kipokia kataeao.

*Paulo Ena Raona Eba'orunakia Haukia.*

<sup>5</sup> Au naraonana Makedonia hanona kakabanai 'uai ia kaihanakia murinai kawahi heremi. <sup>6</sup> Au rani papana wai heremiai kamiaho 'ao kahamiaho keaomo 'ama ranina keore, ba e'u kaoao 'ekakia ha ha kaeao aokiai wai katobaraina'u. <sup>7</sup> Au a'i nanuatae bariu e'u kabanai aonai noanoai wai kaihanimi. E'u buabeni hanona Obiapaka kenuatae raninai rani homa'ana kipokia pahamiaho. <sup>8</sup> Ia au hanona neiamo Epeso aiaranai kamiaho keaomo Pentekoste ranina kea'ina. <sup>9</sup> Pokina Tirama ena aka taearana pa'abina aba ekaikauna ena aka rarina neia kababaina. Iamo i'oata'u haukia abomo ebo'o.

<sup>10</sup> Timoteo kewahi heremi raninai ka-toa'i taearana, aona katobakirona kipokia katomiaho a'i meta'u, ia hanona Obiapaka ena aka nibabaina hauna au ihobo'u. <sup>11</sup> Hau ha ia ia'itaeana a'i kebaaoao aina, ia katobaraina katouhuna mai baibuana kemai, ba ia kemue kemai here'u, au hanona ia nabahubahu aina uaho'abaka baika kipokia katemue katemai.

<sup>12</sup> Uaho'abaka Apolo ena pou hanona nahomana, abahi ahi taburana uaho'abaka baika kipokia katewahi, ia bariu hanona a'i enuatae, muriai rani

namona ha aona ketaina hanona aba kewahi.

*Banamo 'Abina Orena.*

<sup>13</sup> Kato'ima 'ima harainimi, emi a'ikakaumi katokori 'ini, aomi katobanua ko'onakia, abomo katotabura. <sup>14</sup> Tirama mai maearima katoraona'au ainakia, hoahoa neianai emi aka ikoikia katobabai.

<sup>15</sup> Wai to'iohina Akaia hanona aonai Stefano mai ena itu haukia kipokia hanona teraonakabe 'uai Tirama ena maearimai teao ba ia kipokia ekia mauri tebaibeni Tirama ena marea maearimania tebarainakia. Uaho'aba'u e, au hanona wai nabahi ahinimi, <sup>16</sup> a'ikakauma haukia uahomakia mai baika ia kipokia tiaka haemo tibarainakia haukia aiakia katonu.

<sup>17</sup> Stefano, Forotunato mai Akaiko temai hanona ao'u enamo, pokina wai tokapare aonai ia hanona wai 'ekami tea'ina.

<sup>18</sup> Ia tehore e'u ao aro'ari teba'orona, wai emi ao aro'ari abomo teba'orona. Maearima uahomakia hanona kaha'itaea harainakia.

<sup>19</sup> Tirama ena marea maearimania Asia hanona aonai haukia ekia banamo 'abikia teuhunakia heremi, Akula mai Priskila ekia banamo 'abina abomo Obiapaka atanai teuhuna, mai Tirama ena marea maearimania ia ekia itu aonai tito'u haukia ekia banamo 'abina abomo teuhuna. <sup>20</sup> Uaho'abaka neia temiaho haukia ikoikia ekia banamo 'abikia teuhunakia. Wai ha ha kipomi baipau robenai\* katobanamonimi.

<sup>21</sup> Au Paulo kipo'u ima'uai e'u banamo 'abina neiana narerena.

<sup>22</sup> Hau ha Obiapaka a'i niraona'au aina hauna ia hanona ururu aonai kemiaho.

*Obiapaka e, 'Omai!†*

<sup>23</sup> Nabahuba'ari Obiapaka Iesu ena aoko'o hoana heremiai kemiaho. <sup>24</sup> E'u raona'au hanona wai ikoimia heremiai Keriso Iesu aonai. Amen.

\* 16:20: (20) 'ao Obiapaka aonai † 16:22: (22) Marana Ta!



## Paulo Ena Marere Ibaruana KORINTO Haukia Herekiai

### *Puka Aona Irerena 'Abina*

Korinto aiaranai ba'iohi haukia bai'oikia ekia 'abi ki'a obokia Paulo herenai tehina hanona a'ikakauma haukia ekia a'ikakauma tea'i ki'ana. Hoahoa neianai hanona Paulo ena raona raona ia ahakiai hanona eapa'ua ki'a baha. Ena nuatae hanona 'abi 'ao ba'iohi bai'oina neiana Korinto haukia herekiai kebaberonā, weiana paunai marere neiana ererena, ia kipokia kateonamo haeamo mue.

Puka neiana paipana kori'uaina aonai Paulo ehore 'abi pahihikia tohokia baika ehina pounakia 'abi weiakia Korinto maearimākia ebeni 'uainakia haukia. Paulo enuatae ia hanona ua a'i ke'abi aiho, iamo ekia apa, baro'e ai mai ia teiha 'ama'amana paunai 'abi pahihikia tohokiai ehina benakia. Korinto haukia 'abi neiakia aiana kateo'o ba katebatohanakia mai ekia hoahoi kateraona kabe hanona aonamo kerama.

Rani weianai abomo a'ikakauma haukia Iudeai hanona ekia mauri teki'a. Ua buonai Paulo baraibarai monikia baika ebararonakia, keaoainakia kebenakia. Weiana buonai Korinto haukia aokia niba taburanakia, aka neiana paunai moni baika katebaibeni (8–9).

Puka orenai hanona Paulo e'abi, ba'iohi haukia bai'oikia baika teao tibaki'ana. Ena nuatae apa'uana hanona Korinto haukia ba'iohi bai'oikia weiakia aiakia a'i kateo'o.

### *Puka Paipana Apa'uakia*

- a. Roba iahu. (1.1-11)
- b. Paulo mai Tirama ena marea haukia Korintoai. (1.12–7.16)
- c. Beruberu tabakia a'ikakauma haukia Iudeai 'eukia. (8.1–9.15)
- d. Paulo iuhubeau hauna ena hiabu. (10.1–13.10)
- e. 'Abi orekia. (13.11-14)

### *Banamo 'Abina.*

<sup>1</sup> Au Paulo Keriso Iesu ena iuhubeau hau'u Tirama ena nuatae paunai, mai a'ikakaumai uaho'abaka Timoteo ohi marere neiana tarerena niwahi Tirama

ena marea haumi Korinto aiaranai tomiaho abomo Tirama ena maearima ikoimiai Akaia hanona maikoina aonai tomiaho haumi heremiai. <sup>2</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho.

### *Tirama Hanona Ao Bakiro Ikoinei Pokina.*

<sup>3</sup> Tirama kahabanamona aika eka Obiapaka Iesu Keriso hamana. Ia hanona aoko'o mai ao bakiro ikoinei pokina Tiramana. <sup>4</sup> Emai aro'ari ikoikiai ia ehore aomai ebakironakia, weiana buonai Tirama aomai ebakironakia ihobonai bariu tiaro'ari haukia aokia katabakirona abomo ketaina. <sup>5</sup> Pokina Keriso ehau haiara ihobonai ai abomo rani bo'ona tahu haiara, ba rani bo'ona ao bakiro 'eumai niapa'ua Keriso paunai. <sup>6</sup> Ai katahau haiara hanona wai aomi ibakirona mai ibamaurimi paunai, ai aomai ebakirona wai aomi abomo ebakirona, pokina ao bakiro weianai tabura katoa'ina haiara weiakia herekiai katokori 'ini ai hau haiara aokiai takori 'ini 'abana. <sup>7</sup> Emai buabeni heremiai hauna ekori 'ini, pokina ai ta'iohina kipokia nahahau haiara ihobonai ai mai wai kipokia aoka ebakironakia.

<sup>8</sup> Uaho'abamai e, ai tanuatae Asia hanonai taro'ari haukia kato 'iohinakia. Ai hau haiara tahoinakia hanona teapa'ua ki'a baha abomo tepuma ki'a baha, ai katamauri hauna a'i tabuabeni 'apuana. <sup>9</sup> Ai kipomai aomaiai taonobaina hanona aba kata'ari. Ia neiana erama hanona ai kipomai haumaiiai a'i kata'ikakauma paunai, 'a 'ariai nibamikiri muenakia Tiramana ikupaianamo kata a'ikakaumana paunai. <sup>10</sup> Ia ehore 'ari ki'a obona herenai ebamaurinaimai abomo ebamaurinaimai. Haeamona ia tabuabena ebamauri muenamai. <sup>11</sup> Wai abomo katobarainamai emi bahuba'ari ai. Ba bahuba'ari bo'okia weiakia paukiai Tirama keba namonamai, weiana maearima bo'okia katehore namo 'abikia Tirama katebena ai paumaiiai.

### *Paulo Ena Raona Eba'oruna Hauna Eba-haeaina.*

<sup>12</sup> Emai apa hanona neiana aomai tohanai tabatohana, emai mauri hanopakai abomo emai baihatia'a wai kipokia

hanona mai robena mai berona Tirama 'eunai. Ai neiana tababaina hanona hanopaka ena aobero ai aha'i, ia Tirama ena aoko'o hoana hiabunai. <sup>13</sup> Ai wai katotuabina mai obona katobo hauna mo tarere benimi, nanuatae maikoina kato'iobi haraina. <sup>14</sup> Wai bariu obomai a'i tuobo harai re'a au nanuatae wai ai kato'iobi harainamai, weiana eka Obiapaka Iesu Keriso ena mai raninai ai wai tapainimi ihobonai wai ai katoapainamai.

<sup>15</sup> Au neiana a'iobi haraina paunai, weiana e'u raona abakorina kawahi 'uai heremi banamo ibaruana katoa'ina. <sup>16</sup> E'u raona aba'oruna hanona kawahi heremi ba kaeo Makedonia, haeamona Makedoniai kamue hanona kamai heremi, ba wai katohore katobaraina'u kaeo Iudea. <sup>17</sup> Wai turaonana e'u raona weiana aba'oruna raninai 'ama'amanai abakorina, u? 'Ao hanopaka raonaraonanai ababaina ba rani hamonai 'e mai aha'i ahinana, u? Aha'i 'akina. <sup>18</sup> Tirama hanona aia ibabua 'auna hauna, ihobonai emai 'abi ewahi heremi hauna hanona rani hamonai 'e' mai 'aha'i' a'i tahnana. <sup>19</sup> Sila,\* Timoteo mai au wai baiatamiai tairoro aina hauna Tirama Nahuna Iesu Keriso hanona rani hamonai 'e' mai 'aha'i' a'i ehinana, ia aonai hanona rani ikoinai 'abi tohana 'e' mo nemiaho. <sup>20</sup> Pokina Keriso hanona Tirama ena 'abi'uai ikoikia eba tohanakia. Weiana buonai Iesu Keriso paunai 'Amen' nahahinana Tirama atana kahabanamona. <sup>21</sup> Wai mai ai kipokia Keriso aonai ebakori 'ininaka hauna hanona Tirama. Ia ehore ebahiabunaka. <sup>22</sup> Ia ena hoa haukai ehore 'auna aika hanona ia 'euna abomo ena Auba Robe aokai ehorotina weiana hanona keba maurinaka hoana.

<sup>23</sup> Au Tirama atanai na'abi abomo ia ao'u e'jobina, a'i marobenimi aomi a'i mabahaiarana buonai a'i awahi Korinto. <sup>24</sup> Ai wai emi a'ikakauma a'i katapoki aina pokina emi a'ikakauma etabura, ia ai hanona wai kipokia nahaka haeamo aomi ibanamona paunai.

## 2

<sup>1</sup> E'u raona abakorina hanona a'i kawahi heremi aomi a'i mehaiara taaranai. <sup>2</sup> Pokina au wai aomi kabahaiarana hanona tai kehore au kebaonamona'u? Ia wai mo naiami aomi aba abahaiarana haumi. <sup>3</sup> Weiana paunai marere naiana

arerena, au kawahi raninai wai au katobaonamona'u haumi aomi a'i mabahaiarana marikina. Pokina au a'iobi haraina au kaonamo hanona wai ikoimiai abomo katoaonamo. <sup>4</sup> Arere benimi raninai ao'u ehaiara abomo epuma maha'u mai beina, weiana hanona aomi kabahaiarana paunai aha'i ia kaba'iobinimi au wai naraona'au ainimi.

### *Heremai Beho Tebabi Haukia Ekia Beho Katohina Hao.*

<sup>5</sup> Hau ha ehore 'abana aona ebahaiarana hanona au ao'u mo a'i ebahaiarana ia wai ikoimiai aomi ebahaiara 'apuana. Au a'i ka'abi pahihiki'a baha ia herenai. <sup>6</sup> Hau weiana ena ki'a 'arana wai bo'omi tohore puma tobena hanona abataina. <sup>7</sup> Bariu hanona ena ki'a katohina hao abomo aona katobataburana, aona a'i mebahaiara ki'a bahana ta'una. <sup>8</sup> Ua buonai au wai nanoinimi, wai ia turaona'auai tohana hoana katobaihana. <sup>9</sup> Marere weiana arere benimi ena poki tohana hanona au ka'jobina aia'u tuka'ai tohana rani ikoinai, 'ao aha'i. <sup>10</sup> Wai hau ha ena ki'a katohina hao hanona au abomo ena ki'a kahina hao. Au—ia kahina hao paunai—ena ki'a ahina hao weiana hanona Keriso wairanai ababaina wai paumiai. <sup>11</sup> Weiana hanona Satani kehore a'i me'oinaka marikina, pokina aika hanona ena baihobo akakia aba ha'jobinakia.

### *Paulo Ena Nuatae Tito Keihana.*

<sup>12</sup> Au aeao Toroa aiarana Keriso ena pou namona kairoro aina aonai taeara ikaikau au weia Obiapaka ena aka kababaina. <sup>13</sup> Ia ao'u hanona a'i enamo pokina uaho'abaka Tito weia a'i atabu ahina, haparua ahinana maearima weia haukia herekiai ba aeao Makedonia.

### *Aika Hanona Timi Namona Keriso Herenai Nimai.*

<sup>14</sup> Iamo Tirama namo 'abina nabena pokina Keriso nihore rani ikoinai ne'uai ainamai ena mauri taburana aonai katamiaho, ai Keriso pouna namona katairoro aina kate'jobina 'eka maikoinai matoha timi namona nirama otaraina 'abana. <sup>15</sup> Ai hanona timi ha 'abana Tirama wairanai Keriso herenai nimai weiakia timauri mai ti'akauma haukia baiatakia. <sup>16</sup> Weiakia ti'akauma haukia

\* **1:19:** (19) 'ao *Silvano*

herekiai ai hanona timi ki'a obona 'ari kemaiaina, weiakia timauri haukia herekiai ai hanona timi namona mauri kemaiaina. Tai etaina aka neiana kebabaina? <sup>17</sup> Ai hanona bo'okia 'abakia aha'i, ia hanona Tirama ena 'abi kawakawa tabanai tibaona, 'a ai hanona 'abi tohana tairoro aina mai aomai tohanai Tirama wairanai mai Keriso aonai ihobona Tirama euhunakia haukia 'abana.

### 3

#### *'Abi'uai Mahamahana Ena Aka Haukia.*

<sup>1</sup> Turaonana ai kipomai tapani muenamai, u? 'Ao baikā tibabaina 'abana, baikā herekiai ai ibanamomai marerekia katanuatae ainakia kata'i katawahi heremi, 'ao wai heremiāi ibanamomai marerekia kata'i kataeao baikā herekia? Aha'i 'akina. <sup>2</sup> Wai hanona ai emai marere, aomaiai tererena maearima ikoikiai te'jobina abomo tetuabina. <sup>3</sup> Ewaira tina harai wai hanona Keriso ena marere, ai tamaiaina, umu ai a'i ererena ia mauri Tiramana ena Auba Robeai ererena, pihara ahanai a'i ererena ia maearima aonai ererena.

<sup>4</sup> Ai na tapani aihō pokina Tirama wairanai weiana tabatohana Keriso paunai. <sup>5</sup> Ai hanona a'i ta'abi kipomai emai taburai aka neiana tababaina, 'a tabura weiana hanona Tirama herenai nimai. <sup>6</sup> Tirama ehore 'abi'uai apa'uana mahamahana akana katababaina haukia ebaonamai, 'abi'uai mahamahana neiana hanona rauhūbu pukanai tererena hauna aha'i ia Auba Robe 'euna. Rauhūbu irere hauna hanona 'ari kemaiaina ia Auba Robe hanona mauri kebenaka.

<sup>7</sup> Rauhūbu pihara ahanai ererenakia ba Mose ebena raninai Tirama ena nuabi ewaira tina Mose wairanai ea, ea ki'a baha buonai Isaraela haukia a'i teiha 'ariai 'ariaina, ba rani a'i ehoma'a ea weiana mahari mahari e'akauma. Rauhūbu weiana 'ari nimaiaina hauna nuabi uahomana aonai emai raninai, <sup>8</sup> Auba Robe ena aka weiana mauri nimaiaina hauna nuabina hanona aea keapa'ua aihō! <sup>9</sup> Maearima beho 'ekakiai kehorotina akana enuabi raninai maearima bero kebenakia akana nuabina hanona aea keapa'ua aihō! <sup>10</sup> Nuabi 'uaina hauna enuabi, iamo nuabi apa'uana mahamahana emai hauna paunai nuabi weiana hanona matoha a'i enuabi. <sup>11</sup> Taba emiaho 'apua hauna mai nuabina raninai, kemiaho

banaibanai tabana nuabina hanona aea keapa'ua aihō!

<sup>12</sup> Emāi buabeni neiana paunai ta'abi tabura. <sup>13</sup> Mose hanona mukoai wairana e'aeana pokina Isaraela haukia ea weiana ni'akauma hauna a'i temeihana paunai. Ai hanona aka uahomana a'i tababaina. <sup>14</sup> Aokia hanona tekaiahu toha abomo bariu rani neianai rauhūbu 'ai'aina pukana tetuabina aonai ia aokia hanona muko hamona weianai tekaiahuakia. Hau ha Keriso ena mauri aonai ketoto hanona muko weiana kekapare. <sup>15</sup> Bariu rani neianai abomo Mose ena rauhūbu katetuabina raninai, muko hanona aokia nikaiabu ohona mo. <sup>16</sup> Ia hau ha keao Obiapaka herena raninai, muko ia herenai hauna aba ia'i obo. <sup>17</sup> Obiapaka hanona Auba, ba Obiapaka Aubana ae'eai hanona aika rauhūbu herenai ha'abaea. <sup>18</sup> Aika ikoikai wairakai muko keirubu Obiapaka ena nuabi kahabawaira tinana matoha oreore 'abana, ba aokai Obiapaka Aubana niaka hanona aika ia ihobo ihobonai nahaeao nuabi niapa'ua hao apa'ua hao hauna aonai. Obiapaka hanona Auba, ia nihore aka neiana nibabaina.

### 4

#### *Keu Namona Puou Aonai 'Abana.*

<sup>1</sup> Tirama ena aoko'o ai aka neiana ebenamai tababaina, ua buonai ai aomai a'i ni'abe'abe. <sup>2</sup> Ai bunianai haumaea akakia tababai haukia aba tane'e, ai bai'oi akakia a'i tababai abomo Tirama ena 'abi a'i tahina haeaina. Ia 'abi tohana tahina karahi haraina, weianai maearima aokia tohanai kate'jobina ai maearima aea homamai Tirama wairanai. <sup>3</sup> Ia pou namona tairoro aina hauna maearima herekiai ebuni raninai, pa'e weiakia mo kate'ari haukia herekiai ebuni. <sup>4</sup> Satani hanopaka neiana tiramana nihore a'i tia'ikakauma haukia aokia nikaiabuakia paunai, pou namona eana weiana Keriso ena nuabiai nibawaira tinana hauna a'i teiha tinana. Keriso hanona Tirama ihobo ihobona hauna.

<sup>5</sup> Ai kipomai poumai a'i tairoro aina, ia ai tairoro ta'abi Iesu Keriso hanona Obiapaka, abomo ai hanona emi ta'ara'i haumai Iesu paunai. <sup>6</sup> Tirama e'abi etibaha, "Wapura aonai ea merama." Ba Tirama weiana ehore ena eai ai aomai ebaeana,

Tirama ena nuabi Keriso wairanai ewaira tina hauna obona taobo mai taihana.

<sup>7</sup> Ai hanona puou 'abana, aomai kepu namona neiana nemiaho, weiana nihore nibaihanakia hiabu apa'uana hanona Tirama herenai nimai, ia ai heremai ai a'i nimai. <sup>8</sup> Taeara bo'okia haeai haeai ai tibetetuanamai iamo a'i ta'eho, taba bo'okia aomai tibaror'arinakia iamo aomai a'i ni'abe'abe. <sup>9</sup> Bo'okia ti'oatanamai iamo Tirama ai a'i ehabonamai, rani bo'okia tiahunamai tiba'ehonamai iamo a'i taki'a. <sup>10</sup> Nahomanai rani ikoinai hauanimai Iesu ena 'ari tabuana, weiana hanona Iesu ena mauri ai hauanimai nemiaho hauna kewaira tina paunai. <sup>11</sup> Ai tamiaho emai mauri aonai rani ikoinai Iesu paunai 'ari tawairana, weiana hanona ai hauanimai neiana ke'ari hauna aonai Iesu ena mauri kewaira tina. <sup>12</sup> Weiana paunai 'ari hanona ai aomai niaka, ia mauri hanona wai aomai niaka.

<sup>13</sup> Puka robenai na erere aihona, "Au a'ikakauma paunai, a'abi." A'ikakauma hoana hamona weianai, ai abomo ta'ikakauma paunai, ta'abi. <sup>14</sup> Ai ta'iohina Tirama, eka Obiapaka Iesu 'ari ai ebamikirina hauna, kehore ai abomo Iesu kipokia kebamikiri haeamonamai, ba wai mai ai kipokia keaoainaka ia herenai kahakoroti. <sup>15</sup> Taba neiakia ikoikiai hanona wai emi namo paunai tababainakia, weiana Tirama ena aoko'o hoana maearima bo'ona bo'ona ketabu ahinakia, ba namo 'abikia bo'ona Tirama katebena, atana katea'i taana.

#### *A'ikakauma Taearanai Nahamauri.*

<sup>16</sup> Ua buonai aomai a'i nira'ora'o. Hauanimai hanona ni'abe'abe, iamo aomai hanona rani ha ha nimaha maha. <sup>17</sup> Hau haiara papana neiana bariu rani papana tahoaina hauna kehore nuabi rarina 'akina mai banaibanaina hauna kemaiana, nuabi weiana hanona eapa'ua ki'a baha ba hau haiara neiana. <sup>18</sup> Ua buonai mahaka hanona taba nahaihanakia haukia herekiai a'i kemiaho ia a'i naha ihanakia tabakia haukia kahaiha, pokina nahaihanakia tabakia hanona a'i katemiaho homa'a ia a'i nahaihanakia tabakia hanona katemiaho banaibanai.

## 5

<sup>1</sup> Hauanika hanona itu 'abana, aika ha'iohina eka itu neia hanopakai na-

hamiaho aina hauna katekakina kupa ai itu ha Tirama kehore kebenaka, weiana hanona maearima imakiai a'i tebabaina ia Tirama kipona ebabaina ituna kemiaho banaibanai. <sup>2</sup> Aika bariu hauanika ituna neianai nahamiaho aina naha'arara 'arara, eka nuatae apa'uana hanona eka itu kupai hauna weiana mauri hauanina pahabatotona habuni 'abana. <sup>3</sup> Aika habuni weiakia kahaba totonakia raninai, mai hauka a'i katetabu ahinaka. <sup>4</sup> Hanopaka ituna hauanika neianai nahamiaho oho aonai nahapuma hoai naha'arara 'arara hanona hanopakai hauanika habunina pahabakuri ahina paunai aha'i, ia mauri hauanina habunina kupai hauna pahabatotona paunai, weiana mauri hauanina kehore 'ari hauanina 'ekana kea'ina mauri banaibanai hauaninai keao. <sup>5</sup> Tirama hanona aka neiana aika 'eukai eba'oruna, ia ehore Auba Robe ebenaka aka neiana wairai kerama hauna ibatohana.

<sup>6</sup> Ua buonai aika rani ikoinai aoka nitabura. Aika ha'iohina hauanika neianai nahamiaho aonai Obiapaka nemiaho 'ekana herekai hanona atau'ai. <sup>7</sup> Aika hanona a'ikakauma taearanai nahamauri, ia taba nahaiha paukiai aha'i. <sup>8</sup> Aika aoka nitabura abomo eka nuatae tohana hauanika ituna neiana kahahabona kahaeao Obiapaka kipokia kahamiaho. <sup>9</sup> Hauanika ituna neianai kahamiaho 'ao kahahabona, 'abi na aha'i, eka nuatae apa'uana tohana hanona Obiapaka aona kahabaonamona. <sup>10</sup> Pokina aika ikoikai Keriso ena bakai apa'uana wairanai kahakoroti kebabakainaka, ha ha namo 'ao ki'a hauani maurinai hababai ihobonai 'arana kaha'ina.

#### *Baibua Akana Kahababaina.*

<sup>11</sup> Ai ta'iohina Obiapaka aea kahata'uai aihona paunai maearima tabahi ahinakia. Tirama e'iohi harainamai, ba au nabuabenimi wai abomo aomi tohanai ua pato'iohi aihonamai. <sup>12</sup> Ai hanona heremiai kipomai ibanamomai a'i tahina muena, ia ai hanona wai bero namona tabenimi katoapainamai, ba weiakia maearima ihaihana mo tiapaina ia aokia a'i tiraona harai haukia ekia 'abi katobamuena. <sup>13</sup> Emiai babai mai emai 'abi'abi matoha po'o haukia 'abana raninai weiana hanona Tirama atana



paunai, ia ai taotipa raninai weiana hanona wai paumiai. <sup>14</sup> Weiana hanona Keriso ena raona'au ehore ai ebahi ahinamai. Ai ta'iohi haraina hau hamona aika ikoikai paukai e'ari, weiana anina aika ikoikai ia kipokia ha'ari. <sup>15</sup> Keriso maearima ikoikiai paukiai e'ari weiana hanona bariu temiaho haukia ia kipokia ekia miahoai a'i katemaui, 'a Keriso ia paukiai e'ari haeamona emikiri hauna paunai katemaui.

<sup>16</sup> Ua buonai bariu rani neianai niaoaina ai hau ha hanopaka ena raonaraona taaranai a'i kata'uahina, 'uainai Keriso hanona ua ta'uahi ahona ia bariu hanona ua homana a'i taraonana. <sup>17</sup> Hau ha Keriso aonai nemiaho raninai, ia hanona aba maearima mahamahana, mauri 'ai'aina aba ekapare ia aba maearima mahamahanai eao. <sup>18</sup> Taba neikia ikoinai hanona Tirama ebabainakia. Tirama ehore ia mai aika baiataka ebabaibuana Keriso paunai, ba baibua akana ebenaka maearima kahamai ainakia ia ena hauai kateao. <sup>19</sup> Tirama ehore Keriso aonai ia mai hanopaka maearimania baiatakia ebabaibuana, maearima ekia ki'a a'i etuabinakia. Ba baibua 'abina neiana ebenamai katahinana. <sup>20</sup> Ua buonai ai hanona Keriso pinanai taeao, Tirama hanona ai pinamaiai nehina benimi. Ai Keriso atanai wai tahina benimi. Wai Tirama kipokia katobaibua. <sup>21</sup> Keriso hanona ki'a hauna aha'i, 'a aika paukai Tirama ehore ki'a haunai\* ebaona, weiana aika hanona Keriso aonai bero haukai kahaeao Tirama wairanai.

## 6

### *Tirama Ena Aka Haukia Hanona Atetua Aokiai Katebapahihi.*

<sup>1</sup> Ai Tirama kipokia taka haeamo hau mai tabahi ahinimi, Tirama ena aoko'o hoana toa'ina hauna a'i katobaki'ana. <sup>2</sup> Pokina Tirama e'abi etibaha, "E'u nuatae ranina tohanai aiami aona, abomo bamauri beraurana tohanai abarainimi."

Isa 49.8

Au wai nahina benimi Tirama ena nuatae ranina weiana hanona bariu, bamauri beraurana weiana abomo bariu.

<sup>3</sup> Hau ha aona a'i tamabakai'au kai'auna, weiana maearima emai aka beho a'i katetabu ahina paunai. <sup>4</sup> Ia wairakiai ai kipomai tabatohanamai ai Tirama ena aka haumai taeara haeai haeai ikoikiai aokiai, weikia ao aro'ari, hau haiara, mai atetua aokiai tabapahihi, <sup>5</sup> te'atinamai, teba wapuranamai abomo to'ukiai tehari abunamai, taka 'ari, a'i taparua harai abomo mare'a ta'ari, <sup>6</sup> emai robeai, aotipai, bapahihi abomo hoahoa namokiai, Auba Robe taburanai mai maearima iraona'auaikiai maearima tabaihanakia ai Tirama ena ta'ara'i haumai. <sup>7</sup> 'Abi tohana tahina karahina, mai Tirama ena hiabuai taka. Bero akakia hanona emai huari tabakia imamai abira abirai ta'inakia.

<sup>8</sup> Baika atamai tea'i taeana baika atamai tea'i ki'ana, tebapo'onamai abomo temariki ainamai, iamo ai Tirama ena aka haumai taeao. Maearima bai'oi haumai tibaonamai, iamo ai hanona 'abi tohana tahinana. <sup>9</sup> Maearima a'i te'iohinamai, ia Tirama ne'iohinamai. Maearima tiraonana aba ta'ari, ia maurimaiai tamiaho. Puma rarina tibahoinamai, ia a'i ta'ari baihana. <sup>10</sup> Aomai tibahaihaina ia rani ikoinai taonamo. Ururu haumai 'abana ia maearima bo'okia tabaobianakia. Heremai taba aha'i moioina, 'a taba ikoikiai hanona ai 'eumai temiaho.

<sup>11</sup> Emai hau Korinto ai haumi e, taba ikoikiai wairamiai tahina pounakia, aomai ikoinai heremai tabawaira tinana. <sup>12</sup> Ai hanona wai taoko'o ainimi ia wai hanona ai a'i tuaoko'o ainamai. <sup>13</sup> Au wai nahina benimi matoha naha'u 'abana, ai tababai heremai ihobona pato babaina heremai, aomi ikoinai heremai kato-bawaira tinana.

### *Aika Hanona Mauri Tiramana Ena Marea Robena.*

<sup>14</sup> A'i tia'ikakauma haukia kipokia a'i katobahaeamo. Bero mai ki'a aea katebahamomo aiho? Ea mai wapura hanona a'i katemiaho hamomo. <sup>15</sup> Keriso mai Tiaporo aokia aea katebahamomo aiho? A'ikakauma hauna mai a'i nia'ikakauma hauna ohi ekia raona hanona hamonai

\* 5:21: (21) 'ao ki'a ia'i obo tabanai

a'i kemiaho. <sup>16</sup> Tirama ena marea robe mai kaiba'uku terarua hanona aea katebamomoma aiho? Aika hanona mauri Tiramana ena marea robena. Tirama kipona na e'abi aiho,

“Au hanona ia kipokia katamiaho oioi, abomo a'i kahabonakia.

Au hanona ia ekia Tiramai kaeao, ia hanona au e'u maearimai kateao.”

Lev 26.12

<sup>17</sup> Ua buonai Tirama e'abi etibaha, “Wai hanona ia tomohabonakia herekiai tomokapare.

Opu akakia a'i katobabai.

Ba au wai ka'i taeanimi.

Isa 52.11; Esk 20.34, 41

<sup>18</sup> Au hanona wai Hamamiai kaeao, wai hanona au naha'u haukia mai babi'ekia ai katoao.

Tabura ikoinai Obiapakana, e'u 'abi neiana.”

2Sam 7.14

## 7

<sup>1</sup> Ua buonai, e'u raona'au haumi ikoimiai e, 'abi'uai neiana herekai ehabaina paunai, huanika mai aubaka tibaopunakia tabakia ikoikiai herekiai kahakapare eka mauri kahabamaha mahanakia, 'a Tirama kahamariki aina eka mauri maikoina ia kahabena kaharobe.

*Paulo Ena Aonamo Korinto A'ikakauma Haukia Paukiai.*

<sup>2</sup> 'Ekamai katohorena aomia. Ai hau ha herenai beho a'i tababaina, hau ha ena a'ikakauma a'i ta'i ki'ana, abomo hau ha a'i ta'oina ena taba a'i ta'i. <sup>3</sup> 'Abi neiana nahinana hanona puma kabenimi paunai aha'i. Ia 'uainai ahina benimi 'abana, ai katamauri 'ao kata'ari re'a wai hanona rani ikoinai aomaiai katomiaho.

<sup>4</sup> Au hanona wai na'i taeanimi mai napai ki'a bahanimi, ua buonai emai hauhaiara aokiai ao'u nitabura abomo naonamo ki'a baha.

<sup>5</sup> Ai Makedonia ai takara'au raninai abomo a'i tarai 'apua, atetua haeai haeai aokiai tamiaho, baika kipokia tabaiara, aomai mai ta'umai tamiaho. <sup>6</sup> 'A ao 'abe'abe haukia aokia niba taburanakia Tiramana ehore Tito euhuna heremaiai ba aomai eba taburanakia. <sup>7</sup> Weiana ena mai mo aha'i, ia wai aona aea to-

batabura aihona pouna taona hanona

aomai etabura, abomo tonuatae katoihana'u, here'uai tobabai ki'a haunai turaona kabe mai emi aka tabura au pau'uai hauna pouna ehina benamai hanona e'u aonamo eapa'ua ki'a baha.

<sup>8</sup> E'u marere weiana atiu ahina heremiai hauna aomi ebaro'arina re'a, bariu au weiana a'i na'arara aina. 'Uainai, rani papana a'arara aina pokina araonana marere weiana aomi ebaro'arina. <sup>9</sup> Ia bariu hanona ao'u ninamo. Weiana aomi tearo'ari paunai aha'i, ia emi ao aro'ari ehore ebaraona kabenimi paunai naonamo. Wai aomi tearo'ari hanona Tirama ena nuataeai erama, ua buonai ai paumaiai ki'a ha a'i totabu ahina.

<sup>10</sup> Ao aro'ari weiana Tirama ena nuataeai nirama hauna hanona maearima aona nibahaeaina nibaraona kabena bamauri ketabu ahina, weiana hauna a'i kaha'arara aina. Ia ao aro'ari hanopaka ena nuatae paunai nirama hauna hanona 'ari kebaramana. <sup>11</sup> Ao aro'ari neiana Tirama ena nuataeai erama hauna paunai heremiai ebaramanakia tabakia katorona harainakia. Toaka harai, emi beho aha'i hauna tobatoha haraina, beho topuere aina, Tirama tota'u aina, raona'au nuataenai toaka, beho tobaberonakia.

Wai 'eka ikoikiai emi beho aha'i hauna tobawaira tinana.

<sup>12</sup> Au arere benimi hanona beho ehabaina hauna 'ao herenai beho erama hauna paunai aha'i, 'a Tirama wairanai wai aea turaona'auai ki'a bahanamai hauna kewaira tina paunai arere benimi. <sup>13</sup> Weiana ehore aomai eatabura haraina.

Weiana mo aha'i, Tito ena aonamo paunai aomai abomo enamo ki'a baha pokina wai tobaraina aona toba namona paunai. <sup>14</sup> 'Uainai au Tito wairanai apainimi, ba wai au a'i tobahaumaeana'u. Tahina benimi tabakia ikoikiai hanona 'abi tohakia, ihobonai mo tobatohana ai Tito wairanai tapainimi hauna hanona 'abi tohana. <sup>15</sup> Tito ena raona'au heremiai hauna niapa'ua ki'a baha, pokina ia niraona 'inina wai ikoimiai aiana toka'aina abomo toa'i taena mai ta'umi mai marikimi. <sup>16</sup> E'u aonamo eapa'ua pokina a'iobi harai ki'a bahanimi wai emi hoahoa tenamo.

*Makedonia A'ikakauma Haukia Mai Aonamokia Beruberu Tebaibeni.*

<sup>1</sup> Uaho'abamai e, ai taba'iohinimi Tirama hanona ena aoko'o hoana ia ena marea maearimania Makedoniai haukia ebenakia. <sup>2</sup> Ia hau haiara rarina aonai temiaho abomo teuraru ki'a baha, iamo mai aonamokia beruberu bo'ona tebaibeni. <sup>3</sup> Au wai heremiai ia nabatohanakia, taba herekia hauna bo'ona tebaibeniaina, abomo kipokia ekia nuataeai tebaibeni banaina. <sup>4</sup> Ia rani bo'ona tenoinamai, ia abokiamo Tirama ena maearima Ierusalemia haukia ibaraikia akana katebabaina. <sup>5</sup> Ekia baibeni weiana hanona eapa'ua ki'a baha ba ai taraonana hauna. Kori'uaina hanona kipokia tebaibeni ainakia Obiapaka eunai kateao, haeamona Tirama ena nuataeai kipokia tebaibeni ainakia ai 'eumai kateao.

<sup>6</sup> Weiana buonai Tito tanoina, ia aba beruberu akana neiana baiatamiai ea'i ramana paunai, kebarainimi keaomo aka neiana katobaorena. <sup>7</sup> Taba ikoikia hana tubabai harainakia, emi a'ikakaumai, emi 'abiai, emi 'iobiai, emi nuataeai, abomo emi raona'au heremai haunai. Ua buonai ai tanuatae beruberu akana neiana abomo katobabai haraina.

<sup>8</sup> Au rauhuhu ha'i nahorotina. Ia e'u nuatae hanona baika ekia baraiarai aea homana hauna kabawaira tinana heremiai ba ka'iohina wai emi raona'au hanona tohana. <sup>9</sup> Wai aba to'iohina eka Obiapaka Iesu Keriso ena aoko'o hoana aea eapa'ua aiho. Ia hanona obia hauna, ia wai paumiai uraru haunai eao, pokina ena uraruai wai kebaobianimi.

<sup>10</sup> Au e'u raona baraiarai akana neiana herenai hana nahomana, wai taba ihau murikai toa'i ramana hauna patobaorena hana mai emi namo. Aka neiana hanona wai toa'i rama 'uaina abomo tobabaina mai aomi ikoinai. <sup>11</sup> Ua buonai bariu aka neiana katobabaina keaomo katobaorena. Ia'iramana tonuatae aina paunai heremiai temiaho tabakia katobaorena. <sup>12</sup> Wai katobaibeni mai nuataemi raninai, Tirama kehore wai heremiai temiaho tabakia katobena haukia kea'i taenakia, 'a taba heremiai aha'i hauna robana a'i keahuna.

<sup>13</sup> Wai heremiai kepuma ba baika herekia ke'ama'ama, weiana hanona e'u nuatae aha'i. Ia nanuatae ha ha ikoikai kahaihobo. <sup>14</sup> Bariu rani neianai

heremi taba tebo'o haumi tekapu haukia katobarainakia, ba wai emi kapu raninai ia ekia taba katebo'o aonai wai katebarainimi. Weiana ikoikia baraiarai ihobona kaha'ina. <sup>15</sup> Puka robenai aba ererena 'abana, "Bo'ona ebararo hauna 'euna a'i ebo'o ki'a baha, bita mo ebararo hauna 'euna a'i ebita 'aki."

*Paulo Aka Haukia Tito Mai 'Abana Ohi Euhunakia Teao Korinto.*

<sup>16</sup> Tirama namo 'abina nabena, pokina emai nuatae katarainimi hauna ihobonai Tito abomo nenuatae. <sup>17</sup> Emi noi ia kewahi heremiai hauna ea'i taenana. Weiana emi noi paunai mo aha'i, ia kipona enuatae ki'a baha kewahi heremi. <sup>18</sup> Uaho'abaka ha tauhuna Tito ohi tiwahi, ia hanona pou namona neiroro aina paunai Tirama ena marea maearima ikoikia tibanamona hauna. <sup>19</sup> Weiana mo aha'i, ia hanona Tirama ena marea haukia tehore tea'i taenana ai ke'abanamai kebarainamai, kipokia eka raona'au baibeni monina neiana kataeaoaina Ierusalemia. Weiana hanona eka nuatae baraiarai akana kewaira tina Obiapaka ena nuabi paunai. <sup>20</sup> Ai ta'ima harainamai pokina ai raona'au baibeni monina rarina neiana kata'imana aonai hau ha beho ha a'i metabu ahina a'i me'abi ki'a paunai. <sup>21</sup> Ai tanuatae aka namona mai berona katababaina Obiapaka mo wairanai aha'i ia maearima wairakiai abomo.

<sup>22</sup> Ba uaho'abaka haeai ha abomo tauhuna kipokia tiwahi, rani bo'okia tahobona ba taihana ia hanona ena nuataeai ebaraiarai. Bariu ia aba e'iohi harainimi aonai nenuatae ki'a baha kebaraiarai.

<sup>23</sup> Tito hanona au 'aba'u taka haeamo wai ibaraimi. Mai uaho'abaka weikia ia kipokia tiwahi haukia hanona Tirama ena marea haukia tea'i taenakia haukia Keriso ena nuabi katebawaira tinana paunai. <sup>24</sup> Ua buonai emi raona'au hoana katoba ihanakia, weiana Tirama ena marea haukia ikoikia katebatohana abomo kate'iohina wai tapainimi hanona ebero.

## 9

*Baibeni Akana Katobabaina Tirama Ena Maearima Ibaraikia.*

<sup>1</sup> Tirama ena marea maearima robekia Iudeai haukia ibaraikia akana pouna

karere benimi hanona a'i nanuatae. <sup>2</sup> Pokina au a'jobina wai tonuatae katobaraibarai, ba a'ikakauma haukia Makedoniai haukia wairakiai apainimi, a'abi atibaha, "Akaia haukia hanona aba ihau murikai teba'oru katebaibeni." Emi baibeni taburana weiana ehore ebahi ahinakia katebaibeni. <sup>3</sup> Bariu uaho'abaka neiakia nauhunakia tiwahi ena poki hanona emai apa wai ahamiai hauna anina a'i meaha'i paunai. 'A au ahina benimi ihobonai wai emi baibeni tabana hanona katoba'oruna. <sup>4</sup> Weiana Makedonia haukia baika kipokia patawahi ba pateihanimi a'i toba'oru raninai, wai patohaumaea mo aha'i, tapainimi hauna paunai ai patahaumaea ki'a. <sup>5</sup> Ua buonai au aranonana kenamo uaho'abaka neiakia kanoinakia kate'uai katewahi heremi emi beruberu tabana to'uahi 'uaina hauna katoba'oruna. Weiana ai katakara'au aonai baraiabarai tabana hanona aba e'oru, weiana kehore kebawaira tinana wai tobaibeni hanona mai aomi ikoinai, ia bahi ahi paunai aha'i.

<sup>6</sup> Katoraona haraina, ube bita 'aki kebatonakia hauna aniani bita 'aki mo keu'aunakia, 'a ube bo'ona kebato hauna aniani bo'ona keu'aunakia. <sup>7</sup> Wai ha ha kipomi emi nuatae ihobonai katobaibeni, ia mai 'arara 'ararami 'ao bahiahi paunai a'i katobaibeni. Pokina Tirama hanona maearima aona namonai nibaibeni hauna niraona'au aina. <sup>8</sup> Tirama hanona herenai etaina ena aoko'o hoana kebenimi hanona kebeni banainimi, ba rani ikoinai taba namokia heremiai kebo'o, weianai wai emi baraiabarai akakia namokia bo'ona katobabainakia. <sup>9</sup> Puka robenai tererena 'abana etibaha, "Ia nihore taba namokia bo'okia uraru haukia nibenakia aona mai beruberunai, ena aka bero hanona kemiaho banaibanai."

Sal 112.9

<sup>10</sup> Tirama weiana nihore biraura hauna ube nibena mai aniani nibena hauna kehore ube bo'ona kebenimi katobato, keba'omunakia, emi aka namokia buabuakia bo'okia kebaramanakia. <sup>11</sup> Ia wai heremiai taba ikoikiai kebabo'onakia ba katobaibeni rani ikoinai. Weiana emi beruberu tabakia kataeaoainakia herekiai hanona maearima bo'ona namo 'abina katehinana Tirama herenai. <sup>12</sup> Baibeni akana neiana tubabaina

hanona Tirama ena maearima robekia ibaraikia akana mo a'i nibabaina, 'a aka neiana kehore maearima bo'ona abomo namo 'abina Tirama katebena. <sup>13</sup> Emi baibeni akana neiana nihore Keriso ena pou namona tohina pouna mai akana tubabaina hauna nibatohana, abomo emi beruberu akana ia herekiai mai maearima ikoikiai herekiai hauna nibatohana, weiana paunai maearima Tirama katebanamona. <sup>14</sup> Kate bahuba'ari wai ahamiai raninai, kateraona ki'a bahanimi pokina Tirama ena aoko'o hoana apa'uana wai heremiai paunai. <sup>15</sup> Namo 'abina Tirama kahabena ena beruberu apa'uana herekai hauna paunai, beruberu weiana pouna 'abiai kahahina hina haraina hanona a'i ketaina.

## 10

### *Paulo Ena Aka Neuhoreaina.*

<sup>1</sup> Maearima baika ti'abi au wai heremiai namiaho hanona na'amari'amari, 'a naeao atau'ai hanona natabura. Au Paulo kipo'u nahore Keriso ena ao 'amari'amari mai ena rabo harai ai nanoinimi, <sup>2</sup> weiakia te'uahinamai ti'abi hanopaka ena taearai tamauri na tihoma haukia herekiai ka'abi pahihi, ia au wai nanoinimi emi babaiai katobero, kawahi heremiai raninai a'i pa'abi pahihi. <sup>3</sup> Hanopaka neiana aonai nahamiaho iamo aika hanona hanopaka haukia tehuari taearanai a'i nahahuari. <sup>4</sup> Eka huari tabakia hanona hanopaka ena huari tabakia 'abakia aha'i, ia Tirama ena huari tabakia taburakia. Weiakia tiaporo ekia miaho 'ekakia pahihikia abomo kateahu 'iti'itinakia. <sup>5</sup> Aika maearima ekia raonaraona bai'oikia mai apa tabakia weiakia Tirama i'jobina taearana tikaibuna haukia nahahu 'iti'itinakia, maearima aokia maikoinai nahaeaoainakia Keriso aiana kateka'aina. <sup>6</sup> Wai ikoimiai Keriso aiana aba tuka'ai ore haraina aonai, ai kataba'oru weiakia aiana a'i tika'aina haukia puma katabahoa ainakia.

<sup>7</sup> Wai hanona taba kapekia mo toihanakia. Hau ha niraonana ia Keriso ena maearima raninai, ia kipona keraona harai 'uaina, pokina ai abomo Keriso ena maearima ia 'abana. <sup>8</sup> Obiapaka hiabu ebenamai hanona emi mauri kataba taburanakia, ia a'i kata'i ki'anakia, ua



buonai hiabu weiana napai ki'a bahana re'a, weiana a'i nahaumaea aina. <sup>9</sup> Au a'i nanuatae wai katoraonana kabata'unimi buonai marere neiakia narerenakia. <sup>10</sup> Hau baika te'abi tetibaha, "Paulo ena marere 'abikia hanona tepuma abomo tetabura, 'a ia kipona tohana nimai herekai hanona ia e'abe'abe ena 'abi abomo te'amari 'amari taba aha'i." <sup>11</sup> Maearima na ti'abi aiho haukia kate'iobi haraina, marere aokiai taba tarerenakia haukia mai ai tohamai katawahi heremiai taba kata babainakia haukia hanona ihobomo a'i tehaeai.

<sup>12</sup> Ai a'i tanuatae maearima weiakia kipokia tiba apa'uanakia haukia kipokia a'i kataba ihobonamai. Ia hanona ekia aotipa aha'i. Ia kipokia baiatakiai ekia babaiai kipokia tibaihobo aina. <sup>13</sup> Ia ai emai apa hanona a'i kekabanai ki'a baha, ia Tirama aka ebenamai katababaina hauna 'ekana aonai mo kemiaho, wai abomo aka weiana aonai totabura. <sup>14</sup> Ai emai apa hanona a'i eao ki'a baha, Keriso ena pou namona tawahiai 'uaina heremiai paunai, emai apa 'ekana a'i takahaboaina. <sup>15</sup> Ua buonai Tirama emai aka 'ekana e'uahina hauna abihanai maearima baika aka ihobona tibabaina hauna a'i tapaina. 'A ai emai buabeni hanona wai emi a'ikakauma keapa'ua ba ai emai aka Tirama e'uahina heremiai hauna abomo keapa'ua. <sup>16</sup> Weiana paunai ai hanona pou namona katairoro aina hanopaka baika weia wai abihamiai maearimakia weiakia tai ha a'i eiroro 'apua 'ekakia haukia herekiai. Pokina hau ha ena aka 'ekana ai aba tebabaina hauna a'i katapaina.

<sup>17</sup> Puka robenai tererena 'abana, "Tai nenuatae keapa hanona Obiapaka taba ebabaina hauna meapaina."

Ier 9.24

<sup>18</sup> Pokina maearima ha kipona namona nehinana hauna Obiapaka ia a'i nia'i taeana, ia Obiapaka kipona nihore maearima nibatohana enamo hauna nia'i taeana.

## 11

### *Paulo Mai Iuhubeau Haukia Bai'oikia.*

<sup>1</sup> Au nanuatae hanona katoiha haona'u, napo'o 'apua re'a, ia tomoiha haona'u. <sup>2</sup> Au hanona wai nauhore

ainimi, matoha Tirama neuhore ainimi 'abana. Wai hanona uaho rari namona 'abana, a'abi'uai ainimi hau hamona katoatawana, weiana hanona Keriso. <sup>3</sup> Ia au ao'u niaro'ari, pokina 'erau ehore Eba e'oina ebahureana ihobonai wai abomimo raona ki'a obokia katehore aomi katebahureanakia Keriso ikutiaina taearana tohana a'i tomohabona. <sup>4</sup> Pokina hau ha nimai Iesu ai tairoro aina hauna aha'i ia Iesu haeai ha neiroro aina hauna a'i tukaiabuna ia tua'i taeana mai aonamomi, abomo Auba Robe mai pou namona heremaiai to'o haukia a'i tua'i taeanakia ia auba haeai mai pou haeaimo neiroro ainakia haukia tua'i taeanakia.

<sup>5</sup> Au naraonana iuhubeau haukia apa'uakia na tiho haukia tiwahi heremi hanona a'i tenamo ki'a baha ba au. <sup>6</sup> Iamo taina, pa'e 'abi'abiai hanona a'i etaina'u, ia aotipai hanona etaina'u, neiana hanona rani ikoikiai mai taeara ikoikiai aokiai tabawaira tina haraina heremiai.

<sup>7</sup> Tirama ena pou namona heremiai airoro aina hanona 'ara'u a'i atabuna, hoa weianai kipo'u aba'aera 'aerana'u wai ka'i taeanimi paunai. Ba weiana hanona ababai ki'a, 'u? <sup>8</sup> Au wai baiatamiai aka aonai, Tirama ena marea haukia baika aiara haeai haukia tebaraina'u, au hanona herekiai moni a'i 'abaeana, weianai wai kabarainimi paunai. <sup>9</sup> Au heremiai ami-aho aonai moniai patobaraina'u paunai a'i abaro'arinimi, uaho'abaka Makedoniai temai hanona taba anuataeai haukia ikoikiai tebena'u. Rani 'uainai ihobona mai rani wairakai, abomo au hanona aro'ari a'i kabeni 'apuanimi. <sup>10</sup> Keriso ena 'abi tohana ao'uai nemiaho hounai, na'abi au e'u apa neiana hauna Akaia hanona maikoina aonai hau ha a'i keba'orona. <sup>11</sup> A'i naraona'au ainimi paunai na na'abi aiho, 'u? Aha'i. Tirama e'ioibina naraona'au ainimi.

<sup>12</sup> Au bariu 'ara a'i natabuna hauna kababai to'ona weiana iuhubeau haukia na tiho haukia baika ekia apa 'abina tehinana tetibaha, "Ia hanona aika kipokia taeara hamonai nahaka," hauna kaba'orona paunai. <sup>13</sup> Pokina hau weiakia hanona iuhubeau haukia tohakia aha'i, ia hanona iuhubeau haukia bai'oikia, ekia akai hanona tibai'oi, abomo ihakia tibiahaeainakia matoha Keriso ena iuhubeau haukia 'abana. <sup>14</sup> A'i kahamaharea,

pokina Satani abomo kipona ihana ebahaeaina matoha ea aneruna 'abana. <sup>15</sup> Ua buonai ena iuhubeau haukia ihakia kateba haeaina matoha bero akana tibabaina haukia 'abana hanona herekiai a'i epahihi. Muriai hanona ekia babai ki'a obokia ihobokiai 'arafia katea'i.

*Paulo Ena Hauhaiara Iuhubeau Akana Aonai.*

<sup>16</sup> Na'abi mue mo, hau ha a'i meraonana au hana po'o hau'u. Ia ua turaona aihona'u raninai, tomoa'i taeana'u matoha po'o hau'u 'abana ba au papana kapa 'apua. <sup>17</sup> Au taba na'uahina hauna Obiapaka herenai a'i emai, apa 'abi'abinai na'abi hanona matoha po'o hauna ha 'abana. <sup>18</sup> Ia maearima bo'ona hanona hanopakai taba taba tebabai haukia tiapainakia, ba au abomo uamo kahoma.

<sup>19</sup> Wai kipomi turaonana toaobero ki'a baha, ua buonai po'o haukia hanona tua'i taeana. <sup>20</sup> Wai hau ha neuhuaou uhuaonimi, ni'oi'oinimi, 'ao nibapo'o po'onimi, heremiai nibaro'e, 'ao wairami nibo'anakia hanona tua'i taeana. <sup>21</sup> Au hanona ua a'i nababai aihou. Wai turaonana au na'abe'abe paunai ua a'i nababaina, 'ao ua a'i nababaina hauna kahaumaeanana, 'u?

Ia hau ha taba ha keapaina raninai, (au na'abi matoha po'o hauna 'abana) au abomo kapa ia 'abana. <sup>22</sup> Ia Heberu haukia, au abomo Heberu hau'u. Ia Isaraela haukia, au abomo Isaraela hau'u. Ia Aberahamo 'aba'abana, au abomo Aberahamo 'aba'abana. <sup>23</sup> Ia Keriso ena ta'ara'i haukia, u? (Au na'abi'abi matoha beau'ari hauna ha,) ia au hanona ta'ara'i hau'u namo'u ba ia. Au hanona aka tabura ki'a baha, rani bo'okia awapura, te'ati ki'a bahana'u, abomo rani bo'okia hereka 'akinai mo pateba'arina'u. <sup>24</sup> Rani ima Iuda haukia i'ati pumakia ikoinai harau aihau 'ababani hamomo (39) tebena'u. <sup>25</sup> Rani aihau Roma haukia matiui te'atina'u, abomo rani hamona piharai teahuna'u. Rani baihau ahi aehe'au haukia teuhu, ba baiatakiai ha hanona wapu hamona maikoina 'aku aonai abure. <sup>26</sup> E'u kaoao bo'okia aokiai au hanona ki'a bo'okia 'eka neiakiai atabu ahi, tou atekia herekiai, bainao haukia herekiai, kipo'u e'u rama haukia mai rama haeai haukia herekiai, ki'a baika hanona

aiara apa'uakia aokiai, hano'akukiai mai 'akupakai atabu ahi, haeamona tihatia'a bai'oina'u haukia herekiai ki'a atabu ahi. <sup>27</sup> Au hanona aka mai aro'ari, rani bo'okia a'i aparua, mare'a a'ari abomo 'ako'u e'ororo, rani bo'ona aniani here'u eaha'i, e'u parua 'ekana eaha'i abomo habuni'u eaha'i. <sup>28</sup> Weiakia mo ikupaiakia aha'i, ia rani bo'ona Tirama ena marea haukia 'eka haeai haeai temiaho haukia i'imakia paunai ao'u niaro'ari. <sup>29</sup> Hau ha ni'abe'abe raninai au abomo na'abe'abe, hau ha ki'a aonai tibakatotona raninai au ao'u nihaiara.

<sup>30</sup> Au kapa raninai, taba weiakia au e'u 'abe'abe tibawaira tinana haukia kapainakia. <sup>31</sup> Tirama e'iohina au a'i nabai'oi. Ia hanona Tirama eka Obiapaka Iesu Keriso Hamana, Ia atana kahabana-mona banaibanai. <sup>32</sup> Au Damaseko ai amiaho raninai obia 'arana atana Areta ena Kabana hauna ehore 'ima haukia aiara apa'uana pa'abina 'akonai ehorotinakia katebirina'u. <sup>33</sup> Ia uaho'abaka baika tehore areha ha aonai teutana'u pihia 'ererenai tebaririna'u, ia herenai abeau 'akaumana.

## 12

*Paulo Ena Mahabanai.*

<sup>1</sup> Apa hana taba namona ha a'i nibaramana, ia au hanona napa mo. Bariu Obiapaka taba baika mahabanaiai mai ibawaira tina taearanai ebaihana'u haukia robakia kahunakia. <sup>2</sup> Ihau harau haeai bani teao aonai au Keriso ena maearima ha a'iohina hauna tea'i taeana teaoaina kupa ibaihauna hauna aonai. (Au a'i a'iohina, neiana hanona hauaninai eao 'ao aubanai eao, Tirama kipona mo e'iohina.) <sup>3</sup> Na'abi mue mo, hau neiana hanona tea'i taeana teaoaina Paradiso aonai. (Au a'i a'iohina, neiana hanona hauaninai eao 'ao aubanai eao, Tirama kipunamo e'iohina.) <sup>4</sup> Abomo weia 'abi baika maearima pinakiai patehina a'i petainakia, mai taba weiakia poukia maearima a'i katehina haukia aiakia eo'o. <sup>5</sup> Au hau neiana hauna kapaina, ia au kipo'u a'i kapaina'u, haeamona taba weiakia e'u 'abe'abe tibawaira tinana tabakia haukiamo kapainakia.

<sup>6</sup> Au panuatae papa raninai, au hanona po'oai a'i paeao pokina au hanona 'abi

tohana pahinana. Ia a'i kapa, pokina au a'i nanuatae wai ha au taba ababai toihana'u mai ahina urukia to'o haukia paukiai a'i tomotibaha au hanona apa'ua ki'a baha.

*Paulo Hauaninai Haiara Ha Emiaho A'i Keapa.*

<sup>7</sup> Taba namoabukia aihanakia paukiai a'i mapa ki'a baha hanona Tirama hauani'uai haiara rarina ha ehorotina keba'orona'u, Satani hanona haiara nei ana aonai niaka keba 'ehona'u abomo keba'orona'u a'i mapa. <sup>8</sup> Rani aihau abahuba'ari Obiapaka anoina haiara nei ana here'uai hauna kea'i obona. <sup>9</sup> Ia Obiapaka ehina bena'u etibaha, "E'u aoko'o hoana ikupaiana mo kabeni'o, pokina oi nu'abe'abe aonai e'u hiabu hanona niapa'ua ki'a baha." Ua buonai e'u 'abe'abe 'ekakiai napa hanona ao'u ninamo ki'a baha, pokina Keriso ena hiabu ai ke'aeana'u paunai. <sup>10</sup> Keriso paunai au na'abe'abe, 'abi ki'a obokia tehina here'uai, tibahau haiarana'u, ti'oatana'u abomo tibatetuana'u aokiai ao'u ninamo. Pokina au na'abe'abe aonai au hanona natabura toha.

*Paulo Ena Aoaro'ari Korinto Haukia Herekiai.*

<sup>11</sup> Wai tobahi ahina'u paunai au nababai matoha po'o 'abana. Wai hanona pou'u namona patohinana haumi. Iamo taina e'u namo aha'i re'a, ia emi iuhubeau haukia apa'uakia na tiho haukia weiakia au a'i tetara haona'u. <sup>12</sup> Au baiatamiai amiaho aonai ao'u abapahihina, hoa haeai haeai mai bata'u ta'u huri akakia mai hiabu hoakia ababai haukia tehore tebatohana'u au hanona Keriso ena iuhubeau hau'u ha. <sup>13</sup> Tirama ena marea haukia 'eka haeai haeiai temiaho haukia herekiai aka ababainakia haukia ihobokia mo wai heremiai ababai. Ia wai heremiai hanona 'ara'u a'i atabuna. Weiana hanona ababai ki'a raninai, e'u ki'a tomohina haona.

<sup>14</sup> Bariu nei ana hanona rani ibaihauna au aba'oru kabaki bakinimi, abomo au hanona a'i kabaro'arinimi. Pokina au hana wai mo nanuatae ainimi, ia emi kepu a'i nanuataeai. Haeamona miori hana hama hina ekia taba a'i kateba'oru, iamo hama hina haukia katehore miori ekia taba kateba'oru. <sup>15</sup> Ua buonai au hanona mai aonamo'u e'u taba ikoikiai kabenimi

mai au kipo'u abomo kabaibeni aina'u wai ibaraimi paunai. E'u raona'au niapa'ua heremiai hanona emi raona'au keko'iko'i here'uai, u? Aha'i, ua a'i kehoma.

<sup>16</sup> Wai ikoimiai to'iohina, weiana au hanona puma a'i abenimi, iamo hau baikia ti'abi au hanona aba haoreanimi bai'oi ai abarewanimi. <sup>17</sup> Aea a'oi aihonimi? Auhunakia haukia herekiai a'oinimi emi taba a'inakia, u? Aha'i, to'iohina au weiana a'i ababaina. <sup>18</sup> Au Tito auhuna ewahi heremi aonai uaho'abaka ha abomo auhuna terarua tewahi, ba Tito e'oinimi emi taba ea'inakia, u? Aha'i, Tito mai au tararua hanona aomai hamonai taka abomo taeara hamonai taka'a.

<sup>19</sup> Wai pa'e turaonana rani ikoinai ai hanona kipomai emai bero taearana heremiai tatabuna, u? Aha'i. Tirama wairanai ai hanona Keriso ena aka haumi 'abi neiakia tahinanakia, abomo taba tababai haukia ikoikiai hanona wai emai hau ki'ami ibaraimi paunai. <sup>20</sup> Au hanona ao'u niaro'ari, pokina kawahi raninai, katabu ahinimi au naraonanimi ihobonai 'ao aha'i, wai abomo au katotabu ahina'u wai turaonana'u ihobonai 'ao aha'i. Au ao'u niaro'ari taba neiakia heremiai a'i matabu ahinakia paunai, baiara mai wamuru, opuere mai ani ki'a, 'abi ki'a mai uahiuahi, apa mai baripuripu. <sup>21</sup> Au hanona ao'u niaro'ari, pokina kawahi mue raninai e'u Tirama kehore keba-haumaana'u wairamiai, bo'okia 'uainai tebabai ki'a hoahoa 'opukiai, ekia nabau ki'ai mai ekia maha poreporeai a'i teraona kabe haukia paukiai kahai.

## 13

*Paulo Ehina benakia A'ikakauma Aonai Katemiaho.*

<sup>1</sup> Neiana hanona rani ibaihauna au kawahi heremi. Puka robenai tererena 'abana, "Beho ha hanona maha iha\* maeirimakia rua 'ao aihau ekia 'abiai kahabatohana." <sup>2</sup> Au e'u bakibaki ibarua heremiai aonai 'uainai tobaho haumi abaraonanimi. 'A bariu atau'ai namiaho aonai harina maikoina haumi nabaraona muenimi. Au kawahi mue heremi hanona beho haumi ikoimiai puma katoa'ina. <sup>3</sup> Wai tonuatae katobatohana Keriso hana au pina'uai ni'abi. Weiana to'iohina

\* 13:1: (1) mahakiai teihana haukia

Keriso hanona ena aka wai heremiai a'i ni'abe'abe, ia ena hiabu heremiai hanona nitabura. <sup>4</sup> 'Abi tohana Keriso hanona 'abe'abe paunai matiu ibiri ropo 'ubinai teahu 'arina, iamo bariu nimaui nemiaho Tirama ena hiabuai. 'Abi tohana Keriso ena mauri aonai ai abomo ta'abe'abe, ia emai baihatia'a heremiai hauna aonai Tirama ena hiabuai Keriso ena mauri aonai katamiaho katabarainimi.

<sup>5</sup> Kipomi emi mauri tomoiha harainakia, abomo kipomi tomo'iobi harainimi wai hanona a'ikakauma aonai tomiaho 'ao aha'i. Wai to'jobina Keriso Iesu hanona emi mauri aonai nemiaho. Aha'i raninai wai hanona a'i tua'ikakaumai tohana. <sup>6</sup> Au nanuatae wai kato'jobina ai hanona Keriso ena iuhubeau haumai tohamai. <sup>7</sup> Ai Tirama herenai tabahuba'ari wai beho ha a'i katobabaina paunai. Ai Keriso ena iuhubeau haumai 'ao iuhubeau haumai aha'i re'a weiana hauna aomi a'i kebaro'arina, ia emai nuatae apa'uana hanona wai aka berokia katobabai. <sup>8</sup> Ai hanona 'abi tohana ia'iki'ana akana ha a'i katababaina, ia ibaraina akana mo katababaina. <sup>9</sup> Ai ta'abe'abe iamo wai tutabura hanona aomai ninamo. Ba ai tabahuba'ari wai katobero 'aunimi. <sup>10</sup> Weiana buonai atau'ai namiaho aonai 'abi neiakia narerenakia tiwahi heremi, weiana kawahi aonai Tirama hiabu ebena'u haunai a'i mahinabe pahihinimi. Hiabu neiana hauna emi a'ikakauma kebapa'uana ia a'i kea'i ki'ana.

*'Abi Orena.*

<sup>11</sup> 'Abi orenai, uaho'aba'u e, bariu hanona ikoimiai haparua. Katoaka tabura emi a'ikakaumai katobero 'aunimi. E'u noinoi 'abikia katoa'i taeanakia, ha ha aomi katehamomo abomo baibuai katomiaho. Ba raona'au mai baibua Tiramana hanona heremiai kemiaho.

<sup>12</sup> Tirama ena banamoai ha ha kato-banamonimi.

<sup>13</sup> Tirama ena robe maeirimakia ikoikia ekia banamo 'abikia teuhunakia heremiai.



## Paulo Ena Marere GALATIA Haukia Herekiai

### *Puka Aona Irerena 'Abina*

Rani weianai maearima kori'uaikia tohokia Iesu murinai te'au haukia hanona Iuda haukia. Iamo Iesu ehore Paulo iuhubeau haunai ebaona ba euhuna eao rama haeai haukia herekiai pou namona keiroro aina. Maearima bo'ona a'ikakauma haukia kipokia tebahaeamo. Iamo atetua apa'uana ha erama. 'Uaina maearima weiakia hanona Mose ena rauhuhu a'i teka'a ainakia haukia, matoha Iuda haukia Mose ena rauhuhu tika'aina 'abana, ba a'ikakauma haukia teao aonai rauhuhu weiakia kateka'a ainakia 'ao aha'i? Maearima baika hanona ia tibahi ahinakia itare katea'ina Iuda haukia ekia hoahoa ihobonai, ba ia katehore Mose ena rauhuhu kateka'a ainakia.

'A Paulo ni'abi weiana hanona taba apa'uana aha'i, aika Iesu Keriso kaha a'ikakaumana hanona Tirama wairanai kahabero. Iuda haukia baika hanona teao weia Galatiai, ba tenuatae a'ikakauma haukia weia katebahi ahinakia Mose ena rauhuhu kateka'a ainakia. Aka neiana hanona Galatiai nirama ba Paulo pouna eona. Ua buonai puka neiana ererena, weiana ekia a'ikakauma mai ekia hoahoa kebaberonai.

Kori'uainai hanona Paulo e'abi Tirama ehore ia etina'ana iuhubeau akana kebabaina. Haeamona e'abi maearima weiakia Iesu Keriso aonai tia'ikakauma haukia hanona Tirama wairanai tebero. Ba puka puanai hanona e'abi Keriso aika ki'a herenai eba'abaeana hanona Auba Robe kehore aika ke'uai ainaka, weiana aika hanona rani ikoinai hoahoa namokia maearima herekiai kahababai.

### *Puka Paipana Apa'uakia*

- a. Roba iahu. (1.1-10)
- b. Paulo iuhubeau hauna mai ena hiabu. (1.11-2.21)
- c. Tirama ena aoko'o hoana pouna namona. (3.1-4.31)
- d. A'ikakauma haukia ekia bero mai ekia aka katebabai haukia. (5.1-6.10)
- e. 'Abi orekia. (6.11-18)

*Banamo 'Abina.*

<sup>1</sup> Au Paulo, Iuhubeau hau'u, aka neiana maearima a'i tebena'u 'ao a'i teuhuna'u, ia Iesu Keriso mai Hamana 'ariai ebamikiri muena Tiramana ohi teuhuna'u. <sup>2</sup> Au uaho'abaka neia tamiaho ikoikiai atakiai a'ikakauma haumi Galatia hanona aonai marea ha ha aokiai tomiaho haumi narere benimi.

<sup>3</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho. <sup>4</sup> Keriso kipona ena mauri ebaibenai aika eka ki'a paunai, ia hanona hanopaka ki'a obona neiana aonai kebamaurinaka, aika Hamaka Tirama enuatae ihobonai. <sup>5</sup> Ua buonai Tirama ena nuabi kemiaho banaibanai. Amen.

### *Keriso Pouna Namona Ikupaianamo.*

<sup>6</sup> Au ata'u ta'u huri heremiai hanona Keriso ena aoko'o hoanai eaparinimi Tiramana abamo tohabo 'abaeana ia tuao pou haeai tehinana haukia herekia. <sup>7</sup> Weiana hanona pou namona tohana aha'i. 'Eka neianai maearima baika tibabaoonimi pokina tenuatae Keriso pouna namona katebahaeaina. <sup>8</sup> Ai 'ao kupa aneruna ha pemai re'a, ia pou haeai ha peiroro aina ba pou namona 'uainai heremiai tairoro aina hauna terarua a'i teihobo raninai puma banaibanai kehoaina. <sup>9</sup> 'Uainai tahinana hauna bariu haeamona nahina muena. Tai ha pou namona toa'ina hauna aha'i ia pou haeai ha keiroro aina raninai puma banaibanai kehoaina. <sup>10</sup> Bariu au maearima ekia nuatae naka'aina? Aha'i 'akina. Tirama ena nuatae naka'aina. 'Ao maearima aokia kabaonamona taearana natabuna? Maearima aokia ibaonamona manuatae aina raninai, au hanona Keriso ena ta'ara ia'ina hau'uai a'i paeao.

### *Iuhubeau Hauna Paulo Kipona Kikipana.*

<sup>11</sup> Uaho'aba'u e, au nanuatae kato'iobina pou namona airoro aina hauna hanona maearima ena 'iobiai a'i emai. <sup>12</sup> Maearima ha herenai a'i a'ina 'ao tai ha a'i eba'iobina'u, ia Iesu Keriso here'uai ebawaira tinana hauna a'ina.

<sup>13</sup> E'u mauri 'uainai Iuda haukia ekia a'ikakauma taearanai amiaho raninai ababaina hauna 'uruna aba to'ona, Tirama ena marea haukia a'oata ki'a bahanakia anuatae kabapururunakia. <sup>14</sup> Au ihaburi'u haukia Iudai bo'okia baiatakiai

Iuda ekia a'ikakaumai au hanona aotipa ki'a baha, mai 'aba'abamai ekia hoahoa hanona anuataeai ki'a bahanakia.

<sup>15</sup> Ia hina'u nuanai a'i arama baha aonai Tirama aba etina'ana'u, ena aoko'o hoanai eaparina'u, ia ena nuatae ai <sup>16</sup> nahuna ebawaira tinana here'uai, pouna rama haeai haukia herekiai kairoro aina, weiana hau ha ohi a'i tarobahu aina. <sup>17</sup> 'Ao a'i mo aeao Ierusalem, iuhubeau haukia 'uaikia a'i aihanakia, ia beronai mo aeao Arabia, muriai haeamona aeao Damaseko. <sup>18</sup> Ihau aihau teore murinai, au akara'au aeao Ierusalem Petero herena ta'abi'abi, weia tamiaho wapu harau haea ima. <sup>19</sup> Weia Iuhubeau haukia haeai ha a'i aihana, Obiapaka hatina Iakobo mo ikupaiana aihana. <sup>20</sup> Tirama wairanai 'abi neiana arerena hanona tohana ia a'i nabai'oi.

<sup>21</sup> Murinai amikiri hanona Suria mai Kilikia hanokia aeao. <sup>22</sup> Ia Iudeai weia Tirama ena marea haukia hanona au waira'u a'i te'jobina, <sup>23</sup> pou'u mo teona tetibaha, "Uainai e'oatanaka hauna nihore a'ikakauma weiana kebpapururuna hauna bariu aba neiroro aina." <sup>24</sup> Ua buonai Tirama tebanamona au pau'uai.

## 2

### *Paulo Mai 'Abana Kipokia Ekia Aka Haeamo.*

<sup>1</sup> Ihau harau haea bani teao murinai haeamona au Banaba ohi Tito tabaka'ana kipokia takara'au taeao Ierusalem. <sup>2</sup> Tirama ena 'abi ao'uai ewaira tina buonai aeao Ierusalem, pou namona weiana rama haeai haukia herekiai airoro aina hauna robana ahuna. A'ikakauma haukia tipoki ainakia haukia kipokia hanona haia hai ai ta'abi'abi aina kateraonaraona, pokina 'uainai airoro aina hauna mai bariu nairoro aina hauna e'u aka maikoina anina a'i meha'i ta'una. <sup>3</sup> I'abamai hauna Tito hanona Helene hauna ia a'i tebahi ahina itare kea'ina. <sup>4</sup> Eka to'u aonai uaho'aba bai'oikia baika bunianai tetoto, te'itimanaka Keriso Iesu aonai mauri ha'ina hauna kate'jobina, ekia nuatae hanona rauhuhu ena ta'ara ia'inai patehoroti muenaka. <sup>5</sup> Ekia raona a'i tabatohana, pokina pou namona 'abina tohana heremiai a'i mehaeai.

<sup>6</sup> Ia weiakia apa'ua haukiai tibaonakia haukia (au here'uai hanona ekia haeai aha'i. Tirama hanona maearima hauani ena namo a'i nibatohana,) ba maearima weiakia pou namona au airoro aina hauna ahanai taba ha a'i tehore 'auna. <sup>7</sup> Ia teihana Tirama aka ebena'u pou namona rama haeai haukia\* herekiai airoro aina ihobonamo Petero Iuda haukia† herekiai eiroro aina. <sup>8</sup> Tirama ena hiabu ai Petero hanona iuhubeau haunai eao Iuda haukia herekiai, ihobonai mo Tirama ena hiabu ai au hanona iuhubeau hau'uai aeao rama haeai haukia herekiai. <sup>9</sup> To'u weiana kupuana haukia Iakobo, Petero mai Ioane Tirama aoko'o hoana neiana ebena'u hauna teiha tinana rani-nai, au mai Banaba ohi imamai tea'inakia uaho'aba hoana. Weiana tebatohana ai haumai hanona rama haeai haukia herekia kataeao, ia hanona Iuda haukia herekia kateao. <sup>10</sup> 'Abi hamona tehinana heremaiai hanona uraru haukia katarona apa'uanakia, 'abi weiana ta'i taeana ba aka neiana hanona au aba wa'i baha nababai to'ona.

### *Paulo Antioka ai Petero Ebatana.*

<sup>11</sup> Ia Petero emai Antioka raninai maearima wairakiai abatana pokina ena babai hanona a'i ebero.

<sup>12</sup> Petero rama haeai haukia kipokia teaniani haeamo aonai Iuda haukia baika weiakia Iakobo euhunakia haukia tekara'au, ba Petero hanona emikiri herekiai ekapare, pokina ia weiakia itare tiba'jobi ainakia haukia eta'u ainakia. <sup>13</sup> Iuda haukia baika abomo ia ena 'ubo weiana ihobonai bai'oi hoana tebabaina, ba ekia 'ubo ai Banaba abomo eahurea. <sup>14</sup> Au babai weiana aiha pouna pou namona 'abina tohanai a'i teka'aina, ua buonai ikoiki ai wairakiai Petero abatana atibaha, "Oi hanona Iuda haumu, ia emu babai hanona matoha rama haeai haukia ihobonai nomiaho, ia Iuda haukia 'abana aha'i. Aea homanai rama haeai haukia kobahi ahinakia Iuda haukia ekia hoahoai katemiaho?"

### *Bamauri Hanona A'ikakaumai Nimai.*

<sup>15</sup> Aika hanona Iuda ai harama toha hauka, ia 'ki'a hauka' aha'i, rama haeai haukia 'abakia aha'i. <sup>16</sup> 'A naha'jobina weiana maearima hanona rauhuhu ia'i taeana a'i kebero, ia Iesu

\* 2:7: (7) 'ao itare a'i tea'ina haukia † 2:7: (7) 'ao itare tea'ina haukia

Keriso kea'ikakaumana hanona kebero. Ua buonai aika abomo Keriso Iesu naha'ikakaumana, weianai kahabero Keriso ia'ikakaumanai ia rauhuhu ia'i taeana aha'i, pokina rauhuhu ia'i taeana hanona maearima ha a'i kebero. <sup>17</sup> "Ia aika Keriso herenai eka bero nahatabuna, ia mo ki'a haukai kahawaira tina matoha rama haeai haukia ihobokiai raninai, weiana anina hanona Keriso ki'a haukai nibabainaka hauna, u? Ia weiana hanona aha'i 'akina. <sup>18</sup> Kipo'u a'i ki'ana rauhuhuna kabakori muena raninai, au kipo'u kabatohana'u au rauhuhu nakabena hau'u mai ki'a hau'u. <sup>19</sup> Au hanona rauhuhu paunai a'ari rauhuhu herenai, weiana buonai Tirama 'eunai kamauri. <sup>20</sup> Au hanona Keriso ohi matiu ibiri ropo 'ubina'i aba teba'arinamai, ba au a'i namauri, ia Keriso au ao'uai namauri. 'A mauri neiana bariu hauani'uai namiaho aina hauna hanona Tirama Nahuna eraona'au aina'u kipona ena mauri ebena'u hauna na'ikakaumana buonai namauri. <sup>21</sup> Tirama ena aoko'o hoana hanona a'i na'i ki'ana. Rauhuhuai bero paha'ina raninai, Keriso hanona aba e'ari 'abaea."

### 3

#### *Bamauri Hanona Rauhuhu ai A'i Nimai.*

<sup>1</sup> Galatia haumi e, wai hanona po'o haumi. Tai meai ebahureanimi? Wairami tohanai Iesu Keriso pouna aba ikikipa haraina matiu ibiri ropoai teahu 'arina.

<sup>2</sup> Au nanuatae taba hamona mo kato'hina bena'u, Auba Robe toa'ina hanona rauhuhu toka'ai haraina paunai 'ao pou namona tona toa'ikakauma paunai? <sup>3</sup> Wai hama na tupo'o aiho? Popounai mauri neiana Auba Robeai toa'i ramana, ia bariu hauani taburanai katobapuana? <sup>4</sup> Wai pou namona paunai tohau haiara 'ari hanona anina keaha'i? Ua kehoma raninai, aba tohau haiara 'ari 'abaea. <sup>5</sup> Taba buonai Tirama ena Auba ebenimi, bata'u ta'u huri akakia ebabai baiatamiai? Ia rauhuhu toka'ai haraina paunai 'ao pou namona tona toa'ikakaumana paunai?

<sup>6</sup> Aberahamo tomoraonana. Puka robenai na terere aihona, "Aberahamo Tirama ea'ikakaumana, ena a'ikakauma paunai Tirama ehore bero haunai ebaona."

Gen 15.6

<sup>7</sup> Ua buonai kato'iohina weiakia Tirama tia'ikakaumana haukia ikoikiai hanona Aberahamo nahuna. <sup>8</sup> Puka Robena aba eiha 'uaina rama haeai haukia katea'ikakauma hanona Tirama kehore berokia kehinana, ua buonai pou namona eiroroai 'uaina Aberahamo herenai, "Oi paumuai hanopaka maearimafia ikoikiai Tirama kebanamonakia." <sup>9</sup> Ua buonai weiakia mai ekia a'ikakauma haukia hanona Tirama nibanamonakia a'ikakauma hauna Aberahamo kipokia. <sup>10</sup> Rauhuhuai temiaho haukia ikoinai hanona Tirama ena ururu ba'anai temiaho, pokina Puka robenai na erere aihona, "Rauhuhu pukanai terere 'abikia ikoikia a'i ke'ima haraina hauna hanona Tirama ena ururu ba'anai nemiaho." <sup>11</sup> Aba ewaira tina harai rauhuhuai hanona hau ha a'i ebero Tirama wairanai, pokina Puka robenai e'abi, "Bero hauna hanona a'ikakaumai kemaui."

Hab 2.4

<sup>12</sup> Ia rauhuhu hanona a'ikakaumai a'i emai, terarua a'i teihobo, Puka robenai e'abi, "Maearima ha rauhuhu 'abikia ikoikiai keka'ai orena hauna hanona weiakiai kemaui."

<sup>13</sup> Keriso aika eka ururu pumana ehoina, rauhuhu ena ururu aonai eba karahinaka, pokina Puka robenai aba ererena etibaha, "Matiu 'ubina'i ti'ari haukia hanona Tirama ena ururu aonai." <sup>14</sup> Keriso ebakarainaka pokina hanona banamo Aberahamo etauna hauna rama haeai haeai haukia katetabu ahina Keriso Iesu paunai, ua buonai aika eka a'ikakaumai hanona Auba Robe weiana e'abi'uaina hauna kaha'ina.

#### *Rauhuhu Mai 'Abi'uai.*

<sup>15</sup> Uaho'aba'u e, eka miaho maurina aonai ihaiha ha ma'ina hamaihana, maearima rua ekia 'abi'uai tebabaina teba'oruna murinai tai taba ha a'i kea'i parena 'ao ahanai ha a'i keahu'auna, ihobona mo kemiaho. <sup>16</sup> Tirama ena 'abi'uai Aberahamo ena rama herenai ebabaina. Puka Robenai a'i e'abi 'ena rama herekiai' anina maearima bo'ona, ia e'abi 'ena rama herenai' anina maearima hamona, Keriso Iesu e'uahina. <sup>17</sup> Na'uahina hanona neiana, Tirama 'abi'uai ebabai 'uaina ba ihau 430 teao murinai rauhuhu ebaibeni hauna

kehore 'abi'uai weiana a'i kea'i parena 'ao a'i keba'akaumana. <sup>18</sup> Rauhubuaitau kerama raninai, 'abi'uaiai hanona itau a'i kerama. Ia 'abi'uaiai Tirama ena aoko'o hoanai itau Aberahamo ebena. <sup>19</sup> Ba rauhubu ena aka hanona taba? Rauhubu erama ena poki hanona beho 'ekakia kebakarainakia. Ia hanona aneru temaiaina bairarao hauna imanai teutana akana erama, keao mo rama weiana e'uahi 'uaina hauna kemai. <sup>20</sup> Tirama ena 'abi'uai aonai hanona abira hamona mo nemiaho, weiana bairarao hauna ena aka aha'i, ia Tirama mo keikupai.

#### *Rauhubu Eaoainaka Keriso Herena.*

<sup>21</sup> Rauhubu hanona Tirama ena 'abi'uai kea'i ki'ana? Aha'i, aha'i 'akina. Rauhubu weiana mauri ebaibeni raninai, bero hanona aba rauhubuaitau pemai. <sup>22</sup> Ia Puka Robenai e'abi hanopaka neiana maearimakia maikoinai hanona ki'a eka-iabunakia aonai temiaho. Weiana buonai tia'ikakauma Iesu Keriso herenai haukia a'ikakaumai 'abi'uai weiana katea'ina.

<sup>23</sup> A'ikakauma neiana a'i emai baha raninai, aika hanona rauhubu eka-iabunaka wapura haukia 'abana keao mo a'ikakauma kewaira tina. <sup>24</sup> Weianai rauhubu hanona eka iha 'ini hauna 'abana kebaka'anaka Keriso herenai weia a'ikakaumai bero kebenaka. <sup>25</sup> Bariu a'ikakauma hanona aba emai, rauhubu ena iha 'ini hiabuna herekai hanona aba eore.

#### *A'ikakauma Keaoainaka Tirama Nahunai Kahaeo.*

<sup>26</sup> Keriso Iesu tua'ikakaumana buonai wai ikoimiai hanona Tirama nahuna. <sup>27</sup> Keriso kipokia toba hamomo 'uere robe toa'ina haumi ikoimiai hanona Keriso ena mauri habunina ihobona aba tobatotona. <sup>28</sup> Ua buonai wai hanona ha a'i ehaeai, Iuda hauna 'ao Helene hauna, ta'ara a'i hauna 'ao ta'ara a'i hauna aha'i, hau 'ao babi'e, pokina ikoimiai hanona hamona Keriso Iesu aonai. <sup>29</sup> Ba wai Keriso 'euna raninai, wai abomimo Aberahamo ena rama haumi, Tirama ena 'abi'uai barina hanona aba katotauna.

## 4

#### *Aika Tirama Nahuna.*

<sup>1</sup> Au na'uahina hauna neiana, miori hanona hamana barina maikoinai

ke'aranakia, iamo miori papana raninai, ia hanona ta'ara a'i hauna 'abana. <sup>2</sup> Eko'iko'i aonai, i'imana hauna mai iha'ini hauna ekia iha'ini ba'anai nemiaho keao mo hamana ebatohana ranina ketaina. <sup>3</sup> Ihobona aika abomo miori papaka raninai hanopaka aubakia haeai haeai ta'arakia ia'ikiai haeao. <sup>4</sup> Ia ranina tohana etaina aonai, Tirama nahuna euhuna, babi'e nuana erama abomo Iuda ekia rauhubu ba'anai erama, <sup>5</sup> weiakia rauhubu ba'anai haukia kebamaurinakia, weiana kea'inaka Tirama nahuna tohanai kebaonaka.

<sup>6</sup> Bariu nahunai toao buonai, Tirama hanona Nahuna Aubana euhuna emai aokai nemiaho, Aubana weianai aika Tirama nahaparina, "Hama'u."\* <sup>7</sup> Ua buonai wai hanona ta'ara'i haumi aha'i, ia Tirama nahuna. Tirama nahuna tohami buonai barina ikoimiai Aberahamo herenai e'abi'uai aina hauna wai 'eumi.

#### *Paulo Aona Earo'ari Galatia Haukia Herekiai.*

<sup>8</sup> 'Uainai Tirama a'i to'jobina raninai, wai hanona tirama tohakia aha'i haukia ekia ta'ara a'i haumiai toao. <sup>9</sup> Ia bariu Tirama aba to'jobina, au na ma'abi aiho, Tirama abomo wai e'iohi harainimi, aehoma buonai katomue auba haeai haeai 'abe'abekia ekia namo aha'i haukia herekiai ekia ta'ara a'i haumiai katoao mue? <sup>10</sup> Wai hanona wapu, nawa, ihau hamona to'una mai ihau ikoikiai tatukia mo emi beraura apa'uakiai tubaonakia. <sup>11</sup> Au hanona wai paumiai ao'u niaro'ari, pokina e'u aka ikoimiai heremiai hanona anina a'i meaha'i.

<sup>12</sup> Uaho'aba'u haumi e, au wai nanoinimi, au wai 'abamiai aba aeao 'uai ihobonai wai abomo rauhubuaitau tomokarahi 'aba'uaitomoao. Here'uaito'ua ha a'i tubarea. <sup>13</sup> Wai to'jobina e'u inawa paunai heremiai amiaho pou namona airoroai 'uaina heremiai. <sup>14</sup> E'u inawa ena pumai abaro'arinimi, ia a'i to'ia haona'u, a'i toa'i ki'ana'u, aonai toa'ia'i haraina'u, Tirama ena aneru patobanamona 'abana 'ao Iesu Keriso patobanamona 'abana. <sup>15</sup> Ua raninai mai aonamomi tomiaho, ia bariu emi aonamo aeana eao? Au a'io'jobina rani weianai mahami patoipa ahinakia au patobena'u na tohoma. <sup>16</sup> Ia bariu au 'abi

\* 4:6: (6) "Papa, Hama'u."



tohana nahinana heremiai buonai aba emi 'ou hau'uai naeao, u?

<sup>17</sup> Maearima weiakia ekia nuatae aomi kateana, ia ekia raona mai ekia nuatae hanona a'i tebero, ekia nuatae heremaiai katokapare, katonuatae ainakia. <sup>18</sup> Maearima aona keiani maearimana weiana kebanamona paunai, weiana hanona rani ikoinai enamo au heremiai pamiaho 'ao aha'i. <sup>19</sup> Naha'u e, wai buomia nara'ari, miori nirama haiarana 'abana, ua nahaiara aiho keao mo wai Keriso ihaihana ihobonai katoao. <sup>20</sup> Au ao'u niaro'ari pokina heremiai kamiaho aia'u kabahaeaina kabarainimi, wai paumiai naraona raona 'ari.

*'Abi Iabatatai Ihobona Hagara Mai Sara Abakia.*

<sup>21</sup> Wai tai tonuatae rauhuhu ba'anai katomiaho haumi tomohina bena'u. Wai rauhuhu taba na ehoma hauna to'iohina, 'u? <sup>22</sup> Puka Robenai na erere aihona, Aberahamo nahuna hanona rua, ha hanona atawana weiana ta'ara a'i babi'ena herenai ebaramana, ha hanona ia atawana tohana herenai ebaramana. <sup>23</sup> Ia atawana ta'ara a'i babi'ena nahuna hanona harama ihobonai erama, 'a atawana tohana nahuna hanona Tirama ena 'abi 'uai miorina. <sup>24</sup> Ori neiana hanona 'abi ibabatatai 'abana. Babi'e rua hanona 'abi'uai apa'uakia rua. Ha hanona Sinai oeonai emai ta'ara'i haukia ebaramanakia, ia hanona Hagara. <sup>25</sup> Hagara, ne'uahina hanona Sinai oeona Arabia aonai, ia hanona bariu rani neiana Ierusalem aiarana 'abana ia mai nahuna kipokia ikoikiai rauhuhu ena ta'ara'i haukia tiao. <sup>26</sup> Ia Ierusalem weiana kupai hauna hanona ta'ara a'i nia'i babi'ena Sara, ia hanona aika hinaka. <sup>27</sup> Puka Robenai aba ererena,

“One'one babi'emu e, koaonamo!

Beni haiarana a'i nuonobaina  
babi'emu, koabe koio mai  
aonamomu.

Pokina babi'e 'abaea  
nahuna hanona kebo'o,  
ia babi'e weiana mai atawana  
hauna nahuna a'i kebo'o.”

Isa 54.1

<sup>28</sup> Uaho'aba'u e, bariu wai hanona Isako 'abana Tirama nahuna, ia ena 'abi'uai ihobonai. <sup>29</sup> Rani weianai harama ihobonai erama miorina ehore miori

weiana Auba Robe hiabunai erama hauna e'oatana, bariu abomo ua mo homana. <sup>30</sup> 'A Puka Robenai aea terere aihona? Na e'abi aiho, “Ta'ara'i babi'ena nahuna ohi mou'u ahinakia, pokina eatawa tohana nahuna barina hanona ta'ara a'i babi'ena nahuna ohi bari hamona a'i katewatena.” <sup>31</sup> Ua buonai uaho'aba'u e, aika hanona ta'ara a'i nia'i babi'ena nahuna, ia ta'ara'i babi'ena nahuna aha'i.

## 5

### *Keriso Erubunaka.*

<sup>1</sup> Keriso ehore aika aba erubunaka rauhuhu aonai a'i kahamiaho. Ua buonai tomokori 'ini, a'i temebiri muenimi rauhuhu ena ta'ara'i haumiai a'i tomoao marikina.

<sup>2</sup> Tomobahu, au Paulo wai naba'iohinimi, itare patoa'ina raninai Keriso ena aka hanona anina aha'i heremiai. <sup>3</sup> Haeamona nahinabe pahih muenimi natibaha, itare kea'ina hauna hanona rauhuhu ikoikiai ke'ima harainakia kenamo. <sup>4</sup> Wai rauhuhu bero tutabuna haumi hanona Keriso 'eunai kipomi tokabe obonimi, Tirama ena aoko'o hoanai hanona aba tokapu. <sup>5</sup> Ia aika hanona eka a'ikakaumai mai Auba Robe hiabunai nahabuabena Tirama bero kebenaka. <sup>6</sup> Aika Iesu Keriso aonai kahahamomo raninai, itare 'ao itare aha'i ena haeai hanona aha'i, ia taba apa'uana hanona a'ikakauma, raona'auai niwaira tina.

<sup>7</sup> Wai 'uainai hanona a'ikakaumai toka'a harai ki'a baha, ia tai eharabunimi 'abi tohana ia'i taeanai? <sup>8</sup> Aoani 'abikia weiakia hanona eaparinimi Tiramana herenai a'i timai. <sup>9</sup> Katoraonana, “Bakupu mura-murana papana nihore parawa maikoinai nibakupuna.” <sup>10</sup> Au hanona Obiapaka na'ikakaumana kebarainimi wai raona haeai ha a'i katoa'ina. Baoao baoao nibenimi hauna hau aea homana ia Tirama kehore 'arana kebenaka.

<sup>11</sup> Uaho'aba'u e, itare nairoro aina raninai aehoma buonai ti'oatana'u? Weiana petohana raninai Keriso ena matiu ibiri ropo kairoro aina hanona atetuana aha'i.

<sup>12</sup> Au nuuatae weiakia itareai tibatetunimi haukia hanona patekatu'a pateao atetua tabana patekabe obona.

<sup>13</sup> Uaho'aba'u e, Tirama eaparinimi hanona kerubunimi. Erubunimi haumi

hanona hauani akakia ki'a obokia a'i katobabai, ia raona'auai ha ha kipomi katobarai barai haemo. <sup>14</sup> Rauhuhu ikoinai aba ebahamomonakia 'abi neianai, "Here muai hauna koraona'au aina oi kipomu nuraona'au aini'o 'abana." <sup>15</sup> Kato'ima 'ima harainimi wai kipomi emi baiarai mai emi 'au bo'o 'au bo'oai kipomi a'i tomobaorenimi ta'una.

### *Auba Robe Buabuana Mai Hauani Ena Hoahoakia.*

<sup>16</sup> Ua buonai na'abi, Aubu Robe emi mauri ke'uai aina raninai hauani ena nuatae akakia ki'a obokia a'i katobabai. <sup>17</sup> Pokina hauani ena nuatae akakia hanona Aubu Robe nihao abuna, Aubu Robe ena nuatae akakia abomo hauani nihao abuna, ia terarua tibaitaeai, ua buonai wai patobabai haukia a'i tubabai. <sup>18</sup> Aubu Robe wai ke'uai ainimi raninai, wai hanona rauhuhu ba'anai a'i katomi-aho.

<sup>19</sup> Hauani ena hoa hanona emahanai ki'a baha. Taba neiakiai, nabau, raona 'opukia, maha porepore, <sup>20</sup> kaiba'uku ikutiaina, mea, bai'oata, 'au, wamuru, opuere, 'ao'aea, baihabapa'a, ba'iobi bai'oikia, <sup>21</sup> raona ki'a, inu 'ari, ripuripu, ba babai uahomakia ikoikiai. 'Uainai abahinabe pahihinimi, bariu haemona nahinabe pahihi muenimi, aka uahomakia tibabai haukia hanona Tirama ena obia aiarana a'i katetabu ahina.

<sup>22</sup> Ia Aubu Robe eka mauri ke'uai aina buabuana hanona raona'au, aonamo, baibua, bapahihi, aoko'o, rabo harai, aia o'o, <sup>23</sup> 'aiaunu mai aokiro. Neiakia ikoikiai hanona rauhuhu a'i ni'oatanakia. <sup>24</sup> Keriso Iesu ena maearima hanona hauanikia mai ekia hoa ki'a obokia mai ekia nuatae ki'a obokia aba ikoko'au matiu ibiri ropo 'ubinai.

<sup>25</sup> Aubu Robe mauri aba ebenaka buonai, ia mehore eka mauri me'uai aina.

<sup>26</sup> Aika a'i kahapa, 'abaka kipokia a'i kahaba opuerenakia 'ao a'i kahawamuru ainakia.

## 6

### *Emi Puma Katobua Haeahaea.*

<sup>1</sup> Uaho'aba'u e, hau ha beho aonai etoto raninai, aomia Aubu Robe niaka haumi ha kohore aomu namonai kobaberona. Ia oi abomo kipomu ko'ima haraini'o, baihobo a'i mea'ini'o marikina.

<sup>2</sup> Emi puma katobua haea haea, taeara neianai hanona Keriso ena rauhuhu katoa'i taeana. <sup>3</sup> Taba aha'i hauna mo niraonana ia hanona maearima apa'uana ha raninai, ia kipona ni'oina. <sup>4</sup> Ha ha kipomi emi babai kato hobonakia, taba obabai haraina hauna hanona kipomu koapaini'o, ia a'i koaoaina maearima wairakiai. <sup>5</sup> Maearima ikoikiai kipokia ekia puma katebuanakia.

<sup>6</sup> Tirama ena 'abi emarereaina hauna hanona ena taba namokia ikoinai ena ba'iobi hauna ohi katebina'anakia.

<sup>7</sup> Kipomi a'i katohaorea, maearima ha Tirama a'i kebapo'ona. Maearima ube ebatona ihobonai mo anina kea'ina. <sup>8</sup> Ba hauani ena nuataeai ebato bato hauna hanona hauani herenai 'ari ketabu ahina, ia Aubu Robe 'eunai ebato bato hauna hanona Aubu Robe herenai mauri banai banai ketabu ahina. <sup>9</sup> Aka namona ibabainai a'i kahahau hororo, aika a'i kaha 'abe'abe raninai, eueu ranina kemai aonai buabua namona kaha'ina. <sup>10</sup> Ua buonai namo nahatabu ahi ranikiai maearima ikoikiai herekiai namo kahababainakia, ia a'ikakauma haukia herekiai hanona namo kahababai harainakia.

### *Banamo 'Abina Orena Mai Bahuba'ari.*

<sup>11</sup> Rererere rarikia neiakia katoihanakia au ima'uai arerenakia tiwahi heremi.

<sup>12</sup> Weiakia tenuatae atakia keapa'ua haukia tibahi ahinimi itare katoa'ina, ekia poki tohana hanona Keriso ena matiu ibiri ropo paunai maearima a'i teme 'oatanakia. <sup>13</sup> Weiakia aba tetarenakia haukia mo, rauhuhu a'i tika'aina, ia wai tenuatae ainimi itare katoa'ina, hauanimi paunai katebaro'e. <sup>14</sup> Au taba ha a'i kapai 'abaeana, ia eka Obiapaka Iesu Keriso ena matiu ibiri ropo ikupaiana mo kapaina, Keriso paunai hanopaka e'ari au here'uai, au abomo aba'ari hanopaka herenai. <sup>15</sup> Itare 'ao itare aha'i terarua aniki'a aha'i, ia taba apa'uana hanona rama mahamahana. <sup>16</sup> Tirama ena baibua mai aoko'o hanona raona neiana tia'i taeana haukia ikoikiai herekia, abomo Tirama ena maearima weiakia aubai Isaraela haukia tiao haukia herekia.

<sup>17</sup> E'u 'abi puanai hau ha a'i mebaro'arina'u, pokina au hau'uai mani'a temiaho tibaihana au Iesu ena ta'ara'i hau'u.

<sup>18</sup> Uaho'aba'u ikoimiai e, nabahuba'ari  
eka Obiapaka Iesu Keriso ena aoko'o  
hoana ahamiai kemiaho. Amen.

## Paulo Ena Marere EPESO Haukia Herekiai

### *Puka Aona Irerena 'Abina*

Puka neiana ena poki hanona nahomana. Tirama ena nuatae hanona taba ikoikiai kupai mai hanopakai Keriso aonai katebahaeamo. Weiana Keriso hanona taba ikoikiai 'arokia haunai keao (1.10). Haeamona Tirama ena nuatae hanona kipona ena maearima keberi no'anakia, ba ekia mauri maikoina hanona Keriso kipokia katebahaeamo, weiana aokia hanona kehamona.

Puka neiana iro'ana kori'uainai hanona Paulo ehore ao namonai e'abi tabura, maearima keba'iobi harainakia Iesu katea'ikakaumana, ba katebahaeamo ihobona a'ikakauma haukia to'una hamona. Pokina Iesu ena aka namona ahanai hanona Tirama maearima ebamaurinakia, ba Auba Robe kebenakia, weiana hanona ia ikupaiana kehore ena maearima ekia aka namokia kebabainakia ena 'abi ihobokiai (1.4). Iro'ana ibaruanai hanona Paulo ni'abi, maearima Keriso kipokia tebahaeamo hanona aokia kehamona haeamona Tirama ena taara tainai katetai.

Puka neiana aonai hanona Paulo 'abi ibabatai bo'ona ebaibeni maearima keba'iobi harainakia, weiana ekia bahaeamo Keriso kipokia hanona maearima to'una hamonai tiao, matoha hauani hamona 'abana (4.16), 'ao matoha itu 'abana (2.19-21). Puka neiana kahatuabi haraina hanona Tirama ena nuatae ena maearima ekia taba namokia kebabainakia hanona kaha'iobi harainakia.

### *Puka Paipana Apa'uakia*

- a. Roba iahu (1.1-2)
- b. Keriso mai Tirama ena marea haukia. (1.3-3.21)
- c. Mauri mahamahana Keriso aonai. (4.1-6.20)
- d. 'Abi orekia. (6.21-24)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena Iuhubeau hau'u ai naeao, wai robe haumi Epeso ai Keriso Iesu tua'ikakaumana haumi narere benimi. <sup>2</sup> Nabahuba'ari Tirama aika Hamaka

mai eka Obiapaka Iesu Keriso ekia aoko'o hoana mai baibua hanona ahamiai kemihao.

### *Keriso Paunai Tirama Taba Namokia Keбенaka.*

<sup>3</sup> Tirama eka Obiapaka Iesu Keriso Hamana kahabanamona! Tirama hanona aika Keriso aonai ebanamonaka, auba ena banamo ikoinai kupa ai hauna aba ebanamo ainaka. <sup>4</sup> Hanopaka a'i ebabai bahana raninai, Tirama ehore Keriso aonai aba etina'anaka ia 'euna, weiana ia wairanai kaharobe mai ki'a ha a'i kahababaina. <sup>5</sup> Ena raona'au ai Tirama hanona aba eraona 'uaina aika ena bakiro miorikiai kahaeao Iesu Keriso paunai, ena raona weiana hanona ia ena nuatae mai ena aonamo. <sup>6</sup> Tirama kahabanamona ia hanona ena aoko'o hoana ebenaka ena nuabi aonai, aoko'o weiana hanona Nahuna niraona'au aina paunai aika ebeni 'abaeana.

<sup>7</sup> Keriso e'ari aruarunai eka ki'a aba ehina hao mai bamauri aba ha'ina. Tirama ena aoko'o hoana hama ua eobia aiho, <sup>8</sup> ia ebenaka hauna eapa'ua ki'a baha. Ena 'iobi mai ena aobero maikoinai, <sup>9</sup> Tirama ena raona bunikia 'uainai eraonana hauna ebawaira tinana aika herekai mai aonamona, raona weiana hanona aba eba'oruna Keriso paunai kebabaina. <sup>10</sup> Weiana Tirama ena raona eraonana wapuna ketaina raninai, ebabai tabakia ikoikiai keba hamomonakia kupa mai hanopaka tabakia ikoikiai 'arokiai hanona Keriso mo ikupaiana kepoki.

<sup>11</sup> Tirama hanona ena nuatae ihobonai taba ikoikiai ebabainakia, ena raona aba eba'oruna hauna paunai aika ea'i taeana ia ena maearima tohakai kahaeao Keriso aonai. <sup>12</sup> Weiana paunai ai Keriso herenai emai buabeni nemiaho 'uai haumai hanona etina'anamai, Tirama ena nuabi katabanamona haraina.

<sup>13</sup> Wai abomo 'abi tohana 'uruna tona raninai Tirama ena maearimai toao, pouna namona weiana hanona wai ibamaurimi. Haeamona Keriso toa'ikakaumana ba Tirama ena 'abi'uai Auba Robena ebenimi, weiana hanona ibatoha hoana wai ia 'eunai toao. <sup>14</sup> Auba Robe hanona ibatohana hoana kori'uaina Tirama kehore e'abi'uai tabakia aika kebenaka abomo ia kehore ena maearima kebabainakia. Tirama ena nuabi hamabanamona.



*Paulo Ebahuba'ari Epeso Haukia Paukiai.*

<sup>15</sup> Weiana paunai, au abomo emi a'ikakauma Obiapaka Iesu herenai hauna mai emi raona'au Tirama ena robe haukia ikoikiai herekiai hauna 'uruna aba aona, <sup>16</sup> wai paumiai banamo 'abina Tirama nabeni to'ona. E'u bahuba'ari aokiai wai atami nahinana, <sup>17</sup> Tirama nanoina, eka Obiapaka Iesu Keriso Hamana nuabina kehore Auba Robe kebenimi kebaotipanimi abomo Tirama heremiai kebawaira tinana, weiana wai hanona Tirama kato'iohi haraina. <sup>18</sup> Haeamona Tirama nanoina, aomi mahakia kebano'anakia ena ea katoihana ba kato'iohina, weiana ia eaparinimi haumi emi buabeni hanona taba, mai banamo namoabukia e'abi'uai ainakia Tirama ena robe haumi kato'ina hauna hanona aea keapa'ua aiho. <sup>19</sup> Ba kato'iohina Tirama ena hiabu rarina 'akina weiana aika a'ikakauma hauka herekai niaka hauna eapa'ua ki'a baha ena pua aha'i. <sup>20</sup> Tirama ena hiabu weiana hanona Keriso aonai eaka ba 'ari haukia baiatakiai ebamikirina eaoina kupai weia Tirama itipana tainai ebamiatina. <sup>21</sup> Keriso hanona aba 'ubi 'akinai kupa tabakia apa'uakia ikoikiai 'ubikiai, poki haukia, hiabu haukia, tabura haukia, obia haukia ikoikiai 'ubikiai, mai ia atana hanona aba 'ubi 'akinai ata ikoikiai 'ubikiai, hanopaka neiana maurina aonai abomo mauri weiana wairai kemai hauna ikoikiai 'ubikiai. <sup>22</sup> Tirama ehore taba ikoikiai Keriso 'apuna panabana ba'anai ehorotinakia abomo Tirama ena marea haukia ikoikiai arakiai ebaona ba taba ikoikiai kepoki ainakia. <sup>23</sup> Tirama ena marea haukia hanona Keriso huanina, 'eka maikoinai aonai taba ikoikiai ua nibabonu aihonakia.

## 2

*Keriso Kipokia Mauri Ebenaka.*

<sup>1</sup> 'Uainai wai hanona to'ari emi beho mai emi ki'a paukiai. <sup>2</sup> Weia tomiaho aonai hanopaka neiana ena hoahoa taina totai abomo Tiaporo weiana kupa mai hanopaka baiatakia nipoki aina hauna aiana toka'a aina, aubana hanona bariu Tirama aiana a'i tika'aina haukia aokiai niaka. <sup>3</sup> 'Uainai aika ikoikai abomo ia ihobokia huanika ekia nuatae

taikia hatai, ekia hoahoa mai ekia raona ki'a obokia hababai, maearima ikoinai ihobona ramai aika hanona Tirama ena opuere ihoaina hauka.

<sup>4</sup> 'A Tirama ena aoko'o eapa'ua, ena raona'au rarina herekai paunai, <sup>5</sup> weia eka beho paukiai aba ha'ari hauka Keriso kipokia mauri mahamahana ebeni haeamonaka. (Tirama ena aoko'o hoanai wai bamauri toa'ina.) <sup>6</sup> Keriso Iesu aonai Tirama ehore ia kipokia ebamikiri haeamonaka, kupai ia kipokia ebamiati haeamonaka. <sup>7</sup> Weiana hanona ena rabo harai ebaihanaka Keriso Iesu aonai, ena aoko'o hoana aea eapa'ua aiho kebawaira tinana bariu mai waira ranikiai maearima kate'iohina paunai. <sup>8</sup> Pokina Tirama ena aoko'o hoana paunai wai Keriso toa'ikakaumana hanona eba maurinimi. Neiana hanona wai kipomi emi taburai aha'i, ia Tirama ena beruberu. <sup>9</sup> Aka harai paunai aha'i, ua buonai tai ha kipona a'i keapa. <sup>10</sup> Aika hanona Tirama eabainaka, Keriso Iesu aonai ebaramanaka aka namokia ibabaikia paunai, weiana Tirama aba eba'oru baihana hanona aika ua kahamauri aiho.

*Aika Kahabahamomo Keriso Aonai.*

<sup>11</sup> Ua buonai tomoraonana, 'uainai ramai hanona wai rama haeai haumi, weiakia itare haukia na tehoma haukia hanona wai teaparinimi 'itare aha'i haumi'. (Weiana hanona hauani ahanai mai maearima imakiai tebabaina.) <sup>12</sup> Tomoraonana, rani weianai wai hanona Keriso a'i to'iohina, Tirama etina'anakia haukia Isaraela haukia baiatakiai wai hanona aha'i, wai 'eka haeai haumi. Haeamona 'abi'uai rauhubuna herenai wai maearima 'etemi, hanopakai emi buabeni aha'i, mai heremiai Tirama aha'i aonai tomiaho. <sup>13</sup> Wai 'uainai atau'ai tomiaho haumi, bariu hanona Keriso Iesu aonai ia aruarunai emaiainimi Tirama herena. <sup>14</sup> Keriso hanona aika eka baibua, ia huaninai Iuda haukia mai rama haeai haukia baiatakiai ikaiabu i'aana tabana etapana, terarua ebahamomonakia, <sup>15</sup> ia Iuda ekia rauhubu weiana mai rauhubu 'abikia tererenakia tabakia ikoikia ebaorenakia. Pokina Iuda haukia mai rama haeai haukia terarua hanona ia kipona aonai rama mahamahanai kebaramana, taeara neianai

baibua ebabaina. <sup>16</sup> Haeamona matiu ibiri ropo ahanai Keriso ehore rama rua neiakia ebahamomonakia ebairarao ainakia Tirama herenai. Neianai hanona ekia bai'oata ebapuana. <sup>17</sup> Keriso emai wai rama haeai haumi atau'ai haumi heremiai baibua pouna namona eiroro aina haeamona herenai Iuda haukia abomo herekia baibua pouna namona eiroro aina. <sup>18</sup> Keriso paunai aika ikoikai Iuda mai rama haeai haukia Auba Robe hamonai kahaeao Hamaka herena.

<sup>19</sup> Ua buonai wai bariu hanona maearima 'etemi aha'i 'ao aru haumi aha'i, wai hanona Tirama ena maearima robekia kipokia itubu hamomona mai Tirama ena itu maearimami. <sup>20</sup> Wai hanona itu 'abana, iuhubeau haukia mai mahabanai haukia tebakorina hauna ahanai wai tokori 'au, Keriso Iesu ia kipona itu kupuana piharanai eao. <sup>21</sup> Keriso aonai itu tabakia maikoina niara'au nikori niapa'ua marea robeai niao Obiapaka aonai. <sup>22</sup> Ia aonai wai rama haeai haumi abomo Iuda haukia kipokia itu hamonai nibakori haeamonimi Tirama ena miaho 'ekana keao ena Auba Robe aonai.

### 3

#### *Paulo Rama Haeai Haukia Ekia Iroro Hauna.*

<sup>1</sup> 'Eka neiana buonai, au Paulo nahina benimi au hanona Keriso Iesu ena aka paunai nawapura wai rama haeai haumi emi namo itabuna paunai. <sup>2</sup> Pa'e wai 'uru aba tona Tirama ena aoko'o hoanai aka neiana ebena'u wai ibaraimi taaranai. <sup>3</sup> Tirama ena raona bunina hanona here'uai ebawaira tinana, ba au ahore arere 'uai 'abi bita 'aki aokiai. <sup>4</sup> Weiana katotuabina raninai, e'u 'iobi Keriso ena raona ebuni tabana a'ina hauna aba kato'iobina. <sup>5</sup> Rani 'uaikia aokiai hanona Tirama raona bunina neiana maearima a'i eba'iobinakia, ia bariu hanona Tirama ehore ena Auba Robeai ena iuhubeau haukia robekia mai ena mahabanai haukia robekia herekia ebawaira tinana. <sup>6</sup> Ebuni tabana hanona neiana, pou namona paunai rama haeai haukia Keriso Iesu aonai Iuda haukia kipokia Tirama ena banamo hamona katea'i haeamona, hauani hamonai keba haeamonakia, ba 'abi'uai weiana Tirama ebenakia Keriso Iesu paunai hauna

katea'i haeamo. <sup>7</sup> Tirama ena aoko'o hoana paunai ena hiabu ao'uai eaka taaranai pou namona ihinana hau'uai aeao. <sup>8</sup> Tirama ena maearima ikoinai baiatakiai au hanona taba aha'i 'abana, iamo Tirama aoko'o hoana neiana ebena'u hanona rama haeai haukia herekiai Keriso ena obia eapa'ua ki'a baha mai a'i kepua hauna pouna kairoro aina. <sup>9</sup> Taba ikoinai ebabainakia Tiramana ena raona bunikia 'uaina raninai emai mo bariu ihau bo'okia aba teao aonai ehore bunina hauna aea kebakarahi aihona hanona au kahore kahina pounakia maearima ikoikia herekiai. <sup>10</sup> Weiana buonai bariu Tirama ena marea maearimakia paukiai poki anerukia mai hiabu aubakia weiakia kupai temiaho haukia abomo Tirama ena aotipa haeihaeai kate'iobina. <sup>11</sup> Neiana hanona aba wa'i baha Tirama eraonana eka Obiapaka Keriso Iesu aonai kebabaina hauna ebabaina. <sup>12</sup> Aika Keriso aonai ia naha a'ikakaumana paunai kahatabura mai nuako'oka kahaeao Tirama wairanai. <sup>13</sup> Ua buonai nanoinimi, au wai paumiai nahau haiara hauna aomi a'i kebaoao, pokina weianai wai emi nuabi katotabu ahina paunai.

#### *Keriso Ena Raona'au Kato'iobina.*

<sup>14</sup> Weiana paunai Hamaka wairanai nakaipehu nabahuba'ari, <sup>15</sup> rama ikoinai kupai mai hanopakai hanona ia herenai terama mai atakia ebaibeni, <sup>16</sup> Tiramana nanoina, ia ena obia tabakia nuabikia aokiai Auba Robe hiabunai aubami keba taburanakia, <sup>17</sup> ba emi a'ikakauma paunai Keriso wai aomia kemiaho. Au nabahuba'ari wai raona'au aonai katoramu mai katokori 'ini harai. <sup>18</sup> Weiana wai Tirama ena robe haukia ikoikiai kipokia tabura kato'a'i haeamona, Keriso ena raona'au ena mata mai ena homa'a, ena ro'e mai ena 'oura aea homana hauna kato'iobi haraina. <sup>19</sup> Ba kato'iobina, Keriso ena raona'au hanona ekabanai ki'a baha ba aika eka 'iobi, weiana Tirama ena taba ikoikiai kebabonunimi.

<sup>20</sup> Aika aokai niaka Tiramana ena hiabu hanona pahanoina 'ao paharaona tabakia ikoikiai kebenaka ketaina. <sup>21</sup> Tirama ena nuabi hanona Tirama ena marea haukia aokiai mai Keriso Iesu aonai rani ikoinai kemiaho keaomo banaibanai! Amen.

## 4

*Kahabahamomo Keriso Hauanina Aonai.*

<sup>1</sup> Au Paulo Obiapaka ena aka ababaina buonai wapura itunai tekaiabuna'u, ba wai Tirama eaparinimi haumi nabahi ahinimi ia ena nuatae maurinai katomiaho. <sup>2</sup> Rani ikoinei kato'aiaunu, katomamata, katobakiro, raona'auai ha ha emi puma 'ekakiai katobarai barai.

<sup>3</sup> Auba Robe bahamomo weiana ebenimi baibua ai ebahamomonimi hauna kato'ini bena. <sup>4</sup> Weiana Keriso hauanina hanona hamona, Auba Robe abomo hamona, ihobonai mo Tirama eaparinimi ebahamomonimi buabeni hamona weiana aonai katomiaho. <sup>5</sup> Obiapaka abomo hamona, a'ikakauma abomo hamona, 'uere robe abomo hamona. <sup>6</sup> Tirama abomo hamona, ia hanona maearima ikoikai Hamaka, ia hanona maearima ikoikai arakiai, mai maearima ikoikai aokiai niaka, abomo maearima ikoikai aokiai nemiaho.

<sup>7</sup> Ia Keriso aika ha ha ena ibeni haeai tohokia ebenaka, aoko'o hoana weiana hanona kipona ena nuatae ihobonai ewatenakia maearima ha ha ebenakia. <sup>8</sup> Puka robenai na erere aihona, "Ia ekara'au eao 'ubi 'akina raninai, wapura haukia eaoainakia mai maearima beruberu ebenakia."

Sal 68:18

<sup>9</sup> 'Abi neiana 'Ia ekara'au eao 'ubi' anina hanona taba? Weiana anina hanona ia aba eriri 'uai eao hano benunai.

<sup>10</sup> Eao hano benunai hauna haeamona ekara'au emue eao kupa 'ubina 'akinai hanona ena obiai 'eka maikoinai mai taba ikoikai kebahu abunakia paunai.

<sup>11</sup> Ia hauna kipona ibeni ena robe haukia ebenakia hanona baika iuhubeau haukia kateao, baika mahabanai haukia kateao, baika ebaneria haukia kateao, baika hanona iroro haukia mai baika bamarere haukia kateao. <sup>12</sup> Keriso ibeni weikia ebaibeni hanona Tirama ena robe maearimakia ikoikai keba'orunakia marea akakia ibabaikiai, marea ketabura kekori 'ini weiana hanona Keriso hauanina. <sup>13</sup> Taeara neianai aika ikoikai kahamai kahabahamomo Tirama Nahuna kaha'ikakaumana mai kaha'ioibina keao mo Obiapaka aonai kahakiro harai, Keriso ena hoahoa namona maikoina ihobonai

kahaeao. <sup>14</sup> Ba aika hanona miori papakia 'abakiai a'i kahaeao, maearima weikia ekia bai'oi 'abikiai mai ekia iriara ai a'i kate'oinaka matoha baura 'abana keabua abuaonaka. <sup>15</sup> Ia aika raona'au ai 'abi tohana kahahinana hanona taba ikoikai aokiai aika kahapa'ua Keriso 'abanai kahaeao, ia hanona aika eka ara hauna. <sup>16</sup> Keriso aonai hanona hauani maikoina eara'au haeamo abomo hauani maikoina hanona ibakai nihore nia'i 'inina ba hauani puapuakia ha ha ikau ena aka ai tibarai barai tiaka, weiana hanona hauani maikoina raona'auai kipona nibapa'uana nibakori 'inina.

*Mauri Mahamahana Keriso Aonai.*

<sup>17</sup> Ua buonai Obiapaka atanai au wai nahina benimi abomo naba raonanimi, bariu wai emi miaho maurina hanona a'i keao rama haeai haukia ekia mauri 'abana, ia ekia raona hanona anikia aha'i. <sup>18</sup> Ia aokia hanona tewapura abunakia. Tirama ebaibeni maurina hanona ia herekiai aha'i, pokina ekia raonaraona aha'i mai ekia ao tubu paunai. <sup>19</sup> Ia taba tibabaina hauna a'i tihaumaea aina hoahoa ki'a obokia tibabai, abomo hoahoa 'opukia tenuataeai ki'a bahanakia.

<sup>20</sup> Ia wai Keriso pouna hanona ua a'i tomarereai aihona. <sup>21</sup> Aba'ioibina wai Keriso pouna tona abomo 'abi tohana weiana Iesu aonai nemiaho hauna taearana teba'ioibinimi. <sup>22</sup> Ua buonai hauanimi 'ai'aina weiana mauri ki'a obona taearanai eba miahonimi hauna katobakuri ahina, weiana hauani ena nuatae bai'oikia tihore kipona nia'i ki'ana. <sup>23</sup> Aomi mai emi raonaraona hanona katobamaha mahanakia. <sup>24</sup> Hauani mahamahana katobatotona, weiana hanona Tirama ihaihanai erama hauna 'abi tohanai ebero mai erobe.

<sup>25</sup> Ua buonai wai ikoimiai bai'oi katohabona, heremi haukia herekiai 'abi tohokia katohina, pokina aika ikoikai hanona hauani puapuakia ha ha Keriso hauanina hamona aonai. <sup>26</sup> Aomi tiopuere raninai kato'ima 'ima harainimi ki'a a'i katobabaina, beraura maikoina aomi mai opuerekia katomiaho hanona a'i kenamo. <sup>27</sup> Satani 'ekana a'i katohorena. <sup>28</sup> Nibainao hauna bainao mehabona meaka kipona taburanai aka namona mebabaina, ba weianai uraru haukia kebarainakia. <sup>29</sup> Pinamiai 'abi ki'a

obokia ha a'i katohina 'apuana, ia 'abi namokia katohina, aiami tiona haukia kebarainakia katetabura, ba emi 'abi tohinana hauna kehore namo kebenakia. <sup>30</sup> Tirama ena Auba Robe aona a'i kato-baoko'ona, ia hanona Tirama ena batoha hoana wai heremiai keao rani weiana kemai hanona kebamaurinimi. <sup>31</sup> Baibata nuaki'a opuere baiara mai 'uahi'uahi neiakia katohabonakia, haeamona baki'a raonaraonakia haeai haeai katohabonakia. <sup>32</sup> Ia 'abami ha ha herekiai katorabo harai mai aomi keberuberu, ba ha ha 'abami ekia ki'a katohina hao, ihobona Tirama ehore Keriso paunai emi ki'a ehina haonakia 'abana.

## 5

### *Ea Maurina Aonai Kahaka'a.*

<sup>1</sup> Weiana paunai tomobahobo Tirama ihaihanai tomoao, pokina wai hanona Tirama nahuna mai ena raona'au. <sup>2</sup> Ba kipomi ha ha katoraona'au ainimi Keriso aika eraona'au ainaka 'abana. Aika paukai ia kipona ena mauri ebaibeni beruberu tabana timina 'orimona mai ki'a ia'i obokia tabanai eao Tirama wairanai.

<sup>3</sup> Wai baiatamiai nabau, raona ki'a obokia mai uhore 'abi'abikia ha pinamiai a'i katohina 'apuana a'i katobabainakia, pokina neiakia hanona a'i tebero Tirama ena maearima robekia herekiai. <sup>4</sup> Abomo 'ori ki'a obokia, bapo'opo'o 'abikia, mai 'abi 'ai'ai 'abikia, weiakia hanona a'i tebero wai heremiai, ia Tirama hereinai banamo 'abikia katohina hanona enamo. <sup>5</sup> Wai pato'jobina hanona penamo, nabau, raona ki'a 'ao uhore hauna hanona kaiba'uku nekuti aina hauna, ba maearima uahomana hanona ena itau aha'i Keriso mai Tirama ekia obia aiarana aonai.

<sup>6</sup> Hau ha ena po'o 'abikiai a'i ke'oinimi, pokina taba neiakia paukiai Tirama ena aohaiara kemai weiakia aia a'i tiona haukia herekia. <sup>7</sup> Weiana paunai wai hanona maearima uahomakia kipokia a'i katobaihau. <sup>8</sup> 'Uainai wai hanona wapura aonai tomiaho, ia bariu wai hanona Obiapaka ena ea aonai tomiaho, ua buonai wai hanona ea maearimamiai katoao. <sup>9</sup> Ea buabuana hanona raona namokia, aka berokia, mai 'abi tohakia maikoina nibawaira tinana. <sup>10</sup> Ua buonai tomobahobo Obiapaka aona ibaonamona

akana taba hauna kato'iohi haraina. <sup>11</sup> Maearima wapura akakia weiakia anikia aha'i tibabainakia haukia kipokia a'i katobaihau, ia katoba karahinakia aka weiakia hanona beho akakia. <sup>12</sup> Weiana taba bunianai tibabai haukia ihinakia hanona mai haumaeakia buonai a'i kahinana. <sup>13</sup> Ba taba ikoinai kahamai ainakia ea aonai hanona katekere harai. <sup>14</sup> Pokina taba ikoinai tiwaira tina harai haukia hanona eai tiao. Neiana paunai na ti'abi aiho,

“Parua haumu e,  
mono'a, 'ariai momikiri,  
ba Keriso oi kebaeani'o.”

<sup>15</sup> Weiana paunai emi miaho maurina hanona kato'ima haraina, po'opo'o haukia 'abakiai a'i katoao ia aobero haukia 'abakiai katoao. <sup>16</sup> Bariu aka ranikia ebenimi haukia a'i katobaore 'abaeanakia, pokina rani neiakia hanona rani ki'a obokia. <sup>17</sup> Weiana buonai po'opo'o ai a'i katoao, ia Obiapaka ena nuatae aea homana hauna kato'iohi haraina.

<sup>18</sup> Waini beinai a'i katoinu 'ari, weiana hauna kehore wai kea'i ki'animi, ia 'ekanai Auba Robe mehore mebabonunimi. <sup>19</sup> 'Abami kipokia tubahamomo aonai Salamoai, hui'ai, mai auba huikiai kato'abi'abi, aomiai Obiapaka katohui aina mai katobanamona. <sup>20</sup> Rani ikoinai eka Obiapaka Iesu Keriso atanai banamo 'abina Hamaka Tirama kahabena taba ikoikiai paukiai.

### *Hawainibe Mai Marea.*

<sup>21</sup> Ha ha kipomi 'abami aiakia kato'ainakia ihobona Keriso tumariki aina 'abana.

<sup>22</sup> Babi'e e, atawami aiakia katoka'ai ihobona Obiapaka aiana patoka'aina 'abana. <sup>23</sup> Pokina hau hanona babi'e kepoki aina ihobonai mo Keriso marea nipoki aina 'abana. Tirama ena marea haukia to'una hanona ia hauanina, ba ia kipona hauani weiana nibamaurina. <sup>24</sup> Bariu hanona Tirama ena marea haukia Keriso aiana nika'aina ihobonai babi'e abomo taba ikoikiai aokiai atawakia aiakia kateka'ainakia.

<sup>25</sup> Hau e, atawami katoraona'au ainakia ihobona matoha Keriso marea haukia eraona'au ainakia, weiana ia kipona ena mauri ebaibeni ia herekiai 'abana. <sup>26</sup> Neiana ebabaina hanona Tirama ena marea haukia beiai eba'uerenakia mai



Tirama ena 'abiai ebamaha mahanakia haeamona ebarobenakia Tirama 'euna. <sup>27</sup> Pokina Tirama ena marea haukia ikoinai weiana hanona kenamo harai abomo keiroro harai mai behona keaha'i, ia a'i kemani'a mani'a 'ao a'i kemaruru ki'a baika uahomakia herenai kateaha'i, weiana hauna ia kea'ina 'eunai keao. <sup>28</sup> Taeara neiana ihobonai hau atawakia kateraona'au ainakia, matoha kipokia hauanikia tiraona'au aina 'abana, hau atawana niraona'au aina hauna hanona kipona abomo niraona'au aina. <sup>29</sup> Weiana hau ha kipona hauanina a'i ni'oatana, ia nibanianina nia'ia'i haraina, ihobona mo Keriso ena marea haukia nibanianinakia ne'imanakia 'abana. <sup>30</sup> Pokina aika a'ikakauma hauka hanona Keriso hauanina puapuakia. <sup>31</sup> Puka robenai na terere aihona, 'Neiana paunai hau hanona hamana hinana kehobonakia, atawana ohi katebahamomo, ba terarua hauani hamonai kateao.' <sup>32</sup> Neiana hanona 'abi bunina apa'uana, ia au hanona Keriso mai ena marea haukia robakia nahuna katebahamomo. <sup>33</sup> Neiana buonai wai hau ikoimiai atawami katoraona'au ainakia ihobona kipomi turaona'au ainimi 'abana. Haeamona babi'e abomo atawana kemariki aina.

## 6

### *Miori Uaho Mai Hama Hina.*

<sup>1</sup> Miori mai uaho e, hinami hamami aiakia katoka'ainakia, pokina neiana katobabaina hanona ebero Obiapaka wairanai. <sup>2</sup> Hinami mai hamami katomariki ainakia. Weiana hanona Puka robenai ena rauhuhu 'abina kori'uaina haeamona mai 'abi'uaina. <sup>3</sup> 'Abi'uai hanona neiana, emi mauri kenamo mai hanopakai emi miaho maurina hanona kehoma'a.

<sup>4</sup> Hama hina e, nahumi a'i katoba opuerenakia, ia Obiapaka ena bairobe ai mai ena ba'iobi 'abikiai katoba apa'uanakia.

### *Ta'ara'i Hauna Mai Poki Hauna.*

<sup>5</sup> Ta'ara'i haumi e, hanopakai tipoki ainimi haukia aiakia katoka'aina mai marikimi abomo aomi tohakiai mai ta'umi, ihobona Keriso aiana tuka'aina 'abana. <sup>6</sup> Kateihanimi aokia katoba aonamonakia paunai a'i katoaka, ia Tirama ena nuatae akana katobabaina mai aomi ikoinai, ihobona Keriso ena

ta'ara tua'ina haumi 'abana. <sup>7</sup> Aomi namonai katoaka, ihobona Obiapaka ena aka tubabaina 'abana, ia maearima ekia aka 'abana aha'i. <sup>8</sup> Pokina wai aba to'jobina Obiapaka hanona ta'ara'i haukia 'ao ta'ara a'i tia'i haukia re'a maearima ha ha aka namokia tibabai haukia 'arakia kebenakia.

<sup>9</sup> Poki haumi e, taeara ihobonai katobabai harai emi ta'ara'i haukia herekiai, ia a'i katobata'unakia, kato'jobina ia mai wai emi poki hauna hanona hamona kupai nemiaho, ia hanona maearima ikoinai ekia babai ihobokiai mo neihanakia ia tai ha'i nitaina.

### *Tirama Ena Huari Tabakia Kahabatonakia.*

<sup>10</sup> E'u 'abi orena hanona neiana, Obiapaka kipokia katobahamomo ena hiabuai kebahiabunimi, ena taburai katotabura.

<sup>11</sup> Tirama ena huari tabakia ikoinai haumiai katoba totonakia, ba tiaporo ena aotipa akakia katokaiabu harainakia.

<sup>12</sup> Pokina aika hanona maearima a'i nahahuarinakia, ia auba ki'a obokia weiakia auba ekia poki haukia, hiabu aubakia, hanopaka wapurana neiana tipoki aina aubakia, mai huari aubakia ki'a obokia kupa mai hanopaka baiatanai temiaho haukia kipokia nahahuari.

<sup>13</sup> Weiana buonai bariu Tirama ena huari tabakia ikoikiai katoa'i taeanakia haumiai katohore 'aunakia, pokina rani ki'a obona kemai raninai wai hanona aba katokori 'ini, ba huari weiakia katobaore harainakia murinai hanona 'ekamiai katokoroti mai taburami.

<sup>14</sup> Ua buonai katokori 'ini, 'abi tohana katohinana hanona huami ihaina huamiai katohai 'inina, mai aka bero hanona haharami i'aeana haharamiai katohore 'auna. <sup>15</sup> Mai katoba'oru harai pou namona weiana baibua nibaramana hauna katoiroro aina aomi ikoinai hanona emi tamaka 'abana katoaba'auna.

<sup>16</sup> Weiakia ahakiai rani ikoinai a'ikakauma ketina katoa'i taeana, weiana hau ki'a obona ena paki mai irubakiai nibakokinimi hanona katoba'oronakia. <sup>17</sup> Tirama ena bamauri hanona katoa'i taeana emi huari baurabauranai keao, mai Tirama ena 'abi weiana Auba Robe nibenimi hauna katoa'ina emi karebai keao. <sup>18</sup> Rani ikoinai Auba Robe ena hiabuai katobahuba'ari,

taba haeai haeai ahakiai mai emi nuatae ikoikiai bahuba'ari ai Tirama katonoina. Aomia neiana kemiaho katomaha no'a rani ikoinai Tirama ena robe maeari-makia ahakiai katobahuba'ari. <sup>19</sup> Au abomo aha'uai katobahuba'ari, weiana rani tabakiai au kairoro ranikiai Tirama 'abi kebena'u weianai hanona kanu-ako'o pou namona aonai tebuni 'abikia kabawaira tinanakia. <sup>20</sup> Au hanona Tirama kipona euhuna'u pou namona neiana kairoro aina ba weiana paunai au wapura itunai namiaho mai tabiri'u, katobahuba'ari weianai panuako'o pou namona pairoro aina Tirama ena nuatae ihobonai.

<sup>21</sup> Tukiko, uaho'abaka raona'auna mai Obiapaka ena ta'ara ia'ina hauna namona, taba ikoinai aba kehina benimi weianai wai aba kato'iohina au hanona aea homa'u haeamona taba nababaina.

<sup>22</sup> Nauhuna niwahi heremi ena poki hanona neiana, wai kato 'iohina ai hanona aea homamai, weianai aomi peba taburanakia.

<sup>23</sup> Nabahuba'ari Hamaka Tirama mai Obiapaka Iesu Keriso katehore ekia baibua, raona'au mai a'ikakauma uaho'abamai ikoimiai katebenimi.

<sup>24</sup> Tirama ena aoko'o hoana hanona ikoimiai weiami eka Obiapaka Iesu Keriso turaona'auai to'ona haumi heremiai kemiaho.

## Paulo Ena Marere PILIPO Haukia Herekiai

### *Puka Aona Irerena 'Abina*

Pilipo hanona aiara apa'uana ha Macedonia ai (Iuhubeau 16), Paulo ehore pou namona eiroro aina 'ekana. Weiana murinai, eao 'eka ha hanona wapura ituai tekapo totona, ba pou eona hanona maearima baika tehore Pilipo haukia ekia a'ikakauma tibahaeaina. Iamo puka neiana aonai hanona atetua weiakia a'i kahatabu ahinakia. Paulo ena a'ikakauma hanona Iesu aonai ehoreti tohana, ua buonai ia hanona aona namonai. Paulo ena mauri aonai hanona ehau haiara, eurraru mai hauani tabakia enuatae ainakia.

Ua buonai puka neiana irerenai hanona Paulo enuatae namo 'abina apa'uana kebaibeni pokina Pilipo haukia ekia barai barai ia herenai hanona eapa'ua ki'a baha paunai. Mai taba ha hanona, Paulo ena nuatae apa'uana hanona ekia a'ikakauma kebatabura muenakia katekori 'ini, pokina a'i temeraona Paulo hanona bariu aba wapura itu aonai ba a'i temeako'o mue. Paulo ia nehina benakia, beruberu weiana Tirama herenai tetabu ahina hanona mauri mahamahana ba weiana hanona Keriso aonai tetabu ahina. Paulo ena nuatae apa'uana hanona Pilipo haukia Keriso ena hoahoa mai ena babai katea'inakia katemauri ainakia. Weiana Keriso kipona aona eba'aiaununa, ba aka weiana Tirama ehore ia ebena hauna katebaore haraina.

### *Puka Paipana Apa'uakia*

- a. Roba iahu. (1.1-11)
- b. Paulo kipona ena mauri pahihikia. (1.12-26)
- c. Mauri Keriso aonai hauna. (1.27—2.18)
- d. Timoteo mai Epaprodito ohi ekia 'abi. (2.19-30)
- e. 'Ou haukia mai ki'a 'abi'abikia. (3.1—4.9)
- f. Paulo mai ena hau Pilipo haukia. (4.10-20)
- g. 'Abi orekia. (4.21-23)

*Banamo 'Abina.*

<sup>1</sup> Paulo mai Timoteo, ai Keriso Iesu ena ta'ara ia'ina haumai, marere neiana tarerena niwahi wai robe haumi ikoimiai Pilipo ai tomiaho Keriso Iesu tua'ikakaumana haumi mai iha'ini haukia mai tibarainakia haukia kipokia heremi. <sup>2</sup> Tabahuba'ari Tirama aika hamaka mai Obiapaka Keriso Iesu ekia aoko'o hoana mai baibua hanona ahamiai kemiaho.

### *Paulo Ena Bahuba'ari Pilipo Haukia Paukiai.*

<sup>3</sup> Rani ikoikiai naraonanimi aonai e'u Tirama nabanamona. <sup>4</sup> E'u bahuba'ari ai hanona mai aonamo'u nabahuba'ari wai ikoimiai paumiai, <sup>5</sup> pokina emi a'i turi pou namona akana herenai ia'i ramana raninai emai mo bariu. <sup>6</sup> Weiana buonai aba a'ioibina Tirama aka namona weiana aomiai ebaramana hauna aka weiana nibabaina keao mo Keriso Iesu ena mai mue raninai kebaore haraina. <sup>7</sup> Taeara neianai e'u raonaraona ikoimiai heremiai hanona ebero, au hanona wai naraona to'o baihanimi, pokina bariu au nawapura aonai abomo pou namona auhore aina abakori haraina ranikiai ikoikiai toa'i turina'u Tirama ena aoko'o hoana aonai. <sup>8</sup> Au Keriso Iesu aonai ikoimiai aea naraona'au aihonimi hanona Tirama ne'ioibina.

<sup>9</sup> E'u bahuba'ari hanona neiana. Emi raona'au hanona pekupu to'ona 'ioibiai mai aoberoai, <sup>10</sup> weiana paunai wai hanona taba namokia tohakia katotina'anakia, aomi kemahamaha mai beho a'i katoa'ina keao mo Keriso ena mai mue raniai, <sup>11</sup> aka bero buabuakia Iesu Keriso 'eunai temai haukiai katobonu, weianai Tirama ena nuabi ibawaira tinana mai ibanamona.

### *Paulo Wapura Itunai Emiaho Pou Namona Ibarainai eao.*

<sup>12</sup> Uaho'aba'u ikoimiai e, au nanuatae kato'ioibina taba weiana here'uai erama hauna hanona pou namona ibarainai eao. <sup>13</sup> Pokina obia 'arana Kaisa ena itu i'imana haukia ikoinai mai maearima ikoinai te'ioibina au hanona Keriso paunai wapura itunai namiaho. <sup>14</sup> Au nawapura paunai, uaho'abaka bo'ona Obiapaka niba nuako'onakia, a'i tita'u Tirama ena 'abi tehinana mai taburakia.

<sup>15</sup> 'Abi tohana Keriso pouna teiroro aina aonai baika hanona mai wamurukiai mai baiarakiai, ia baika hanona aokia namokiai. <sup>16</sup> Baika neiakia hanona

raona'auai teiroro aina pokina te'jobina aka neiana Tirama ebena'u hanona pou namona kauhore aina. <sup>17</sup> Baika weiakia hanona Keriso pouna aokia namokiai a'i teiroro aina, ia ekia nuatae hanona atakia patebapa'ua, mai ekia raona hanona wapurai namiaho aonai e'u haiara patebapa'uana. <sup>18</sup> 'Abina aha'i. Bai'oi'ai 'ao tohakia'i teibiu ibiu, ia taba apa'uana hanona Keriso pouna aba teiroro aina, neiana paunai au naonamo. 'E, au hanona kaonamo to'ona.

<sup>19</sup> Au a'jobina weiana emi bahuba'ari ai abomo Iesu Keriso Aubana ena baraiarai ai, taba here'u ai erama hauna kehore ibamauri'u ai keao. <sup>20</sup> E'u nuatae apa'uana mai e'u buabeni hanona neiana e'u aka aokiai a'i kahaumaea, ia 'uaina ranina'i ihobonai bariu abomo panuako'o harai, mauriai 'ao 'ariai re'a rani ikoikia'i hauani'u ai Keriso atana kabapa'uana. <sup>21</sup> Pokina e'u mauri aonai hanona Keriso, e'u 'ari ai abomo namo katabu ahina. <sup>22</sup> Ia hauani maurina'i kami-aho aka namokia kababai mo ranina'i, ia a'i na'jobina aeana hauna katina'ana. <sup>23</sup> Au hanona 'eka rua baiatanai nami-aho, nanuatae mauri neiana kahabona kaeao Keriso herena, weiana hanona kenamo here'u ai. <sup>24</sup> 'A mauri'u ai nami-aho hanona taba apa'uana tohana pokina kabarainimi paunai. <sup>25</sup> Aba a'jobi haraina hanona neiana, au hanona 'eka'u ai kami-aho, mai wai ikoimia'i kipokia kahabahaemo emi a'ikakauma ibapa'uanai mai aonamomi paunai. <sup>26</sup> Weiana buonai au kamue kamai heremiai ranina'i, wai hanona Keriso Iesu aonai emi aonamo keapa'ua au pau'uai.

<sup>27</sup> Taba apa'uana hanona neiana, Keriso ena pou namonai kipomi hoahoa namonai tomobaka'a harainimi. Weiana kawahi kaihanimi 'ao a'i kawahi re'a poumi mo paona, wai hanona raona hamonai tukori 'ini tohuari pou namona ia'ikakaumanai. <sup>28</sup> Taba ikoinai ti'oatanimi haukia a'i katota'u ainakia katotabura. Weiana hanona ia ekia 'ari hoana, ia wai heremiai hanona mauri hoana Tirama herenai nimai. <sup>29</sup> Keriso paunai eberuberu benimi hanona ia ia'ikakaumana mo kipona aha'i, ia paunai katohau haiara. <sup>30</sup> Wai abomo tua'i turina'u huari neiana aonai, weiana

hanona 'uainai toihana'u ihobona, bariu abomo pou tuona au nahuari oho mo.

## 2

*Keriso Aona Ihobonai Ha Ha 'Aiaunuai 'Abami Kipokia Katobapa'uanimi.*

<sup>1</sup> Na'jobina emi bahamomo Keriso herenai nibataburanimi, mai ena raona'au ai nibarainimi. Wai Auba Robe ai tubahamomo, emi aoko'o mai rabo harai 'abami herekia'i. <sup>2</sup> Weiana paunai nabahi ahinimi, raona hamonai e'u aonamo katobapa'uana, raona'au hamonai katomi-aho haeamo, auba hamonai mai nuatae hamonai. <sup>3</sup> Kipomi taba ha a'i katobabaina bai'oata ai 'ao apa ai, ia ha ha 'aiaunu ai 'abami katoba apa'uanakia. <sup>4</sup> Ha ha kipomi emi namo a'i katotabuna, ia 'abami ekia namo katotabuna.

<sup>5</sup> Keriso Iesu aona ihobonai wai abomo katoa'ina.

<sup>6</sup> Keriso hanona taba ikoinai Tirama ihobonai nemiaho, iamo Tirama ohi peihobo hauna a'i eraonana.

<sup>7</sup> Kipona taba aha'i 'abanai ebaona, ta'ara'i haunai eao, maearima ihobokiai erama.

<sup>8</sup> Maearima ihobo hobonai eao aonai,

kipona e'aiaunu aina, Tirama aiana eona eao mo e'ari, weia matiu ibiri ropo 'ubina'i e'ari.

<sup>9</sup> Weiana buonai Tirama ehore ea'i taeana 'ubi 'akinai, ata ebena ata ikoikia'i 'ubikiai.

<sup>10</sup> Kupa ai, hanopaka ai mai hanopaka ba'anai haukia ikoikiai Iesu atanai katekai pehu.

<sup>11</sup> Maearima ikoinai pinakia'i katehina pouna Iesu Keriso hanona Obiapaka, Hamaka Tirama ibanubina.

*Maearima Herekia'i Katoea Bihui 'Abakia.*

<sup>12</sup> Ua buonai, e'u raona'au haumi e, kipokia hamiaho aonai aia'u toka'aina, ia bariu heremiai a'i namiaho ia rani ikoinai aia'u katoka'ainakia emi mauri akana katobaore haraina mai ta'umi mai 'ururu 'ururumi weiana hanona taba apa'uana.

<sup>13</sup> Pokina Tirama hanona wai aomia'i nika ena nuatae taearanai kipomi katobabaina mai hiabuna.



<sup>14</sup> Taba ikoinai atetuai 'ao baihara taeai a'i katobabainakia. <sup>15</sup> Weiana buonai wai a'i katobeho a'i katoki'a, Tirama nahuna namomia katoao, wai hanona beho mai po'o hanopakana aonai tomiaho, ia herekia katoea matoha bihiu kupai 'abakia, <sup>16</sup> weianai mauri 'abina katobawaira tina haraina.\* Keriso ena mai mue raninai au kapa, a'i abeau 'abaea mai a'i aro'ari 'abaea.

<sup>17</sup> Emi a'ikakauma akakia robekia kato-baibeni Tirama herenai hauna ahanai au aruaru'u pekiki oioi pa'ari matoha robe ibaibeni 'abana. Au kaonamo mai au wai kipokia kahaonamo haeamo. <sup>18</sup> Taeara ihobonai wai abomo katoaonamo mai wai au kipokia hamaonamo haeamo.

### *Timoteo Mai Epaprodito.*

<sup>19</sup> Obiapaka Iesu nenuatae raninai nabuabena, Timoteo aba kauhuna kewahi heremi, weiana au abomo poumi kaona raninai katabura. <sup>20</sup> Pokina hau ha ia ihobona here'u ai aha'i, ia kipona mo hanona au ao'u ea'ina wai keiha 'ini harainimi. <sup>21</sup> Maearima ikoinai kipokia ekia nuatae tabakia titabu ia Iesu Keriso 'eunai aha'i. <sup>22</sup> Ia wai to'jobina Timoteo hanona maearima aea homana, ia kipona ebatohana matoha miori ha hamana ebaraina 'abana ebaraina'u, tararua tabahamomo pou namona akana tababaina. <sup>23</sup> Weiana buonai e'u buabeni hanona taba here'u ai aea perama aiho paihana, ba ia kauhu biaina kewahi heremi. <sup>24</sup> Obiapaka aonai naraonana ketaina au kipo'u abomo aba kawahi heremi.

<sup>25</sup> Ia au naraonana ena namo hanona uaho'abaka Epaprodito kauhu muena kewahi heremi, tararua taka haeamo mai tahuari haeamo, ia hanona wai emi iuhubeau hauna wai touhuna e'u nuatae akakia kebabai. <sup>26</sup> Ia hanona ikoimiai niraona ki'a bahanimi aona niaro'ari pokina pouna tona ia hanona neinawa. <sup>27</sup> 'Abi tohana ia einawa ki'a herekai mo pe'ari. Ia Tirama ehore eaoko'o aina ia herenai mo aha'i au abomo eaoko'o aina'u, e'u ao haiara a'i meapa'ua marikina. <sup>28</sup> Weiana buonai e'u nuatae apa'uana hanona nauhuna kewahi heremi, weiana ia katoiha muena rani-nai aomi kenamo, mai au e'u ao aro'ari

hanona ke'aera. <sup>29</sup> Obiapaka atanai ia katoa'i taeana mai aonamomi, maearima ua homakia hanona katomariki ainakia. <sup>30</sup> Pokina Keriso ena aka paunai herekai mo pe'ari, ia ena mauri ereana hanona emi barai barai akana here'u ai epua hauna ia ebaorena.

## 3

### *Keriso Ia'ikakaumana Paunai Bero Kebenaka.*

<sup>1</sup> 'Abi orenai, Uaho'aba'u e, Obiapaka aonai katoaonamo! 'Abi hamona neiana narere mue rere muena, ia a'i nabaoao, pokina wai kebarainimi.

<sup>2</sup> Aka ki'a haukia waeaha 'abakia weiakia kato'ima 'ima harainakia titare 'abaeanakia haukia herekia kato'ima harainimi. <sup>3</sup> Ia aika hanona itare hauka tohaka, aika Tirama nahakuti aina ena Auba Robeai, Keriso Iesu nahapaina, hauani ena hoahoa a'i naha a'ikakaumanakia. <sup>4</sup> Au abomo hauani hoahoana ia'ikakaumana a'jobina. <sup>5</sup> Au arama 'oru'oru'u ai wapu 'ababani aonai tetarena'u. Isaraela maearima'u, Beniamina ena itubu hau'u, Heberu hau'u toha'u. Iuda ekia rauhuhu i'imanai au hanona Parisea hau'u. <sup>6</sup> E'u tabura maikoina abakarahina Tirama ena marea haukia a'oatanakia. Rauhuhu aka bero i'imanai au hanona a'i abeho 'apua. <sup>7</sup> Iamo 'uainai namo tebena'u tabakia bariu Keriso paunai ki'a obokia nahinanakia. <sup>8</sup> Neiakia mo aha'i. Taba ikoikia au naraonanakia anikia aha'i, Keriso Iesu e'u Obiapaka kaha'iohi haraina hanona taba apa'uana. Au taba ikoinai ane'enakia hamarai abaonakia pokina Keriso ka'ina paunai, <sup>9</sup> ia aonai ketabu ahina'u. Au kipo'u rauhuhu ia'inai bero ha a'i atabu ahina, ia Keriso ia'ikakaumanai. Tirama kehore bero kebenaka ia'ikakaumana paunai. <sup>10</sup> Au nanuatae Keriso kipona mai ena mikiri mue hiabuna ka'jobina, mai ia ehaiara aina ihobona au abomo kaonobaina, ena 'ari taearanai au abomo ka'ari. <sup>11</sup> Weianai au nabuabena 'ari ai mikiri mue maurina ka'ina.

### *Paulo Puana Ebeaubena.*

<sup>12</sup> Au a'i na'abi taba ikoinai aba a'ina 'ao aba abaore haraina. Au nau'u ohona mo ka'ina hauna naraonana, weiana hanona

\* 2:16: (16) 'ao katoa'i 'inina.

Keriso Iesu kipona aba ea'ina'u hauna. <sup>13</sup> Uaho'aba'u e, au a'i naraonana 'uai tabana aba a'ina. Ia taba hamomona naro'ari aina, e'u aka muri'u ai hauna nareana, waira'u ai hauna mo natabura aina, <sup>14</sup> puana nabeau bena 'ara'u ka'ina. 'Ara weiana hanona Tirama eaparina'u Keriso Iesu aonai kupai mauri ka'ina.

<sup>15</sup> Ikoikai aba a'ikakaumai hatabura hauka hanona ua paharaona aiho. Ia wai baika taba haeai turaonana raninai, Tirama kehore neiakiai abomo aomi kebaeanakia. <sup>16</sup> Aika taba aba ha'jobina hauna mo taearanai kahaka'a.

<sup>17</sup> Uaho'aba'u e, e'u babai ihobonai kato'ka'a, emai aka mai 'abi tia'i taeanakia haukia katoiha harainakia. <sup>18</sup> 'Uainai rani bo'okia ahina benimi bariu abomo mai haihai'u nahina benimi, bo'ona 'akina hanona ekia mauriai Keriso ena 'ari matiu ibiri ropo ai hauna herenai 'ou haukia tiao. <sup>19</sup> Ekia mauri puana hanona 'ari, pokina ekia tirama hanona hauani ena nuatae tabakia. Ia ekia apa hanona haumaea tabakia, aokia hanona hanopaka tabakia mo tiraonanakia. <sup>20</sup> Ia aika hanona kupa maearimaka eka aiara tohana hanona weia, aika ibamaurika hauna Obiapaka Iesu Keriso naha 'imana kupa ai kemaie mue. <sup>21</sup> Ia kehore taba ikoinai kemaianakia kepoki ainakia, hiabuna weianai huanika ki'a obona kebaheaina ia huanina mai nuabina ihobonai.

## 4

### *Rani Ikoinai Katoaonamo Obiapaka Aonai.*

<sup>1</sup> Weiana buonai, uaho'aba'u e, wai naraona'au ainimi haumi mai naraona ki'a bahanimi haumi hanona e'u aonamo mai e'u apa. Wai hanona ua katokori 'ini aiho Obiapaka aonai au a'abi ihobonai.

<sup>2</sup> Euodia nanoina mai Sunutuke nanoina, terarua aokia katebahamomona Obiapaka aonai. <sup>3</sup> Oi iebebe hamona habuana haumu, e'u nuatae babi'e neiakia rua kobarainakia, pokina ia hanona au kipokia taka haeamo pou namona paunai, abomo Klemento mai au 'aba'u kipokia taka haeamo haukia, ia atakia hanona Tirama ena mauri pukana aonai nemiaho.

<sup>4</sup> Rani ikoinai katoaonamo Obiapaka aonai. Haeamona nahinabe muenimi. Katoaonamo!

<sup>5</sup> Emi rabo harai maearima ikoinai wairakiai katobawaira tinana. Obiapaka hanona aba kemai. <sup>6</sup> Aomi a'i kearo 'ari taba ha herenai, ia taba ikoikai aokia bahuba'ari mai nuatae ai Tirama katonoina mai aomi namonai. <sup>7</sup> Tirama ena baibua hanona maearima ena 'iobi etara haona, weianai aomi mai emi raona raona keiha 'inina Keriso Iesu aonai.

<sup>8</sup> Uaho'aba'u e, 'abi orena neiana. Aka nahomakia katoraona 'ini, aka namokia mai maearima atakia tibanamona akakia ikoikai, toha tabakia, mariki tabakia, bero tabakia, aokia namo tabakia, raona'au tabakia, ibanamo tabakia. <sup>9</sup> Au here'u ai to'jobina, toa'ina, 'uruna tona hauna, 'ao here'u ai toihana hauna katobahobona. Weiana baibua Tiramana heremiai kemiaho.

### *Paulo Pilipo Haukia Ekia Baibeni Ea'ina Namu 'Abina Ehinana.*

<sup>10</sup> Obiapaka aonai naonamo ki'a baha, pokina wai au toraona muena'u paunai, a'jobina 'uainai toraonana'u, ia katobaraina'u taearana aha'i. <sup>11</sup> E'u uraru 'abina a'i nahinana, pokina aba amareaina taba ikoikai aokia aea kamamata aihona here'u ai nemiaho hauna naonamo aina. <sup>12</sup> Au a'jobina taba nahanuatae aonai aea kamauri aiho, abomo au a'jobina taba ena bo'o aonai aea kamauri aiho, taba bunikia aba amarere ainakia ikoikai aba amamata ainakia, ani'ari 'ao mare'a, obia 'ao uraru. <sup>13</sup> Keriso nihore hiabu nibena'u, ia aonai taba ikoinai katabura ainakia.

<sup>14</sup> Ia e'u haiara aokia toa'i turina'u hanona enamo ki'a baha. <sup>15</sup> Wai Pilipo haumi e, to'jobi haraina pou namona airoro aina popounai weia Makedonia ahabona raninai wai Tirama ena marea haumi Pilipoai haumi mo kipokia habarai barai baibeni hoanai. <sup>16</sup> Ia au Tesalonika ai amiaho raninai, rani baika barai barai totiu ahinakia temai here'u. <sup>17</sup> Beruberu a'i natabuna ia buabua natabuna wai ibanamomi buabuana. <sup>18</sup> Au taba ikoinai aba a'inakia, here'u taba aba ebo'o, emi baibeni Epaprodito imanai totiuahi haukia aba a'inakia, weiana hanona timikia namokia mai baibeni tabakia Tirama aba ea'i taeanakia eonamo ainakia. <sup>19</sup> E'u Tirama kehore tokapu tabakia kebeni muenimi Keriso Iesu nuabina aonai kohu namokia tohakiai kebabonunimi. <sup>20</sup> Aika Hamaka Tirama

herenai nuabina kemiaho banai banai.  
Amen.

*Banamo 'Abina Orena.*

<sup>21</sup> Keriso Iesu ena robe haukia ikoikiai herekiai banamo katobenakia. Uaho'abaka here'u ai temiaho haukia ekia banamo tibenimi. <sup>22</sup> Robe haukia ikoikiai neia mai baikā obia 'arana Kaisa ena ituai temiaho haukia abomo banamo tibenimi.

<sup>23</sup> Nabahuba'ari Obiapaka Iesu Keriso ena aoko'o hoana hanona aubami ai kemi-aho.

## Paulo Ena Marere KOLOSE Haukia Herekiai

### *Puka Aona Irerena 'Abina*

Kolose hanona aiara ha Asia hanonai, Epeso haukia herekiai. Paulo hanona a'i eao Kolose, iamo maearima baika euhunakia teao 'eka weianai teiroro, ba temai Koloseai. Paulo pou eona hanona maearima baika tenuatae ekia a'ikakauma katebahaeaina, ua buonai puka neiana ererena kebakori 'ininakia.

Na ehinabe aihonakia, Keriso hanona taba ikoikiai 'arakiai hauna, mai ia iku-paiana mo kehore aika ikoikai kebamaurinaka. 'A taeara haeai baika hanona a'i kateba maurinaka, ia Keriso herenai kateberi parenaka. Pokina Keriso aonai hanona Tirama ehore taba ikoikiai ebaramanakia, haeamona Keriso ena aka ai hanona Tirama taba ikoikiai ea'i muenakia. Keriso hanona aika aokai nemiaho, ba aika nahamahamaha, mai nahanuatae Keriso ena hoahoa mai babai taikia kahatai. Paulo ehore puka neiana ererena, ba maearima rua ebenakia, Tukiko mai Onesimo, ba ia terarua teoaina Kolose haukia tebenakia.

### *Puka Paipana Apa'uakia*

- a. Roba iahu. (1.1-8)
- b. Keriso ena mauri mai ena aka. (1.9—2.19)
- c. Mauri mahamahana Keriso aonai. (2.20—4.6)
- d. 'Abi orekia. (4.7-18)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena iuhubeau hau'uai naeao, mai uaho'abaka Timoteo ohi, <sup>2</sup> Tirama ena robe haumi Koloseai tomiaho uaho'abamai Keriso tua'ikakaumana haumi tarere benimi. Tabahuba'ari Tirama aika Hamaka ena aoko'o hoana mai baibua hanona ahamiai kemiaho.

*Paulo Ena Bahuba'ari Kolose Haukia Paukiai.*

<sup>3</sup> Ai wai paumiai tabahuba'ari ranikia ikoikiai, eka Obiapaka Iesu Keriso Hamana Tirama tabanamona.

<sup>4</sup> Pokina poumi aba taona, Keriso Iesu tua'ikakaumana abomo Tirama ena robe haukia ikoikiai turaona'au ainakia. <sup>5</sup> A'ikakauma mai raona'au neiana hanona emi buabeniai nimai, buabeni weiana hanona wai 'eumi kupai nemiaho, ba neiana hanona 'abi tohana pouna namona aba 'uaina tona aonai toa'i 'inina, <sup>6</sup> pou namona weiana hanona aba emai heremi. Hanopaka maikoinai pou namona neiana aba erama otaraina ni'omu mai nebua'a, ihobona wai Tirama ena aoko'o hoana 'uruna tona mai obona tobo haraina rani weiana kori'uaina emai mo bariu wai baiatamiai erama. <sup>7</sup> Epafra herenai 'iobi weiana toa'ina, ia hanona emai raona'au hauna ai kipokia ta'ara ta'i, Keriso ena aka harai hauna wai heremiai ai atamaiai, <sup>8</sup> ba ia ehore ai ehina benamai emi raona'au hanona Auba Robe aonai.

### *Keriso Ena Mauri Mai Ena Aka.*

<sup>9</sup> Ua buonai ai hanona wai paumiai tabahuba'ari to'o baihana rani weiana poumi taona aonai emai mo bariu. Ai Tirama tanoina Auba Robe kehore 'iobi mai aobero maikoina kebenimi, Tirama ena aotipai kebonunimi ena nuatae kato'iobina. <sup>10</sup> Ba wai hanona Obiapaka ena nuatae maurinai katomiaho, weiana ia aona ibanamona akakia ikoikiai katobabai, aka namokia haeai haeai ikoinai katobabai buabuami katerama ba emi 'iobi Tirama herenai hanona keapa'ua. <sup>11</sup> Ena hiabu ikoinai weiana ena nuabi hiabunai nimai haunai keba taburanimi ba wai katokori 'ini katobakiro ikoikiai aokiai mai aonamomi. <sup>12</sup> Abomo hamaka katobanamona, ia hauna ehore eba'orunimi itau weiana ena robe haukia kipokia katoa'ina ena ea aiarana aonai. <sup>13</sup> Tirama ehore wapura ena hiabu aonai eba maurinaka, haeamona emaiainaka nahuna weiana niraona'au aina hauna ena obia aiarana aonai. <sup>14</sup> Weiana Iesu paunai\* aika eba-maurinaka eka ki'a ehina haonakia.

<sup>15</sup> Keriso hanona a'i nahaihana Tiramana ihaihana, ia erama'uai ba terama tabakia ikoikiai 'ubikiai. <sup>16</sup> Pokina Keriso paunai Tirama ehore taba ikoinai kupai mai hanopakai ebaramanakia, nahaihanakia tabakia mai a'i nahaihanakia tabakia, obia haukia, hiabu haukia, poki haukia, mai rauhuhu haukia, weiakia

\* **1:14:** (14) 'ao ia aruarunai



kupa tipoki aina haukia Tirama ehore taba ikoikiai ebaramanakia ia paunai mai ia 'euna. <sup>17</sup> Keriso hanona aba emiaho ba taba ikoikiai terama, ba ia paunai taba ikoikiai 'ekakiai temiaho. <sup>18</sup> Keriso hanona 'ara, Tirama ena marea haukia hana hauani, ia hanona mauri pokina 'ari mikirimue hobohobona, ua buonai taba ikoikiai aokiai ia hanona waira 'akinai. <sup>19</sup> Weiana hanona Tirama kipona ena nuataeai, ia kipona ena mauri mai ikoina nahuna aonai kemiaho. <sup>20</sup> Ba Tirama enuatae nahuna paunai taba ikoinai kupai mai hanopakai keba hamomonakia katemai ia herena. Nahuna matiu ibiri ropo ubinai e'ari hanona baibua ebabaina.

<sup>21</sup> 'Uaina raninai wai mai Tirama hanona baiatami epa'a ena 'ou haumiai toao pokina emi babai mai raona ki'a paukiai. <sup>22</sup> Ia bariu hanona nahuna hauanina ena 'ari paunai bahamomo akana ebabaina ba wai keaoainimi robe haumiai katoao wairanai katomahamaha mai emi beho 'abikia a'i kehinanakia. <sup>23</sup> Ua buonai a'ikakauma hanona wai emi mauri a'enai keao, weianai katokori 'ini harai pou namona aba tona hauna ena buabeniai a'i tomoibiu. Pou namona neiana hanona maearima ikoikiai herekiai teiroro aina hanopaka aonai, weiana ehore au Paulo eaoaina'u aka hau'uai naeao.

### *Paulo Eaka 'ari Tirama Ena Marea Haukia Paunai.*

<sup>24</sup> Bariu e'u hauhaiara wai paumiai hauna naonamo aina. Au Keriso ena hauhaiara harina ehabona ia hauanina weiana Tirama ena marea haukia paukiai hauna hauani'uai nahoaina. <sup>25</sup> Tirama ehore au ena marea haukia ekia aka hau'uai ebaona'u, hoa neiana ebena'u ena poki hanona wai kabarinimi, Tirama ena 'abi kairoro aina keaomo kabaore haraina 'eka maikoina aonai. <sup>26</sup> Ena 'abi weiana hanona 'uainai emai bariu maearima ikoikiai herekiai ebunina, ia bariu hanona ebawaira tina haraina ena robe haukia herekiai. <sup>27</sup> Tirama enuatae ena raona bunina rama haeai haukia herekiai ebawaira tina hanona aea enuabi aiho hauna ena maearima keba'iohi ainakia, raona bunina weiana hanona Keriso wai aomia nemiaho hauna, ba wai hanona ena nuabi katobuabena

kipokia katowatena. <sup>28</sup> Ai hanona Keriso pouna tairoro aina maearima ikoikiai herekiai, aotipa haeai haeai tarobenakia mai taba'iohinakia weiana maearima ikoinai katenamo harai Keriso aonai ba katabaibeni Tirama wairanai. <sup>29</sup> Aka neiana paunai au naka'ari mai naro'ari Keriso nihore tabura mai hiabu au ao'uai hauna nibaibeni.

## 2

### *Kaha'ikakauma Tabura Bai'oi Kahaba'orona.*

<sup>1</sup> Au nanuatae wai kato'iohina au e'u aro'ari hanona aea homana wai paumiai, mai a'ikakauma haukia weiakia Laodikeai temiaho haukia paukiai, mai au toha'u a'i teiha 'apuana'u haukia abomo paukiai. <sup>2</sup> E'u raona tohana hanona aokia ketabura mai raona'auai katebahamomo, weiana aokia kea, obo kateobo harai keaomo Tirama ena 'abi bunikia kate'iohinakia, weiana hanona Keriso. <sup>3</sup> Keriso aonai hanona aotipa mai aobero kepukia ikoikiai weia ebuninakia.

<sup>4</sup> Au wai nahinabe aihonimi hau ha aoani 'abikiai a'i me'oinimi marikina. <sup>5</sup> Au hau'u hanona wai heremiai aha'i, ia auba'u hanona wai heremiai, iamo emi aka hanona tebero abomo Keriso tua'ikakaumana mai taburami weiana naihanakia hanona naonamo.

### *Keriso Haunai Kotau To'o Hanona Mauri Tohana Koa'ina.*

<sup>6</sup> Ua buonai, wai Keriso Iesu aba toa'ina emi Obiapaka, bariu hanona ia aonai katomiaho. <sup>7</sup> Wai katokori 'ini ia aonai matoha matiu 'anoai niramumu 'abana, ia ahanai emi mauri katobakori'auna matoha itu 'abana, pou namona taba'iohinimi a'ikakaumanai katotabura ba rani ikoinai ia katobanamona.

<sup>8</sup> Kato'ima 'ima harainimi, hau ha ehore maearima ekia aotipa ba'iohikiai mai bai'oikia 'abikiai a'i me'oinimi, ba'iohi weiakia hanona maearima ekia aotipa hoahoakiai timai haeamona auba ki'a obokia hanopaka aonai tipoki haukia herekiai timai, ia Keriso 'eunai aha'i.

<sup>9</sup> Pokina Tirama ena mauri hoahoana maikoina hanona Keriso hauanina aonai nemiaho. <sup>10</sup> Wai emi bahamomo Keriso aonai hanona mauri namona maikoinai aba toa'ina. Keriso hanona poki aubakia ikoikiai mai hiabu aubakia ikoikiai arakiai

nemiaho. <sup>11</sup> Keriso aonai wai hanona aba itare toa'ina, itare weiana hanona maearima imakiai a'i tebabaina, ia itare weiana hanona hauani ena hoahoa ki'a obokiai herekiai katokapare, weiana hanona Keriso ena itare. <sup>12</sup> Wai emi 'uere robeai hanona Keriso kipokia tehoreni, haeamona emi a'ikakaumai Keriso kipokia Tirama ena hiabuai tomikiri mue, hiabu weiana ehore Keriso 'ariai ebamikiri muena. <sup>13</sup> Wai hanona 'uainai aubai to'ari pokina emi ki'a paukiai mai wai rama haeai haumi hauanimiti ki'a obona a'i tetarena, ia bariu Tirama ehore Keriso kipokia ebamaurini, eka ki'a ikoikiai ehina haonakia. <sup>14</sup> Eka babai ki'a obokia irere'au haukia buoka pahabua haukia ia ehore ekakinakia, ea'i obonakia matiu ibiri ropo ubinai ekoko 'aunakia. <sup>15</sup> Matiu ibiri ropo weiana 'ubinai Keriso ehore poki aubakia mai hiabu aubakia ekia hiabu ikoikiai ea'i boinakia ehe amatainakia maearima wairakiai eba haumaeanakia.

### *Aika Hanona Keriso Kipokia Aba Ha'ari.*

<sup>16</sup> Ua buonai hau ha aniani 'ao inuinu paukiai, marea tatukia, 'ao nawa koriahi aonamona tatuna, 'ao Beraura robena, weiakia paukiai a'i teme'uahinimi. <sup>17</sup> Taba weiakia ikoikiai hanona aiaiana 'abana wairai katerama, 'a tohatohana hanona Keriso. <sup>18</sup> Maearima weiakia kipokia aokia tiba'aiaunu bai'oina mai aneru tekuti ainakia haukia ekia raonaraona 'abikiai wai a'i temeba'ehonimi, weiakia hanona kipokia ekia mahabanai 'abi'abikiai tiapa, iamo anikia aha'i. <sup>19</sup> Ia hanona Keriso herenai te'eho, Keriso hanona hauani arana, ia ena iha'ini aonai hanona hauani maikoina nitabura, ibakai mai o'eo'e ikoinai nia'i 'ininakia, ba niapa'ua harai Tirama ena nuatae taearanai.

<sup>20</sup> Wai Keriso kipokia auba ki'a obokia hanopaka ena mauri tipoki aina haukia herekiai aba to'ari raninai, taba buonai wai hanopaka ena rauhuhu tua'i taeanakia ihobona matoha wai hanopaka 'euna, <sup>21</sup> totibaha, "A'i katokai 'apuana," "A'i katoani hobona," "A'i katoa'i 'apuana?" <sup>22</sup> Weiakia ikoikiai hanona anikia kateaha'i abomo katepua pokina ia hanona maearima tebabai mai tiba'ioibai

rauhubukia. <sup>23</sup> Rauhuhu nahomakia ihaihakia hanona aotipa 'abikia 'abana, weiana maearima tihore aneru tekutiai taburanakia aokia tiba'aiaunu bai'oina kipokia hauanikia tiba haiaranakia, iamo aka weiakia hanona ekia baraibarai aha'i pokina raona ki'a obona maearima aonai kekarahi hauna keba'orona hanona a'i ketaina.

## 3

### *Keriso Kipokia Aba Hamikiri Mue.*

<sup>1</sup> Weiana paunai, wai hanona Keriso kipokia aba tomikiri mue buonai aomiai hanona kupa aona tabakia mo katotabunakia, weia Keriso Tirama itipana tainai emiati. <sup>2</sup> Aomiai hanona 'ubi tabakia weiakia katoraonanakia, ia hanopaka neiana tabakia a'i katoraonanakia. <sup>3</sup> Pokina wai hanona aba to'ari, ba emi mauri hanona Keriso kipokia aba Tirama aonai ebunina. <sup>4</sup> Keriso hanona wai emi mauri pokina tohana, ba kewaira tina raninai wai abomo ia kipokia katowaira tina haeamo ena nuabi weiana aonai.

### *Aika Hanona Aba Maearima Mahamahaka.*

<sup>5</sup> Ua buonai hanopaka maurina ena nuatae akakia aomiai temiaho haukia katoba'arinakia, hoahoa neiakia maha porepore, raona 'opukia, rea, raona ki'a obokia, uhore. Uhore hanona kaiba'uku ikutiaina hoana. <sup>6</sup> Pokina hoahoa weiakia paukiai Tirama ena opuere nimai maearima weiakia aiana a'i tia'i taeana haukia herekiai. <sup>7</sup> 'Uainai wai abomo ua tomiaho aiho hauani ena raona taearakiai.

<sup>8</sup> Ia bariu hanona wai hoahoa neiakia ikoikiai katohabonakia, opuere, ao ki'a, raona ki'a, uahiuahi, mai baibata 'abikia, weiakia ha pinamiai a'i katohina 'apuana. <sup>9</sup> 'Abami herekiai a'i katobai'oi, pokina emi mauri 'ai'aikia ekia hoahoa hanona aba tobakuri obonakia. <sup>10</sup> Ia bariu wai hanona hauani mahamahana aba tobatotona. Hauani maha mahana neiana hanona barama Tiramana ena aotipai rani ikoinai kebamaha mahanimiti keaomo ia kipona ihaihanai katoao. <sup>11</sup> Mauri mahamahana neiana aonai hanona luda hauna aha'i hauna 'ao Iuda hauna, tetarena hauna 'ao a'i tetarena hauna, aona a'i niea hauna 'ao

nua ki'a hauna, ta'ara'i hauna 'ao ta'ara a'ia'i hauna, weiakia ikoikiai ekia haeai aha'i, ikoikiai hanona Keriso 'euna, Keriso hanona ikoikiai aokiai nemiaho.

### *'Abaka Kaha'i Turinakia.*

<sup>12</sup> Wai hanona Tirama etina'animi, ebarobenimi, mai niraona'au ainimi maearimami, ua buonai wai kipomi aoko'o, rabo harai, 'aiaunu, mamata mai bakiro katobatonakia emi mauriai. <sup>13</sup> 'Abami katoa'i turinakia mai emi 'abi baitaeai a'i nirama baha aonai ekia ki'a katohina hao ihobona Obiapaka emi ki'a ehina hao 'abana, wai abomo ua katobabai aiho. <sup>14</sup> Ba taba neiakia ikoikiai ahakiai hanona raona'au katohore 'auna, pokina raona'au nihore taba ikoinai niba hamomonakia nibabero 'aunakia. <sup>15</sup> Keriso ena baibua hanona aomi kepoki aina, weiana paunai Tirama ehore eapari haeamonimi hauani hamona aonai. Rani ikoinai banamo 'abina Tirama katobena. <sup>16</sup> Keriso ena 'abi hanona aomia kemiaho keobia, weiana ha ha kipomi aobero maikoinai katoba'iobi mai kato bairobe, Salamo ai, hui ai, auba huikiai Tirama katobanamona mai aomi ikoinai banamo raonaraonai. <sup>17</sup> Emi akai 'ao emi 'abiai, tabakia ikoikiai hanona Obiapaka Iesu atanai katobabai, abomo Hamaka Tirama banamo 'abina katobena Iesu paunai.

### *Bairobe Rama Hamona Aonai.*

<sup>18</sup> Babi'e e, atawami aokia katoka'ainakia, pokina weiana hanona ebero Obiapaka wairanai. <sup>19</sup> Hau e, atawami katoraona'au ainakia, aokia a'i katoba haiaranakia.

<sup>20</sup> Miori mai uaho e, taba ikoikiai aokiai hamami hinami aiakia kato ka'aina, ba weiana hanona Obiapaka aona ibanamona. <sup>21</sup> Hama hina e, nahumi a'i katoba'abi ki'anakia, aokia a'i me'abe'abe marikina.

### *Ta'ara'i Hauna Mai Poki Hauna.*

<sup>22</sup> Ta'ara'i haumi e, hanopakai tipoki ainimi haukia rani ikoinai aiakia katoka'ainakia, ia pateihanimi patebanamonimi paunai aha'i, ia mai aomi ikoinai katoaka ihobona Obiapaka tumariki aina tuaka 'abana. <sup>23</sup> Aka tabana tubabaina hauna katobabaina mai aomi ikoinai, ihobona matoha Obiapaka ena aka tubabaina 'abana ia maearima 'eukia

aha'i. <sup>24</sup> Aba to'jobina Obiapaka itau aba keba'oruna katoa'ina wai aramiai keao, pokina wai hanona emi poki hauna tohana Keriso ena aka haumi. <sup>25</sup> Ia aka ki'a haukia ekia aka ki'a weiana 'arana ihobona katea'ina, pokina Tirama hanona maearima ha a'i nitaina.

## 4

<sup>1</sup> Poki haumi e, emi ta'ara'i haukia bero mai namo taearanai kato'imanakia, pokina to'jobina wai abomo emi poki hauna ha weia kupai nemiaho.

### *Aoka Kebero Kahabhuba'ari To'ona.*

<sup>2</sup> Katobahuba'ari to'o baihana, tubahuba'ari aonai mai aomi beronai Tirama katobanamona. <sup>3</sup> Ai abomo ahamaiai katobahuba'ari ba Tirama kehore emai taeara kekaikauna ena 'abi katairoro aina Keriso ena 'abi bunikia katairoroai, aka neiana paunai au wapura itunai namiaho. <sup>4</sup> Katobahuba'ari ba au 'abi neiana kairoroai karahi haraina aka neiana hanona au ebena'u kababaina.

<sup>5</sup> Katoaobero emi hoahoa katenamo a'i tia'ikakauma haukia herekiai emi aka ranina a'i katobaore 'abaeana. <sup>6</sup> Rani ikoinai maearima aona ibanamona 'abi'abinai katoba'abi 'abi harainakia matoha kikimaru aniani abiabina nibanamona 'abana, weiana ia ekia raona 'abikia katobamue harainakia.

### *Paulo Tukiko Mai Onesimo Euhunakia.*

<sup>7</sup> Tukiko kehore au pou'u maikoinai kehinana, ia hanona uaho'abaka eka raona'au hauna ha, ia abomo aia ibabua 'auna hauna ha, ia hanona au 'aba'u ha Obiapaka ta'arana ta'i haeamo. <sup>8</sup> Nauhuna niwahi heremi ena poki hanona ai emi miaho neia hauna pouna kehinana, ba wai aomi kebataburana. <sup>9</sup> Onesimo nauhuna Tukiko ohi tiwahi, ia abomo aika uaho'abaka eka raona'au mai aia ibabua 'auna hauna ha, ia hanona wai kipokia tomiaho haeamo. Ia katehore taba neia tirama haukia ikoikiai heremiai katehinanakia.

### *Banamo 'Abina Orena.*

<sup>10</sup> Aristako au 'aba'u ha wapura ituna aonai ena banamo neuhuna niwahi, mai Banaba uana Mareko abomo ena banamo netiu ahina wai heremi. (Ba'iobi aba toa'ina Mareko kewahi raninai katoa'i taana.) <sup>11</sup> Iusto atana ha Iesu abomo ena banamo nibenimi. Iuda

haukia neiakia teaihau 'akimo kipokia taka haemo Tirama ena obia aiarana pouna ihinanai, ia ekia a'ituri here'uai epa'ua ki'a baha.

<sup>12</sup> Epafra wai hatia'ami ha Keriso Iesu ena ta'ara'i hauna ena banamo nibenimi, ia hanona rani ikoinai nibahuba'ari to'o baihana wai paumiai katokori 'ini aomi kekiro mai aomi ikoinai Tirama ena nuatae akana ibabaina aonai. <sup>13</sup> Au wai nahina benimi Epafra hanona wai paumiai, mai weiakia Laodikea mai Hieropoli haukia paukiai niaka 'ari. <sup>14</sup> Eka raona'au hauna Luka muramura hauna mai Dema, ekia banamo tibenimi.

<sup>15</sup> E'u banamo uaho'abaka Laodikeai temiaho haukia katobenakia, abomo Numufa mai Tirama ena marea maearimakia weiakia ena ituai tito'u haukia katobenakia. <sup>16</sup> Marere neiana katotuabina kepua hanona katotiu ahina Tirama ena marea maearimakia Laodikeai temiaho haukia kate tuabina, marere weiana Laodikeai nimai hauna wai katotuabina. <sup>17</sup> Akipo katohina bena katotibaha, "Oi emu aka Obiapaka ebeni'o hauna akana kobabai haraina keaomo kobaorena."

<sup>18</sup> Banamo neiana hanona au Paulo kipo'u ima'uai arerena. A'i katoreana au hanona mai tabiri'u namiaho. Nabahuba'ari Tirama ena aoko'o hoana heremiai kemiaho.



## Paulo Ena Marere Kori'uaina TESALONIKA Haukia Herekiai

### *Puka Aona Irerena 'Abina*

Tesalonika hanona aiara apa'uana ha Makedonia hanona aonai. Paulo Pilipo aiarana ehabona hanona eao Tesalonika, ba weia a'ikakauma haukia to'una ha ebakorina (Iuhubeau 17). Rani baika murikiai hanona Paulo eao Korinto aiaranai, ba Timoteo emai Paulo herenai ba taba a'ikakauma haukia weia Tesalonikai haukia herekiai erama hauna robana eahuna. Paulo hanona Timoteo herenai pou eona aonai, terarua Sila kipokia puka neiana tererena, Tesalonika haukia ekia a'ikakauma katebataburana.

Puka neiana aonai hanona Paulo niaonamo ekia a'ikakauma paunai mai ekia hoahoa namokia paukiai. Matoha ia hanona Keriso aea kemue aiho hanona a'i te'iohina, abomo tenuatae kate'iohi haraina 'ari haukia hanona aba te'ari baihana 'ao aha'i, mai Keriso hanona aba emue 'ao aha'i, mai ia kipokia teraonakia weiana ia hanona aba mauri banaibanai katetabu ahina 'ao aha'i, mai Keriso hanona aita kemai? Bakai bakai neiakia 'abikia ibamuekiai hanona Paulo ehina benakia rani ikoinai hoahoa namokia katebabai, mai kateba'oru Obiapaka ena mue mai wapuna kate'imana.

### *Puka Paipana Apa'uakia*

- a. Roba iahu. (1.1)
- b. Ia'itaea mai banamo. (1.2–3.13)
- c. A'ikakauma maurina tohana. (4.1-12)
- d. Keriso ena mue mai ba'iohikia. (4.13–5.11)
- e. 'Abi orekia. (5.12-22)
- f. Banamo orekia. (5.23-28)

### *Banamo 'Abina.*

<sup>1</sup> Au Paulo, Sila\* mai Timoteo emai marere tarerena niwahi marea robe haumi Tesalonikai tomiaho haumi heremi, wai hanona Tirama aika Hamaka mai Obiapaka Iesu Keriso 'eukia. Ai tabahuba'ari Tirama ena aoko'o hoana mai baibua ahamiai kemiaho.

\* 1:1: (1) 'ao Siluano

### *Tesalonika Haukia Ekia Mauri Mai Ekia A'ikakauma.*

<sup>2</sup> Ai rani ikoinai wai paumiai Tirama namo tabena mai atami tahinana emai bahuba'ari aokiai. <sup>3</sup> Ai Hamaka Tirama wairanai emi a'ikakauma akana tobabaina hauna mai emi raona'au hoana toaro'ari hauna haeamona emi buabeni Obiapaka Iesu Keriso herenai tobakori 'inina hauna taraona 'ininakia. <sup>4</sup> Uaho'abamai e, ai aba ta'iohina Tirama wai eraona'au ainimi abomo etina'aniami.

<sup>5</sup> Pokina eka pou namona ekara'au heremiai hanona 'abi 'abaeana mo aha'i ia mai hiabuna Auba Robe ai wai aomia ebatohana. Ai wai kipokia aea hamiaho aiho hanona wai aba to'iohina, weiana hanona wai emi namo.

<sup>6</sup> Tohau haiara ki'a baha mo ia 'abi naha'i, ia ai 'abamai ai mai Obiapaka 'abanai toao 'abi toa'i taeana mai aonamomi weiana hanona Auba Robe herenai emai. <sup>7</sup> Ua buonai wai hanona a'ikakauma haukia ikoikiai Makedonia ai mai Akaia ai haukia ekia ihaiha tabanai toao. <sup>8</sup> Obiapaka ena pou namona wai heremiai 'uruna ekarahi hauna Makedonia mai Akaia ai mo a'i epua ia eao 'eka maikoina, emi a'ikakauma Tirama herenai hauna abomo 'eka maikoinai ekanai. Weiana buonai ai 'abi ha katahinana hanona 'ekana aha'i. <sup>9</sup> Pokina ai aea toa'i taea aihonamai hanona ia kipokia pouna tehinana mai aea toraona kabe aiho kaiba'uku tiramakia tohabonakia 'a Tirama tohana mauri Tiramana ta'arana toa'i, <sup>10</sup> mai Tirama Nahuna Iesu 'ariai emikiri hauna kupai kemai hauna to'imana pouna abomo tehinana. Iesu hanona Tirama ena opuere kemai aonai araka kebamaurina.

## 2

### *Paulo Ena Aka Tesalonika ai Hauna.*

<sup>1</sup> Uaho'abamai e, wai kipomi aba to'iohina ai tawahi heremi hanona mai anina. <sup>2</sup> Aba to'iohina ai Pilipo ai pura'a tahoaina mai tebataeainamai ba tawahi wai heremi. Tebatetua ki'anamai mo ia 'abi naha'i, ia eka Tirama ebataturanamai ena pou namona tairoro aina heremiai. <sup>3</sup> Emi batabura 'abikia hanona raona ki'ai aha'i 'ao raona opukiai aha'i 'ao bai'oiiai aha'i. <sup>4</sup> Ia ai hanona Tirama ea'i taeanamai ena pou namona ebenamai

hauna tahinana, ai maearima kataba aon-amonakia paunai aha'i ia aoka e'iohina Tiramana aona kenamo paunai. <sup>5</sup> Wai to'iohina ai aoani 'abikia a'i tabenimi 'ao emai ao'aea harabukia a'i tabenimi. Tirama hanona ai nibatohanamai. <sup>6</sup> Ai mariki a'i tatabuna maearima herekia mai wai heremiai 'ao baika herekia. <sup>7</sup> Ai Keriso ena iuhubeau haumai paunai taba bo'ona heremiai patanuataeai, ia ai wai baiatamiai hanona ta'aiaunu matoha babi'e nahuna ne'imanakia. <sup>8</sup> Ai tanuatae ainimi Tirama ena pou namona mo ikupaiana a'i katabenimi ia emai mauri abomo katabenimi, pokina wai taraona'auai ki'a bahanimi.

<sup>9</sup> Uaho'abamai e, aba to'iohina Tirama ena pou namona tairoro aina heremiai hanona taro'ari ki'a rabi mai mararani taka aniani itabukiai pokina hau ha puma a'i katabena. <sup>10</sup> Wai mahamiai toihana, abomo Tirama e'iohina ai wai a'ikakauma haumi baiatamiai hanona emai babai erobe, ebero abomo behona aha'i. <sup>11</sup> Wai to'iohina ai ha ha taiha 'ininimi matoha hama ha nahuna tohakia ne'imanakia. <sup>12</sup> Ai tabataburanimi, aomi tabakirona abomo tabahi ahinimi Tirama ena nuatae maurina aonai katomiaho, Tirama hanona eparinimi ena aiara nuabina aonai katomiaho.

<sup>13</sup> Ai rani ikoinai Tirama namo tabena, pokina Tirama ena 'abi heremiai tona hauna toa'ina aonai maearima ekia 'abiai a'i tobaona, 'a toa'i haraina Tirama ena 'abi tohanai tobaona, Tirama ena 'abi weiana hanona tua'ikakauma haumi aomia niaka. <sup>14</sup> Uaho'abamai e, wai hanona Tirama ena maearima Iudeai 'abanai toao, ia hanona Keriso Iesu tia'ikakaumana, Tirama ena maearima weiakia Iudeai ekia maearima herekia pura'a tehoaina ihobona mo wai abomo emi maearima herekia pura'a tohoaina. <sup>15</sup> Iuda haukia hanona Obiapaka Iesu mai mahabanai haukia teahu 'arinakia, ai abomaimo teura ahinamai. Ia Tirama aona tebaopuerena mai maearima ikoikia ekia 'ou haukia teao. <sup>16</sup> Ia tehore rama haeai haukia katairoro benakia ia mauri katea'ina taearana weiana tekaiabuna. Neiana tibabaina hanona ekia ki'a tibapa'uanakia, Tirama ena opuere hanona aba ia ahakiai.

*Paulo Enuatae Keiha Muenakia.*

<sup>17</sup> Uaho'abamai e, rani papana ai tahabonimi aonai hauaniai hanona ba-iataka epa'a ia aubai hanona aha'i, ai taraona ki'aniami taeara tatabu pataihanimi. <sup>18</sup> Ai taeara tatabu patawahi heremi, 'abi tohana au Paulo rani baika ahobona taeara atabu, 'a Satani hanona emai taeara ekaiabunakia. <sup>19</sup> Eka Obiapaka Iesu Keriso ena muemai raninai, emai buabeni, emai aonamo mai emai apa hoana hanona taba ia wairanai? Weiana hanona wai. <sup>20</sup> 'Abi tohana, emai apa mai emai aonamo pokina hanona wai.

### 3

<sup>1</sup> Weia katabai'ima homa'a taobona a'i etaina buonai tanuatae ikupaiaimai Atene ai katamiaho. <sup>2</sup> Uaho'abaka Timoteo tauhuna, ia hanona Tirama ena aka hauna Keriso ena pou namona neiroro aina hauna ewahi heremi emi a'ikakauma kebataburana mai kebakironimi. <sup>3</sup> Weiana pura'a neiakia paukia wai naiami ha a'i komue, wai aba to'iohina pura'a hanona aika kahahoainakia haukia. <sup>4</sup> Naia kipokia hamiaho aonai aba tahinabe 'uainimi aika hanona pura'a kahahoainakia, ba aba erama neiana. <sup>5</sup> Ua buonai au weia kabai'ima homa'a aobona a'i etaina buonai abaiuhu emi a'ikakauma ka'iohina, au ata'u hanona taeara baikai baihobo hauna Tiaporo kehobonimi re'a emai aro'ari anina a'i meaha'i.

<sup>6</sup> Timoteo heremiai naia bariu abemue emai heremai, emi a'ikakauma mai emi raona'au poukia namokia emaiainakia. Ai haiamaiai e'abi, wai rani ikoinai turaona ki'a bahanamai tonuatae patoihanamai ihobonai ai abomo tanuatae pataihanimi. <sup>7</sup> Ua buonai uaho'abamai e, emai aro'ari emai pura'a aokiai wai emi a'ikakauma ehore ai eba taburanamai. <sup>8</sup> Bariu ai emai miaho hanona abenamo, pokina wai Obiapaka 'eunai aba tukori 'ini. <sup>9</sup> Eka Tirama atanai wai taonamoai ki'a bahanimi weiana banamo 'abina Tirama wairanai aea katahina aihona? <sup>10</sup> Rabi mai mararani ai tabahuba'ari tabura tanuatae wai pataiha muenimi, emi a'ikakauma ena 'abe'abe 'ekakiai pataba taburanimi.

<sup>11</sup> Tanuatae bariu Tirama aika Hamaka mai eka Obiapaka Iesu katehore taeara ha kateba'oruna ai 'eumai katawahi heremi.

<sup>12</sup> Eka Obiapaka kehore emi raona'au kebapa'uana kebabonu 'aunimi ha ha katoraona'au ainimi abomo maearima ikoikiai katoraona'au ainakia, ai wai taraona'au ainimi ihobona. <sup>13</sup> Taeara nahomanai Obiapaka kehore aomi keba taburanakia, eka Obiapaka Iesu ena robe haukia kipokia katemai raninai wai hanona robe haumi mai beho aha'i haumi katoao Hamaka Tirama wairanai.

#### 4

##### *Tirama Aona Ibanamona Maurina.*

<sup>1</sup> Uaho'abamai e, puana neiana, ai taba'iobinimi aea katomiaho aiho Tirama keonamo hauna aba tubabaina emi mauriai. Bariu Obiapaka Iesu atanai tanoinimi haeamona tabahi ahinimi mauri neianai katomiaho to'ona.

<sup>2</sup> Wai aba to'iobina ba'iobi 'abina aeana hauna tabenimi Obiapaka Iesu ena hiabuai. <sup>3</sup> Tirama ena nuatae hanona neiana, wai ikoimiai hanona katorobe. Wai maha porepore hoakia katohabonakia. <sup>4</sup> Ba ikoimiai ha ha atawami kipokia hauanimi katerobe mai marikimi katomiaho. <sup>5</sup> A'i katonabau rama haeai haukia 'abakia, ia haukia hanona Tirama a'i te'iobina. <sup>6</sup> Babai neiana aonai hau ha uaho'abana rabona kea'i ki'ana hanona Tirama kehore ena ki'a 'arana kehorena, ai aba tahina benimi haeamona taba'iobinimi. <sup>7</sup> Tirama eaparinaka hanona maha porepore paunai aha'i, ia mauri robenai kahamiaho paunai. <sup>8</sup> Ua buonai ba'iobi 'abina neiana nibaki'ana hauna hanona maearima a'i nibaki'ana, ia Tirama nibaki'ana, ia hanona Auba Robe ebenimi.

<sup>9</sup> Uaho'abaka aea kaharaona'au aihonakia 'abina hanona a'i katarere benimi, pokina Tirama wai aba eba'iobinimi ha ha katoraona'au ainimi. <sup>10</sup> Wai neiana aba tubabaina ba uaho'abaka Makedoniai ikoikiai turaona'au ainakia. Uaho'abamai e, ai tabahi ahinimi naiana katobabai hao babai haona. <sup>11</sup> Ai tahina benimi ihobonai emi miaho maurina katobabai haraina katomia 'ororo, kipomi emi roba katoahu mai emi aniani akana kipomi imami tohakiai katobabai. <sup>12</sup> Mauri namona weiana kehore murimuri haukia katemariki ainimi, ba wai hau ha ahanai a'i katohe 'au a'i katonoinoi.

##### *Obiapaka Ena Mai Mue.*

<sup>13</sup> Uaho'abamai e, ai tanuatae ainimi, weiakia te'ari haukia poukia hanona kato'iobina, weiakia ekia buabeni aha'i haukia 'abakiai a'i katoao aomi a'i keaoko'o. <sup>14</sup> Aika naha'ikakauma Iesu e'ari haeamona emikiri mue, weiana ha'iobina Tirama Iesu kemaiana raninai weiakia Iesu tea'ikakaumana te'ari haukia kipokia Tirama ena mauri 'ekana'i kebaka'a totonakia.

<sup>15</sup> Obiapaka ena ba'iobi 'abina neiana ai wai tahina benimi, aika miaho hauka tai kemiaho keao Obiapaka ena muemai raninai haukia aba te'ari haukia a'i keka-haonakia. <sup>16</sup> Tirama ena pihi ke'arara mai aneru apa'uana ba'iobi 'abina keio aina aonai Obiapaka kipona kupai keriri kemai hanona Keriso tea'ikakaumana te'ari haukia katemikiri 'uai. <sup>17</sup> Weiana murinai aika hanopaka ai kahamiaho oho hauka kea'i taeana kahaeao 'auhao 'ubinai ia kipokia kebararonaka Obiapaka kipokia kahabaitabu ahi, ba aika weia Obiapaka kipokia kahamiaho banaibanai. <sup>18</sup> Ua buonai 'abi neiakiai ha ha kahaba taburanaka.

#### 5

##### *Kahaba'oru Obiapaka Ena Mai Paunai.*

<sup>1</sup> Uaho'abamai e, taba neiakia katerama ranikia mai wapukia hanona wai a'i katarere benimi. <sup>2</sup> Pokina wai abomo aba to'iobi haraina Obiapaka ena muemai beraurana hanona bainao hauna rabi nima 'abana. <sup>3</sup> Weiana maearima kate'abi, "Taba ikoikiai tenamo aba nahamiaho harai" raninai, ki'a rarina 'akina kebata'u kemai ahakiai, matoha babi'e nimaui haiarana 'abana, ekia robo 'au taearana aha'i. <sup>4</sup> Uaho'abamai e, wai hanona wapura a'i tomiaho paunai beraura neiana wai a'i kebata'uta'u hurinimi bainao hauna 'abana. <sup>5</sup> Wai ikoimiai hanona ea nahuna mai beraura nahuna haumi. Aika ikoikai hanona rabi 'ao wapura 'euna hauka aha'i. <sup>6</sup> Ua buonai aika hanona tiparua haukia 'abakiai a'i kahaeao a'i kahaparua, ia aika hanona kahano'a aoka ketabura. <sup>7</sup> Pokina parua haukia hanona rabi tiparua, abomo inuina haukia hanona rabi teinuina. <sup>8</sup> 'A aika hanona beraura 'euna hauka buonai aoka ketabura, a'ikakauma mai raona'au aonai kahamiaho haharaka i'aeana'i keao abomo bamaui buabena

hanona kahabau'una araka ibahu abunai keao. <sup>9</sup> Tirama aika etina'anaka hanona ena opuere kahahoaina paunai aha'i, ia aika bamauri kaha'ina eka Obiapaka Iesu Keriso paunai. <sup>10</sup> Aika paukai Iesu e'ari hana ena mue mai raninai hamauri 'ao ha'ari re'a aika ia kipokia kahamiaho haeamo. <sup>11</sup> Ua buonai aba tubabaina ihobonai ha ha katoba taburanimi mai katobakori 'ininimi.

*'Abi Orekia Mai Banamo 'Abina Orena.*

<sup>12</sup> Uaho'abamai e, bariu tanoinimi naia baiatamiai barai barai akana tibabaina haukia weiakia Obiapaka etina'anakia kate'uai ainimi katerobenimi haukia katomariki ainakia. <sup>13</sup> Ekia aka paunai ia katomariki ainakia mai katoraona'au ainakia, mai baibuami ha ha kipokia katomiaho oioi.

<sup>14</sup> Uaho'abamai e, ai tabahi ahinimi, 'aboro haukia katorobenakia, ao 'ubo haukia katoba taburanakia, 'abe'abe haukia katobarainakia, ikoikiai herekiai katobakiro.

<sup>15</sup> Katoraona 'inina ha ena ki'a 'arana a'i katohorena, ia rani ikoinai katobabai harai 'abami herekiai mai maearima ikoikiai herekiai.

<sup>16</sup> Rani ikoinai katoaonamo, <sup>17</sup> katobahuba'ari to'o baihana, <sup>18</sup> taba ikoikiai aokiai Tirama katobanamona, pokina neiakia hanona Tirama ena nuatae wai Keriso Iesu 'eunai haumi emi mauriai katobabainakia.

<sup>19</sup> Auba Robe ena aka a'i katoba'orona matoha iruba a'i katoba'aona 'abana. <sup>20</sup> Auba Robe herenai timai 'abikia a'i katobaoao ainakia. <sup>21</sup> Taba ikoikiai katohobonakia, ba namokia haukia hanona kato'ini benakia. <sup>22</sup> Ia taba ki'a obokia ikoikiai herekiai hanona katokapare.

<sup>23</sup> Baibua nibenaka Tiramana tanoina, ia kehore taeara ikoikiai aokiai kebaberonimi kebarobenimi, ba aubami, aomi mai hauanimi maikoinai ke'ini benakia, eka Obiapaka Iesu Keriso ena mue mai raninai beho ikoikiai herekiai kebakaparenimi. <sup>24</sup> Eaparinimi hauna hanona ena 'abi nibatohanakia, ia kehore nejana kebabaina.

<sup>25</sup> Uaho'abamai e, ai paumai kato bahuba'ari.

<sup>26</sup> Uaho'abaka ikoikiai baipau robenai banamo katobenakia.

<sup>27</sup> Obiapaka atanai au wai nahina benimi, marere nejana hanona katotuabina uaho'abaka ikoikiai wairakiai.

<sup>28</sup> Eka Obiapaka Iesu Keriso ena aoko'o hoana ahamiai kemiaho.



## Paulo Ena Marere Ibaruana TESALONIKA Haukia Herekiai

### *Puka Aona Irerena 'Abina*

Tesalonika ai maearima bo'ona rani weianai hanona teraona raona ki'a baha Keriso ena mue mai hanona taba kerama. Maearima baika hanona te'abi Obiapaka ena rani hanona aba emai. Ua buonai Paulo marere neiana ererena maearima ekia a'ikakauma kebaberonā. Ia nehina benakia Obiapaka ena rani hanona a'i nikara'au baha. Ba rani weiana a'i nimai baha hanona maearima bo'ona katehaia po'o, mai babai ki'a haeai haeai ikoikiai kateapa'ua, haeamona rauhūbu ikabena hanona kemai Keriso i'oatana apa'uanai keao.

Paulo ia nibataburanakia a'ikakaumai katekori 'ini harai, mai puma wairakiai tiropo haukia katekabanai harai. Ena nuatae hanona katetabura ki'a baha weiana kipokia kate'ima harainakia, ihobona ia kipona ne'ima haraina mai ia kipokia tiaka haeamo haukia 'abakia. Weiana aka herenai a'i kate'abe'abe 'ao a'i kate'aboro, haeamona maearima ibaraikiai a'i kate'aboro.

### *Puka Paipana Apa'uakia*

- a. Roba iahu. (1.1-2)
- b. Banamo mai rauhūbu 'abikia. (1.3-12)
- c. Keriso ena mue mai ba'iofikia. (2.1-17)
- d. A'ikakauma maurina tohana. (3.1-15)
- e. 'Abi orekia. (3.16-18)

### *Banamo 'Abina.*

<sup>1</sup> Au Paulo, Sila\* mai Timoteo emai marere tarerena niwahi marea robe haumi Tesalonikai tomiaho haumi heremi, wai hanona Tirama Hamaka mai Obiapaka Iesu Keriso 'eukia.

<sup>2</sup> Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemi-aho.

### *Keriso Kemai Bero Akana Kebabaina.*

<sup>3</sup> Uaho'abamai e, ai wai paumiai rani ikoikiai Tirama namo 'abina tabena,

\* 1:1: (1) 'ao Siluano

weiana hanona ebero pokina wai emi a'ikakauma hanona niapa'ua hao apa'ua hao, mai emi raona'au ha ha heremiai mai 'abami herekiai hanona nikara'au niao. <sup>4</sup> Hau haiara ikoikiai mai baihobo ikoikiai aokiai tubapahihi abomo emi a'ikakauma a'i tuhabona, weiakia haukia Tirama ena marea ha ha haukia wairakiai tapainakia.

<sup>5</sup> Taba neiakia ikoikiai tibawaira tinana hanona Tirama ena bakaiai tebero. Wai Tirama ena obia aiarana paunai bariu haiara tuhoaina, ia keao puana hanona wai bero katoa'ina Tirama ena obia aiarana haumi. <sup>6</sup> Tirama hanona mai ena bero. Ia kehore weiakia wai teba haiaranimi haukia 'arakia kebamuenakia keba haiaranakia. <sup>7</sup> Haiara tuhoaina haumi wai ai kipokia 'araka kebenaka kaharai. Obiapaka Iesu kupai kewaira tina ena aneru taburakia kipokia katemai raninai neiana hanona kerama. <sup>8</sup> Ia kemai mai iruba upana, weiakia Tirama a'i te'iofina haukia mai eka Obiapaka Iesu ena pou namona aiana a'i tika'aina haukia hanona puma kebahoainakia. <sup>9</sup> Ia katehaiara banaibanai mai puma katehoaina abomo katekatu'a baihana Obiapaka wairanai mai ena hiabu nuabina herenai. <sup>10</sup> Obiapaka kemai beraurana weianai ena maearima robekia katekuti aina mai weiakia tea'ikakaumana haukia ikoikiai katebanamona. Weiana aonai wai abomimo baiatakiai weia pokina pou tahinana wai heremiai hanona toa'ikakaumana.

<sup>11</sup> Neiana taranonana paunai, ai wai ahamiai tabahuba'ari to'ona, weiana eka Tirama kehore miaho banaibanai haumiai kebaonimi ena apari ihobonai, mai ia kehore ena hiabuai emi hoahoa anikia namokia kebaramanakia mai emi a'ikakauma akakia ikoikiai kebatohanakia. <sup>12</sup> Taeara neianai eka Obiapaka Iesu atana wai paumiai katebanamona, ba ia paunai wai katebanamonimi, eka Tirama mai Obiapaka Iesu Keriso ekia aoko'o hoana paunai.

## 2

### *Hau Pairipairi Tiaporo Kewaira Tina.*

<sup>1</sup> Uaho'abamai e, eka Obiapaka Iesu Keriso ena muemai abomo aika ibararoka ia herenai hauna pouna tahinana, ba

tanoinimi, <sup>2</sup> aomi a'i katenoanoa, maha-banai 'abikia 'ao 'abi baika 'ao marere heremai ai ewahi na tiho ti'abi Obiapaka ena beraura aba emai hanona wai a'i kebata'unimi 'ao nuami a'i ketae. <sup>3</sup> Hau ha taeara neianai a'i ke'oinimi. Pokina beraura weiana hanona a'i kemai baha keaomo maearima Tirama katemurina kate'oata 'uaina ba hau pairipairi tiaporo kewaira tina, ia keao 'ekana hanona haiara banaibanai 'ekana. <sup>4</sup> Ia hanona maearima tekuti ainakia tabakia ikoikiai mai tiaparinakia tirama na tiho haukia ke'oatanakia, ia kipona kehorotina neiakia ikoikiai arakiai abomo keao Tirama ena marea robe aonai kemiati ba ke'abi ia kipona hanona Tirama.

<sup>5</sup> Au wai heremiai raninai taba neiakia ikoikiai ahinabe ainimi, weiana wai a'i turaona 'ininakia, u? <sup>6</sup> Abomo bariu wai aba to'jobina hiabu tabana nihore ia nia'i 'inina weiana keaomo ia ena rani tohanai hau weiana kewaira tina. <sup>7</sup> Pokina hau pairipairi tiaporo ena hiabu aba niaka bunianai, 'a ia weiana bariu nia'i 'inina hauna kea'i 'inina keaomo ia kehe pare. <sup>8</sup> Ba hau pairipairi tiaporo kewaira tina, iamo Obiapaka Iesu kemai raninai pinana maebunai tiaporo keahu 'arina mai ena nuabiai keapuana. <sup>9</sup> Hau pairipairi hanona Satani ena hiabuai kemai hiabu bai'oikia haeai haeai, babai bai'oikia mai hoa apa'uakia bai'oikia kebabai, <sup>10</sup> mai aka ki'a obokia haeai haeai ai ni'oinakia ia hanona kate'ari haukia. Ia kate'ari pokina 'abi tohana weiana mauri kebaibeni hauna iraona'au aina teubo aina. <sup>11</sup> Pokina neiana buonai Tirama ehore ahurea raonana hiabuna aokiai ehorotina keaka, ia bai'oi weiana katea'i taeana. <sup>12</sup> Weiana 'abi tohana a'i tea'ikakaumana haukia mai ki'a teonamo aina haukia ikoikiai hanona puma katehoaina.

#### *Tirama Etina'animi Bamauri Katoa'ina.*

<sup>13</sup> Uaho'abamai e, wai Obiapaka ni-raona'au ainimi haumi, ai wai paumiai rani ikoinai mo Tirama namo 'abina katabena, pokina popounai Tirama etina'animi,\* ba mauri katoa'ina Auba Robe ena hiabuai, mai emi a'ikakauma weiana 'abi tohana herenai haunai wai Tirama ena maearima robekiai katoao. <sup>14</sup> Tirama ehore pou namona weiana ai

heremiai tairoro aina haunai eaparinimi tomai mauri robena neianai, weiana emi itau eka Obiapaka Iesu Keriso ena nuabi aonai katoa'ina. <sup>15</sup> Ua buonai uaho'abamai e, katokori 'ini, mai emai ba'ioibi 'abikia tairoroai pinamaiai tahina 'ao marere ai tabenimi haukia kato'ini benakia.

<sup>16</sup> Eka Obiapaka Iesu Keriso mai aika Hamaka Tirama tanoinakia, ia hanona eraona'au ainaka ena aoko'o hoana aonai batabura banaibanai mai buabeni namona ebenaka, <sup>17</sup> ia kehore aomi kebakirona mai kebataburana rani ikoinai aka namokia katobabai mai 'abi namokia katohina.

## 3

### *Ai Paumai Katobahuba'ari.*

<sup>1</sup> Uaho'abamai e, orenai ai paumai katobahuba'ari, Obiapaka ena pou kerama otarai biaina ba katea'i taeana mai aonamokia ihobona wai heremiai erama 'abana. <sup>2</sup> Abomo katobahuba'ari weiana Tirama kehore po'o haukia mai aka ki'a haukia herekiai keba karahinamai, pokina maearima bo'ona Keriso a'i tia'ikakaumana.

<sup>3</sup> 'A Obiapaka hanona aia ibabua 'au hauna, ia kehore kebataburanimi mai ke'aeanimi aka ki'a haukia herekiai. <sup>4</sup> Ai Obiapaka aonai wai tabatohanimi tabahi ahinimi aka naiakia tubabainakia haukia katobabai to'ona.

<sup>5</sup> Obiapaka kehore aomi ke'uai ainakia Tirama ena raona'au anina mai Keriso ena bapahihi hoana kato'ioibi harainakia.

### *Aka Namona Ibabainai Ai Kato-hauhororo.*

<sup>6</sup> Uaho'abamai e, eka Obiapaka Iesu Keriso atanai taharabunimi, uaho'abaka weiakia tiaboro 'ao ba'ioibi tabenimi ihobokiai a'i temiaho haukia herekiai katokapare. <sup>7</sup> Weiana ai tababaina hauna wai kipomi aba to'jobina aea katoka'a aiho. Ai wai heremiai raninai a'i ta'aboro 'apua. <sup>8</sup> Ai maearima ekia aniani a'i tani 'abaea ia 'arasia tahorenakia, ai hanona rabi mararani taka taro'ari pokina wai puma a'i tamabenimi. <sup>9</sup> Ua tababai aiho hanona ai mai emai bero baraibarai weiana kata'ina, 'a neiana tababaina

\* 2:13: (13) 'ao Tirama etina'animi ena buabua kori'uainai

hanona ihaiha tabana wai taearanai katoka'a.

<sup>10</sup> Ai wai heremiai aonai bairobe neiana abomo tabenimi, "Hau ha a'i keaka raninai, ia a'i keaniani." <sup>11</sup> Ai 'uru tao'o baiatamiai maearima baika hanona te'aboro, aka ha a'i tibabaina tiaomo maearima baika ekia aka aokiai titoto. <sup>12</sup> Obiapaka Iesu Keriso atanai tahina benakia mai tabahi ahinakia, katemia 'ororo ekia aniani tabu akakia katebabai ekia aniani katerama.

<sup>13</sup> Uaho'abamai e, wai aka namona ibabainai a'i katohau hororo. <sup>14</sup> Hau ha emai ba'iobi 'abikia marere neiana aonai a'i nia'i taeanakia hauna hanona katoiha 'inina, ia kipokia a'i katobahamomo, ba kipona abiabina keonobaina hanona kehaumaea. <sup>15</sup> Ia hau weiana katoi-hana hanona 'ou haunai a'i katobaona, 'a uaho'abami ai katobaona katorobena.

*Banamo 'Abina Orena.*

<sup>16</sup> Obiapaka hana eka baibua pokina hauna, bariu ai tanoina ia kehore kipona baibua kebenimi. Rani ikoinai mai taeara ikoikiai Obiapaka hana wai ikoimiai heremiai.

<sup>17</sup> Au Paulo e'u banamo 'abina neiana ima'u tohanai narerena, e'u marere ikoikiai aokiai hanona na narere aihonakia katobatohana au e'u marere.

<sup>18</sup> Ai tabahuba'ari eka Obiapaka Iesu Keriso ena aoko'o hoana hana wai ikoimiai heremiai kemiaho.

## Paulo Ena Marere Kori'uaina TIMOTEO Herenai

### *Puka Aona Irerena 'Abina*

Timoteo hanona a'ikakauma hauna 'aru'aruna ha, ia hanona Paulo pou namona eiroro aina aonai e'abana tekaao hauna (Iuhubeau 16.1-3). Weiana murinai, Timoteo hanona Tirama ena marea maearimania Epesoai haukia i'uaiaikia haunai eao, ba Paulo puka neiana ererena herena eao.

Taba kori'uaina robana eahuna hauna neiana. Timoteo hanona ke'ima haraina, weiana maearima baika katehore bai'oi ai maearima ekia a'ikakauma a'i temebabehona marikina. Maearima neiakia tiraonana hanopaka neiana tabana ikoikia hanona teki'a. Ua buonai hau ha nenuataea kemiaho harai raninai, ia hanona aniani baika a'i keani abomo ia hanona a'i kehawainibe. Weiana ia kebaberonana. Ibaruana hanona a'ikakauma haukia i'imakia taerana namona mai ia ekia aka, maearima iha'inikia akana kebabaina hauna mai ena hoahoa aea homakia hanona robana eahuna. 'Abi orena hanona Timoteo hanona kemiaho harai matoha Iesu Keriso ena aka hauna namona 'akina 'abana. Ba a'ikakauma haukia haeai haeai herekiai abomo ua keaka harai aiho.

### *Puka Paipana Apa'uakia*

- Roba iahu. (1.1-2)
- Ba'iobi 'abikia Tirama ena marea mai aka haukia 'eukia. (1.3—3.16)
- Ba'iobi 'abikia Timoteo mai ena aka 'euna. (4.1—6.21)

### *Banamo 'Abina.*

<sup>1</sup> Au, Paulo, Tirama aika ibamaurika hauna mai Keriso Iesu aika nahabuabena hauna ekia 'abiai hanona Keriso Iesu ena iuhubeau hau'uai aeao,

<sup>2</sup> Timoteo narerebeni'o, oi hanona au naha'u tohamu Iesu ia'ikakaumana aonai. Nabahuba'ari Hamaka Tirama mai Keriso Iesu eka Obiapaka ekia baraibarai apa'uana, aoko'o mai baibua ahamuai kemiaho.

*Ba'iobi Haukia Bai'oikia Herekiai  
Kate'ima 'ima Harainakia.*

<sup>3</sup> Au aeao Makedonia hanona rani-nai, abahi ahini'o ihobonai oi hanona naia Epeso aiaranai komiaho weiana maearima baika naia kohinabe pahihinakia ba'iobi bai'oikia a'i katebabai mue, <sup>4</sup> abomo kipokia hauanikia a'i katebaibeni hanopaka tiramakia 'orikia mai kuputori 'abi'abikia weiakia ekia pua aha'i haukia herekiai. Neiakia hanona baihara taea rarikia kateba ramanakia iamo Tirama ena raona weiana a'ikakaumai nibawaira tinana hauna akana i'io binai a'i tibarai barai. <sup>5</sup> E'u bahiahi 'abina neiana ena poki tohana hanona raona'auai katemiaho, weiana hanona aoka berona namonai nia'i ramana mai raona beronai haeomona a'ikakauma tohanai nimai. <sup>6</sup> Ia maearima baika hanona hoahoa neiakia herekiai tekaobo teao 'abi anikia aha'i haukia ti'abi'abi ainakia. <sup>7</sup> Tenuatae Tirama ena rauhuhu iba'iobi aina haukiai kateao, iamo taba robana tiahuna 'ao aokiai taba tehina taburana hanona obona a'i tiobo.

<sup>8</sup> Aika aba ha'io bina weiana maearima ha rauhuhu keka'ai haraina raninai rauhuhu hanona taba namona. <sup>9</sup> Abomo aba ha'io bina weiana rauhuhu hanona bero haukia paukiai a'i erama ia rauhuhu hanona rauhuhu tikabena haukia paukiai erama, weiakia a'i tika'aina haukia mai Tirama a'i timariki aina haukia mai ki'a haukia, a'i terobe haukia mai Tirama atana tia'i ki'ana haukia, weiakia hamakia 'ao hinakia tiahu 'arinakia haukia mai ahu ahu haukia, <sup>10</sup> nabau haukia, mai hau kipona 'abana ninabauaina haeamona babi'e kipona 'abana ninabauaina haukia, ta'ara a'i haukia tikawa kawa ainakia haukia, mai bai'oi haukia, mai bakai aonai tihorehore abu haukia, abomo taba haeai haeai weiakia ba'iobi tohana tainai a'i titai haukia. <sup>11</sup> Ba'iobi tohana weiana hanona banamo Tiramana ena pou namona nuabina herenai emai, pou namona weiana au e'u iha'ini aonai ehorotina akana kababaina.

### *Paulo Namu 'Abina Keriso Ebena.*

<sup>12</sup> Keriso Iesu aika eka Obiapaka namo 'abina nabena, weiana ia hanona au tabura ebena'u pokina ia aia ababua 'auna hau'uai ebaona'u. <sup>13</sup> Iamo 'uainai hanona Keriso atana ihinana a'iki'ana mai a'oatana, haeamona aibara ki'a herenai mo raninai, Tirama au eaoko'o aina'u pokina e'u a'ikakauma aha'i mai taba



ababaina hanona a'i a'iohina. <sup>14</sup> Eka Obiapaka ena aoko'o hoana here'uai ebapa'ua ki'ana, haeamona a'ikakauma mai raona'au Keriso Iesu aonai aika 'euka haukia rani hamonai ebena'u.

<sup>15</sup> Neiana hanona 'abi tohana aoka tohakiai kaha'i taeana mai kaha a'ikakaumana. Keriso Iesu emai hanopaka aonai hanona ki'a haukia kebamaurinakia, baiatakiai au hanona aki'a ki'a baha. <sup>16</sup> Ia Tirama au eaoko'oai ki'a bahana'u, weiana au aki'a ki'a baha, pokina Keriso Iesu ena bapahihi tabura weiana ena ore aha'i hauna au here'uai kebawaira tinana, ba baika ihaiha neiana kateihana hanona Keriso kate a'ikakaumana mauri banaibanai katetabu ahina. <sup>17</sup> Obia 'arana nimaui banaibanai, ena pua aha'i, mai a'i nahaihana hauna, Tirama mo weiana ikupaiana kahamariki aina mai herenai nuabi kemiaho keamo banaibanai. Amen.

*Paulo Timoteo Ebahi ahina Ketabura.*

<sup>18</sup> Timoteo, naha'u e, 'abi koka'aina hauna neiana nabeni'o, weiana hanona 'uainai mahabanai 'abina ihinanai oi robamu teahuna, ba mahabanai 'abikia weikua ihobokia koka'ainakia hanona oi aba huari namona kobabaina. <sup>19</sup> Emu a'ikakauma mai aomu berona namona koa'i 'ini harainakia. Baika aokia berona neiana tebaki'ana hanona ekia a'ikakauma tebahuna. <sup>20</sup> Ia baiatakiai hanona Humenao mai Alesanda, terarua hanona aba Satani imanai ahabonakia ia ena hiabu ba'anai katemiaho, weiana kehore keba'iohinakia ekia 'abi ki'a Tirama herenai haukia katebapuanakia.

## 2

*Maearima Ikoikiai Paukiai Kahabaha'ari.*

<sup>1</sup> E'u bahiahi kori'uaina hanona neiana, maearima ikoikiai paukiai Tirama konoina kebarainakia mai kebanamonakia, ia paukiai Tirama herenai namo 'abina kohinana emu bahaba'ari ai. <sup>2</sup> Weiana obia 'arana haukia mai hiabu haukia ikoikiai paukiai abomo kobahaba'ari, ba aika mai ia kipokia hanona mai baibuaka haeamona mauri namona aonai kahamiaho Tirama imariki aina mai robe maurina ikoinai taaranai. <sup>3</sup> Bahaba'ari nahomana hanona enamo ba Tirama ibamaurika hauna aona ibanamona hoana. <sup>4</sup> Tirama nenuatae

maearima ikoikiai bamauri katea'ina mai katemai Tirama ena 'abi tohana kate'iohina. <sup>5</sup> Weiana Tirama hanona hamona haeamona Tirama mai maearima baiatakiai bairarao hauna abomo hamonamo Keriso Iesu, ia hanona maearima tohana, <sup>6</sup> ia kipona hauanina ebaibeni maearima ikoikiai ekawanakia irubu katea'ina. Tirama hanona ena nuatae ebatohana ranina tohanai ebawaira tinana. <sup>7</sup> Weiana paunai au etina'ana'u iroro mai iuhubeau hau'uai naeao Keriso pouna kahinana, rama haeai haukia ibamarerekia hau'uai naeao Tirama ena 'abi tohana mai a'ikakauma kaba'iohinakia. ('Abi tohana nahinana a'i nabai'oi.)

<sup>8</sup> Ua buonai, nanuatae 'eka maikoinai hau a'i kateopuere 'ao kipokia a'i katebahara tae, ia ekia mauri katebero aonai katebahaba'ari.

*Babi'e Ekia Hoahoa Namokia Katebabai.*

<sup>9</sup> Abomo au nanuatae, babi'e ekia habuni batotoai hanona aba tia'ia'i harai, ia buikia a'i katebahaeai haeainakia, 'ao taba 'imare'imarekia weikua gold 'ao kutu ai tebabainakia haukia a'i kateba taitainakia, habuni 'arakia rarikia a'i katebatotonakia. <sup>10</sup> Ia ekia hoahoa namokia katebabai weikua katehore kateba tohanakia ia hanona Tirama tekuti aina babi'ekia. <sup>11</sup> Babi'e hanona ena 'aiaunuai hanona 'iobi kea'ina. <sup>12</sup> Au naharabuna, babi'e hanona hau a'i kateba marerenakia 'ao a'i katepoki ainakia, ia hanona kemiaho 'uru'uruna keaha'i. <sup>13</sup> Pokina Tirama ehore Adamu ebabai 'uaina ba muriai 'Eva ebabaina. <sup>14</sup> Ba Satani hanona Adamu a'i e'oina ia babi'e e'oina, ba ki'a weia ia herenai ea'i ramana. <sup>15</sup> Iamo babi'e ekia 'aiaunu aokiai a'ikakauma, raona'au, mai robe maurikiai katemiaho to'o baihana raninai, nahukia kateba ramanakia, ba bamauri katea'ina.

## 3

*Iha'ini Haukia Ekia Mauri Marea Robe Aonai.*

<sup>1</sup> "Hau ha nenuatae Tirama ena mareai iha'ini akana kebabaina raninai ia hanona aka namona nenuatae aina," na ti'abi aiho hanona 'abi tohana aoka tohanai kaha'i taeana hauna. <sup>2</sup> Tirama ena marea iha'ini hauna hanona ena babai kenamo herenai beho ha a'i katetabu ahina, atawana kehamona, aona kebakiro, aona kea'i 'inina,

katemariki aina, aru 'abaea haukia kea'i taeanakia ena ituai, haeamona bamarere akana kebabai haraina, <sup>3</sup> a'i keinu 'ari, a'i keaiahu ia ke'aiaunu, a'i keaibara, mai moni a'i keraona'au aina. <sup>4</sup> Ia hanona kipona ena itu haukia ke'ima harainakia haeamona nahuna kemaianakia aiana kateka'aina mai katemariki aina. <sup>5</sup> (Hau ha kipona ena itu haukia a'i ke'ima harainakia raninai, Tirama ena marea haukia aea ke'ima harai aihonakia?) <sup>6</sup> Maearima bariumo nia'ikakauma hauna hanona mareai iha'ini haunai a'i katea'i taeana, pokina a'i meapa ba Tirama Satani eba'ehona 'abanai a'i me'eho. <sup>7</sup> Ba murimuri haukia abomo ia katemariki aina, weiana a'i kate'uahi aina Satani ena rioai a'i meto'o.

#### *Baraibarai Haukia Ekia Mauri Marea Robe Aonai.*

<sup>8</sup> Taeara ihobonai Tirama ena marea ena aka haukia abomo hoahoa namokia katebaiha baihai, bai'oi akakia a'i katebabai, a'i kateinuinu banaina, mai beho taearanai moni a'i katetabunakia. <sup>9</sup> Ia haukia hanona raonaraona apa'uakia weiakia Tirama aba ebawaira tinanakia a'ikakauma aonai haukia tia'i 'ininakia mai aokia berona namonai. <sup>10</sup> Ia haukia hanona kahabahobo 'uainakia ba herekiai beho ha a'i kahatabu ahina hanona tiakono akana katebabaina. <sup>11</sup> Taeara ihobonai atawakia\* abomo hoahoa namokia katebaiha baihai mai a'i kate'uahi 'uahi, bia a'i kateinu 'ari, mai aka ikoikiai aokiai hanona aia katebabua 'auna. <sup>12</sup> Tirama ena marea ena aka hauna atawana kehamona haeamona nahuna mai ena itu haukia ke'ima harainakia. <sup>13</sup> Weiakia tiakono akana tebabai haraina haukia 'arakia hanona mariki 'ekakia katea'ina, ekia a'ikakauma katetabura ki'a Keriso Iesu pouna katehina haraina.

#### *Eka Kuti Taearana.*

<sup>14</sup> Au nabuabeni rani papana aonai aba kawahi kaihani'o, iamo marere neiana natiu ahina niwahi heremu, <sup>15</sup> pokina papana kamahari re'a marere neiana kebaraonani'o kipoka eka mauri aea kaha'ima harai aihona Tirama ena marea haukia baiatakiai, weiana hanona mauri Tiramana ena marea, Tirama ena 'abi tohana kemiaho aina kebataburana 'ekana. <sup>16</sup> Aika naha'iobi haraina eka

kuti taearana weiana Tirama herekai ebawaira tinana haukia hanona eapa'ua. Keriso† hanona hauaniai ewaira tina, aubai ena bero ebatohana, aneru ia teihana, rama haeai haukia herekiai ia pouna teiroro aina, mai hanopaka maearimakia ia tea'ikakaumana, nuabi aonai ea'i taeana eao kupai.

## 4

### *Ba'iobi Haukia Bai'oikia A'i Teme'oinimi.*

<sup>1</sup> Auba Robe nehinabe maha harainaka netibaha, muri ranikiai maearima baika a'ikakauma katehabona ia auba weiakia tibai'oi haukia murikiai kateka'a mai auba ki'a obokia ekia ba'iobi tainai katetai. <sup>2</sup> Ba'iobi nahomakia hanona bai'oi haukia herekiai timai weiakia aokia berokia hanona teki'a ihobona auri hiabunai teba'aranakia. <sup>3</sup> Maearima tikaibunakia a'i katehawainibe mai aniani baika hanona a'i kateani. Ia Tirama hanona aniani ebenaka kahani, aniani neiakia hanona ebenakia a'ikakauma haukia mai weiakia Tirama ena 'abi tohana te'iobina haukia namo 'abina katehinana ba kateani. <sup>4</sup> Tirama ebarama tabakia ikoikiai hanona tenamo, ikoikiai hanona ahakiai Tirama namo 'abina kahabena ba kahani ia ha a'i kahabaki'ana. <sup>5</sup> Pokina aniani hanona Tirama ena 'abi mai eka bahuba'ari nihore nibarobenakia.

### *Keriso Iesu Ena Aka Haumu Namomuai Koao.*

<sup>6</sup> Ba'iobi neiakia uaho'abaka koba'iobi harainakia raninai oi hanona Keriso Iesu ena aka haumu namomuai koao, weiana oi kipomu abomo a'ikakauma 'abikiai mai ba'iobi namona weiana tainai otai haunai kotabura. <sup>7</sup> Hanopaka tiramakia bai'oikia 'orikia mai kikipa 'abaeakia herekiai kokapare, iamo kipomu ibataburamu akana kobabaina Tirama imarikiaina haumuai koao. <sup>8</sup> Hauanika ibataburana akakia nahababai hanona ena namo baika, ia Tirama imarikiaina hoana ena namo hanona taba ikoikiai aokiai, pokina ia hanona mai 'abi'uaina eka mauri bariu hanopaka neiana aonai mai mauri banaibanai wairai hauna

\* 3:11: (11) 'ao diakono babi'ekia † 3:16: (16) baika tererena 'Tirama'

abomo aonai. <sup>9</sup> Neiana hanona 'abi tohana aoka tohakiai kaha'i taeana mai kaha'ikakaumana. <sup>10</sup> Neiana paunai naharo'ari mai nahahau haiara pokina aika hanona mauri Tiramana nahabuabena, ia hanona maearima ikoikiai ekia Bamauri hauna, weiakia tia'ikakaumana haukia hanona katemaui.

<sup>11</sup> 'Abi neiakia koba'ioibinakia mai kohinanakia kateka'ainakia. <sup>12</sup> O'aru'aru buonai maearima oi a'i katehao tiboani'o, iamo ihaiha namokia a'ikakauma maearimania wairakiai kobawaira tinana emu 'abi'abiai, emu mauriai, emu raona'auai, emu a'ikakaumai, mai beho ha a'i kobabaina aonai. <sup>13</sup> Mako wairakiai aka neiakia kobabai to'ona, Puka robena 'abina kotuabina, koiroro aina, mai kobamarere aina keaomo au kawahi heremu. <sup>14</sup> Auba Robe ena ibeni aomuai nemiaho hauna a'i kobaoaoaina, weiiana hanona marea ena kiro haukia imakia ahamuai tehao'au tehabu'ari raninai mahabanai 'abina aonai ebeni'o. <sup>15</sup> Kohauaro aka neiakia ikoikiai aokiai mai aomu ikoinai kobabainakia, weiiana maearima ikoinai oi emu aka aba ninamo hauna kateiha tinana. <sup>16</sup> Emu ba'ioibi mai emu mauri ko'ima haraina, taba neiakia kobabai to'o baihana, pokina neiana kobabaina hanona Tirama kehore kebamaurini'o haeamona aiamu tiona haukia ikoikiai abomo kebamaurinakia.

## 5

### *Marea Robe Maearimania Hanona Rama Hamona 'Abana.*

<sup>1</sup> Hau anepakakia herekiai a'i ko'abi pahihi 'apua, iamo mariki hoahoanai kohinabe hinabe harainakia matoha ia hanona oi hamamu 'abana, ia hau 'aru'arukia hanona uaho'abamuai kobaonakia, <sup>2</sup> babi'e anepakakia hanona hinamu 'abanai kobaonakia, mai babi'e 'aru'arukia hanona haibumuai kobaonakia mai aomu beronai.

### *Wapu Babi'ekia Tohakia Kateiha Harainakia.*

<sup>3</sup> Wapu babi'ekia weiakia tiwapu toha haukia komariki ainakia. <sup>4</sup> Ia wapu nahuna 'ao kupuna baika raninai, ia koba'ioibi 'uainakia ekia kuti hoahoana tainai ekia itu haukia kate'ima harainakia, uahomanai hanona hamakia hinakia mai

kupukia ekia 'ima'ima 'arana katebamuena, pokina weiiana hanona Tirama aona ibanamona akana.

<sup>5</sup> Wapu babi'ena tohana ikupaiana nemiaho hanona ena buabeni Tirama herenai nihorotina rabi ikoinai mai mararani ikoinai nibahuba'ari Tirama herenai baraibarai ninoiaina. <sup>6</sup> Ia wapu babi'ena weiiana hauanina ena aonamo niraona apa'uana hanona hauanai nimaui ia aubai aba e'ari. <sup>7</sup> A'ikakauma haukia herekiai 'abi neiakia kobenakia kateka'ai, weiiana herekiai beho ha a'i temetabu ahina marikina. <sup>8</sup> Weiiana maearima ha hatia'ana 'ao ena itu haukia tohakia baraibarai ha a'i nibenakia hanona a'ikakauma babaina nebuniaina, maearima uahomana hauna hanona eki'a ki'a baha ba maearima weiiana a'ia'ikakauma hauna.

<sup>9</sup> Atarere pukanai wapu atakia a'i katererenakia keaomo ekia rama ihaukia imabui harauhaea abiranai, haeamona atawakia hamokia tewapu ainakia babi'ekia mo atakia katererenakia, <sup>10</sup> haeamona babi'e ha'ioibi haraina ena mauri enamo, abomo nahuna ne'ima harainakia, aru 'abaea haukia nia'i taea harainakia ena ituai, a'ikakauma haukia ta'arakia nia'i, baika ekia aro'ariai ebarainakia, mai aka namokia haeaihaei ikoikiai aokiai nia'ituri babi'ena.

<sup>11</sup> Iamo wapu babi'ekia 'aru'arukia hanona atakia atarere pukanai a'i korerenakia, pokina aokia hawainibe kateraonana raninai Keriso aba katereana ba katehawainibe. <sup>12</sup> Weiiana ia hanona kipokia Tirama ena bakai 'ekanai katetoto pokina Tirama herenai ekia 'abi'uai kori'uaina weiiana a'i katehawainibe mue hauna tekabena. <sup>13</sup> Ia hanona ti'aboro tiao itu ha haeamona itu ha ai tikara'au, ekia 'aboro mo aha'i ia te'uahi 'uahi mai maearima haeai ekia aka aokiai titoto, haeamona 'abi a'i patehina haukia tehinanakia. <sup>14</sup> Ua buonai au nanuatae wapu 'aru'arukia hanona katehawainibe nahukia kateba ramanakia kipokia ekia itu kate'imanakia. Weiiana 'ou haukia kate'abi ki'a herekai hanona taearana keaha'i. <sup>15</sup> Wapu baika hanona a'ikakauma aba tehabona teao Satani murinai te'au. <sup>16</sup> A'ikakauma babi'ena ha ena ituai wapu baika temiaho raninai ia mehore wapu weiakia mebarainakia,

ia Tirama ena marea maearimakia a'i kebaro'arinakia, weianai Tirama ena marea maearimakia katehore wapu tohakia weiakia ikupaiakia temiaho haukia katebarainakia.

*Tirama Ena Aka Tihauaro ainakia Haukia Katomariki ainakia.*

<sup>17</sup> Tirama ena marea kiro haukia weiakia maearima herekiai 'uai akana namona tibabaina haukia katomariki ainakia. Ba weiakia aka tihauaro aina Tirama ena 'abi teiroro aina mai tibamarere aina haukia hanona katomarikiai apa'uanakia. <sup>18</sup> Puka robenai e'abi, "Poromakau witi iba'iti'itina akana nibabaina aonai pinana a'i kobiri abuna,"

Deu 25.4

haeamona  
"Aka hauna 'arana kea'ina hanona ebero."

Luk 10.7

<sup>19</sup> Weiana hau ha Tirama ena marea poki hauna ena beho 'abina nehina hanona aiana a'i koa'i taeara, keaomo maearima rua 'ao aihau katebatohana hanona aiakia koa'i taeara. <sup>20</sup> Ba marea poki hauna ha ki'a ebabai toha raninai mako wairanai kobatana ba marea poki haukia baika ihaiha neiana kateihana hanona kateta'u.

<sup>21</sup> Tirama mai Keriso Iesu mai aneru robekia wairakiai au oi nahina beni'o, aka neiakia ikoikiai robakia ahu haukia koka'ai harainakia, maearima ikoikiai herekiai babai ihobona kobabaina ia tai ha'i kotaina.

*Kipomu Ko'ima'ima Haraini'o.*

<sup>22</sup> Koraona harai 'uaina ba imamu hau ha ahanai kohao'au Obiapaka ena aka kebabaina raninai baika ekia babai ki'a aokiai a'i kototo. Kipomu ko'ima haraini'o emu mauri a'i ke'opu Tirama wairanai.

<sup>23</sup> Bei 'aki mo a'i koinu, ia bine beina papana koinu nuamu kebaraina pokina emu inawa inawa paunai.

<sup>24</sup> Maearima baika ekia ki'a hanona temahanai harai ki'a baha nahaihanakia, ki'a weiana hanona keaoai 'uainakia bakai 'ekana, iamo baika ekia ki'a hanona muriai aba katewaira tina. <sup>25</sup> Ihobonai mo maearima babai namokia tibabai hanona temahanai harai ki'a baha nahaihanakia, haeamona ekia babai namokia a'i nahaihanakia haukia abomo aba katewaira tina.

## 6

*Ta'ara'i Hauna Ena Poki Kemariki aina.*

<sup>1</sup> A'ikakauma haukia weiakia ta'ara'i akana tibabaina haukia ikoikiai hanona ekia poki haukia katemarikiai ki'a bahanakia, weiana hau ha Tirama atana mai eka ba'iohi 'abikia ahakiai a'i ke'abi ki'a.

<sup>2</sup> Ta'ara'i haukia ekia poki haukia hanona a'ikakauma haukia raninai ia uaho'abakia paukiai a'i katehao ti-boanakia, ia ta'arakia katea'i harai, pokina poki haukia weiakia ta'ara'i haukia herekiai barai barai tia'ina haukia hanona a'ikakauma haukia weiakia ta'ara'i haukia tiraona'au ainakia haukia. Taba neiakia hanona kobamarere ainakia mai kobahi ahinakia.

*Moni Kaharaona Ki'a Bahana Hanona Kaha'eho.*

<sup>3</sup> Hau ha ba'iohi haeai ha niba'iohi aina haeamona eka Obiapaka Iesu Keriso ena ba'iohi tohana mai ba'iohi weiana Tirama ikutiaina taearana tohana nibaihana hauna a'i nibatohana raninai, <sup>4</sup> ia herenai hanona apamo ebonu, ia taba ha'i e'iohina. Ia ena raona raona teki'a ki'a baha, weiana 'abi'abi aokiai hanona ke'abi harataea mai ke'abi baitaeai, ba 'abi weiakiai hanona wamuru mai baiara, 'abi ki'a obokia mai tai ha a'i nibatohana. <sup>5</sup> Haeamona maearima weiakia ekia raona raona a'i tiberu harai, Tirama ena 'abi tohana a'i te'iohina, mai Tirama ibanamona akakiai kateobia tiraonana haukia kipokia baiatakiai tibiaira to'ona.

<sup>6</sup> Iamo hau ha herenai taba ea'inakia haukiai aona ketaina raninai Tirama ikutiaina maurina hanona kebaobiana. <sup>7</sup> Harama ahi raninai taba ha'i hamaihana hanopaka, haeamona hanopakai kaha'ari raninai taba ha'i kahaeoaina kupa. <sup>8</sup> Ua buonai herekai aniani mai habuni papakia katehaea re'a weiana hanona abetaina aika 'eukai. <sup>9</sup> Ia weiakia tenuatae pateobia haukia hanona baihobo aokiai katetoto, raona po'okia mai ao ibahaiara raonaraonakia rionai kateto'o, weiana ekia mauri keaoaina ki'a 'ekana tohanai mai kea'i ki'anakia. <sup>10</sup> Pokina moni iraona'au aina hanona aka ki'a haeai haeai ikoikiai keba ramanakia. Maearima baika moni tenuaki'aina hanona a'ikakauma tereana kipokia ao pumai tebonu.

*A'ikakaumai Huari Namona Kobabaina.*



<sup>11</sup> Ia oi Tirama ena maearima, taba neiakia ikoikiai herekiai kokapare. Ia bero tohana kotabuna, Tirama komarikiaina, koa'ikakauma, raona'auai komi-aho, kobapahihi, mai rabo haraii komi-aho. <sup>12</sup> A'ikakaumai huari namona kobabaina, ba mauri banaibanai koa'i 'inina, pokina mako tebatohani'o wairanai emu a'ikakauma hoana ohina pou haraina raninai Tirama eaparini'o mauri neiana aonai.

<sup>13</sup> Tirama taba ikoikiai mauri nibenakia hauna mai Keriso Iesu ia kipona Pontio Pilato herenai 'abi tohana ehina pouna hauna wairakiai au oi nabahi ahini'o. <sup>14</sup> Keriso ena rauhuhu 'abikia koka'ai harainakia mai herekiai a'i kobeho, haeamona hau ha a'i kekaiahini'o keaomo eka Obiapaka Iesu Keriso ena mai mue wapuna. <sup>15</sup> Ena mai mue wapuna weiana hanona Tirama kehore ena rani tohanai kebabaina. Tirama hanona banamo pokina mai ia ikupaiana mo taba ikoikiai ekia poki, obia 'arana haukia ikoikiai ekia Obia 'arana, haeamona obiapaka ikoikiai ekia Obiapaka. <sup>16</sup> Ia ikupaiana mo kemiaho banaibanai a'i ke'ari 'apua, ia hanona ea aonai nemiaho ea weiana hanona ea ki'a baha tai ha keao herena hanona a'i ketaina, maearima 'abaeana ha hanona Tirama a'i eihana 'ao a'i keihana. Mariki mai hiabu hanona Tirama herenai kemiaho banai banai. Amen.

*Kohu Herekia Tebo'o Haukia Marea Aonai.*

<sup>17</sup> Maearima weiakia bariu hanopaka neiana ena mauri tabakiai tiobia haukia kohinabe taburanakia, a'i kateapa, mai ekia buabeni obia tabakia weiakia aba kate'akauma haukia herekiai a'i kemiaho, ia ekia buabeni hanona Tirama herenai mo kemiaho, pokina taba ikoikiai niberuberu benaka aoka ibanamona. <sup>18</sup> Kohina benakia aka namokia katebabai, babai namokiai kateobia, haeamona maearima baika herekiai watewateai kateberuberu benakia. <sup>19</sup> Taeara weianai katebabaina hanona kipokia ekia kepu katebararona, weiana hauna ia kebamia 'ininakia mauri wairai hauna 'euna, ba mauri weiana katea'ina hanona mauri tohana.

<sup>20</sup> Timoteo e, aka naiana Tirama ebeni'o hauna ko'ima haraina, hanopaka 'abi'abikia mai po'o baihara taena

weiana maearima baika tiapari haoreaina tetibaha 'aotipa' weiakia haukia herekiai kokapare. <sup>21</sup> Pokina maearima baika po'o raonana weiana tea'ina hanona ekia a'ikakauma teba'akaumana.

Nabahuba'ari Tirama ena aoko'o hoana hanona ikoimiai heremiai kemiaho.

## Paulo Ena Marere Ibaruana TIMOTEO Herenai

### *Puka Aona Irerena 'Abina*

Timoteo hanona Paulo e'abana pou namona akana tebabaina hauna. Ua buonai Paulo puka neiana ererena eao herena, taeara namokia robakia eahunakia mai ehina bena taeara weiakiai keka'a rani ikoinai. Ia Timoteo ehina bena kea'ikakauma tabura mai Iesu Keriso pouna namona keiroro aina rani ikoinai. Tirama ena 'abi keka'ai harainakia. Maearima katebahaiarana 'ao puma katebena haukia paukiai a'i kekai'au kai'au. Ba ia hanona ketabura, Tirama aka ebena hauna kebabai haraina. Ia hanona bai'oi 'abikia haeai haeai aiakia a'i kebahu ainakia, mai ekia raona a'i tenamo haukia herekiai kekapare, 'abi uahomakia tihore maearima tia'i ki'anakia. Ia hanona Paulo ena miaho taearana keraona 'ini haraina ba ia ua kemiaho aiho, pokina a'ikakaumanai tetabura haukia ekia miaho taearana hanona weiana, baibuai katemiaho mai uaho'abakia aokia kateba namonakia abomo ekia puma katebuanakia.

### *Puka Paipana Apa'uakia*

- a. Roba iahu. (1.1-2)
- b. Banamo 'abina mai bahiahi 'abina. (1.3–2.13)
- c. Bairobe 'abina. (2.14–4.5)
- d. Paulo ena nuatae 'abina. (4.6-18)
- e. 'Abi orekia. (4.19-22)

### *Banamo 'Abina.*

<sup>1</sup> Au Paulo, Tirama ena nuatae paunai Keriso Iesu ena iuhubeau hau'u ai aeao Keriso Iesu aonai mauri te'abi'uai aina hauna pouna kahinana,

<sup>2</sup> Timoteo, naha'u ki'amu, narere beni'o. Nabahuba'ari Tirama Hamaka mai Keriso Iesu aika eka Obiapaka ekia baraibarai apa'uana, aoko'o, mai baibua heremuai katemiaho.

### *Paulo Timoteo Aona Eataburana.*

<sup>3</sup> Tirama namo 'abina nabena, haeamona rani ikoinai e'u bahuba'ari ai oi a'i nareani'o rabi mai mararani aokiai. Tirama weiana ao'u berona tohanai ia ta'arana na'i ihobona 'aba'aba'u ia

ta'arana tea'i 'abana. <sup>4</sup> E'u ka'a aonai ohai hauna naraonana, e'u nuatae maikoinai hanona paihani'o, ba paihani'o raninai ao'u penamo wairai. <sup>5</sup> Emu a'ikakauma tohana naraona 'inina, a'ikakauma weiana hanona 'uainai oi kupumu babi'ena Loi mai hinamu Eunike temauriaina hauna, bariu nabatohana oi aomuai abomo a'ikakauma weiana nemiaho. <sup>6</sup> Ua buonai au oi nabaraonani'o, ima'u ahamuai aha'o'au abahuba'ari aonai auba ena ibeni naiana Tirama ebeni'o hauna kobapa'uana akana kobabai taburana. <sup>7</sup> Pokina Tirama hanona ta'u aubana a'i ebenaka, ia hiabu, raona'au mai bakiro aubana ebenaka.

<sup>8</sup> Ua buonai eka Obiapaka pouna ihinani a'i kohaumaea mai Keriso paunai au nawapura hauna abomo a'i kohaumaeaina. Tirama tabura ebenaka ihobonai hau haiara aokiai kahamiaho pou namona paunai. <sup>9</sup> Ia ehore aika ebamaurinaka abomo eaparinaka ena robe maearimakai kahaeao. Weiana hanona taba ha hababaina paunai aha'i, ia ena raonaraona mai ena aoko'o hoana paunai. Ena aoko'o hoana neiana hanona aba 'uainai hanopaka a'i erama baha aonai Keriso Iesu paunai ebenaka. <sup>10</sup> Ia bariu hanona aba ewaira tina harai Keriso Iesu ibamaurika hauna emai aonai. Ia ehore 'ari hiabuna ebapuana, haeamona mauri banaibanai a'i kepua hauna taearana pou namonai ebawaira tinana.

<sup>11</sup> Pou namona neiana paunai Tirama ehore etina'ana'u, kairoro iuhubeau hau'u ai kaeao abomo ba'iohi hau'uai kaeao. <sup>12</sup> Weiana paunai au hanona na nahau haiara aiho, iamo a'i nahaumaea, pokina au a'iohina tai na'ikakaumana hauna abomo a'iohi haraina au ia herenai ahorotina akana ke'ima haraina keao mo ena mai mue wapunai.

<sup>13</sup> Au aba'iohini'o 'abikia tohakiai taearanai koka'a mai a'ikakaumamu haeamona mai raona'aumu Keriso Iesu aonai. <sup>14</sup> Taba namona ebeni'o oi emu iha'ini ba'anai hauna Auba Robe weiana aika aokai nemiaho hauna ena baraibarai ai ko'ima haraina.

<sup>15</sup> Aba o'iohina 'abaka Asia hanonai temai haukia ikoikiai tekamuri aina'u tehabona'u, baiatakiai hanona Fugelo mai Heremogene ohi.

<sup>16</sup> Obiapaka kehore ena aoko'oai Onesiforo mai ena itu haukia ikoikiai kebanamonakia, pokina ia rani bo'ona ao'u ebataburana abomo tebirina'u awapura hauna a'i ehauma'eaina. <sup>17</sup> Ia weia Romai ekara'au raninai, au etabuna'u etabuna'u eaomo etabu ahina'u. <sup>18</sup> Nabahuba'ari Obiapaka ia kebaraina ia hanona Obiapaka ena aoko'o ketabu ahina wapu weianai. Abomo oi aba o'iobi haraina ia aea ebarai aihona'u weia Epesoai.

## 2

### *Keriso Iesu Ena Huari Haumu Namomu ai Koao.*

<sup>1</sup> Ua buonai, naha'u e, Keriso Iesu aoko'o hoana weiana ebeni'o hauna aonai kotabura. <sup>2</sup> 'Abi naiakia maearima bo'ona wairakiai airoro ainakia 'urukia o'o haukia maearima weiakia nubatohanakia haukia koba'iobinakia, ba ia katehore maearima baika kateba 'iobinakia.

<sup>3</sup> Keriso Iesu ena huari haumu namomuai koao, hau haiara aokiai kobatabura ihobona au nababaina 'abana. <sup>4</sup> Huari hauna maearima 'abaeakia ekia mauri hoahoana aonai a'i nitoto. Ia huari akana nibabai haraina pokina ena nuatae poki hauna aona kebanamona. <sup>5</sup> Abomo beau baitaeai hauna beau rauhukia ikoinai keka'ai harainakia, aha'i raninai beauai 'uai 'arana a'i kea'ina. <sup>6</sup> Biraura hauna kearo'ari ba aniani kori'uaina hanona ia kea'i'uaina. <sup>7</sup> Au taba nahinana hauna koraona haraina, pokina Obiapaka hanona aba aomu kekaikauna taba ikoinai obokia kobo.

<sup>8</sup> Iesu Keriso 'ariai emikiri mue hauna koraona 'inina, ia hanona Davida 'aba'abana, neiana hanona pou namona au nairoro aina. <sup>9</sup> Pou namona airoro aina paunai nahau haiara mai tebirina'u matoha beho hauna ha 'abana, ia Tirama ena 'abi katebirina hanona a'i ketaina. <sup>10</sup> Ua buonai e'u atetua ikoikiai aokiai abatabura ki'a Tirama ena a'i taea haukia paukiai, weiakia kabarainakia Keriso Iesu aonai bamauri mai nuabi banaibanai hauna katea'ina. <sup>11</sup> Neiana hanona 'abi tohana aoka tohakiai kaha'i taeana mai kaha'ikakaumana.

"Aika Keriso kipokia

ha'ari raninai,

aika ia kipokia kahamauri oioi.

<sup>12</sup> Aika hau haiara aokiai kahabatabura raninai,

aika ia kipokia kahaobia oioi.

Aika ia kahabuniaina raninai,

ia abomo aika kebuniai ainaka.

<sup>13</sup> Aika aia a'i nahababua 'auna re'a ia hanona aia nibabua 'au ohona, pokina ia hanona kipona a'i kebuniai aina."

### *Tirama Kebatohani'o Ena Aka Haumu Tohamu.*

<sup>14</sup> 'Abi neiakia maearima kobaraonanakia. Ba Tirama wairanai kohinabe pahihinakia, 'abi'abi 'abaeakia ahakiai a'i katebaiara, 'abi weiakia hanona anikia aha'i, maearima aia weiana tiona hanona ekia mauri nia'i ki'anakia.

<sup>15</sup> Koaka tabura harai, kipomu Tirama wairanai kobatohani'o oi hanona aka haumu weiamu emu aka a'i nuhau-maeaina, ba oi haumu hanona Tirama ena 'abi tohana 'abina taearana beronai nuba'iobi. <sup>16</sup> Hanopaka 'abi'abikia mai po'o 'abi'abikia herekiai kokapare, pokina weiakia hanona maearima Tirama herenai tibaka'a 'akaumanakia. <sup>17</sup> 'Abi ua homakia tiba'iobi hanona matoha tua ki'a obona koipe 'abana bitio niani obona, Humenaio mai Fileto hanona maearima neiakia baiatakia. <sup>18</sup> Ia terarua hanona 'abi tohana taearana aba tehabona ia ekia bai'oiai ti'abi, aika aba hamikiri mue muri hanona 'ariai a'i kahamikiri mue, ba 'abi weiana nihore maearima baika ekia a'ikakauma nia'i ki'ana.

<sup>19</sup> Ia Tirama ehore kori 'ini 'ekana ha aba ehorotina weiana a'i keibiu 'apua, ba ahanai 'abi neiakia tererenakia, "Obiapaka hanona ena maearima ikoikiai e'iobinakia," abomo "Taimo taimo ti'abi ia Obiapaka 'euna hanona babai ki'a ikoikiai katehabonakia."

<sup>20</sup> Itu apa'uana ha aonai hanona uro mai 'ororo haeai haeai weia temiaho, baika hanona gold 'ao silba ai tebabainakia, ia baika hanona matiui 'ao tipuai tebabainakia, ba baika hanona aka apa'uakiai kateakainakia, ia baika hanona aka 'abaeakiai kateakainakia. <sup>21</sup> Hau ha ena mauri aonai kipona ki'a herenai kekapare raninai, ia hanona aka apa'uakia aokiai kateakaina, ia hanona tebarobena, haeamona ena aka kebo'o ki'a baha ena poki hauna herenai, abomo aba e'oru aka namokia ikoikiai keakainakia.

<sup>22</sup> Ba'aru'aru raonaraonakia ki'a obokia kohabonakia, ia kotabura aka beroai,

a'ikakauma, raona'au mai baibuai komi-aho, haeamona weiakia aokia tenamo Obiapaka atanai tiapari haukia kipokia katobahamomo. <sup>23</sup> Po'o mai ao 'abaea baihara taeakia herekiai kokapare, pokina aba o'ioibina weiakia puakia hanona baiara katerama. <sup>24</sup> Ia Obiapaka ena ta'ara'i hauna hanona a'i kebaiara, ia hanona maearima ikoikiai herekiai kerabo harai haeamona ba'ioibi hauna namonai keao mai kebahahihi. <sup>25</sup> Weiakia ia ti'oatana haukia hanona baihauai kehina harainakia ba taeara weianaimo Tirama mehore mebaraona kabenakia katemai Tirama ena 'abi tohana katea'i taeana. <sup>26</sup> Ba weianai ekia raonaraona katebero Satani weiana ea'inakia aiana teka'aina hauna ena rioai katekapare.

### 3

#### *Wapu Orekiat.*

<sup>1</sup> Neiana hanona koraona 'inina, wapu orekiai hanona ki'a rarikia 'akikia katerama. <sup>2</sup> Maearima hanona kipokiamo kateraonakia, moni mo katenua ki'aina, kate'abi ki'a, kateapa, katebaro'e, maearima herekiai kate'abi ki'a, nahu hama hina aiakia a'i kateka'ainakia, namo 'abikia a'i katehina, mai robe akakia a'i katebabai, <sup>3</sup> herekiai haukia a'i kateraona'au ainakia, ki'a a'i katehina hao, kate'uahi 'uahi, katebaripu ripu, kateaiahu, aka namona kate'oatana, <sup>4</sup> katehinahina, a'i kateraona raona ia katebabai 'abaea, aokia apa katebonu, aonamo akakia katenuatae ainakia, ia Tirama a'i kateraona'au aina. <sup>5</sup> Hauaniaimo Tirama ikutiaina maurinai temiaho, ia mauri weiana hiabuna tohana hanona tibaki'ana. Maearima uahomakia haukia hanona herekiai kokapare.

<sup>6</sup> Maearima uahomakia baika hanona babi'e ekia raona teko'iko'i haukia ekia itu aokia titoto, aokia tiani kipokia nabau akakia ki'a obokia tibabainakia babi'e weiakia hanona aka ki'a aonai temiaho ekia nuatae ki'a obokia ihobonai. <sup>7</sup> Babi'e weiakia rani ikoinai tibahobona tenuatae taba mahamahakia patemareai haraina, ia Tirama ena 'abi tohana hanona a'i mo te'ioibi bahana. <sup>8</sup> Ihobona Iane mai Iambore Mose te'oatana 'abana, maearima uahomakia hanona Tirama ena 'abi tohana abomo ti'oatana, ekia

raona hanona a'i tebero, Tirama ekia a'ikakauma a'i tibatohana. <sup>9</sup> Ia ekia ba'ioibi hanona a'i keao homa'ana, pokina maearima ikoinai hanona ia ekia po'o kateiha tinana, ihobona Iane mai Iambore ohi herekiai erama 'abana.

#### *Tirama Ena 'Abi Tohanai Komiaho.*

<sup>10</sup> Ia oi hanona e'u ba'ioibi akakia ikoinai aba o'ioibinakia, e'u hoahoa, e'u raonaraona apa'uana, e'u a'ikakauma, e'u bakiro, e'u raona'au, e'u bapahihi aba o'ioibinakia. <sup>11</sup> Oi o'ioibina au te'oatana'u abomo ahau haiara weia Antioka ai, Ikonio ai mai Lusterai ai. Bai'oata pahihikia terama ia abapahihi, ba Obiapaka ehore ki'a weiakia aokiai ea'i maurina'u. <sup>12</sup> 'Abi tohana maearima tenuatae Keriso Iesu aonai Tirama ikutiaina maurinai katemiaho haukia ikoikiai hanona kate'oatanakia. <sup>13</sup> Ba aka ki'a haukia mai ahu 'oi'oi haukia ekia aka ki'a tebabai to'o baihana eaomo teki'a ki'a baha, weiana ia tihore maearima baika ti'oinakia haeamona ia kipokia abomo ti'oinakia.

<sup>14</sup> Ia oi hanona Tirama ena 'abi tohanai komiaho, weiana o'ioibina omarene aina mai nua'ikakauma aina hauna, abomo o'ioibina tai hanona oi emu ba'ioibi haukia. <sup>15</sup> Ko'iko'imuai raninai Puka robena aba o'ioibina emai mo bariu, ba Puka robena kehore aobero kebenaka, weianai Keriso Iesu oa'ikakaumana bamauri oa'ina. <sup>16</sup> Puka Robena 'abikia ikoikiai hanona Tirama Aubana ena baraiarai ai tererenakia, ba ekia aka hanona teapa'ua ki'a baha, weiakiai 'abi tohana kahabamarere aina, katebaraona beronaka, katebaka'a beronaka, mai mauri berona kateba'ioibinaka weianai kahamiahohi. <sup>17</sup> Ua buonai Puka robena 'abina kehore maearima Tirama ena aka tibabaina haukia keba'oru harainakia aka namokia ikoikiai katebabainakia.

### 4

<sup>1</sup> Tirama mai Keriso Iesu wairakiai au oi nabahi ahini'o, Keriso hanona kemai mue mauri haukia mai 'ari haukia kebabakainakia ena obia aiarana ke'arana. <sup>2</sup> Tirama ena 'abi koiroro aina, tia'i taeani'o 'ao a'i tia'i taeani'o ranikia ikoikiai aokiai, mai bakiro mu maearima kobamarerenakia, kobaberonakia, korobenakia, haeamona koba taburanakia. <sup>3</sup> Pokina maearima ba'ioibi berona aiana a'i kateona ranina hanona kemai, weiana



ia kipokia ekia nuatae taikiai katetai abomo kipokia ekia ba'iobi haukia bo'ona katetabu ahinakia aokia ibanamona 'abikia katehina aiakia kateo'o. <sup>4</sup> Tirama ena 'abi tohana ionai katebua ke'e, ia kikipa bai'oikia katebahu ainakia. <sup>5</sup> Ia oi hanona rani ikoikiai ko'ima haraini'o, mai bakiromu haiara aokiai kobakiro, pou namona ihinana akana kobabaina, Tirama ena aka ibabaina haumuai koao aka ikoikia kobabai ore harainakia.

<sup>6</sup> Au e'u mauri maikoinai hanona beruberu tabanai keao Tirama herena, ba e'u 'ari ranina weiana hanona aba herekai. <sup>7</sup> 'Au aonai aba a'au harai, mai beau baitaeai aonai beau abaore haraina, abomo e'u a'ikakauma hanona a'ima haraina. <sup>8</sup> Ba bariu hanona e'u bero paunai 'uai hoana eba'oruna 'eu'u, weiana Obiapaka bero hauna bakai ke'uai aina hauna kehore au 'uai hoana kebena'u, au mo ikupaia'u aha'i, ia weiakia ikoikiai mai raona'aukia Obiapaka te'imana kewaira tina ena mai wapunai haukia abomo kebenakia.

### *Paulo Ena Nuatae 'Abina.*

<sup>9</sup> Taeara kotabu konoanoa komai biai au here'u. <sup>10</sup> Pokina Dema hanona hanopaka maurina eraona'au aina buonai ehobona'u eao Tesalonika. Kereske hanona eao Galatia, ba Tito hanona eao Dalamatia. <sup>11</sup> Luka mo ikupaiana hanona au here'uai nemiaho. Mareko kobaka'ana torarua katomai, pokina ia hanona aka neianai kebaraina'u aba ketaina. <sup>12</sup> Tukiko hanona aba auhuna Epeso eao.

<sup>13</sup> Komai raninai, e'u habuni ibatoto imukina weia Toroai Kapo herenai ahabona hauna komaiaina, mai puka komaiainakia, puka weiakia mamoe paruakiai tererenakia haukia hanona a'i koreanakia koa'inakia komaiainakia.

<sup>14</sup> Alesanda auri akana nibabaina hauna hanona here'uai eabai ki'a ki'a baha, ia Obiapaka kehore ena babai weiana ihobonai 'arana kebamuenta. <sup>15</sup> Ia herenai oi abomo ko'ima 'ima haraini'o, pokina eka ba'iobi 'abikia hanona e'oata ki'a ki'a bahanakia.

<sup>16</sup> Bakai kori'uainai, akoroti e'u pou ahinana aonai tai ha a'i ebarai 'apuana'u, ikoikiai tehabona'u teka'a. Ia Tirama ekia ki'a weiana 'arana a'i pehorena. <sup>17</sup> Ia

Obiapaka hanona au here here'uai emi-aho tabura ebena'u, weiana au ahore pou namona maikoina airoroai haraina rama haea haukia ikoikiai kateona, e'u 'ari katebatohana 'ekanai ebarobo maurina'u. <sup>18</sup> Obiapaka kehore au ki'a 'ekakia ikoikiai aokiai kebarobo maurina'u mai keaoai haraina'u ena kupa aiaranai. Nuabi hanona ia herenai kemiaho keao mo banaibanai. Amen.

### *Banamo 'Abina Orena.*

<sup>19</sup> E'u banamo 'abina Priskila mai Akula ohi kobenakia, abomo Onesiforo ena itu haukia kipokia kobenakia. <sup>20</sup> Erasto hanona Korintoai nemiaho, ba Trofimo hanona einawa buonai Miletoai ahabona weia nemiaho. <sup>21</sup> Taeara kotabu konoanoa, 'ama ranina a'i nikara'au baha hanona komai. Eubulo, Pude, Lino mai haibuka Klaudia, haeamona uaho'abaka ikoikiai ekia banamo 'abina teuhuna heremu.

<sup>22</sup> Nabahuba'ari Obiapaka hanona aubamu herenai kemiaho. Tirama ena aoko'o hoana ikoimiai heremiai kemiaho.

## Paulo Ena Marere TITO Herenai

### *Puka Aona Irerena 'Abina*

Tito hanona Iuda hauna aha'i. 'A ia eraona kabe aonai, Paulo ebaraina ena iuhubeau akana aonai. Paulo ehore Tito hanona Krete kereibuanai ehabona, ia kehore a'ikakauma haukia iha'inikia akana kebabaina 'eka weianai.

Marere neiana aonai, 'abi kori'uaina hauna neiana. Kreta haukia ekia hoahoa hanona a'i tenamo harai (1.10-13). Paulo e'abi, a'ikakauma haukia i'uaiaikia akana nenuatae aina hauna ena hoahoa hanona katenamo harai. Abomo maearima iba'iofikia taearana Tito ehina bena, ihobona hau mai babi'e maearima 'aru'arukia mai ta'ara'i haukia. Marere puanai hanona Paulo ehore Tito ehina bena hau mai babi'e keba'iofinakia aokia katehamomo. Ia ha ha herekiai aka namokia katebabai mai maearima baika herekiai abomo. Ia hanona opuere 'abikia a'i katehina mai maearima baika kipokia a'i katebaiharatae.

### *Puka Paipana Apa'uakia*

- a. Roba iahu. (1.1-4)
- b. Tirama ena marea aka haukia. (1.5-16)
- c. A'ikakauma haukia ekia mauri. (2.1-15)
- d. Bahiahi 'abikia. (3.1-11)
- e. 'Abi orekia. (3.12-15)

### *Banamo 'Abina.*

<sup>1</sup> Au Paulo, Tirama ena ta'ara a'i mai Iesu Keriso ena iuhubeau hau'u. Au hanona teuhuna'u maearima weiakia Tirama etina'anakia haukia ekia a'ikakauma kabarainakia Tirama ena 'abi tohana kate'iofina weianai Tirama katemariki aina. <sup>2</sup> A'ikakauma mai aotipa weianai mauri banai banai katebuabena Tirama hanona aba wa'i baha hanopaka a'i erama baha aonai mauri neiana e'abi'uai aina, ia hanona a'i nibai'oi. <sup>3</sup> Aba eraona 'uaina ba ena rani tohanai ena pou namona ebawaira tinana maearima ikoikiai kate'iofina, weiana hauna nairoro aina, Tirama ibamaurika hauna ebatohana'u ia ena aka neiana ibabainai.

<sup>4</sup> Tito, naha'u tohana eka a'ikakauma hamona aonai, au oi narere beni'o. Tirama aika hamaka mai Keriso Iesu aika ibamaurika hauna aoko'o hoana mai baibua katebeni'o.

### *Tito Ena Aka Krete Aonai, Kiro Haukia Katea'i taeanakia.*

<sup>5</sup> Krete ai ahaboni'o ena poki hanona aka ikoinai a'i teore haukia koa'ia'i harainakia ba aiara ikoikiai aokia Tirama ena mareai kiro haukia kotina'anakia 'uai akana katebabaina, 'iobi abeni'o haunai koaka. <sup>6</sup> Kiro hauna hanona behoi a'i tikaiahina hauna, atawana babi'ena hamona, nahuna katea'ikakauma abomo aia kateka'aina, a'i kateripuripu. <sup>7</sup> Pokina Tirama ena aka neiha 'ininakia hauna hanona beho ai a'i tikaiahina, kipona ena nuataeai a'i keka'a, 'ao a'i keopuere noanoa, a'i keinu 'ari, a'i keripuripu, mai moni a'i kenua ki'aina. <sup>8</sup> Baki haukia kea'i taeanakia ena ituai mai taba namona hauna keraoana'au aina, aoberoi kemihao, bero taearanai kemaui, ena mauri kebaibeni Tirama herenai, mai aona kebaibero. <sup>9</sup> Tirama ena 'abi tohana weiana teba'iofi aina haunai kea'i ini. Taeara neianai ba'iofi tohana keba'iofinakia maearima aokia keba taburanakia, mai weiakia ba'iofi tohana ti'oatana haukia ekia beho kebaberonakia.

### *Ba'iofi Haukia Bai'oikia Kateba'oronakia.*

<sup>10</sup> Pokina bai'oata haukia bo'okia weia ekia 'abi 'abaea 'abi 'abaeai maearima ti'oinakia, ba weiakia tetarenakia haukia bo'okia abokiamo weia. <sup>11</sup> Maearima weiakia kato ba'oronakia 'urukia kepua, pokina a'ikakauma haukia ekia itu haukia bo'ona aokia tibaro'arina, a'i pateba'iofiai tabakia tiba'iofiai moni iraonanai haumaea akakia weiakia tibabai. <sup>12</sup> Kerete haukia kipokia ekia mahabanai hauna ha Kerete haukia ehina benakia etibaha, "Kerete haukia hanona bai'oi haukia, 'aki aiporokia ki'a obokia 'abakia, te'aboro kipokia mo nuakia tiraonanakia." <sup>13</sup> Neiana hanona 'abi tohana ehinana, ua buonai kobata ki'anakia, weianai hanona ekia hoahoa katebero Tirama katea'ikakauma taburana. <sup>14</sup> Ba Iuda haukia ekia ori 'ao kikipa 'ai'aikia mai weiakia maearima ekia rauhuhu 'abikia aiakia a'i kateo'o, weiakia hanona maearima herekiai timai Tirama ena 'abi tohana ti'oatana.

<sup>15</sup> Weiakia aokia tebero harai haukia hanona herekiai taba ikoinai tebero harai, ia weiakia aokia ki'ai tebonu haukia mai a'i tia'ikakauma haukia hanona herekiai taba ha a'i ebero. Ekia raona mai aokia tohana hanona teki'a. <sup>16</sup> Ia ti'abi Tirama te'iobi haraina, iamo ekia babai ai hanona Tirama a'i tia'i taeana. Ia hanona maearima weiakia 'arikia a'i ni'ari haukia aia a'i tika'aina haukia haeamona taba namona ha katebabaina herekiai hanona a'i ketaina.

## 2

### *A'ikakauma Berona Tohana Keba'iobinakia*

<sup>1</sup> Ia oi hanona a'ikakauma berona tohana koba'iobi ainakia taeara weianai katemauri. <sup>2</sup> Hau kirokia koba'iobinakia katebakiro, ekia hoahoai maearima ia katemariki ainakia, aoberoai katemauri mai ekia a'ikakauma ketabura harai, kate raona'au haeamona katebapahihi.

<sup>3</sup> Taeara ihobonaimo babi'e kirokia koba'iobinakia Tirama ena nuatae maurina ketemiaho, baika herekiai a'i kate'uahi 'uahi, 'ao a'i kateinu 'ari, ia aka namo taearakia kateba'iobi ainakia. <sup>4</sup> Weiana ia katehore babi'e 'aru'arukia kateba marerenakia kipokia atawakia mai nahukia kateraona'au ainakia, <sup>5</sup> kateaobero mai ekia hoahoai katebero harai, ekia itu akakiamo katea'i rea, katerabo harai, mai atawakia taikiai katetai, weiana hau ha Tirama ena 'abi a'i keba'ki'ana.

<sup>6</sup> Taeara ihobonaimo, hau 'aru'arukia koba taburanakia aoberoai katemauri. <sup>7</sup> Oi hanona taba ikoikia aokiai ihaiha namona kobaihanakia emu babai namokiai. Emu ba'iobi aokiai hanona hoahoa beronai mai aomu tohanai koba'iobi. <sup>8</sup> 'Abi berona tohanai ko'abi'abi weiana tai ha a'i ke'abi ki'a bena. Ba weiakia oi ti'oatani'o haukia katehaumaea pokina herekai 'abi ki'a obona katehinana 'ekana aha'i.

<sup>9</sup> Ta'ara'i haukia koba'iobinakia taba ikoikia aokiai ekia poki haukia aiakia kateka'ainakia, aokia kateba namonakia mai ekia 'abi a'i kateba muenakia. <sup>10</sup> Ekia poki haukia herekiai a'i katebainao iamo taeara ikoikia aokiai hanona ekia namo mai aia ibabua 'au hoana katebawaira tinana, weianai maearima Tirama aika ibamaurika hauna i'iobina katenuataeai taburana.

### *Keriso Ena Mue Mai Wapuna Naha'imana Aonai.*

<sup>11</sup> Hoahoa uahomakiai kahamiaho, pokina Tirama ena aoko'o hoana weiana maearima ikoikiai keba maurinakia hauna aba ebawaira tinana. <sup>12</sup> Aoko'o hoana weiana aika niba'iobinaka Tirama ibaki'ana maurina a'i kahamauri mai hanopaka inuatae aina akakia ki'a obokia a'i kahababai, iamo bakiroai mai beroai kahamiaho, haeamona Tirama ena nuatae maurina kahamauri aina hanopaka neiana aonai. <sup>13</sup> Aika hanona ua kahamiaho aiho eka buabeni apa'uana weiana Tirama apa'uana mai ibamaurika hauna Iesu Keriso ena mue mai wapuna nuabina naha'imana aonai. <sup>14</sup> Keriso kipona ena mauri ebaibeni aika paukai weiana 'araka ehorenakia babai ki'a ikoikia aokiai erubunaka mai ki'a aha'i haukai ebaonaka ia kipona 'euna tohaka, maearima weiaka aoka tohakiai nahanuatae rani ikoikiai namo akakia mo kahababainakia.

<sup>15</sup> 'Abi neiakia koba'iobai mai maearima koba taburanakia, abomo ekia mauria taba teki'a haukiai mai taburamu maikoinai kobaberonakia. Hau ha a'i koiha haona oi a'i kebamiori po'oni'o.

## 3

### *A'ikakauma Haukia Kateba'oru Aka Namokia Ibabaikiai.*

<sup>1</sup> A'ikakauma haukia kobaraonanakia Kabamani haukia mai poki haukia ekia hiabu ba'anai ketemiaho, aiakia kateka'aina abomo kateba'oru aka namokia ibabaikiai. <sup>2</sup> Kohina benakia hau ha herenai a'i kate'abi ki'a, baibuai ketemiaho, kate'amari 'amari, mai katerabo harai maearima ikoikiai herekiai.

<sup>3</sup> 'Uainai aika abomo hapo'o, aia a'i haka'ai, te'oi ahinaka habeho, mai hauani ena nuatae akakia ki'a obokia ta'arakia ha'i abomo haonamo ainakia. Haeamona eka mauri aokiai ki'a akakia hababai mai hawamuru, maearima baika te'oatanaka, mai aika ha ha abomo kipoka habai'oatana.

<sup>4</sup> Iamo Tirama aika ibamaurika hauna ena rabo harai mai ena raona'au tewaira tina raninai, <sup>5</sup> aika ebamaurinaka. Weiana hanona aika eka aka bero paunai aha'i, 'a ia kipona ena aoko'o hoanai ebaumaurinaka. Auba Robeai eba'uerenaka

harama mue maearima mahamahakai haeao ebamaurinaka. <sup>6</sup> Tirama ehore ena beruberuai Auba Robe ahakai eheina ibamaurika hauna Iesu Keriso paunai. <sup>7</sup> Weiana buonai Tirama ena aoko'o hoanai bero ebenaka ia wairanai, weiana aika mauri banaibanai nahabuabena hauna kaha'ina. <sup>8</sup> Ba'iohi neiana hanona 'abi tohana, ba au nanuatae oi ko'abi taburaina maearima hanona taba neiakia obokia kateobo. Ba maearima weiakia Tirama tia'ikakaumana haukia hanona kate'ima 'ima harainakia aka namokia katebabai ekia mauri aokiai. Neiakia hanona taba namokia maearima ikoikiai katebarainakia.

*Hoahoa Ki'a Obokia Herekiai Kokapare.*

<sup>9</sup> Iamo po'o baihara taekia, mai rama kupu torikia kikipakia, mai Mose ena rauhuhu paunai tibaiara 'ao ti'au haukia herekiai kokapare. Taba weiakia hanona anikia aha'i mai hau ha a'i katebaraina. <sup>10</sup> Baiata hore nibaramanakia hauna rani kori'uaina mai ibaruana korobena, ba murinai hanona kohabo 'abaeana kateba karahina. <sup>11</sup> Oi ko'iohina maearima uahomakia hanona taeara tohana tehabona mai ia hanona ki'a haukia, kipokia ekia ki'a tihore tibatohanakia ia hanona tebeho.

*Paulo Ena Nuatae 'Abina Mai Banamo 'Abina Orena.*

<sup>12</sup> Weiana au Aretema 'ao Tukiko kauhuna kewahi heremu 'ekamu kea'ina raninai, taeara kotabu komai biai here'u weia Nikapoli ai, pokina au ao'u aba a'ia'i haraina weia kamiaho 'ama ranina neiana aonai. <sup>13</sup> Sena rauhuhu hauna mai Apolo ohi kobarainakia ekia harima taearana koa'ia'i haraina weiana ia taba ikoikia tenuatae ainakia haukia katea'inakia.

<sup>14</sup> Eka maearima 'iohi katea'ina ekia mauriai aka namokia katebabai ba maearima weiakia taba tenuataeai haukia katebarainakia. Weiana a'i tememi-aho 'abaea ekia mauri buabuakia a'i temeaha'i.

<sup>15</sup> Maearima neia here'uai haukia ikoikiai ekia banamo 'abikia teuhunakia heremu. Emai banamo 'abikia eka maearima ikoikiai weiakia a'ikakauma aonai tiraona'au ainamai haukia kobenakia.

Nabahuba'ari Tirama ena aoko'o hoana ikoimia heremiai kemiaho.



## Paulo Ena Marere PILEMONA Herenai

### *Puka Aona Irerena 'Abina*

Pilemona hanona hau apa'uana ha, ia hanona a'ikakauma haukia Koloseai haukia niraonanakia. Pilemona hanona mai ena ta'ara'i hauna, ia atana hana Onesimo. Onesimo hanona ebeau 'akau-mana ena poki hauna herenai, ba eao aiara haeai ha aonai emiaho. Aiara weianai Paulo ohi tebaitabu ahi ba eraona kabe. Rani weianai Paulo hanona wapura 'ekanai buonai Pilemona kipokia kate'abi'abi hanona epahihi. Ua buonai marere neiana ererena, ba Onesimo ebena, ia kehore kea'ina keoaina ena poki hauna kebena.

Marere neiana aonai, Paulo ehore Pilemona eba'amena ena ta'ara'i hauna kea'ina mai aona namonai. Abomo ehina bena Onesimo hanona aba eraona kabe ena mauri Obiapaka ebena. Paulo mai aona ikoinai Pilemona enoina bariu rani neianai keoaina aonai Onesimo keaparina ia uaho'abana tohana.

### *Puka Paipana Apa'uakia*

- a. Roba iahu. (1-3)
- b. Banamo 'abina. (4-7)
- c. Enoina Onesimo paunai. (8-22)
- d. 'Abi orena. (23-25)

### *Banamo 'Abina.*

<sup>1</sup> Au Paulo, Keriso Iesu paunai nawapura hau'u, mai uaho'abaka Timoteo ohi marere tarerena niwahi Pilemona, emai hau ki'amu kipokia haka haeamo haumu heremu, <sup>2</sup> mai haibuka Apia, Arekipo nahahuari haeamo hauna mai Tirama ena marea haukia naia emu ituai tuto'u haeamo haukia ikoimiai heremi.

<sup>3</sup> Nabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona heremiai kemi-aho.

### *Pilemona Ena Raona'au Mai A'ikakauma.*

<sup>4</sup> Rani ikoinai e'u bahuba'ari ai oi naraonani'o haeamona e'u Tirama namo 'abina nabena, <sup>5</sup> pokina emu a'ikakauma Obiapaka Iesu herenai hauna mai emu raona'au Tirama ena maearima robekia ikoikiai herekiai hauna poukia aba ao'o.

<sup>6</sup> Au nabahuba'ari hanona eka baihauai oi emu a'ikakauma keaka harai aonai taba namokia weiakia Keriso aonai aba ha'inakia haukia maikoinai obokia kobo harai. <sup>7</sup> Hati'u ki'amu e, emu raona'au weiana ehore e'u aonamo ebapa'ua ki'a bahana mai ao'u ebatabura ki'ana, pokina uaho'abaka Tirama ena robe haukia aokia oba'amarina paunai.

### *Paulo Onesimo Paunai Enoi.*

<sup>8</sup> Ua buonai Keriso aonai au hanona panuako'o pabahi ahini'o aka berona kobabaina. <sup>9</sup> Iamo naraona'au aini'o paunai, ua a'i kahoma ia nanoini'o. Au Paulo bariu aba akiro abomo Keriso Iesu paunai nawapura hau'u, <sup>10</sup> naha'u Onesimo paunai au oi nanoini'o, ia hanona au naha'uai eao weia wapura itunai amiaho aonai. <sup>11</sup> 'Uainai hanona ia ena namo aha'i oi heremuai, ia bariu hanona ena namo aba epa'ua oi mai au herekai.

<sup>12</sup> Au hanona ia nauhu muena niwahi heremu. Iamo ao'u tohanai naraona'au aina hauna nauhuna. <sup>13</sup> Au neia pou namona paunai nawapura aonai nanuatae pa'i 'inina pemiaho oi 'ekamu pea'ina au pebaraina'u. <sup>14</sup> Ia au taba ha'i kababaina keaomo oi ko'abi harai 'uai, ba oi emu namo ha au here'uai kobabaina, weiana hanona oi emu nuataeai kobabaina ia au e'u bahiahi paunai a'i kobabaina.

<sup>15</sup> Onesimo hanona rani papana ehaboni'o, baiatami epa'a buonai bariu hanona koa'i muena heremuai kemiaho baihana. <sup>16</sup> Ia hanona ta'ara'i hauna 'abaeana aha'i, 'a ia hanona enamo ki'a baha ba ta'ara'i haukia, ia hanona uaho'abaka raona'auna, au ia naraona'au aina, iamo oi hanona koraona'auai ki'a bahana, ia hanona ta'ara'i hauna mai uaho'abaka tohana Obiapaka aonai.

<sup>17</sup> Ua buonai, oi nuraonana au emu hau toha'u raninai, Onesimo koa'i taea haraina matoha au nua'i taeana'u 'abana. <sup>18</sup> Ia oi heremuai taba ha ea'i ki'ana 'ao heremuai ena a'i 'abaea ha re'a, taba weiakia ikoikiai hanona au e'u pumai kateao. <sup>19</sup> Au Paulo 'abi neiana au kipo'u ima'uai narerena. 'Ara bita hanona ikoinai 'araki kahorenakia. (Ia oi abaraini'o bamauri otabu ahina hauna robana a'i nahuna.) <sup>20</sup> Ua buonai, hati'u e, au nanoini'o Obiapaka atanai e'u nuatae naiana kobabaina, Keriso aonai ao'u koba'amarina.

<sup>21</sup> Au marere neiana narerena hanona a'jobina e'u noi heremuai hauna akana aba kobabaina, ba kobabai banaina.

<sup>22</sup> Haeamona ituai baki ikaihurina ha koa'ia'i haraina au 'eu'u, pokina e'u buabeni Tirama herenai hanona emi bahuba'ari kea'i taeana ba au kawahi heremu.

*Banamo 'Abina Orena.*

<sup>23</sup> Au 'aba'u ha Epafra, Keriso Iesu paunai tararua tawapura haeamo hauna ena banamo 'abina neuhuna oi heremu.

<sup>24</sup> Abomo Mareko, Aristako, Dema, mai Luka, au kipokia taka haeamo haukia ekia banamo 'abikia teuhunakia.

<sup>25</sup> Nabahuba'ari eka Obiapaka Iesu Keriso ena aoko'o hoana hanona wai aubamiai kemiaho.

## Marere HEBERU Haukia Herekiai

### *Puka Aona Irerena 'Abina*

Puka neiana ererena hanona a'ikakauma haukia baika kebarainakia weiakia ekia a'ikakauma tihabona pokina maearima baika ia tebapo'onakia ba atetua aonai temiaho. Weiana buonai puka neiana ererena ekia a'ikakauma kebatapurana. Weiana Keriso ikupaianamo herenai etaina Tirama ena taeara tohakia kebaihanaka.

Puka neianai taba apa'uakia aihau robakia niahunakia. Kori'uaina hanona Iesu hanona Tirama nahuna tohana. Iesu hanopakai emiaho aonai, ia hanona puma bo'ona ehoainakia, mai haiara rarikia ea'inakia ba taeara weianai Tirama ehore Iesu hanona maearima ikoikiai ibaraikia hauna apa'uanai ebaona (2.10). Weiana paunai Iesu hanona mahabanai haukia mai aneru mai Mose etara haonakia. Ibaruana hanona Tirama kipona ehore Iesu ea'i taeara robe haunai keao banaibanai. Ia hanona robe hauna apa'uana kupai, ia hanona herenai etaina maearima ia tia'ikakauma tohana haukia kebamaurinakia. Mose ena hoahoa mai ena rauhuhu robakia eahunakia. Weiana hanona Iesu taba ebaubana hauna aubaubana 'abana.

Puka neiana aonai Isaraela maearimania 'uaikia haukia ekia a'ikakauma orikia bo'okia temiaho (11), ba maearima ekia a'ikakauma nibataburana. Orena hanona ia nibataburanakia weiana atetua taba taba katetabu ahinakia, 'a ia hanona ekia a'ikakaumai katekora 'ini keaomo 'ariai. Ia mahakia hanona Iesu herenai kemiaho, ena taearai kateka'a, weiana puma mai haiara hanona ekia a'ikakauma a'i katea'i parena (12.1-12).

### *Puka Paipana Apa'uakia*

- a. Roba iahu: Keriso hanona Tirama ibawaira tinana. (1.1-3)
- b. Keriso hanona aneru etara haonakia. (1.4-2.18)
- c. Keriso hanona Mose mai Iosua etara haonakia. (3.1-4.13)
- d. Keriso ena robe akana ena apa'ua. (4.14-7.28)

- e. Keriso ena 'abi'uai ena apa'ua. (8.1-9.28)
- f. Keriso ena baibeni akana ena apa'ua. (10.1-39)
- g. A'ikakauma hanona taba apa'uana. (11.1-12.29)
- h. Bahiahi 'abina mai 'abi orekia. (13.1-25)

### *Tirama Ena 'Abi Nahuna Pinanai Ehina benaka.*

<sup>1</sup> Wa'i baha raninai Tirama ehore mahabanai haukia pinakiai rani bo'ona taeara haeaihaeai ai 'aba'abaka herekiai ehina benakia. <sup>2</sup> Ia bariu rani neiakia puakiai hanona Nahuna pinanai aika ehina benaka. Tirama ehore Nahuna imanai kupa mai hanopaka ebaubainakia, ia ehore Nahuna etina'ana taba ikoikiai ebena ia 'euna. <sup>3</sup> Nahuna neiana hanona ne'imare Tirama nuabina nibawaira tinana, ia hanona Tirama ihobona tohana, ia ena 'abi hiabunai taba ikoikiai ne'imanakia. Ia maearima ekia ki'a eutu obonakia murinai kupa 'ubinai hiabu ikoinai Tiramana itipana taina imariki aina 'ekanai emiati nemiaho.

### *Tirama Nahuna Hanona Aneru Etara Haonakia.*

<sup>4</sup> Ia hanona aneru etara haonakia pokina Tirama ia atana ebena hauna hanona aneru atakia etara haonakia. <sup>5</sup> Tirama ehore ia ehina bena, "Oi hanona au Naha'u. Bariu beraura neianai Au oi abaramani'o,"

Sal 2.7

ia aneru ha herenai ua a'i e'abi aiho. Ia haeamona e'abi, "Au hanona ia Hamanai keaao, ia abomo au Naha'u ai keao."

2 Sam 7.14

<sup>6</sup> Haeamona Nahuna apa'uana euhuna hanopakai emai raninai e'abi etibaha, "Tirama ena aneru ikoikiai hanona ia temekuti aina."

Deu 32.43

<sup>7</sup> Aneru robakia eahuna etibaha, "Tirama ehore ena aneru hanona baurai ebaonakia, ena aneru baika ta'ara'ina tia'i haukia hanona iruba upakiai ebaonakia."

Sal 104.4

<sup>8</sup> Ia Nahuna robana eahuna etibaha, "Oi hanona Tirama, emu obia

imia'auna kemiaho banaibanai,  
oi hanona bero ai emu aiara  
nupoki aina.

<sup>9</sup> Aka bero onuatae aina,  
babai ki'a hanona o'oatana.  
Ua buonai Tirama emu Tirama  
ehore aonamo tehoronai  
eheini'o emu obia hoana,  
atamu ebapa'uana  
'abamu wairakiai.”

Sal 45.6, 7

<sup>10</sup> Haeamona etibaha,  
“Obiapaka e,  
popouna 'akinai hanopaka  
hanona oi obabaina,  
kupa abomo oi imamuai obabaina.

<sup>11</sup> Kupa mai hanopaka  
hanona kate'akauma,  
iamo oi hanona komiaho  
banaibanai,  
ia taba ikoikiai kateburuburu  
habuni 'ai'aina 'abana.

<sup>12</sup> Kupa mai hanopaka kounakia  
habuni iro'abu 'abana,  
weiakia ihakia katehaeai  
habuni ni'ai'ai 'abana.  
Ia oi hanona 'ekamuai mo,  
emu mauri ihaukia hanona  
a'i kepua.”

Sal 102.25-27

<sup>13</sup> Rani ha Tirama aneru ha na a'i ehinabe  
aihona a'i etibaha,  
“Itipa'u tainai momiati  
keaomo oi i'oatamu haukia  
'apumu ba'anai kahorotinakia.”

Sal 110.1

<sup>14</sup> Aneru hanona taba? Ia ikoikiai  
hanona auba, Tirama ta'arana tia'i haukia,  
euhunakia bamauri katea'ina haukia  
katebarainakia.

## 2

### *Bamauri Hanona Taba Apa'uana.*

<sup>1</sup> Ua buonai 'abi tohana Nahuna pouna  
aba haona hauna kaha'ima haraina,  
weiana herenai a'i hamakapare ta'una.  
<sup>2</sup> Tirama ena aneru pinakiai 'aba'abami  
ehina benakia 'abikia abomo hiabu  
'abikiai teao, akakia a'i tebabai 'ao a'i  
tea'i taeanakia haukia hanona puma  
eba'oruna hauna tehoaina. <sup>3</sup> Bamauri  
hanona taba apa'uana, weiana ka-  
habaki'ana raninai puma kemai hauna  
herenai aika aea kahapihi aiho?

Bamauri neiana hanona Obiapaka  
kipona aba ehina pou 'uaina, weiana  
teona haukia tehore tebatohana aika  
herekai. <sup>4</sup> Tirama kipona abomo hoa  
apa'uakia, bata'uta'u huri akakia, hiabu  
akakia haeihaeai ebawaira tinanakia,  
mai ia ena nuatae ihobonai Auba Robe  
ebaibeni ia kipokia tebatohanakia.

### *Iesu Ke'uai ainaka Bamauri Aonai.*

<sup>5</sup> Tirama hanona aneru a'i etina'anakia,  
hanopaka mahamahana nimai hauna a'i  
katepoki aina, bariu hanopaka weiana  
pouna nahinana. <sup>6</sup> Puka robena aonai 'eka  
ha na erere aihona etibaha,

“Tirama e,  
maearima hanona taba?  
Ba oi ia nuraona 'inina.  
Maearima nahuna hanona taba?  
Ba oi ia no'ima haraina.

<sup>7</sup> Oi ohore rani papana ia obariri  
'apuana aneru benukiai,  
ia haeamona oi ohore nuabi  
mai mariki hoana 'akonai  
obabainuna.

<sup>8</sup> Oi ohore taba ikoikiai  
ia ena iha 'ini ba'anai  
ohorotinakia.”

Sal 8.4-6

Tirama taba ikoikiai ia ena iha'ini ba'anai  
ehorotinakia hanona ia kehore taba  
ikoikiai keiha 'ininakia. Iamo bariu aika  
nahaihanakia hanona taba ikoikiai ia  
ena iha'ini ba'anai aha'i 'abana. <sup>9</sup> Ia  
aika Iesu nahaihana, ia rani papana eriri  
aneru benukiai, ia 'ari ehau haiara aina  
paunai Tirama ehore nuabi mai mariki  
hoana ebabainuaina. Ia 'ari abiabina  
eonobaina maearima ikoikiai paukiai,  
weiana hanona Tirama ena aoko'o hoana.

<sup>10</sup> Tirama ena aka hanona ebero, ia  
hanona taba ikoikiai ebabainakia mai  
neiha 'ininakia, nahuna bo'okia ena nuabi  
aonai kebaka totonakia paunai enuatae  
Iesu kehau haiara ke'oru harai, weianai  
nahuna bo'okia katemai ena nuabi aonai  
katemiaho. Iesu ikupaiana mo ke'uai  
ainakia bamauri aonai. <sup>11</sup> Maearima ekia  
ki'a neutu obonakia hauna mai ekia ki'a  
eutu obonakia haukia kipokia hamakia  
hanona hamona. Ua buonai Iesu a'i nihau-  
maea ia keaparinakia uaho'abana. <sup>12</sup> Ia  
ehore Tirama ehina bena etibaha,  
“Oi atamu kahina pouna  
uaho'aba'u wairakiai.  
Ekia to'u aokiai oi atamu



kabanamona.”

Sal 22.22

<sup>13</sup> Haeamona e'abi etibaha,  
“Au hanona Tirama na'ikakaumana.”

Isa 8.17

E'abi mue etibaha,  
“Au neia'u mai Tirama ehore  
nahunai ebena'u haukia kipokia.”

Isa 8.18

### *Iesu Maearima ai Eao Kebarainaka.*

<sup>14</sup> Weiakia nahuna na nihoma haukia hanona maearima mai bitiohia abomo mai aruarukia, Iesu kipona ia ihobokiai emai eka hauani maurinai emiaho, weiana ebabaina pokina hanona ena 'ariai Tiaporo 'ari nipoki aina hauna keba'ehona, <sup>15</sup> abomo ekia mauri beraurakia ikoikiai 'ari teta'u aina ta'arana tea'i haukia kerubu obonakia.

<sup>16</sup> Weiana Iesu hanona aneru a'i ni-barainakia, ia Aberahamo 'aba'abana ni-barainakia. <sup>17</sup> Ua buonai ia hanona uaho'abana ihobokiai eao taeara ikoikiai aokiai, ia robe hauna apa'uana keao mai ena aoko'o mai ena aka bero Tirama ena aka nibabaina aonai maearima ekia ki'a kehina haonakia. <sup>18</sup> Ia kipona bai-hobo aonai emiaho abomo ehau haiara buonai ia baihobo aonai haukia ibaraikia e'iohina.

## 3

### *Iesu Hanona Mose Etara Haona.*

<sup>1</sup> Ua buonai uaho'aba'u robemi e, wai kipokia Tirama eapari haeamonaka haumi, Iesu katoraona haraina, ia hanona Tirama ena iuhubeau hauna abomo robe hauna apa'uana eka a'ikakaumai pouna nahahinana hauna. <sup>2</sup> Mose Tirama ena itu aonai eaka harai ihobonai Iesu hanona euhuna Tiramana ena aka ebabai haraina mai aona ikoinai. <sup>3</sup> Itu ebabaina hauna temarikiai apa'uana ba itu kipona, ihobona Iesu hanona nuabi apa'uana kea'ina ba Mose. <sup>4</sup> Itu ikoikiai mai ibabaikia haukia, ba Tirama hanona taba ikoikiai ebabainakia. <sup>5</sup> Mose hanona Tirama ena itu ikoinai aonai ta'ara'i haunai eao eaka harai mai aona ikoinai, ia hanona muriai Tirama taba ke'uahinakia haukia poukia ehinanakia. <sup>6</sup> Iamo Keriso hanona Tirama Nahuna, ia Tirama ena itu nipoki aina mai aona ikoinai. Aika rani ikoinai kaha'ikakauma mai taburaka

kahabuabena mai aonamoka raninai aika hanona Tirama ena maearima.

### *Tirama Ena Maearima Ekia Arai 'Ekana.*

<sup>7</sup> Ua buonai Auba Robe na e'abi aiho,

“Bariu rani neianai  
Tirama aiana katona raninai,  
<sup>8</sup> aomi a'i katoba pahihinakia  
rani weiana hano'akunai  
Tirama tehobona aonai  
tebapairi pairi 'abana.

<sup>9</sup> Weia 'aba'abami ihau bariabui  
aokiai e'u aka teihanakia  
iamo tehobona'u mai  
tebahobona'u.

<sup>10</sup> Ua buonai uru weiana  
aopuere aina a'abi atibaha,  
'Aokia hanona atau'a 'akinai  
buonai e'u taeara a'i te'iohina.’

<sup>11</sup> Weiana aopuere a'abi'uai pahihi  
atibaha,  
'Ia hanona e'u arai 'ekana  
a'i katekatoto.’”

Sal 95.7-11

<sup>12</sup> Uaho'aba'u e, kato'ima harainimi  
ha kipona aona a'i kea'i ki'ana ena  
a'ikakaumai a'i kekaobo mauri Tiramana  
a'i kekamuriaina. <sup>13</sup> 'A Puka robena  
nehinana 'bariu rani neiana' hanona  
aika eka rani, ua buonai rani ikoinai  
'abami kipokia aomi katoba taburanakia,  
ki'a kehore ena bai'oi ai aomi a'i meba  
pahihinakia marikina. <sup>14</sup> Eka a'ikakauma  
ha'iramana hauna kaha'i 'inina keaomo  
puanai hanona aika Keriso kipokia  
nahaka haeamo haukai kahaeao.

<sup>15</sup> Puka robena na e'abi aiho,  
“Bariu rani neianai  
Tirama aiana katona raninai  
aomi a'i katoba pahihinakia  
rani weianai 'aba'abami tebapairi  
pairi 'abana.”

Sal 95.7, 8

<sup>16</sup> Maearima tabakia Tirama aiana  
teona iamo tebapairi pairi? Weiakia  
Mose Aikupito ai ebakarainakia haukia  
ikoikiai. <sup>17</sup> Tirama tai eopuere ainakia  
ihau bariabui aokiai? Maearima weiakia  
ki'a tebabai hano'akunai te'eho te'ari  
ore haukia. <sup>18</sup> Tai herekiai Tirama  
e'abi'uai pahihi benakia ena arai 'ekana  
a'i katekatoto na ehoma? Weiana hanona  
tai ehina benakia? Weiakia Tirama aiana  
a'i teka'aina haukia.\* <sup>19</sup> Ua buonai aika

\* 3:18: (18) 'ao a'i tea'ikakauma haukia.

ha'jobina ekia a'ikakauma aha'i paunai arai 'ekana'i a'i tekatoto.

#### 4

*Aika Kahatabura Arai 'Ekana Kahakatoto.*

<sup>1</sup> Tirama ena 'abi'uai aika 'euka ena arai 'ekana'i kahakatoto hanona 'ekana'i, ua buonai aika kaha'ima harainaka, ha a'i ke'eho arai 'ekana a'i me'ubo aina ta'una. <sup>2</sup> Aika pou namona haona, Isaraela haukia abokiamo 'abi aba teona. Iamo herekiai 'abi teona hauna ena namo aha'i pokina teona haukia a'i tea'ikakauma.

<sup>3</sup> Weiana hanona Tirama e'abi ihobona etibaha,

“Aopuere a'abi'uai pahihi atibaha, 'Ia hanona e'u arai 'ekana'i a'i katekatoto.’”

Sal 95.11

Ia aika a'ikakauma hauka hanona ena arai 'ekana'i kahakatoto. Aka neiana hanona aba ebaorena hanopaka ebaabaina rani-nai. <sup>4</sup> Pokina puka robena aonai wapu iba'abaihau hamomona pouna ehinana etibaha, “Tirama ena aka ikoikiai ebaorenakia ba wapu iba'abaihau hamomonai earai.” <sup>5</sup> Haeamona arai robana eahuna etibaha, “Ia hanona e'u arai 'ekana'i a'i katekatoto.” <sup>6</sup> Weiakia pou namona teo'uaina haukia ekia aiao'o aha'i paunai Tirama ena arai 'ekana a'i tekatoto. Iamo bariu baika hanona ia ena arai 'ekana'i katekatoto. <sup>7</sup> Weiana paunai rani homa'ana eao murinai Tirama ehore wapu ha ea'i taeana atana eaparina “Bariu rani neiana”, haeamona Davida pinanai wapu weiana pouna ehinana etibaha,

“Bariu rani neianai,

Tirama aiana katona raninai aomi a'i katoba pahihinakia.”

Sal 95.7, 8

<sup>8</sup> Iosua arai 'ekana tohana pebenakia raninai Tirama hanona murinai wapu ha a'i pe'uahina. <sup>9</sup> Ua buonai ha'jobina Tirama ena maearima katearai ranina hanona nimai ihobona wapu iba'abaihau hamomona 'abana. <sup>10</sup> Tirama ena arai 'ekana'i aba tekatoto haukia hanona ekia akai tiarai ihobona Tirama ena aka ebaorena ba earai 'abana. <sup>11</sup> Ua buonai aika hanona kahatabura arai 'ekana weianai kahakatoto, weiakia aiao'o aha'i

haukia 'abakiai a'i kahaeao hau ha arai 'ekana a'i me'ubo aina ta'una.

<sup>12</sup> Pokina Tirama ena 'abi hanona nimaui abomo niaka, eara ki'a baha ba kareba weiana mahana abira abira teara hauna 'abana, ia hanona eara kekomo rurunaka keaomo aoka mai aubaka herekia huriaka mai ibakai herekiai, weiana maearima ekia raonaraona mai ekia nuatae kebawaira tinanakia.

<sup>13</sup> Hanopaka tabakia ha Tirama wairanai a'i kebuni 'apua, taba ikoikiai katewaira tina mahanai ba ia herenai aika eka mauri maikoinai pouna kahahinana.

*Iesu Hanona Robe Haukia 'Arakiai Hauna Apa'uana.*

<sup>14</sup> Aika hanona mai eka robe hauna apa'uana ekara'au eao kupa, ia hanona Iesu Tirama Nahuna. Ua buonai aika hanona eka a'ikakauma pouna nahahinana hauna kaha'i 'inina. <sup>15</sup> Eka robe hauna apa'uana Iesu hanona eka 'abe'abe 'ekakiai niaoko'o ainaka, neia hanopakai emiaho raninai tehobona taeara haeai haeaii aika ihoboka, iamo ia herenai hanona ki'a ha aha'i. <sup>16</sup> Ua buonai mai taburaka kahaeao aoko'o Tiramana ena obia imia'auna herenai, weianai aoko'o apa'uana kaha'ina mai aoko'o hoana kahatabu ahina, eka nuatae ranikiai kebarainaka.

#### 5

*Iesu Hanona Eka Bamaui Pokinai Eao.*

<sup>1</sup> Robe haukia apa'uakia ikoikiai hanona maearima baiatakiai Tirama ea'i taeanakia ena aka katebabaina maearima paukiai, beruberu tabakia mai ki'a ia'jobokia tabakia katebaibeni. <sup>2</sup> Robe hauna apa'uana kehore 'iobi aha'i haukia mai beho tibabai haukia keaoko'o ainakia pokina ia kipona abomo taeara bo'onai ni'abe'abe. <sup>3</sup> Ia kipona abomo ni'abe'abe paunai, maearima ekia ki'a paukiai mo aha'i, 'a ia kipona ena ki'a ia'jobokia tabakia abomo kebaibeni.

<sup>4</sup> Hau ha kipona robe hauna apa'uana hoana a'i kea'ina ia Tirama kehore keaparina hauna robe hoana kea'ina, ihobona Arona eaparina 'abana.

<sup>5</sup> Taeara ihobonai Keriso abomo kipona robe hauna apa'uana hoana a'i ea'ina, ia hoa ebena Tiramana ehina bena etibaha, “Oi hanona au Naha'u.

Bariu rani neianai au hanona  
Hamamuai naeao.”

Sal 2.7

<sup>6</sup> Puka robenai 'eka haeai ha e'abi etibaha,  
“Oi hanona robe haumuai  
nomiaho keaomo banaibanai  
Melkisedek robe akana  
ebabaina 'abana.”

Sal 110.4

<sup>7</sup> Iesu hanopakai emiaho aonai ia  
'ariai kebamaurina Tiramana herenai  
ebahuba'ari enoi eapari aota mahana mai  
beina, ba Tirama ia aiana eona pokina  
kipona ebako'iko'ina Tirama emariki aina  
paunai. <sup>8</sup> Ia hanona Tirama Nahuna, iamo  
ena hauhaiarai Tirama aiana ika'aina  
e'iobina. <sup>9</sup> Weianai e'oru harai, ia aiana  
tika'aina haukia ikoikia ekia bamauri  
banaibanai pokina eao. <sup>10</sup> Tirama ehore  
Iesu robe hauna apa'uana ai ebaona  
Melkisedek robe akana ebabaina 'abana.

*A'i Kahamiaho Oho Miori Papakia  
'Abana.*

<sup>11</sup> Melkisedek ena aka robana katahuna  
'abikia hanona ebo'o, iamo ihinahina  
haraikia hanona tepahihi pokina 'uruna  
katona hanona obona a'i katobo. <sup>12</sup> Rani  
homa'ana toa'ikakauma aba etaina, wai  
hanona ba'iobi haumi ai patoao, iamo  
wai bariu hau ha pehore Tirama ena 'abi  
tohana pokina peba'iobi muenimi. Wai  
hanona matoha 'ae teinu oho miorikia  
'abakia, aniani pahihikia ianikiai a'i  
tutabura baha. <sup>13</sup> Hau ha 'ae neinu oho  
hauna hanona miori papana, pokina ia  
bero mai beho a'i e'iobinakia. <sup>14</sup> Aniani  
pahihikia hanona maearima apa'uakia  
'eukia, ia hanona aokia tebero, namo mai  
ki'a hoakia aba te'iobinakia.

## 6

*Kahabakiro Kahabai'ima Tirama 'Eu-  
nai.*

<sup>1</sup> Ua buonai aika hamatabura waira  
hamaeao Keriso ena ba'iobi taburana  
hama'ina, ia a'ikakauma ba'iobikia  
kori'uaikia haukia herekiai a'i kahamiaho.  
Neiakia hanona 'ari akakiai naharaona  
kabe mai Tirama naha'ikakaumana,  
<sup>2</sup> 'uere robe ba'iobina mai ahakiai  
ima tihao'au, abomo 'ariai mikiri mue  
ba'iobina mai miaho banaibanai bakaina,  
a'i kahamue ba'iobi neiakia pokikiai.  
<sup>3</sup> Tirama kenuatae raninai aika hanona

kahaka'a waira kahaeao ba'iobi taburana  
herena.

<sup>4</sup> Maearima baika ekia a'ikakauma  
te'akauma haukia aea katemue aiho?  
Ia 'uainai Tirama aokia ebaeanakia,  
kupa beruberuna teonobaina, Auba Robe  
kipokia teaka haeamo, <sup>5</sup> Tirama ena  
'abi namona te'iobina abomo Tirama  
kepoki aina hiabuna teonobaina, <sup>6</sup> ba  
Keriso herenai ti'eho ti'akauma raninai  
kateraona kabe rani ibaruana katema-  
hamaha hanona a'i ketaina, pokina ia  
aba imakiai Tirama Nahuna matiu ibiri  
ropo 'ubinai tikoko 'au muena maearima  
wairakiai tibahaumaeana.

<sup>7</sup> Ihobona matoha hano weiana ahanai  
rani bo'ona abara etibo, aniani namokia  
nibaramanakia tebiraura haukia 'eukia,  
hano weiana hanona Tirama ena banamo  
kea'ina. <sup>8</sup> Ia hano weiana ahanai 'ini  
boaboa mai awa 'ini'inikia te'omu raninai  
ena namo ha aha'i, Tirama ia aba keururu  
aina irubai kate'ara ore.

<sup>9</sup> E'u raona'au haumi e, ua tahinabe  
pahihi aihonimi, ia ai ta'iobi haraina  
wai hanona uahomana aha'i, banamo  
namona keaoainimi bamauri 'ekana.  
<sup>10</sup> Tirama hanona tai ha a'i nitaina, emi  
aka tobabai mai emi raona'au ia atanai  
aba tobawaira tinana ena robe haukia  
tobarainakia bariu abomo tubarainakia  
haukia a'i kereanakia. <sup>11</sup> Ai tanuatae ki'a  
baha wai ikoimiai aka weianai katotabura  
keaomo puanai taba tobuabena hauna  
katoa'ina. <sup>12</sup> Wai a'i kato'aboro, 'a ekia  
a'ikakauma mai ekia bapahihi paukiai  
Tirama e'abi'uai ai tabakia tea'i maeari-  
makia 'abakiai katoao. Iabataina hanona  
nahomana.

*Kaha'ikakauma Tirama Ena 'Abi'uai  
Paunai.*

<sup>13</sup> Tirama ehore Aberahamo herenai  
e'abi'uai raninai hau ha Tirama a'i  
etara haona paunai ia kipona atanai  
'abi'uai pahihina ebabaina, <sup>14</sup> etibaha,  
“Au oi kabanamo tohani'o, ba 'aba'abamu  
kababo'onakia.” <sup>15</sup> Weiana Aberahamo  
ebai'ima mai bapahihina eaomo Tirama  
e'abi'uai hauna ea'ina.

<sup>16</sup> Maearima ha ia etara haona hauna  
atanai 'abi'uai pahihina kebabaina,  
'abi'uai pahihina weiana kehore ena  
'abi kebatohana ekia baiara keapuana.  
<sup>17</sup> Ihobonai, Tirama enuatae kebatohana  
ena 'abi'uai hanona ketoha weiakia ena  
'abi'uai tabakia katea'i haukia herekiai,

abomo enuatae kate'jobina ia ena raona wairai hauna a'i kebaheaina, weiana buonai ia 'abi'uai pahihina eabaina. <sup>18</sup> Tirama hanona a'i kebai'oi paunai weiakia rua ena 'abi'uai mai ena 'abi'uai pahihina hanona a'i kebaheainakia, weiana aika hapihi hamai Tirama herenai hauka hanona batabura rarina 'akinai kahakori 'ini wairakai nimai tabana kahabuabena. <sup>19</sup> Buabeni neiana ha'ina hauna hanona ihobona to'o 'abana eka mauri ai, etabura ebakori 'ininaka kebakatotonaka kupa marea robenai i'aea huri habuninai kebakabanainaka keaomo erobe ki'a baha 'ekana aonai. <sup>20</sup> Aika paukai Iesu e'uai ekatoto weia robe hauna apa'uanai eao banaibanai, ihobona Melkisedek robe akana eabaina 'abana.

## 7

### *Melkisedek Obia 'Arana Mai Robe Hauna Apa'uana.*

<sup>1</sup> Melkisedek neiana hanona Salema obia 'arana abomo 'ubi toha tohanai Tiramana ena robe hauna. Aberahamo ehuari aiara obiakia eahu 'arinakia emue aonai te baitabu ahi, Melkisedek ehore Aberahamo ebanamona. <sup>2</sup> Aberahamo ehore huari aonai ea'inakia kohukia ikoinai harau haea harau haea aokiai ha ha Melkisedek ebena. Melkisedek atana anina hanona 'aka bero obiana 'arana', haeamona atana Salema obiana anina hanona 'baibua obiana 'arana'. <sup>3</sup> Melkisedek hanona hamana aha'i hinana aha'i, ena itubu aha'i, aita erama aita e'ari a'i ha'jobina, ia orina aha'i, ia hanona ihobona Tirama Nahuna 'abana, robe haunai nemiaho banaibanai.

<sup>4</sup> Melkisedek weiana katoraonana, ia aea eapa'ua aiho! Aika 'aba'abaka Aberahamo huari ai ea'i kohukia namokia harau haea harau haea aokiai ha ha ia ebena. <sup>5</sup> Weiakia Lebi itubuna haukia robe hoana tea'ina paunai, rauhuhu e'abi, Aberahamo 'aba'abana Isaraela haukia ekia kohu ikoikia harau haea harau haea aokiai ha ha uaho'abakia Lebi itubuna katebenakia. <sup>6</sup> Melkisedek hanona Lebi itubuna hauna aha'i, iamo Aberahamo herenai ena kohu ikoikia harau haea harau haea aokiai ha ha ea'ina ba ia ehore Aberahamo weiana Tirama ena 'abi'uai ea'ina hauna ebanamona. <sup>7</sup> Aika ha'jobina hoa apa'uana ea'ina hauna kehore hoa papana ea'ina hauna kebanamona.

<sup>8</sup> Robe haukia hanona maearima ekia kohu harau haea harau haea aokiai ha ha tea'inakia, Melkisedek abomo Aberahamo ena kohu harau haea harau haea aokiai ha ha ea'inakia, ia robe haukia hanona kate'ari, ia Melkisedek hanona nemiaho banaibanai Puka robenai e'abi ihobona. <sup>9</sup> Na hama'abi aiho, Lebi haukia maearima ekia kohu harau haea harau haea aokiai ha ha tea'inakia, ia Aberahamo ena kohu harau haea harau haea aokiai ha ha Melkisedek ebena aonai Lebi ena itubu haukia abokiamo ekia kohu harau haea harau haea aokiai ha ha te baitabu ahi aonai Lebi hanona a'i erama baha ia 'aba'abana Aberahamo huaninai emiaho.

### *Iesu Ihobona Melkisedek.*

<sup>11</sup> Tirama Isaraela haukia rauhuhu ebenakia Lebi itubuna haukia robe akana katebabaina. Ia Lebi itubuna robe akana te baitabu haraina iamo aka weiana hanona maearima a'i teba beronakia Tirama wairanai paunai robe hauna haeai ha kewaira tina keaka matoha Melkisedek 'abana, ia Arona 'abana aha'i. <sup>12</sup> Robe haukia katehaeai hanona rauhuhu abomo kehaeai. <sup>13</sup> Weiana robana hahuna hauna hanona itubu haeai hauna, Lebi itubuna hauna aha'i, itubu weiana aonai hanona hau ha itara robena akana a'i e baitabu 'apuana. <sup>14</sup> Weiana aba ha'iohi haraina eka Obiapaka hanona Iuda itubunai erama, 'a Mose robe haukia ha itubu weianai a'i ea'i taeana.

<sup>15</sup> Taba nahauahina hauna aba ha'iohi haraina pokina robe hauna haeai ha aba ewaira tina, ia Melkisedek 'abana. <sup>16</sup> Ia robe haunai eao hanona maearima ekia rauhuhu 'ao ekia taerai aha'i, ia mauri hiabuna nemiaho banaibanai huanai. <sup>17</sup> Puka robenai na e'abi aiho,

“Oi hanona robe haumuai nomiaho keaomo banaibanai, Melkisedek robe akana eabaina 'abana.”

Sal 110.4

<sup>18</sup> Weiana rauhuhu 'ai'aina aba tea'ibona, pokina ia hanona e'abe'abe abomo ena aka aha'i. <sup>19</sup> Mose ena rauhuhu ai maearima a'i ebaeronakia Tirama wairanai. Ua buonai Tirama ehore buabeni namona ha ebenaka weiana hanona rauhuhu etara haona, weianai nahaeao Tirama herena.



<sup>20</sup> Haeamona Tirama mai ena 'abi'uai pahihinai Iesu robe haunai ebaona. Weiakia Lebi itubuna haukia robe haukiai teao hanona Tirama ena 'abi'uai pahihinai aha'i. <sup>21</sup> Ia Iesu robe haunai eao hanona Tirama ena 'abi'uai pahihinai. Tirama na e'abi aiho,  
 “Obiapaka hanona ena 'abi'uai pahihina ebaona  
 ia ena 'abi a'i kebaheaina,  
 'Oi hanona robe haumuai nomiaho keaomo banaibanai.’ ”

Sal 110.4

<sup>22</sup> Na homana Iesu hanona 'abi'uai apa'uana neiana ibatohana haunai eao, 'abi'uai neiana hanona 'abi'uai apa'uana 'ai'aina etara haona.

<sup>23</sup> Robe haukia hanona tebo'o pokina ia te'ari ekia akai a'i temiaho banaibanai. <sup>24</sup> Ia Iesu hanona kemiaho banaibanai, ena robe akana hanona a'i keao hau ha herena. <sup>25</sup> Ia nemiaho banaibanai abomo aika paukai ia Tirama ninoina paunai, ia atanai Tirama herena kateao haukia kebamauri orenakia.

<sup>26</sup> Iesu neiana hanona robe hauna apa'uana eka nuatae ikoikiai e'iobi. Ia hanona erobe, beho 'ao ki'a ha ia herenai aha'i, ia hanona ki'a haukia baiatakiai aha'i kupa 'ubina tohanai ekara'au. <sup>27</sup> Ia hanona robe haukia weiakia ihobokia aha'i, robe haukia ha ha hanona rani ikoikiai kipona ena ki'a ihina haona akana kebabai 'uaina murinai maearima ekia ki'a ihina haokia akakia kebabai. 'A Iesu hanona ua a'i kehoma, pokina ia kipona ena mauri ebaibeni ki'a ia'i obona tabanai eao, ia rani hamonai aka weiana maikoina ebaorena. <sup>28</sup> Mose ena rauhuhu ehore maearima ea'i taeanakia robe haukiai teao, ia te'abe'abe, 'a Tirama ena 'abi'uai pahihina rauhuhu murinai emai hauna ehore Tirama Nahuna ea'i taeana ia abe'oru harai robe hauna apa'uanai eao ia hanona kemiaho banaibanai.

## 8

*Iesu Hanona Eka Robe Hauna Apa'uana Kupai.*

<sup>1</sup> Au robana ahuna 'abikia pokikia hanona neiana, aika hanona robe hauna apa'uana nahomana hauna nemiaho herekai. Ia kupa 'ubinai hiabu Tiramana

ena imia'au itipana taina imarikiaina 'ekanai aba emiati. <sup>2</sup> Ia 'eka robena tohanai robe hauna apa'uana ena aka nibabaina, paraboa\* tohana weiana hanona Obiapaka Tirama ehore ebakorina ia maearima a'i tebakorina.

<sup>3</sup> Robe haukia apa'uakia ikoikiai tea'i taeanakia beruberu tabakia katebaibeni mai ki'a ia'iobokia tabakia katebaibeni Tirama herenai, ua buonai eka robe hauna apa'uana neiana abomo taba ha kebaibeni. <sup>4</sup> Iesu hanopakai pemiaho raninai robe haunai a'i peao, pokina robe haukia temiaho ia tehore beruberu tabakia tebaibeni Mose ena rauhuhu ihobonai. <sup>5</sup> Robe haukia ekia aka hanona kupa ai tibabaina akana ihobo ihobona mai aubaubana 'abana, aka weiana hanona ihobona Tirama Mose ehinabe pahihina paraboa robena ebakorina 'abana etibaha, “Ko'ima haraina taba ikoikiai kobabai oeo ai abaihani'o tabakia ihaihakia ihobo ihobokia.” <sup>6</sup> Ia bariu Iesu robe akana ea'ina hanona robe haukia ekia aka etara haonakia, pokina ia 'abi'uai apa'uana weianai bairarao haunai eao, 'abi'uai apa'uana neiana hanona ma enamo ba 'abi'uai apa'uana 'ai'aina, pokina weiana hanona 'abi'uai namokia 'akikia ahakiai ebakorina.

*'Abi'uai Apa'uana Mahamahana Hanona 'Ai'aina Etara Haona.*

<sup>7</sup> 'Abi'uai apa'uana kori'uaina maikoinai enamo raninai, ibaruana a'i pahanuatae aina. <sup>8</sup> Ia Tirama ena maearima herekiai beho eihana buonai ehinanakia etibaha, “Au, Obiapaka Tirama, na'abi, Beraura aba nimai 'abi'uai apa'uana mahamahana kababaina Isaraela haukia herekiai abomo Iuda itubuna aonai. <sup>9</sup> Au, Obiapaka Tirama, na'abi, 'Abi'uai apa'uana neiana hanona 'aba'abakia imakiai a'ina Aikupito hanonai abakarahinakia raninai a'abi'uai hauna 'abana aha'i. Ia e'u 'abi'uai apa'uana a'i teka'aina buonai au abomo aiakia a'i aona.”

<sup>10</sup> Au, Obiapaka Tirama, haeamona na'abi, Weiana murinai 'abi'uai apa'uana

\* 8:2: (2) i'aua robena

ha kababaina Isaraela haukia herekiai hanona neiana. Au e'u rauhuhu ia aokiai kahorotina mai ahekiai karerena. Au hanona ekia Tirama ai kaeao, ia hanona au e'u maearima ai kateao.

<sup>11</sup> Hau ha uaho'abana 'ao herenai hauna a'i kehina bena 'Obiapaka ko'jobina'.

Pokina ikoikiai hanona aba kate'jobina'u papana 'akiai eaomo apa'uanai epua.

<sup>12</sup> Ekia beho akakia aokiai kaoko'o ainakia abomo ekia ki'a a'i karaona 'ininakia."

Ier 31.31-34

<sup>13</sup> Tirama 'abi'uai apa'uana mahamahana e'uahina raninai weiana kori'uaina hanona aba 'ai'ainai ebaona, ba taba ni'ai'ai mai nimara hauna hanona aba ke'akauma.

## 9

### *'Abi'uai Apa'uana 'Ai'aina.*

<sup>1</sup> 'Abi'uai apa'uana kori'uaina hanona mai ena kuti rauhuhukia mai kuti 'ekana, 'eka weiana hanona maearima imakiai tebabaina. <sup>2</sup> Paraboa tebakorina ba tekaihurina ikaihuri rua, atapaka tainai ikaihuri atana teaparina Robe 'ekana. Robe 'ekana aonai hanona ramepa horoti 'ekana ha mai itara papana ha, ahanai baibeni parawana tehorotina Tirama 'euna. <sup>3</sup> I'aeahuri habunina ibaruana aona tainai hanona teaparina Erobe ki'a baha 'ekana. <sup>4</sup> Weiana aonai hanona itara robena ha tebabaina gold ai tebahu abuna ahanai nabunabu timina namona tekinena, abomo 'abi'uai apa'uana mauana ha hauna maikoinai gold ai tebahu abuna, maua aonai hanona gold urona ha aonai mana teutana hauna mai Arona ena ikai'ini weiana 'uainai ebubuhi rauna tekarahi hauna mai pihara panabakia rua ahakiai rauhuhu tererenakia haukia. <sup>5</sup> Maua ikaiabuna ubinai hanona teaparina Ki'a ihina haona 'ekana, Tirama ena nuabi aneru 'abakia ibabataikia rua atakia Kerubi, banikiai 'eka weiana tehao abuna. Bariu hanona taba neiakia ikoikiai a'i kahinahina harainakia.

<sup>6</sup> Taba weiakia ua teba'oru aihonakia, weiana robe haukia hanona rani ikoikiai ikaihuri kori'uaina aonai tekatoto ekia aka tebabainakia. <sup>7</sup> Ia ikaihuri ibaruana hanona robe hauna apa'uana ikupaiana mo ihau ha aonai rani hamona ekatoto, imana 'abaeana a'i ekatoto, ia aruaru ea'ina etoto aina ia kipona ena ki'a paunai abomo maearima ekia ki'a a'i te'jobina aonai tebabaina haukia paukiai. <sup>8</sup> Taba weiakiai Auba Robe aba eba'jobi harainaka, robe 'ekana kori'uaina ekoroti nemiaho aonai taeara keao erobe ki'a baha 'ekana hanona a'i nikaikau bahana. <sup>9</sup> Neiakia hanona ibabatai 'abakia bariu rani neiana 'euna. Taeara weianai beruberu tabakia mai ki'a ihina hao tabakia tibaibeni Tirama 'euna, iamo weiakiai kuti haukia aokia tohana a'i katebabero toha tohana. <sup>10</sup> Weiakia hanona aniani tabakia inuinu tabakia mai 'uere hoahoakia, hauani ena rauhuhu 'abaeakia, ia kateaka keaomo Tirama taeara kebama-hamaha muenakia raninai.

### *'Abi'uai Apa'uana Mahamahana.*

<sup>11</sup> Ia bariu Keriso aba emai terama tabakia namokia ekia robe hauna apa'uanai eao, paraboa weiana eapa'ua mai e'oru harai hauna aonai ekatoto, weiana hanona maearima imakiai a'i tebabaina abomo hanopaka 'euna aha'i. <sup>12</sup> Keriso paraboa aonai ekatoto raninai, nani 'ao poromakau nahukia aruarukia a'i ea'i ia kipona ena mauri ebaibeni aruarunai ekatoto, rani hamonai mo erobe ki'a baha 'ekana aonai ekatoto, weianai bamauri banaibanai akana ebaorena aika paukai. <sup>13</sup> Maearima te'opu Tirama wairanai raninai, nani poromakau aruarukia mai poromakau irubai teba'ara obonakia rabukia haukiai tekapo otarainakia, ba haukia temahamaha terobe Tirama wairanai. <sup>14</sup> Weiana hanona 'abi tohana iamo Keriso aruaruna hanona weiakia etara haonakia. Keriso hanona ena ki'a 'ao ena beho ha aha'i, ia miaho banaibanai Auba Robena ena baraibara ai kipona ena mauri baibeni tabanai ebaona Tirama ebena. Keriso aruaruna weiana hanona aoka tohana kebamaha mahana, weiakia anikia aha'i hoakia herekiai kaha kapare kahaeao mauri Tiramana ena aka kahababaina.

*Keriso Aruarunai 'Abi'uai Apa'uana Mahamahana Ebatohana.*

<sup>15</sup> Ua buonai Keriso hanona bairarao haunai eao 'abi'uai apa'uana mahamahana kebataburana. Ia maearima ekia ki'a weiakia 'abi'uai apa'uana 'ai'ainai temiaho aonai tebabainakia haukia kerubunakia paunai e'ari, ba Tirama eaparinakia haukia hanona banamo banaibanai Tirama e'abi'uai aina hauna katea'ina.

<sup>16</sup> Ke'ari hauna ena nuatae 'abi'uaina hanona a'i keaka keaomo ena 'ari katebatohana murinai nuatae 'abi'uaina weiana hanona keaka. <sup>17</sup> 'Ari hauna ena nuatae 'abi'uaina hanona e'abi'uai hauna ke'ari ba 'abi'uai hiabuna keaka, ia a'i e'ari nemiaho oho aonai 'abi'uai weiana hanona hiabuna aha'i. <sup>18</sup> Weiana buonai 'abi'uai apa'uana kori'uaina abomo 'ari aruarunai 'abi'uai hiabuna eaka. <sup>19</sup> Kori'uaina Mose ehore rauhuhu 'abina ena maearima ikoikia eba'io binakia, weiana murinai poromakau nahukia aruarukia nani aruarukia mai bei kipokia ea'i haeamona, mamoe buirana birona mai wapaea rauna kipokia ea'inakia ekaihuna, rauhuhu pukana mai maearima ikoinai ahakiai ekapo otaraina. <sup>20</sup> Ba e'abi etibaha, "Neiana hanona 'abi'uai apa'uana aruaruna, Tirama ehina benimi katoa'i taeana." <sup>21</sup> Taeara ihobonai Mose aruaruai paraboa robena ahanai ekapo otaraina mai robe akana tibabai tabakia ikoikia abomo ahakiai ekapo otarainakia. <sup>22</sup> Mose ena rauhuhu eba'io binakia taba bo'okia hanona aruaru kehore kebamaha mahanakia, ia aruaru a'i kekiki oioi raninai ki'a ihina haona keaha'i.

<sup>23</sup> Paraboa aona tabakia neiakia kupa tabakia ibabataikia hanona taeara uahomanai patebamaha mahanakia, ia kupa tabakia tohakia hanona baibeni namona 'akinai katebamaha mahanakia. <sup>24</sup> Keriso hanona 'eka robena maearima imakiai tebabaina hauna aonai a'i ekatoto, 'eka weiana hanona 'eka robena tohana ibabataina, 'a ia hanona kebarainaka paunai 'eka robena tohana kupa 'ubinai hauna aonai ekatoto eao Tirama wairanai.

<sup>25</sup> Robe haukia apa'uakia hanona ihau ha ha aokia mahi aruarukia tea'i erobe ki'a baha 'ekana tekato. Ia Keriso hanona rani bo'ona ua a'i kehoma. <sup>26</sup> Ua pehoma raninai, hanopaka ea'i ramana raninai emai mo bariu Keriso hanona rani

bo'ona pehau haiara. Ia Keriso rani hamona mo ewaira tina rani neiakia puakiai, kipona baibeni tabanai eao ki'a ia'io bona.

<sup>27</sup> Maearima ha ha hanona rani hamonai kate'ari, murinai Tirama kebabakainakia.

<sup>28</sup> Taeara ihobonai Keriso hanona rani hamona mo baibeni tabanai eao mako ekia ki'a ia'io bokia. Ia haeamona kewaira tina mue hanona te'imana haukia kebamaurinakia paunai, ia ki'a ia'io bokia paunai aha'i.

## 10

*Keriso Hauanina Rani Hamona Ikoinai Paunai Ebaibeni.*

<sup>1</sup> Mose ena rauhuhu hanona taba namona wairai kemai hauna aubaubana, taba tohana aha'i. Rauhuhu taearanai maearima ekia ki'a ia'io bokia tabakia ihau ha ha ihobokia tebaibeni, iamo weiakia hanona Tirama herenai katekuti haukia a'i katebabero harainakia. <sup>2</sup> Baibeni neiana pehore Tirama tekuti aina haukia ekia ki'a rani hamonai pebamaha mahanakia raninai, ia kipokia pate'io bina ekia ki'a aba teore, weiana ki'a ia'io bokia tabakia a'i patebaibeni mue. <sup>3</sup> Ia ki'a ia'io bokia tabakia weiakia tebaibeni hanona ekia ki'a tebaraona muenakia ihau ha ha aokiai. <sup>4</sup> Pokina poromakau mai nani aruarukia hanona ki'a a'i katea'io obo 'apuanakia.

<sup>5</sup> Ua buonai Keriso hanopakai emai aonai ia Tirama ehina bena etibaha, "Rauhuhu ena barobe tabakia abomo baibeni tabakia a'io nuatae ainakia.

'A hauani ha oba'oruna au eu'u.

<sup>6</sup> Oi baibeni tabakia irubai teba'aranakia haukia mai ki'a ia'io bokia tabakia a'io aonamo ainakia.

<sup>7</sup> Ba au a'abi atibaha, "Tirama e, Au neia'u, aba amai, rauhuhu pukanai pou'u tererena ihobonai oi emu nuatae akana kababaina.' "

Sal 40.6-8

<sup>8</sup> Keriso kori'uainai e'abi etibaha, "Barobe tabakia, beruberu tabakia, baibeni tabakia irubai teba'aranakia haukia, mai ki'a ia'io bokia tabakia oi a'io nuatae ainakia, a'io aonamo ainakia." (Weiakia hanona Mose ena rauhuhu ena nuatae paunai tebaibeni.) <sup>9</sup> Murinai e'abi etibaha, "Tirama e, Au neia'u, aba amai, oi emu

nuatae akana kababaina.” Ia hanona barobe taearana kori'uaina ea'i parena ia ibaruana ebakorina. <sup>10</sup> Iesu Keriso ehore Tirama ena nuatae akana ebabaina, ia kipona hauanina rani hamonai ikoinai paunai ebena baibeni tabanai eao, weianai eka ki'a ai aba hamahamaha.

<sup>11</sup> Robe haukia ikoikiai beraura ikoikiai ekia robe akakia tibabai, barobe tabakia hamokiamo tibaibeni hao baibeni hao, ia barobe tabakia weiakia hanona ki'a a'i katea'ioho 'apuanakia. <sup>12</sup> Ia Keriso ehore rani hamonai baibeni tabanai eao ki'a ia'iohokia paunai, baibeni weiana hanona niaka keaomo banaibanai. Ba ia Tirama itipana taina imarikiaina 'ekanai aba emiati. <sup>13</sup> Weia ia nibai'ima keaomo Tirama kehore ti'oatana haukia kemaiainakia Keriso 'apuna ba'anai. <sup>14</sup> Ia baibeni tabana hamonai weiakia ekia ki'ai ebamaha mahanakia haukia ebabero harainakia keaomo banaibanai.

<sup>15</sup> Auba Robe abomo aba kipona pou neiana ehinabe ainaka. Kori'uaina e'abi etibaha,

<sup>16</sup> “Obiapaka hanona ni'abi, Rani weiana murinai Au e'u 'abi'uai apa'uana herekiai kababaina hanona neiana. E'u rauhuhu ia aokiai kahorotina mai ia 'akokiai karerena.”

Ier 31.33

<sup>17</sup> Haeamona e'abi etibaha, “Au ekia ki'a mai ekia beho a'i karaona 'ini 'apuanakia.”

Ier 31.34

<sup>18</sup> Ia ki'a mai beho weiakia aba ehina haonakia paunai ki'a ia'i obokia tabakia katebaibeni hanona ena poki aba aha'i.

### *Aika Kaha'ikakauma Tohana Tirama Herenai Kahaeao.*

<sup>19</sup> Uaho'aba'u e, ua buonai aika Iesu e'ari aruarunai tabura kaha'ina erobe ki'a baha 'ekana aonai kahakatoto. <sup>20</sup> Iesu hauanina e'ari hanona i'aeahuri habunina\* etapana ba taeara mahamahana mai mauri ekaikauna aika paukai. <sup>21</sup> Aika hanona mai eka robe hauna apa'uana Tirama ena maearima neiha 'ininakia. <sup>22</sup> Aokai ia aruaruna ekapo otaraina paunai aoka tohanai ki'a weiana aba ea'i obona, hauanika abomo bei iroronai aba eutu harainakia, ua buonai bariu aika kahaka'a haha Tirama herena kahaeao mai

aoka tohanai abomo mai a'ikakaumaka a'i kahabaoao baoao. <sup>23</sup> E'abi'uai Tiramana hanona ena 'abi'uai kebatohana paunai, aika eka buabeni ha'uahina hauna kaha'i 'inina. <sup>24</sup> 'Abaka kipokia kaharaona raona haeamo, ha ha kahaba taburanaka, eka raona'au kahaba ihanakia, mai namo akakia kahababai. <sup>25</sup> Baika marea to'una akakia tibaoaoai haukia ekia hoahoai a'i kahaeao, iamo 'abaka kahaba taburanakia to'u akana kahabapa'uana Obiapaka ena rani kemai hereka hauna nahaihana aonai.

### *Tirama Nahuna A'i Kahakamuri aina.*

<sup>26</sup> Tomobahu. Aika Keriso pouna aba ha'iohi tohana murinai eka nuatae ai ki'a kahababai to'ona raninai, ki'a weiakia ia'i obokia baibeni tabakia haeai ha a'i nemi-aho. <sup>27</sup> 'A taba muriai kerama kahata'u aina hauna hanona bakai apa'uana mai iruba ki'a obona Tirama ti'oatana haukia keba pururunakia. <sup>28</sup> Ha'iohina hau ha Mose ena rauhuhu ekabena a'i ea'i taeara raninai ihina pouna haukia rua 'ao aihau tebatohana ba hau weiana beho haunai eao teahu 'arina a'i teaoko'o aina. <sup>29</sup> Hau ha nihore Tirama Nahuna a'i nimariki aina, ia nihore 'abi'uai apa'uana aruaruna ia ebarobena hauna taba 'abaeana ni-baona, mai Tirama ena aoko'o hoana nimaianaka Auba Robena herenai ni'abi ki'aina hauna, hau weiana kaharaonana ena puma kehoaina hanona aea keapa'ua aihoh! <sup>30</sup> Aika ha'iohina Tirama hanona na e'abi aihoh etibaha, “Ara hore hanona e'u aka, au kahore arana kabamuena.” Haeamona etibaha, “Obiapaka kehore ena maearima kebabakainakia.” <sup>31</sup> Weiana kaha'eho mauri Tiramana imana aonai kahaenouta hanona taba ki'a obona tohana!

<sup>32</sup> Rani 'uaina aea tohoma hauna katoraona muena. Tirama ena ea totabu ahina murinai haiara bo'ona toa'i ia wai hanona tobatabura. <sup>33</sup> Rani baika maearima wairakiai tebapo'onimi mai te'oatanimi, abomo rani baika haiara uahomakia tea'i haukia tobarainakia. <sup>34</sup> Wapura itunai tekaiabunakia haukia tobarainakia, abomo baika tehore emi kepu tea'i 'akaumanakia raninai tobapahihi mai aonamomi, pokina to'iohina emi kepu namokia 'akikia hanona katemiaho banaibanai.

\* **10:20:** (20) marea robe aonai



<sup>35</sup> Ua buonai emi raona taburana a'i katohabona. Pokina weianai 'arana apa'uana katoa'ina. <sup>36</sup> Wai hanona katobapahihi pokina Tirama ena nuatae akana katobabaina murinai taba e'abi'uai aina hauna katoa'ina. <sup>37</sup> Puka robenai Keriso robana eahuna etibaha, "Rani papana mo ia a'i kehoma'a, ia hanona kemai, ia a'i kemahari. <sup>38</sup> E'u aka bero hauna hanona mai a'ikakaumana kemaui. Ia kekamuri aina'u raninai au ia a'i kaonamo aina."

Hab 2.3, 4

<sup>39</sup> Aika hanona weiakia tikamuri mai ti'akauma haukia 'abakia aha'i, aika hanona mai a'ikakaumaka bamauri kaha'ina.

## 11

### *A'ikakauma Hanona Taba?*

<sup>1</sup> Eka a'ikakauma nihore nahabuabeni tabakia nimaianakia taba tohakiai tiao, a'i nahaiha tabakia taba tohakiai nibaonakia. <sup>2</sup> 'Uaina maearimakia abomo a'ikakauma neiana paunai Tirama ehore ebatohanakia. <sup>3</sup> A'ikakaumai aika ha'iohina kupa mai hanopaka tabakia ikoikiai hanona Tirama ena 'abiai terama, weiana ha'iohina nahaihakia tabakia hanona taba a'i nahaihakia haukia herekiai temai terama.

### *Abela, Enoka, Mai Noa Ekia A'ikakauma.*

<sup>4</sup> A'ikakaumai Abela hanona baibeni tabana namona Tirama ebena Kaino ena baibeni tabana etara haona, weiana ena a'ikakauma paunai Tirama ehore Abela ena baibeni tabana ea'i taeana abomo aka bero haunai ebaona. Ia e'ari, 'a ena a'ikakaumai ia hanona bariu ni'abi ohomo.

<sup>5</sup> A'ikakaumai Enoka hanopakai ea'i taeana 'ari a'i e'iohina Tirama herena eao, ua buonai hau ha ia a'i tetabu ahina. Tirama ehore ea'i obona. Puka robenai ebatohana e'abi ia a'i ea'i taea bahana aonai ia hanona Tirama aona ebanamona. <sup>6</sup> Ia ena a'ikakauma aha'i hauna hanona Tirama aona ibanamona a'i e'iohina. Tirama herena kateao haukia hanona katea'ikakauma tohana Tirama hanona nimaui abomo titabuna haukia arakia namokia kebenakia.

<sup>7</sup> A'ikakaumai Noa hanona Tirama taba wairai kerama hauna eba'ikakaumana aonai ia a'i eiha tabakia Tirama aiana ea'i taeana mai marikina aunohi ha ebabaina

ba ena itu haukia ibamaurikiai keao tou aonai. A'ikakauma weianai ia bero hanonai eao Tirama wairanai ba hanopaka haukia puma rarina tehoaina.

### *Aberahamo Mai Sara Ekia A'ikakauma.*

<sup>8</sup> Aberahamo hanona Tirama ea'ikakaumana. Ia eaparina raninai aiana ea'i taeana ekaobo ena hano ehabona. Tirama e'abi'uai hano ha kebena, ia aeana keao hanona a'i e'iohina aonai ena hano tohana ehabona. <sup>9</sup> A'ikakaumai Aberahamo eao 'abi'uai hanona, weia aiara haeai haunai eao, ia Isako mai Iakobo kipokia paraboa aokiai temiaho, ia terarua abomo 'abi'uai hamona tea'ina Tirama herenai. <sup>10</sup> Pokina Aberahamo hanona ebai'ima Tirama kehore aiara weiana kebakorina keba'ini haraina miabanai aiaranai keao.

<sup>11</sup> Aberahamo atawana Sara ohi aba tekiro ki'a baha miori a'i patebaramana, ia a'ikakaumai hanona Aberahamo hama ai eao pokina ia Tirama ea'ikakaumana ena 'abi'uai kebatohana. <sup>12</sup> Aberahamo hanona eanepaka ki'a ihobona aba e'ari 'abana, hau anepakana hamona neianai itubu rarina 'akina ebaramana ihobona kupa bihiukia 'abana 'ao poe 'anona 'abana kahatuabina hanona a'i kahatuabi orena.

<sup>13</sup> Maearima neiakia ikoikiai ekia a'ikakaumai temiaho iamo Tirama ena 'abi'uai tabakia a'i tea'i bahanakia aonai te'ari, ia wairai katerama tabakia te'iohinakia haukia teanonamo ainakia, ba murinai ia kipokia tehina pounakia ia hanona baki mai aiara haeai haukia hanopaka neiana ahanai. <sup>14</sup> Maearima ua ti'abi aiho hanona aika ha'iohina ia hanona ekia hano tohana titabuna. <sup>15</sup> Ia hano weiana 'uaina tehabona hauna pateraonana raninai patemue abomo petaina. Ia ua a'i tehoma. <sup>16</sup> Aiara ia te'imana hauna hanona aiara namona 'akina kupa aiarana. Weiana Tirama hanona a'i nihaumaea kateaparina ekia Tirama, pokina ia aiara ha aba eba'oruna ia 'eukia.

<sup>17</sup> Tirama Aberahamo ehobona aonai Aberahamo a'ikakaumai nahuna Isako barobe tabanai ebaona. Tirama Aberahamo herenai e'abi'uai 'aba'abana katebo'o, iamo Aberahamo nahuna hamo hamona barobe tabanai ebaona ebena. <sup>18</sup> Tirama Aberahamo ehina bena etibaha, "Isako haunai oi itubumu a'abi'uai ainakia haukia katerama." <sup>19</sup> Aberahamo

ea'ikakauma Tirama hanona mai hiabuna maearima 'ari ai kebamikiri muena. Weiana hamatibaha Aberahamo hanona nahuna Isako 'ariai ea'i muena 'abana.

*Isako, Iakobo, Mai Iosepa Ekia A'ikakauma.*

<sup>20</sup> A'ikakaumai Isako ehore Iakobo mai Esau 'abi'uai banamona ebenakia wairai katerama tabakia abomo ehina pounakia.

<sup>21</sup> A'ikakaumai Iakobo ena 'ari aba eherekai 'aki aonai ia Iosepa nahuna ha ha ebanamonakia abomo ena ikai'ini ai ehara 'au Tirama ekuti aina.

<sup>22</sup> A'ikakaumai Iosepa ena mauri aba kepua aonai Isaraela itubuna Aikupitoai katekarahi hauna pouna ehinana abomo ehina benakia huriana Kanana hanonai katehorena.

*Mose Ena A'ikakauma.*

<sup>23</sup> A'ikakaumai Mose hamana hinana ia erama murinai tehore bunina nawa aihau pokina teihana ia hanona miori namona, ba Aikupito Obia 'arana a'i teta'u aina ena rauhuhu a'i tea'i taeana.

<sup>24</sup> A'ikakaumai Mose eapa'ua aonai a'i enuatae ia hanona Aikupito obia 'arana nahuna babi'ena nahunai a'i keao. <sup>25</sup> Ia hanona enuatae Tirama ena maearima kipokia katehau haiara haeamo, ia a'i enuatae rani papana ki'a akakia a'i keaonamo ainakia. <sup>26</sup> Mose eraonana keha haiara Tirama etina'ana hauna paunai hanona enamo ki'a baha ba Aikupito kepukia bo'ona a'i kea'inakia, pokina 'ara namona wairai hauna eraonana.

<sup>27</sup> A'ikakaumai Mose hanona Aikupito ehabona obia 'arana ena opuere a'i eta'u aina. Ia ebapahihi to'ona a'i nahaihana Tiramana aba eihana 'abana.

<sup>28</sup> A'ikakaumai Mose ehore Kabanai tatuna eba'oruna, ehina benakia aruaru ai pa'abi akokia tetaronakia, ahuahu aneruna Isaraela nahukia hobohobo miorikia pakakia a'i meahu 'arinakia marikina.

*Isaraela Haukia Bo'ona Tirama Tea'ikakaumana.*

<sup>29</sup> A'ikakaumai Isaraela haukia hanona 'Aku birona tekabanai hano 'ororonai tekabanai 'abana, ia Aikupito haukia tebahobona katekabanai aonai ikoikiai 'akuai tetono 'ari.

<sup>30</sup> A'ikakaumai Isaraela haukia Ieriko aiara parabuna apa'uana tekakaiarona wapu 'abaihau hamomo hanona epobu.

<sup>31</sup> A'ikakaumai Rahaba maha porepore babi'ena hanona Isaraela ekia ihaihapai haukia rua ebarai harainakia. Ia Tirama a'i tea'i taeana haukia\* te'ari aonai Rahaba hanona emauri.

<sup>32</sup> Ba bita karobahu ainakia? Gideon, Barak, Samson, Idfeta, Davida, Samuela mai mahabanai haukia poukia kakikipanakia ranina hanona aba aha'i. <sup>33</sup> Ia ekia a'ikakaumai tehuari hanopaka bo'ona tea'i ki'anakia, bero akakia tebabai, Tirama ena 'abi'uai tabakia tea'i, ia tehore laiona pinakia tekaiabunakia, <sup>34</sup> iruba apa'uakia teba'aonakia, kareba mahanai terobo mauri. Te'abe'abe ia haeamona tetabura mue, huari ai tetabura ki'a atau'a haukia to'una teu'unakia. <sup>35</sup> Babi'e baika hanona hatia'akia te'ari haukia temikiri mue tetabu ahinakia, baika teba wapuranakia irubukia a'i tenuatae pokina kateahu 'arinakia aonai mikiri mue namona 'akinai katemauri paunai.

<sup>36</sup> Baika hanona tebatate ainakia te'atinakia, tebirinakia wapura itunai tekaiabunakia. <sup>37</sup> Pihara ai teahu 'arinakia, teiri boanakia rua, kareba ai tehara 'arinakia. Mamoe mai nani paruakia tehainakia tekaoao, teuraru, te'oatanakia, mai tea'i ki'anakia. <sup>38</sup> Hanopaka hanona ena namo ha aha'i ia herekiai. Ia hanona hano aha'i haukia 'abanai tekaoao, hano'akunai, oeo ai, pihara 'ererekiai mai 'uriai temiaho.

<sup>39</sup> Neiakia ikoikiai hanona mai ekia a'ikakauma Tirama ehore ebatohanakia, iamo Tirama e'abi'uai anikia hanona a'i tea'i. <sup>40</sup> Pokina Tirama hanona ena raona namona 'akina eba'oruna aika 'euka. Ena nuatae hanona 'uainai tea'ikakauma maearimakia mai aika kipokia maearima aba te'oru haukai kahaeao haeamo.

## 12

*Iesu Kahaihana Mai Kaha'ikakauma.*

<sup>1</sup> Weiakia a'ikakauma maurinai temiaho haukia bo'okia hanona baiaruru haukia 'abakiai tekori kakaiaronaka paunai, aika taba weiakia tibapumanaka mai ki'a weiakia tia'i 'ininaka haukia ikoikiai hama'i obonakia, ba mauri

\* 11:31: (31) 'ao a'i tea'ikakauma haukia.

beauna wairakai nimai haunai hamabeau mai bapahihika. <sup>2</sup> Aika mahaka hanona Iesu mo kahaihana, ia ehore aika eka a'ikakauma ebaramana popounai keaomo puanai, ia hanona wairai nemiaho aonamona paunai ebapahihi a'i ehaumaea matiu ibiri ropo haiarana ehoina ubinai e'ari, ba ia bariu hanona weia Tirama ena imia'au itipana taina imarikiaina 'ekanai aba emiati.

*Tirama Puma Kebenaka Hanona Kahabero.*

<sup>3</sup> Wai ia katoraona haraina, ia aka ki'a haukia te'oatana aonai ebapahihi benakia, ba wai kipomi aomi a'i tomone'e 'abaeana a'i tomohau hororo ta'una. <sup>4</sup> Wai hanona ki'a kipokia tohuari, iamo a'i to'au tabura a'i teahu 'arinimi. <sup>5</sup> Tirama ehore nahunai ebaonimi aomi ebataburanakia 'abina aba toreana, 'u? Etibaha,

“Naha'u e, Obiapaka nirobenimi hanona aiana katobahuaina, haeamona nerikenimi hanona aomi a'i katone'e 'abaeana.

<sup>6</sup> Pokina Obiapaka

niraona'au ainakia haukia nirobenakia, abomo nahunai nibaonakia haukia ni'atinakia.”

Her 3.11, 12

<sup>7</sup> Emi hauhaiara katobapahihi aina, weiana hanona hamami ena bairobe. Pokina Tirama nihore nahunai nibaonimi. Hama tabana nahuna a'i nirobena?

<sup>8</sup> Maearima ikoikiai nahukia tirobenakia. Wai a'i kerobenimi raninai wai hanona tubu miorimi nahuna tohami aha'i.

<sup>9</sup> Aika ikoikai mai hamaka hanopaka neiana ahanai tirobenaka ba aiakia naha'i taeanakia. Aika hanona mai Hamaka kupai hauna aiana kahaka'ai harai hanona kahamauri. <sup>10</sup> Aika hamaka hanopakai neia haukia ekia bero ai rani papana tirobenaka, ia Tirama nirobenaka hanona aika eka namo paunai, ba ia kipokia ena robe maurina aonai kahamiaho haeamo.

<sup>11</sup> Hama nahu tirobenakia raninai mai haiarakia ia aonamona aha'i, ia muriai weiakia tehaiara tepuma hoai haukia hanona baibua buabuana namona katea'ina aka bero haukiai kateao.

<sup>12</sup> Weiana buonai imami timahe haumi tomoa'i taea mai aemi ti'abe'abe haumi tomobapahihi tomomikiri. <sup>13</sup> Taeara berokiai katoka'a, weiana aekia teki'a haukia taeara weianai aekia katenamo.

<sup>14</sup> Wai tomobahobo maearima kipokia mai baibuami katomiaho mai robemi katomiaho, pokina a'i kerobe hauna hanona Obiapaka a'i keihana. <sup>15</sup> Ha ha kato'ima harainimi, hau ha Tirama ena aoko'o hoanai a'i mekapu marikina, 'ao baiatamiai hau ha ramu mabina 'abana a'i me'omu 'au mako a'i mebaro'arinimi mai a'i meba'opunimi marikina. <sup>16</sup> Kato'ima harainimi, baiatamiai hau ha a'i kenabau, 'ao auba akana a'i timariki aina haukiai a'i temeao marikina ihobona Esau 'abana, ia hanona aniani 'ororo hamona paunai ena rama'uai hoana banamona maikoinai eba'akaumana. <sup>17</sup> Aba to'iohina, muriai Esau hanona hamana herenai ena rama'uai hoana banamona ia'ina enuatae enoi mai haihaina, iamo hamana ekamuri aina, ia Esau hanona ena rama'uai hoana banamona kea'i muena taearana ha a'i etabu ahina.

*Aika Aba Hakara'au Kupa Ierusalem-ana.*

<sup>18</sup> Wai tomiai 'ekana hanona 'uainai Isaraela haukia teao Sinai oeona 'abana aha'i. Sinai oeona hanona imakai kaha'i 'apuana ketaina, iruba ni'ara, 'auhao 'umuna mai wapura ekaiabuna, abomo kou eabu, <sup>19</sup> pihi 'uruna mai aia rarina teona. Ba maearima weiakia aia teona haukia Mose tenoina Tirama ia herekiai 'abi ha a'i kehina muena. <sup>20</sup> Pokina maearima weiakia Tirama e'abi benakia hauna teta'uai ki'a bahana, ia e'abi etibaha, “Maearima ha keao oeo neiana imanai kea'i 'apuana hanona piharai kateahu 'arina, mahi ha re'a uamo katehomana.” <sup>21</sup> Mahakia eao hoa rarikia teihanakia teta'u ki'a, Mose abomo e'ururu 'ururu e'abi etibaha, “Nata'u ki'a baha.”

<sup>22</sup> Ia wai tomiai 'eka neiana hanona Siona oeona, mauri Tiramana ena aiara, kupa Ierusalem-ana. 'Eka weiana aonai aneru to'una rarina 'akina mai aonamokia temiaho. <sup>23</sup> Wai tomiai nahu pakakia 'abanai katoao atami kupai terere haukia ekia aonamo to'u apa'uana herena, maearima ikoikiai ibabakaikia hauna Tiramana herena, mai aka bero haukia weiakia aubakia aba tebero harai haukia herekia. <sup>24</sup> Wai tomiai Iesu 'abi'uai apa'uana mahamahana ebairarao aina hauna herena, mai ia aruaruna ki'a ia'i obokia hauna herena, aruaru ikapo otarai

hauna weiana hanona Abela aruaruna 'ara hore enuatae aina hauna etara haona.

### *Kaha'ima 'ima Harainaka.*

<sup>25</sup> Kato'ima harainimi, nehina benimi hauna aiana a'i kato baoaoaina. Weiakia hanopakai Tirama ena 'abi ebena hauna Mose tebaoaoaina haukia hanona puma tehoaina. Aika kupai nirobenaka hauna kahabaki'ana raninai puma kemai hauna herenai aea kahakapare aiho? <sup>26</sup> Rani weianai ia aiana ehore hanopaka ebaibiuna, ba bariu hanona e'abi'uai etibaha, “Au hanopaka haeamona kabaibiuna, hanopaka mo aha'i, ia kupa abomo.” <sup>27</sup> 'Abi neiana “haeamona” anina hanona weiakia terama tabakia katebiu haukia ikoikiai kea'i parenakia, ia taba baika a'i katebiu haukia hanona 'ekakiai katemiaho.

<sup>28</sup> Tirama niobia aina aiarana a'i neibiuna hauna ebenaka kipokia kahaobia aina paunai banamo apa'uana Tirama kahabena, kahakuti aina mai marikika abomo mai ta'uka ia kahabanamona. <sup>29</sup> Pokina aika eka Tirama hanona iruba apa'uana tohana 'abana taba ikoikiai niba'aranakia.

## 13

### *'Abaka Ha Ha Kaharaona'auai To'onaka.*

<sup>1</sup> Wai ha ha kipomi katoraona'auai to'o baihanimi uaho'aba hamona 'abana Keriso aonai. <sup>2</sup> A'i katoreana, baki haukia hanona katoa'i taeanakia emi ituai, pokina baika tehore ekia ituai baki haukia tea'i taeanakia aonai aneru tea'i taeanakia, ia kipokia hanona a'i te'iohina.

<sup>3</sup> Wapura itukiai tekaibunakia haukia katoraonanakia, ihobona wai abomimo ia kipokia patekaibunimi 'abana. Maearima tihore tiba haiaranakia haukia abomo kato raonanakia, ihobona wai abomimo tuhaiara 'abana.

<sup>4</sup> Maearima ikoikiai hawainibe katemariki aina hanona kenamo. Hau mai babi'e atawami kipokia emi hawainibe hoana kato'ima haraina hanona kenamo, pokina Tirama kehore maha porepore maearimakia abomo hawainibe aonai tinabau ki'a maearimakia hanona kebabakainakia.

<sup>5</sup> Moni a'i katonuatae ai ki'a bahana ia taba heremiai temiaho haukia mo katoa'i aomi kenamo, pokina Tirama e'abi etibaha,

“Au hanona a'i kahabonimi abomo a'i kareanimi, aha'i 'akina.”

Deu 31.6

<sup>6</sup> Ua buonai mai taburaka kaha'abi kahatibaha,

“Obiapaka hanona au ibarai'u hauna, au a'i kata'u.

Maearima taba katebabaina au here'uai?”

Sal 118.6

<sup>7</sup> 'Uainai te'uai ainimi Tirama ena 'abi teba'iohi ainimi haukia kato raonanakia. Ekia mauri katoraonana aea temiaho aiho eao mo te'ari, ba ekia a'ikakauma hoana katobahobo hoboaina.

<sup>8</sup> Iesu Keriso hanona warani, bariu abomo mara a'i kehaeai keaomo banaibanai. <sup>9</sup> Ba'iohi 'abikia haeai haeai a'i katehore taeara namonai a'i katebaka'a parenimi. Namona hanona Tirama ena aoko'o hoana kehore aomi keba taburanakia, aniani rauhukia a'i katoba apa'uanakia. Pokina weiakia aniani rauhukia tea'i taeanakia haukia hanona namo ha a'i tetabu ahina.

<sup>10</sup> Aika hanona mai eka itara robena, weiana hanona matiu ibiri ropo 'ubinai Iesu e'ari hauna, robe haukia weiakia paraboa aonai ekia robe akakia tibabai haukia katemai eka itara robena weianai kateaniani hanona ekia bero aha'i.

<sup>11</sup> Pokina mahi aruarukia hanona robe hauna apa'uana eaoainakia erobe ki'a baha 'ekana aonai etotoainakia ki'a ia'iohokia paunai, 'a hauanikia hanona eaoainakia aiara parabuna murinai ehuhunakia. <sup>12</sup> Ihobonai Iesu abomo kipona aruarunai maearima ekia ki'ai kebamaha mahanakia paunai aiara parabuna murinai ehau haiara e'ari. <sup>13</sup> Ua buonai aika abomo ia herena kahaeao, aiara parabuna murinai ia ehaumaeaina hauna kipokia kaha haumaea haemo.

<sup>14</sup> Hanopaka neiana aonai aika eka miaho banaibanai aiarana ha aha'i, aika hanona aiara weiana wairai nimai hauna naha'imana. <sup>15</sup> Ua buonai aika rani ikoinai Iesu atanai Tirama banamo kahabena, aika kahahore pinakai ia atana kahapaina, weiana hanona aika eka baibeni tabana Tirama 'euna. <sup>16</sup> Aka namokia abomo 'abami ibaraikia akakia



a'i kato reanakia, pokina aka uahomakia hanona baibeni tabakia Tirama niaonamo ainakia.

<sup>17</sup> Te'uai ainimi haukia aiakia katoka'aina mai tenuataeai akakia katobabainakia. Pokina ia tihore wai te'imanimi Tirama wairanai mai ta'ukia, a'i tioro. Aiakia katoka'aina hanona mai aonamokia ekia aka katebabaina, ia mo aiakia a'i katoka'aina raninai mai raona raonanakia kateaka, ba weiana 'eumiai hanona baraiбарaina aha'i.

<sup>18</sup> Rani ikoinai katobahuba'ari ai ahamai ai. Ai taraona haraina aomai tohakia hanona tebero pokina taba ikoikia aokiai tanuatae aka berokia katababai.

<sup>19</sup> Au nanoinimi kato bahuba'ari tabura Tirama keuhuna'u kawahi biai heremi.

*Banamo 'Abina Orena.*

<sup>20</sup> Baibua Tiramana ehore Obiapaka Iesu 'ari haukia baiatakiai ebamikirina, ia hanona miaho banaibanai 'abi'uaina apa'uana aruaruna ekiki oioi ba mamoe 'ima hauna apa'uanai eao. <sup>21</sup> Au nabahuba'ari, Tirama neiana kehore taba namokia ikoikiai kebenimi pokina ena nuatae akana katobabaina paunai, Iesu Keriso atanai ia niaonamo aina akana aokai kebabaina. Keriso herenai nuabi kemiaho banaibanai. Amen.

<sup>22</sup> Uaho'aba'u e, marere neiana arere benimi 'abikia hanona a'i tehoma'a, ia e'u batabura 'abikia neiakia katoa'i taea tohanakia. <sup>23</sup> Naba'iobinimi uaho'abaka Timoteo wapura itunai aba tebakarahina, ia pemaia biai raninai tararua patawahi pataihanimi.

<sup>24</sup> Te'uai ainimi haukia ikoikiai mai Tirama ena maearima ikoikiai herekiai e'u banamo 'abina katohina benakia. Weia Italia ai temiaho haukia ekia banamo 'abina tetiu ahina heremi.

<sup>25</sup> Tirama ena aoko'o hoana hanona ikoimiaia heremiaia kemiaho. Amen.

## Marere IAKOBO Ererena Hauna

### *Puka Aona Irerena 'Abina*

Puka neiana aonai 'abi namokia temiaho. Iakobo puka neiana ererena Tirama ena maearima keba'io binakia taeara namokia neiakiai kateka'a. 'Abi ibabataikia bo'ona ererenakia maearima kebarainakia raonaraona mai aotipa katea'inakia mai ena 'abi kate'iobi harainakia. Iakobo hanona e'abi harai, maearima ha nia'ikakauma hauna hanona a'i kea'ikakauma 'abaea, ia hanona babai namokia maearima herekiai kebabai, pokina babai weiakia ia nibatohana ena a'ikakauma hanona etabura mai enamo.

### *Puka Paipana Apa'uakia*

- a. Roba iahu. (1.1)
- b. A'ikakauma mai aobero. (1.2-8)
- c. Uraru hauna mai kepu hauna. (1.9-11)
- d. Baihobo aonai. (1.12-18)
- e. Aia o'o mai aka babai. (1.19-27)
- f. A'itaeana hoana. (2.1-13)
- g. A'ikakauma mai aka. (2.14-26)
- h. A'ikakauma hauna mai maeana. (3.1-18)
- i. A'ikakauma hauna mai hanopaka. (4.1-5.6)
- j. 'Abi orekia. (5.7-20)

### *Banamo 'Abina.*

<sup>1</sup> Au Iakobo, Tirama mai Obiapaka Iesu Keriso ekia ta'ara ia'ina hau'u, marere neiana narerena niwahi Tirama ena maearima ikoimiai torama otaraina hanopaka haeai haeai tomiaho haumi heremi, e'u banamo 'abina nabenimi.

### *A'ikakauma Mai Aobero.*

<sup>2</sup> Uaho'aba'u e, atetua haeai haeai katekara'au heremi hanona aonamo tabanai katobaonakia. <sup>3</sup> Pokina to'io bina, atetua katehore emi a'ikakauma katehobona, weiana hanona wai emi bapahihi keba apa'uana. <sup>4</sup> Emi bapahihi ena tabura ikoinai kebawaira tina haraina, weianai katobero 'aunimi, katonamo harai toha mai taba ha herenai a'i katokapu.

<sup>5</sup> Wai ha aobero okapu raninai Tirama konoina, ia hanona a'i nibaibata

maearima ikoikiai niberuberu benakia, ia kehore aobero kebeni'o. <sup>6</sup> Ia Tirama konoina raninai koa'ikakauma aomu a'i kekai'au kai'au. Hau ha aona kekai'au kai'au hanona matoha roio roio 'abana, baura nihore niabuna niaoina nima-iaina. <sup>7</sup> Hau uahomana hanona a'i keraonana ia taba ha Obiapaka herenai kea'ina. <sup>8</sup> Pokina aona nibaruana hauna ena aka ikoikiai aokiai hanona taeara hamonai a'i kekori 'ini.

### *Uraru Hauna Mai Obia Hauna.*

<sup>9</sup> Tirama kehore uaho'abaka uraruna ha kea'i taeara 'ubiai raninai keaonamo wairai. <sup>10</sup> A Tirama kehore uaho'abaka niobia hauna kebaririna raninai ia abomo keaonamo, pokina obia weiana hanona ke'akauma matoha tubu taitaina ni'ororo ni'eho 'abana. <sup>11</sup> Beraura nitae, nirara kokopuna nihore tubu niba'ororona taitaina ni'eho ena nuabi abomo niore. Ihobonai obia hauna ena kepu nitabuna aonai ua ke'ari aiho.

### *Baihobo 'Abikia.*

<sup>12</sup> Atetua aokiai nibapahihi hauna hanona keaonamo, pokina atetua aonai etabura ekabanai buonai mauri banaanai weiana Tirama e'abi'uai aina ia tiraona'au aina haukia herekiai hauna kea'ina. <sup>13</sup> Baihobo aokiai hau ha a'i ke'abi, "Tirama nihobona'u." Pokina ki'a Tirama kehobona hanona a'i ketaina, abomo Tirama hanona hau ha a'i nihobona. <sup>14</sup> Baihobo hanona hau ha kipona ena nuatae ki'a obona nihore aona niana ba ni'oina paunai nirama. <sup>15</sup> Nuatae ki'a obona nihore ki'a nibaramana, ki'a ni'omu 'au niapa'ua ba buabuana nirama hanona 'ari.

<sup>16</sup> Uaho'aba'u ki'ami e, raona weiana a'i kebahaoreanimi. <sup>17</sup> Beruberu tabakia namokia ikoikiai mai ibeni tabakia bero 'aukia ikoikiai hanona 'ubiai timai, weiana ea tabakia ebabainakia Tiramana herenai timai, ia hanona a'i nihaeai abomo aiaia 'abanai a'i neihiu. <sup>18</sup> Kipona ena nuatae paunai ena 'abi tohanai ebaramanaka, ba taba ikoikiai ebaramanaka baiatakiai aika hanona wairai.

### *Aia O'o Mai Aka Babai.*

<sup>19</sup> Uaho'aba'u ki'ami e, neiana kato'iobi haraina, maearima ikoinai 'abi ionai

katenoanoa, ia ihinanai hanona katemahari mahari mai opuereai abomo katemahari mahari. <sup>20</sup> Pokina hau ha ena opuere hanona Tirama ena nuatae maurina berona aonai kemaui hauna a'i kebaraina. <sup>21</sup> Ua buonai hoahoa 'opukia ikoinai mai babai ki'a obokia ikoikiai aomia temiaho haukia tomone'e 'akau-manakia, ia Tirama ena 'abi weiana aomia ebatona hauna wai kebamaurini hauna tomoa'i taeana mai 'aiaunumi.

<sup>22</sup> Tirama ena 'abi tuona hauna akana katobabaina, ia 'abimo tuo'o 'abaeana, akana a'i tubabaina hanona kipomi tu'oi ahinimi. <sup>23</sup> Hau ha Tirama ena 'abi aiana niona ia akana a'i nibabaina hauna hanona ihobona ia kipona wairana oreore ai neihana 'abana. <sup>24</sup> Kipona wairana eihana epua ekaobo, a'i ehoma'a aba ereana ia ihana hanona aea homana. <sup>25</sup> 'A hau ha Tirama ena rauhuhu weiana bero'auna mai maearima ki'ai erubunakia hauna emarereai haraina aia eona a'i ereanakia, haeamona akakia eabai hauna hanona ena aka aonai Tirama ena banamo ketabu ahina.

<sup>26</sup> Hau ha aonai niraonana ia hanona Tirama nia'ikakauma haraina, iamo maeana a'i ne'ima haraina raninai ia hanona kipona ni'oi ahina, ba hau weiana ena a'ikakauma Tirama herenai hanona anina aha'i. <sup>27</sup> A'ikakauma hauna ena aka namona tohana mai berona Hamaka Tirama wairanai hanona neiana, araobo mai wapu kahabarainakia ekia hau haiarai, haeamona kipoka kaha'ima 'ima harainaka hanopaka 'opuna a'i meba'opunaka.

## 2

### *Maearima Ikoikiai A'itaeana Hoana Ihobona Kahababaina Herekiai.*

<sup>1</sup> Uaho'aba'u e, eka Obiapaka Iesu Keriso hanona nuabi obiana, tua'ikakaumana raninai, maearima ihaihakiai taikia a'i katotai. <sup>2</sup> Hau ha Tirama ena marea to'unai pekatoto imana mai hoeahoeana mai ena habuni namoabukia ebatoto, 'a uraru hauna ha ena habuni 'opukia ebatoto abomo pekatoto, <sup>3</sup> ba oi hau weiana habuni namokia ebatoto hauna nua'i taea haraina notibaha, "Emu imia'au namona neianai momia'au," 'a uraru hauna nohina bena, "Eiwa'a mokoroti 'ao neia ae'u pokinai momiatu," raninai, <sup>4</sup> wai hanona

aba tobaho, pokina kipomi baiatami toba-haeaina haeamona emi raona ki'a obonai baiata tohorena.

<sup>5</sup> Uaho'aba'u ki'ami e, aia'u tomona, Tirama ehore hanopakai uraru haukia etina'anakia a'ikakaumai kateobia, haeamona Tirama ena obia aiarana weiana aba e'abi'uaina ia tiraona'au aina haukia 'eukia hauna uraru haukia katea'ina. <sup>6</sup> 'A wai hanona uraru haukia toiha haonakia. Obia haukia hanona emi mauri tipoki aina mai bakai 'ekanai tiberi totonimi. <sup>7</sup> Ia tihore Iesu atana namona Tirama ebenimi hauna ti'abi ki'a bena.

<sup>8</sup> Rauhuhu apa'uana Puka robenai hauna etibaha, "Heremu hauna ko-raona'au aina oi kipomu nuraona'au aini'o 'abana." Ua tubabai aho raninai wai hanona aba tubabai harai. <sup>9</sup> 'A wai maearima ihaihakiai taikia tutai raninai wai hanona aba ki'a tubabaina, ba tubeho Tirama ena rauhuhu tuk-abena. <sup>10</sup> Pokina hau ha rauhuhu ikoikiai ke'ima harainakia, ia hamona ekabena raninai ia aba ebeho ihobona rauhuhu maikoinai ekabe orena 'abana. <sup>11</sup> Pokina Tirama etibaha, "A'i konabau," haeamona etibaha, "A'i koahuahu," ba pe a'i onabau, ia oahuahu raninai oi hanona Tirama ena rauhuhu aba okabe hurina. <sup>12</sup> Taba ikoikiai aokiai kato'abi'abi mai katobabai hanona katoraonana Keriso ena rauhuhu weiana ki'ai erubunimi hauna kehore kebabakinimi. <sup>13</sup> Pokina maearima a'i koaoko'o ainakia raninai, Tirama ena bakai aonai a'i keaoko'o aini'o. Aoko'o hanona bakai etara haona.

### *A'ikakauma Mai Akana Hauna Enamo.*

<sup>14</sup> Uaho'aba'u e, hau ha ni'abi ia hanona mai ena a'ikakauma ia akana a'i nibabaina raninai, ena a'ikakauma weiana hanona ena namo taba? Ena namo aha'i. A'ikakauma uahomana hanona ia a'i kebamaurina. <sup>15</sup> Pe a'ikakauma haukia baiatakiai uaho'abamu ha 'ao haibumu ha herenai habuni 'ao aniani keani hauna aha'i, <sup>16</sup> ba oi ia pohina bena potibaha, "Mai baibuamu moao, haumu kehiabuhi-abu, mai koaniani harai," 'a enuatae ainakia tabakia ha a'i oben'i apuana raninai, weiana ena namo hanona taba? Ena namo aha'i. <sup>17</sup> Taeara ihobonai a'ikakauma ikupaiana mo, 'a akana aha'i hanona a'ikakauma tohana aha'i, weiana hanona aba e'ari a'i niaka.

18 'A hau ha ketibaha, "Hau ha hanona kea'ikakauma, 'a hau ha hanona keaka." 'A au natibaha, "Emu a'ikakauma weiana akana aha'i hauna mobaihana'u, ba au kahore e'u a'ikakauma mai akana hauna kabaihani'o." 19 Oi nua'ikakauma Tirama hanona hamona mo. Weiana hanona enamo. Auba ki'a obokia abomo ua tia'ikakauma aiho haeamona tita'u ki'a te'ururu 'ururu. 20 Ao 'abaea haumi e, a'ikakauma weiana akana aha'i hauna hanona ena namo aha'i\* kabaihanimi. 21 'Aba'abaka Aberahamo hanona Tirama wairanai ebero pokina ena a'ikakauma akana ebabaina, nahuna Isako itara robenā ahanai ehore 'auna Tirama eberuberu bena. 22 Aba to'iohina ena a'ikakauma mai ena aka hanona teaka haeamo, ba ena babai weiana ehore ena a'ikakauma ebabero'auna. 23 Ba Puka robenai tererena 'abina aba etohana etibaha, "Aberahamo ehore Tirama ea'ikakaumana, ena a'ikakauma weiana buonai Tirama ia ea'i taeana bero haunai ebaona." Ba Aberahamo teaparina Tirama ena hau. 24 Ua buonai bariu aba to'iohina maearima hanona ena babai paunai Tirama ia nibatohana bero hauna, ia a'ikakauma ikupaiana mo aha'i.

25 Taeara ihobonai mo, Rahaba rea babi'ena abomo ena aka harai paunai Tirama ia ebatohana bero babi'ena, pokina ia ehore Iuda ekia ihaihapai haukia ebarainakia, haeamona taeara haeai eu-hunakia temue. 26 Ua buonai hauani aonai auba aha'i hanona e'ari ihobonai, a'ikakauma abomo akana aha'i hanona aba e'ari.

### 3

#### *Eka 'Abi Kaha'ima Harainakia.*

1 Uaho'aba'u e, haumi bo'ona ba'iohi haumiai a'i katoao, pokina wai aba to'iohina, ai taba'iohi 'uai haumai hanona ibabakaimai hanona aba kepahihi ki'a baha ba maearima baika. 2 Aika ikoikai hanona rani bo'ona nahababai beho, ia hau ha a'i ke'abi rea raninai ia hanona kebero'au haeamona ia kipona hauanina maikoina kepokiai haraina ketaina. 3 Hoti pinakia ibirikia aurikia pinakiai kahabiri 'aunakia raninai ia aika aoka kateka'aina, aika kahanuatae hoti hauna maikoinai kahabaibiuna mai kahaba kakaiarona

hanona ketaina. 4 Haeamona aunohi rarina kahaihana, ia eapa'ua ki'a baha mai baura rarina niabuna re'a, hari papana nihore niharina, kapena hauna ena nuatae 'ekana ae'e hanona keaoaina mo weia. 5 Ihobonai mo maea hanona papana 'aki hauanikai nemiaho, ia niapa aka apa'uakia nibabai nya niho.

Iruba abomo kaharaonana, baubaea papana 'aki iamo keupa raninai arabu maikoinai ke'ara obo. 6 Maea hanona matoha iruba, ia hanona hauanikai nemiaho ki'ai ebonu, eka mauri maikoina kea'i ki'ana, ia nihore eka mauri maikoinai irubai niba'ara'auna, ena iruba hanona eiwa'a iruba ni'ara banai banai 'ekana nimaiana. 7 Maearima katehore mauri tabakia ikoikai, mahi, roborobo, tikara tabakia haukia, mai 'aku aonai temiaho tabakia ikoikai kateba mamatanakia hanona ketaina, ba ia tihore taba weiakia tiba mamatanakia. 8 Iamo hau ha maea kebamamatana hanona a'i ketaina, maea hanona ki'a nehina to'o baihana, 'ari muramuranai ebonu. 9 Maea neianai eka Obiapaka Hamaka nahabanamona, haeamona maea neianai Tirama ihaihanai ebabainakia maearimakia nahaururu ainakia. 10 Pina hamonai banamo mai ururu 'abikia tikarahi. Uaho'aba'u e, weiana a'i pahababaina hanona penamo. 11 'Aku beina mai bei 'aki\* terarua ate hamonai a'i tiaru ahi. 12 Uaho'aba'u e, tuba matiuna ororo buana a'i kebaramana, abomo 'aruhi matiuna tuaba buana a'i kebaramana. Haeamona 'aku beina bei 'aki a'i kaharaina.

#### *Aobero Tirama Herenai Emai Hauna.*

13 Tai hanona wai baiatamiai eaobero toha mai obo niobo harai? Ia kehore ena mauri namonai mai ena babai harai weiana kebaihanimi mai 'aiununa, weiana hanona ena aobero hoana. 14 Aomia wamuru ani ki'a temiaho raninai emi aobero a'i katoapaina, weianai Tirama ena 'abi tohana a'i katobunina. 15 'Aobero' uahomakia hanona Tirama herenai a'i timai, ia hanona hanopaka 'euna mai tiaporo herenai timai. 16 Pokina wamuru mai ani ki'a temiaho 'ekana hanona ripuripu mai aka ki'a haeai haeai abomo temiaho. 17 'A aobero weiana Tirama herenai nimai hauna ihaihana

\* 2:20: (20) 'ao e'ari \* 3:11: (11) 'ao bei kumana mai bei mabina



kori'uaina hanona hoahoa berona, murinai hanona baibua, 'aiaunu, bamamata, aoko'oai ebonu, babai namokia, ki'a taikia a'i nitai, mai ahu 'oi'oi aha'i. <sup>18</sup> Baibua tibabaina haukia tihore baibua uhona tibatona ni'omu nirewa buabuana hanona aka bero ba tiarina.

## 4

### *Hanopaka Ihatia'ana Hanona Tirama I'oatana.*

<sup>1</sup> Baiatamiai 'au mai baiara ikoikiai hanona ae'eai timai? Ekia mai 'ekana hanona oi aomu ena nuatae uhorena weiakia haukia oi aomuai ti'au to'o baihana. <sup>2</sup> Tonuatae taba katoa'i iamo a'i tua'inakia, ua buonai tuba'oru katoahuahu, taba tonua ki'ainakia iamo a'i tua'inakia, ua buonai tubaiara mai tu'au. Taba tonuatae ainakia haukia a'i tua'inakia pokina wai hanona Tirama a'i tunoina. <sup>3</sup> Haeamona taba tunoi ai haukia a'i tutabu ahinakia pokina emi raonaraona hanona a'i tebero, tonuatae kipomi aomi katoba namonakia tabakia mo tunoiainakia. <sup>4</sup> Tirama herenai aia a'i tubabua 'au haumi e, wai matoha nabau ki'a babi'ekia 'abakia, hanopaka ihatia'ana hanona Tirama i'oatana, wai weiana a'i to'iohina, 'u? Maearima tabana hanopaka kehauna hanona ia kipona Tirama ena 'ou haunai niao. <sup>5</sup> Puka robenai ererena etibaha, "Tirama Auba Robe aika aokai ehorotina hauna nihore aika neuhore ainaka." Wai turaonana 'abi neiana hanona anina aha'i, 'u?

<sup>6</sup> 'A Tirama ena aoko'o hoana nibaibeni hauna hanona nitabura hao tabura hao, Puka robenai ererena etibaha, "Tirama hanona apa haukia ni'oatanakia, 'a 'aiaunu haukia hanona ena aoko'o hoana nibenakia."

Aot 3.34

<sup>7</sup> Ua buonai kato'aiaunu kipomi emi mauri Tirama katobena, 'eunai katoao, ia tiaporo kato'oatana hanona heremiai kebeau 'akaumana. <sup>8</sup> Tomai Tirama herena, ia abomo kemai heremiai. Ki'a haumi e, emi mauri aonai ki'a temiaho haukia tomoutu obonakia matoha imami toutunakia 'abana, aomi tubaruanakia haumi e, aomi tomoa'ia'i harainakia emi hoahoa katebero. <sup>9</sup> Tomobabirabira, tomohai, tomohai 'ari ki'a, emi iriri hanona

hai ai meao, emi aonamo hanona aro'ariai meao. <sup>10</sup> Obiapaka wairanai kipomi tomoba 'aiaununimi, weiana ia kehore kea'i taeanimi.

### *Uaho'abaka A'i Kaha'uahinakia.*

<sup>11</sup> Uaho'aba'u e, kipomi baiatamiai a'i katobaitabu haoaina. Tabana uaho'abana Keriso aonai hauna ha nitabu haona 'ao nibapuma hoaina hauna hanona rauhuhu nitabu haona mai nibapuma hoaina. Ba oi rauhuhu nubapuma hoaina raninai oi hanona rauhuhu a'i nuka'aina haumu ia nubapuma hoaina haumu. <sup>12</sup> Tirama ikupaiana mo rauhuhu ebaibeni mai kebabakainakia ia mai ena hiabu kebamauri mai kebapururu. Ua buonai oi hanona emu bero aha'i heremuai hauna puma kobahoaina.

### *Mara 'Euna A'i Kahapa.*

<sup>13</sup> Aia'u tomona, wai nya tu'abi aiho haumi totibaha, "Bariu 'ao mara hanona kahaeao aiara weianai ihau hamona kahamiah, moni akana kahababaina mai moni bo'ona 'akina kahababai." <sup>14</sup> 'A wai hanona mara emi mauriai taba kerama hauna a'i to'iohina. Emi mauri hanona ihobona 'abu 'abana, rani papana ke-waira tina haeamona ke'akauma mue. <sup>15</sup> Ua buonai wai hanona nya kato'abi aiho, "Obiapaka kenuatae raninai aika kahamauri oho aka neiana 'ao weiana kahababaina." <sup>16</sup> 'A bariu hanona wai kipomi tubapa'ua mai tuapa, bapa'ua nahomakia hanona babai ki'a. <sup>17</sup> Ua buonai tabana aka berona ibabaina e'iohina iamo a'i nibabaina hanona ki'a nibabaina.

## 5

### *Obia Haukia Iba'iohikia 'Abina.*

<sup>1</sup> Kepu heremi tebo'o haumi e, aia'u tomona, katohai 'ari ki'a baha pokina atetua rarina kemai heremi. <sup>2</sup> Emi kepu aba teburuburu abomo 'abi'abi emi habuni aba teani maranakia. <sup>3</sup> Emi gold mai silba aba temotemote ba ekia motemote neiana kehore kebatohana wai hanona tobeho mai hauanimi irubai kepururu. Rani orena nimai iamo wai emi kepu tubararo ohomo. <sup>4</sup> Tomobahu emi umai tebiraura haukia 'araki'a a'i tohore obonakia haukia haeamona weiakia umai teueu haukia emi beho paunai tehai aiana aba ekara'au eao hiabu ikoikiai

Obiapakana haianai etoto puma keba-hoainimi. <sup>5</sup> Wai hanopaka ahanai emi mauri hanona eobia ki'a baha haeamona mai aonamomi tomiaho, ba kipomi turo'onimi tubapa'uanimi ihobona tatu aiporona 'abanai tuao.\* <sup>6</sup> Wai tohore maearima ekia beho aha'i haukia weiakia a'i tebatetua 'apuanimi haukia puma toba-hoainakia mai toahu 'arinakia.

*Kahabakiro Mai Kahabahuba'ari.*

<sup>7</sup> Ua buonai, uaho'aba'u e, katobapahihi keaomo Obiapaka kemue kemai. Katoraonana biraura hauna ena biraura anina namona ne'imana mai bapahihi 'abana niba'ima niaomo hiribo abarana niore iaia abarana nimai ba ena uma anina nirama. <sup>8</sup> Wai abomimo aomi katobapahihina mai emi buabeniai katokori 'ini harai pokina Obiapaka ena mai hanona aba niherekai.

<sup>9</sup> Uaho'aba'u e, wai kipomi baiatamiai a'i kato'arara 'arara weiana a'i meaoainimi Tirama a'i meba bakainimi, iamo bakai hauna hanona aba pa'abi 'akonai ekoroti. <sup>10</sup> Uaho'aba'u e, wai hanona mahabanai haukia ekia hau haiara aokiai tebakiro hauna katoraonana murikiai kato'au, ia hanona Obiapaka ena 'abi tehinana ba tehau haiara. <sup>11</sup> Aika naha'abi bapahihi haukia hanona tenamo. Iobu ena bapahihi orina aba to'jobina Obiapaka ena namo hanona ia herenai aea homana. Obiapaka hanona aoko'o mai rabo haraiiai ebonu.

<sup>12</sup> Uaho'aba'u e, taba apa'uana hanona neiana 'abi pumakiai a'i ko'abi 'uai, kupai 'ao hanopakai 'ao taba ha atanai emu 'abi'uai a'i kobatohana. Iamo ko'abi 'e' re'a 'e tohanamo kohinana, 'ao ko'abi 'aha'i' re'a aha'i tohana mo kohinana, weianai a'i mobabai ki'a puma a'i mo-hoaina marikina.

<sup>13</sup> Baiatamiai hau ha nihau haiara re'a kebahuba'ari, hau ha baiatamiai niaonamo re'a banamo huikia kea'i. <sup>14</sup> Baiatamiai hau ha neinawa re'a Tirama ena mareai kiro haukia keaparinakia Obiapaka atana hiabunai ahanai katebahuba'ari mai tehoroi katetarona. <sup>15</sup> Ia a'ikakauma bahuba'arina kehore inawa hauna kebanamona Obiapaka kehore kebamikirina haeamona mai ena ki'a raninai kehina haonakia. <sup>16</sup> Ua buonai 'abami

kipokia emi ki'a katohina pounakia abomo kipomi ha ha 'abami ahakiai katobahuba'ari, weiana emi inawa katenamo. Bero hauna ena bahuba'ari hanona ehiabu abomo mai anina. <sup>17</sup> Elia hanona maearima aika 'abaka, iamo ebahuba'ari tabura tabura abara a'i ketibo, ba abara hano ahanai a'i etibo ihau aihau nawa 'abaihau. <sup>18</sup> Haeamona ebahuba'ari mue, weiana abara kupai etibo hano ebamapu mapuna, ba buabuana ebarama muena.

<sup>19</sup> Uaho'aba'u e, wai ha Tirama ena 'abi tohanai kekaobo ba 'abami ha kehore kemaiai muena raninai, <sup>20</sup> ki'a hauna weiana ena hoa ki'a obokiai kemueaina kemaiaina, ba Tirama kehore ki'a hauna aubana 'ariai kebamaurina abomo ena ki'a bo'ona kehina haonakia. Neiana katoraona haraina.

\* 5:5: (5) 'ao iahu'arina ranina ewairana.

## Marere Kori'uaina PETERO Ererena Hauna

### *Puka Aona Irerena 'Abina*

Marere neiana hanona a'ikakauma haukia bo'ona atetua rarikia titabu ahi haukia kebarainakia ekia a'ikakauma keba taburanakia. A'ikakauma haukia nehina benakia ia hanona Iesu Keriso pouna namona kateraona 'inina. Weiana Iesu hanona e'ari haeamona emikiri mue, mai ena 'abi'uai ia kemue kemai. Ena 'abi'uai kateraona taburanakia mai bakirokia katebai'ima keaomo kemai. Weiana a'ikakauma haukia ikoikiaki ekia a'ikakauma kehobonakia. Ua buonai ia hanona ekia a'ikakaumai katekora 'ini keaomo Keriso kemue kemai. Ba rani weianai ia hanona 'arakiya katea'i.

### *Puka Paipana Apa'uakia*

- a. Roba iahu. (1.1-2)
- b. Tirama ena bamauri teba'iobi. (1.3-12)
- c. Mauri robena. (1.13-2.10)
- d. A'ikakauma haukia ekia hoahoa hau haiara aokiai. (2.11-4.19)
- e. 'Uai haukia ekia aka. (5.1-11)
- f. 'Abi orekia. (5.12-14)

### *Banamo 'Abina.*

<sup>1</sup> Au Petero Iesu Keriso ena iuhubeau hau'u, Tirama etina'aniami haumi torama otaraina hano haeai ai tomiaho haumi, Ponto ai, Galatia ai, Kapadokia ai, Asia ai mai Bitunia ai tomiaho haumi narerebenimi. <sup>2</sup> Tirama aika hamaka ena 'iobi 'uai ihobonai etina'aniami ba Auba Robe hanona wai aba eba robenimi, weiana Iesu Keriso aiana katoka'aina ia aru- arunai emi ki'a keutunakia. Nabahuba'ari Tirama ena aoko'o hoana mai baibua hanona heremiai keapa'ua.

### *Tirama Kahabanamona Buabeni To- hana Ebenaka.*

<sup>3</sup> Eka Obiapaka Iesu Keriso Hamana Tiramana kahabanamona, ia ena aoko'o eapa'ua paunai Iesu Keriso e'ari ena mikiri mue maurina aonai aika ebarama muenaka, ba buabeni tohana ebenaka. <sup>4</sup> Aika nahabuabena itau Tirama nahuna kebenakia. Banamo weiana hanona aba eba'oruna kupai ua'a wai 'eumi, a'i keki'a, a'i ke'opu, abomo a'i ke'akauma.

<sup>5</sup> Tirama ena hiabu nihore ni'aeanimi emi a'ikakauma paunai keaomo bamauri weiana aba eba'oruna kebawaira tinana rani orenai hauna katoa'ina.

<sup>6</sup> Neiana buonai aomi kenamo ka- toaonamo ki'a baha, iamo bariu rani papana aomi tiaro'ari pokina baihobo haeai haeai tihobonimi paunai. <sup>7</sup> Baihobo weiana hanona emi a'ikakauma ena namo kebatohana. 'A a'ikakauma ena namo hanona gold weiana irubai tebanamona iamo aba ke'akauma hauna ena namo etara haona. Emi a'ikakauma weiana tebahobona tebanamona hauna hanona Iesu Keriso kewaira tina berauranai ibanamomi, ia'i taeami mai imarikiaimi tabanai keao. <sup>8</sup> Iesu a'i toiha 'apuana iamo turaona'au aina. Bariu a'i toihana ia tua'ikakaumana ba tuaonamo aina, aonamo apa'uana mai namona weiana hanona 'abiai ihina haraina a'i ketaina. <sup>9</sup> Pokina emi a'ikakauma buabuana tua'ina, weiana hanona aubami ibamau- rikia tabana.

<sup>10</sup> Mahabanai haukia weiakia Tirama ena aoko'o hoana wai heremiai kekara'au hauna temahabanai haukia tehore ba- mauri weiana tetabu haraina abomo temarereai haraina. <sup>11</sup> Auba Robe Keriso euhuna hauna hanona mahabanai haukia aokiai emiaho, Keriso ena haiara mai ena nuabi weiana haiara murinai kemai hauna eba'iobinakia ihobonai ia hanona tebahobona kate'iobina rani tabanai abomo hoana aea homana. <sup>12</sup> Tirama mahabanai haukia herekiai ebawaira tinana ekia aka hanona kipokia ekia namo paunai aha'i ia wai emi namo paunai, abomo bariu pou namona neiana hanona teiroro aina haukia tehore Auba Robe kupai euhu ririna emai hauna ena baraiarai ai teba'iobinimi. Taba neiakia hanona aneru abomo tenuatae kateiha tinanakia.

### *Mauri Robenai Kahamiaho.*

<sup>13</sup> Ua buonai aomi katoa'iai haraina, katoba'oru emi buabeni maikoina hanona Iesu Keriso kewaira tina raninai aoko'o hoana kekara'au 'eumiai. <sup>14</sup> Bariu aiao'o miorimiai katoao, hauanimi ekia nuatae babaikia ki'a obokia 'uainai a'i to'iobi raninai tobabainakia haukia a'i katoba- bainakia. <sup>15</sup> 'A eaparinimi Tiramana erobe 'abana wai abomimo katorobe emi ho- aho ikoikiaki aokiai. <sup>16</sup> Puka robenai aba tererena,

“Wai hanona katorobe

pokina au hanona narobe.”

Lev 11.44, 45

17 Wai tu'arara Hamaka, ia hanona maearima nibabakainakia raninai ihaihana enamo hauna a'i niraonana ia ha ha ena aka ena aka paukiai kebabakainakia. Ua buonai emi miaho neia hanopakai hanona mai ta'umi katomiaho ihobona hano haeai haumi 'abana. 18 Wai aba to'iohina, Tirama wai emi mauri ki'a obona weiana 'aba'abami tebenimi hauna aonai ebamaurini hanona hanopaka tabakia weiakia aba kate'akauma haukia silba 'ao gold 'abakiai a'i ekawanimi, 19 ia Keriso aruaruna namona 'akina mamoe nahuna weiana haunai mani'a 'ao ki'a ha aha'i mamoeana 'abanai ekawanimi. 20 Tirama hanona aba wa'i baha hanopaka a'i erama baha aonai ia etina'ana, ba rani orena neianai ewaira tina wai paumiai. 21 Wai Keriso paunai Tirama tua'ikakaumana, ia hanona Keriso 'ariai ebamikiri muena haeamona nuabi ebena. Ua buonai wai emi a'ikakauma mai emi buabeni hanona Tirama aonai nemiaho.

22 Bariu Tirama ena 'abi tohana ia'itaeana aubami aba toutu harainakia, uaho'abami kato raona'auai tohanakia mai taearana buonai, 'abami katoraona'au ainakia mai aomi ikoinai. 23 Wai torama mue hanona uho weiana kepari haunai aha'i, iamo weiana a'i kepari hauna Tirama ena 'abi nimaui mai nemiaho banaibanai haunai torama mue. 24 Pokina Puka robenai tererena 'abana, “Maearima ikoikiai hanona tubu 'abana, abomo ekia nuabi hanona tubu taitaina 'abana. Tubu ni'ororo taitaina ni'eho niobo.

25 'A Obiapaka ena 'abi hanona kemiaho keaomo banaibanai.”

Isa 40.6—8

'Abi neiana hanona pou namona weiana teiroro aina heremiai.

## 2

1 Ua buonai wai kipomi ki'a akakia ikoikiai, bai'oi, ahu 'oi'oi, wamuru, 'uahi'uahi ikoikiai katone'e 'akaumanakia. 2 Miori 'oru'oruna niramahi 'ae nenuatae 'abana, rani ikoinai auba ena bamarere namona katonuatae aina, weianai katoapa'ua keaomo bamaui katoa'ina.

\* 2:6: (6) 'ao itu ibakori'au piharana

3 Pokina wai hanona Obiapaka ena banamo aba tonobai 'apuana.

*Obiapaka Hanona Pihara Maurina, Wai Hanona Tirama Ena Maearima.*

4 Katomai Obiapaka Iesu herena, ia hanona pihara maurina, hanopaka maearimakia tebaoaoaina 'a Tirama ehore pihara weiana etina'ana, ba eihana hanona enamo ki'a baha ia herenai. 5 Wai abomo pihara maurikia 'abana, Auba Robe ena hiabuui Tirama ena marea robenai katoao, wai hanona ia ena robe haumi emi mauri katobena baibeni tabanai keao Tirama kehore mai aonamona kea'i taeanimi Iesu Keriso paunai.

6 Puka Robenai na erere aihona, “Katoihana au pihara ha a'itaeana weiana hanona 'uni'uni piharana\* namona 'akina Siona oeonai nahorotina, taba ikoikiai ia ahanai katebakori 'aunakia, ia kea'ikakaumana hauna hanona a'i kehaumaea.”

Isa 28.16

7 Ua buonai tua'ikakaumana haumi heremiai hanona enamo ki'a baha, 'a ia a'i tia'ikakaumana haukia herekiai hanona pihara 'abaeana aba tererena 'abana, “Itu ibakorina haukia tebaki'ana piharana hanona aba itu 'uni'unina piharana eao.”

Sal 118.22

8 Abomo, “Maearima pihara weianai tikai tiehe herea haeamona tiehe ta'erai ti'eho.”

Isa 8.14

Tirama ena 'abi a'i teona a'i teka'aina paunai ia ti'eho, weiana hanona ia itaukia Tirama ena raona ihobonai.

9 'A wai hanona Tirama etina'aniami maearimami, obia 'arana ena robe haumi, robe itubuna, maearima weiakia Tirama 'euna haumi. Tirama ea'i taeanimi hanona ena hoahoa namokia katohina pounakia paunai, weiana ia hanona wai wapura aonai eapari ahinimi ena ea namona 'akina aonai ebakatotoni. 10 'Uainai wai hanona Tirama ena maearima aha'i 'a bariu hanona wai aba Tirama ena maearima, 'uainai wai



hanona Tirama a'i eaoko'o ainimi 'a bariu hanona Tirama ena aoko'o aba toa'ina.

*Tirama Ena Ta'ara'i Hauka.*

<sup>11</sup> E'u raona'au haumi e, wai hanona hano haea mai kaoao 'abaea haumi hanopaka neiana aonai, nabahi ahinimi, hauanimi ekia hoahoa opukia a'i katobabai, weiakia tihore aubami tehuarina.

<sup>12</sup> A'i tia'ikakauma haukia baiatakiai emi hoahoa katobaberona, tia'i ki'aniami aka ki'a haumiai tibaonimi haukia emi hoahoa namokia kateiha, weiana Tirama atana katebanamona ia ena mai raninai.

<sup>13</sup> Maearima ekia hiabu haukia ikoikiai aiakia katoka'ainakia, weiana hanona Obiapaka imarikiaina paunai, hanopaka obia 'arana aiana katona ia hanona poki hauna, <sup>14</sup> abomo kabamani haukia aiakia katona, ia hanona poki hauna euhunakia tiaka ki'a haukia kateba haiaranakia, 'a babai harai haukia kateba namonakia. <sup>15</sup> Pokina Tirama ena nuatae hanona emi babai harai bapo'o po'o haukia ekia aotipa 'abikia kekaiabunakia.

<sup>16</sup> Rauhubu herenai to'abaea haumiai katomiaho, 'a emi miaho 'abaea weiana aka ki'a ikaikauna tabanai a'i keao, wai hanona Tirama ta'arana ia'inai katoao.

<sup>17</sup> Maearima ikoikiai katomariki ainakia, 'abami kato raona'au ainakia, Tirama katota'u aina, obia arana katomariki aina.

*Keriso Ehaiara Ihobonai Kahahaiara.*

<sup>18</sup> Ta'ara'i haumi e, emi poki haukia aiakia katoka'aina mai ta'umi, namo 'ao 'abi bero haukia herekiai mo aha'i ia aibara haukia herekiai abomo. <sup>19</sup> Ena ki'a aha'i ia Tirama niraonana paunai hauhaiara nihoaina hauna weiana hanona Tirama ia kebanamona. <sup>20</sup> Katoaka ki'a kateahunimi aonai katobapahihi ena namo hanona taba? 'A aka namokia katobabai katohaiara aonai katobapahihi weiana hanona mai banamona Tirama wairanai.

<sup>21</sup> Neiana paunai Tirama wai eaparinimi. Keriso hanona ehau haiara wai paumiai, ehabonimi ibabataiai eao wai murinai katoao 'apunai katoka'a.

<sup>22</sup> "Keriso hanona ki'a ha a'i ebabaina abomo pinanai bai'oi 'abina ha a'i tetabu ahina."

Isa 53.9

<sup>23</sup> Tehinabe ki'ana ia aiakia a'i ehamuena, haiara eonobaina ia a'i ebaro 'arinakia, 'a

ikoinai hanona beroai nibakai Tiramana imanai eutanakia. <sup>24</sup> Keriso hauaninai eka ki'a ehoainakia matiu ibiri ropo ubinai e'ari hanona ki'a 'eunai kaha'ari 'a bero 'eunai kahamauri. Ena imoa mani'akiai wai aba ebanamonimi.

<sup>25</sup> 'Uainai wai hanona e'akauma mamoea 'abana, ia bariu hanona aba to-mue tomai aubami i'imakia mai iha'inikia hauna herena.

### 3

*Hawainibe Haukia Mai Babi'ekia Ekia 'Abi.*

<sup>1</sup> Babi'e e, ihobona ta'ara'i haukia ekia poki haukia aiakia tika'aina 'abana, atawami aiakia katoka'ainakia, weiakia Obiapaka ena 'abi a'i tia'i taeana haukia hanona 'abiai aha'i iamo wai emi babai harai katobaraona kabenakia, <sup>2</sup> emi babai berokia mai mariki akakia kateiha paukiai. <sup>3</sup> Wai emi taitai hanona hauanimi kapena ibataitaina paunai aha'i, buimi taitaikia 'ao haiami 'abakia gold 'ao taba 'imarekia 'ao emi ibatoto 'arakia rarikia 'abakia aha'i. <sup>4</sup> 'A aomi tohakia haukia, raona namona 'aiaununa ena namo a'i ke'akauma haunai katoba taitainakia hanona Tirama wairanai ena namo eapa'ua. <sup>5</sup> Pokina 'uaina raninai robe babi'ekia weiakia ekia buabeni Tirama herenai haukia ua tetaitai aiho, atawakia aiakia teka'ai harainakia. <sup>6</sup> Sara atawana Aberahamo aiana eona mai eaparina ena obia. Wai abomo bero akana katobabaina mai rani ikoinai a'i katota'u hanona nahuna babi'emiai katoao.

<sup>7</sup> Hau e, taeara ihobonai wai abomimo atawami kipokia katomiaho haeamo mai 'iobi haraimi ia hanona hauani akakiai te'abe'abe katomariki ainakia, pokina Tirama ena mauri tohana beruberuna kipokia katoa'i haeamona, ua homanai emi bahuba'ari taearana a'i mekaiabu marikina.

*Aka Bero Paunai Kahahaiara.*

<sup>8</sup> 'Abi orena neiana, ikoimiai aomi kehamomo, kipokia katoraonaraona, katoraona'au ainimi uaho'aba 'abakia, katokaoko'o ainimi, abomo kato 'aiaunu. <sup>9</sup> Ekia aka ki'a a'i katoba muena herekiai a'i katoaka ki'a, 'ao ekia 'abi ki'a 'arakia a'i katohore herekiai a'i kato'abi ki'a, 'a tia'i

ki'animi haukia hanona katoba namonakia, pokina weiana paunai eaparinimi Tirama ena banamo katoa'ina.

<sup>10</sup> Pokina Puka robenai aba tererena, “Hau ha kenuatae mauri namona mai rani namona keihana hanona maeanana ke'ima haraina pinanai ki'a 'abina a'i kehinana, pinana paruanai bai'oi 'abina a'i kehina 'apuana.

<sup>11</sup> Ki'a kehabonakia aka namokia kebabainakia, baibua ketabuna murinai ke'au.

<sup>12</sup> Pokina Obiapaka mahana hanona aka bero haukia neihanakia, haiana hanona ekia noinoi nibahubahu ainakia, 'a Obiapaka wairana hanona aka ki'a haukia niwairanakia ni'oatanakia.”

Sal 34.12-16  
<sup>13</sup> Wai aka namona tonuaki'aina katobabaina hanona tai kehore wai keba haiaranimi? <sup>14</sup> Ia aka berokia katobabainakia mo katohau haiara raninai wai hanona katonamo Tirama wairanai. “Ekia bai'oata 'abikia a'i katota'u ainakia aomi a'i kearo'ari.” <sup>15</sup> 'A Keriso hanona aomia katomariki aina emi Obiapaka robenana. Ba rani ikoinai katoba'oru, emi buabeni weiana aomia nemiaho hauna anina katebakai bakai aina maearimakia ekia bakaibakai 'abina katobamuena mai baibuami abomo mai marikimi. <sup>16</sup> Rani ikoinai emi mauri aonai aomi kebero Tirama wairanai. Weiana maearima weiakia emi aka namokia Keriso aonai tubabai haukia tehinabe ki'animi haukia aka weiakia katehore kateba haumaeanakia. <sup>17</sup> Pokina Tirama ena nuatae raninai aka namonai katohau haiara hanona enamo, emi aka ki'a paunai katohau haiara hanona a'i enamo.

<sup>18</sup> Pokina Keriso rani hamonai e'ari ki'a ia'iohokia akakia ikoinai paunai, ia beho aha'i hauna ehore beho haukia 'ekakiai e'ari pokina keaoainaka Tirama herena. Hauanina teahu 'arina, ia aubai emauri mue. <sup>19</sup> Keriso hanona aubai eao teka-iabunakia aubakia herekia eirononakia. <sup>20</sup> Auba weiakia hanona 'uaina 'akinai Noa aunohi ehabaina raninai, maearima weiakia Tirama aiana a'i teka'aina ia aona eba pahihina ebai'ima kateraona kabe haukia. Ia aunohi weiana aonai hanona a'i tebo'o, haukia 'ababani mo bei weiana

aonai ebamaurinakia. <sup>21</sup> Ibabatana bei hanona 'uere robe weiana Iesu Keriso ena mikiri mue paunai wai nibamaurinimi hoana, hauanimiti 'opuna katoutuna paunai aha'i ia kato'abi'uai\* aomi mai mahamahakia Tirama wairanai. <sup>22</sup> Keriso hanona aba kupai ekara'au, bariu Tirama itipana tainai marikiaina 'ekanai emiati, aneru, obia aubakia mai hiabu haukia ikoikiai nipoki ainakia.

## 4

### *Eka Mauri Katehaeai.*

<sup>1</sup> Keriso hauanimiti ehaiara buonai, wai abomo raona weiana ihobonai aomi katoba taburanakia, pokina hauanimiti kehaiara hauna hanona ki'a kehabonakia. <sup>2</sup> Ua buonai emi mauri ranikia ikoikiai aokiai hauanimiti ena nuatae ki'a obokia a'i katobabai, ia Tirama ena nuatae akakia katobabainakia. <sup>3</sup> 'Uainai wai hanona rama haeai haukia ekia nuatae ihobokiai tomiaho. Maha porepore, nuatae ki'a obokia akakia tobabai, toinu 'ari, tobaripu ripu, tobapo'o po'o, kaiba'uku tokuti ainakia. <sup>4</sup> Bariu maearima weiakia hanona teta'uta'u huri tehinabe ki'animiti, pokina wai ia kipokia a'i tubahamomo a'i tubaripu ripu paunai. <sup>5</sup> 'A ia hanona ekia babai paukiai aba eba'oru mauri mai 'ari haukia kebabainakia Tiramana wairanai katekoroti ekia pou katehina. <sup>6</sup> Weiana paunai pou namona 'ari haukia herekia eirononakia, ia abokiamo hauanimiti hanona bakai tea'ina maearima ikoikiai 'abana, 'a aubakia hanona katemaui Tirama ena nuatae ihobona.

### *Tirama Ena Aoko'o Hoakia I'ima Haraikia Haukai Kahaeao.*

<sup>7</sup> Taba ikoikiai ekia pua hanona abanimiti, ua buonai kipomi katoraona haranimiti aomi katoba kironakia ba katobahuba'ari. <sup>8</sup> 'A apa'uana tohana hanona 'abami katoraona'au ainakia mai aomi ikoikiai, pokina raona'au hanona ki'a bo'ona nibahu abunakia. <sup>9</sup> Emi ituai 'abami ha ha katoa'i taeanakia ia a'i katoururu ainakia. <sup>10</sup> Tirama wai ha ha ena aoko'o hoanai beruberu ebenimiti, weianai ha ha katobarainimiti Tirama ena aoko'o hoana haeai haeai i'imana haumi namomia katoao. <sup>11</sup> Hau ha

\* 3:21: (21) 'ao tiao

keiroro raninai ia hanona 'abi weiana Tirama herenai nimai hauna ihobonai keiroro aina, haeamona hau ha nenuatae kebarai barai, weiana hanona Tirama tabura ebena hauna ihobonai keakaina. Taba weiakia ikoikia aokiai Tirama atana kahabanamona Iesu Keriso paunai. Nuabi mai hiabu ia 'euna keaomo banaibanai. Amen.

### *Kahahaiara Keriso Ena Maearimai Na-haeao Paunai.*

<sup>12</sup> E'u raona'au haumi e, baihobo hariarana 'eumi katerama hanona a'i katokai'au kai'au a'i katoraonana taba haeai ha 'eumiai erama. Aha'i. <sup>13</sup> 'A katoaonamo, pokina wai hanona Keriso ehau haiara 'abanai tuhau haiara, Keriso ena nuabiai kewaira tina aonai katoaonamo wairai. <sup>14</sup> Wai Keriso ena maearimai paunai tehinabe ki'aniami raninai, banamona hanona wai 'eumi pokina Tirama ena Auba weiana nuabi Auba Robena hanona wai ahamiai. <sup>15</sup> A'i enamo wai ha kehau haiara ahuhau paunai 'ao bainao paunai 'ao aka ki'a paunai 'ao maearima haeai ekia aka aokiai nitoto paunai. <sup>16</sup> 'A wai ha kehau haiara Keriso ena maearima paunai, ia hanona a'i kehaumaea 'a Tirama kebanamona ata weiana ea'ina paunai.

<sup>17</sup> Pokina ranina aba ekara'au Tirama ena maearima herekiai bakai kea'i ramana. Aika keba'uai ainaka raninai weiakia Tirama ena pou namona a'i tea'i taeanu haukia herekiai hanona aea kepua aihō? <sup>18</sup> Puka robenai na terere aihona, "Aka bero haukia bamauri ia'inai katearo'ari raninai Tirama a'i tia'i taeanu haukia mai ki'a haukia aea katekōri 'ini aihō?"

Aot 11.31

<sup>19</sup> Ua buonai weiakia Tirama ena nuatae paunai tihau haiara haukia hanona aka namokia mo katebabai, aubakia hanona ebaabainakia Tiramana aia nibabua 'auna hauna imana aonai kateutanakia.

## 5

### *Tirama Ena Mamoe To'una Katoihā 'In- inakia.*

<sup>1</sup> Wai baiatamiai Tirama ena marea kiro haumi nabahi ahinimi, au abomo kiro hau'u, Keriso ehau haiara hanona au maha'uai aihana, nuabina kewaira tina

aonai au mai e'u itau. <sup>2</sup> Tirama ena mamoe to'una i'imakia haumiai katoao katoihā 'ini harainakia Tirama ena nuatae ihobonai. Baoao baoaoai a'i katobabaina, ia aomi mai nuatae tohanai katobabai. Moni paunai a'i katoaka ia aomi mai aonamōnai katoihā 'ininakia. <sup>3</sup> Wai katoihā 'in-  
inakia haukia herekiai ekia poki haumiai a'i katoao, ia herekiai ibabatai namokia haumiai katoao. <sup>4</sup> Weiana mamoe i'ima poki hauna Keriso kekara'au raninai wai hanona 'ara ibahuabuna\* nuabina a'i ke'akauma 'apua hauna katoa'ina.

<sup>5</sup> Hau 'aru'arumi e, taeara ihobonai kiro haukia aiakia katona, ikoimiai kipomi 'aiaunu ai katobarainimi, pokina Puka robenai ererena etibaha, "Tirama hanona apa haukia niwae'e ainakia, 'a 'aiaunu haukia hanona keaoko'o ainakia."

Aot 3.34

<sup>6</sup> Ua buonai kipomi katoba'aera 'aeranimi Tirama ena hiabu ba'anai kato'aiaunu, rani kemai aonai ia kehore wai kea'i taeanimi. <sup>7</sup> Aomi ekia aro'ari ikoikiāi Tirama herenai katohorotinakia, pokina ia hanona wai ne'imanimi.

<sup>8</sup> Katoraona harai kato'ima 'ima harainimi. Emi 'ou hauna tiaporo hanona wai heremiai nikabanai kabanai neiki matoha mahi apa'uana atana laiona 'abana nibaitabu hau ha petonona hanona nirao-nana. <sup>9</sup> Emi a'ikakaumai katokōri 'ini tiaporo katokaiabuna, pokina to'ioibina uaho'abami maikoinai hanopaka neiana aonai hanona hau haiara ihobona mo tihoaina. <sup>10</sup> Aoko'o hoana ikoinai pokina Tiramana weiana Keriso aonai eaparinimi ena miaho banaibanai nuabina aonai kebaka totonimi hauna kehore wai rani papana mo katohau haiara, murinai ia kipona kebabero 'aunimi, keba pahihinimi, kebataturanimi, keba kori 'ini harainimi. <sup>11</sup> Hiabu ikoikiāi hanona Tirama 'euna keaomo banaibanai. Amen.

### *Banamo 'Abina Orena.*

<sup>12</sup> Sila ena baraibarai ai au marere papana neiana arere ko'ona. Au aihana ia hanona uaho'abaka tohana. Au arere benimi hanona aomi kabaturana mai kahina pouna Keriso paunai kahahau haiara hanona Tirama ena aoko'o hoana

\* 5:4: (4) obia ibau'una

tohana. Wai aoko'o hoana neiana aonai katokori 'ini.

<sup>13</sup> Tirama ena marea maearimakia Babulono ai temiaho wai kipokia Tirama ea'i taeanimi haukia tehore ekia banamo 'abikia tebenimi, Mareko a'ikakaumai naha'u abomo ena banamo 'abina ebenimi. <sup>14</sup> Raona'au hoana baipaunai ha ha emi banamo katobaibeni.

Au nabahuba'ari Keriso aonai tomiaho haumi ikoimiai baibua aonai katomiaho.



## Marere Ibaruana PETERO Ererena Hauna

### *Puka Aona Irerena 'Abina*

Marere neiana tererena ena poki hanona a'ikakauma haukia kehina benakia ia hanona ba'iobi haukia bai'oikia baika robakia a'i kateahu 'apuana. Ia haukia hanona aba maearima kipokia tibahamomo ekia a'ikakauma mai ekia miaho maurina namona katea'i ki'anakia. Puka neiana nihore maearima nehina benakia 'abi weiakia 'uainai iuhubeau haukia tebenakia haukia katea'i 'ininakia, pokina 'abi weiakiai ia Tirama mai Obiapaka Iesu Keriso kate'iobi harainakia. Iuhubeau haukia hanona mahakiai Iesu teihana abomo haiakiai ena ba'iobi 'abikia aiakia teo'o. Maearima baika ti'abi Iesu hanona a'i kemue a'i kemai paunai, puka neiana ni'abi Iesu hanona kemue kemai toha, iamo bariu beronai a'i kemai, weiana anina hana nahomana. Tirama hanona nenuataea maearima ikoikiai kateraona kabe, ua buonai ia hanona nibai'ima mai bakirona (3.9).

### *Puka Paipana Apa'uakia*

- a. Roba iahu. (1.1-2)
- b. Tirama ena aparti. (1.3-21)
- c. Ba'iobi haukia bai'oikia. (2.1-22)
- d. Obiapaka ena mai mue. (3.1-18)

### *Banamo 'Abina.*

<sup>1</sup> Au, Simona Petero, Iesu Keriso ena ta'ara'i mai Iuhubeau hau'u, e'u marere narerena niwahi weiami eka Tirama mai ibamaurika hauna Iesu Keriso ekia bero paunai a'ikakauma namo abuna toa'ina ihobona ai 'abamai haumi heremi. <sup>2</sup> Nabahuba'ari emi aotipa Tirama mai eka Obiapaka herekiai keapa'ua, weiana aoko'o hoana mai baibua 'eumiai hauna hanona keapa'ua hao apa'ua hao.

### *Tirama Ena Aparti Mai Ena A'itaea.*

<sup>3</sup> Keriso hanona Tirama ena hiabuai taba ikoikiai kahanuatae ainakia haukia ebenaka weiakiai aika mauri tohana aonai kahamiaho mai Tirama ikutiainai kahamiaho, weiana hanona aika eaparinaka ena namo mai nuabi ebenaka Tiramana ha'iobina paunai etaina.

<sup>4</sup> Taeara neianai ia ehore ibeni rarikia mai namoabukia e'abi'uai ainakia haukia ebenaka, weiana ibeni neiakia katehore hanopaka ena raonaraona ki'a obokia katea'i ki'anaka haukia herekiai kateba kaparenaka kahamai Tirama ihaihana aonai kahamiaho haeamo.

<sup>5</sup> Ibeni neiakia paukiai katobatabura, emi a'ikakauma ahanai babai namo katohore 'auna, haeamona emi babai namo ahanai aobero katohore 'auna, <sup>6</sup> emi aobero ahanai bakiro katohore 'auna, emi bakiro ahanai bapahihi katohore 'auna, emi bapahihi ahanai Tirama imarikiaina akana katohore 'auna, <sup>7</sup> emi aka Tirama imarikiaina hauna ahanai uaho'aba hoahona katohore 'auna, emi uaho'aba hoahona ahanai raona'au katohore 'auna.

<sup>8</sup> Babai namokia neiakia katobabai taburanakia 'eumiai kateao raninai, emi 'iobi eka Obiapaka Iesu Keriso herenai hanona katetabura haeamona katebatohana. <sup>9</sup> Ia maearima ha neiakia a'i kebabainakia raninai ia hanona mahana teki'a, a'i neihaiha haeamona ena ki'a 'ai'aikia Tirama ehina haonakia haukia hanona aba ereanakia. <sup>10</sup> Ua buonai uaho'aba'u e, Tirama eaparinimi mai etina'aniami ena maearimai toao weianai kato tabura haeamona katobatohana. Weiana katobabaina raninai a'i kato'eho. <sup>11</sup> Taeara neianai wai hanona bero maikoina kebenimi eka Obiapaka mai bamauri hauna Iesu Keriso ena obia aiarana nemiaho banaibanai hauna aonai katokatoto.

<sup>12</sup> Ua buonai wai Tirama ena 'abi tohana aba to'iobi haraina haeamona toa'ina hanuina aba tua'i to'o, iamo rani ikoikiai hanona taba neiakia ikoikiai kabaraonaniami. <sup>13</sup> Au maurimauri'u hauani'uai namiho oho aonai naraonana taba neiakia aomiai kabaraona muenimi hanona ebero. <sup>14</sup> Pokina eka Obiapaka Iesu Keriso ehinabe haraina'u ihobonai a'iobina hauani'u neiana hanona aba kahabona paunai. <sup>15</sup> E'u tabura tohana kahorotina emi taeara ha kababaina ba e'u 'ari murinai hanona taba neiakia ikoinai katoraona 'ininakia.

### *Keriso Ena Nuabi Mahamai ai Taihana Haumai.*

<sup>16</sup> Eka Obiapaka Iesu Keriso ena hiabu mai ena mai hanopakai hauna 'abina taba'iobinimi aonai hanona hanopaka ena aotipa orina ha a'i takikipana, ia hanona

ai mahamai tohanai mai ena hiabu hauna taihana. <sup>17</sup> Iesu mariki hoana mai nuabi Hamana Tirama herenai ea'ina aonai aia ha ea nuabina tohana aonai eriri emai etibaha, "Neiana hanona au Naha'u, e'u raona'au hauna, naonamoai ki'a bahana." <sup>18</sup> Weia oeo robenai Iesu kipokia tamiaho aonai ai kipomai tohana aia neiana kupai emai hauna taona. <sup>19</sup> Ua buonai mahabanaui haukia 'abi tehinana hauna taba-tohana. Wai abomo ekia 'abi katobahuai haraina hanona kenamo matoha ramepa eana wapura aonai ni'ara 'abana, keaomo kupa kebaeana ba raurani bihiuna aomia kerara.

<sup>20</sup> Taba ikoikia 'araki neiana hanona katoraona 'ini apa'uana, Puka robenai 'abikia hanona mahabanaui hauna ha kipona ena raona 'abina a'i ehinana. <sup>21</sup> Pokina mahabanaui 'abina hanona maearima ha ena nuataeai a'i emai, ia maearima weiakia Auba Robe ena hiabu aonai temiaho haukia tehore Tirama raona ebenakia haukia 'abikia tehinana.

## 2

### *Mahabanaui Bai'oikia Haukia Ekia Hoahoa Ki'a Obokia.*

<sup>1</sup> 'Uainai Isaraela haukia baiatakiai mahabanaui haukia bai'oikia baika temiaho ihobona mo ba'iobi haukia bai'oikia baika baiatamiai katewaira tina. Ekia ba'iobi bai'oikia weiakia emi a'ikakauma katea'i ki'ana haukia tibia'obiai, Obiapaka weiana aruarunai ekawanakia hauna tebuniaina, weiana kipokia ibapururukia akana tibabai noanoana. <sup>2</sup> Maearima bo'ona ia taikia katetai nabau haukia katebabai, ba babai weiakia pookiai maearima Tirama ena 'abi tohana herenai kate'abi ki'a. <sup>3</sup> Ba'iobi haukia ekia ao'aea paunai bai'oi orikiai aomi kateani, iamo ekia bakai hanona aba wa'i baha e'oru nemiaho abomo ibapururukia hauna hanona eno'a nibai'ima.

<sup>4</sup> Pokina Tirama aneru tebeho haukia a'i eiha haonakia, ia iruba ni'ara banaibanai 'ekana aonai ekapo totonakia, weia 'uri wapurana aonai\* temiaho bakai wapuna te'imana. <sup>5</sup> Tirama uru 'ai'aina a'i eiha haona, ia tou ebakarantina Tirama a'i timariki aina haukia ebapururunakia. Ia Noa bero eiroro aina hauna mai 'abana 'abaihou hamomo kipokia eba

maurinakia. <sup>6</sup> Tirama ehore Sodoma mai Gomora aiara ki'a obokia puma ebahoainakia ba irubai ehuhu abunakia teaomo teabururu, weiana 'abana hanona Tirama a'i timariki aina haukia herekiai kerama. <sup>7</sup> Tirama ehore bero hauna Lota ebamaurina, ia hanona maearima weiakia rauhuhu tikabenakia haukia ekia maha poreporeai aona eatetua. <sup>8</sup> (Pokina bero hauna Lota hanona weia baiatakiai emiaho mara mara ekia babai ki'a eihanakia mai 'urukia eo'o, ba babai weiakia tehore ia aona tebatetuana.) <sup>9</sup> Ua buonai Obiapaka hanona ia timariki aina haukia baihobo aokia aea kebarobo mauri aihonakia hauna e'iobina mai aka ki'a haukia puma ihoaina 'ekana aea kebamiaho aihonakia keaomo bakai wapuna hauna abomo e'iobina. <sup>10</sup> Weiakia ahakiai hanona hauani ena raona akakia ki'a obokia tika'ainakia ia Tirama ena hiabu a'i timariki aina haukia hanona puma rarina katehoai ki'a bahana.

Ba'iobi haukia bai'oikia neiakia hanona tenuako'o mai tiapa, ekia mariki aha'i weiana nuabi haukia kupai temiaho haukia herekiai ti'abi ki'a. <sup>11</sup> Nuabi haukia weiakia ekia tabura mai ekia hiabu hanona teapa'ua ki'a baha ba ba'iobi haukia bai'oikia neiakia, iamo nuabi haukia hanona Obiapaka wairanai ba'iobi bai'oikia ia'i ki'akia 'abina a'i tehinana.

<sup>12</sup> 'A maearima neiakia hanona taba obokia a'i tiobo haukia ti'abi ki'a 'abi ki'a, ihobona mahi weiakia ekia raona aha'i ekia nuataeai mo temiaho haukia 'abakia maearima ia kate a'inakia kateahu 'arinakia paunai terama, ia abomo katepururu matoha 'aki mahikia 'abana. <sup>13</sup> Ekia aka ki'a weiakia tibabai haukia 'arana ihobo katea'ina. Ia hanona mararani tohakiai hauani hoahoakia ki'a obokia ibabaikia hanona tiaonamoai, ba kipokia katoaniani haemo aonai abomo kateba haumaeanimi mai atami katea'i ki'anakia. <sup>14</sup> Aokia hanona maha poreporeai ebonu nabau mai babai ki'a ibabaikiai a'i tibaoao, babi'e aokia a'i tetabura haukia tiaoinakia ki'a 'ekana, aokia teuhore mai ia hanona Tirama ena ururu aonai. <sup>15</sup> Ba'iobi haukia bai'oikia neiakia hanona taeara berona aba tereana mai tiaru 'abaea aru 'abaea Beor nahuna mahabanaui hauna Balam murinai tika'a, ia hanona aka ki'a 'arana

\* 2:4: (4) 'ao tabiri ai tebirinakia

moniai kea'ina hauna eraona'auai ki'a bahana. <sup>16</sup> Ena babai ki'a paunai kipona ena doniki 'abi a'i ne'jobina hauna ehore maearima maeakiai ia erikena, weiana mahabanai hauna aona ea ena ao'abaea weiana ka'ana niaoaina hauna ebapuana.

<sup>17</sup> Maearima neiakia hanona matoha ateate weiakia beikia te'ororo haukia 'abana ekia 'abi anina aha'i 'ao baura taburana 'auhao niabuao abuaona 'abana abara a'i nimaiaina, ba Tirama 'eka ewapura ki'a baha hauna aba eba'oruna ia 'eukia. <sup>18</sup> Ekia apa mai po'o 'abikia tehina abomo maha porepore hoahoakia ki'a obokia tibabai maearima weiakia bariu mo beho 'ekakiai temiaho haukia baiatakiai tikarahi haukia katemue ainakia. <sup>19</sup> Ia ti'abi'uai weiakia hanona ki'a ta'arana a'i katea'i, iamo ia kipokia hanona ki'a akana weiana tibabaina hauna ta'arana ia'ina haukia tiao, pokina taba ha maearima ena mauri nipoki aina raninai ia hanona weiana ta'arana ia'ina haunai niao. <sup>20</sup> Maearima hanopaka maurina 'opunai tikarahi timai eka Obiapaka Bamauri hauna Iesu Keriso te'jobina haeamona temue hanopaka ena ki'a aonai ba nipoki ainakia raninai, maearima uahomakia hanona herekiai keki'a ki'a baha ba 'uainai mauri temiaho aina hauna. <sup>21</sup> Maearima uahomakia hanona taeara berona a'i pate'jobina hanona penamo, ia te'jobina haeamona rauhuhu robena tebenakia hauna herenai tikaobo hanona a'i enamo. <sup>22</sup> Aobero 'abina ia herekiai hauna hanona etoha, "Waeha nemue kipona eaiora hauna niani, mai aiporo e'uere harai 'aki ia haeamona nemue niao tipuai neno tao'atao'a."

### 3

#### *Obiapaka Ena Mai 'Abi'uaina.*

<sup>1</sup> E'u hau ki'ami e, bariu neiana hanona e'u marere ibaruana narerena niwahi heremi, marere kori'uaina mai neiana ohi arerenakia hanona taba neiakiai nabaraona muenimi weiana emi raona raona katebero harai. <sup>2</sup> E'u nuatae hanona 'abi aba wa'i baha 'akinai mahabanai haukia tehinanakia haukia mai rauhuhu 'abikia weiakia eka Obiapaka mai Bamauri hauna ena iuhubeau haukia tehore tebaibeni haukia katoraona 'ininakia.

\* 3:10: (10) 'ao *katewaira tina*.

<sup>3</sup> Kori'uaina kato'iohi haraina weiana rani orekia aokiai bapo'o po'o haukia baikia katekarahi, ia ekia mauri hanona kipokia hauanikia ena nuatae ne'uai ainakia haukia, wai katebapo'onimi, <sup>4</sup> na kate'abi aiho, "Iesu e'abi'uai kemai, uhe? Ba ia ae'e? 'Aba'abaka aba te'ari ore, 'a taba ikoikiai hanona 'ekakiai mo hanopaka erama raninai emai mo bariu." <sup>5</sup> Iamo ekia 'abi hanona a'i tebero 'abi tohana hanona a'i tiraona 'inina, weiana wa'i baha 'akinai Tirama ena 'abiai kupa mai hanopaka terama, ba hanopaka hanona 'akupaka aonai ekara 'au erama mai 'aku ehore hanopaka ekakaiarona. <sup>6</sup> Haeamona bei ehore hanopaka 'ai'aina touai ebapururuna. <sup>7</sup> Tirama ena 'abi hamonamo weiana ehore kupa mai hanopaka bariu temiaho haukia ea'i 'ininakia irubai kebpapururunakia, ia keaomo Tirama a'i timariki aina haukia ekia bakai mai pururu wapunai.

<sup>8</sup> E'u hau ki'ami e, taba hamona neiana hanona a'i katoreana, Obiapaka wairanai wapu hamona mai ihau taha hamona (1,000) hanona ekia haeai aha'i, terarua hanona ihobo. <sup>9</sup> Obiapaka hanona a'i emahari ena 'abi'uai akakia ibabaikiai, baikia tiraonana 'abana aha'i, ia hanona oi nibahuaini'o pokina a'i nenuatae hau ha a'i ke'akauma, ia nenuatae maearima ikoikiai ekia ki'ai kateraona kabe.

<sup>10</sup> 'A Obiapaka ena rani kemai hanona matoha bainao hauna 'abana, rani weianai hanona 'uru rarina 'akina kebua aonai kupa kate'akauma, kupa aona tabakia ikoikiai irubai kateara, haeamona hanopaka mai ahanai tabakia ikoikiai kate'akauma.\* <sup>11</sup> Taba ikoikiai hanona ua katepururu aiho raninai, wai hanona maearima aea homamiai patoao? Emi mauri hanona katerobe mai Tirama imarikiaina maurinai katomiaho. <sup>12</sup> Tirama ena mai wapuna to'imana aonai katoaka tabura wapu weiana ena mai kenoanoa. Wapumo weianai hanona kupa kate'ara 'akauma mai kupa tabakia iruba hiabunai kateobo. <sup>13</sup> Ia aika hanona Tirama e'abi'uai aina hauna naha'imana, weiana hanona kupa mai hanopaka mahamahana aka bero haukia mo katemiaho aina 'ekana.

<sup>14</sup> Ua buonai, e'u hau ki'ami e, wapu weiana to'imana aonai katoaka tabura, ki'a a'i katobabai mai a'i katobeho Tirama wairanai haeamona mai baibuami ia kipokia katomiaho. <sup>15</sup> Katoraona 'inina eka Obiapaka ena bakiroai hanona aika kebamaurinaka. Uaho'abaka eka raona'au hauna Paulo aobero weiana Tirama ebena haunai 'abi ihobona erere benimi. <sup>16</sup> Ena marere ikoinai aokiai taba neiakia robakia eahunakia, taba baika hanona tepahihi mai obokia a'i kahaobo, weiana maearima ekia 'iobi teko'iko'i haukia mai aokia a'i tepahihi haukia tihore 'abi anina tehina ku'a bainaina ihobona Puka robena 'abina baika tibabaina 'abana. Weiana tibabaina hanona ia kipokia kateba pururunakia.

<sup>17</sup> Ua buonai, uaho'aba'u ki'ami e, wai neiana to'iobina hanona kato'ima 'ima harainimi, weiana rauhuhu tikabena haukia ekia beho a'i temeaba kaparenimi, a'i tomo'eho marikina. <sup>18</sup> Ia eka Obiapaka mai Ibamaurika hauna Iesu Keriso ena aoko'o hoana mai ia i'ioibinai katoapa'ua. Nabahuba'ari nuabi hanona ia herenai bariu keao mo banaibanai. Amen.



## Marere Kori'uaina IOANE Ererena Hauna

### *Puka Aona Irerena 'Abina*

Marere neiana ena poki hanona rua. Ioane nenuatae a'ikakauma haukia kebarainakia, weiana ia mai Tirama aika Hamaka, mai Nahuna Iesu Keriso ohi kipokia aokia kehamomo. Ibaruana hanona ia a'i nenuatae bai'oi haukia timai ti'oinakia ekia a'ikakauma Tirama herenai hauna katea'i parena. Maearima neiakia ekia hoahoa hanona wapurai temiaho ba na ti'abi aiho, "Hanopaka neiana tabakia hanona a'i tenamo. Iesu hanona Tirama nahuna, ua buonai ia maearimai a'i kemai, hanopaka neiana tabakia kipokia a'i katemiaho haeamo, aika maearima nahababaina 'abana hanona a'i ketai 'apuana." Haeamona ti'abi, "Maearima ha nenuatae kemiaho harai Tirama herenai raninai, ia hanona hanopaka neiana tabakia a'i keaonamo ainakia, weiakia paukia aona a'i kearo'ari."

Marere neiana ererena hanona ba'iohi neiakia aiakia tibahuai haukia nibaki'a tohanakia. Ia ni'abi Iesu hanona emai ia hanona maearima tohana, ba weiakia Iesu tia'ikakaumana haukia hanona Tirama katenuataeai tohana mai maearima abomo kateonamo ainakia.

### *Puka Paipana Apa'uakia*

- a. Roba iahu. (1.1-4)
- b. Ea mai Wapura. (1.5—2.29)
- c. Tirama nahuna mai tiaporo nahuna. (3.1-24)
- d. 'Abi tohana mai beho. (4.1-6)
- e. Raona'au hoana. (4.7-21)
- f. A'ikakauma ena hiabu. (5.1-21)

### *Mauri 'Abina.*

<sup>1</sup> Au bariu pou narere benimi hanona hau weiana popouna 'akinai emiaho hauna, weiana hauna haiamaiai taona, mahamaiai taihana, mahamai tohanai taiha haraina mai imamaiai ta'i 'apuana. Ia hanona Mauri 'Abina Keriso weiana mauri pokina hauna. <sup>2</sup> Mauri neiana hanopakai ewaira tina. Mauri banaibanai hauna Keriso neiana taihana paunai

\* 2:2: (2) 'ao hanopaka maikoinai

pouna tahinana tairoro aina heremiai. Ia hanona Hamana ohi temiaho ba heremaiai ewaira tina. <sup>3</sup> Ai taba taihana abomo 'uruna taona hauna tairoro aina heremiai hanona wai mai ai kipokia kahabahaemo. Eka bahaeamo hanona Hamaka mai Nahuna Iesu Keriso aba aika kipokia. <sup>4</sup> Ai tarere benimi ena poki hanona kipokia kahaonamo haeamo.

### *Tirama Hanona Ea.*

<sup>5</sup> Pou Keriso herenai taona hauna bariu tairoro aina heremiai hanona neiana. Tirama hanona ea, Ia aonai hanona wapura ha aha'i 'akina. <sup>6</sup> Aika paha'abi Tirama kipokia nahaba haeamo iamo wapura aonai nahaka'a raninai aika hanona nahabai'oi mai Tirama ena 'abi tohana a'i nahaka'aina. <sup>7</sup> Ia Tirama ea aonai nemiaho 'abana aika eai nahaka'a raninai aika hanona 'abaka kipokia kahabahaemo, Nahuna Iesu aruarunai eka ki'a ikoikiai neutu obonakia.

<sup>8</sup> Aika paha'abi eka ki'a aha'i raninai aika kipoka nahabapo'onaka abomo Tirama ena 'abi tohana hanona aokai aha'i. <sup>9</sup> Ia aika eka ki'a Tirama wairanai kahahina pounakia raninai ia hanona aia ibabua 'auna hauna mai bero hauna ba eka ki'a kehina haonakia abomo eka beho ikoikiai keutu obonakia. <sup>10</sup> Aika paha'abi ki'a ha a'i hababaina raninai Tirama hanona bai'oi haunai nahabaona, abomo ena 'abi hanona aokai aha'i 'akina.

## 2

### *Keriso Hanona Aika Ibaraika Hauna.*

<sup>1</sup> Naha'u ki'ami e, au neiana narerena niwahi heremi hanona wai ki'a ha a'i katobabaina paunai. Ia hau ha ki'a nibabaina raninai aika ibaraika hauna ha nemiaho Hamana kehina bena aika paukai, ia hanona bero hauna Iesu Keriso. <sup>2</sup> Ia kipona ena mauri ebaibeni bairarao tabanai eao eka ki'a ihina haona paunai, aika ikupaiaka mo paukai aha'i ia maearima ikoinai\* ekia ki'a paunai.

<sup>3</sup> Aika Tirama ehina benaka 'abikia nahaka'a ainakia raninai kaha'iohina aika hanona Tirama ha'iohina.

<sup>4</sup> Hau ha pe'abi petibaha, "Au Tirama a'iohina," ia Tirama ena rauhuhu a'i nika'ainakia raninai, hau weiana hanona bai'oi hauna, ia aonai Tirama ena 'abi

tohana hanona a'i nemiaho. <sup>5</sup> Hau ha Tirama ena 'abi nika'ainakia hauna hanona Tirama niraona'auai† tohana. Weianai kaha'iobi haraina aika hanona Tirama herenai nahamiaho. <sup>6</sup> Hau ha ni'abi ia Tirama herenai nemiaho hauna hanona Iesu emauriaina maurina ihobonai kemauro.

*Rauhuhu 'Abina Mahamahana.*

<sup>7</sup> E'u hau ki'ami e, rauhuhu 'abina neiana narerena niwahi hauna hanona mahamahana aha'i, ia rauhuhu 'abina 'ai'aina aba 'uainai toa'ikakauma aonai toa'ina, rauhuhu 'abina 'ai'aina neiana hanona aba to'ona 'abina. <sup>8</sup> Iamo rauhuhu 'abina neiana hanona mahamahana, anina tohana hanona Keriso mai wai heremiai aba nahaihana, pokina wapura hanona aba nikapare, ea tohana aba nirara.

<sup>9</sup> Hau ha ni'abi ia hanona ea aonai nemiaho, iamo uaho'abana 'arina a'i ni'ari hauna hanona bariu wapura aonai nemiaho ohomo. <sup>10</sup> Hau ha uaho'abana niraona'au aina hanona ea aonai nemiaho, ba herenai ki'a aha'i, hau ha a'i kebabehona. <sup>11</sup> Ia hau ha uaho'abana 'arina a'i ni'ari hauna hanona wapura aonai nemiaho mai wapura aonai nika'a. Wapura ehore ia mahana aba ekaiabunakia buonai, aeana niao hanona a'i ne'iobina.

<sup>12</sup> Naha'u ki'ami e,  
narere benimi ena poki hanona  
emi ki'a Keriso atanai  
aba ihina hao.

<sup>13</sup> Hamamai haumi e,  
narere benimi ena poki hanona  
wai hau weiana popounai  
emiaho emai mo bariu hauna  
aba to'iobina.

Hau 'aru'arumi e,  
narere benimi ena poki hanona  
wai hau ki'a obona aba  
toba'ehona.

<sup>14</sup> Naha'u e,  
narere benimi ena poki hanona  
wai Hamaka to'iobina.  
Hamamai haumi e,  
narere benimi ena poki hanona  
wai hau weiana popounai  
emiaho emaimo bariu hauna  
aba to'iobina.

Hau 'aru'arumi e,  
narere benimi ena poki hanona

tutabura Tirama ena 'abi  
wai aomia nemiaho ba  
hau ki'a obona aba toba'ehona.

<sup>15</sup> Hanopaka mai aonai temiaho tabakia ikoinai a'i katoraona'au ainakia, iamo hau ha hanopaka niraona'au aina raninai, ia hanona Hamaka a'i niraona'auai tohana. <sup>16</sup> Pokina hanopaka aona tabakia ikoikiai hanona hauani ena nuatae ki'a tabakia katebabai, maha ena nuatae ki'a tabakia kateiha, mai obia tabakia kateapainakia, uahomakia ikoikiai hanona Hamaka herenai a'i timai ia hanopaka herenai timai. <sup>17</sup> Hanopaka mai aona inuatae aina tabakia ikoikiai aba ti'akauma ore, ia Tirama ena nuatae akana tibabaina haukia hanona katemauro banaibanai.

*Keriso Ena 'Ou Hauna.*

<sup>18</sup> Naha'u e, hanopaka kepua ranina hanona aba ekara'au. Pou aba tona Keriso ena 'ou hauna nimai, ia bariu Keriso ena 'ou haukia bo'okia hanona aba tewaira tina. Ua buonai aika ha'iobina rani puana hanona aba ekara'au. <sup>19</sup> Maearima weiakia hanona herekai tekarahi pokina ia hanona aika 'abaka tohakia aha'i. Ia aika 'abaka haukia raninai, aika kipokia pahamiaho haeamo. Iamo ekia ka'a oboai kaha'iobi haraina ia hanona aika 'abaka aha'i.

<sup>20</sup> Ia wai hanona Auba Robe weiana Robe hauna Keriso ebaibeni hauna aba toa'ina aomia, ua buonai wai ikoimiai Tirama ena 'abi tohana to'iobina.‡ <sup>21</sup> Au wai narere benimi hanona Tirama ena 'abi tohana a'i to'iobina paunai aha'i, ia wai hanona Tirama ena 'abi tohana aba to'iobina. Ba wai aba to'iobina bai'oi hanona Tirama ena 'abi tohana herenai a'i nimai. <sup>22</sup> Bai'oi hauna hanona tai? Ia hauna ni'abi Iesu hanona Keriso aha'i. Maearima uahomana hanona Keriso ena 'ou hauna, ia hanona Hama mai Nahu ohi nebuniainakia. <sup>23</sup> Hau ha Nahu nebuniaina hauna hanona ia herenai Hama aha'i. Hau ha Nahu nibatohana hauna hanona Hama abomo ia herenai.

<sup>24</sup> Popounai 'abi tona hauna hanona aomia kemiaho. Tona 'abina weiana katoka'aina raninai, wai hanona Nahuna aonai mai Hamana aonai katomiaho. <sup>25</sup> Neiana hanona Keriso kipona e'abi'uai aika 'euka, mauri banaibanai kebenaka.

† 2:5: (5) 'ao Tirama ena raona'au ia aonai ‡ 2:20: (20) 'ao wai Tirama ena 'abi tohana ikoinai to'iobina.

<sup>26</sup> Narere benimi weiakia ekia nuatae kate'oinimi haukia robakia ahuna. <sup>27</sup> Ia wai hanona Keriso ehore Auba Robe ebenimi aomia nemiaho, ua buonai maearima ha a'i keba 'iobinimi re'a abetaina. Pokina Auba Robe hanona taba ikoinai niba'iobinimi, ena ba'iobi hanona tohakia, ia a'i nibai'oi. Auba Robe eba'iobinimi ihobonai rani ikoinai Keriso aonai katomiaho.

<sup>28</sup> Naha'u ki'ami e, bariu Keriso aonai katomiaho, pokina ia ena mue mai raninai aika hanona kahatabura abomo a'i kaha-haumaea ia wairanai. <sup>29</sup> Wai to'iobina Keriso hanona bero hauna raninai, kato'iobi haraina maearima weiakia bero akakia tibabai haukia ikoikia hanona Tirama nahuna.

### 3

#### *Tirama Nahunai Nahaeao Hauka.*

<sup>1</sup> Hamaraona harai, Hamaka ena raona'au herekai eapa'ua ki'a baha ba eaparinaka aika hanona Tirama nahuna. Aika hanona ia nahuna tohaka. Hanopaka haukia a'i te'iobinaka ena poki hanona ia Tirama a'i te'iobina paunai. <sup>2</sup> E'u hau ki'ami e, bariu aika hanona Tirama nahuna, ia aika maearima aehomaka hanona a'i niwaira tina harai baha, iamo aika ha'iobina Keriso kewaira tina raninai\* aika hanona ia 'abanai kahaeao, pokina ia tohana kahaihana. <sup>3</sup> Maearima ikoinai Keriso herenai buabeni neianai temiaho haukia hanona kipokia aokia ki'a keaha'i ihobona Keriso aona ki'a eaha'i 'abana.

<sup>4</sup> Hau ha ki'a nibabaina hanona Tirama ena rauhuhu ni'oatana, pokina ki'a hanona rauhuhu ni'oatana. <sup>5</sup> Ia wai aba to'iobina Keriso ewaira tina hanona ki'a kea'i pare, ia aonai hanona ki'a ha aha'i. <sup>6</sup> Ua buonai hau ha Keriso ohi temiaho oioi hauna hanona ki'a a'i nibabai to'ona. Ia hau ha ki'a nibabai to'ona hauna hanona Keriso a'i eiha tinana abomo a'i e'iobina.

<sup>7</sup> Naha'u ki'ami e, hau ha beho babai 'ekakiai a'i meaoainimi. Hau ha aka berona nibabaina hauna hanona ebero, ihobona Keriso ebero 'abana. <sup>8</sup> Ki'a nibabai to'ona hauna hanona Tiaporo 'euna, pokina Tiaporo hanona aba popounai ki'a ebabaina emai mo bariu. Tirama nahuna

ewaira tina ena poki hanona neiana, Tiaporo ena aka kebabururuna. <sup>9</sup> Hau ha Tirama nahunai niao hauna hanona ki'a a'i nibabai to'ona, pokina mauri mahamahana weiana Tirama herenai emai hauna ia aonai nemiaho. Ia Tirama 'eunai erama paunai ki'a a'i kebabai to'ona. <sup>10</sup> Weiana Tirama nahuna mai Tiaporo nahuna ba-iatakia kaha'iobi haraina. Hau ha aka berona a'i nibabaina 'ao uaho'abana a'i niraona'au aina hanona Tirama nahuna aha'i.

#### *Aika Ha Ha Kaharaona'au ainaka.*

<sup>11</sup> 'Uainai toa'ikakauma aonai pou tona hauna neiana: Aika ha ha kaha raona'au ainaka. <sup>12</sup> Kaino 'abanai a'i katoao, ia hanona Tiaporo ena maearima, kipona hatina Abela eahu 'arina. Taba buonai Kaino Abela eahu 'arina? Pokina ia ena hoahoa hanona teki'a, ia hatina ena hoahoa hanona tebero.

<sup>13</sup> Uaho'aba'u e, hanopaka haukia 'arimi a'i kate'ari re'a, a'i katota'u ta'u huri. <sup>14</sup> Aika uaho'abaka naharaona'au ainakia paunai ha'iobina aika hanona 'ari aonai aba hakarahi mauri mahamahana aonai hatoto. Ia hau ha ena raona'au aha'i hauna hanona 'ari aonai nemiaho ohomo. <sup>15</sup> Uaho'abana 'arina a'i ni'ari hauna hanona ahuhahu hauna, wai to'iobina ahuhahu hauna aonai hanona mauri bannaibanai a'i nemiaho. <sup>16</sup> Keriso ena mauri ebaibeni aika paukai. Neianai aika raona'au tohana hanona taba ha'iobina. Ua buonai aika abomo eka mauri kahabaibeni uaho'abaka paukia. <sup>17</sup> Herenai taba tebo'o hauna uaho'abana neuraru hauna neihana iamo a'i nibaraina raninai, ha'iobina Tirama ena raona'au hanona ia aonai a'i nemiaho. <sup>18</sup> Naha'u ki'ami e, eka raona'au hanona 'abiai mo mai pinakai mo a'i kahahina 'abaeana, ia eka raona'au hanona eka hoahoa tohanai kahabaiha baiha aina.

#### *Kahanuako'o Tirama Wairanai.*

<sup>19</sup> Taeara neianai kaha'iobina aika hanona Tirama ena 'abi tohana kipokia nahamiaho, haeamona aoka ketabura Tirama wairanai. <sup>20</sup> Aoka kehinabe ki'anaka re'a, aika ha'iobina Tirama hanona eapa'ua ki'a baha ba aika aoka mai ha'iobi tabakia maikoina, abomo ia hanona taba ikoikia ne'iobinakia. <sup>21</sup> E'u hau ki'ami e, aika aoka a'i kehinabe

\* 3:2: (2) 'ao ua kehoma raninai

ki'anaka raninai aika mai taburaka Tirama wairanai kahakoroti. <sup>22</sup> Ba herenai taba ikoinei kahanoi haukia kebenaka, pokina ena rauhuhu 'abina nahaka'aina mai ibaonamona akana nahababaina. <sup>23</sup> Tirama ena rauhuhu 'abina hanona neiana, aika Ia Nahuna Iesu Keriso atana kaha'ikakaumana mai ehina benaka 'abana, ha ha kaharaona'au ainaka. <sup>24</sup> Tirama ena rauhuhu 'abina nika'aina hauna hanona Tirama aonai nemiaho, Tirama abomo ia aonai nemiaho. Tirama Auba Robe ebenaka paunai, aika ha'iohina Tirama hanona aika aokai.

## 4

### *Tirama Aubana Mai Auba Ki'a Obona.*

<sup>1</sup> E'u hau ki'ami e, Auba Robe tea'ina na tiho haukia ikoikia ekia 'abi a'i katoa tohanakia, ia katohobo 'uainakia kato'iohina auba weiana hanona Tirama herenai emai 'ao. Pokina mahabanai haukia bai'oikia bo'okia hanopakai aba tewaira tina 'eka maikoinai. <sup>2</sup> 'A wai Tirama ena Auba Robe ea'ina hauna hanona taeara neianai ko'iohina: Hau ha kehina pouna Iesu Keriso hanona hau-niai emai hanopakai raninai, auba weiana ia ea'ina hauna hanona Tirama herenai emai. <sup>3</sup> Ia auba ha Iesu nebuniaina hanona Tirama herenai a'i emai. Auba weiana hanona Keriso ena 'ou hauna Tia-poro herenai emai. Pouna tona kemai ia aba emai bariu hanopaka neiana aonai.

<sup>4</sup> Naha'u ki'ami e, wai hanona Tirama 'euna, mahabanai haukia bai'oikia toba'ehonakia, pokina Tirama ena Auba aomia nemiaho hauna etabura ki'a baha ba tiaporo weiana hanopaka haukia herekiai. <sup>5</sup> Ia mahabanai bai'oikia hanona hanopaka 'euna, ua buonai hanopaka 'abikia mo tehinanakia hanopaka haukia ia aiakia tiona. <sup>6</sup> Ia aika hanona Tirama 'euna, hau ha Tirama e'iohina hauna hanona aiaka keona, ia hau ha Tirama 'euna aha'i hauna hanona aiaka a'i keona. Ihaiha nahomanai 'abi tohana aubana mai bai'oi aubana hanona aba kaha'iohi ainakia.

### *Tirama Hanona Raona'au.*

<sup>7</sup> E'u hau ki'ami e, ha ha hamaraona'au ainaka, pokina raona'au hanona Tirama herenai emai. Niraona'au hauna hanona Tirama nahunai niao, abomo Tirama ne'iohina. <sup>8</sup> 'A a'i niraona'au hauna

hanona Tirama a'i e'iohina, pokina Tirama hanona raona'au. <sup>9</sup> Tirama hanona ena raona'au na ebaiha aihonaka, Nahuna hamo hamona euhuna emai hanopakai, weiana ia paunai aika kahamauri. <sup>10</sup> Raona'au tohana hanona neiana: Aika Tirama a'i haraona'au aina, ia Tirama aika eraona'au ainaka paunai Nahuna euhuna emai aika eka ki'a ihina haona tabanai eao.

<sup>11</sup> E'u hau ki'ami e, Tirama hanona na eraona'au aihonaka buonai, aika abomo 'abaka ha ha ua kaharaona'au aihonakia. <sup>12</sup> Hau ha Tirama a'i eiha 'apuana, iamo aika 'abaka ha ha kaharaona'au ainakia raninai, Tirama hanona aika aokai nemiaho, ena raona'au hanona aba nitabura 'au aika aokai.

<sup>13</sup> Tirama Auba Robe ebenaka buonai, ha'iohina aika hanona Tirama aonai nahamiahohaeamona ia abomo aika aokai nemiaho. <sup>14</sup> Tirama Nahuna euhuna emai hanopakai maearima ibamaurikia haunai eao, weiana ai aba taihana mai tahina pouna. <sup>15</sup> Hau ha ena 'abiai keba tohana Iesu hanona Tirama Nahuna raninai, Tirama hanona ia aonai nemiaho, ia abomo Tirama aonai nemiaho. <sup>16</sup> Tirama niraona'au ainaka hauna ha'iohina mai naha'ikakaumana.

'Abi tohana Tirama hanona raona'au. Hau ha maearima niraona'au aina hauna hanona Tirama aonai nemiaho, Tirama abomo ia aonai nemiaho. <sup>17</sup> Taeara neianai raona'au aokai aba nitabura 'au, ba weianai aika hanona a'i kahata'u Tirama ena bakai wapuna aonai, pokina hanopaka neiana aonai eka mauri hanona Keriso ena mauri ihobona. <sup>18</sup> Tirama ena raona'au aonai hanona a'i kahata'u, Tirama ena raona'au taburana hanona ta'u maikoina neu'u ahinakia, pokina ta'u aonai puma raonana nemiaho. Ua buonai hau ha nita'u hanona ia aonai raona'au a'i nitabura harai baha.

<sup>19</sup> Aika ha ha 'abaka naharaona'au ainakia pokina Tirama aika eraona'auai 'uainaka paunai. <sup>20</sup> Hau ha ni'abi ia Tirama niraona'au aina iamo uaho'abana 'arina a'i ni'ari raninai, ia hanona bai'oi hauna. Hau ha uaho'abana nahaihana hauna a'i niraona'au aina hanona Tirama a'i nahaihana hauna keraona'au aina a'i ketaina. <sup>21</sup> Keriso rauhuhu 'abina ebenaka hauna neiana: Tirama niraona'au



aina hauna hanona uaho'abana abomo keraona'au aina.

## 5

*A'ikakauma Haukia Hanopaka Ena Hoahoa Tiba'ehonakia.*

<sup>1</sup> Maearima weiana Iesu hanona Keriso nia'ikakaumana hauna hanona Tirama nahuna, Hama niraona'au aina hauna hanona nahuna abomo niraona'au ainakia. <sup>2</sup> Tirama naharaona'au aina mai ena rauhuhu 'abikia nahaka'a ainakia raninai, neianai kaha'iobi haraina aika hanona Tirama nahuna naharaona'au ainakia. <sup>3</sup> Aika Tirama naharaona'au aina hanona ena rauhuhu 'abikia kahaka'a ainakia. Abomo ena rauhuhu 'abikia hanona a'i tepahihi aika herekai. <sup>4</sup> Pokina Tirama nahuna ikoinai hanona hanopaka hiabuna tiba'ehona. Aika Tirama naha'ikakaumana, hoahoa neianai hanopaka ena hiabu nahaba'ehona.

<sup>5</sup> Ua buonai hanopaka hiabuna tiba'ehona haukia hanona weiakia tia'ikakauma Iesu hanona Tirama Nahuna haukia mo ikupaiakia.

*Tirama Ehore Nahuna Pouna Ehinana.*

<sup>6</sup> Iesu Keriso hanona beiai mai aruaruai emai, beiai e'uere robe mai matiu ibiri ropo 'arunai e'ari. Ia hanona beiai mo a'i emai, ia beiai mai aruaruai emai. Auba Robe abomo nibatohana, pokina Auba Robe hanona Tirama ena 'abi tohana. <sup>7</sup> Ua buonai teaihau hanona Iesu tibatohana: <sup>8</sup> Auba Robe, bei, mai aruaru,\* teaihau ekia 'abi hanona hamona, Iesu hanona Tirama Nahuna.

<sup>9</sup> Aika maearima tebatohana 'abina naha'i taeanakia, ia Tirama ebatohana 'abina hanona eapa'ua ki'a baha pokina ia hanona Tirama, ebatohana 'abina hanona ia Nahuna pouna. <sup>10</sup> Maearima ha Tirama Nahuna nia'ikakaumana hauna hanona batoha 'abina neiana ia aonai nemiaho. Tirama a'i nia'ikakaumana hauna hanona Tirama bai'oi haunai nibaona, pokina maearima weiana hanona Tirama ebatohana 'abina Nahuna herenai e'uahina hauna a'i nia'ikakaumana. <sup>11</sup> Tirama ebatohana 'abina hanona neiana: Tirama hanona mauri banaibanai ebenaka, ba mauri neiana hanona Nahuna Iesu Keriso aonai nemiaho. <sup>12</sup> Tirama Nahuna ea'ina hauna hanona mauri aba ea'ina, 'a Tirama

Nahuna a'i ea'ina hauna hanona mauri a'i ea'ina.

*Mauri Banaibanai.*

<sup>13</sup> Tirama Nahuna atana tua'ikakaumana haumi marere neiana narere benimi, pokina wai kato'iobina mauri banaibanai hanona aba toa'ina. <sup>14</sup> Aika hanona tabura neiana ha'ina Tirama wairanai, aika ia ena nuatae ihobonai kahanoina raninai aiaka niona. <sup>15</sup> Aika ha'iobina Tirama herenai taba taba kahanoi ainakia hanona aiaka niona raninai, ha'iobi haraina hanoi tabakia hanona aba ha'inakia.

<sup>16</sup> Hau ha uaho'abana herenai ki'a weiana a'i keba'ari baihana hauna neihana raninai ahanai kebahuba'ari, ba Tirama kehore uaho'abana weiana mauri kebena. Au maearima weiakia ekia ki'a a'i keaoainakia 'ari 'ekana hauna na'uahina. Ia maearima baika ki'a ha tibabaina weiana keaoainakia 'ari 'ekana. Au ki'a weiana ahanai kebahuba'ari hauna robana a'i nahuna. <sup>17</sup> Beho babai ikoinai hanona ki'a, ia ki'a baika hanona a'i tiaoinakia 'ari banaibanai 'ekana.

<sup>18</sup> Aika ha'iobina Tirama nahunai tiao haukia hanona ki'a a'i tibabai to'ona. Tirama Nahuna ni'aeabunakia, hau ki'a obona ia a'i kea'i 'apuanakia. <sup>19</sup> Ha'iobina aika hanona Tirama nahuna, ia hanopaka maikoina hanona hau ki'a obona ena hiabu aonai.

<sup>20</sup> Abomo aika ha'iobina Tirama Nahuna emai hanona aoka ebaeana, weianai aika Tirama tohana kaha'iobina, haeamona aika hanona Tirama tohana aonai mai Nahuna Iesu Keriso aonai nahamiaho. Iesu Keriso hanona Tirama tohana abomo ia hanona mauri banaibanai pokina.

<sup>21</sup> Naha'u ki'ami e, bai'oi tiramakia herekia kato'ima 'ima harainimi herekia katokapare.

\* 5:8: (8) baika te'abi, Hamana mai 'abi tohana mai Auba Robe teaihau

## Marere Ibaruana IOANE Ererena Hauna

### *Puka Aona Irerena 'Abina*

Marere neiana hanona 'kiro hauna' ererena eao 'babi'e ha mai nahuna' kipokia herekia. Babi'e neiana ibabataina hanona a'ikakauma maearimakia. Marere ererena ena nuatae hanona ia ha ha kateraona'au ainakia, haeamona ba'iobi haukia bai'oikia weiakia rani ikoinai Tirama ena 'abi tia'i ki'anakia haukia herekiai kate'ima'ima harainakia.

### *Puka Paipana Apa'uakia*

- a. Roba iahu. (1-3)
- b. Kaharaona'au. (4-6)
- c. Ba'iobi haukia bai'oikia. (7-11)
- d. 'Abi orena. (12-13)

### *Banamo 'Abina.*

<sup>1</sup> Au, Ioane Tirama ena marea ekia kiro hau'u, Tirama etina'ani'o babi'emu nahumu kipokia narere benimi, wai naraona'au ai tohanimi, aumo ikupaia'u aha'i, ia Tirama ena 'abi tohana te'jobina haukia ikoikiai abokiamo wai tiraona'au ainimi. <sup>2</sup> Pokina Tirama ena 'abi tohana hanona aika aokai nemiaho, haeamona aika herekai kemiaho keaomo banaibanai. <sup>3</sup> Raona'auai mai 'abi tohanai nahamiaho hanona Tirama aika Hamaka mai Nahuna Iesu Keriso katehore baraibarai apa'uana, aoko'o mai baibua katebenaka.

### *Ha Ha 'Abaka Kaharaona'au ainakia.*

<sup>4</sup> Ao'u enamo ki'a baha pokina pou aona nahumu baika hanona Hamaka ehina benaka akana kahababaina ihobonai Tirama ena 'abi tohanai temiaho. <sup>5</sup> Ua buonai, babi'e ki'amu e, bariu au wai narere benimi hanona rauhuhu 'abina mahamahana aha'i, ia rauhuhu 'abina aba 'uainai ha'ikakauma aonai haona hauna, ba au oi nanoini'o, aika ikoikai hanona ha ha 'abaka kaharaona'au ainakia. <sup>6</sup> 'Abaka kaharaona'au ainakia hanona ihobona aika Tirama ena rauhuhu 'abikia kahaka'a ainakia 'abana. Ena rauhuhu 'abina neiana hanona aba popouna 'uruna tona, wai ikoimiai hanona raona'au aonai katomiaho.

### *Keriso Ena 'Ou Haukia.*

<sup>7</sup> Bai'oi haukia bo'ona aba tekarahi hanopaka maikoinai. Maearima weiakia hanona Iesu Keriso hauaniai emai hauna a'i tibatohana. Maearima uahomakia hanona bai'oi haukia mai Keriso ena 'ou haukia. <sup>8</sup> Kipomi kato'ima 'ima harainimi, weiana taba weiakia buokiai haka 'ari haukia ikoikiai a'i kato'ubo ainakia, weianai arami maikoina katoa'ina. <sup>9</sup> Hau ha Keriso ena ba'iobi a'i nika'aina mai ahanai ba'iobi haeai nihore 'auna hauna hanona herenai Tirama aha'i. 'A hau ha Keriso ena ba'iobi nika'aina hauna hanona herenai Hamana mai Nahuna ohi temiaho. <sup>10</sup> Ua buonai, hau ha kemai heremi, ba'iobi neiana a'i kemai aina rani-nai, a'i katoa'i taena emi itu aokiai, haeamona banamo 'abina ha a'i katohinana ia herenai. <sup>11</sup> Pokina hau ha maearima weiana ea'i taena hauna hanona hau weiana ohi ena aka ki'a tibabai haeamona.

### *Banamo 'Abina Orena.*

<sup>12</sup> Kahina beni'o 'abikia hanona ebo'o, ia marere hamonai karerena hanona a'i nanuatae. E'u buabeni hanona kawahi kaihani'o ba hararua kahabaiwaira kaha'abi'abi, weiana eka 'abi kahabaore harainakia mai aonamoka.

<sup>13</sup> Uaho'abamu Tirama etina'ana babi'ena nahuna ekia banamo 'abina tibenio.

## Marere Ibaihauna IOANE Ererena Hauna

### *Puka Aona Irerena 'Abina*

Marere neiana hanona 'kiro hauna' ererena eao haumo ha atana Gaio hauna herena. Ia hanona Gaio ebanamona pokina Gaio rani ikoinai a'ikakauma haukia ebarainakia. Ia Gaio ehina bena maearima ha weia, atana Diotrefe, ia hanona apa hauna weiana herenai ke'ima'ima haraina.

### *Puka Paipana Apa'uakia*

- a. Roba iahu. (1-4)
- b. Gaio ebanamona. (5-8)
- c. Diotrefe keihana. (9-10)
- d. Demeterio keraonana. (11-12)
- e. 'Abi orena. (13-15)

### *Banamo 'Abina.*

<sup>1</sup> Au, Ioane, Tirama ena marea ekia kiro hau'u, marere narerena niwahi e'u hau Gaio ki'amu heremu, au hanona naraona'auai tohani'o.

<sup>2</sup> E'u hau ki'amu e, au a'ioibina aubamu ena mauri hanona enamo, ba nabahuba'ari weiana ihobonai taba ikoikiai hanona katenamo oi heremuai, haeamona oi hanona mai taburamu komiaho harai. <sup>3</sup> Uaho'abaka baika temai oi Tirama ena 'abi tohana nua'i taeana mai taearanai nuka'a hauna pouna tehina bena'u raninai ao'u enamo ki'a baha. <sup>4</sup> Au naha'u Tirama ena 'abi tohana taearanai tika'a poukia nao'o hanona e'u aonamo niapa'ua ki'a baha haeamona aonamo weiana hanona e'u aonamo ikoinai etara haonakia.

### *Gaio Hoahoa Namona Ebabaina.*

<sup>5</sup> E'u hau ki'amu e, uaho'abaka weiakia a'i o'ioibi harai haukia\* baika obarainakia hanona enamo, weiana hanona emu a'ikakauma ai aka namona obabaina. <sup>6</sup> Ia tehore emu raona'au pouna tehinana Tirama ena marea maearimasia neia haukia herekiai hoahoa namona obabaina. Kobarai harainakia ekia harima kateao aonai Tirama aona ibanamona taearanai. <sup>7</sup> Pokina maearima weiakia hanona Keriso ena aka paunai ekia harima tea'iramana tika'a, iamo a'i

tia'ikakauma haukia herekiai hanona taba ha a'i titabu ahina. <sup>8</sup> Ua buonai aika abomo ia kahabarainakia, weiana kahababaina aonai, aika hanona Tirama ena 'abi tohana akana aba ia kipokia nahababaina.

### *Diotrefe Hoahoa Ki'a Obona Ebabaina.*

<sup>9</sup> Au aka neianai 'abi baika marere ha ai arerena ewahi Tirama ena marea maearimasia weiakia herekiai, iamo Diotrefe, ia hanona nenuatae ki'a baha Tirama ena marea maearimasia ekia 'uai haunai keao, ai aiamai a'i nia'i taeana. <sup>10</sup> Ua buonai au kawahi raninai, Diotrefe naia taba nibabaina hauna robana kahuna, heremai ai ni'abi ki'a mai nibai'oi. Ia weiana mo aha'i ia nihore uaho'abaka tiwahi hanona a'i nia'i taeanakia, abomo weiakia tenuatae uaho'abaka katea'i taeanakia hanona niba'oronakia mai Tirama ena mareai nibakarahinakia.

### *Demeterio Aka Namona Ebabaina.*

<sup>11</sup> E'u hau ki'amu e, babai ki'a obokia ua homakia a'i kobabai, ia babai namokiamo kobabai. Babai namokia nibabai hauna hanona Tirama 'euna. Ia weiana babai ki'a obokia nibabai hauna hanona Tirama a'i e'ioibi 'apuana.

<sup>12</sup> Maearima ikoikiai Demeterio ena babai harai pouna tehinana haeamona Tirama ena 'abi tohana nihore ia ena babai harai weiana nibatohana. Ai abomo ia ena babai harai poukia tahina, wai to'ioibina ai emai 'abi hanona tohakia.

### *Banamo 'Abina Orena.*

<sup>13</sup> Kahina beni'o 'abikia hanona tebo'o, ia marere hamonai karerena hanona a'i anuatae. <sup>14</sup> E'u buabeni hanona rani a'i kehoma'a hanona kawahi kaihani'o ba hararua kahabaiwaira kaha'abi'abi.

<sup>15</sup> Nabahuba'ari baibua heremuai kemiaho. Eka hau neia haukia ekia banamo 'abikia teuhunakia heremu. Eka hau naia haukia emai banamo 'abikia ha ha kobenakia.

\* 1:5: (5) 'ao weiakia tekaokao Keriso pouna tehinana haukia

## Marere IUDA Ererena Hauna

### *Puka Aona Irerena 'Abina*

Marere neiana ena poki hanona a'ikakauma haukia kebataburanakia kateaka tabura ekia a'ikakauma weiana Tirama ehore ena maearima ebe-nakia hauna kate'ima haraina (3). Ia kate'ima'ima harainakia pokina maearima bai'oikia baika ia baiatakiai ti'abi ia hanona a'ikakauma haukia.

### *Puka Paipana Apa'uakia*

- a. Roba iahu. (1-2)
- b. Ba'iobi haukia bai'oikia. (3-16)
- c. A'ikakauma taearana. (17-23)
- d. Banamo 'abina. (24-25)

### *Banamo 'Abina.*

<sup>1</sup> Au Iuda, Iesu Keriso ta'arana ia'ina hau'u mai Iakobo hatina, marere neiana narerena niwahi wai Tirama eaparin-imi haumi ikoimiai heremi, wai hanona Tirama Hamaka niraona'au ainimi mai Iesu Keriso ena iha'ini aonai tomiaho. <sup>2</sup> Nabahuba'ari Tirama ena aoko'o, baibua mai raona'au maikoina 'eumiai keapa'ua.

### *Marere Ererena Ena Poki.*

<sup>3</sup> E'u hau ki'ami e, au anuatae ki'a baha Tirama ena bamauri hatabu ahina hauna pouna e'u marereai karerena kewahi heremi, iamo bariu naraonana marere karerena kewahi hanona kabataburanimi Tirama a'ikakauma weiana rani hamonai ebaibeni ena robe maearimakia ikoikiai 'eukia hauna huari aonai kato'ima haraina. <sup>4</sup> Pokina maearima baika aba bunianai tekatoto wai baiatamiai temiaho. Ia hanona eka Tirama ti'oatana ena aoko'o hoana pouna tia'i banai haeaina ia kipokia ekia nabau hoa hoakia ki'a obokia tabakiai tibaonakia mai Iesu Keriso eka Obiapaka ikupaiana mo nipoki ainaka hauna tibaki'ana. Maearima neiakia ekia puma katehoaina pouna hanona aba wa'i baha Puka robenai ehina 'uaina.

### *Ba'iobi Haukia Bai'oikia.*

<sup>5</sup> 'Abi neiana aba to'iobina iamo au nanuatae kabaraona muenimi. Obiapaka\*

ehore Isaraela haukia Aikupito hanonai 'arakia ebamaurina ia muriai weiakia a'i tea'ikakauma haukia ikoikiai ebapuru-runakia. <sup>6</sup> Haeamona aneru baika ekia bero tea'ina hiabuna ihobonai mo a'i temiaho ia kipokia ekia miaho 'ekana tehabona, ia hanona aba tabiri weiana a'i kemohu banaibanai haunai tebirinakia wapura aonai temiaho, weia Tirama ehore parenakia katemiaho keaomo bakai apa'uana wapunai puma katehoaina. <sup>7</sup> Taeara ihobonaimo, Sodoma mai Gomora haeamona aiara herekiai haukia nabau akakia mai hoahoa ki'a obokia tebabainakia hanona iruba banai banai pumana tehoaina, ba ihaiha weiana hanona aika ikoikai ibaraonaka puma a'i hamahoaina paunai. <sup>8</sup> Ihobonaimo, maearima neiakia baiatamiai tetoto haukia abomo ba'iobi haukia bai'oikia neiakia ekia nibiai hoahoa 'opukia tibabai kipokia hauanikia tia'i ki'anakia, Tirama ena hiabu tibaki'ana haeamona kupa anerukia nuabikia ti'abi ki'a benakia. <sup>9</sup> Mikaela aneru 'arakai hauna hanona hoahoa uahomana a'i ebabai 'apuana. Tiaporo ohi Mose e'ari huanina tebahara taeaina raninai 'abi pumakiai tiaporo a'i ehinabe pahihina, ia ehina bena etibaha, "Obiapaka kehore oi kebatani'o." <sup>10</sup> Ia maearima neiakia hanona taba obokia a'i tiobo haukia ahakiai ti'abi ki'a, mai ekia 'iobi hanona ihobona mahi 'aki weiakia ekia raonaraona aha'i haukia 'abakia huanikia taikia titai, ekia hoahoa neiakia tihore ia kipokia tibapururunakia. <sup>11</sup> Ia herekiai hanona keki'a ki'a bahana. Pokina taeara weiana Kaino ena hoahoa ki'a obona taina tetai. Moni paunai kipokia teaoainakia beho weiana Balam ebabaina hauna aonai tetoto. Kora ebaki'a 'abana, ia abokiamo Tirama tebakiana, ua buonai taeara ihobonaimo ia abokiamo katepururu.

<sup>12</sup> Wai emi raona'au miato'ukia aninikia aokiai maearima neiakia titoto 'opu hoahoakia tibabai, ekia haumaea aha'i kipokia mo tiraonanakia. Ihobona matoha 'auhao weiakia baura nihore niabunakia nika'ainakia ia abara ha'i tibiaibeni, haeamona matoha matiu weiakia ekia bua'a ranina tohanai, iamo buabuakia ha'i tibaramanakia,

\* 1:5: (5) baika tererena, Iesu



matiu weiakia hanona mai ramukia aba ipuhu'au haeamona aba te'ari baihana. <sup>13</sup> Ia hanona matoha 'akuai roio nihara puni 'abana kipokia ekia haumaea hoahoakia tiwaira tina matoha 'uto'uto 'abakia, haeamona matoha bihiu weiakia tiaru 'abaea haukia 'abakia. Maearima weiakia hanona wapura banai banai aonai kate'ao.

<sup>14</sup> Enoka hanona Adamu ena uru iba'abaihou hamomona aonai hauna ena mahabanai 'abina aonai maearima neiakia robakia na eahu aihona, "Obiapaka hanona ena aneru robekia bo'ona 'akina kipokia katemai. <sup>15</sup> Maearima ikoikiai kebabakainakia, Tirama a'i temariki aina haukia ekia babai ki'a pumakia kebahoainakia, haeamona Tirama herenai te'abi ki'a haukia ikoikiai behoi kehorotinakia." <sup>16</sup> Maearima neiakia hanona teururu to'o baihana haeamona maearima baika tikaiahinakia, kipokia ekia nuatae ki'a obokia taikia titai, kipokia tiapainakia, mai maearima baika tiba'amenakia herekiai taba namokia pateai paunai.

#### *Tirama Ena Raona'auai Katomiaho.*

<sup>17</sup> E'u hau ki'ami e, eka Obiapaka Iesu Keriso ena iuhubeau haukia taba wairai kerama hauna tehina benimi 'abikia katoraona 'ininakia. <sup>18</sup> Haiamiai te'abi tetibaha, "Rani orekia katemai raninai Tirama a'i timariki aina maearimakia baika katewaira tina bapo'o po'o 'abikia heremiai katehinanakia haeamona kipokia ekia nuatae ki'a obokia taikia katetai." <sup>19</sup> Maearima neiakia robakia teahuna haukia hanona wai Tirama ena marea haumi baiatami ai hoa hore tibaramanakia, hanopaka maearimakia ekia nuatae taikia titai, Auba Robe aokiai a'i nemiaho.

<sup>20</sup> Ia, e'u hau ki'ami e, kipomi emi a'ikakauma robena ahanai emi mauri katobakori 'auna mai Auba Robe ena baraiarai ai katobahuba'ari. <sup>21</sup> Eka Obiapaka Iesu Keriso to'imana ena aoko'oai keaoainimi mauri banaibanai aonai, kipomi Tirama ena raona'auai katomiaho.

<sup>22</sup> Weiakia mai ekia raona kai'au kai'au haukia katoaoko'o ainakia. <sup>23</sup> Baika mauri pahihina matoha iruba 'abana aonai temiaho haukia mai taburami katobarainakia katekarahi katemauri, haeamona baika hauani ena aka ki'ai ekia

mauri te'opu haukia katoaoko'o ainakia mai ta'uta'umi, ekia ki'a aonai a'i temeberi totonimi, ekia nabau hoahoa ki'a obokia katobaki'anakia matoha habuni 'opukia 'arikia a'i tu'ari 'abana.

#### *Banamo 'Abina Orena.*

<sup>24</sup> Tirama hanona etabura kebarainimi ketaina a'i kato'eho, ba kemaiai harainimi ena nuabi aonai kebaka totonimi, weiana emi beho keaha'i ia wairanai mai emi aonamo keapa'ua. <sup>25</sup> Ia hanona Tirama hamona mo, ikupaiana aika ibamaurika hauna. Iesu Keriso eka Obiapaka paunai Tirama herena nuabi, mariki hoana, tabura, mai ena hiabu katemiaho, 'uaina ranikia ikoikiai aokiai, emai bariu, keaomo banaibanai. Amen.

## **Keriso Ena 'Abi IBAWAIRA TINANA Ioane Herenai**

### *Puka Aona Irerena 'Abina*

Puka neiana hanona rani weiana a'ikakauma haukia Obiapaka Iesu Keriso tea'ikakaumana paunai tebahaiara ki'anakia aonai ererena. Puka neiana ena poki hanona haiara weiana aonai ia kebataburanakia ba ekia a'ikakauma a'i katehabona. Puka neiana aonai 'abi ibabataikia ebo'o, taba muriai katerama 'ao aba tirama haukia 'abikia ehina. Ibabatai weiakia ekia aka tohana hanona neiana. Iesu Keriso hanona Obiapaka, ba ia imanai Tirama kehore ena 'ou haukia ikoinai kehao hainakia, mai Satani abomo ua kehaohai aihona. Ba Iesu aka neiakia ikoikia kebaorenakia hanona Tirama kehore weiakia tekori 'ini mai ekia a'ikakauma a'i teba'ehona haukia 'arackia namokia kebenakia. Ia hanona Tirama kipokia katemiaho, puma mai haiara hanona keaha'i, pokina Tirama hanona taba ikoikia kebahaainakia katemahamaha.

### *Puka Paipana Apa'uakia*

- a. Roba iahu. (1.1-8)
- b. Mahabanai ikaikauna mai marea robe 7 ekia marere. (1.9-3.22)
- c. Puka iouna mai ikaiabu hoana 7. (4.1-8.1)
- d. Pihi 7. (8.2-11.19)
- e. Dragona mai aiahu mahikia rua. (12.1-13.18)
- f. Ihakia haeai haeai. (14.1-15.8)
- g. Tirama ena opuere puoukia 7. (16.1-21)
- h. Babulonia e'eho. (17.1-20.10)
- i. Bakai apa'uana orena. (20.11-15)
- j. Kupa, hanopaka, mai Ierusalemahamakahakia. (21.1-22.5)
- k. 'Abi orekia. (22.6-21)

### *Puka Pouna Ihinana 'Abina.*

<sup>1</sup> Au, Ioane, Iesu Keriso ebawaira tinana 'abina puka neianai narerena. Tirama ehore Iesu ebena ena ta'ara'i haukia herekiai rani a'i kehoma'a tabakia katerama haukia kebaihanakia. Weiana Iesu ena aneru ha euhuna, ena ta'ara'i hauna Ioane ebaihana. <sup>2</sup> Weiana Ioane ehore Tirama ena 'abi mai Iesu Keriso ena 'abi

aiakia eo'o mai eihanakia tabakia ikoikia ehina pounakia.

<sup>3</sup> Mahabanai 'abikia neiakia katetu-abi haukia hanona tenamo, abomo puka neianai terere 'abikia kateona mai aokia ikoinai kateka'aina haukia hanona tenamo, pokina taba neiakia ikoikia katerama ranina hanona aba herekai.

### *Ioane Marere Ererena Tirama Ena Marea 'Abaihau Hamomo Herekiai.*

<sup>4</sup> Au Ioane Tirama ena marea 'abaihau hamomo Asia hanonai narerebenimi. Bariu nemiaho, 'uainai abomo emiaho, haeamona wairai kemai Tiramana, mai ena obia imia'auna wairanai auba 'abaihau hamomo tekoroiti haukia, <sup>5</sup> mai Iesu Keriso kipokia ekia aoko'o hoana mai baibua ahamiai kemiaho. Iesu Keriso hanona Tirama ena 'abi maikoina nehina pou haraina hauna, 'ariai mikiri mue kori'uaina hauna abomo hanopaka obiakia 'arackia ikoikia ekia poki.

Eraona'au ainaka paunai ena 'ari aru-aranai eka ki'a herekiai erubunaka. <sup>6</sup> Ena obia aiarana mai ena robe haukai ebaonaka Hamana Tirama ena aka kahababai. Iesu Keriso herenai nuabi mai hiabu katemiaho keaomo banaibanai. Amen.

<sup>7</sup> Tomoihana Iesu hanona 'auhao ai nimai, maearima ikoikia mahakia hanona ia kateihana, robuna tekomonu haukia abomo kateihana, hanopaka itubukia maearimana ikoikia ia paunai katehai 'ari. 'Abi tohana, neiana hanona kerama toha. Amen.

<sup>8</sup> Obiapaka Tirama ni'abi netibaha, "Au hanona Alepa mai Omega, Kori'uaina mai Murihaina. Au hanona bariu namiaho 'uaina abomo amiaho, haeamona wairai kamai, hiabu ikoinai Tiramana."

### *Ioane Keriso Eihana.*

<sup>9</sup> Au, Ioane, wai uaho'abami kipokia nahamiaho haeamo, ena obia aiarana aonai mai hau haiara hamona aonai mai bapahihika Iesu paunai. Tirama ena 'abi mai Iesu pouna ahina waira tinana paunai Patamo kereibuanai tehorotina'u namiaho. <sup>10</sup> Weiana Obiapaka ena beraurai Auba Robe hanona au ao'u ebabonu 'auna, weiana muri'u ai aia ha

<sup>11</sup> ia etibaha, "Neiakia noihanakia tabakia

hanona puka ai morerenakia kouhuna keao Tirama ena marea 'abaihau hamomo aiara neiakiai temiaho haukia herekia, Epeso, Semurana, Peregamo, Tuatira, Sadi, Piladelpia, mai Laodikea.”

<sup>12</sup> Weiana akori kabe e'abi bena'u hauna kaihana na ahoma. Iamo gold ramepakia 'abaihau hamomo tekoroiti aihanakia. <sup>13</sup> Ramepa baiatakiai hau ha ekoroiti, ia ihana matoha Maearima nahuna 'abana, ena habuni hanona ehoma'a eaomo aena etaro abunakia, haharanai hanona gold 'apana e'aberena. <sup>14</sup> Arana mai buina hanona tepore obo harai matoha poame 'abana 'ao 'auhao porena 'abana. Mahana ihakia hanona matoha iruba neupa 'abana. <sup>15</sup> Aena hanona matoha kopa iruba aonai nibaubaea ne'imare 'imare 'abana. Aiana hanona matoha roio rarikia tihara puni 'urukia 'abana. <sup>16</sup> Imana itipana bihiu 'abaihau hamomo ea'inakia, kareba ha mahana abira abira teara hauna pinana ekarahi. Mai wairana ihana hanona matoha atiaha beraura nirara eana 'abana.

<sup>17</sup> Ia aihana ranina a'eho aena pokina a'umuti, matoha a'ari 'abana. 'A ia ehore imana itipana hau'u ai ehao'au, e'abi etibaha, “A'i mota'u, au hanona kori'uaina mai murihaina. <sup>18</sup> Au hanona mauri hau'u, au a'ari iamo amauri haeamona kamauri banaibanai. Au hanona ki a'ina weiana mai e'u hiabu 'ari haukia ekia 'eka kakaikauna kamaianakia katemaui. <sup>19</sup> Ua buonai noihanakia tabakia morerenakia, neiakia hanona bariu temiaho tabakia haeamona wairai katerama tabakia. <sup>20</sup> Bihiu 'abaihau hamomo ima'u itipana mai gold ramepakia 'abaihau hamomo oihanakia. Neiakia hanona 'abi bunikia ba anikia hanona nahomana, bihiu 'abaihau hamomo hanona Tirama ena marea 'abaihau hamomo ekia aneru,\* mai gold ramepakia 'abaihau hamomo hanona Tirama ena marea 'abaihau hamomo.”

### *Marere Keao Epeso ai.*

## 2

<sup>1</sup> Ia e'abi etibaha, “Tirama ena marea Epeso aiarana hauna ena aneru na korere beni aihona.

\* 1:20: (20) 'ao iuhubeau

Hau weiana bihiu 'abaihau hamomo imana itipana aonai ea'inakia haeamona gold ramepakia 'abaihau hamomo tekoroiti baiatakiai nikabanai kabanai hauna ena 'abi neiana.

<sup>2</sup> Au oi emu babai, emu aro'ari mai emu bapahihi hanona a'iobinakia. Haeamona a'iobina aka ki'a haukia a'i oiha haonakia, weiakia kipokia iuhubeau haukia ai tebaonakia haukia 'a ia hanona iuhubeau haukia tohakia aha'i, ba obahobonakia hanona o'iobinakia bai'oi haukia. <sup>3</sup> Oi hanona obapahihi, mai atetua aokiai au ata'u paunai obakiro, a'i ohaba 'apua.

<sup>4</sup> Iamo emu ki'a hanona neiana, emu raona'au kori'uaina au here'uai hauna aba ohabona. <sup>5</sup> Ua buonai 'eka weianai o'eho hauna moraonana, koraona kabe, aka weiakia obabai 'uainakia haukia kobabai muenakia. Emu ki'ai a'i koraona kabe ranina, au hanona kawahi emu ramepa ena koroti 'ekanai ka'i obona. <sup>6</sup> 'A emu namo hamona hanona neiana. Nikolaita haukia ekia hoahoa 'arikia a'i nu'ari, ihobona au abomo ekia hoahoa 'arikia a'i na'ari 'abana.

<sup>7</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona bero kabena mauri nibaibeni matiuna buabuana keani, matiu weiana hanona Tirama ena uma nuabina aonai ni'omu.”

### *Marere Keao Semurana ai.*

<sup>8</sup> Ia e'abi mue etibaha, “Tirama ena marea Semurana aiarana hauna ena aneru na korere beni aihona.

Hau weiana Kori'uaina mai Murihaina hauna, e'ari haeamona emauri mue hauna ena 'abi neiana.

<sup>9</sup> Emu hau haiara mai emu uraru hanona aba a'iobinakia. Iamo oi hanona aba kepu haumu. Maearima weiakia kipokia Iuda haukia ai tibaonakia haukia ekia 'abi ki'a oi heremuai hanona a'iobina, ia hanona Iuda haukia tohakia aha'i, ia Satani ena marea haukia. <sup>10</sup> Aba kohau haiara iamo haiara weiana a'i kota'u aina. Haiamuai na'abi, Tiaporo kehore wai baika kehobonimi weiana wapura itu-nai kekaiabunimi ba wapu harauhaea

katohau haiara. Iamo oi hanona emu a'ikakauma au here'uai hauna koa'i 'inina keaomo ko'ari re'a, ba au kahore mauri kabeni'o matoha 'uai hoana kobau'una 'abana.

<sup>11</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona 'ari ibaruanai a'i kehaiara 'apua."

*Marere Keao Peregamo ai.*

<sup>12</sup> Ia e'abi mue etibaha, "Tirama ena marea Peregamo aiaranai hauna ena aneru na korere beni aihona.

Hau weiana kareba mahana abira abira teara ea'ina hauna ena 'abi neiana.

<sup>13</sup> Emu miaho 'ekana hanona a'iohina, Satani ena obia imia'auna hanona naia. Iamo oi ohore au ata'u oa'i 'inina, ba iatamiai Antipa aia ibabua 'au hauna au pou'u ehinana hauna, ba Satani ena miaho 'ekana weianai teahu 'arina aonai abomo emu a'ikakauma au here'uai hauna a'i obuniai aina.

<sup>14</sup> Iamo emu ki'a baika hanona neiakia. Maearima baika naia hanona mahabanai hauna Balam ena ba'iohi 'abikia tika'ai ohonakia, hau weiana ehore Balak eba'iohina, ba ena ba'iohi bai'oina weianai Isaraela haukia tebabai ki'a, weiana ia tehore kaiba'uku ibarobekia anianikia teani mai nabau hoahoakia ki'a obokia tebabainakia.

<sup>15</sup> Taeara ihobonai mo baika naia heremiai hanona Nikolaita haukia ekia ba'iohi 'abikia bai'oikia abomo tika'ai ohonakia mai ki'a ihobokiamo tibabainakia. <sup>16</sup> Ua buonai tomoraona kabe. Keaha'i raninai, au kipo'u kawahi biai, pina'u karebanai kahu 'arinakia.

<sup>17</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona. Ena a'ikakauma ketabura, ki'a aokiai kekabanai hauna hanona aniani atana mana baika tebuni haukia ia kabena, abomo au kahore pihara porenha ahanai ata mahamahana ha irere'au hauna ia kabena. Pihara ia'ina hauna mo kipona ata weiana ke'iohina."

*Marere Keao Tuatira ai.*

<sup>18</sup> Ia e'abi mue etibaha, "Tirama ena marea Tuatira aiaranai hauna ena aneru na korere beni aihona.

Tirama Nahuna weiana mahana ihakia hanona matoha iruba neupa 'abana, aena hanona matoha kopa ne'imare 'imare 'abana hauna ena 'abi neiana.

<sup>19</sup> Au hanona oi emu babai a'iohina. Emu raona'au, emu a'ikakauma, emu baraiarai, mai emu bapahihi hanona a'iohinakia. Haeamona bariu emu babai neiakia hanona emu babai 'ai'aikia tetara haonakia.

<sup>20</sup> Iamo emu ki'a hanona neiana, oi hanona babi'e weiana atana Isabela kipona mahabanai babi'enai nibaona babi'ena hanona noiha haona. Ia ena ba'iohi e'u ta'ara'i haukia nibaka'a ki'anakia niaoainakia maha porepore akakia ki'a obokia tibabai haeamona kaiba'uku ibarobekia anianikia tiani. <sup>21</sup> Au hanona ia ena rani aba ha abena ena maha porepore hoahoakia weiakiai keraona kabe. Ia a'i nenuatae. <sup>22</sup> Ua buonai au kahore inawa itaranai kakapo 'auna weia kehaiara 'ari ki'a baha, haeamona weiakia ia kipokia tinabau haukia a'i kateraona kabe raninai, ia abokiamo kabahaiara ki'a bahanakia. <sup>23</sup> Ia nahuna abokiamo kahuahu 'arinakia. Weianai hanona Tirama ena marea haukia ikoikiai kate'iohina, au hanona maearima aokia mai ekia raonaraona bunikia natahu ahinakia hau'u, mai au kahore wai ha ha emu babaimo ihobokiai 'arami kabamuena.

<sup>24</sup> 'A bariu wai harina maikoina Tuatira babi'e naiana ena ba'iohi 'abikia uahomakia a'i tuka'ainakia mai Satani ena buni tabakia tohakia na tiho haukia a'i to'iohi haumi, nahina benimi ahamiai puma ha a'i kahore 'auna. <sup>25</sup> Iamo wai taba namona aba toa'ina hauna katoa'i 'ini haraina keaomo au kawahi.

<sup>26</sup> Ena a'ikakauma ketabura, ki'a aokiai kekabanai hauna haeamona e'u nuatae akana kebabai haraina keaomo puanai hauna hanona hiabu kabena, ia kehore hanopaka maearimakia keobia ainakia. <sup>27</sup> 'Ia auri ikai'ininai kepoki ainakia, keahu 'iti'itinakia matoha uro 'abana.' Ihobona au Hama'u herenai hiabu a'ina 'abana. <sup>28</sup> Au kahore raurani bihiuna abomo ia kabena. <sup>29</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."



### 3

#### *Marere Keao Sadi ai.*

<sup>1</sup> Ia e'abi etibaha, “Tirama ena marea Sadi aiaranai hauna ena aneru ʻna korere beni aihona.

Auba 'abaihau hamomo weiakia Tirama ena aka tibabaina haukia mai bihiu 'abaihau hamomo ea'inakia hauna ena 'abi neiana.

Au emu babai hanona a'io binakia, robamu teahuna tetibaha, ‘Tirama ena marea neiana hanona nimaui,’ iamo oi hanona aba o'ari. <sup>2</sup> Ua buonai mono'a, heremuai temiaho tabakia aba kate'ari baihana haukia mobataburanakia, pokina emu babai bero'auna ha e'u Tirama wairanai a'i atabu ahina. <sup>3</sup> Taba oa'ina mai ona hauna moraona 'inina, moka'ai haraina, abomo emu ki'ai moraona kabe. Iamo a'i kono'a raninai au hanona bainao hauna 'abana kawahi, e'u wahi beraurana hoana hanona a'i o'io bina.

<sup>4</sup> Iamo naia Sadi ai hanona Tirama ena maearima baikia ekia habuni a'i teba'opunakia weiakia hanona ekia hoahoa tenamo, ia hanona mai ekia bero habuni porekia katebatotonakia au kipokia kataka'a haeamo.

<sup>5</sup> Taeara ihobonai ena a'ikakauma ketabura, ki'a aokiai kekabanai hauna hanona habuni porenā kebatotona, ia atana abomo mauri pukanai a'i kakakina, 'a Hama'u wairanai mai ena aneru wairakiai ia atana kahinana. <sup>6</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona.”

#### *Marere Keao Piladelpia ai.*

<sup>7</sup> Ia e'abi mue etibaha, “Tirama ena marea Piladelpia aiaranai hauna ena aneru ʻna korere beni aihona.

Erobe mai 'abi tohana hauna, mai Davida ena ki ea'ina hauna, ia taba ekaikauna hanona hau ha a'i keka-iabuna, haeamona ia taba ekaiabuna hanona hau ha a'i kekaikauna hauna ena 'abi hanona neiana.

<sup>8</sup> Au hanona oi emu babai a'io bina. Moihana, au pa'abi ha oi wairamu ai aba akaikauna, weiana hau ha keka-iabuna hanona a'i ketaina. A'io bina emu tabura hanona a'i eapa'ua, iamo e'u 'abi aba o'ima haraina mai ata'u a'i obuniaina. <sup>9</sup> Moihana, weiakia kipokia Iuda haukiai tibaonakia haukia hanona

tibai'oi, ia hanona Iuda haukia tohakia aha'i, ia Satani ena marea haukia. Au kahore maearima weiakia kama-iainakia oi aemu pokinai katekaipehu, kate'io bina au hanona oi naraona'au aini'o. <sup>10</sup> Pokina oi ohore e'u bahi-ahi 'abina weiana atetua aokiai koba-pahihi hauna aba o'ima haraina, ua buonai au kahore oi abomo ka'ima haraini'o hanopaka ena atetua ranina kemai aonai, weiana hanona maearima ikoinai kahobonakia hanopaka neiana ahanai. <sup>11</sup> Au hanona aba kawahi, emu a'ikakauma aonai kotabura harai, weiana hau ha a'i mehore emu 'uai hoana 'aramu ai obau'una hauna a'i mepuhu boini'o.

<sup>12</sup> Ena a'ikakauma ketabura, ki'a aokiai kekabanai hauna hanona e'u Tirama ena marea robe kupuanai kabaona, ba ia hanona 'eka weiana a'i kehabona. Au kahore ia ahanai e'u Tirama atana, mai e'u Tirama ena aiana, weiana Ierusalema mahamahana, e'u Tirama herenai weia kupa ai keriri hauna atana karerenakia, mai au ata'u mahamahana abomo ia ahanai karerena. <sup>13</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona.”

#### *Marere Keao Laodikea ai.*

<sup>14</sup> Ia e'abi mue etibaha, “Tirama ena marea Laodikea aiaranai hauna ena aneru ʻna korere beni aihona.

Amen pokina hauna, aia ibabua'auna hauna, mahanai eihana ehina pouna hauna tohana, mai Tirama ebabainakia tabakia ikoinai pokina hauna ena 'abi hanona neiana.

<sup>15</sup> Au hanona oi emu babai a'io bina, oi hanona a'i o'amari mai a'i ohi-abu. Au e'u nuatae hanona kohi-abu toha 'ao ko'amari toha. <sup>16</sup> Iamo oi hanona ohiabu hiabu, a'i ohiabu toha mai a'i o'amari toha. Ua buonai au kahore pina'u ai ka'atoti ahini'o.

<sup>17</sup> Oi nu'abi notibaha, ‘Au hanona kepu hau'u, e'u taba tebo'o, taba ha a'i akapu.’ Iamo a'i o'io bina oi hanona oki'a ki'a baha, kateaoko'oai ki'ani'o, nouraru, mahamu teki'a, abomo mai-haumu. <sup>18</sup> Au oi narobeni'o, here'uai gold kokawana aba irubai tebamaha

mahana hauna, ba kepu haumu tohamuai koao. Here'uai habuni porena abomo kokawana kobatona, weiana mai haumu emu haumaea kepua, mai here'uai maha muramurana kokawana, weianai mahamu koutunakia ba taba koihanakia ketaina. <sup>19</sup> Au naraona'au ainakia haukia hanona narikenakia mai na'atinakia, ua buonai bero akakia konuataeai ki'a bahanakia, mai ki'ai ko-raona kabe.

<sup>20</sup> Moihana, au hanona pa'abi 'akonai akoroti, naharahara. Hau ha aia'u keona abomo pa'abi kekaikauna raninai, ia 'eunai kakatoto herenai kataniani mai ia au here'uai kataniani. <sup>21</sup> Ena a'ikakauma ketabura, ki'a aokiai kekabanai hauna hanona bero kabena e'u obia imia'auna ahanai katamiati haeamo, ihobona au atabura, ki'a aokiai akabanai, ba Hama'u ohi ena obia imia'auna ahanai tamiati haeamo 'abana. <sup>22</sup> Mai haiana hauna kehore Auba Robe ena 'abi Tirama ena marea maearimakia nehina benakia hauna aiana keona."

## 4

### *Tirama Tekuti aina Kupai.*

<sup>1</sup> Taba neiakia murikiai, maha'u eao kupai pa'abi ha ikaikau waira'uai ekoroti aihana. Ba aia weiana ehinabe 'uaina'u 'uruna matoha pihi 'uruna 'abana hauna e'abi etibaha, "Mokara'au omai neia, taba neiakia murikiai katerama haukia kabaihani'o." <sup>2</sup> Au hanona beronai mo Auba Robe ao'u ebaonu 'auna, ba waira'uai hanona obia imia'auna ha kupai aihana mai hau ha imia'au weiana ahanai emia'au. <sup>3</sup> Emia'au hauna ihaihana hanona ea ki'a baha matoha pihara namoabukia atakia daiamond hauna eiroro mai rubi hauna ebiro haukia 'abana, 'opa ehore obia imia'auna weiana ekakaiarona, ihaihana hanona ea ki'a matoha pihara namoabuna atana emerald hauna ekupa 'abana. <sup>4</sup> Obia imia'aukia ikoinai haraurua bani obia imia'auna apa'uana tekai kakaiarona abomo kiro haukia haraurua bani obia imia'aukia weiakia ahakiai temia'au, habuni pore obokia tebatoto mai 'arakiai hanona obia ibau'ukia gold ai ibabai haukia tebau'unakia. <sup>5</sup> Obia imia'auna weianai hanona kupa 'imarekia, 'uru rarikia mai

kupa niro'u 'urukia ao'o. Obia imia'auna wairanai ramepa 'abaihau hamomo teara mai upa upakia. Neiakia hanona Tirama ena auba te'abaihau hamomo. <sup>6</sup> Abomo obia imia'auna wairanai hanona 'aku nemiaho, eiroro waira 'akinai matoha pihara namoabuna atana kristal 'abana.

Ibuanai hanona mauri tabakia ikoinai bani obia imia'auna tekori kakaiarona, ia wairakiai mai murikiai hanona maha 'abaeana teka kaiaronakia. <sup>7</sup> Mauri tabana kori'uaina hanona ihana matoha mahi atana laiona 'abana, ibaruana hanona ihana matoha poromakau nahu 'abana, ibaihauna wairana hanona ihana matoha maearima wairakia 'abana, ibabanina hanona ihana matoha po'i nirobo 'abana. <sup>8</sup> Ia mauri tabakia bani weiakia hanona ha ha banikia 'abaihau, ba banikia weiakia aokiai mai kapekiai hanona mahakia mo 'abaeana. Ia hanona mararani mai rabi a'i tiarai ia ti'abi to'ona tetibaha,

"Erobe, erobe, erobe. Obiapaka hiabu ikoinai Tiramana hanona erobe. Ia hanona 'uainai emiaho, bariu nemiaho, haeamona wairai kemai hauna."

<sup>9</sup> Mauri tabakia neiakia tihore mauri banaibanai Tiramana obia imia'auna ahanai emia'au hauna herenai nuabi mariki mai namo 'abina tibena aonai, <sup>10</sup> kiro haukia haraurua bani tihore obia imia'auna ahanai emia'au hauna wairanai tikaipahu mauri banaibanai Tiramana tekuti aina. Ekia obia ibau'ukia 'arakiai tibau'unakia haukia tia'i obonakia obia imia'auna wairanai tibaenotina, ba ti'abi tetibaha,

<sup>11</sup> "Emai Obiapaka emai Tirama e, oi hanona mai emu bero nuabi mai mariki mai hiabu koa'inakia. Pokina oi ohore taba ikoikiai obaramanakia. Emu nuatae paunai taba ikoikiai terama ba temiaho."

## 5

### *Ioane Puka Iouna Ha Eihana Mai Ika-iabu Hoana.*

<sup>1</sup> Epua obia imia'aunai emia'au hauna aihana imana itipanai hanona puka iouna ha ea'ina, aonai mai kapenai marere tererenakia, puka kapena hanona ika-iabu hoakia ba weiakia hanona 'abaihau

hamomo puka kapenai. <sup>2</sup> Ba aneru taburana ha aihana eio aota etibaha, “Tai mai ena bero hauna kehore puka ahanai ikaiabu hoahoakia neiakia keba pa'anakia ba kekaikauna?” <sup>3</sup> Iamo hau ha kupai 'ao hanopakai mai hanopaka ba'anai ha a'i etaina puka iouna weiana kekaikauna abomo aona keihana. <sup>4</sup> Weiana au ahai, ahai 'ari ki'a baha pokina hau ha a'i ebero harai puka iouna weiana kekaikauna abomo aona keihana. <sup>5</sup> Ia kiro hauna ha ehina bena'u etibaha, “A'i kohai, Iuda itubuna ena Laiona weiana Davida ena rama ramuna hauna 'ou haukia eahu parenakia hauna, ia kehore puka iouna ahanai ikaiabu hoakia 'abaihau hamomo keba pa'anakia puka kekaikauna.”

### *Ioane Mamoe Nahu Eihana.*

<sup>6</sup> Weiana obia imia'auna 'ekana ibuanai Mamoe nahu ha ekoroti aihana ihana matoha 'uainai teahu 'arina 'abana, mauri tabakia bani mai kiro haukia weia tekori kakaiarona, ia 'eana hanona 'abaihau hamomo mahana abomo 'abaihau hamomo, mahana weiakia hanona Tirama ena auba 'abaihau hamomo euhunakia teao hanopaka ikoinai haukia. <sup>7</sup> Mamoe nahu hanona eao obia imia'aunai emia'au hauna imana itipanai puka iouna weiana ea'ina. <sup>8</sup> Puka weiana ea'ina raninai mauri tabakia bani mai kiro haukia harau rua bani hanona Mamoe nahu wairanai tekaipehu. Ia ha ha mai ekia kita atana hap abomo mai ekia gold puou puoukia aokiai muramura timikia 'orimokiai tebabonunakia, teba'aranakia timikia tehao, weiakia hanona Tirama ena robe maearimakia ekia bahuba'ari ai. <sup>9</sup> Weiana hui mahamahana ha tea'i taeana tehuiaina tetibaha, “Oi hanona mai emu bero puka iouna koa'ina abomo ikaiabuna hoahoakia kobapa'anakia. Pokina oi teahu 'arini'o, ba emu 'ari aruarunai maearima okawanakia Tirama 'euna, itubu ikoikiai, maea ikoikiai, maearima ikoikiai, mai hano ikoikiai herekia. <sup>10</sup> Oi ohore obia 'arakia haukiai mai robe akana tibabaina haukiai obaonakia eka Tirama ta'arana katea'i, mai hanopaka katepoki aina.”

### *Ikoikiai Tirama Mai Mamoe Nahu Tekuti ainakia.*

<sup>11</sup> Ba maha'u eao aneru bo'ona 'akina aihanakia mai aiakia aona, ia tehore obia imia'auna mai mauri tabakia bani mai kiro haukia tekori kakaiaronakia, tebo'o ki'a baha taha taha. <sup>12</sup> Tehui aota tetibaha, “Mamoe nahu 'uainai teahu 'arina hauna, bariu mai ena bero, hiabu, kepu, aobero, mai tabura kea'inakia abomo mariki, nuabi, mai banamo kea'inakia.”

<sup>13</sup> Ba mauri tabakia ikoikiai weiakia kupai, hanopakai, hanopaka ba'ana abomo 'akupakai mai aokiai temiaho haukia ikoikiai aiakia aona tehui tetibaha, “Obia imia'auna ahanai emia'au Tiramana abomo Mamoe nahu herekiai banamo, mariki, nuabi, mai hiabu katemiaho, bariu keaomo banabanai.”

<sup>14</sup> Weiana mauri tabakia bani te'abi tetibaha, “Amen.” Ba kiro haukia tekaipehu ia tekuti aina.

## 6

### *Mamoe Nahu Puka Ikaiabu Hoakia 'Abaihau Ea'i Obonakia.*

<sup>1</sup> Epuu Mamoe nahu aihana, puka iouna ahanai ikaiabu hoakia 'abaihau hamona hauna ea'ina, ia ehore ikaiabu hoana kori'uaina ea'i obona. Ba mauri tabakia bani 'abakia ha aiana aona, matoha kupa niro'u 'abana, e'abi etibaha, “Omai.” <sup>2</sup> Maha'u eao hanona waira'uai hoti porenna ha aihana, ba ahanai emia'au hauna hanona hunu ha imanai ea'ina, obia ibau'una ha tebena, ba hotiai ebeau ahi, ihaihana matoha arawai hauna, ia ehore 'ou haukia eba 'ehonakia, haeamona mai hiabuna niao bo'ona keba'ehonakia.

<sup>3</sup> Mamoe nahu ikaiabu hoana ibaruana ea'i obona raninai mauri tabana ibaruana aiana aona, e'abi etibaha, “Omai.”

<sup>4</sup> Ba hoti ha ekarahi hauna hanona ebiro. Ahanai emia'au hauna hanona hiabu tebena baibua hanopakai kea'i parena, weiana maearima kipokia 'abakia kateahuahu 'arinakia. Ia hanona kareba apa'uana ha tebena.

<sup>5</sup> Ba Mamoe nahu ikaiabu hoana ibaihauna ea'i obona raninai, mauri tabana ibaihauna aiana aona, e'abi etibaha,

“Omai.” Ba maha'u eao hanona hoti 'umu obona ha aihana, ahanai emia'au hauna hanona puma ihobokia tabana ha imanai ea'ina. <sup>6</sup> Ba matoha aia ha 'abana mauri tabakia bani baiatakiai aona, e'abi etibaha, “Moao emu aka mobabaina, arobo rarina kerama. Weiana maearima wapu hamona niaka monina nia'ina hanona witi kaputi hamona kekawana, mai maearima wapu hamona niaka monina nia'ina hanona aniani atana bali kaputi aihau kekawanakia, iamo olibe matiukia mai bine haharukia a'i koa'i ki'anakia.”

<sup>7</sup> Ba Mamoe nahu ikaiabu hoana ibabanina ea'i obona raninai, mauri tabana ibabanina aiana aona, e'abi etibaha, “Omai.” <sup>8</sup> Maha'u eao hanona hoti hauna a'aeabuna ha aihana, ahanai emia'au hauna atana hanona 'Ari, mai 'ari haukia ekia 'eka hanona ia murinai ni'au. Hiabu hanona terarua tebenakia, ba hanopaka maearimakia iwate paipa bani aonai paipa ha hanona kateahu 'arinakia, maearima weiakia hanona huari aonai karebai kate'ari, arobo aonai mare'a ai kate'ari, inawai kate'ari, mai hanopaka ena ahuhahu mahikiai kate'ari.

<sup>9</sup> Mamoe nahu ikaiabu hoana ibaimana ea'i obona raninai, maha'u eao itara robena ba'anai Tirama ena 'abi buonai mai ena 'abi ihina pouna paunai teahu 'arinakia haukia aubakia aihanakia. <sup>10</sup> Ia hanona teio aota tetibaha, “Taba ikoikiai Obiapakana e, oi hanona orobe mai toha tohana, rani tabanai hanopaka haukia kobakainakia, puma kobahoainakia emai 'ari aruarumai paunai?” <sup>11</sup> Weiana habuni homa'akia pore obokia ha ha tebenakia, ba ehina benakia katebai'ima rani papana kehoma'a 'apua keaomo 'abakia ta'ara'i haukia mai uaho'abakia Keriso ena aka tibabaina haukia iahu'arikiai ia teahu 'arinakia ihobona, weiana ituabikia ranina ketaina.

<sup>12</sup> Ba Mamoe nahu aihana ikaiabu hoana iba'abaihauna ea'i obona raninai, kanokau rarina eka'a hano eibiu ki'a, beraura ewapura habuni 'umuna 'abana, haeamona nawa hanona ebiro aruaru 'abanai eao, <sup>13</sup> mai bihiu kupai te'eho hanopaka ahanai matoha baura rarina eabu'au 'ororo buabuana a'i te'aiba haukia eba'ehonakia 'abana. <sup>14</sup> Kupa abonamo e'akauma matoha 'ire teouna

'abana, haeamona oeo mai kereibua ikoikiai 'ekakiai teibiu. <sup>15</sup> Ba hanopaka ena obia 'arana haukia, obia haukia, huari poki haukia, kepu haukia, hiabu haukia, ta'ara'i haukia, haeamona ta'ara a'i tia'i haukia ikoikiai hanona oeo urikia aokiai mai oeo piharakia baiatakiai tepihi. <sup>16</sup> Ia tehore oeo mai pihara apa'uakia tea-parinakia tetibaha, “Tomo'eho tomobahu abunamai, obia imia'auna ahanai nemia'au Hauna wairanai mai Mamoe nahu ena opuere herekiai tomoba buninamai. <sup>17</sup> Pokina ekia opuere wapuna apa'uana aba ekara'au. Tai he kekoroti?”

## 7

### *Tirama Ena Ta'ara'i Haukia 144,000 Paukia Ahakiai Mani'a Tea'ina.*

<sup>1</sup> Weiana murinai aneru bani aihanakia, hanopaka 'uni puakia bani tekori abunakia, hanopaka ena baura bani tehe abunakia, baura ha a'i keabu hano ai 'ao 'aku 'ao matiu a'i keabunakia. <sup>2</sup> Ba aneru haeai ha aihana, taetana tainai ekara'au mai mauri Tiramana ena taba ha ea'ina weianai tabakia kebamani'anakia Tirama 'euna. Weiana eio aota aneru bani weiakia Tirama ehore hiabu ebenakia hanopaka mai akupaka katea'i ki'anakia haukia ehina benakia etibaha, <sup>3</sup> “Wai hanopaka mai 'akupaka abomo matiu a'i katoa'i ki'anakia keaomo eka Tirama ena ta'ara'i haukia paukia ahakiai mani'a ha katahore 'auna.” <sup>4</sup> Weiana tebamani'ana haukiai ekia bo'o tetuabina aiakia aona hanona taha ikoinai hinabu hamomo bariabui bani (144,000), ia hanona Isaraela itubukia harauhaea rua herekiai tekarahi. <sup>5</sup> Paukia ahakiai tebamani'anakia haukia,

Iuda itubunai hanona taha harauhaea rua (12,000).

Ruben itubunai hanona taha harauhaea rua (12,000).

Gad itubunai hanona taha harauhaea rua (12,000).

<sup>6</sup> Asere itubunai hanona taha harauhaea rua (12,000).

Napatali itubunai hanona taha harauhaea rua (12,000).

Manase itubunai hanona taha harauhaea rua (12,000).

<sup>7</sup> Simeona itubunai hanona taha harauhaea rua (12,000).



Lebi itubunai hanona taha harauhaea rua (12,000).

Isakara itubunai hanona taha harauhaea rua (12,000).

<sup>8</sup> Sebuluna itubunai hanona taha harauhaea rua (12,000).

Iosepa itubunai hanona taha harauhaea rua (12,000).

Mai Beniamina itubunai hanona taha harauhaea rua (12,000).

*Maearima To'una Rarina 'Akina Mai Ekia Habuni Porekia Tirama Tekuti aina.*

<sup>9</sup> Taba neiakia murikiai maha'u eao maearima to'una rarina 'akina aihana pahatuabinakia a'i petaina, ia hanona hano haeai haeai, itubu haeai haeai, rama haeai haeai, mai maea haeai haeai ikoikiai aokiai tekarahi, ia ikoikiai hanona obia imia'auna wairanai mai Mamoe nahu wairanai tekoroiti, ekia habuni hanona tehoma'a tepore obo, abomo imakiai hanona matiu raukia matoha tona 'ari'arina 'abakia tea'inakia. <sup>10</sup> Ba teio aota tetibaha,

“Bamauri hanona aika eka Tirama obia imia'aunai nemia'au Hauna mai Mamoe nahu herekiai nimai.”

<sup>11</sup> Weiana aneru ikoikiai weiakia obia imia'auna, kiro haukia, mai mauri tabakia bani tekori kakaiaronakia haukia tehore obia imia'auna wairanai tekaipehu wairakia hano teao Tirama tekuti aina, <sup>12</sup> tetibaha,

“Amen.

Banamo, mai nuabi,  
mai aobero, mai namo 'abina,  
mariki, mai hiabu, mai tabura  
hanona eka Tirama 'euna keaomo  
banaibanai.

Amen.”

<sup>13</sup> Weiana kiro hauna ha ebakaina'u etibaha, “Habuni homa'akia pore obokia tebatotonakia haukia hanona tai? Abomo ae'eai temai?” <sup>14</sup> Au ena 'abi abamuena atibaha, “Hau apa'uana e, oi o'io'ina.” Haeamona ehina bena'u etibaha, “Neiakia hanona hau haiara apa'uakia aokiai tekabanai harai temai haukia, ekia habuni hanona Mamoe nahu aruarunai teutunakia ba tebaporenakia. <sup>15</sup> Ua buonai,

Ia hanona Tirama ena obia imia'auna wairanai tikoroiti,  
abomo ena marea robe aonai ia ena aka tibabaina rabi mai mararani.

Ba obia imia'auna ahanai nemia'au Tiramana kehore ekia i'auai keao ke'aeanakia mai ke'abanakia.

<sup>16</sup> Ia hanona mare'a a'i kate'ari mue, 'akokia a'i kate'ororo mue.

Beraura 'ao hiabu haeai ha ia haukia a'i kebapetanakia.

<sup>17</sup> Pokina Mamoe nahu obia imia'auna ibuana tohanai nemiaho hauna kehore ke'imanakia mamoe i'imana hauna 'abana,

ia kehore ke'uai ainakia mauri beina 'uriai nebuti hauna herenai,

ba Tirama kehore mahakia beikia ikoikiai mahakiai keutu 'ororonakia.”

## 8

*Puka Ikaiabu Hoana Iba'abaihau Hamomona Ea'i Obona. Aneru Ha Mai Gold Urona.*

<sup>1</sup> Ba Mamoe nahu Puka ikaiabu hoana iba'abaihau hamomona ea'i obona rani-nai, kupai 'uru ha a'i ebua 'apua eaomo beraura hoana abirana ha 'abana. <sup>2</sup> Weiana Tirama wairanai tikoroiti anerukia 'abaihau hamomo aihanakia, ba pihi 'abaihau hamomo aneru weiakia tebenakia.

<sup>3</sup> Aneru haeai ha emai itara robena herenai ekoroiti. Imanai hanona gold urona ha ea'ina aonai muramura timina 'orimona tekinena hauna. Ba muramura timina 'orimona bo'ona tebena mai Tirama ena robe haukia ikoikiai ekia bahuba'ari kipokia keba haeamonakia gold itarana robena weiana obia imia'auna wairanai hauna ahanai keberuberu ainakia. <sup>4</sup> Weiana aneru imanai muramura timina 'orimona ni'ara hi-abuna mai robe haukia ekia bahuba'ari kipokia tekara'au Tirama wairanai. <sup>5</sup> Ba aneru ehore uro weiana ea'ina, aonai itara robena irubanai ebabonuna, ba hanopakai ekapo'auna hanona kupa ero'u mai e'imare, 'uru rarikia tehua, mai hano ekaukau.

*Aneru Bani Ekia Pihi Teubaina.*

<sup>6</sup> Ba aneru 'abaihau hamomo weiakia teba'oru ekia pihi kate ubainakia.

<sup>7</sup> Aneru kori'uaina ehore ena pihi eubaina, weiana abara pihara 'abakia mai iruba aruaru kipokia teba hamomo te'eho hanopaka ahanai abara netibo 'abana. Rani weianai hanopaka iwate paipa aihau aonai paipa ha e'ara obo mai matiu ikoinai

iwate paipa aihau aonai paipa ha e'ara ore, haeamona tubu ikoinai te'ara ore.

<sup>8</sup> Aneru ibaruana ehore ena pihi eubaina, weiana taba ha ihana matoha oeo apa'uana ha 'abana mai irubana 'akuai tekapo uhuna. Weiana 'akupaka iwate paipana aihau aonai paipa ha hanona aruaruai eao, <sup>9</sup> ba 'aku aonai mauri tabakia iwate paipana aihau aonai paipa ha hanona te'ari, mai aunohi ikoikiai iwate paipa aihau aonai paipa ha hanona tepururu.

<sup>10</sup> Aneru ibaihauna ehore ena pihi eubaina, weiana bihiu apa'uana ha ni'ara matoha toti 'abana kupai e'eho, ba ate ikoikiai iwate paipa aihau aonai paipa ha mai bei ekia buti 'ekakia ahakiai e'eho. <sup>11</sup> Bihiu weiana atana hanona 'Mabi'. Ba bei ikoikiai iwate paipa aihau aonai paipa ha hanona temabi ki'a. Ba maearima bo'ona bei weiana teinu hanona te'ari, pokina bei aba emabi.

<sup>12</sup> Aneru ibabanina ehore ena pihi eubaina, weiana beraura iwate paipana aihau aonai paipa ha, mai nawa iwate paipana aihau aonai paipa ha, haeamona bihiu ikoikiai iwate paipa aihau aonai paipa ha tepoanakia, weiana ea iwate paipana aihau aonai paipa ha hanona ewapura, ba mararani iwate paipana aihau aonai paipa ha, mai rabi iwate paipana aihau aonai paipa ha hanona a'i ea.

<sup>13</sup> Ba po'i ha aihana kupa baiatanai erobo, aiana aona eio aota etibaha, "Keki'a, keki'a. Hanopaka ahanai temiaho haukia ikoikiai herekiai hanona keki'a ki'a bahana, pokina aneru haeai aihau ekia pihi aba kateubainakia."

## 9

### *Aneru Ibaimana Ena Pihi Eubaina.*

<sup>1</sup> Weiana aneru ibaimana ehore ena pihi eubaina, ba au bihiu ha aihana kupai aba e'eho hanopakai, bihiu weiana hanona 'uri 'ourana 'akina a'ena aha'i hauna kina tebena. <sup>2</sup> Ba bihiu weiana ehore 'uri 'ourana ekaikauna, weiana 'uriai hiabu 'umuna ekara'au matoha iruba rarina 'akina hiabuna nikara'au 'abana. Weiana 'uri hiabuna ekara'au beraura mai kupa ebawapuranakia. <sup>3</sup> Weiana hiabu aonai pekau tekarahi teriri hanopaka ahanai,

ia hanona hiabu ebenakia matoha hara nikainaka nahahaiara 'abana. <sup>4</sup> Iamo ehina benakia hano tubuna abomo 'anoai tiomu tabakia mai matiu ha a'i katea'i ki'a, 'a maearima weiakia paukia ahakiai Tirama ena mani'a aha'i haukia mo katea'i ki'anakia. <sup>5</sup> Ia pekau ehina benakia maearima a'i kateahu 'arinakia, iamo kateba haiaranakia weiana nawa ima aonai katehaiara ihobona hara nikainaka ena haiara 'abana. <sup>6</sup> Wapu weiakia aokiai maearima hanona 'ari katetabuna iamo a'i katetabu ahina, katenuatae ki'a baha pate'ari iamo 'ari hanona ia herekiai kebeau pare.

<sup>7</sup> Pekau weiakia ihaihakia hanona matoha huari hotikia 'abakia teba'orunakia huari kateao, arakiai hanona taba ha tebau'una matoha obia ibau'una gold ai tebabaina 'abana, wairakia hanona matoha maearima wairakia 'abana. <sup>8</sup> Buikia hanona matoha babi'e buikia homa'akia 'abana, nihekia hanona matoha mahi atana laiona nihekia 'abana. <sup>9</sup> Haharakiai hanona auri panabanai te'aeanakia, ia banikia 'urukia hanona matoha hoti bo'ona 'akina mai kori'au tabakia atakia kariota hotiai teberinakia tebeau huari tiao 'urukia 'abana. <sup>10</sup> A'arekia hanona mai 'inikia matoha hara a'arekia 'abakia, mai a'arekia aokiai hanona mai ekia hiabu maearima nawa ima kateba haiaranakia. <sup>11</sup> Ia hanona mai ekia obia 'arana ha, 'uri 'ourana weiana aneruna, ia atana Heberu maeakiai hanona Abadon, 'a Helene maeakiai atana Apoluona, anina hanona Bapururu hauna.

<sup>12</sup> Atetua ki'a obona kori'uaina aba eore, murinai haeamona atetua ki'a obokia rua naha'imanakia katemai.

### *Aneru Iba'abaihauna Ena Pihi Eubaina.*

<sup>13</sup> Aneru iba'abaihauna ehore ena pihi eubaina, ba aia ha aona 'uruna hanona Tirama wairanai itara robena gold ai tebabaina haunai 'ea bani herekiai weia ekarahi. <sup>14</sup> Aia weiana ehore aneru iba'abaihauna pihi ea'ina hauna ehina bena etibaha, "Aneru bani weiakia Efarate ate apa'uana haianai aba tebirinakia haukia korubu ta'inakia." <sup>15</sup> Ba aneru weiakia bani terubunakia, anerukia weiakia hanona aba teba'oru tibatima ihau weiana aonai nawa weiana aonai wapu weiana aonai beraura hoana weianai katekarahi hanopaka maearimakia iwate paipana aihau aonai paipa

ha kateahu 'arinakia. <sup>16</sup> Aneru bani weiakia ekia huari haukia mai hotikia tetuabinakia aiakia aona hanona ikoinai kerepu hinabu rua 'abana. <sup>17</sup> Weiana e'u mahabanai ai, hotikia mai huari haukia weiakia hotikia ahakiai temia'au haukia aihanakia, haharakia i'aeakia hanona tebiro, matoha iruba, tepurutoni, mai tea'aeabu, 'a hoti arakia hanona matoha mahi atana laiona arakia 'abana, abomo pinakiai iruba, hiabu, mai pihara atakia salpa mai irubakia tekarahi. <sup>18</sup> Taba ki'a obokia aihau weiakia hoti pinakiai tikarahi haukia tehore hanopaka maearimakia iwate paipana aihau aonai paipa ha teahu 'arinakia, taba weiakia hanona iruba, hiabu, mai pihara atakia salpa. <sup>19</sup> Pokina hoti ekia hiabu hanona pinakia ai mai a'arekia ai temiaho, a'arekia hanona matoha 'erau 'abana mai arakia ba weianai maearima tea'i ki'anakia.

<sup>20</sup> Maearima harina taba ki'a obokia aihau neiakiai a'i te'ari haukia hanona a'i teraona kabe baha, imakiai tebabainakia tabakia a'i temurinakia, auba ki'a obokia ikutiakia a'i teba puanakia, kaiba'uku weiakia gold, silba, kopa, pihara, mai matiu ai tebabainakia haukia, weiakia a'i teihaiha, aia a'i tio'o, a'i tika'a tabakia ikutiakia a'i tehabona. <sup>21</sup> Ekia ahuhau hoakiai, ekia nepu hoakiai, ekia nabau hoahoakia ki'a obokiai, mai ekia bainao hoahoakiai a'i teraona kabe 'apua.

## 10

### *Aneru Ha Mai Puka Iouna Papana Ha.*

<sup>1</sup> Weiana aneru taburana ha aihana kupai eriri nimai huanina 'auhao ai ero'abuna, arana ubinai hanona 'opa, wairana hanona ea matoha beraura, ia aena ihakia hanona matoha iruba bero berokia 'abakia. <sup>2</sup> Imanai hanona puka iouna papana ha aba ikaikau hauna ea'ina. Aena itipana hanona 'aku ahanai ehe'au ia awarina hanona hanopaka ahanai ehe'au. <sup>3</sup> Aneru weiana eio aota matoha mahi atana laiona ni'arara 'abana. Ba eio raninai, kupa rani 'abaihau hamomo ero'u, ro'u ha ha 'abi tehinana. <sup>4</sup> Ba ro'u 'abaihau hamomo te'abi'abi nonoa hanona aiakia karerena nahoma, iamo aia ha kupai emai aona etibaha, "Ro'u 'abaihau hamomo te'abi hauna kobunina, a'i korerenakia."

<sup>5</sup> Weiana aneru aihana hauna 'aku ahanai mai hanopaka ahanai ekoroti hauna ehore imana itipana etiu taeana kupa. <sup>6</sup> Ba aneru weiana ehore miaho bannaibanai Tiramana weiana kupa mai aona tabakia ikoinai mai hanopaka mai aona tabakia ikoinai mai akupaka mai aona tabakia ikoinai ebabainakia Tiramana atanai e'abi 'uai etibaha, "Rani hanona aba keore, Tirama hanona a'i kebai'ima homa'ana. <sup>7</sup> Iamo aneru iba'abaihau hamomona ena pihi keubaina raninai, Tirama ena raona bunina hanona ketohana, Pou namona neiana hanona ena mahabanai haukia ia ta'arana tea'i haukia ehina benakia."

### *Ioane Puka Iouna Papana Eana.*

<sup>8</sup> Ba aia weiana kupai ao 'uaina hauna haeamona ehinabe muena'u etibaha, "Moao aneru weiana 'akupakai mai hanopakai ekoroti hauna imanai puka iouna weiana ekaikau hauna koa'ina." <sup>9</sup> Ua buonai aeao aneru weiana herena ba anoina puka iouna papana weiana kebena'u. Ba ia au ehina bena'u etibaha, "Moa'ina moana mo'orumuai hanona kemabi, 'a pinamuai hanona kekuma kuma matoha hoho beina 'abana." <sup>10</sup> Ba aneru imanai puka iouna papana weiana a'ina ani obona, weiana pina'uai hanona ekuma kuma matoha hoho beina 'abana, iamo ani obona murinai mo'oru'uai hanona emabi.

<sup>11</sup> Ba ehina bena'u etibaha, "Oi hanona mahabanai 'abina kohina muena, weiana maearima haeai haeai, hano haeai haeai, maea haeai haeai, mai obia arakia haeai haeai haukia robakia koahuna."

## 11

### *Pou Hina Haukia Rua.*

<sup>1</sup> Epua, hiribo ha matoha ikai'ini 'abana ebena'u ba ehina bena'u etibaha, "Omikiri, Tirama ena marea robe mai itara robena kohobonakia, abomo aonai maearima tibahubari haukia kotuabinakia. <sup>2</sup> 'A marea robe ara aonai ena i'aea huri 'ekana atapakai hauna hanona a'i kohobona, pokina Tirama ena maearima aha'i haukia aba ebenakia ia hanona nawa bariabui rua aiara robena katehe hai ehe haina. <sup>3</sup> Iamo au pou'u ihinana haukia rua hiabu kabenakia, pute habunikia weiakia aoko'o katebaiha

baihaina haukia katebatotonakia, weiana wapu taha hamomo hinabu rua imabui harau haea (1,260) weia mahabanai 'abina katehinana.”

<sup>4</sup> Neiakia hanona olibe matiukia rua mai ramepa rua hanopaka ikoinai Obiapakana wairanai tekoroiti haukia. <sup>5</sup> Ba hau ha kenuatae terarua kea'i ki'akia raninai, terarua pinakiai iruba katekarahi weiakia ekia 'ou haukia keahu 'ari orenakia, weiana maearima tabana ia'i ki'akia kenuatae aina hanona ia abomo ua ke'ari aihō. <sup>6</sup> Ia terarua hanona mai hiabukia kupa katekaiabuna, weiana ekia mahabanai 'abina ihinana beraurakia aokiai hanona abara a'i ketibo. Abomo mai hiabukia bei 'aki katebahaeaina aruaruai keao, weiana katenuatae raninai atetua ibaramana akakia haeai haeai hanopakai kateba ramanakia.

<sup>7</sup> Ekia pou hina 'abina weiana katebaorena kepua murinai, aiahu mahina weiana 'uri e'oura ki'a aonai kekara'au hauna kehore terarua kehuari benakia keahunakia keahu 'arinakia. <sup>8</sup> Weiana terarua te'ari hauanikia hanona aiara apa'uana Ierusalem airabuanai katenoti. Weiana hanona terarua ekia Obiapaka matiu ibiri ropo ubinai e'ari 'ekana, aiara weiana 'abi ibabatainai atana tehinana, Sodoma 'ao Aikupito. <sup>9</sup> Wapu aihau mai abirana ha aonai maearima haeai haeai, itubu haeai haeai, maea haeai haeai, mai hano haeai haeai haukia katemai 'ari hauanikia weiakia rua kateihanakia, iamo katehina benakia a'i kate horenakia. <sup>10</sup> Hanopaka haukia hanona hau rua ekia 'ari paunai kateonamo ki'a baha, abomo maearima ha ha beruberu tabakia katebaibeni, pokina mahabanai haukia weiakia rua tehore hanopaka haukia tebahaiara ki'anakia.

<sup>11</sup> Iamo wapu aihau mai abirana ha weiakia teore murinai, mauri nibaibeni maeabuna Tirama herenai emai terarua aokiai etoto, weiana temikiri tekoroiti. Ua'a teihanakia haukia ikoikiai hanona teta'u ki'a. <sup>12</sup> Ba aia apa'uana ha kupai emai teona, eapari etibaha, “Tomokara'au tomiai neia.” Weiana terarua hanona i'oataki haukia wairakiai 'auhao ha aonai tekara'au teao kupa. <sup>13</sup> Beraura hoana weianai kanokau apa'uana ha eka'a, weiana aiara apa'uana iwate paipana harau haea aonai paipa ha maikoina

hanona ebapururuna, abomo kanokau ehore maearima ikoinai taha 'abaihau hamomo (7,000) eba'arinakia. Maearima harina weiakia a'i te'ari haukia hanona teta'u ki'a baha, kupa Tiramana atana tea'i taeana.

<sup>14</sup> Weiana hanona atetua ki'a obona ibaruana, aba ekapo raina. Iamo tomobahu, atetua ki'a obona ibaihauna hanona aba kemai.

#### *Aneru Iba'abaihau Hamomona Ena Pih Eubaina.*

<sup>15</sup> Epua, aneru iba'abaihau hamomona ehore ena pih eubaina. Weiana aia apa'uakia kupai te'abi tetibaha, “Hanopaka ipokiaina hiabuna hanona aba eka Obiapaka mai ena Keriso 'eukiai eao. Ia hanona obia 'aranai eao hanopaka kepoki aina keaomo banaibanai.”

<sup>16</sup> Weiana kiro haukia haraurua bani Tirama wairanai ekia obia imia'aukiai temia'au haukia te'umuti tekuti Tirama tebanamona tetibaha,

<sup>17</sup> “Obiapaka Hiabu ikoinai Tiramana e, oi nomiaho mai 'uainai omiaho. Ai tahore namo 'abina tabeni'o. Pokina emu hiabu apa'uana aba oa'ina.

Emu obia aiarana nupoki aina.

<sup>18</sup> Hano haeai haukia teopuere, iamo oi emu opuere ranina ekara'au.

Ba aba te'ari haukia oi emu bakai aonai katewaira tina kobabakainakia ranina aba ekara'au.

Emu ta'ara'i haukia weiakia mahabanai haukia, mai emu maearima robekia, mai oi atamu timariki aina haukia papakia eaomo apa'uakiai epua, ikoikiai 'araki

namokia kobenakia ranina aba ekara'au.

Abomo hanopaka tea'i ki'ana haukia kobapururunakia ranina aba ekara'au.”

<sup>19</sup> Weiana murinai aneru Tirama ena marea robe kupai hauna tekaikauna, ba ena rauhuhu mauana marea robe aonai hauna aihana. Weiana kupa te'imare, 'uru



rarikia tehua, kupa ero'u, kanokau eka'a, mai abara etibo pihara 'abakia.

## 12

### *Babi'e Ha Mai Mahi Ha Atana Dragona.*

<sup>1</sup> Epua, hoa apa'uana ha kupai ewaira tina. Babi'e ha ena habuni ibatoto hanona beraura, mai nawa hanona ia 'apuna ba'akiai, mai bihiu harauhaea rua hanona ena obia ibau'unai temiaho aranai ebau'una. <sup>2</sup> Ia hanona mai nua ba mai haiarana nihai ihobona aba kemaui. <sup>3</sup> Ba hoa haeai mo ha kupai ewaira tina. Mahi ha weia atana dragona 'erau 'abana rarina 'akina birona weia 'arana ikoinai 'abaihau hamomo, 'arana ha ha ahakiai hanona obia ibau'ukia, haeamona 'eana hanona ikoinai harau haea. <sup>4</sup> A'arenai kupa bihiukia iwate paipana aihau aonai paipa ha kupai etaro ahinakia hanopakai ekapo 'aunakia.

Mahi weiana hanona babi'e aba kemaui hauna wairanai ekoroti, nibai'ima babi'e miori kebaramana hanona keana. <sup>5</sup> Ba babi'e emauri nahuna hanona hau papana, miori weiana hanona hanopaka maearimakia ikoikiai auri ikai'ininai kepoki ainakia, ba miori hanona tea'i parena teaoaina Tirama herena mai ena obia imia'aunai. <sup>6</sup> Babi'e hanona ebeau 'akau mana eao hano'akunai, Tirama 'eka ha aba eba'oruna ia 'euna, weia ia kateiha 'inina keao wapu ikoinai taha hamomo hinabu rua imabui harau haea (1,260).

<sup>7</sup> Epua kupai huari erama, Mikaela mai ena aneru kipokia mahi atana dragona tehuarina, mahi weiana ena aneru kipokia tehore Mikaela tehuarina. <sup>8</sup> Iamo mahi ena tabura hanona a'i etaina, ba ekia 'eka kupai hauna teba'akaumana. <sup>9</sup> Mahi rarina 'akina weiana hauna kupai tekapo ahina. (Ia hanona 'erau 'ai'aina weiana atana hanona Tiaporo 'ao Satani, hanopaka maikoina ni'oi ahina hauna.) Ia hanona tekapo ahina eriri hanopakai mai ena aneru kipokia.

<sup>10</sup> Ba aia ha rarina 'akina kupai aona e'abi etibaha, "Bariu eka Tirama ena bamaui, ena hiabu, mai ena obia aiarana, mai Keriso ena hiabu hanona aba tewaira tina, pokina uaho'abaka ekaiahinakia

hauna, weiana rabi mai mararani Tirama wairanai ekaiahinakia hauna hanona aba tekapo ahina.

<sup>11</sup> Uaho'abaka tehore Mamoe nahu ena 'ari aruarunai mai 'abi tohana ihinana paukiai tiaporo weiana teahu parena. Ia kipokia ekia mauri hanona a'i teraona'au aina iamo tenuatae kate'ari.

<sup>12</sup> Ua buonai tomoaoanamo ki'a, wai kupa mai kupai tomiaho haumi. Iamo wai hanopaka mai 'akupaka heremiai hanona keki'a ki'a baha, pokina Tiaporo hanona aba eriri ewahi heremi, niopuere ki'a baha, pokina e'jobina ena rani hanona aba eko'o ko'o."

<sup>13</sup> Dragona weiana e'jobina ia hanona aba tekapo ahina eriri hanopakai hanona ia ehore babi'e weiana miori ebaramana hauna ebatetuana. <sup>14</sup> 'A babi'e hanona po'i apa'uana ha banina rua tebena, weiana ia kehore kerobo keao hano'akuna ena 'eka ha, aba teba'oruna weia kateiha 'inina ihau aihau mai abirana ha aonai, 'erau weiana ia a'i ketabu ahina. <sup>15</sup> Ba 'erau weiana pinanai hanona bei emama ahina matoha ate 'abana weiana babi'e murinai earu eao kearu 'akaumana. <sup>16</sup> Iamo hanopaka ehore babi'e ebaraina, hanopaka pinana ekaikauna tou beina weiana dragona pinanai earu emai hauna maikoinai etono 'au orena. <sup>17</sup> Dragona hanona babi'e eopuereai ki'ana, ba eao babi'e nahuna ikoikiai kehuarinakia. (Weiakia hanona Tirama ena rauhuhu 'abikia tika'aina haukia mai Iesu ehina pounakia 'abikia tia'i taeana haukia.)

## 13

### *Aiahu Mahikia Rua Tekara'au.*

<sup>1</sup> Epua, maha'u eao hanona aiahu mahina ha 'akuai ekara'au aihana. Ia hanona 'eana harau haea mai 'arana 'abaihau hamomo, ba 'eana korikiai hanona mai ekia obia ibau'ukia harau haea, 'ara ha ha ahakiai hanona Tirama ibaki'ana 'abikia atakiai tererenakia. <sup>2</sup> Aiahu mahina weiana aihana ihana

hanona matoha puti 'aki apa'uana atana taiga 'abana aena ihakia hanona matoha mahi atana bea aena 'abana, mai pinana ihana matoha mahi atana laiona pinana 'abana. Ba mahi weiana atana dragona hauna ehore kipona ena tabura, mai ena obia imia'auna, mai hiabu apa'uana aiahu mahina weiana ebena. <sup>3</sup> Aiahu mahina weiana aihana 'arana ha hanona matoha imoai e'ari 'abana iamo imoa weiana haeamona enamo, ba hanopaka maikoinai teta'uta'u huri mahi murinai teka'a. <sup>4</sup> Maearima dragona tekuti aina, pokina ia ehore ena hiabu aiahu mahina ebena, abomo aiahu mahina tekuti aina, te'abi tetibaha, "Tai hanona aiahu mahina neiana 'abana? Tai mai ena tabura ia kehuarina?"

<sup>5</sup> Aiahu mahina hanona bero tebena apa 'abikia, mai Tirama ibaki'ana 'abikia kehina, hiabu tebena nawa bariabui rua aokiai hoahoa weiana kebabaina. <sup>6</sup> Pinana ekaikauna Tirama ibaki'ana 'abikia ehina, mai atana abomo e'abi ki'a bena, Tirama ena miaho 'ekana mai weiakia kupai temiaho haukia ikoikia abomo e'abi ki'a benakia. <sup>7</sup> Ia hanona hiabu tebena Tirama ena robe haukia kehuarinakia keahunakia, ba bero tebena itubu ikoikia, maearima ikoikia, maea ikoikia abomo hano maikoinai kepoki ainakia. <sup>8</sup> Maearima ikoikia hanopaka ahanai temiaho haukia, weiakia Tirama hanopaka ebakorina murinai atakia Mamoe nahu ena mauri pukanai a'i tererena haukia ikoikia hanona aiahu mahina weiana katekuti aina. Mauri pukana weiana hanona Mamoe nahu 'uainai teahu 'arina hauna 'euna.

<sup>9</sup> Mai haiana hauna kehore aia neiana keona.

<sup>10</sup> Tirama nenuatae hau ha katea'ina katebawapurana raninai, hau weiana hanona katea'ina katebawapurana.

Haeamona Tirama nenuatae hau ha akiuai ke'ari raninai, hau weiana hanona akiuai kateharana ba ke'ari. Neiana buonai Tirama ena robe maearimakia hanona bakiroai mai a'ikakaumai katemiaho.

<sup>11</sup> Epuu, aiahu mahina haeai ha aihana, hano aonai ekara'au, 'eana hanona rua matoha mamoe nahu 'abana, ia

e'abi aiana hanona matoha mahi atana dragona 'abana. <sup>12</sup> Ia hanona aiahu mahina weiana kori'uaina hauna herenai emiaho ena hiabu ihobonai eaka, hiabu neianai hanopaka mai temiaho aina maearimana ikoikia ebahi ahinakia mahi kori'uaina weiana 'aranai imoa enamo hauna katekuti aina. <sup>13</sup> Aiahu mahina ibaruana ehore bata'uta'u huri akakia apa'uakia ebabainakia, ha hanona maearima ikoikia wairakia tohanai iruba weia kupai euhu ririna emai hanopakai.

<sup>14</sup> Pokina bero ea'ina bata'uta'u huri akakia weiakia aiahu mahina kori'uaina herenai emiaho aonai ebabainakia haukia hanopaka haukia e'oinakia. Aiahu mahina ibaruana ehore hanopaka maearimakia ebahi ahinakia kaiba'uku ha katebabaina aiahu mahina kori'uaina imarikiaina paunai, weiana akiuai imoa ea'ina ba emauri mue hauna. <sup>15</sup> Aiahu mahina ibaruana hauna bero ea'ina, kaiba'uku weiana mauri maeabuna ebena ke'abi'abi, mai hiabu ebena kaiba'uku kehore maearima kehina benakia weiakia kaiba'uku a'i katekuti aina haukia ikoikia kateahu 'arinakia.

<sup>16</sup> Haeamona aiahu mahina ibaruana ehore maearima ikoikia ebahi ahinakia, papakia mai apa'uakia, obia huakia mai uraru haukia, ta'ara a'i tia'i haukia mai ta'ara tia'i haukia, ikoikia hanona mani'a ha imakia itipanai 'ao paukia ahakia katea'ina. <sup>17</sup> Maearima mani'a weiana a'i kea'ina hauna hanona taba ha a'i kekawana mai taba ha a'i kekawakawai 'apuana, mani'a weiana hanona aiahu mahina weiana atana 'ao atana irere itu-abina hauna. <sup>18</sup> Maearima mai ena aobero hauna ata ituabi neiana ke'jobina hanona ketaina, aobero hauna kehore aiahu mahina ata ituabina keraonana, pokina tuabi tuabi neiana hanona maearima ha atana ituabina ihobona, tuabi tuabi neiana hanona hinabu 'abaihau imabui harau haea reana 'abaihau (666).

## 14

*Mamoe Nahu Ena Maearima Hui Mahamhana Tea'ina.*

<sup>1</sup> Epuu, maha'u eao hanona mamoe nahu aihana, Siona Oeona ahanai ekoroti, herenai hanona maearima ikoinai taha ikoinai hinabu hamomo bariabui bani (144,000) weiakia paukia ahakia ia atana mai Hamana atana tererenakia haukia.

<sup>2</sup> Ba 'uru namona ha aona kupai emai, 'uruna matoa ate bo'okia tiaru mai kupa niro'u 'uruna 'abana. 'Uru weiana aona hanona matoa kita ahu haukia ekia kita atakia hap tipapura ainakia 'abana. <sup>3</sup> Ba maearima weiakia tehore Tirama ena obia imia'auna mai mauri tabakia bani mai kiro haukia wairakiai, hui mahamahana ha tea'ina. Tai ha hui weiana kemarere aina a'i ketaina ia weiakia haukia 144,000 hanopaka herenai aruarunai ekawanakia haukia mo te'iohina. <sup>4</sup> Maearima weiakia hanona babi'e kipokia a'i tenabau haukia, ekia mauri aonai hanona ki'a herenai te'abaea harai, ia Mamoe nahu aeana niao hanona murinai ti'au haukia, mai hanopaka maearimakia baiatakia ia ekawanakia, mai baibeni tabakia kori'uaikiai teao Tirama mai Mamoe nahu herekiai. <sup>5</sup> Bai'oi 'abina ha pinakiai a'i tehina, ia hanona herekia beho aha'i.

*Aneru Aihau Bakai Ranina Pouna Tehinana.*

<sup>6</sup> Epua, aneru haeai ha kupa ba-iatanai erobo aihana, ia hanona Pou namona nemiaho banaibanai hauna ea'ina, weiana hanopakai temiaho haukia herekiai keiroro aina, hano ikoikiai, itubu ikoikiai, maea haeai haeai, mai maearima ikoikiai herekiai. <sup>7</sup> Ia ehore e'abi aota etibaha, "Tirama tomota'u aina mai ia atana tomobanamona, pokina maearima ikoinai kebabakainakia ranina aba etaina, ia hanona kupa, hanopaka, 'akupaka, mai bei hanoai tebuti haukia ebabainakia hauna, tomokuti aina."

<sup>8</sup> Ba aneru ibaruana ha aneru kori'uaina murinai erobo, e'abi aota etibaha, "Aba e'eho! Babulonia aiara apa'uana, aba e'eho. Ia ehore ena biai hano ikoikiai maearimakia ebainu 'arinakia, bia weiana hanona ena maha porepore hoahoakia."

<sup>9</sup> Ba aneru ibaihauna ha aneru rua te'uai haukia murikiai erobo, e'abi aota etibaha, "Hau ha aiahu mahina mai ena kaiba'uku nekuti ainakia, mai ia pauna ahanai 'ao imana ahanai mahi ena mani'a nia'ina hauna, <sup>10</sup> ia abomo Tirama ena opuere wainina keinu, weiana Tirama ia keopuere aina puma kebaohai ki'ana matoa waini weiana kaputi aonai aba teheina bei kipokia a'i tebahaeamona hauna 'abana. Ki'a hauna weiana hanona

aneru robekia mai Mamoe nahu wairakiai kehaiara iruba mai pihara atana salpa mai irubana aokiai. <sup>11</sup> Iruba weianai tihaiara hiabuna hanona kekara'au to'ona keaomo banaibanai. Aiahu mahina weiana mai ena kaiba'uku tekuti aina haukia 'ao mahi atana mani'ana tea'ina haukia hanona ekia arai ranina ha aha'i, mararani mai rabi katehaiara mo."

<sup>12</sup> Neiana buonai Tirama ena robe haukia weiakia ena rauhuhu 'abikia tika'ainakia mai Iesu tia'ikakaumana haukia hanona bakiroai katemiaho.

<sup>13</sup> Ba aia ha kupai aona e'abi etibaha, "Abi neiana morerena. Bariu keaomo wairai aonai weiakia Obiapaka aonai ti'ari haukia hanona tenamo." Auba Robe abomo e'abi etibaha, "Abi tohana, ekia aro'ariai katearai, pokina ekia hoahoa namokia katehore ia kate'abanakia."

*Hanopaka Ena Ariari Ranina Ekara'au.*

<sup>14</sup> Epua, maha'u eao hanona 'auhao ha porena waira'uai aihana, 'auhao weiana ahanai hanona hau ha ihana matoa Maearima nahuna 'abana emia'au, 'arana ahanai hanona obia ibau'una gold ai tebabaina hauna, ba imanai hanona iraburabu tabana ha nihena eara hauna ea'ina. <sup>15</sup> Ba aneru haeai ha marea robeai ekarahi emai ba 'auhao ahanai emia'au hauna eaparina aiana 'ubiai etibaha, "Emu iraburabu moa'ina moariari aina, pokina witi iarina ranina aba ekara'au, hanopaka witina hanona aba te'oru harai." <sup>16</sup> Ua buonai 'auhao ahanai emia'au hauna ehore ena iraburabu tabana eraburabu aina, ba witi hanopakai hauna maikoina earina.

<sup>17</sup> Ba aneru haeai ha marea robe kupai hauna aonai ekarahi, ia abomo imanai iraburabu tabana ha nihena eara hauna ea'ina. <sup>18</sup> Haeamona aneru haeai ha weiana iruba nipoki aina hauna itara robenai emai ba aneru weiana imanai iraburabu nihena eara hauna ea'ina hauna eaparina, aiana 'ubiai etibaha, "Emu iraburabu moa'ina hanopaka ena bine haharuanai bine buabuakia moarinakia, pokina hanopaka ena bine buabuakia hanona aba te'aiba harai." <sup>19</sup> Ba aneru weiana ehore ena iraburabu tabana hanopaka ahanai eraburabu aina, hanopaka ena bine buabuakia ekabe hurinakia, eba raronakia ba ekapo utanakia bine buabuakia imutukia 'ekanai, weiana

hanona Tirama ena opuere 'ekana. <sup>20</sup> Ba aiara kapenai bine buabuakia imutuna 'ekana temutunakia, ba imutu 'ekana aruaru earu ahi, earu eao ena ro'e hanona hoti ekoroti pinana ihobona, 'a ena homa'a hanona kilometa hinabu aihau.

## 15

*Aneru 'Abaihau Hamomo Ia'i Ki'akia Tabakia Orekia 'Abaihau Hamomo Tea'inakia.*

<sup>1</sup> Epuu, au bata'uta'u huri hoana haeai ha apa'uana kupai aihana. Aneru 'abaihau hamomo imakiai hanona maearima ia'i ki'akia tabakia ki'a obokia 'abaihau hamomo tea'inakia, neiakia hanona orekia, murikiai hanona haeai ha a'i kerama, weiana Tirama ena opuere hanona keore.

<sup>2</sup> Haeamona maha'u eao taba ha aihana, ihana matoha 'akupaka weiana eiroro wairai ihobona karati mai irubana 'abana. Maearima weiakia aiahu mahina mai ena kaiba'uku mai atana irere ituabina hoana teahu parenakia haukia ikoikiai weia 'aku haianai tekoroiti, Tirama kita atakia hap ebenakia hanona imakiai tea'inakia. <sup>3</sup> Ia hanona Mose weiana Tirama ena ta'ara'i hauna ena hui ha mai Mamoe nahu ena hui abomo ha tehuiaina tetibaha, "Obiapaka

hiabu ikoinai Tiramana e, emu aka teapa'ua ki'a baha, bata'uta'u huri akakia nubabai. Uru ikoikiai ekia Obia 'arana e, emu taeara hanona tebero wairai abomo toha tohakia.

<sup>4</sup> Obiapaka e, ikoikiai hanona oi kateta'u aini'o, mai oi atamu katea'i taeana. Pokina oi ikupaiamu hanona orobe. Hano ikoikiai hanona katemai oi wairamuai katekuti aini'o. Pokina oi emu babai berokia hanona aba tewaira tina."

<sup>5</sup> Neiakia murikiai maha'u eao kupai marea robe aihana ikaikau emiaho, weiana hanona Tirama ena rauhuhu emiaho paraboana. <sup>6</sup> Ba aneru 'abaihau hamomo aba teba'oru maearima ia'i ki'akia tabakia ki'a obokia 'abaihau hamomo katebabainakia haukia marea robeai tekarahi, habuni namokia tohakia

atakia linen mai 'imare 'imarekia tebatotonakia, mai gold 'apakia haharakiai te'aberenakia. <sup>7</sup> Weiana mauri tabakia bani baiatakiai ha ehore gold puoukia 'abaihau hamomo ea'inakia aneru 'abaihau hamomo weiakia ebenakia, puou weiakia aokiai hanona Tirama weiana kemiaho banaibanai hauna ena opuere ebonu. <sup>8</sup> Ba Tirama ena nuabi mai ena hiabu paunai iruba hiabuna marea robe aonai ebonu 'auna, hau ha a'i kekatoto 'apua keaomo aneru 'abaihau hamomo weiakia katehore maearima ia'iki'akia tabakia ki'a obokia 'abaihau hamomo katebaore harainakia.

## 16

*Tirama Ena Opuere Puoukia 'Abaihau Hamomo Tebakiki Oioinakia.*

<sup>1</sup> Epuu, aia ha marea robeai aona aneru 'abaihau hamomo ehinabe 'aotanakia etibaha, "Tomoao, Tirama ena opuere puoukia 'abaihau hamomo haukia katebakiki oioinakia hanopaka ahanai."

<sup>2</sup> Ua buonai aneru kori'uaina eao ena puou hano ahanai ebakiki oina, ba tua ki'a obokia mai haiarakia maearima weiakia aiahu mahina ena mani'a tea'ina haukia mai ena kaiba'uku tekuti aina haukia ahakiai terama.

<sup>3</sup> Aneru ibaruana ehore ena puou 'aku ahanai ebakiki oina, ba 'aku ebaebo matoha 'ari hauna aruaruna 'abana, ba taba weia 'aku aonai temiaho haukia ikoikiai te'ari.

<sup>4</sup> Aneru ibaihauna ehore ena puou ate mai bei hanoai tebuti haukia ahakiai ebakiki oina, ba tebaebo aruaru ai teao.

<sup>5</sup> Ba bei nipoki ainakia aneruna aiana aona e'abi etibaha,

"Robe Tiramana e, oi nomiaho mai 'uainai omiaho haumu, emu bakai neiakiai ki'a haukia puma obahoainakia hanona obero ki'a baha.

<sup>6</sup> Pokina ia tehore emu robe haukia mai mahabanai haukia teahu 'arinakia aruarukia tebakiki oinakia, ba oi ohore aruaru obenakia kateinu hanona ekia ki'a 'arana obamuena."

<sup>7</sup> Ba aia ha itara robenai emai aona e'abi etibaha,



“E, 'abi tohana,  
Obiapaka  
hiabu ikoinai Tiramana e,  
oi emu bakai weiana ki'a haukia  
puma obahoainakia hanona tohakia mai  
tebero.”

<sup>8</sup> Aneru ibabanina ehore ena puou beraura ahanai ebakiki oina, ba beraura bero tebena irubanai maearima keba'aranakia. <sup>9</sup> Hiabu rarina 'akina ehore maearima eba'aranakia, ba Tirama weiana maearima ia'iki'akia neiakia ebaramanakia hauna atana teururu aina haeamona raona kabe a'i tenuatae aina mai ia a'i tebanamona. <sup>10</sup> Aneru ibaimana ehore ena puou aiahu mahina ena obia imia'auna ahanai ebakiki oina, ba mahi weiana ena obia aiarana maikoina ewapura abuna, weiana maearima tehaiara ki'a baha paunai maeakia te'urinakia, <sup>11</sup> mai ekia haiara mai ekia tua paukiai Tirama weiana kupai nemiaho hauna teururu aina, mai ekia aka ki'ai kateraona kabe hanona a'i tenuatae.

<sup>12</sup> Aneru iba'abaihauna ehore ena puou Eufrate atena apa'uana ahanai ebakiki oina, ba ate beina e'ororo 'au, taetana tainai obia 'arana haukia ekia taeara eba'oruna katemai. <sup>13</sup> Ba auba ki'a obokia\* aihau aihanakia ihakia matoha hobi 'abakia, ia hanona mahi atana dragona hauna pinanai, mai aiahu mahina pinanai, mai mahabanai hauna bai'oina pinanai tekarahi. <sup>14</sup> Ia hanona tiaporo aubakia ki'a obokia, hoa mai bata'uta'u huri akakia tibabai, ba ia hanona tikarahi hanopaka maikoina ena obia 'arana haukia katebararonakia Hiabu ikoinai Tiramana ena bakai wapuna apa'uana kemai raninai katehuarina.

<sup>15</sup> Weiana aia ha aona e'abi etibaha, “Tomobahu, au hanona bainao hauna 'abana kawahi. Hau ha eno'a nemiaho mai ena habuni ebatotona nemiaho hauna hanona enamo, weiana ia hauna 'abaeana a'i kekabanai kabanai, haeamona mako wairakiai a'i kehaumaea.”

<sup>16</sup> Ba auba ki'a obokia aihau weiakia tehore obia 'arana haukia tebararonakia 'eka weiana Heberu maeakiai atana teaparina 'Aramagedono' haunai.

<sup>17</sup> Aneru iba'abaihau hamomona ehore ena puou maeabu aonai ebakiki oina, ba marea robe aonai obia imia'auna ahanai

aia ha emai e'abi 'aota etibaha, “Aba eore.” <sup>18</sup> Ba kupa e'imare, ero'u, 'uru rarikia tebua, mai kanokau ki'a obokia 'akikia teka'a, kanokau ua homana ha a'i eka'a 'apua ua'i baha 'akinai maearima hanopakai erama raninai emai mo bariu, kanokau neiana hanona ki'a obona tohana. <sup>19</sup> Weiana aiara apa'uana atana Babulonia hanona epa'a paipana aihau, mai hano ikoikiai aiarakia apa'uakia hanona tepururu. 'A Tirama hanona Babulonia aiara apa'uana ena ki'a eraona 'inina, ba ia ehore ena kaputi ai Babulonia ebainuna, kaputi weiana hanona Tirama ena opuere ki'a obona waininai ebonu 'auna. <sup>20</sup> Ba kereibua ikoikiai te'akauma, mai kobio hanona wairakia aha'i. <sup>21</sup> Abara kupai te'eho matoha pihara apa'uakia, ekia puma hanona kilogram imabui 'abana hanona kupai te'eho maearima teahu ki'anakia, ba maearima tehore Tirama teururu aina pihara abarana weiana paunai, pokina ena ia'iki'a neiana hanona eki'a ki'a baha.

## 17

### *Rea Babi'ena Apa'uana Ena Puma Kehoaina.*

<sup>1</sup> Epua, aneru 'abaihau hamomo weiakia puou 'abaihau hamomo tea'inakia haukia 'abakia ha emai here'u ehina bena'u etibaha, “Omai, au kahore rea babi'ena apa'uana ena puma kehoaina hauna kabaihani'o, ia hanona bei bo'ona 'arakiai nemiati. <sup>2</sup> Hanopaka ena obia 'arana haukia rea babi'ena weiana kipokia tenabau, hanopaka maearimakia abomo ia kipokia tenabau matoha biai teinu 'ari 'abana.”

<sup>3</sup> Ba Auba Robe ao'u eba'bonu 'auna, aneru weiana ehore eaoaina'u hano'akuna, weia babi'e ha aihana, aiahu mahina ha birona ahanai emia'au. Mahi weiana hauna maikoinai ata tererenakia weiakia hanona 'abi ki'a obokia Tirama herenai, mahi weiana 'arana hanona 'abaihau hamomo 'eana harau haea. <sup>4</sup> Babi'e weiana hanona habuni apupuna mai birona ebatotona, gold mai pihara namoabukia 'imare 'imarekiai, mai kutu 'imare 'imarekiai ebataitaina, imanai hanona gold 'erena ha, aonai hanona ena

\* 16:13: (13) 'ao 'opukia

aka ki'a obokia mai ena nabau hoahoakia 'opukiai ebonu. <sup>5</sup> Ia pauna ahanai hanona ata bunina ha tererena,

'BABULONIA APA'UANA, HANOPAKA ENA REA BABI'EKIA IKOIKIAI MAI TABA KI'A OBOKIA MAIKOINAI HINAKIA.'

<sup>6</sup> Ba babi'e weiana aihana hanona Tirama ena robe haukia mai Iesu pouna tehinana haukia eahu 'arinakia mai aruarukiai einu 'ari. Aihana raninai ata'uta'u huri.

<sup>7</sup> Ba aneru weiana ehina bena'u etibaha, "Aehoma buonai nuta'uta'u huri? Au kahore babi'e naiana 'abina bunikia mai mahi weiana ahanai emia'au 'arana 'abaihau hamomo 'eana harau haea hauna anina kaba'jobini'o. <sup>8</sup> Ba aiahu mahina naiana oihana hauna hanona 'uainai emiaho, ia bariu hanona a'i nemiaho, ia hanona 'uri 'ourana weiana a'ena aha'i haunai kekara'au kemai, ba keao kepururu baihana. Maearima weiakia hanopaka erama emaimo bariu hanopakai temiaho haukia, weiakia atakia mauri pukana aonai a'i tererenakia haukia, mahi weiana kateihana hanona kateta'uta'u huri, pokina ia hanona 'uainai emiaho, bariu a'i nemiaho, haeamona kemai mue.

<sup>9</sup> "Maearima mai ena aobero hauna hanona neiana obona keobo, aiahu mahina arana 'abaihau hamomo hanona oeo 'abaihau hamomo, aiara weiakia babi'e epoki ainakia, mai obia 'arakia haukia 'abaihau hamomo. <sup>10</sup> Weiakia haukia ima hanona aba tepururu, ia ha hanona bariu nemiaho, ha hanona a'i nimai baha, ia weiana kemai raninai rani papana mo kemiaho. <sup>11</sup> Aiahu mahina weiana 'uainai emiaho ia bariu a'i nemiaho hauna hanona obia 'arana hauna iba'ababanina, weiakia 'abaihau hamomo haukia 'abakia ha, ba ia abomo kepururu.

<sup>12</sup> "Aiahu mahina 'eana harau haea weiakia oihanakia hanona obia 'arakia haukia harau haea, iamo obia 'arakiai haukia weiakia ekia aiara a'i tia'i bahanakia, ia aiahu mahina kipokia obia hiabuna katea'ina beraura hoana hamona aonai. <sup>13</sup> Obia 'arana haukia weiakia harau haea ikoikiai ekia raona hanona kehamona, ba ekia tabura mai ekia hiabu aiahu mahina katebena. <sup>14</sup> Ba ia haukia hanona Mamoe nahu katehuarina, ia Mamoe nahu kehore keahu

'iti'itinakia, pokina ia hanona obia ikoikiai ekia Obiapaka mai obia 'arana haukia ekia Obia 'arakiai hauna, ia ti'abana haukia weiakia eaparinakia mai etina'anakia, mai aia ibabua 'au haukia hanona Mamoe nahu kipokia huari aonai ekia 'ou haukia kateahu 'iti'itinakia."

<sup>15</sup> Weiana aneru haeamona ehina bena'u etibaha, "Bei weiakia oihanakia ahakiai rea babi'ena emia'au, hanona maearima haeai haeai, rama haeai haeai, hano haeai haeai, mai maea haeai haeai haukia. <sup>16</sup> Aiahu mahina mai 'eana harau haea oihanakia haukia hanona rea babi'ena weiana 'arina a'i kate'ari, ena taba ikoikiai katea'i obonakia maihauna katehabona, bitiona kateana, iruba ai katehuhuna ke'ara obo. <sup>17</sup> Pokina Tirama obia 'arana haukia weiakia aokiai hanona nuatae ehorotina ena raona ikoinai katebaorena, weiana aokia katebahamomona ekia hiabu aiahu mahina katebena keobia aina, keaomo Tirama ena 'abi ketohana. <sup>18</sup> Babi'e weiana oihana hauna hanona aiara apa'uana, weiana hanopaka ena obia 'arana haukia ikoikiai nipoki ainakia."

## 18

### *Babulonia Aiara Apa'uana Aba E'eho.*

<sup>1</sup> Neiakia murikiai aneru haeai ha aihana kupai eriri emai. Ia ena hiabu hanona eapa'ua ki'a baha weiana ena nuabi ehore hanopaka maikoinai ebaea obona. <sup>2</sup> Aiana taburanai eio aota etibaha, "Babulonia aiarana apa'uana aba e'eho, aba e'eho!

Ia hanona tiaporo mai auba ki'a obokia\* ikoikiai ekia kaimue 'ekanai eao, roborobo 'opukia mai 'arikia a'i ti'ari haukia ekia paparo'ai eao.

<sup>3</sup> Pokina hanopaka maearimakia ikoikiai ia kipokia nabau hoahoakia ki'a obokia tebabai matoha ena bia pahihinai teinu 'ari 'abana. Hanopaka ena obia 'arana haukia abomo ia kipokia aba tenabau, haeamona hanopaka ena kawakawa haukia hanona enuatae ki'a tabakia

\* 18:2: (2) 'ao 'opukia

weiakia arakia rarikiai  
ekia obia aba tebapa'uanakia.”

<sup>4</sup> Ba aia haeai ha aona etibaha,  
“E'u maearima e,  
aiara naiana aonai  
tomokarahi tomai.  
Ia kipokia ki'a akakia  
a'i tomobabai haeamo marikina.  
Ia kipokia ia'iki'ana pumana  
a'i tomohoai haeamona marikina.  
<sup>5</sup> Pokina ena ki'a hanona  
aba ero'ana eaomo kupa,  
mai Tirama hanona ia ena babai  
ki'a ikoikiai niraona 'ininakia.

<sup>6</sup> Ena baibeni ihobonai  
katobeni muena.  
Taba ebabaina hauna 'arana  
rani rua katohorena.  
Emi 'ere aokiai muramura  
pahihina eba'oruna  
katoinu ihobonai,  
ia ena 'ere aonai  
muramura pahihina katoba'oruna  
hanona ena tabura katoba  
kabanaina rani rua.  
<sup>7</sup> Ia kipona taba weiakia  
'arakia rarikia enuatae ki'a  
mai ena nuabi ebena ihobokiai mo  
katobahaiarana mai katobahaina.  
Pokina kipona aonai  
niapa netibaha,  
'Au hanona obia 'arakia  
babi'e'u mo ha n̄amiati,  
au hanona wapu aha'i,  
mai au hanona a'i kahai 'apua.'

<sup>8</sup> Ua buonai wapu hamona aonai  
ia ia'iki'ana akakia ikoikiai  
ketabu ahinakia,  
'ari, hai mai arobo.  
Haeamona ia hanona iruba aonai  
ke'ara obo.  
Pokina Obiapaka Tirama  
ia nibabakaina hauna hanona  
etabura ki'a baha.

<sup>9</sup> “Hanopaka ena obia 'arana haukia  
ia kipokia tenabau mai ena kepu teaon-  
amoai haeamo haukia hanona iruba  
weiana hiabuna nikara'au kateihana  
raninai katehai 'ari ki'a baha. <sup>10</sup> Ena  
hau haiara paunai, kateta'u ki'a atau'ai  
katekoroti katehai kate'abi,  
'Eki'a ki'a baha,  
eki'a ki'a baha.  
Babulonia aiara apa'uana  
mai taburana e,  
beraura hoana hamona 'akimo

aonai puma ohoaina.’

<sup>11</sup> “Hanopaka ena kawakawa haukia  
abomo katehai 'ari ki'a baha, pokina  
ekia kawakawa tabakia hanona hau ha  
a'i kekawanakia. <sup>12</sup> Kawakawa tabakia  
weiakia hanona gold mai silba, pihara  
namoabukia mai kutu 'imare'imarekia,  
habuni namoabukia, habuni apupukia,  
habuni nibinibikia ta'eta'ekia, habuni  
birokia, matiu timikia namokia haeai-  
haei, mahi atana elefant 'eanai tebabai  
tabakia ikoikiai, matiu 'arakia rarikia  
haukia, kopa, auri mai pihara pahihina  
namonai tebabainakia tabakia, <sup>13</sup> weiakia  
aniani timikia ibanamokia muramura  
ataki sinemon mai spaisi, muramura  
timikia 'orimokia atakia insense mai  
mira, mai muramura taburana hauani  
katetarona hauna, waini mai olibe ho-  
hona, parawa namokia, witi, poromakau  
mai mamoe, hoti, mai kariota, ta'ara'i  
haukia, mai maearima ekia mauri. <sup>14</sup> Taba  
tikawakawai haukia weiakia katehina  
bena katetibaha,  
'Babulonia e,  
taba namokia onuatae ainakia  
haukia te'akauma,  
mai emu obia tabakia mai  
emu nuabi tabakia ikoikiai  
hanona aba te'akauma,  
ba a'i kotabu ahi muenakia.’

<sup>15</sup> “Kawakawa haukia taba weiakia ia  
herenai tekawa kawainakia ba monikiai  
teobia haukia atau'a 'akinai katekoroti,  
kateta'u haiara weiana ki'a obona pau-  
nai katehai 'ari ki'a baha. <sup>16</sup> Kate'abi  
katetibaha,  
'Eki'a ki'a baha,  
aiara apa'uana herena  
eki'a ki'a baha.  
Habuni namoabukia,  
apupukia, mai birokia  
obatotonakia, gold,  
pihara namoabukia 'imarekia,  
mai kutu 'imarekiai otaitai. <sup>17</sup> Beraura  
hoana hamona aonai  
emu obia tabakia neiakia  
ikoikiai hanona aba tepururu.’

“Aunohi kapena haukia ikoikiai mai  
tehe'au tiharima haukia ikoikiai, aunohi  
ai tiaka haukia ikoikiai mai ekia mauri  
'akuai tikaoao aina haukia ikoikiai atau'ai  
katekoroti. <sup>18</sup> Ia ni'ara hiabuna nikara'au  
kateihana raninai kateio katetibaha,  
'Aiara tabana hanona

aiara apa'uana neiana 'abana?'  
<sup>19</sup> Arakia apuroro katehore 'aunakia katehai 'ari ki'a baha katetibaha, 'Eki'a ki'a baha, aiara apa'uana herenai eki'a ki'a baha, mai ekia aunohi 'aku kapenai haukia ikoikiai oi emu obia tabakiai kepu haukiai teao, 'a beraura hoana hamona 'akimo aonai oi aba opururu.

<sup>20</sup> Tomoaonamo. Kupa, mai Tirama ena robe haumi, mai iuhubeau haumi, mai mahabanai haumi e, tomoaonamo ki'a baha, Tirama ehore ia puma ebahoaina pokina ia wai heremiai ebabai ki'a paunai. ”

<sup>21</sup> Ba aneru taburana ha ehore iata rarina 'akina ha ea'i taeana 'aku aonai ekapo uhuna ba e'abi etibaha, “Taeara neiana ihobonai Babulonia aiara apa'uana 'aku aonai katekapo uhuna, ba a'i kateiha muena.

<sup>22</sup> Kita atana hap tipapura aina haukia ekia 'uru namokia, mai hui a'itaea haukia, marori mai pihi ubai haukia 'urukia namokia oi aomuai a'i kateo muena. Oi aomuai aka haeai haeai tibabai haukia ha a'i katetabu ahi muena. Oi aomuai tona tiorina 'uruna a'i kateo muena.

<sup>23</sup> Ramepa eana ha oi aomuai a'i ke'ara mue. Hawainibe mahamaha hauna mai babi'ena aiakia oi aomuai a'i kateo'o muenakia. Neiakia katerama pokina emu kawakawa haukia hanona hanopaka ena maearima apa'uakiai teao, oi emu nepuai hanona hanopaka maearimakia o'oi ahinakia.

<sup>24</sup> Babulonia aiara apa'uana hanona puma ehoina pokina ia aonai mahabanai haukia mai Tirama ena robe haukia aruarukia tetabu ahinakia,

mai hanopaka ahanai teahu 'arinakia haukia ikoikia aruarukia.”

## 19

### *Kupa 'Ubinai Teio, Haleluia!*

<sup>1</sup> Neiana murinai, au 'uru ha aona 'uruna matoha maearima to'una rarina kupa 'ubina teio tetibaha,

“Haleluia! Hamabanamona. Bamauri, nuabi, mai hiabu hanona eka Tirama 'euna.

<sup>2</sup> Pokina ena bakai hanona tohana mai ebero. Tirama ehore rea babi'ena apa'uana puma ebahoaina, ena maha porepore babai ki'ai hanopaka ea'i ki'ana paunai.

Tirama ena ta'ara'i haukia teahu 'arinakia aruarukia 'arabia aba ebamuena.”

<sup>3</sup> Haeamona teio mue tetibaha, “Haleluia! Hamabanamona. Aiara apa'uana ni'ara mai hiabuna nikara'au a'i kepua 'apua keaomo banaibanai.”

<sup>4</sup> Ba kiro haukia harau rua bani mai mauri tabakia bani tekaipehu Tirama weiana obia imia'auna ahanai emia'au hauna tekuti aina, ba teio tetibaha, “Amen, Haleluia!”

### *Mamoe Nahu Ena Hawainibe Tatuna.*

<sup>5</sup> Ba weia obia imia'aunai aia ha emai etibaha,

“Ena ta'ara tua'ina haumi ikoimiai mai maearima ikoimiai weiami papana mai apa'uana ia tumariki aina haumi ikoimiai, eka Tirama hamabanamona.”

<sup>6</sup> Ba 'uru ha aona, 'uruna matoha mako rarina 'akina 'ao roio rarikia tihara puni 'ao kupa niro'u 'uruna rarina 'abana teio tetibaha,

“Haleluia! Hamabanamona. Pokina Obiapaka aika eka Tirama hiabu ikoinai hauna nihore aika nipoki ainaka.

<sup>7</sup> Aoka kenamo, kahaonamo ki'a, ia nuabi kahabena. Pokina Mamoe nahu ena hawainibe ranina aba ekara'au, haeamona keatawana babi'ena abomo aba eba'oru.

<sup>8</sup> Habuni namona atana linen



erau'a mai ne'imare hauna tebena kebatotona.” (Habuni namona weiana anina hanona Tirama ena robe haukia aka berona tebabaina haukia.)

<sup>9</sup> Ba aneru ehina bena'u etibaha, “'Abi neiana morerena. Tebeaubeau benakia Mamoe nahu ena hawainibe tatuna aonai temai haukia hanona tenamo.” Haeamona e'abi mue etibaha, “Neiakia hanona Tirama pinana 'abikia tohakia.”  
<sup>10</sup> Weiana au aneru weiana aena pokinai akaipehu kakuti aina, 'a ia au ehina bena'u etibaha, “'A'i kokuti aina'u! Au hanona ta'ara'i hau'u 'abaea'u, oi 'abamu mai uaho'abamu Iesu ena pou tehinana haukia 'abakia. Tirama ikupaianamo kahakuti aina! Pokina Iesu ihina pouna hanona mahabanai hiabunai.”

### *Hoti Porena Ahanai Emia'au Hauna.*

<sup>11</sup> Epuu, au kupa ekaikau hoti pore obona ha waira'uai aihana, ahanai emia'au hauna atana hanona 'AIA IBABUA'AU' mai 'TOHA TOHANA' Ia hanona bero paipanai nibabakai mai nehuari. <sup>12</sup> Mahana ihakia hanona matoha iruba neupa 'abana, aranai hanona obia ibau'ukia bo'okia, ia ahanai hanona ata ha irere'au ba hau ha ata weiana a'i e'iohina, 'a ia kipona mo e'iohina. <sup>13</sup> Ena habuni homa'ana ebatotona hauna hanona earuaru obo. Ia atana tehinana hanona 'TIRAMA ENA 'ABI'. <sup>14</sup> Kupa ena huari haukia ia murinai te'au, hoti porekiai temia'au, habuni namokia atakia linen tebatotonakia, tepore obo mai terau'a. <sup>15</sup> Pinanai hanona kareba nihena eara hauna nikarahi, ena aka hanona hano haeai haeai haukia keahu 'iti'itinakia, ba ia kehore auri ikai'iniiai kepoki ainakia. Hiabu ikoinai Tiramana ena opuere kebatohana 'ekana bine buabuana ibahari 'iti'itina 'ekana kehe 'iti'itinakia. <sup>16</sup> Ena habuni ahanai 'apena tainai hanona ata neiana ererena,

'OBIA 'ARANA HAUKIA IKOIKIAI EKIA  
OBIA 'ARAKIA HAUNA MAI OBIA  
IKOIKIAI EKIA OBIAPAKA.'

<sup>17</sup> Ba aneru ha beraura aonai ekoroti aihana, roborobo kupa baiatanai tirobo haukia ikoikiai eapari 'aotanakia etibaha, “Tomai, Tirama ena tatu apa'uanai to-moto'u. <sup>18</sup> Weiana wai hanona obia 'arana haukia, huari poki haukia, mai

tabura haukia bitiokia katoani, hoti mai hoti ai temia'au haukia bitiokia katoani, mai maearima ikoikiai weiakia ta'ara tia'i haukia mai ta'ara a'i tia'i haukia, papakia mai apa'uakia bitiokia katoani.”

<sup>19</sup> Ba aiahu mahina weiana mai hanopaka ena obia 'arana haukia mai ekia huari haukia kipokia teto'una aihanakia, tenuatae hoti porenai emia'au hauna ena huari haukia kipokia katehuari. <sup>20</sup> Iamo aiahu mahina teahuna tea'i maurina, ena mahabanai hauna bai'oina ohi. Mahabanai hauna bai'oina weiana hanona aiahu mahina wairanai bata'uta'u huri hoahoakia ebabai hauna, hoahoa weiakiai aiahu mahina mani'ana tea'ina mai ena kaiba'uku tekuti aina haukia e'oi ahinakia. Weiakia terarua mauri maurikia iruba 'obuna weiana pihara mai irubana atana salpa ni'ara banaibanai 'ekana tekapo uhunakia. <sup>21</sup> Weiana hoti porena ahanai emia'au hauna ehore pinanai kareba ekarahi haunai 'ou haukia ikoikiai eahu'ari orenakia, ba roborobo ikoikiai bitio weiakiai teani 'ari.

## 20

### *Keriso Kipokia Kateobia Ihau Taha Hamona.*

<sup>1</sup> Epuu, aneru ha kupai ekarahi eriri emai aihana, imanai hanona 'uri 'ourana a'ena aha'i hauna kina mai tabiri apa'uana ha ea'inakia. <sup>2</sup> Ia ehore mahi atana dragona weiana 'erau 'ai'aina hauna ea'ina, mahi weiana hanona Tiaporo 'ao Satani, ba tabiriai ebiri 'inina ihau ikoinai taha hamona kemiaho aina. <sup>3</sup> Aneru weiana ehore mahi weiana 'uri 'ourana a'ena aha'i hauna aonai ekapo utana ba ekaiabu 'inina, mai ahanai rauhuhu hoana ehorotina, weiana ia hanopaka maearimakia a'i me'oinakia keaomo ihau taha hamona, weiana murinai hanona kerubuna kemiaho rani papana.

<sup>4</sup> Epuu, obia imia'aukia aihanakia, ahakiai temia'au haukia hanona hiabu tea'ina katebabakai. Haeamona weiakia Iesu pouna tehinana mai Tirama ena 'abi tehinana paukiai 'akokia tekabe hurinakia haukia aubakia aihanakia. Ia hanona aiahu mahina weiana 'ao ena kaiba'uku a'i tekuti aina mai ena mani'a paukia ahakiai 'ao imakia ahakiai a'i

tea'ina haukia. Ia hanona temauri mue Keriso kipokia teobia ihau ikoinai taha hamona. <sup>5</sup> Neiana hanona 'ariai mikirimue kori'uaina. ('Ari haukia harina maikoina hanona a'i temauri mue eaomo ihau ikoinai taha ha ekabanai.) <sup>6</sup> Maearima weiakia mikiri mue kori'uaina aonai katemiaho haukia hanona tenamo mai terobe. 'Ari ibaruana hanona ena hiabu aha'i ia herekiai, 'a ia hanona Tirama mai Keriso ekia robe akakia ibabaikia haukia kateao, mai kipokia kateobia haeamo keaomo ihau ikoinai taha hamona.

### *Satani Iruba 'Obunai Tekapo Uhuna.*

<sup>7</sup> Ba ihau ikoinai taha hamona keore murinai hanona Satani ena wapura 'ekanai katerubuna. <sup>8</sup> Satani kekarahi keao hanopaka maikoinai hanopaka maearimania ke'oinakia, weiakia itubu rua Gog mai Magog kebato'unakia huari kateao. Ekia bo'o hanona kebo'o ki'a baha matoha poe 'anona 'abana. <sup>9</sup> Hanopaka maikoinai tekabanai teao Tirama ena maearima temiaho 'ekana mai ena raona'au aiarana tekori kakaiarona. Iamo iruba kupai eriri 'eho huari haukia weiakia maikoinai eba'ara obonakia. <sup>10</sup> Ba tiaporo weiana ia e'oi ahinakia hauna hanona weia pihara mai irubana atana salpa ni'ara 'obuna aonai tekapo uhuna, aiahu mahina mai mahabanai hauna bai'oina tekapo uhunakia 'ekana. Weia teihau puma kate hoaina mararani mai rabi keaomo banaibanai.

### *Obia Imia'auna Apa'uana Porenai Emia'au Hauna Ena Bakai.*

<sup>11</sup> Epuia, obia imia'auna apa'uana pore obona ha mai ahanai nemia'au hauna aihana. Hanopaka mai kupa hanona wairanai tekaobo tai ha a'i eiha muenakia. <sup>12</sup> Ba 'ari haukia aihanakia apa'uakia mai papakia Tirama ena obia imia'auna wairanai tekoroti, ba aneru puka tekai kaunakia, baiatakiai puka haeai ha abomo tekaikauna weiana hanona mauri pukana. 'Ari haukia ekia babai puka aokiai irere ihobokiai eba bakainakia. <sup>13</sup> 'Aku aonai te'ari haukia 'aku ehore euhu 'aunakia, haeamona 'ari mai 'ari haukia ekia 'eka tehore ekia 'ari haukia teuhu 'aunakia. Ba maearima ikoinai hanona ha ha ekia babai ihobohobokiai eba bakainakia. <sup>14</sup> Murinai 'ari mai 'ari haukia ekia 'eka abomo iruba 'obuna aonai tekapo

uhunakia. Iruba 'obuna weiana hanona 'ari ibaruana. <sup>15</sup> Maearima weiakia atakia weia mauri pukana aonai irere aha'i haukia ikoikiai hanona iruba 'obuna aonai tekapo uhunakia.

## 21

### *Kupa Mahamahana Mai Hanopaka Mahamahana.*

<sup>1</sup> Epuia, maha'u eao kupa mahamahana mai hanopaka mahamahana aihanakia, pokina kupa kori'uaina mai hanopaka kori'uaina aba te'akauma, 'akupaka abomo wairana aha'i. <sup>2</sup> Ba aiara robena aihana, Ierusalemah mahamahana, Tirama herenai kupa 'ubinai eriri emai. Aihana ihana matoha hawainibe mahamaha babi'ena tebataitai haraina teba'oruna atawana 'euna 'abana. <sup>3</sup> Ba aia ha obia imia'aunai emai aona e'abi 'aota etibaha, "Bariu Tirama ena miaho 'ekana hanona maearima herekiai, Tirama hanona ia kipokia katemiaho, ia hanona Tirama ena maearimai kateao, Tirama kipona hanona ia herekiai kemiaho, haeamona ekia Tirama ai keao. <sup>4</sup> Ia kehore mahakia beikia ikoikiai mahakiai keutu obonakia, ba maearima a'i kate'ari mue, a'i kateaoko'o mue, a'i katehai mue, mai a'i katehaiara mue, pokina taba 'ai'aikia weiakia hanona aba te'akauma baihana."

<sup>5</sup> Epuia, obia imia'auna ahanai emia'au Tiramana e'abi etibaha, "Tomobahu, Au taba ikoikiai aba nababai maha mahanakia!" Haeamona ehina bena'u etibaha, "Abi neiana hanona morerena pokina 'abi neiakia hanona toha tohakia mai aokia tohakiai kateai taeanakia." <sup>6</sup> Ba haeamona ehina bena'u etibaha, "Taba ikoikiai aba ababai orena. Au hanona Alepa mai Omega, Kori'uaina mai Murihaina. Ia'iramana mai Imapuana hau'u. Hau ha 'akona ni'ororo hauna au kahore mauri beina nebuti 'arana aha'i hauna kabena keinu. <sup>7</sup> Ena a'ikakauma ketabura, ki'a aokiai kekabanai hauna hanona itauna neiakia ikoikiai kea'inakia, ba au hanona ia ena Tirama ai kaeao, ia hanona au naha'u ai keao.

<sup>8</sup> Iamo 'ubo haukia, a'i tia'ikakauma haukia, aka ki'a haukia, ahuaahu haukia, nabau haukia, nepu haukia, kaiba'uku tekuti aina haukia, mai bai'oi haukia ikoikiai ekia 'eka hanona iruba 'obuna weiana pihara mai irubana atana salpa

ni'ara banaibanai 'ekana aonai. Neiana hanona 'ari ibaruana."

### *Jerusalema Mahamahana.*

<sup>9</sup> Epuā, aneru ha emai here'u, ia hanona aneru 'abaihau hamomo weiakia puou 'abaihau hamomo aokiai ia'iki'a tabakia orekia 'abaihau hamomo tebabonunakia tea'inakia haukia 'abakia ha, ba ehina bena'u etibaha, "Omai neia, au kahore hawainibe mahamaha babi'ena kabaihani'o, ia hanona Mamoe nahu atawana."

<sup>10</sup> Weiana Auba Robe ao'u ebabonu 'auna ba aneru ea'ina'u eaoaina'u oeo ha apa'uana ba'ona 'ubinai, ba aiara apa'uana robena, Ierusalema, ebaihana'u Tirama herenai kupa 'ubinai neriri nimai.

<sup>11</sup> Tirama ena nuabi hanona aiara neiana ebaea obona, ena 'imare hanona matoha pihara namoabuna atana daiamond 'abana, eiroro ki'a matoha karati 'abana.

<sup>12</sup> Aiara neiana ena ara hanona eapa'ua mai ero'e, pa'abina hanona harau haea rua, pa'abina ha ha herekiai hanona aneru ha ha tikoroti temiaho haukia ikoinai harau haea rua. Pa'abina ha ha ahakiai hanona Isaraela itubuna harau haea rua atakia ha ha tererenakia.

<sup>13</sup> Pa'abi aihau hanona taetana tainai, ha aihau hanona tototaina tainai, ha aihau hanona ahitaina tainai, ha aihau hanona tibotaina tainai. <sup>14</sup> Aiara apa'uana arana ena kori'au piharakia hanona harau haea rua, ahakiai Mamoe nahu ena iuhubeau haukia harau haea rua atakia tererenakia.

<sup>15</sup> Aneru weiana ehina bena'u hauna imanai hanona ikai'ini ha gold ai tebabaina hauna ea'ina, ba aiara apa'uana, mai ena pa'abi, mai ena ara kehobonakia. <sup>16</sup> Aiara ebakorina 'uni'unina bani baiatakia hanona teihobo, ena homa'a mai ena mata abomo ihobo, ikai'iniai aiara ehobona ba ena homa'a etabu ahina hanona kilometa taha rua hinabu rua (2,200), ena ro'e abomo teihobo. <sup>17</sup> Aneru ehore ara ena imuki\* ehobona hanona meta imabui harau haea 'abaihau (66), aneru hanona maearima ekia hobohobo ihobonai ua ehobo aihona.

<sup>18</sup> Ara hanona pihara namoabuna atana daiamond ai ebakorina, ba aiara apa'uana hanona gold tohanai ebabaina eiroro ki'a matoha karati 'abana. <sup>19</sup> Aiara ebakorina arana ena kori'au piharakia hanona

pihara namoabukia haeaihaeai ikoinai harau haea rua ai ebataitainakia, pihara namoabukia atakia hanona neiakia, kori'uaina hanona daiamond, hauna eiroro, ibaruana hanona sapaia, hauna epurutoni, ibaihauna hanona kalakedo, hauna e'apuro, ibabanina hanona emerald, hauna ekupa, <sup>20</sup> ibaimana hanona sadonu, hauna ebirobiro, iba'abaihauna hanona rubi, hauna ebiro, iba'abaihau hamomona hanona krusolito, hauna ewaima, iba'ababanina hanona berulio, hauna ekupa, iba'ababani hamomona hanona topasio, hauna eiroro, ibaharau haeana hanona krusoparaso, hauna ekupakupa, ibaharau haea hamomona hanona huakinto, hauna epurutoni, mai ibaharau haea ruana hanona ametuso, hauna e'apupu. <sup>21</sup> Ara pa'abikia harau haea rua ba pa'abi ha ha hanona kutu porekia rarikia 'imare 'imarekiai tebabainakia. Aiara ibuana taearakia ikoikia hanona gold tohana 'abaeana, teiroro ki'a matoha karati 'abana.

<sup>22</sup> Au aiara weiana aonai Marea Robe ha a'i aihana, pokina Obiapaka hiabu ikoinai Tiramana mai Mamoe nahu hanona aiara Marea Robena. <sup>23</sup> Aiara apa'uana weiana hanona beraura 'ao nawa eakia a'i nenuatae, ia ahanai a'i kerara, pokina Tirama ena nuabi hanona aiara nibaeana Mamoe nahu hanona aiara ena ramepai niao. <sup>24</sup> Hanopaka maearimakia aiara eanai kateka'a, haeamona hanopaka ena obia 'arana haukia hanona ekia nuabi haeai haeai kateaoainakia ia aonai. <sup>25</sup> Pa'abi hanona rani ikoinai a'i katekaiabu 'apuana, pokina rabi hanona weia aha'i. <sup>26</sup> Hanopaka maearimakia hanona ekia nuabi tabakia mai ekia obia tabakia aiara weiana aonai katekatoto ainakia. <sup>27</sup> Iamo 'opu tabana ha a'i ketoto mai hoahoa ki'a obokia tebabai haukia 'ao bai'oi haukia ha hanona aiara weianai a'i kekatoto 'apua, iamo weiakia atakia Mamoe nahu ena mauri pukanai tererenakia haukia mo katekatoto.

## 22

### *Mauri Beina Atena.*

<sup>1</sup> Epuā, aneru weiana ehore mauri beina atena eba ihana'u, eiroro wairai matoha

\* 21:17: (17) 'ao bao

karati 'abana. Ba Tirama mai Mamoe nahu ekia obia imia'aunai eharu riri emai, <sup>2</sup> ba aiara taearana apa'uana ibuanai eharu ririna. Ate 'arana abira abira hanona matiu weiakia mauri tibaibeni haukia tekoroṭi, ihau hamona aonai hanona rani ikoinai harau haea rua buabuakia tiba ramanakia, nawa ha ha aokiai tēbua'a. Ia raukia hanona hanopaka maearimakia ikoikiai ekia inawa ibanamokia tabakia. <sup>3</sup> Aiara weiana aonai hanona Tirama ena ururu ba'anai tēmiaho tabakia ha weia a'i kahatabu ahina. Pokina Tirama mai Mamoe nahu ekia obia imia'auna hanona aiara weiana aonai kate miaho. Ena ta'ara'i haukia katehore ia katekuti aina, <sup>4</sup> ba ia wairana kateihana, haeamona Tirama atana hanona paukia ahakiai irere 'au. <sup>5</sup> Rabi ha weia keaha'i, ramepa 'ao beraura eakia hanona a'i katenuatae ainakia, pokina Obiapaka Tirama kehore ea kebenakia. Haeamona ia hanona obia 'arana haukiai kateao katepoki keaomo banaibanai.

### *Iesu Aba Kemai.*

<sup>6</sup> Epuā, aneru weiana ehina bena'u etibaha, "Abi neiakia hanona toha tohakia mai kateba tohanakia. Obiapaka Tirama weiana mahabanai haukia aubakia niba taburanakia ia pouna tēhinana hauna ehore ena aneru euhuna taba aba katerama haukia ena ta'ara'i haukia keba ihanakia."

<sup>7</sup> Iesu e'abi etibaha, "Tomobahu, Au hanona aba kawahi, mahabanai 'abikia puka neiana aonai tika'ainakia haukia hanona tenamo."

<sup>8</sup> Au Ioane hanona taba neiakia aihanakia mai 'urukia ao'o. Ba aia ao'o mai aihanakia murinai, taba neiakia ebaihana'u aneruna aena pokinai akaipehu kakuti aina nahoma. <sup>9</sup> Iamo ia ehore au ehina bena'u etibaha, "A'i kokuti aina'u. Au hanona ta'ara'i hau'u oi 'abamu mai uaho'abamu mahabanai haukia 'abakia mai puka neiana 'abina tē'ima haraina haukia ikoikiai 'abakia. Oi hanona Tirama ikupaiana mo kokuti aina." <sup>10</sup> Haeamona aneru weiana ehina bena'u etibaha, "Puka neiana ena mahabanai 'abikia a'i kokaiabunakia, pokina neiakia ikoikiai katerama ranikia hanona aba herekai. <sup>11</sup> Maearima weiakia ki'a akakia tibabai

haukia hanona ki'a akakia temebabai, weiakia hoahoa 'opukia tibabai haukia hanona hoahoa 'opukia temebabai, weiakia bero akakia tibabai haukia hanona bero akakia temebabai, weiakia tirobe haukia hanona temerobe."

<sup>12</sup> Iesu e'abi etibaha, "Tomobahu. Au hanona aba kawahi. Au kahore ikoimia emi babai ihobokiai ha ha 'arami kabenimi paunai, 'arami hanona kawahi ainakia. <sup>13</sup> Au hanona Alepa mai Omega, Kori'uaina mai Murihaina, taba ikoikiai ia'iramakia mai ibapuakia hau'u."

<sup>14</sup> Ekia habuni tētunakia haukia hanona tenamo, weiana ia hanona bero kate'ina mauri nibaibeni matiuna buabuana kateani, mai aiara weiana Ierusalemā mahamahana pa'abina aonai katekatoto. <sup>15</sup> 'A aiara weiana kapenai hanona maearima weiakia wae ha 'abakia haukia, nepu ba'ari haukia, nabau hoahoakia ki'a obokia tibabai haukia, ahuhau haukia, kaiba'uku tēkuti haukia, mai maearima weiakia bai'oi 'arina ti'ari ekia 'abi'abia mai ekia hoahoi tibi'oi haukia ikoikiai. <sup>16</sup> "Au Iesu hanona e'u aneru auhuna ewahi 'abi tohakia neiakia kebaibeni wai\* Tirama ena marea haumi heremi. Au hanona Davida obia 'arana hauna Ramuna mai ena rama hau'u. Au hanona raurani bihiuna 'imarena."

<sup>17</sup> Auba Robe mai hawainibe mahamaha babi'ena ohi ti'abi tētibaha,

"Omai!"  
Tabana aia neiana niona hauna abomo me'abi metibaha,

"Omai!"  
Tabana 'akona ni'ororo hauna hanona kemai. Abomo tabana nenuatae hauna hanona kemai mauri beina 'arana aha'i hauna keinu.

<sup>18</sup> Puka neiana ena mahabanai 'abikia tiona haukia ikoikiai narobenakia. Hau ha 'abi neiakia ahakiai 'abi haeai ha kehore 'auna raninai, Tirama kehore ia'iki'a tabakia puka neiana aonai irere haukia ia ahanai kehore 'aunakia. <sup>19</sup> Ba hau ha mahabanai pukana neiana aonai 'abi ha kea'i parena raninai, Tirama kehore ia ena itau weiakia mauri nibaibeni matiuna ahanai hauna mai aiara robena aonai hauna, weiakia puka neiana aonai robakia teahu haukia, ia herenai kea'i parenakia.

<sup>20</sup> Iesu, taba neiakia 'abikia nehina pounakia hauna netibaha,

\* 22:16: (16) 'ao oi



“'Abi tohana,  
au hanona aba kawahi.”  
Amen. Obiapaka Iesu e,  
'omai.

<sup>21</sup> Nabahuba'ari, Obiapaka Iesu ena  
aoko'o hoana hanona Tirama ena  
maearima ikoimiai heremiai kemiaho.  
Amen.

## 'Abi Anikia

### ABELA

- hanona Kaino hatina.

### 'ABI'UAI APA'UANA

- hanona maearima rua baiataki ai aokia tibahamona hanona 'abi'u ai apa'uana tibabaina. Maearima 'abi'u ai apa'uana nibabaina raninai ni'abi'u ai 'abana herenai taba namona ha kebabaina, ba ibamue nai hanona 'abana weiana abomo ni'abi'u ai ia herenai abomo taba namona ha kebabaina.

Bariu Tirama ena 'abi'u ai apa'uana hanona Tirama ehore ebaramana, ba e'abi'u ai ena maearima ia murinai kate'au raninai ia hanona ena maearima Hamakia mai ekia Obiapakai keao.

'Abi'u ai apa'uakia Tirama e babainakia hanona rua 'aki mo. Kori'uaina hanona Tirama Mose herenai e babaina, ba e'abi, maearima ia ena rauhubu 'abikia keka'ai harainakia hanona Ia kipona ena maearima tohakiai kebaonakia, ua buonai 'abi'u ai apa'uana kori'uaina aonai hanona hau ha Tirama wairanai a'i etaina.

'Abi'u ai apa'uana ibaruana aonai hanona Tirama e'abi etibaha, Maearima ha Iesu Keriso aonai kea'ikakauma hauna hanona Tirama ia kebatohana bero hauna, ihobona matoha ia hanona a'i tebabai ki'a 'apua 'ao Tirama ena rauhubu ha a'i tekabe 'apuana 'abana.

### ABRAHAMO

- hanona Isaraela hanopakana hamakia kori'uaina. 'Uaina 'akinai Tirama ehore Aberahamo ehinabena, ia kehore hano mahamahanana ha Aberahamo kebena weia kemiaho. Tirama ia ehinabena kipona ena hano tohana kehabona keao hano weiana ketabuna. Aberahamo Tirama aiana eka'aina. Ba eharima, eao atau'a 'akinai, ihau bo'ona 'aki eharima, eaomo hano weiana etabu ahina. Ba weiana hanona hano weiana bariu atana tiaparina Isaraela.

Tirama ena 'abi'u ai apa'uana

kori'uaina hanona Aberahamo herenai e babaina. Tirama Aberahamo ehinabena ena maearima kipokia Ia tainai katetai raninai ia hanona Tirama ena iha'ini maearimakia tohakiai kateao.

Aberahamo hanona babi'e atana Sara eatawana. Miori ha a'i tebaramana eaomo terarua teanepaka toha. Epu a Tirama hoa ha e babaina weianai Sara miori ha ebaramana. Miori teaparina Isako.

Isako epa'ua hanona babi'e ha atana Rebeka eatawana. Rebeka miori rua ebaramanakia, ba terarua hanona miori bai'apaea, atakia hanona Esau mai Iakobo. Iakobo atana ibaruana hanona Isaraela. Iuda haukia ekia ata hanona Iakobo herenai emai ba tetibaha, 'Isaraela haukia'.

Iakobo hanona a'a hati rua eatawanakia, atakia hanona Lea mai Rahela, mai ta'ara'i babi'ekia rua eatawanakia. Ia ehore miori ikoinai harau haea rua ebaramanakia, ba ia hanona Isaraela itubuna harau haea rua 'aba'abakia. Atakia hanona Ibawaira tinana 7.4-8 ai irere'au ua'a.

Miori weiakia harau haea rua tehore miori bo'ona tebaramanakia, ba ia nahukia miorikia tehore miori bo'ona tebaramanakia, uahomana eaomo Isaraela maearimakia haukia ebo'o waira 'akinai. Ba ia ikoiki ai hanona Aberahamo kupuna 'aba'abana haukia.

### ADAMU

- 1. Adamu hanona maearima kori'uaina, Tirama ehore ia e babaina hanopakai. Tirama ehore 'anoai Adamo e babaina.

2. Popouna tohanai hanona Adamo atawana Eba ohi Tirama aiana a'i teka'aina ba tebabai ki'a, rani weiana emaiaina bariu hanona maearima ikoinai tebabai ki'a to'ona.

3. 1 Korinto 15.45 aonai Iesu Keriso hanona nahaparina Adamu murihaina, pokina ia ehore ekia ki'ai ebamaurinakia. Adamu ebabai ki'a hanona maearima eaoainakia tebabai ki'a. 'A Iesu ehore maearima ekia ki'ai ebamaurinakia

haeamona mauri mahamahana ebenakia.

## AIKUPITO

- hanona hanopaka ha Isaraela hanopakana herenai, 'uainai hanona Isaraela maearimakia hanona Aikupito ai ta'ara tea'i ihau ikoinai hinabu bani (400). Iuhubeau 7.34-38.

## 'AKU BIRONA

- hanona Isaraela mai Aikupito ba- iatakiai nemiaho. 'Mose' 'ekana koihana.

## ALEPA

- hanona rererere kori'uaina Helene haukia maeakia ituabina aonai, ihobona matoha A hanona rererere kori'uaina piritani maeana ABC ituabina aonai. Ua buonai aba tererena ihobonai, 'Obiapaka Iesu Keriso hanona Alepa,' weiana anina hanona ia hanona kori'uaina, taba ikoikiai ia'iramakia hauna. Helene haukia maeakia ituabina aonai rererere orena 'akina hanona atana Omega. Isu hanona taba ikoikiai ia'iramakia hauna, ihobona mo, ia hanona taba ikoikiai puakiai nemiaho hauna, taba ikoikiai hanona ia aonai katepua.

## AMEN

- Heberu maeakiai 'Amen' anina hanona, 'Ua mehoma', 'Ua merama aiho', 'ao "Abi tohana'. Hau ha ni- bahuba'ari raninai 'abana ikoikiai aokia ketaina kate'abi 'Amen'.

## ANERU

- hanona Tirama ena iuhubeau haukia weia kupai ia wairanai temiaho. Iuhubeau neiakia hanona maearima aha'i, 'a ia hanona auba. Ia hanona kahaihanakia a'i ketaina, 'a kipokia katebawaira tinanakia hanona kahaihanakia.

Tirama ena aneru neuhunakia ena aka tibabainakia. Ia ekia aka hanona Tirama ena maearima kateiha 'ininakia( Iuhubeau 12.6-11; 27.23, Heb 1.14). Rani baika hanona Tirama neuhunakia tiao ena maearima herekiai ena 'abi tibenakia.

Aneru ekia obia hanona atana Mikaela (Iuda 9). Haeamona aneru apa'uana ha hanona atana Gabriela (Luka 1.19, 26)

## AREOPAGO

- hanona oeo papana ha atana, weia Atene aiaranai. Aiara apa'uana maearima apa'uakia oeo weiana ahanai temiato'u. Ba maearima weiakia ekia miato'u abomo atana teaparina Areopago.

## ARONA

- hanona Levi 'aba'abana ha ba Levi hanona Iakobo nahuna harau haea rua 'abakia ha. Ia hanona maearima kori'uaina tea'i taeana robe akakia kebabai. Ba Isaraela haukia 'ao Iuda haukia baiatakiai hanona Tirama ehore Arona kupuna haukia e'uahinakia robe akakia katebabai.

Rani ha Isaraela maearimakia baika tehore Mose mai Arona ohi aiakia a'i teka'aina raninai, Tirama ehore ebawaira tina haraina weiana ia terarua hanona 'uai haukia Ia ehore etina'anakia. Tirama ehina benakia Isaraela itubuna harau haea rua te'uai ainakia haukia ha ha ekia ikai'ini tea'inakia Tirama ena itu robena aonai tehorotinakia. Erani raurani hanona Arona ena ikai'ini ehuhu abomo etaitai haeamona ebua'a. Tirama e'abi, rani weiana keao aina hanona Arona ena ikai'ini hanona rauhuhu mauana aonai kemiaho weia Tirama ena itu robena aonai ihobona hoa ha 'abana. Numera 17.1'10; Heberu 9.4, koihanakia, haeamona Levi mai Mose abomo koihanakia.

## ATEMI

- hanona tirama babi'ena ha. Maearima bo'ona weia Asia hanonai hanona tirama weiana tekuti aina.

## AUBA KI'A OBOKIA

- hanona Satani murinai ti'au aubakia. Ia ekia aka apa'uana hanona maearima katea'iki'anakia mai maearima katebaka'a pare- nakia Tirama aiana katekabena iamo Satani aiana kateka'aina. Rani baika hanona maearima aokiai titoto, maearima weiakia Satani ena aka ki'a obokia tibabai haukia.

## AUBA ROBE

- hanona Tirama Aubana, ia hanona maearima weiakia Iesu Keriso tia'ikakaumana haukia aokiai nemiaho. Ia ena aka hanona nahomakia;

- a. Ia nihore maearima Tirama ena 'abi niba'iobinakia. (Ioane 16.13; 1 Korinto 2.10-13)
- b. Maearima weiakia Iesu Keriso tia'ikakaumana haukia paukiai nibahuba'ari Tirama herena. (Roma 8.26)
- c. Maearima ne'uai ainakia Tirama kate'iohina. (Iuhubeau 13.2; 16.6, 7)
- d. Maearima hiabu nibenakia Tirama ena 'abi katehinana mai ena aka katebabaina. (1 Korinto 2.4, 5)
- e. Ia nihore maearima ha ha hiabu nibenakia, ba ia tihore Tirama ena marea ibataburana akakia tibabai. (1 Korinto 12, 14)

**BAALA**

- hanona kaiba'uku ha. 'Uaina 'akinai Isaraela haukia weia Isaraela hanonai a'i teaiara baha aonai, maearima 'eka weianai temiaho haukia hanona Baala tekuti aina. Rani baika Isaraela haukia abomo Tirama ikutiaina tehabona ia Baala tekuti aina, weiana paunai Tirama eopuereai ki'a bahanakia.

**BABULONIA**

- hanona aiara rarina 'akina ha atana. 'Uaina 'akinai aiara weiana haukia Isaraela haukia kipokia tehuari ba teba'ehonakia. Isaraela maearimakia bo'ona tea'inakia ta'ara'i haukiai tebaonakia, teaoainakia Babulonia hanonai ua'a ihau ikoinai imabui harau rua temiaho. (Mataio 1.11, 12, 17. Iuhubeau 7.43)

Ibawaira tina pukana aonai ( 14.8; 17.5; 18 maikoina) hanona aiara apa'uana atana Babulonia robana eahuna. Weiana hanona ibabatai ai ni'abi ia hanona Roma ne'uahina. 1 Petero 5.13 aonai abomo Babulonia hanona Roma ne'uahina.

**BALAM**

- hanona Tirama ena mahabanai hauna ha. Rani ha hanona Isaraela maearimakia ekia 'ou haukia baika, ia hanona 'eka atana Moab haukia. Ekia obia 'arna hauna atana hanona Balak. Ba Balak hanona enuatae Balam kehore Isaraela maearimakia keururu ainakia, weianai Balak enuatae Isaraela keahunakia. Popounai hanona Balam a'i enuatae, iamo aona ea'i a'i haraina Balak herena niao aonai, aneru ha ehore ia ena taeara ekori abuna. 'A doniki Balam

ahanai emia'au hauna mahana eao anere taeara ekori abuna eihana hanona eubo, a'i enuatae keka'a haha, 'a Balam hanona ena doniki niahu ahu beau. Ba doniki ekabe Balam ehinabe pahihina.

Balam Isaraela maearimakia keururu ainakia hanona a'i etaina pokina e'iohina Tirama ena banamo hanona ia ahakiai nemiaho paunai. 'Abi'uai apa'uana mahamahana pukana aonai tererena Balam te'uahina hanona, ia ehore moni eraona'au aina paunai enuatae Balak ohi kateaka hamomo, iamo Balak hanona Balam ena maearima ekia 'ou hauna. (Numeru 22-24)

**BALI**

- hanona witi 'abana. Maearima bali uhona tia'ina parawa tibabaina, iamo parawa witi'iai tibabaina hauna hanona enamo ki'a baha ba parawa bali ai tibabaina hauna.

**BAMAURI HAUNA,**

- Iesu hanona 'Bamauri hauna' pokina Ia ehore taeara ha ea'i kauna, weianai hanopaka maearimakia ekia babai ki'a pumana a'i temehoaina paunai katerobo mauri. Pokina Iesu e'ari hanona maearima ikoikiai ekia puma ehoina, ua buonai Tirama nihore maearima weiakia Iesu tia'ikakaumana haukia ekia ki'a nehina haonakia, nia'i taeanakia, nibatohanakia, bero haukiai nibaonakia ia wairanai mai Iesu buonai.

**BARAK**

- honona Isaraela maearimakia ekia 'uai hauna apa'uana ha. Ia ehore Isaraela haukia e'uai ainakia teo huari aonai tetoto ba ekia 'ou haukia teahunakia. (Judges 4, 5)

**BEA**

- hanona mahi apa'uana ha, hano baika ekia arabu aokiai temiaho. Eka hanopaka (PNG) aonai hanona bea ha'i nemiaho.

**BELESEBULO**

- hanona auba ki'a obona ha atana, itubu baika Isaraela maearimakia herekiai hanona auba weiana tekutiaina. Atana tohana hanona Baal-sebulo. Ia abomo Satani na tiho aubana, auba ki'a obokia ekia



obia ha.  
BENIAMINA

- hanona Iakobo nahuna harau haea rua 'abakia ha, ia hanona Iuda itubuna harau haea rua kupukia 'aba'abakia ha. 'Aberahamo' koihana.

BINE

- hanona buabua ha. Buabua neiana aubauba hanona puka aonai kotabu ahina. Matiu weiana buabua nahomana nibaramana hauna hanona atana bine. Bine hanona tia'ikia waini tibabai. Iuda haukia hanona ekia biraura hanokiai bine matiukia bo'okia tibatonakia ba te'ima harainakia tibapa'uanakia weianai ia katehore tatu katebabaina.

DAVIDA

- hanona Isaraela maearimakia ekia obia 'arana haukia 'arakiai hauna. Hamana atana hanona Iese ba Davida hanona Iese nahuna, murihaina 'akina. Obia 'arana hoana a'i ea'i bahana aonai, ia hanona hamana ena mamoe eiha 'inikakia. Davida ena ramai eririaina eaoaina hanona Iesu erama. (Roma 1.3; Ibawairatina 22.16) 'Uaina 'akinai hanona tetibaha, Keriso bamauri hauna weiana Tirama keuhuna hauna hanona Davida kupuna 'aba'abana eririaina haukia herekiai kemai.

DRAGONA

- hanona mahi ki'a obona ha. Ibawairatina 12.3–13.4 aonai hanona mahi neiana robana eahuna. Maearima baika te'abi mahi atana dragona hauna hanona matoha 'erau 'abana, mai imana mai aeana abomo mai 'eana. Ena tabura hanona eapa'ua. Dragona hanona Satani ne'uahina, ia honona auba ki'a obokia ekia obia.

EBA

- hanona Adamu atawana, Tirama hanopaka ebabaina raninai Adamu ebagai 'uaina, epua Adamu robuna huriana ha ea'ina Eba ebabaina. Iamo Eba ehore 'erau weiana Satani hauna aiana ea'i taeana, ba matiu buana weiana Tirama erauhubuna hauna ea'ina eani. Ia abomo matiu buana weiana hana Adamu ebena eani. Ia terarua hanona maearima kori'uaikia Tirama aiana

a'i teka'aina, ba rani weianai emai bariu hanona maearima ikoinai ki'a tebabai. Adamu mai Eba miori aihau tebaramanakia, atakia hanona Kaino, Abela mai Seta.

ELIA

- hanona Tirama ena mahabanai hauna ha. Ia 'orina ha hanona Iakobo 5.17 aonai kotuabina.

ELISA

- 'Namana' 'ekana koihana.

EPIKURO

- maearimakia hanona atakia 'stoiko'. Ia hanona marere harai haukia, ekia raonaraona apa'uana hanona 'jobi mai 'abi tohana tiraonanakia. Rani bo'ona taba neiakia tiroba ahuainakia.

ESAU

- Isako nahuna hanona miori bai'apaea rua. Atakia hanona Esau mai Iakobo. Esau hanona hau pakana, iamo rani ha mare'a e'ari ki'a hanona kipona pakana ena bero hau i'irina Iakobo herenai ekawa kawaina. Ia aona etaina Iakobo kehore hau pakana ena banamo ikoinai kea'ina 'ekana aniani peani hanona eraonana.

GIDEON

- hanona Isaraela maearimakia ekia 'uai hauna apa'uana ha. Ia ena a'ikakauma Tirama herenai hanona eapa'ua ki'a baha. Ia Tirama ea'ikakaumana ia ke'ima haraina. Ia hanona Isaraela haukia e'uai ainakia teao tehuari, ba Tirama ena taburai ekia 'ou haukia teahunakia, 'a ia haukia hanona a'i ebo'o, tebabita 'aki.

GOMORA

- 'Sodom' koihana.

HAGARA

- hanona ta'ara'i babi'ena ha Sara ena ituai emiaho. Sara hanona Aberahamo atawana. Sara rani weianai miori ha'i ebaramana paunai Hagara ehinabena Aberahamo ohi kateparua. Ba Aberahamo ehore Hagara miori ebena atana teaparina Ismaela. Tirama e'abi'uai Aberahamo miori ha kebena nahunai keao, iamo Ismaela hanona 'abi'uai miorina aha'i, haeamona Tirama taba weiana e'abi 'uaiaina Aberahamo kupuna 'aba'abana eririaina haukia 'eukia hauna Is-

maela kupuna 'aba'abana eririaina haukia hanona 'abi'uai weiana a'i tea'ina. Muriai Sara ehore miori ha ebaramana atana teaparina Isako. Isako hanona Tirama ena 'abi'uai miorina Aberahamo mai Sara herekiai.

Sara Isako ebaramana murinai, Hagara eopuere aina paunai eu'u ahina. Hagara eao oeo atana Sinai herenai emiaho. Ihau bo'ona 'aki tekabanai murinai, Tirama ena rauhuhu oeo weiana ahanai Mose ebena. Weiana buonai Galatia 4 aonai etibaha, Hagara ta'ara'i babi'ena hanona maearima weiakia Tirama ena rauhuhu ta'arana tia'i haukia ihaihakia.

Ia hanona ta'ara'i haukia pokina ekia a'ikakauma hanona 'Maearima ha Tirama ena rauhuhu 'abikia keka'ai harainakia hanona Tirama ia keba-toha bero hauna.'

'A Tirama ena 'abi hanona a'i tia'ikakaumana, Tirama etibaha, maearima weiakia Iesu Keriso aonai tia'ikakauma haukia ikoikiai hanona nia'itaeanakia bero haukia.

#### HALELUIA

- Iuda haukia tenuatae Tirama katebanamona hanona teapari tetibaha, 'Haleluia'. 'Abi neiana anina hanona, 'Yawe ibanamona' weiana hanona tetibaha, 'Tirama ibanamona'.

#### HEBERU

- Maearima weiakia teaparinakia Heberu haukia hanona Aberahamo kupuna 'aba'aba eririaina haukia. Isaraela maearimakia hanona Heberu haukia. Ata neiana, 'Heberu' hanona kupukia 'aba'abakia ha atana 'Eber' hauna herenai emai. Iuda haukia maeakia hanona atana Heberu. 'Iuda' 'ekana koihana.

#### HELENE

- hanona hano atana. Bariu hanona tiaparina Gris. Helene hanonai aiara apa'uana hanona atana Atene, haeamona Korinto aiarana abomo hano weiana aonai nemi-aho.

Helene maearimakia hanona marere harai haukia, ba ekia aobero paunai maearima ia temariki ainakia. Maearima bo'ona hanona Helene

haukia maeakia teona, abomo Iesu hanopakai emiaho aonai, marere harai haukia ikoikiai hanona Helene haukia maeakiai te'abi'abi. Popouna tohanai pou namona pukana neiana tererena hanona Helene haukia maeakiai tererena.

#### HEREME

- hanona tirama ha atana, ia hanona Helene haukia tekutiaina tiramana ha. Helene haukia ti'abi ia hanona tirama baika ekia iuhubeau hauna.

#### HERODA

- Pou namona pukana neiana aonai hanona maearima bani atakia hanona Heroda.

1. Kori'uaina hanona Heroda obia 'arana hauna. Ia hanona Iuda ekia obia 'arana hauna rani weiana Iesu hanopakai erama raninai. Ia mo neiana enuatae Iesu keahu'arina Iesu miorina aonai. (Mataio 2.2-22; Luka 1.5)

2. Ibaruana hanona Heroda Antipa. Ia hanona Helene haukia ekia obia hauna, rani weiakiai hanona Iesu eiroro mai bata'uta'u huri hoakia ebabai. Heroda mo neiana Herodia eatawana ba Ioane ba'uere robe hauna 'akona ekabena. Rani weianai Iesu tebahobona hanona teaoaina Heroda wairanai tebabakaina.

3. Ibaihauna hanona obia 'arana hauna atana Heroda Agripa apa'ua. Ia hanona Tirama ena marea kori'uaina aonai maearima weiakia Iesu Keriso tea'ikakauma haukia e'aotanakia. Ia ehore Ioane uaho'abana atana Iakobo eahu'arina. (Iuhubeau 12.1-23)

4. Iabanina abomo obia 'arana hauna atana Heroda Agripa pavana. Ia hanona Paulo ebabakaina ba euhuna eao Roma, weia Kaisa wairanai kebakai.

#### HOSANA

- hanona banamo 'abina, maearima ekia mariki hoana hau ha herenai hanona 'abi neianai hau weiana tibanamona. 'Abi anina hanona, 'Tirama ia mebamaurina,' 'ao 'ia'itaeana'.

#### I'ABANA HAUKIA

- Iesu i'abana haukia hanona maearima ikoinai weiakia Iesu tebatohana mai aiana teona haeamona aiana teka'aina. Iuhubeau

ekia aka pukana aonai Iesu i'abana haukia abomo atakia baika teapari, ihobona matoha, 'Iesu tia'ikakaumana haukia' mai 'uaho'abakia'.

Mataio, Mareko, Luka mai Ioane aokiai hanona Iesu i'abana haukia abomo robakia teahu, Neiakia hanona Iesu i'abana haukia harau haea rua ia kipona ea'i taeanakia haukia ia kipokia temiaho. Abomo ena iuhubeau haukia ebaonakia euhunakia ena aka tebabai, ihobona matoha Matai 10.1-4 aonai 'abanai.

#### IAKOBO

- ia atana ha hanona Isaraela. Ia nahuna hau ikoinai harau haea rua, ba ia hanona Isaraela itubuna harau haea rua mearimakia kupukia 'aba'abakia.

'Aberahamo' 'ekana koihana.

#### I'AUA ROBENA

- 'uaina 'akinai Isaraela maeariamakia hano'akunai tekaoao aonai, Tirama Mose ehinabena i'aua robena ha kebabaina. Aea kebabai aihona hanona paipana ikoinai eba'iohina. Weiana hanona habuni namona tohanai mai mahi parukiai, i'aua robena weiana aonai hanona Rauhuhu mauana weia aonai tehorotina. Maua aonai hanona pihara panabakia rua weiakia ahakiai hanona Tirama ena rauhuhu harau haea erere'aunakia haukia, haeamona taba robekia baika.

'Rauhuhu mauana' koihana.

Iuda haukia weia i'aua robena aonai Tirama tekuti aina, haeamona weiamo ekia baibeni mahikia tekinenakia Tirama tebanamona, eaomo Solomona Marea Robe mahamahana ebabaina.

I'aua tatuna

- 'Tatu' 'ekana koihana.

#### IEREMIA

- hanona Tirama ena mahabanai hauna ha. Ia ehore Keriso Bamauri hauna weiana Tirama e'abi'uai keuhuna kemai hauna, ena raninai taba taba katerama haukia robakia eahu 'uainakia ba muriai terama.

#### IESE

- hanona Davida obia 'arana hauna hamana, ia hanona Iesu Keriso kupana 'aba'abana ha. 'Uaina 'akina

mahabanai hauna atana Isaia ena rererere ai Keriso robana eahuna hanona etibaha 'Keriso hanona Iese mai Davida kupukia 'aba'abakia.'

#### IESU

- anina hanona 'Bamauri hauna,' 'ao 'Tirama hanona aika ibamaurika hauna.' Iesu atana baika neiakia; Iesu Keriso, Tirama Nahuna, Maerima Nahuna, Davida Nahuna.

#### INSENSE

- hanona muramura ha atana, timina hanona e'orimo wairai. Ia hanona matiu ha hohoe'anai tia'ina haeamona raunai mai ramunai abomo tia'ina. Marea robe aonai mearima Tirama tibahuba'ari bena aonai muramura neiana tekinena timina 'orimona nikara'au.

#### IONA

- hanona Tirama ena mahabanai hauna ha. Rani ha Tirama ia euhuna eao aiara apa'uana ha atana Nineba, Tirama ena 'abi weia kehinana. 'A Iona aunohi ha ahanai ehe'au keao 'eka haeai ha na ehoma ba aunohi weianai tibeau aonai Tirama ehore kou apa'uana ha euhuna e'abu'au. Aunohi haukia te'iohina, ua hanona Iona paunai kou apa'uana aonai tetoto, ua buonai Iona 'akuai tekapo uhuna. Maia apa'uana ha Iona etono 'auna, ba ia weia maia nuana aonai wapu aihau emiaho, epua maia apa'uaina eao poe ahanai Iona emama ahina. Weiana murinai Iona ehore Tirama aiana eka'ai eao Nineba weia Tirama ena 'abi eiroroaina.

#### IOSEPA

- Pou nomona aonai mearima atakia Iosepa hanona ebo'o bo'o.

1. Iosepa ha hanona Iakobo nahuna harau haea rua 'abakia ha.

Ia hanona Isaraela mearimakia kupukia 'aba'abakia. Iosepa neiana hanona Beniamina a'ana. (Iuhubeau 7.9-14; Ioane 4.5; Heberu 11.21, 22; Ibawairatina 7.8)

2. Iosepa ha hanona Maria atawana.

3. Iosepa ha hanona Iesu hatina ha atana. (Mataio 13.55; Mareko 6.3)

4. Iosepa ha hanona Iakobo a'ana. (Mataio 27.56; Mareko 15.40, 47)

5. Arimatea hauna ha atana Iosepa hanona kepu hauna.

Ia hanona Iuda maearimakia ekia rauhuhu te'uai aina haukia 'abakia ha. Ia hanona maearima namona ha, abomo Iesu murinai e'au. (Mataio 27.57-60; Mareko 15.42-46; Luka 23.50-53; Ioane 19.38-42)

6. Iosepa Basaba (Iuhubeau 1.23)

hanona Iesu i'abana hauna ha mai herenai emiaho. Rani ha Iuhubeau haukia tenuatae Iesu i'abana haukia ha katea'i taana Iuda (Iesu ehina hinaina hauna) 'ekana ke'aina, ba Iosepa neiana mai Matia baiatakiai tepu'i hanona Matia tea'itaana.

7. Baraba abomo teaparina Iosepa. (Iuhubeau 4.36)

#### IOSUA

- Mose e'ari murinai hanona Iosua ehore Isaraela maearimakia e'uai ainakia. Teao Kanana hanonai tekatoto, weiana hanona Tirama e'abi'uai Isaraela maearimakia kebenakia hanona. Maearima weia temiaho haukia teahunakia. Ba Iosua ehore hano weiana ewatena epua e'uahinakia itubu ha ha 'eukia, 'a Levi itubuna hanona hano ha'i ebenakia, Ia hanona robe haukia. Iosua hanona 'uai hauna apa'uana ha mai ia ehore maearima ehina benakia Tirama murinai kateka'a. E'abi etibaha, "Au mai e'u itu haukia kipokia hanona Tirama murinai kataka'a."

#### ISAKO

- hanona Sara mai Aberahamo ohi nahukia. Ata neiana Isako anina hanona 'iriri'. 'Aberahamo' 'ekana koihana.

#### ISAIA

- hanona Tirama ena mahabanai hauna apa'uana ha. 'Uaina 'akinai Iesu hanpaka ahanai a'i emiaho baha aonai hanona Isaia taba bo'okia Iesu herenai katerama haukia robakia eahu.

#### ISARAELA

- Tirama ehore Iakobo atana eaparina Isaraela. Iakobo hanona Isako atawana Rebeka ohi nahukia, ia hanona Esau ohi mo terama. Iakobo kupuna 'aba'abana eririaina hanona atakia teaparina Isaraela haukia, murinai teaparinakia Iuda

haukia, epua teaparinakia Heberu haukia. 'Iuda' 'ekana koihana. Ekia hano temiaho aina hanona atana Isaraela. 'Uainai atana hanona Kanana, bariu abomo tiaparina Palestine hanona.

#### ITARE

- Iuda maearimakia ekia hoahoai hanona nahukia miori papakia ikoikiai terama wapukia 'ababani hanona tetarenakia. Tirama Aberahamo ehinabena ua katebabai aiho. (Genese 17.9-14)

Itare hoana anina hanona, miori itare ea'ina hanona Iuda miorina. Mearima itare tea'ina hanona teaparinakia Iuda haukia. Rani weiana maearima pou namona teiroro aina raninai Iuda haukia baika te'abi, maearima weiana Iuda hauna aha'i, 'a nenuataea Keriso ena maearimai keao raninai, ia hanona itare kea'i 'uaina. Hoa neianai hanona ia aba Iuda haunai eao, ba weiana murinai hanona Keriso ena maearimai keao. 'A Paulo hanona 'abi neiana a'i enuatae aina, ba ena marere ererena eao Galatia haukia herekia mai hano haeai haukia herekia aonai neiana robana eahuna. E'abi etibaha, maearima kenuatae mauri kea'ina raninai taba hamona mo kebabaina, weiana hanona Iesu Keriso mo kea'ikakauma.

#### IUDA

- hanona Iakobo nahuna ha. Ia hanona Isaraela itubuna atana Iuda kupukia 'aba'abakia. Hano weiana ia kupuna 'aba'aba eririaina haukia temiaho aina hanona atana Iudea, hano weianai Ierusema nemiaho. Iesu hanona Iuda itubunai erama.

#### IUDA HAUKIA

- maearima weiakia tiaparinakia Iuda haukia hanona Aberahamo kupuna 'aba'abana. 'Aberahamo' 'ekana koihana.

Ata neiana 'Iuda haukia' hanona 'Maearima weiakia Iuda hanonai temiaho haukia.' weiana hanona Iuda itubuna haukia, itubu neiana hanona Isaraela itubuna harau haea rua 'abakia ha. Iamo muriai ata weianai Isaraela maearimakia teaparinakia. 'Isaraela' 'ekana koihana.



Ioane pou namona ererena aonai  
Iuda haukia ererena hanona Iuda  
ekia 'uai haukia e'uahinakia.

#### IUDA HAUKIA EKIA MAREA

- aiara ikoikiai Iuda haukia ekia  
hanoai hanona mai ekia marea.  
Neiana hanona ekia mia to'u  
'ekana, rani bo'okia 'ao Wapu  
robekiai hanona 'eka neianai temia  
to'u. Marea neiana aonai hanona  
Puka robena tetuabina, Tirama ena  
'abi abomo tiba'ioibiai, haemona  
tibahuba'ari, mai Tirama tibana-  
mona. Rani baika hanona neia  
tibakai.

#### IUHUBEAU HAUKIA

- Iesu ehore murinai ti'au haukia  
harau haea rua ea'i taeanakia ia  
kate'abana ena iuhubeau haukiai  
kateao. ( Mataio 10.1-4; Mareko  
3.13-19; Luka 6.12-16 )

Maearima weiakia hanona Ia herenai  
temiaho mai Ia ehore eba'iobinakia.  
Iesu e'ari ba amikiri mue hanona  
ia kipokia mahakia tohanai teihana.  
Ia hanona maearima weiakia Iesu  
tea'ikakauma haukia te'uai ainakia.  
Iuhubeau ekia aka pukana aonai  
hanona, Paulo, Banaba mai  
maearima baika abomo teapari-  
nakia iuhubeau haukia. Ia abomo  
Iesu eaparinakia euhunakia ena  
aka katebabaina haukia.

Kabanai tatuna.

- 'Tatu' 'ekana koihana.

#### KAINO

- hanona Adamu mai Eba nahukia  
miorina pakana. Ia hanona hatina  
hau i'irina atana Abela ewamuru  
aina, pokina Tirama ehore Abela  
mamoe ekinena baibeni tabanai  
ebaona hauna ea'itaeana, iamo  
Kaino batobato tabakia buakia  
baibeni tabakiai ebaonakia Tirama  
herenai haukia Tirama ehore  
ebaki'anakia paunai. Ua buonai  
Kaino ehore Abela eahu'arina.  
Neiana buonai Tirama e'abi, Kaino  
hanona hanopaka ahanai kearu  
'abaea aru 'abaea mai maearima  
ikoikiai hanona ia katebaki'ana.

#### KAISA

- hanona Roma maearimakia ekia  
obia 'arana haukia nipoki ainakia  
hauna. Roma maearimakia hanona  
hano bo'ona ekia huari haukia  
teahunakia ba Kaisa hanona

ikoikiai ekia obia hauna. Roma  
maearimakia ekia obia apa'uakia  
ua homakia hanona teaparinakia  
Kaisa.

#### KAMELA

- hanona mahi apa'uana ha weiana  
maearima tihore ahanai tehe'au  
hauna. Ia hanona puma rarikia  
nebuanakia. Rani baika Kamela  
buina tia'ina habuni kapena pahi-  
hina tibabaina. Kamela aubauba ha  
hanona puka neiana aonai kotabu  
ahina.

#### KANANA

- hanona hano weiana Tirama  
e'abi'uai ena maearima Isaraela  
haukia kebenakia ekia hanoai  
keao. Rani neiakiai hano weiana  
tiaparina Isaraela, 'a rani baika  
tiaparina Palestine.

#### KERISO

- Nao maeakiai Keriso mai Mesia  
hanona anikia teihobo. Keriso  
hanona Helene maeakiai 'a Mesia  
hanona Heberu maeakiai, ba 'abi  
anina hanona; 'maearima 'arana  
tehoru ai teheina hauna.' Neiana  
ena poki hanona, 'uainai Tirama  
maearima ha ea'i taeana Iuda  
haukia ekia Obia 'arana haunai  
keao hanona hau weiana 'aranai  
tehoru ai teheina ba ihaiha weianai  
hanona ia aba tea'i taeana Obia  
'arana haunai keao.

Tirama abomo e'abi'uai, Bamauri  
hauna ha keuhuna kemai, ba ia  
kehore ena maearima kebamaur-  
rinakia mai keaoainakia Tirama  
ena iha'ini ba'anai katemiaho.  
Maearima neiana atana hanona  
'Keriso', pokina Tirama ehore ia ea'i  
taeana mai euhuna hauna.

#### KERISO ENA MAEARIMA

- hanona piritani maeanai 'Christian',  
'a aika maeakai hanona Keriso  
ena maearima, ba anina hanona  
'Maearima weiana Iesu Keriso  
murinai ni'au hauna.'

#### KIA

- Maearima ha Tirama ena 'abi a'i  
nika'aina hanona ki'a nibabaina.  
Maearima wairakiai babai ua-  
homana hanona taba apa'uana 'ao  
papana re'a, Tirama wairanai ia  
hanona ki'a hauna.

#### KORA

- hanona maearima baika e'uai ainakia

Mose mai Arona te'oatanakia. Tirama eopuere wairai hano ebapa'ana Kora mai murinai ti'au haukia ikoikiai tetoa ehano abunakia.

## LEVI

- hanona Iakobo nahuna harau haea rua 'abakia ha. Iakobo nahuna harau haea rua weiakia Isaraela itubuna harau haea rua kupukia 'aba'abakia haukia. Levi kupuna 'aba'abana eriri aina hanona Tirama ehore e'uahinakia Marea robe aonai Tirama ena robe akakia mo katebabai. Levi itubunai hanona robe haukia tea'i taeanakia, ia hanona Arona ena itu haukia. 'Arona' 'ekana koihana.

Iesu i'abana haukia harau haea rua 'abakia ha hanona atana Levi. Ia atana abomo Mataio. (Mataio 9.9-13; Mareko 2.14; Luka 5.27-29)

## LOTA

- hanona Harana nahuna. Harana hanona Aberahamo hatina. 'Aberahamo' 'ekana koihana. Tirama e'abi'uai, hano mahamahana ha Aberahamo kebena, ba Aberahamo hano weiana itabuna eao hanona Lota abomo ia ohi teao. Hano weiana tekatoto murinai, rani ha hanona Lota eao Sodoma aiarana apa'uanai emiaho. Aiara weiana maearimakia hanona babai ki'a obokia bo'ona tebabai. Neiana buonai Tirama e'abi aiarana weiana kebapuputona.

Lota ena itu haukia kipokia aiara weiana tehabona, murinai Tirama ehore aiara weiana ebapururuna. Tirama ena aneru Lota ehinabena aiara weiana katehabona aonai a'i kateiha kabe. Iamo Lota atawana eiha kabe hanona biaimo hauanina epahihi pahih, kikimaru kaiba'ukunai eao.

## MAEARIMA NAHUNA,

- wa'i baha 'akinai mahabanai hauna ha atana Daniela ehore Tirama Bamauri hauna ha keuhuna kemai hauna robana eahuna aonai e'abi, Bamauri hauna hanona 'Maearima Nahuna'. 'Abi neiana anina hanona ihobona Keriso 'abana. 'Keriso' 'ekana koihana.

Iesu abomo kipona robana eahuna hanona ata neiana ehinana, Iesu kipona atana eaparina, 'Maearima

Nahuna', hanona netibaha Tirama hanona Ia euhuna mai Tirama herenai hiabu ea'ina. Ia hanona maearima, ia abomo Tirama.

## MAHABANAI HAUNA

- hanona maearima weiana Tirama herenai 'abi nia'ina ba nehina otaraina Tirama ena maearima herekiai hauna. Ia hanona Tirama atanai maearima nehina benakia. 'Uainai Tirama mahabanai haukia bo'okia euhunakia, matoha Samuela, Isaia mai Ieremia, Tirama ehore taba waira 'akinai katerama haukia mahabanai haukia herekiai ebawaira tinanakia.

Ihau bo'ona 'aki, Iesu hanopakai a'i erama baha aonai, mahabanai haukia tehore Iesu ena mai robana teahuna haeamona taba kebabai haukia mai herenai katerama haukia abomo tebawaira tinanakia.

Haeamona hanopaka ena wapu orekiai taba bo'ona keterama haukia robakia teahu. Weiana hanona Iesu a'i kemue baha hanopaka a'i kebabakai bahana aonai.

## MAMOE

- hanona mahi ha atana. Iuda haukia hanona rani weiakiai mamoe tebakori emaimo bariu mamoe tibakori oho. Puka neiana aonai mamoe aubaubakia koihanakia. Iuda haukia ekia mamoe 'ima paipakia hanona nahomakia;

a. Rani weiakiai maearima hamona hanona mamoe bo'ona 'aki ebakorinakia. Mamoe hanona aiarai mo a'i te'imanakia, teaoainakia 'eka tabakia tubu tebo'o hanona weia te'imanakia tubu teani.

b. Mamoe 'ima haukia hanona hano weiakiai ekia mamoe te'imanakia. Ia hanona mamoe te'iobi harainakia haukia, ekia mamoe teiha 'iobiainakia mai mamoe abomo ia aiakia te'iobi.

c. Mamoe 'ima hauna nihore mamoe parabuna ha nibabaina, ba rabi aokiai hanona mamoe ne'imanakia nirani. Haeamona parabu pa'abinai nenoti. Rani baika bainao hauna ha parabu huanai kerobo banai, mamoe ha a'i mebainao aina marikina.

d. Iuda haukia hanona mamoe tea'inakia, baibeni tabakiai tebaon-

akia, tekinenakia Tirama tebanamona. 'Tirama ena Mamoe Nahu' koihana.

#### MANA

- 'uaina 'akinai Isaraela maearimakia Aikupitoai tekarahi hanona ihau bariabui (40) hano'akunai tearu 'abaea aru 'abaea. Rani weianai hanona Tirama ehore aniani ebena. Aniani weiana hanona atana 'mana'. Aniani neiana hanona wapu ikoinai hanona kupai e'eho emai 'ano, iamo ekia kuti wapuna hamona Wapu robena hanona aniani a'i te'eho. Maearima teao ekia aniani tea'inakia. Aniani neiana hanona Esodo 16.13-36 aonai robana eahuna.

#### MAREA ROBE

- hanona Isaraela aonai aiara apa'uana atana Ierusalemia ua'a nemiaho. Iuda haukia tiao 'eka weianai tatu apa'uakia tiaonamo ainakia mai ekia beruberu mahikia tekinenakia haeamona ekia baibeni Tirama herena tabakia tiaoinakia weia.

Maearima weiakia Iuda haukia aha'i hanona ikaihuri kapeai hauna aonai titoto. Marea aona 'akinai hanona Tirama ena taba robekia tihorotinakia, robe haukia 'arakiai hauna mo ikupaiana nitoto 'eka weiana aonai, ihau hamona aonai hanona rani hamona mo nitoto. I'aea huri habunina apa'uana imukina ha hanona Erobe Ki'a baha 'Ekana weiana ikatotona 'ekana e'aea abuna. Iesu e'ari hanona i'aea huri habunina mo neiana huanai etapa, 'ubiai ea'i ramana eaomo ba'ai epua. (Mataio 27.51; Mareko 15.38; Luka 23.45). Ihaiha neiana erama hanona rani weianai Tirama ehore taeara ha aba ea'ikauna. Weianai maearima Iesu Keriso tia'ikakaumana haukia kateao Ia herena.

Marea robe ibarobena tatuna.

- 'Tatu' 'ekana koihana.

#### MATIU IBIRIROPO

- Roma ekia hoahoa aonai maearima ha aka ki'a obona ha ehabaina, ihobona eahu ahu 'ao bainao akana ki'a obona ehabaina hauna ena puma katebahoaina hanona matiu ibiri ropo ahanai kateba'arina.

Matiu rua tia'inakia tebiri roponakia ba babai ki'a hauna hanona weia matiu ibiriropo ahanai tikoko 'auna, 'ao waroai tebiri 'auna. Nepua hanona matiu ibiriropo tibakorotina ba maearima weiana hanona weia matiu ibiriropo ahanai tihabona nemiaho niaomo ni'ari. Maearima matiu ibiriropo 'arunai na tikoko 'au aihona hanona nihaiara ki'a baha ba ni'ari. Hoa nahomana hanona haumaea hoana tohana.

#### MELKISEDEK

- hanona a'i naha'iobi haraina, 'a Heberu iro'ana 5 eao 7 aonai hanona ia robana teahu 'apuanai. Haeamona puka 'ai'aina Genese 14.17-20 aonai tererena. Rani ha 'ou haukia temai Aberahamo uana Lota mai ena itu haukia kipokia tea'ina. Ena taba ikoinai abomo ea'inakia. Ba Aberahamo eao 'ou haukia neiakia ehuarinakia ba eahunakia. Epua Lota mai ena itu haukia kipokia ebamaurinakia, ekia taba ikoinai abomo tea'imuenakia. Aberahamo nemue aonai, taeara huanai Melkisedek ohi te baitabu ahi.

Melkisedek ehore Aberahamo parawa mai waini ebena epua ebanamona, ahanai ehaba'ari weiana Tirama kehore ia kebanamona. Ba Aberahamo ehore taba weiakia huariai ea'inakia tabakia ewatenakia paipa harau haea aokiai paipa ha ha ea'itaeanakia Melkisedek ebena. Ba weiana murinai emaiaina hanona Isaraela maearimakia tehore ekia taba tewatenakia paipakia harau haea aokiai paipa ha ha tea'i taeanakia ekia robe haukia tebenakia.

Ua buonai Heberu haukia tetibaha Melkisedek hanona robe hauna ha. Iamo Tirama e'abi robe haukia hanona Levi itubunai kateaitaeanakia. 'A rani weiana Aberahamo Melkisedek ohi te baitabu ahi aonai Aberahamo kupuna Levi hanona a'i erama baha. Ua buonai Heberu pukana aonai tetibaha Aberahamo ehore ena taba ewatenakia paipakia harau haea aokiai paipa ha ha ea'i

taeanakia Melkisedek ebena, ba weiana ihaihana hanona matoha Levi itubuna haukia abomo ekia taba tebaibeni, pokina ia hanona muriai Aberahamo aonai terama haukia.

## MIRA

- hanona muramura ha atana, ba kahakawakawaina hanona 'arana eapa'ua ki'a, timina hanona e'orimo wairai. Ia hanona matiu ha hohoe'anai tia'ina. Iuda haukia hanona muramurai tibaona, weianai maearima tibaparua reana, a'i mehaiara ki'a paunai. Abomo muramura neiāna tia'ina maearima aba te'ari haukia hauanikia tiba'orunakia ba tihorenakia.

## MOSE

- hanona Isaraela maearimakia ekia 'uai hauna apa'uana ha. Rani weianai Isaraela maearimakia Aikupitoai ta'ara tea'i aonai Tirama ehore Mose ea'itaeana Isaraela maearimakia ke'uai ainakia Aikupito hanonai katekarahi katemue kateao hano weiana Tirama e'abi'uai kebenakia hanonai katemiaho. Tirama hanona ihaiha apa'uanai ha ewaira tina, Mose ohi tebaitabu ahi. Mose mahana eao matiu ha mai irubana eiha tinana, iamo matiu weiana hanona a'i e'ara obo. Ba Mose e'iohina Tirama hanona aba weia. Tirama weia Mose eba'iohina ia hanona aba ea'itaeana keao ena maearima Aikupito hanonai ke'uai ainakia katemue kateao ekia hano tohanai.

Tirama ehore Mose imanai taba haeai haeai ebawaira tinanakia. Rani ha Aikupito haukia tehore Isaraela maearimakia teu'unakia, teao ate apa'uana ha atana 'Aku Birona'. Tirama ehore ate weiana ena aru eba'orona, bei ebapa'a boana weiana Isaraela maearimakia ekia taeara eba'orona, hano 'ororonai tekabanai, tekabanai murinai hanona Aikupito haukia tebahobo katekabanai, iamo bei haeamona eharu mue ikoikia ebatono 'arinakia.

Tirama ena rauhuhu Isaraela maearimakia 'eukia hanona Mose herenai ebaibeni. Rani ha hano'akunai

temiaho aonai Mose ehore oeo ha atana Sinai ahanai ekara'au eao weia kemiaho 'apua mai kehabuha'ari Tirama herena weia Tirama kipona Mose herenai ewaira tina ba ena rauhuhu Mose ebena, abomo Tirama ena rauhuhu apa'uakia ikoinai harau haea hanona pihara panabakia rua ahakiai erere'aunakia. Pihara neiakia hanona Marea Robena aonai robe 'ekanai ua'a tehorotinakia. Tirama ena rauhuhu weiakia Mose ebena hanona puka robena aonai. Puka 'ai'aina aonai puka kori'uaikia ima (5) hanona atakia Mose ena puka. Pukakia hanona, Genese, Esodo, Levitiko, Numera mai Deuteronomi. Haeamona puka atana Rauhuhu abomo.

## NAMANA

- hanona huari haukia ne'uai ainakia hauna ha atana. Ia hanona Suria hauna. Ia hanona Iuda hauna aha'i. Ia huari poki hauna apa'uana ha, iamo hauaninai inawa atana morumoru ea'ina. Rani ha eao mahabanai hauna atana Elisa herenai, ba enoina ena inawa kebanamona. Iamo Elisa ia ehinabena keao Iordidane atenai rani ikoinai 'abaihau hamomo ke'uere. Namana eao ua ebabai aiho hanona hauanina maikoina enamona.

## NADO

- rani ha babi'e ha ehore tehoro ha emaiaina Iesu aena keutuna. Tehoro neiāna hanona taba ha atana nado ai tebabaina, ba ia hanona matiu atana spikenado hohoe'anai tia'ina.

## NINEBA

- hanona aiara apa'uana weiana Tirama ehore Iona euhuna keao ena 'abi keiroroaina aiarana. 'Iona' 'ekana koihana.

Tirama e'abi Nineba aiarana kebauputona pokina babai ki'a obokia tohakia tebabai paunai. Nineba maearimakia pou neiāna teona raninai tehai mai teraona kabe. Na tebabai aiho paunai Tirama ekia ki'a ehina hao mai a'i ebapuputonakia.

## NOA

- hanona aba 'uaina 'akina tohanai emiaho hauna. Adamu hau



kori'uaina kupuna 'aba'aba eriri-  
aina emai iba'ababani hamonai  
hanona Noa erama.

Noa ena raniai hanona hanopaka  
maearimakia ikoikiyai babai ki'a  
obokia bo'ona tebabai. Ua buonai  
Tirama e'abi tou rarina 'akina  
ketiuahina, hanopaka ketou 'auna,  
maearima mai hanopaka tabakia  
ikoinai kebabururunakia. Iamo  
Noa hanona maearima namona  
mai Tirama aiana eka'aina hauna.  
Ua buonai Tirama Noa ehinabena  
aunohi rarina 'akina tohana ha  
kebabaina, abomo Tirama ehore  
Noa eba'iohina taeara tabai aunohi  
kebabaina. Epuia Tirama Noa  
ehinabena atawana mai nahuna  
hau aihau atawakia kipokia aunohi  
ai katehe'au haeamona mahi mai  
roborobo haeai haeai baiatakiai  
koa ha mai 'one ha kebaehe 'au-  
nakia, 'a mahi baiatai baika hanona  
koa 'abaihau hamomo mai 'one  
'abaihau hamomo keuta 'aunakia.  
Noa Tirama ena 'abi ea'ikakaumana  
paunai taba ikoikiyai Tirama  
e'uahinakia haukia akakia tohakia  
ebabai. Noa ena maearima kipokia  
aunohiai tekatoto murinai, Tirama  
ehore abara pumana tohana ebatibona,  
tou rarina 'akina ekarahi, oeo  
abomo ebahuabunakia. Hanopaka  
maearimakia ikoikiyai tetono te'ari  
ore, ia Noa mo ena itu haukia  
kipokia hanona temauri. Nawa  
bo'ona tekabanai murinai tou  
eriri, bei eo'o. Hanopaka e'ororo  
mue. Noa ena itu haukia kipokia  
aunohiai tekarahi. Ba Noa beru-  
beru ha ebabaina Tirama 'euna  
pokina ebamaurinakia paunai.  
Tirama e'abi'uai tou ha uahomana  
a'i kebakarahi muena hanopaka  
ahanai, haeamona e'abi 'opa  
hanona ia ena 'abi'uai hoana, rani  
weiana keaoaina hanona rabi mai  
mararani katemiaho, 'ama ranina  
mai hiabu ranina, haeamona abara  
ranina mai hano ke'ororo ranina,  
abomo eueu mai ariari ranina.

#### OLIBE

- hanona matiu ha atana. Matiu  
neiana hanona mai buabuana.  
Ihana hanona matoha tuaba  
matiuna 'abana iamo rauna hanona

papakia beroberokia. Puka neiana  
aonai olibe matiuna aubaubana  
koihana.

Iuda haukia olibe buabuana tia'ina  
tehoro tibabai. Tehoro weiana  
tea'ina tekai'au kai'auaina hae-  
mona aka bo'ona haeai haeai  
tebabai. Iuda ekia mauri aonai,  
olibe tehorona hanona taba  
apa'uana. Olibe oeona hanona  
Ierusalem herenai oeo ha atana.  
Oeo weiana haunai hanona olibe  
matiukia ti'omu.

#### OMEGA

- 'Alepa' 'ekana koihana.

#### PARADISO

- anina hanona 'uma namoabuna'.  
Maearima 'eka namoabuna weiana  
Eden aonai hanona atana tiaparina  
Paradiso. Hanopaka ia'iramanai  
hanona Tirama Adamu mai Eba  
ohi ua'a ehorotinakia. Pou  
namona neiana aonai Paradiso  
robana eahuna hanona ihobona  
kupa aiarana 'abana. 'A kupa  
aiarana hanona 'eka namoabuna,  
maearima weiakia Iesu Keriso  
ti'aikakauma haukia hanopaka  
neianai kate'ari murinai hanona  
kateao 'eka weiana.

#### PARAO

- hanona Aikupito ekia obia 'arana  
haukia nipoki aina hauna. Aikupito  
ekia obia 'arana haukia tepoki-  
ainakia haukia ikoikiyai hanona tea-  
parinakia Parao.

Parawa ibakupu aha'i tatuna

- 'Tatu' 'ekana koihana.

#### PARISEA

- haukia hanona maearima apa'uakia  
baika Iuda haukia baiatakiai. Ia  
hanona rauhuhu poki haukia  
kipokia tiaka hamomo. Rauhuhu  
poki haukia hanona rauhuhu  
tiba'iohiaina haukia. Ba rauhuhu  
weiakia Tirama ehore Mose ebena  
haukia te'iohi harainakia, iamo  
Tirama ena rauhuhu ahakiai  
kipokia ekia hoahoa mai rauhuhu  
baika tihore 'aunakia. Rani bo'ona  
tiapa pokina tiraonana ia hanona  
tenamo ki'a baha ba maearima  
baika. Ia hanona tebabai matoha  
maearima namokia. Iamo ekia  
raonaraona hanona teki'a. Mataio  
iro'ana 23 aonai Iesu Parisea haukia  
robakia eahuna haeamona eapari-

nakia 'bahaorea haukia'. Parisea haukia hanona Iesu te'oatana haeamona taeara tetabu kateahu'arina na tehoma.

Pentikose tatuna

- 'Tatu' 'ekana koihana.

PIHARA NAMOABUKIA

- Ibawairatinana 21: aonai hanona Ioane aiara robena mahamahana eihana hauna robana eahuna. aiara weiana e'aeana hanona pihara namoabukia ikoinai harau haea rua ai ena kori'ini 'ekana tebabaina. Pihara haeai haeai neiakia ikoinai harau haea rua hanona pihara namoabukia, te'imare'imare ihakia haeai haeai.

Pihara haeai haeai ikoinai harau haea rua atakia neiakia.

1. Daiamond

- hauna eiroro.

2. Sapaia

- hauna epurutoni.

3. Kalakedo

- hauna e'apuro.

4. Emerald

- hauna ekupa.

5. Sadonu

- hauna ebirobiro.

6. Rubi

- hauna ebiro.

7. Krusolito

- hauna ewaima.

8. Berulio

- hauna ekupa.

9. Topasio

- hauna eiroro.

10. Krusoparaso

- hauna ekupakupa.

11. Huakinto

- hauna epurutoni.

12. Ametuso

- hauna e'apupu.

RAHABA

- 'uaina 'akinai Isaraela maearimakia tebahobo hano weiana Tirama e'abi'uai kebenakia hauna aonai katekatoto na tehoma hanona ekia ihaihapai haukia teuhunakia teao hano weiana aonai teihana. Ba ekia 'ou huakia hano weianai aea kateahu aihonakia taearakia teba'oruna. Rahaba hanona rea babi'ena ha hano weianai emiaho. Isaraela ekia ihaihapai haukia weia tekara'au raninai ebarainakia mai ebapihinakia, pokina aonai e'iobi

tohana Tirama ena nuataea hanona ena maearima Isaraela haukia katehore hano weiana katea'ina. Ua buonai Isaraela haukia tehore aiara weiana maearimakia ikoikiai teahu'arinakia, iamo rea babi'ena weiana hanona a'i teahuna. Ia hanona babi'e mo weiana atana puka robena aonai tererena, Mataio 1.5. Iesu kupuna 'aba'abana ha.

RAHELA

- hanona Iakobo atawana ha atana. Iakobo hanona atawana neiana eraona'auai ki'a bahana. Rahela hanona Iosepa mai Beniamina hinakia. Ia hanona Iuda maearimakia ikoikiai hinakiai tibaona.

RAMA HAEAI HAUKIA

- hanona Iuda haukia aha'i. Helene haukia maeakia 'abi neiana tehinana anina hanona 'hano ikoikiai' ba weiana anina hanona hano ikoikiai hanopaka ahanai, iamo Iuda haukia aha'i. Iuda haukia hanona teapa wairai pokina Tirama hanona ia etina'anakia ena maearima tohakiai kateao, ba ia hanona hano haeai haukia 'arikia a'i te'ari.

RAONA KABE

- anina tohana hanona;  
a. Maearima ne'iohina ia hanona ki'a hauna Tirama wairanai.  
b. Ba aona tohanai ni'abi ena babai ki'a maurina kehabona, iamo Tirama ena nuatae maurinai ke-mauri.  
c. Haeamona Tirama ninoina ena ki'a ikoikiai kehina haonakia.

RAPI

- hanona ata weiana, Iuda haukia tihore baiatakia ba'iobi hauna apa'uana 'ao 'uai hauna apa'uana hanona atana tiaparina 'rapi'. Maearima apa'uakia 'ao aobero haukia hanona tiaparinakia 'rapi'. Ata neiana 'rapi' hanona ihobona 'raboni' 'abana. 'Abi anikia hanona hamona.

RAUHUBU

- Tirama ena rauhuhu hanona puka robena 'ai'aina aonai puka kori'uaikia ima. Neiakia hanona Tirama ena rauhuhu Mose herenai ebawaira tinanakia ena maearima 'eukia.

RAUHUBU MAUANA

- maua neiana hanona matiu ai tebabaina ba gold ai hauna maikoina temaka kaiarona. Aonai hanona pihara apa'uakia panabakia rua weiakia ahakiai Tirama ena rauhubu harau haea erere 'aunakia haukia. (Heberu 9.4, 5) Isaraela haukia hano'akunai teharima aonai maua neiana tebuana teka'a aina, mai Tirama ena itu robena aonai tehorotina, maua neiana aona tabakia hanona terobe wairai pokina weiakia hanona Tirama ena 'abi'uai rauhubuna ibabataina.

#### RAUHUBU POKI HAUKIA

- hanona maearima weiakia Tirama ena rauhubu weiakia Mose ebena Iuda haukia 'eukia haukia maearima tiba'iohinakia. Ia ti-hore taba weiakia Mose ena puka ima aokiai ererenakia haukia tiba'iohia. 'Rauhubu' mai 'Mose' 'ekana koihanakia.

#### REBEKA

- hanona Isako atawana, Isako hanona Aberahamo nahuna. Rebeka hanona Esau mai Iakobo hinakia. Ia terarua hanona miori bai'apaea terama, Esau hanona erama 'uai, iamo Tirama Iakobo ea'itaeana ke'uai, ba ia haunai Iuda haukia terama. 'Esau' mai 'Iakobo' 'ekakia koihanakia.

#### ROBE HAUKIA

- hanona maearima weiakia Tirama ea'itaeanakia robe akakia katebabai. Ia hanona Isaraela maearimakia atakiai beruberu mahikia 'itara robena ahanai tekinenakia Tirama tebanamona, Iesu ena rani ai hanona ekia aka neiakia Marea robe aonai tebabainakia, Ierusalem. Robe haukia hanona Arona kupuna 'aba'abana eriri aina haukia, haeamona Levi itubuna haukia. 'Arona' mai 'Levi' 'ekakia koihanakia.

Robe haukia 'arakuha hauna

- hanona maearima apa'uana tohana robe haukia ikoikiai baiatakiai. Robe hauna ha tia'itaeana robe haukia 'aranai niao ihau hamona aonai. Marea robe aonai ikaihuri weiana, atana "Eka Robena Tohana' aonai hanona robe haukia 'arakuha hauna mo iku-

paiana nitoto. Ihau hamona aonai hanona rani hamona mo nitoto niao beruberu akakia nibabai Tirama herena, weiana Tirama kehore ia mai Isaraela maearimakia ikoikiai tebabai ki'a haukia ekia ki'a kehina haonakia paunai.

#### ROMA

- hanona hanopaka atana Italia ena aiara apa'uana. Iesu hanopakai emiho aonai, Roma haukia tehore hano bo'ona haukia teahunakia mai tepoki ainakia, Isaraela abomo tepokiana. Neiana buonai Isaraela haukia hanona Roma haukia 'arukia a'i te'ari, tenuatae ekia hanoai kateu'u ahinakia. Roma ekia obia 'arana hauna teaparina Kaisa hanona obia 'arana hauna apa'uana hanopaka aonai rani weianai.

#### SADUKEA

- haukia hanona Iuda haukia baiatakiai maearima apa'uakia baika to'ukia. Ia hanona maearima tibamarerenakia Tirama ena rauhubu weiakia Mose ebena haukia kateka'ainakia, mai Iuda ekia hoahoa abomo kateka'ai harainakia. Ia hanona ihobona Parisea haukia 'abakia. 'Parisea' 'ekana koihana. Iamo rani bo'ona Sadukea haukia hanona Parisea haukia kipokia ti'abi baitaeai, pokina Parisea haukia ekia a'ikakauma hanona maearima ha ke'ari murinai hanona mauri mahama-hanai kemauri mue, ia Sadukea haukia hanona 'abi weiana a'i tia'ikakaumana.

#### SALAMO

- pukana hanona Tirama ibanamona huikia pukana. Davida mai 'abana baika ekia raona'au Tirama herenai huikia mai Tirama ibanamona huikia tererenakia.

#### SALPA

- hanona pihara 'a'aeabuna ha. Ni'ara raninai nehiabu wairai, niea ki'a haeamona timina epahihi ki'a.

#### SAMARIA

- hanona 'eka ha atana. Samaria haukia hanona Iuda haukia tohakia aha'i pokina 'uaina 'akinai hanona rama haeai babi'ekia teatawanakia. Iuda haukia hanona ia 'arukia a'i te'ari.

## SAMSON

- hanona Iuda ekia 'uai hauna ha aba ua'i baha 'akinai. Tirama ehore tabura rarina 'aki ebena. Samson hauaniai hanona etabura ki'a.

## SAMUELA

- hanona mahabanai hauna apa'uana ha. Ia ehore Davida 'arana tehoru ai eheina ebarobena obia 'arana hau-nai keao. Ia hanona maearima ekia 'uabi hauna apa'uana ha.

## SARA

- hanona Aberahamo atawana. Ihau bo'ona 'aki hanona miori ha'i ebaramana, iamo aba eanepaka hanona Isako ebaramana. 'Aberahamo' 'ekana koihana.

## SATANI

- hanona auba ki'a obokia ne'uai ainakia hauna. Ia hanona Tirama ni'oatana, ua buonai maearima ni'oi ahinakia, ena nuatae hanona patebabai ki'a. Ia nihore maearima Iesu tia'ikakauma haukia rani ikoinai ekia ki'a nibaraonanakia, na nibabai aiho pokina ena nuatae hanona a'ikakauma haukia kateraona Tirama ekia ki'a a'i nehinahao. Satani atana abomo 'tiaporo', hanopaka neiana obiana.

## SINAI

- hanona oeo ha atana. Oeo mo neiana kaipanai Tirama ena rauhubu Mose ebena Isaraela maearimakia 'eukia. 'Mose' 'ekana koihana.

## SINAPI

- hanona matiu ha atana, nao maeanai hanona 'mustard', ia uhona hanona papakia 'aki, 'a ke'omu raninai keapa'ua ki'a matoha matiu 'abana. Ihaihana hanona matoha tuaba 'abana.

## SINEMON

- hanona matiu ha ai tibabaina. Timina e'orimo wairai mai tekawakawaina hanona 'arana rarina 'akina rani weianai. Maearima sinemon tia'ina tehoru kipokia tibahaeamonakia, tehoru timina iba'orimona paunai, ba tehoru weiana tea'ina maearima 'araki ai teheina, ia'itaea hoana, mai rani baika hanona 'ari 'ekakiai teakainakia.

## SIONA

- oeo weiana ahanai Ierusalemia nemiaho hanona atana Siona. Marea robe hanona oeo weiana ahanai

nemiaho, haeamona Ierusalemia aiarana aonai 'eka weiana hanona erobe ki'a baha. Rani baika Ierusalemia maikoina abomo tiaparina Siona.

Rani baika hanona Ierusalemia kupai nemiaho hauna atana tiaparina Siona, weiana hanona kupa aiarana te'uahina. Ba weiana anina hanona Tirama ena miaho 'ekana. (Heberu 12.22; Ibawaira tinana 14.1)

## SODOMA

- hanona aiara apa'uana ha atana. Lota hanona weia emiaho. 'Lota' 'ekana koihana. Aiara apa'uana ha weia Sodoma herenai hanona atana Gomora.

Sodoma mai Gomora maearimakia hanona babai ki'a bo'ona tebabai, ua buonai Tirama ehore irubai aiara neiakia rua ebapururunakia.

## SOLOMONA

- hanona Davida nahuna. Ia hanona Isaraela maearimakia ekia obia 'arana hauna apa'uana ha.

Rani ha Solomona ena nibiai Tirama emai ia herena ba ebakaina ena nuatae beruberuna hanona taba Tirama ia kebena. Ba Solomona Tirama enoina aobero kebena, weianai ena maearima ke'uai ai harainakia. Ba Tirama ehore Solomona aobero apa'uana ebena. Ia hanona obia 'arana haukia ikoiki ai ekia aobero 'arana haunai eao. Tirama abomo Solomona kepu apa'uana ebena weiana Solomona hanona kepuai eobia ki'a.

Solomona ehore Marea robe kori'uaina ebakorina. 'Uainai Iuda haukia hanona I'aua robena tebabaina, weianai Tirama tekutiaina. Marea robe neiana hanona ihana enamo waira 'akinai.

## SUKU

- hanona matiu ha atana, nao maeanai hanona 'fig', buabuana hanona ekuma wairai.

## TATU

- Iuda haukia hanona ihau hamona aonai tatu apa'uakia baika tibabai tatu neiakia tibabainakia raniki ai hanona Tirama ena banamo mai taba baika aba 'uainai ia hereki ai ebabainakia haukia tiraonanakia. Tatu baika atakia hanona neiakia; Marea robe ibarobena tatuna



- Tatu neiana hanona Iuda haukia maearima ha atana Iuda Makabi tiraonana. Ia hanona aba ua'i baha 'akinai Tirama ena Marea robe ea'ia'i haraina, eba'oruna weiana maearima weia Tirama katekutiaina paunai. Aka weiana ebabaina pokina ekia 'ou haukia mai waira mahamahakia marea aonai tetoto Marea robe tea'i ki'ana paunai. Iuda haukia abomo tatu neiana teaparina 'Ea tatuna'. Ua buonai Iesu e'abi etibaha, "Au hanona hanopaka ena ea." (Ioane 9.5)

#### Kabanai tatuna

- hanona Iuda haukia ekia tatu apa'uana tohana ha. Tatu neiana aonai hanona Iuda 'uaina 'akinai Aikupitoai ta'ara tea'i ba aea tekaobo aiho hauna tiraonana. Rani weianai hanona Tirama ena aneru euhuna eao Aikipito haukia ekia itu ha ha aokiai etoto nahukia pakakia mo ikoikia eahu'ari orenakia. Iamo Tirama Iuda haukia ehina benakia ekia itu ha ha aokiai mamoe nahu teahu 'arinakia ba ararukia tea'inakia ekia pa'abi hoborokia tetaronakia. Ba aneru aruaru eihana hanona itu 'ubinai ekabanai, iamo miori weia ha'i eahu 'arina.

Ua buonai Kabanai tatuna raninai hanona itu ha ha aokiai mamoe nahu tiahua'arinakia tianiani haemo.

#### Parawa ibakupu aha'i tatuna

- hanona Kabanai tatuna kipokia rani hamona tibabaina. Pokina 'uaina 'akinai Iuda haukia tenoanoa Aikupito ai katekaobo aonai parawa kate'ima kekupu ba katekinena hanona ranina aha'i. Ua buonai tatu neiana aonai hanona Iuda haukia tihore parawa ibakupu aha'i hauna tiani.

#### I'aua tatuna

- hanona Iuda haukia tiaonamo pokina eueu mai ariari ranikia hanona aba teore paunai. Tatu weiana aonai hanona

i'aua tibabai ba weia ba'akiai temiaho hui hamona, ua tibabai aiho hanona kupukia 'aba'abakia 'uaina 'akinai hano'akunai tearu 'abaea aru 'abaea ihau bariabui (40) murinai hanona Tirama 'abi'uai hanona ebenakia hauna aonai tekatoto hauna tiraonana.

#### Pentikose tatuna

- hanona Iuda haukia ekia tatu apa'uana ha. Ata weiana 'Pentikose' anina hanona 'imabui (50)'. Iuda haukia ekia tatu neiana hanona Kabanai tatuna murinai wapu imabui tikananai hanona titatu.

Pentikose tatunai hanona Iuda haukia witi iarina tiaonamo aina. Abomo 'uaina 'akinai Tirama ena rauhuhu Sinai oeona 'ubina Mose ebena Iuda haukia 'eukia hauna abomo tiraonana. Rani neiakiai Pentikose raninai hanona Keriso ena maearima tihore rani weianai Auba Robe eriri maearima weiakia Keriso tia'ikakaumana haukia ahakiai hauna tiraonana.

#### TIRAMA ENA MAMOE NAHU

- Ioane 1.29, 36 aonai hanona Ioane ba'uere robe hauna ehore Iesu atana eaparina, 'Tirama ena Mamoe Nahu'. Iuda haukia ekia hoahoai hanona mamoe nahu tiahua 'arina ba beruberu tabanai tibaona tekinena Tirama herena, weianai Tirama ekia ki'a kehina hao paunai. Mamoe nahu aruaruna nihore ia nibarobenakia mai nibamahama-hanakia Tirama wairanai.

Iesu hanona Tirama ena Mamoe Nahu, pokina kipona ena mauri beruberu tabanai ebaona, matiu ibiri ropo ahanai teahu'arina, weianai Tirama kehore aika eka ki'a ikoikiai kehina hao paunai.

#### 'UERE ROBE

- Pou namona aonai tererena hanona Ioane ehore mearima bo'ona Ioridane atenai eba'uere robenakia. Ehina benakia ekia ki'ai kateraona kabe ba ke'uere robe, ba maearima ikoinai kate'iohina ia hanona aba teraona kabe.

Maearima Iesu Keriso tia'ikakauma haukia baiatakiai, 'uere robe hanona ihaiha weiana maearima kebaihanakia, 'uere robe ea'ina

hauna hanona Keriso ena maearima.  
Ba'uere robe anina hanona na homana;

1. Maearima weiana 'uere robe ea'ina hauna hanona kipona ena ki'a ai aba eraona kabe.
2. Ia hanona Iesu Keriso nia'ikakaumana, Iesu hanona maearima weiakia Ia tia'ikakaumana haukia ekia ki'a nehina hao hauna, ua e'abi'uai aiho.
3. Maearima weiana 'uere robe ea'ina hauna hanona nenuatae Iesu Keriso murinai ke'au mai aiana keka'aina.

#### WAPAEA

- Nao maeanai hanona tiaparina 'hisop'. Robe haukia tihore neiana tia'ina aruaru 'ao bei ai tihao utuna ba maearima 'ao ekia taba baika 'ubikia tia'i baure baurena, beibeina ni'eho, ua tibabai aiho hanona Tirama wairanai barobe akana tibabaina.

#### WAPU ROBENA

- hanona Paraita wapuna mai Hui wapuna ohi baiataki ai hauna wapuna

weiana nahaparina Tatate. Genese pukana aonai tererereha hanona Tirama wapuna ikoinai 'abaihanu hanona hanopaka ehabaina, epua wapuna iba'abaihanu hamomona hanona earai pokina ena aka hanona eore paunai. Tirama e'abi maearima ikoiki ai hanona hui hamona ena wapuna kori'uaikia 'abaihanu hanona ekia aka katebabai, iamo wapuna iba'abaihanu hamomona hanona katearai mai Tirama katekutiaina.

Iuda maearimakia ekia Wapuna robena rauhubukia hanona ebo'o. Tetibaha wapuna weianai hanona maearima aka ha a'i katebabai 'apuana, ba maearima rauhubu weiana tekabena hanona teopuere wairai. Ua buonai Iesu ehore inawa hauna ha Wapuna robenai ebanamona, mai Iesu i'abana haukia Wapuna robenai witi temutunakia kateani hanona Iuda haukia teopuere wairai. Te'abi weiakia hanona aka.